

# हरियाणवी बाइबिल

## The Open Haryanvi Bible

This Bible is copyrighted by Free Bibles India and made available under a Creative Commons Attribution-ShareAlike 4.0 International License. Original work available at <http://www.free-biblesindia.com>. )

This Bible is provided at the cost of printing by the Digital Bible Society (dbs.org). This Bible, and many others, are available for free download in a variety of digital formats at [dbs.org/bibles](http://dbs.org/bibles).

मत्ती.....	4
मरकुस .....	21
लूका .....	35
यूहन्ना .....	56
प्रेरितों के काम .....	72
रोमियों.....	92
1 कुरिन्थियों .....	101
2 कुरिन्थियों .....	109
गलातियों.....	115
इफिसियों .....	118
फिलिप्पियों.....	121
कुलुस्सियों .....	123
1 थिस्सलुनीकियों .....	125
2 थिस्सलुनीकियों .....	127
1 तीमुथियुस.....	129
2 तीमुथियुस.....	132
तीतुस .....	134
फिलेमोन.....	135
इब्रानियों .....	136
याकूब.....	142
1 पतरस .....	145
2 पतरस .....	147
1 यूहन्ना.....	149
2 यूहन्ना.....	152
3 यूहन्ना.....	153
यहूदा .....	154
प्रकाशित वाक्य.....	155

# मत्ती

## यीशु की पीढ़ी

(लुका 3:23-38)

1 अब्राहम की ऊलाद, दाऊद की ऊलाद, यीशु मसीह की पीढ़ी।  
2 अब्राहम तै इसहाक जण्या, इसहाक तै याकूब जण्या, याकूब तै यहूदा अर उसके भाई जण्ये, 3 यहूदा अर तोमार तै फिरिस, जोरह जण्ये, फिरिस तै हिस्त्रोन जण्या, हिस्त्रोन तै एराम जण्या, 4 एराम तै अम्मीनादाब जण्या, अम्मीनादाब तै नहशोन, अर नहशोनतै सलमोन जण्या, 5 सलमोन अर रहाब तै बोअज जण्या, बोअज अर रुत तै वोबेद जण्या, अर वोबेद तै यिशै जण्या, 6 अर यिशै तै दाऊद राजा जण्या। अर दाऊद तै सुलैमान उस जनानी तै जण्या जो पैहले उरिय्याह का की बीरबान्नी थी, 7 सुलैमान तै रहबाम जण्या, रहबाम तै अबिय्याह जण्या, अर अबिय्याह तै आसा जण्या, 8 आसा तै यहोशाफात जण्या, यहोशाफात तै योराम जण्या, अर योराम तै उज़ियाह जण्या, उज़ियाह तै योताम जण्या, योताम तै आहाज जण्या, अर आहाज तै हिजकिय्याह जण्या, 9 उज़ियाह तै योताम जण्या, योताम तै आहाज जण्या, अर आहाज तै हिजकिय्याह जण्या, 10 हिजकिय्याह तै मनशिशह जण्या, मनशिशह तै आमोन जण्या, अर आमोन तै योशिय्याह जण्या; 11 अर कैदी होकै बेबीलोन जाण कै बख्त म्ह योशिय्याह तै युकुन्याह, अर उसके भाई जण्ये। 12 कैदी होकै बेबीलोन खिन्दाए जाण कै पाच्छे युकुन्याह तै शालतिएल जण्या, अर शालतिएल तै जरुब्बाबिल जण्या, 13 जरुब्बाबिल तै अबीहूद जण्या, अबीहूद तै इल्याकीम जण्या, अर इल्याकीम तै अजोर जण्या, 14 अजोर तै सदोक जण्या, सदोक तै अखीम जण्या, अर अखीम तै इलीहूद जण्या, 15 इलीहूद तै इलियाजार जण्या, इलियाजार तै मत्तान जण्या, मत्तान तै याकूब जण्या, 16 याकूब तै यूसुफ जण्या, जो मरियम का धणी था, अर मरियम तै यीशु जो मसीह कुहावै सै, जण्या। 17 इस तरियां अब्राहम तै दाऊद तैई चौदाहा पीढ़ी होई, अर दाऊद तै बेबीलोन नै कैदी होकै खिन्दाये जाण तैई चौदाहा पीढ़ी, अर कैदी होकै बेबीलोन नै खिन्दाए जाण कै बख्त तै मसीह तैई चौदाहा पीढ़ी होई।

## मसीह का जन्म

(लुका 1:26-38; 2:1-7)

18 यीशु मसीह का जन्म इस तरियां होया, के जिब्ब उसकी माँ मरियम कि सगाई यूसुफ कै गैल होय्थी, तो उनके मिलण तै पैहल्या ए वा पवित्र आत्मा की ओड़ तै गर्भवती पायी गयी। 19 इस करके उसके धणी नै जो धर्मी था उसनै बदनाम नी करना चाहवै था उस ताही चुपके तै छोड़ण का बिचार करया। 20 जिब्ब वो इन बातां नै सोचै ए था कै प्रभु का सुर्गदूत उसनै सपनै म्ह आकै कहण लाग्या, “हे यूसुफ! दाऊद की ऊलाद, तू आपणी बीरबान्नी मरियम नै अपणे याडै ल्याण तै ना डर, क्यूँके जो उसकी कोख म्ह सै, वो पवित्र आत्मा की वोड़ तै सै। 21 वो बेटा जाम्यैगी अर तू उसका नाम यीशु धरिये, क्यूँके वो अपणे माणसां का उनके पाप तै उद्धार करैगा।” 22 यो सारा इस खात्तर होया के जो वचन प्रभु नै नब्बी कै जरिये कहा था, वो पूरा: हो 23 “देखरो एक कुँवरी गर्भवती होगी अर एक छोरा जण्येगी, अर उसका नाम इम्मानुएल धरया जावैगा,” जिसका मतलब सै-पणमेशर म्हारै गैल सै। 24 फेर यूसुफ नीद तै जाग कै प्रभु कै दूत के हुकम कै मुताबिक अपणी बीरबान्नी नै आपणे याडै ले आया; 25 अर जिब्ब ताही उसनै छोरा ना जण्या जिब्ब तक वो उसके धोरै न्ही ग्या: अर उसनै उसका नाम यीशु धरया।

## ज्योतिषिया का आणा

2 हेरोदेस राजा कै दिनां म्ह जिब्ब यहूदिया के बैतलहम म्ह यीशु का जन्म होया, तो पूरब तै कई ज्योतिषी यरुशलेम म्ह आकै बुझ्ण लागे, 2 यहूदिया का राजा जिसका जन्म होया सै, वो कीत्त सै? हमनै पूरब म्ह उसका तारा देख्या सै अर उसनै नमस्कार कल्ल आये सां। 3 यो सुणकै हेरोदेस राजा अर उसके गैल सारा यरुशलेम डर ग्या। 4 फेर उसनै माणसां के सारे प्रधान याजकां अर शास्त्रीयां नै कड्डा करके उनतै बुझ्णया, “मसीह का जन्म कीत्त होणा चाहिये?” 5 उनै उस ताही कह्या, “यहूदिया के बैतलहम म्ह, क्यूँके नब्बियां कै जरिये यो ए लिख्या गया सै: 6 “है बैतलहम, तू जो यहूदा कै परदेस म्ह सै, तू किसे भी ढाळ तै यहूदा कै अधिकारियां म्ह सारा तै छोड्या कोन्या; क्यूँके तेरे म्ह तै एक राजकुमार लिक्डैगा, जो मेरी प्रजा इस्राएल की रुखाली करैगा।” 7 फेर हेरोदेस नै ज्योतिषिया ताही लुह्वमा बुलाकै उनतै बुझ्णया के तारा ठीक किस बख्त दिख्या था, 8 अर उसनै यो कष्टकै उन ताही बैतलहम भेज्णया, “जावो, उस बाळक के बारे म्ह ठीक-ठाक बेरा पाडो, अर जिब्ब वो मिल ज्या तो मन्त्रे खबर द्यो ताके मै भी आण कै उसनै नमस्कार करौ।” 9 वे राजा की बात सुण कै चले गए, अर जो तारा उनै पूरब म्ह देख्या था वो उनके आगै-आगै चाल्या; अर जडै बाळक था, उस जंगहां कै ऊपर जाकै रुक ग्या। 10 उस तारे नै देखकै वे घणे आनन्दित होए। 11 उनै उस घर म्ह जाकै उस बाळक नै उसकी माँ मरियम कै गैल देख्या, अर मोध्धे मुँह गिरकै बाळक ताही नमस्कार करया, अर अपना-अपणा झोळा खोल कै उस ताही सोन्ना, लोबान, अर गन्धरस की भेट चढाई। 12 फेर सपनै म्ह या चेतावनी पाकै के हेरोदेस कै धोरै फेर ना जाइये, वे दूसरै राह म्ह तै अपणे देश म्ह चले ग्ये।

## मिस्र देश म्ह जाणा

13 उन कै चले जाण कै बाद प्रभु कै एक दूत नै सपनै म्ह आकै यूसुफ तै कह्या, “उठ, उस बाळक नै अर उसकी माँ नै लेकै मिस्र देश म्ह भाग ज्या; अर जिब्ब ताही मै तेरे तै ना कहुँ, जिब्ब ताही ओड़ै ए रहिये; क्यूँके हेरोदेस इस बाळक नै टोहकै उस ताही मरवा दे।” (उसनै मरवाना चाहवै सै) 14 फेर वो रात नै ए उठकै बाळक अर उसकी माँ नै लेकै मिस्र नै चाल पड्या, 15 अर हेरोदेस कै मरण तक ओड़ै रह्या। इस करके के वो वचन जो प्रभु नै नब्बी कै जरिये कह्या था पूरा हो: “मन्त्रे अपनै बेटे ताही मिस्र तै बुलाया।” (मन्त्रे आपणे बेटा मिस्र तै बुलाया) 16 जिब्ब हेरोदेस नै यो देख्या, के ज्योतिषिया नै उसके गैल धोखा करया सै, फेर वो छोह म्ह भर ग्या, अर माणसां नै भेजकै ज्योतिषिया कै जरिये ठीक-ठाक बताये होड़ बख्त कै मुताबिक बैतलहम अर उसके लोवै-धोवै की जंगहांया के सारे छोरे जो दो साल के या उसतै छोटे थे, मरवा दिए। 17 फेर जो वचन यिर्मयाह नब्बी कै जरिये कहा ग्या था, वो पूरा होया: 18 “रामाह म्ह एक रोण की आवाज सुणाई देई, रोणा अर घणाए बिलाप; राहेल अपणे बाळकां कै खात्तर रोवै थी, अर चुप न्ही रहणा चाहवै थी, क्यूँके वे इब न्ही रहे।”

## मिस्र देश तै आणा

19 हेरोदेस कै मरण कै पाच्छे, प्रभु कै दूत नै मिस्र म्ह यूसुफ ताही सपनै म्ह बोल्या, 20 “उठ, बाळक अर उसकी माँ नै लेकै इस्राएल कै देश म्ह चल्या ज्या, क्यूँके जो बाळक नै मारणा चाहवै थे, वे मर लिये सै।” 21 वो उठ्या,

अर बाळक और उसकी माँ नै गेल्या लेकै इस्राएल देश म्ह आया। 22 पर या सुणकै के अरखिलाउस अपणे पिता हेरोदेस की जगहां यहूदियां पै राज करै सै, ओड़ै जाण तै डरया। फेर सपनै म्ह पणमेशर की चेतावनी पाकै गलील परदेश म्ह चल्या गया, 23 अर नासरत नाम कै नगर म्ह जा बस्या, ताके वो वचन पूरा हो, जो नब्बियां कै जरिये कहा गया था: वो नासरी कुहावैगा।”

### यूहन्ना बपतिस्मा देण आळा

(मरकुस 1:1-8, लूका 3:1-18; यूहन्ना 1:6-8, 15-34)

3 उन दिनां म्ह यूहन्ना बपतिस्मा देण आळा आकै यो प्रचार करण लाग्या: 2 “मन बदल ल्यो, क्युँके स्वर्ग का राज धोरै आ लिया सै।” 3 यो वो ए सै जिसका जिक्र यशायाह नब्बी कै जरिये करया गया: “बण म्ह तै ए कोए रुक्का देवै सै, के प्रभु का राह तैयार करो अर उसकी सडक सीधी करो।” 4 यूहन्ना जो था ऊट के चमडै के लत्ते पहरणीया अर अपनी कड्डु म्ह चमडै की पेट्टी-बान्धन आळा था। उसका खणपान टिड्डी अर शहद था। 5 फेर यरुशलेम अर सारे यहूदी, यरदन कै लोवै-धोवै की सारी जघायां के माणस उसकै धोरै आये। 6 उण सारया नै अपने-अपने पापां ताहि (पापां नै) मान कै यरदन नदी म्ह उसतै बपतिस्मा ले लिया। 7 जिब्व उसनै घणे सारै फरीसिया अर सद्किया ताही अपने धोरै बपतिस्मा लेण खात्तर आंदे देख्या, तो बोल्या, “हे साँप के सप्पोलों, थारै ताही किसनै बता दिया कै पणमेशवर के आण आळे छोह तै भागो? 8 इस खात्तर मन बदल कै पणमेशवर कै छोह तै बच जावो; 9 अर अपणै-अपणै मन म्ह या ना सोचों की म्हारा पिता अब्राहम सै, क्युँके मै थमनै कहूँ सूँ के पणमेशर इन पत्थरां म्ह तै भी अब्राहम खात्तर ऊलाद जण सकै सै। 10 इब कुहाडा दरखता की जड पै धरया सै इस खात्तर जो-जो दरखत आच्छे फल न्ही ल्यांदे, वो काट्या अर आग म्ह झोंक्या जावै सै। 11 “मै तो थमनै पाणी तै मन बदलण का बपतिस्मा देऊँसूँ, पर जो मेरै पाच्छे आवैगा, वो मेरै तै भी घणा ताकतवर (सामर्थी) होगा; मै उसकी जूती ठाण जोग्गा भी कोनी। वो थमनै पवित्र आत्मा अर आग तै बपतिस्मा देवैगा। 12 उसका सूप उसके हाथ म्ह सै, वो अपना खेत आच्छी तरिया साफ करेगा, अर आपणे गेहूँआ नै आपणे खत्तां/कुदला म्ह कड्डा करेगां, पर घास/ (भूसी) नै आग म्ह जलावैगा जो कदे बूझे कोणी।”

### यूहन्ना के जरिये यीशु का बपतिस्मा

(मरकुस 1:9-11; लूका 3:21,22; यूहन्ना 1:31-34)

13 उस बख्त यीशु गलील तै यरदन कै कन्ठारे यूहन्ना कै धोरै उसतै बपतिस्मा लेण आया। 14 पर या कहकै यहून्ना उसनै रोकण लाग्या, कै मन्नै तो तेरै हाथ तै बपतिस्मा लेण की जरूरत सै, अर तू मेरै धोरै आया सै?” 15 यीशु नै उसते जवाब दिया, कै इब तो यो ऐ होण दे, क्युँके हमनै इस्से तरिया तै सारी धार्मिकता पूरी करना सई सै।” जिब्व उसणै उसकी बात मान ली। 16 अर यीशु बपतिस्मा लेकै जिब्व पाणी तै ऊपर आया, अर देख्या उसकै खात्तर अकास खुल गया, अर उसणै पणमेशवर की आत्मा ताहि कबूतर कै जिसा उतरते अर अपणे ऊपर आंदे देख्या। 17 अर देखो, या अकास म्ह तै आवाज (आकाशवाणी) आयी: “कै यो मेरा प्यारा बेटा सै, जिसतै मै भोत घन्ना राज्जी सु।”

### यीशु का इन्तान

(मरकुस 1:12-13; लूका 4:1-13)

4 फेर आत्मा यीशु नै बण म्ह ले गया ताके इबलीस तै उसका इन्तान हो। 2 वो चालीस दिन अर चालीस रात, बिना खाए पिए रह्या, फेर उसनै भूख लाग्गी। 3 फेर परखण आळ्ये नै धोरै आण कै उस ताही कहा, “जै तू पणमेशर का बेटा सै, तो कह दे, के ये पत्थर रोटी बण जावै।” 4 यीशु नै जवाब दिया: “लिख्या सै, ‘माणस सिर्फ रोटी तै ए न्ही, पर हरेक वचन तै जो पणमेशर कै मुँह तै निकडै सै, जिन्दा रहैगा।’” 5 फेर इबलीस उसनै पवित्र नगर म्ह लेग्या अर मंदर की गुमटी पै खड्या करया; 6 अर उसतै बोल्या, “जै तू पणमेशर का बेटा सै, तो आपणे आपनै तळै गेर दे; क्युँके लिख्या सै: “वो तेरै बारे म्ह आपणे फरिश्ता नै हुकम देगा, अर वे तन्नै हाथो हाथ उठा लेंगे

कदे इसा ना हो के तेरै पैरां म्ह पत्थर तै ठेस लागै।” 7 यीशु नै उसतै कहा, यो भी लिख्या: सै “तू आपणे प्रभु पणमेशर का इन्तान ना लो।” 8 फेर इबलीस उसनै घणे ऊँचे पाहड़ पै ले गया अर सारि दुनियां का राज अर उसका वैभव दिखाकै 9 उसतै बोल्या, “जै तू झुककै नै मन्नै नमस्कार करै, तो मै सारा किम्मे तन्नै दे दूंगा।” 10 फेर यीशु उसतै बोल्या, “हे शैतान दूर हो ज्या, लिख्या सै: तू प्रभु आपणे पणमेशर नै नमस्कार कर, अर सिर्फ उस्से की भक्ति करया करा। 11 फेर शैतान उसकै धोरै तै चल्या गया, अर देख्ये, सुर्गदूत आण कै उसकी सेवा करण लाग्ग।

### यीशु के जरिये सेवा करण कि शरुआत

(मरकुस 1:14,15; लूका 4:14-15,31)

12 जिब्व उसनै न्यू सुण्या के यूहन्ना केदी बणा लिया सै, तो वो गलील म्ह चल्या गया। 13 अर वो नासरत नै छोड़कै कफरनहूम म्ह, जो झील कै कन्ठारे जबूलून अर नप्पाली कै देश म्ह ज्याकै रहण लाग्या; 14 ताके जो यशायाह नब्बी कै जरिये कहा गया था, वो पूरा हो: 15 अर जबूलून नप्पाली कै देश, झील कै रास्तै यरदन पार, गेरजातियां का गलील- 16 जो माणस अंधेरै म्ह बैठये थे, उन्नै बड्डा चान्दणा देख्या; अर जो मौत के देश अर छाया म्ह बैठये थे, उण पै चान्दणा चमक्या।” 17 उस टैम तै यीशु नै प्रचार करना अर कहणा शरु करया, मन फिरावो क्युँके सुर्ग का राज धोरै आया सै।” 18 गलील की झील कै कन्ठारै घुमदे होए उसनै दो भाईयां ताही शमौन जो पतरस कुहावै सै, अर उसके भाई अन्ड्रियास ताही झील म्ह जाळ गेरते देख्या; क्युँके वो मछवारे थे। 19 यीशु नै उन्हते कहा, “मेरै पाच्छे हो ल्यो, तो मै थमनै माणसां का पकड़ण आळा बणाऊंगा।” 20 वे जिब्वे जाळां नै छोड़कै उसकै पाच्छे हो लियो। 21 ओड़ तै आगै चाल कै, यीशु नै दो और भाईयां ताही यानी जब्दी के बेटे याकूब अर उसकै भाई यहून्ना ताही देख्या। वे आपणे पिता जब्दी कै गैल किस्ती पै आपणे जाळां नै सुल्झाण लाग रह्ये थे। उसनै उन ताही भी बुला लिया। 22 वे जिब्वे नाव अर आपणे बाबू नै छोड़कै उसकै पाच्छे हो लियो 23 यीशु सारै गलील म्ह फिरता होया उन कै मन्दरां म्ह उपदेश सुणान्दा, अर राज्य का सुसमाचार सुणादा अर माणसां की हरेक ढाळ की बीमारी अर कमजोरियां नै दूर करता रह्या। 24 अर सारै सीरिया देश म्ह उसका यश फैल गया; अर माणस सारे बिमारां नै, जो कई ढाळ की बिमारियां अर दुखां नै जकड़े होए थे, जिन्ह म्ह भूंडी आत्मा थी, अर मिर्धी आळे अर लकवै के रोगी नै उसकै धोरै ल्याए उसनै उन ताही ठीक करया। 25 गलील अर दिकापुलिस, यरुशलेम, यहूदी अर यरदन नदी कै पार तै भीड़ की भीड़ उसकै पाच्छे हो ली

### यीशु का पहाड़ी उपदेश

5 वो उस भीड़ नै देखकै पाहाड़ पै चढ़ गया, अर जब बैठ गया तो उसके चेल्ये उसकै धोरै आए। 2 अर वो आपणी ऊँची आवाज म्ह उन्नै यो उपदेश देण लाग्या:

#### धन्य वचन

(लूका 6:20-23)

3 “धन्य सै वे, जो मन तै दीन (भोळे) सै, क्युँके सुर्ग का राज उन्नै का सै। 4 “धन्य सै वे, जो शोक करै सै, क्युँके वे शांति पावेंगे। 5 “धन्य सै वे, जो नर्म सै, क्युँके वे धरती के हकदार होंगे। 6 “धन्य सै वे, जो धार्मिकता के भूखे अर तिशाए सै, क्युँके वे छिकाए ज्यावेंगे। 7 “धन्य सै वे, जो दया करण आळे सै, क्युँके उन पै दया करी ज्यागी। 8 “धन्य सै वे, जिनके मन शुध्द सै, क्युँके वे पणमेशर नै देखेंगे। 9 “धन्य सै वे, जो मेल करण आळे सै, क्युँके वे पणमेशर के बेटे कुहावेंगे। 10 “धन्य सै वे, जो धार्मिकता के कारण सताए जावें सै, क्युँके सुर्ग का राज उन्नै का सै। 11 धन्य सों थम, जिब्व माणस मेरै कारण थारी बुराई करै सतावै अर झूठ बोल- बोल कै थारै बिरोध म्ह सारी तरियां की ओच्छी बात कहवै। 12 फेर खुश अर मग्न होइयो, क्युँके थारै खात्तर सुर्ग म्ह बड्डा फळ सै। इस करकै के उन्नै उन नब्बियां तै जो थारै तै पहल्या थे इस्से ढाळ सताया था।

**नमक अर चान्दणा**  
(मरकुस 9:50; लूका 14:34,35)

13 “थम धरती के नूण सों; पर जै नूण का स्वाद खराब होज्या, तो वो किस चीज तै नमकीन करैया ज्यागा? फेर वो किस्से काम का न्ही, सिर्फ इसकै के बाहर फेंक्या ज्या अर माणसां के पैरां तळै चिकल्या ज्या। 14 थम दुनिया का चाँदणा सो। जो नगर पहाड़ पै बस रह्या सै वो लुहक न्ही सकदा। 15 अर माणस दीवा जळा कै पैमाने कै तळै न्ही पर दीवट/टान्डी पे धरै सै, फेर उसतै घर के सारे माणसां ताही चान्दणा ज्या सै। 16 उस्से तरियां थारा चान्दणा माणसां के स्याम्ही चमकै के वे थारै भले कामां नै देखकै थारै पिता की, जो सुर्ग म्ह सै बड़ाई करै।

**नियम की शिक्षा**

17 “या ना समझो, के मैं नियम कायदा या नब्बियां की किताबां नै मिटाण आया सूं, मिटाण न्ही, पर पूरा करण आया सूं। 18 क्यूँके मैं थमनै सच कहूँ सूं, के जब ताही अकास अर धरती टळ न्ही जावै, जद ताही नियम कायदा तै एक मात्रा या एक बिन्दु भी बिना पूरा होए न्ही टळैगा। 19 इस करकै जो कोए इन छोटे तै छोटे हुक्म म्ह तै किसे एक नै तोड़ै, अर उसाए माणसां नै सिखावै, वो सुर्ग के राज्य म्ह सारा तै छोटा कुहावैगा; पर जो कोए उन हुक्मां पै चाल्यैगा अर उन्नै सिखावैगा, वो ए सुर्ग राज्य म्ह महान् कुहावैगा। 20 क्यूँके मैं थमनै कहूँ सूं, के जै थारी धार्मिकता शास्त्रियां अर फरिसियां की धार्मिकता तै बढ़कै न्ही हो, तो थम सुर्ग के राज्य म्ह कदे बड न्ही पावोगे।

**छोह अर हत्या**

21 “थमनै सुण्या होगा, के पैहलडे माणसां तै कह्या, गया था के ‘खून ना करियो’, अर ‘जो कोए खून करैगा वो कच्चेडी म्ह दण्ड के लायक होगा।’ 22 पर मैं थमनै या कहूँ सूं, के जो कोए आपणे भाई पे गुस्सा करैगा, वो कच्चेडी म्ह दण्ड के लायक होगा, अर जो कोए आपणे भाई नै निकम्मा कहवैगा वो बड्डी पंचायत म्ह दण्ड के लायक होगा; अर जो कोए कहवै ‘अरै बेकूप’ वो नरक की आग के दण्ड के लायक होगा। 23 इस करकै जै तू आपणा चढ़ावा मंडही पै ल्यावै, अर ओड़ै तू याद करै, के तेरै भाई के मन म्ह तेरै खात्तर किमे बिरोध सै, 24 तो तू आपणा चढ़ावा ओड़ै ए मंडही कै स्याम्ही छोड़ दे, अर ज्याकै आपणे भाई तै मेल मिलाप कर अर फेर आकै आपणा चढ़ावा चढ़ा। 25 जिब्व ताही तू आपणे बैरी/मुद्दई के गैल्या रास्तै म्ह ए सै, उसतै तुरता फुर्ती/ जिब्वे मेल मिलाप करले कदे इसा ना हो के बैरी तन्नै अधिकारी के हवालै, अर अधिकारी तन्नै सिपाही के हवालै कर दे, अर तू जेळ म्ह गेर दिया ज्यावै। 26 मैं तन्नै सच कहूँ सूं के जिब्व ताही तू कौड़ी-कौड़ी/पाई-पाई न्ही भरदे जद ताही ओड़ै तै छुटण न्ही पावैगा।

**जारी**

27 “थमनै सुण्या होगा के कह्या गया था, ‘जारी ना करियो।’ 28 पर मैं थमनै न्यू कहूँ सूं, के जो कोए किसे लुगाई पै भुंडी निगांहर गेरै वो अपणै मन म्ह उस तै जारी करग्या। 29 जै तेरी सोळी आँख तन्नै ठोकर खुवावै, तो उसनै लिकाड के फेंक दे; क्यूँके तेरै खात्तर यो ए ठीक सै के तेरै अंगां म्ह तै एक नाश हो ज्या अर तेरी सारी देही नरक म्ह गेरी ज्यावै। 30 जै तेरा सोळा हाथ तन्नै ठोकर खवावै, तो उसनै काट के फेंक दे; क्यूँके तेरै खात्तर यो ए आच्छा सै के अंगां म्ह तै एक नाश हो ज्यावै अर तेरी सारी देही नरक म्ह न्ही गेरी ज्यावै।

**तलाक**

(मत्ती 19:9,11,12; लूका 16:18)

31 यो भी कह्या गया था, ‘जो कोए आपणी बीरबान्नी नै तलाक देणा चाहवै, तो उसनै तलाक नामा दे।’ 32 पर मैं थारै तै यो कहूँ सूं के जो कोए आपणी बीरबान्नी नै जारी कै सिवा किसे और कारण तै तलाक दे, तो वो उसतै जारी करवावै सै; अर जो कोए उस छोड़ी होड़ी तै ब्याह करै; वो जारी करै सै।

**सूह**

33 “फेर थमनै सुण्या होगा के पैहलडे माणसां तै कह्या गया था, ‘झूठी सूह ना खाइये, पर प्रभु के खात्तर आपणी सूह नै पूरी करिये।’ 34 पर मैं थमनै या कहूँ सूं के कदे सूह ना खाइये; ना तो सुर्ग की, क्यूँके वो पणमेशर का सिंहासन सै; 35 ना धरती की, क्यूँके वा उसकै पैरां की पिड्डी सै; ना यरुशलेम की, क्यूँके वो महाराजा का नगर सै। 36 आपणे सिर की भी सूह ना खाइये क्यूँके तू एक बाळ नै भी ना धोळा, ना काळा कर सकै सै। 37 पर थारी बात ‘हाँ,’ की ‘हाँ,’ या ‘ना’ की ‘ना’ हो; क्यूँके जो किमे इसतै घणा होवै सै वो बुराई तै होवै सै।

**बदला**

(लूका 6:29,30)

38 “थमनै सुण्या होगा के कह्या था, ‘आँख के बदलै आँख, अर दान्द के बदलै दान्द।’ 39 पर मैं थमनै कहूँ सूं के भुंडे का सामना ना करियो; पर जो कोए तेरै सोळै गाल पै थप्पड़ मारै उस कात्री दूसरा भी फेर दे। 40 जै कोए तेरै पे दाब देकै तेरा कुड़ता लेणा चाहवै, तो उसनै चादरा/अंगोच्छा भी लेण दे। 41 जो कोए तन्नै एक कोस मुफ्त म्ह ले ज्यावै, तो उसकै गैल्या दो कोस चल्या ज्या। 42 जो कोए तेरै तै माँगै, उसणै दे; अर जो कोए तेरै तै उधार लेणा चाहवै, उसतै मुँह ना मोड़। 43 “थमनै सुण लिया सै के कह्या था, ‘आपणे पड़ोसी तै प्रेम राखिये, अर आपणे बैरी तै बैर।’ 44 पर मैं थमनै कहूँ सूं के आपणे बैरियां तै प्रेम राख्यो अर आपणे सतावण आळे के खात्तर प्रार्थना करो, 45 जिसतै थम आपणे सुर्गीय पिता की ऊलाद मान्ये जावोगे। क्यूँके वो भलै अर बुरै दोनुआ पै आपणा सुरज उगाया करै सै, अर धर्मी अर अधर्मी दोनुआ पै मिह बरसावै सै। 46 क्यूँके जै थम आपणे प्रेम करण आळा तै ए प्रेम राख्यो, तो थारै खात्तर के ईनाम होगा? के चुंगी लेण आळे भी इसाए न्ही करते? 47 “जै थम आपणे भाइयां ने ए नमस्कार करो, तो कौणसा बड्ठा काम करो सों? के गैरजात के भी इसा न्ही करदे? 48 इस करकै चाहिए के थम सिध्द बणो, जिसा थारा सुर्गीय पिता सिध्द सै।

**दान**

6 “चौकस रहो थम माणसां नै दिखाण कै खात्तर आपणे धर्म के काम ना करो, न्ही तो आपणे सुर्गीय पिता तै किमे भी ईनाम न्ही पावोगे। 2 “इस करकै जिब्व तू दान करै, तो आपणे आंगै बीण/तुरही ना बजवावै, जिसा कपटी, पंचायतां अर गलियां म्ह करै सै, ताके माणस उनकी बड़ाई करै। मैं थारै ताही साच्ची कहूँ सूं के उन्नै आपणा ईनाम पा लिया। 3 पर जिब्व तू दान करै, तो जो तेरा सोळा हाथ करै सै, उसनै तेरा ओळा हाथ न्ही जाणन पावै। 4 ताके तेरा दान छिप्या रहवै, अर जिब्व तेरा पिता जो छिपकै देख्यै सै, तन्नै ईनाम देगा।

**प्रार्थना**

(लूका 11:2-4)

5 “जिब्व तू प्रार्थना करै, तो कपटियां के तरियां न्ही हो, क्यूँके माणसां नै दिखाण खात्तर आराधनालयां म्ह अर सडकां कै मोडां पै खड्ये हो कै प्रार्थना करणा उन्नै आच्छा लागै सै। मैं थमनै साच्ची कहूँ सूं के उन्नै आपणा ईनाम पा लिया। 6 पर जिब्व तू प्रार्थना करै, तो आपणी कोठडी म्ह जा; अर क्वाड बंद करकै आपणे पिता तै जो गुप्त म्ह सै प्रार्थना कर। जद तेरा पिता जो लुहक कै देख्यै सै, तन्नै ईनाम देगा। 7 प्रार्थना करदे टैम गैरजातां की तरियां बडबडाइये ना, क्यूँके वे समझै सै के उनकै घने बोळण तै उनकी सुणी जावैगी 8 इस करकै थम उनकी तरियां ना बणो, क्यूँके थारा पिता थारै माँगण तै पैहल्या ए जाणै सै के थारी के-के जरूत सै। 9 “इस करकै थम इस तरिया तै प्रार्थना करया करो: ‘हे म्हारे पिता, तू जो सुर्ग म्ह सै; तेरा नाम पवित्र मान्या जावै। 10 तेरा राज आवै। तेरी मर्जी जिसी सुर्ग म्ह पूरी होवै सै, उसी धरती पै भी हो। 11 ‘म्हारी दिन भर की रोटी आज हमनै दे। 12 ‘अर जिस तरियां हमनै आपणे कसूरवारां ताही माफ करैया सै, उस्से तरियां तू भी म्हारे

कसूरानें माफ कर।<sup>13</sup> 'अर म्हारा हिम्तान ना लेवै, पर बुराई तै बचा; (क्यूँके राज्य, वीरता अर मान हमेशा तेरे ए सै।' आमीन।)<sup>14</sup> "इस करके जै थम माणसां के कसूर माफ करोगे, तो थारा सुर्गीय पिता भी थमनै माफ करैगा।<sup>15</sup> अर जै थम माणस के कसूरा नै माफ न्ही करोगे, तो थारा पिता भी थारे कसूर माफ न्ही करैगा।

### उपवास

<sup>16</sup> "जिब्व थम ब्रत करो, तो कपटियां की तरियां थारै मुँह पै उदासी छाई ना रहवै, क्यूँके वे आपणा मुँह बनाई राख्यै सै, ताके माणस उन्नै ब्रती जाणै। मैं थमनै साच्चो कहूँ सूँ के वे आपणा ईनाम पा चुके।<sup>17</sup> पर जिब्व तू ब्रत करै तो आपणे सिर पे तेल लगा अर मुँह धो, <sup>18</sup> ताके के माणस न्ही पर तेरा पिता जो गुप्त म्ह सै, तन्नै ब्रती जाणै। इस हालत म्ह तेरा पिता जो गुप्त म्ह देख्ये सै, तन्नै ईनाम देगा।

### सुर्गीय धन

(लूका 12:33-34)

<sup>19</sup> "आपणे खात्तर धरती पे धन कट्टा ना करो, जडै कीड़ा अर काई नाश करै सै, अर जडै चोर सेंध लगावै अर चोरै सै।<sup>20</sup> पर आपणे खात्तर सुर्ग म्ह धन कट्टा करो, जडै ना तो कीड़ा अर ना काई नाश करै सै, अर जडै चोर ना सेंध/पाड़ लगावै अर चोरै सै।<sup>21</sup> क्यूँके जडै तेरा धन सै उडै तेरा मन भी लाग्या रवैगा।

### देह कि ज्योति

(लूका 11:34-36)

<sup>22</sup> "देही का दिवा आँख सै इस करके जै तेरी निगांह आच्छी सै, तो तेरी सारी देही भी उजाळा होगा।<sup>23</sup> पर जै तेरी निगांह औपरी हो, तो तेरी सारी देही म्ह भी अन्धेरा होगा; इस कारण जो वो चाँदणा तेरै म्ह सै जै अन्धेरा हो तो वो अन्धेरा कितना बड्डा होगा!

### पणमेशर अर धन

(लूका 16:13;12:22-31)

<sup>24</sup> "कोए माणस दो मालिकां की सेवा न्ही कर सकदा, क्यूँके वो एक तै बैर अर दूसरे तै मोह राख्यैगा, या एक तै मिल्या रहवैगा अर दूसरे नै छोटा जाणैगा। थम पणमेशर अर धन दोनूआ की सेवा न्ही कर सकदे।<sup>25</sup> इस करके मैं थारै तै कहूँ सूँ के आपणे प्राण/जान के खात्तर या चिंता न्ही करियो के हम के खावाँगें अर के पीवाँगें, अर ना आपणे देही के खात्तर के पैहरागें। के प्राण/जान खाणै तै, अर देही लत्यां तै बढकै कोन्या? <sup>26</sup> अकास के पंछियां नै देख्यो! वे ना बोवै सै, ना काटै सै, अर ना खेतां म्ह कट्टा करै सै; फेर भी थारा सुर्गीय पिता उन ताही खुवावै सै। के थम उनतै घणे कीमती कोनी <sup>27</sup> थारै म्ह कौण सै, जो चिंता करके आपणी उम्र म्ह एक घड़ी भी बढा सकै सै? <sup>28</sup> "अर लत्यां के खात्तर क्यो चिंता करो सो? जंगली सोशन पै ध्यान करो के वे किस तरियां बढे सै; वे ना तो मेहनत करे सै, ना काटै सै। <sup>29</sup> तो भी मैं थारै तै कहूँ सूँ के सुलैमान भी, आपणे सारे अ-सो आराम म्ह उन म्ह तै किस्से के तरियां लत्ते पैहरे होए कोनी था। <sup>30</sup> इस करके जिब्व पणमेशर मदान की घास नै, जो आज सै अर कल भाड़ म्ह झोंकी ज्यागी, इस्से लत्ते पैहरावै सै, तो हे कमजोर बिश्वासियो, थारै ताही वो इन तै बढ के क्यो न्ही पैहरावैगा? <sup>31</sup> "इस करके थम चिंता कर के न्यु ना कहियो के हम के खावाँगें, या के पीवाँगें, या के पैहरागें। <sup>32</sup> क्यूँके गैरजात इन सारी चीजां की टोह म्ह रहवै सै, पर थारा सुर्गीय पिता जाणै सै के थमनै इन सारी चीजां की जरूरत सै। <sup>33</sup> इस करके पैहल्या थम पणमेशर के राज्य अर उसके धर्म की खोज करो तो ये सारी चीज भी थमनै मिल ज्यांगी। <sup>34</sup> इस करके कांल की चिंता ना करो, क्यो के कांल का दिन आपणी चिंता आप कर लेवैगा; आजकै खात्तर आज का ए दुःख भतेरा सै।

### दुसरां पै इल्जाम ना लावो

(लूका 6:37,38,41,42)

**7** "इल्जाम ना लावो के थारै पै भी इल्जाम लाया जावै।<sup>2</sup> क्यूँके जिस तरियां थम इल्जाम लगावो सो, उसी तरियां थारै पे भी इल्जाम लगाया जावैगा; जिस नाप तै थम नापो सो, उस्से नाप तै थारै खात्तर भी नाप्या जावैगा।<sup>3</sup> "तू क्यो आपणे भाई की आँख कै तिन्कै नै देख्ये सै, अर आपणी आँख का लाक्कड तन्नै न्ही दिखदा? <sup>4</sup> जिब्व तेरी ए आँख म्ह लाक्कड सै, तो तू आपणे भाई तै किस तरियां कहवै सै, ल्या मैं तेरी आँख तै तिन्का लिकाड द्यु?" <sup>5</sup> हे कपटी, पैहल्या आपणी आँख म्ह तै लाक्कड लिकाड ले, फेर तू आपणे भाई की आँख का तिन्का आच्छी दाऊ देख के लिकाड सकैगा। <sup>6</sup> "पवित्र चीज कुत्या नै ना द्यो, अर आपणे मोती सूअरां के आगै ना गेरो; इसा न्ही हो के वे उन्नै पैरां तलै चिकलै अर उलटके थमनै पाडले।

### माँगो, तो पावो

(लूका 11:9-13)

<sup>7</sup> "माँगो, तो थमनै दिया जावैगा; टोव्हों तो थम पावो; खटखटावो, तो थारै खात्तर खोल्या ज्यागा। <sup>8</sup> क्यूँके जो कोए माँगै सै, उसनै मिले सै; अर जो ढूँडे सै, वो पावै सै; अर जो खटखटावै सै, उसकै खात्तर खोल्या ज्यागा। <sup>9</sup> "थारै म्ह तै इसा कौण माणस सै, के जै उसका बेटा उसतै रोटी माँगै, तो वो उसनै पत्थर दे? <sup>10</sup> या मछली माँगै, तो उसनै साँप दे? <sup>11</sup> इस करके जिब्व थम बुरे होके, आपणे बाळकां नै आच्छी चीज देणा जाणो सो, तो थारा सुर्गीय पिता आपणे माँगण आळां नै आच्छी चीज क्यो न्ही देवैगा? <sup>12</sup> इस कारण जो किमे थम चाहो सो के माणस थारै गेल्या करै, थम भी उसकै गेल्या उसा ए करो; क्यूँके कायदे-नियम अर नब्बियां की शिक्षा याए सै।

### भिड़ा अर चौड़ा राह

(लूका 13:24)

<sup>13</sup> "भीडे फाटक तै दाखल होवों, क्यूँके चौड़ा सै वो फाटक अर सीधा सै वो रास्ता जो नाश नै पुहच्ये सै; अर घणेए सै जो उसतै दाखल होवै सै। <sup>14</sup> क्यूँके भीड़ा सै वो फाटक अर मुश्किल सै वो राह जो जीवन नै पुहचावै सै; अर थोडे सै जो उसनै पावै सै। <sup>15</sup> "झूठे नब्बिया तै चौकस रहो, जो भेड्डा के भेष म्ह थारै धोरै आवै सै, पर भित्तर तै वे पाडण आळे भेड्डिये सै। <sup>16</sup> उनकै फलां तै थम उनताही पिच्छाण ल्योगे। के माणस झाडिया तै अंगूर, या झाड़ बोझडे तै अंजीर तोडै सै? <sup>17</sup> इस तरियां हर एक आच्छा दरखत आच्छा फळ ल्यावै सै अर निकम्मा दरखत भुंडा फळ ल्यावै सै। <sup>18</sup> आच्छा दरखत भुंडा फळ न्ही ल्या सकदा, अर ना निकम्मा दरखत आच्छा फळ ल्या सकै सै। <sup>19</sup> जो-जो दरखत आच्छा फळ न्ही ल्यान्दा, वो काट्या अर आग म्ह गैरया ज्या सै। <sup>20</sup> इस तरियां उनकै फलां तै थम उन्नै पिच्छाण ल्योगे। <sup>21</sup> "जो मेरै तै, 'हे प्रभु! हे प्रभु! कहवै सै, उन म्ह तै हर एक सुर्ग के राज्य म्ह दाखल न्ही होगा, पर वोए जो मेरै सुर्गीय पिता की मर्जी पै चाल्यै सै। <sup>22</sup> उस दिन घणखरे-ए माणस मेरै तै कहवैगे, "हे प्रभु, हे प्रभु, के हमनै तेरै नाम भविष्यवाणी न्ही करी, के हमनै तेरै नाम तै औपरी आत्मायां ताही न्ही लिकाड्या, अर तेरै नाम तै घणेए अचम्भे के काम न्ही करे?" <sup>23</sup> फेर मैं उनतै खुलकै कह द्युगा, "मन्नै थारै ताही कदे न्ही जाण्या। हे भुंडा/ओच्छे काम करण आळो, मेरै धोरै तै चल्ये जावो। <sup>24</sup> "इस करके जो कोए मेरी ये बात सुणकै मात्रै सै, वो उस स्याणे माणस की तरियां होगा जिसनै आपणा घर चट्टान पै बनाया। <sup>25</sup> अर मिह बरसया, बाढ़ आयी, आंधी आई, अर उस घर तै टकराई, फेर भी वो कोनी गिरया, क्यूँके उसकी नीम चट्टान पै धरी र्यी थी। <sup>26</sup> पर जो कोए मेरी ये बात सुण सै अर उनपै न्ही चाल्या, वो उस बेकूप माणस की तरियां सै, जिसनै आपणा घर बालूरेत पै बनाया। <sup>27</sup> अर मिह बरसया, बाढ़ आयी, आंधी चाल्यी, अर उस घर तै टकराई अर वो गिरके सत्यानाश होग्या।" <sup>28</sup> जिब्व यीशु नै ये बात कह ल्यी, तो इसा होया के भीड़

उसके उपदेश तै हेरान होगी, 29 क्यूँके वो उनके शास्त्रीयां की तरियां नही पर अधिकारी की तरियां उन्नै उपदेश देवे था।

8 जिब्व वो उस पहाड़ तै उतरा, तो एक बड्डी भीड़ उसके पाच्छे हो ल्यी। 2 अर देख, एक कोढ़ी नै धोरै आके उस ताही नमस्कार करैया अर कहा, "हे प्रभु, जै तू चाहवै, तो मन्नै आच्छा कर सकै सै।" 3 यीशु नै हाथ बढाके उस ताही छुआ, अर कहा, "मैं चाहूँ सूँ, तू आच्छा हो ज्या।" अर वो जिब्वे कोढ़ तै आच्छा होग्या। 4 यीशु नै उसतै कहा, "देख किस्से तै ना कहिये, पर जाके आपणे आप नै याजक ताही दिखा अर जो चढावा मूसा नै बताया सै उसणै चढा, ताके माणसां के खात्तर गवाही हो।" 5 जिब्व वो कफरनहूम म्ह आया तो एक सूबेदार नै धोरै आके उसतै बिनती करी, 6 "हे प्रभु, मेरा नौकर लकवे के रोग तै घणा दुःखी होरया सै।" 7 उसनै उस ताही कहा, "मैं आके उसनै ठीक करूँगा।" 8 सूबेदार नै जवाब दिया, "हे प्रभु, मैं इस लायक कोनी के तू मेरी छात के तलै आवै, पर सिर्फ मुँह तै कहदे तो मेरा नौकर ठीक हो ज्यागा।" 9 क्यूँके मैं भी गुलाम आदमी सूँ, अर सिपाही मेरै अधीन सै। जिब्व मैं एक तै कहूँ सूँ, 'जा!' तो वो जावै सै; अर दूसरे तै, 'आ' तो वो आवै सै; अर जिब्व आपणे नौकर तै कहूँ सूँ, 'यो कर।' तो वो करै सै।" 10 यो सुण के यीशु के अचम्भा होया, अर जो उसके पाच्छे आवै थे उनतै कहा, "मैं थमनै साब्री कहूँ सूँ के मन्नै इस्राइल म्ह भी इसा बिश्वास नही देख्या। 11 अर मैं थमनै कहूँ सूँ के पूरब अर पश्चिम तै घणेण माणस आके अब्राहम अर इसहाक अर याकूब के गैल्या सुर्ग के राज्य म्ह बैठोगे। 12 पर राज्य की ऊलाद बाहर अन्धेरै म्ह गेर दिये ज्यांगे: उड़ै रोणा अर दांत पीसना होगा। 13 जिब्व यीशु नै सूबेदार तै कहा, "जिसा तेरा बिश्वास सै, उसाए तेरै खात्तर होगा।" अर उसका नौकर उसै टैम ठीक होग्या। 14 यीशु जिब्व पतरस के घरणै आया, तो उसनै उसकी सास ताही बुखार/ताप म्ह पड्या देख्या। 15 उसनै उसका हाथ पकड्या अर उसका बुखार/ताप उतर ग्या, अर वा उठके उसकी खातर-दारी करण लागी। 16 जिब्व साँझ होई फेर वो उसके धोरै घणेण माणसां नै ल्याए जिन म्ह औपरी आत्मा थी अर उसनै उन आत्मायां ताही आपणे वचन तै लिकाड़ दिया; अर सारे बिमारां ताही ठीक कर दिया। 17 ताके जो वचन यशायाह नब्बी के जरिए कहा गया था वो पूरा हो: "उसनै खुद म्हारी कमजोरी ले ल्यी अर म्हारी बीमारी उठा ल्यी।" 18 यीशु नै जिब्व आपणे चौगरदू एक भीड़ देख्यी तो झील के उस पार जाण का हुक्म दिया। 19 फेर एक शास्त्री नै धोरै आके उसतै कहा, "हे गुरु, जड़ै किर्ते तू जावैगा, मैं तेरै पाच्छे हो ल्युंगा।" 20 यीशु नै उसतै कहा, "लोमडियां की घुरखाण अर अकास के पक्षियां के बसेरे हो सै; पर माणस के बेट्टे खात्तर सिर छिपाण की भी जगहा कोनी सै।" 21 एक और चेल्यै नै उसतै कहा, "हे प्रभु, मन्नै पैहल्ये जाण दे के आपणे पिता नै दफना/दाब द्यु।" 22 यीशु नै उसतै कहा, "तू मेरै गैल्या हो ले, अर मुर्दा नै मुर्दे दफनान/ दाबण दे।" 23 जिब्व वो किस्ती पै चढ्या, तो उसके चेल्ये उसके पाच्छे हो लिए। 24 अर देखखो, झील म्ह एक इसा बड्ढा अन्धोड़ उठ्या के किस्ती झालां तै ढक्कण लाग्यी, अर वो सोण लाग रहा था। 25 फेर चेल्यां नै धोरै आके उस ताही जगाया अर कहा, "हे प्रभु, हमनै बचा, हम मरण आळे सां।" 26 उसनै उन ताही कहा, "हे अल्पबिश्वासियों/कमजोर बिश्वासियो, क्योँ डरो सों?" फेर उसनै उठके आँधी अर पाणी ताही धमकाया, अर सारा थम ग्या। 27 अर वे अचम्भा करके कहण लाग्ये, "यो किसा माणस सै के आँधी अर पाणी भी उसका हुक्म माने सै।" 28 जिब्व वो उस पार गदरेनियां के देश म्ह पुँह्या, तो दो माणस जिन म्ह औपरी आत्मा थी कब्रां तै लिकड़ते होए उसनै मिले। वे इतनै डरावने थे के कोए उस रास्तै तै जा नही सकै था। 29 उन्नै रुक्का मारके कहा, "हे पणमेशर के बेट्टे, म्हारा तेरै तै के काम? के तू बखत तै पैहल्ये हमनै दुःख देण आड़ै आया सै?" 30 उनतै थोड़ी सी दूर पे घणेण सुअरां का टोळ चरन लाग रहा था। 31 औपरी आत्मायां नै उसतै या कहके बिनती करी के, "जै तू हमनै लिकाड़ै सै, तो सुअरां के टोळ म्ह खिन्दा दे। 32 उसनै उनउनसै उन ताही कहा, "जाओ!" अर वे ज्या के सुअरां म्ह बैठग्यी अर देखखो, सारा टोळ डौळै पै तै तिश्ळ के पाणी म्ह ज्या पड्या, अर डूब मरां। ताही कहा, "जावो!" अर वे ज्या के सुअरां म्ह बैठ ग्यी अर लखावो, सारा टोळ डौळै पै तै तिष्ळ के पाणी म्ह ज्या पड्या, अर डूब मरां। 33 उनकै पाळी भाज्ये, अर नगर म्ह ज्याके ये सारी बात अर जिन म्ह औपरी आत्मा थी उनका सारा हाल कह

सुनाया। 34 फेर सारे नगर के माणस यीशु तै फेटण नै लिक्ड़ाए, अर उस ताही देख के बिनती करी के म्हारी सीम तै बाहर चल्या ज्या।

9 फेर वो किस्ती म्ह चढके पार गया, अर आपणे नगर म्ह आया। 2 अर देखखो, कई माणस लकवे के एक मरीज नै खाट पै लिटा के उसके धोरै ल्याए। यीशु नै उनका बिश्वास देखके, उस लकवे के मरीज तै कहा, "हे बेट्टे, धीर बाँध; तेरै पाप माफ होए।" 3 इस पै कई शास्त्रियां नै सोच्या, "यो तो पणमेशर की बुराई करै 4 यीशु नै उनके मन की बात जाण के कहा, "थम माणस आपणे-आपणे मन म्ह भुंडा बिचार क्योँ करण लागरै सों? 5 सोक्खा के सै? यो कहणा, 'तेरे पाप माफ होए', या यो कहणा, 'उठ अर चल फिर।' 6 पर इस करके के थम जाण ल्यो के माणस के बेट्टे नै धरती पे पाप माफ करण का हक सै। फेर उसनै लकवे के रोगी तै कहा, "उठ, अपनी खाट उठा, अर आपणे घरां चल्या ज्या।" 7 वो उठके आपणे घरा चल्या गया। 8 माणस यो देखके डरगे अर पणमेशर का गुणगान करन लाग्ये जिसनै माणस ताही इसा हक दिया सै। 9 ओड़ै तै आगे बढ के यीशु नै मत्ती नाम के एक आदमी ताही चुंगी की चौकी पे बैठ्या देख्या, अर उसतै कहा, "मेरै पाच्छे हो ले।" वो उठके उसके पाच्छे हो लिया। 10 जिब्व वो घर म्ह खाणा/रोटीजिम्ण खात्तर बैठे तो घणेण चुंगी लेण आळे अर पापी आके यीशु अर उसके चेल्या के गैल्या जिम्ण बैठे। 11 या देखके फरीसियां नै उसके चेल्या तै कहा, "थारा गुरु चुंगी लेण आळे अर पापियां के गैल्या क्योँ खावै सै?" 12 या सुणके यीशु नै उनतै कहा, "वेद्ध आच्छे बिच्छ्यां खात्तर कोनी पर बिमारां खात्तर जरूरी सै। 13 इस करके थम ज्या के इसका मतलब सीख ल्यो: 'मैं कुर्बानी नही पर दया चहुँ सूँ।' क्यूँके मैं धर्मियां नै नही, पर पापियां नै बुलाण आया सूँ।" 14 फेर यूहन्ना के चेल्या नै धोरै आपके कहा, "के कारण सै के हम अर फरीसी इतना ब्रत करा सां, पर तेरे चेल्ये ब्रत नही करदे?" 15 यीशु नै उनतै कहा, "के बराती, जिब्व ताही बंदडा उसके गैल्या सै, शोक कर सकै सै? पर वे दिन आवैगे जिब्व बंदडा उनतै न्यारा करैया जावैगा, उस टेम वे ब्रत करैगे। 16 नये लत्या की थेन्ली पुराने लत्या पे कोए नही ल्यांदा, क्यूँके वो थेन्ली लत्ते तै और भी लत्ता खुस्का दे सै, अर वो और भी घणा पाट ज्या सै। 17 अर माणस नया अंगूर का रस पुरानी मशक म्ह नही भरदे, क्योँ के इसा करण तै मशक पाट ज्या सै, अर अंगूर का रस खिड़ ज्या सै, अर मशक फुउट ज्या सै; पर नया अंगूर का रस नई मशकां म्ह भरै सै अर वे दोनु बचे रहवै सै।" 18 वो उनतै ये बात कहण-ए लागरैया था, के देखखो, एक सरदार नै आके उस ताही नमस्कार करैया अर कहा, "मेरी बेटी इब्बे मरी सै, पर चाल के आपणा हाथ उसपै धरै, तो वो जिन्दा हो ज्यागी।" 19 यीशु उठके आपणे चेल्या समेत/सुधा उसके पाच्छे हो लिया। 20 अर देखखो, एक बीरबानी नै जिसके बारहा साल तै लहु बैहण की बीमारी थी, पाच्छे तै आके उसके लत्ते के हाथ भीड़ा दिया। 21 क्यूँके वा आपणे मन म्ह कहवै थी, "जै मैं उसके लत्ते के ए हाथ लगा ल्युंगी तो ठीक हो ज्यांगी।" 22 यीशु नै घूम के उस ताही देख्या अर कहा, "बेटी धीर बाँध; तेरै बिश्वास नै तेरै ताही ठीक करैया सै।" आखर वा लुगाई उससे बखत ठीक होगी। 23 जिब्व यीशु उस सरदार के घर म्ह पुहवा अर बाँसली बजान आळे अर भीड़ नै रोळा मचां दे देख्या, 24 फेर कहा, "हट जावो, छोरी मरी कोणी, पर सोवै सै।" इसपे वे उसका मखौल करण लाग्ये। 25 पर जिब्व भीड़ लिकाड़ दी, तो उसनै भीतर ज्या के उस छोरी का हाथ पकड्या, अर वा जी उठी। 26 अर इस बात का जिक्र सारे देश म्ह फैल ग्या। 27 जिब्व यीशु ओड़ै तै आगे बढा, तो दो आँधे उसके पाच्छे या कहन्दे होए चाल्ये, "हे दाऊद की ऊलाद, म्हारै पे दया कर!" 28 जिब्व वो घर म्ह पुह्या, तो वे आँधे उसके धोरै आये, अर यीशु नै उनतै कहा, "के थमनै बिश्वास सै के मैं यो कर सकूँ सूँ?" उन्नै उसतै कहा, "हाँ प्रभु!" 29 फेर उसनै उनकी आँखां के हाथ लगाके कहा, "थारै बिश्वास के मुताबिक थारै खात्तर हो।" 30 अर उनकी आँख खुल ग्यी। यीशु नै उनतै समझां के कहा, "चौकस, कोए इस बात नै नही जाणै।" 31 पर उन्नै मिलके सारे देश म्ह उसका नाम फैला दिया। 32 जिब्व वे बारणे जाण लागरै थे, तो देखखो, "माणस एक गूँगे नै जिस म्ह औपरी आत्मा थी, उसके धोरै ल्याए; 33 अर जिब्व औपरी आत्मा लिकाड़ दी, तो गूँगा बोलण लाग्या। इस पै भीड़ नै अचम्भा करके कहा, "इसाएल म्ह इसा कदे नही देख्या गया।" 34 पर फरीसियां नै कहा, "यो तो औपरी आत्मायां के सरदार की मदद तै औपरी आत्मायां नै लिकाड़ै



सै।" 35 यीशु सारे नगरा अर गाम्मा म्ह घुमदा रह्या अर उनके मंदरां म्ह उपदेश देंदा, अर राज्य की सुसमाचार का प्रचार करदा, अर हरेक तरियां की बीमारी अर कमजोरी नै दूर करदा रह्या। 36 जिब्व उसनै भीड़ देखी तो उसनै माणसां पै तरस आया, क्यूँके वे उन भेड्या की ढाळ थे, जिनका कोए रुखाळी ना हो, बेचैन अर भटके होए से थे। 37 फेर उसनै आपणे चेल्या तै कहा, "पके खेत तो घणे सै पर मजदूर थोड़े सै। 38 इस करके खेत के मालिक तै बिनती करो के वो आपणे खेत काटण खात्तर मजदूर खिन्दा दे।"

10 फेर उसनै आपणे बारहा चेल्या नै धोरै बुलाके, उन्नै औपरी आत्मायां पै हक दिया के उन्नै लिकाड़े अर सारी ढाळ की बिमारियां अर सारी ढाळ की कमजोरियां नै ठीक करै। 2 इन बारहा प्रेरितां के नाम ये सै: पहल्या शमौन, जो पतरस कुहावै सै, अर उसका भाई अन्द्रियास, जब्दी का बेड़ा याकूब, अर उसका भाई यूहन्ना; 3 फिलिप्पुस, अर बरतुलमै, थोमा, अर चुंगी लेण आळा मत्ती, हलफई का बेटा याकूब, अर तदे, 4 शमौन कनानी, अर यहूदा इस्करियोती जिसनै वो पकड़वा भी दिया। 5 इन बारहां तै यीशु नै यो हुक्म देके खिन्द्या: "गैरजातियां कात्री ना ज्याइयो, अर सामरियां के किस्से नगर म्ह दाखल ना होइये। 6 पर इस्राएल के कुणबे की ए खुई होड़ी भेड्डा के धोरै जाइये। 7 अर चालते-चालते यो प्रचार करो: सुर्ग का राज्य धोरै आ गया। 8 बिमारां नै ठीक करो, मरै होए नै जीवाओ, कोढ़ियां नै शुध्द करो, औपरी आत्मायां नै लिकाड़ो। थमनै मुफत लिया सै मुफत द्यो। 9 आपणे अंगोछां म्ह ना तो सोन्ना, अर ना चाँदी, अर ना ताम्बा राखियो; 10 रास्ते खात्तर ना झोळी लियो, ना दो कुडते, ना जुत्ती अर ना लाठी ल्यो, क्यूँके मजदूर नै उसका खाणा मिलना चाहिए। 11 "जिस किस्से नगर या गाम म्ह जावओ, तो बैरा पाड़ो के कुण लायक सै। अर जिब्व ताही ओड़ै तै ना लिकड़ो, उससे के गेल्या रहो। 12 घर म्ह बड़ते आणी उसनै शीश दिए। 13 जै उस घर के माणस लायक होंगे तो थारा कल्याण उन पै पुहँगा, पर जै वे लायक ना हों तो थारा कल्याण थारै धोरै उल्टा ए आ ज्यागा। 14 जो कोए थमनै ना अपनावै अर थारी बात ना सुणै, उस घर या उस नगर तै लिकड़ते आणी आपणे पैरां की धूल झाड़ लियो। 15 मैं थमनै सच्ची कहूँ सूँ के न्याय के दिन उस नगर की दशा तै सदोम अर अमोरा के देश की दशा घणी सहण लायक होगी। 16 "देखो, मैं थमनै भेड्डा की तरियां भेड्डियां के बिचाल्ये खिन्दाऊ सूँ, इस करके साँपां की तरियां अकूमंद अर कबुतरां की तरियां भोले बणो। 17 पर माणसां तै चौकस रहो, क्यूँके वे थमनै बड्डी पंचायतां म्ह साँपे, अर अपनी पंचायतां म्ह थारै कोड़े मारेंगे। 18 थम मेरै खात्तर हकीमां अर राजां के स्याम्ही उन पे, अर गैरजातियां पे गवाह होण के खात्तर खिन्दाए जावोंगे। 19 जिब्व वे थमनै पकड़वावें तो या फिकर ना करयो के हम किस रीति तै या के कहवागें, क्यूँके जो किम्मं थारे ताही कहणा होगा, वो उससे बखत थारै ताही बता दिया ज्यागा। 20 क्यूँके बोलण आळे थम न्ही सों, पर थारे पिता की आत्मा थारे म्ह बोलै सै। 21 "भाई, भाई नै अर पिता बेहँ नै, घात के खात्तर साँप देंगें, अर बाळक आपणे माँ बाप के विरोध म्ह उठ के उन्नै मरवा देंगें। 22 मेरै नाम के कारण सारे माणस थारै तै बैर करेंगें, पर जो आखर ताही सबर राखैगा उससे का कल्याण होगा। 23 जिब्व वे थमनै नगर म्ह सतावै, तो दूसरे म्ह भाग ज्याइओ। मैं थमनै सच्च कहूँ सूँ, थम इस्राएल के सारे नगरां म्ह न्ही घूम सकोगें के माणस का बेटा आ ज्यागा। 24 "चेल्या आपणे गुरु तै बड्डा न्ही होदा; अर ना नौकर आपणे मालिक तै। 25 चेल्ये का गुरु के, अर नौकर का मालिक के बराबर होणा ए भोत सै। जिब्व उन्नै घर के मालिक तै शैतान कहा तो उसके घरआळां नै के किमे न्ही कहवैगे। 26 "इस करके माणसां तै ना डरो; क्यूँके किमे ढँका न्ही जो खोल्या ज्यागा, अर ना किमे ल्हूक्या सै जो जाणा न्ही ज्यागा। 27 जो मैं थारै तै अन्धेरे म्ह कहूँ सूँ, उसनै थम चान्दणे म्ह कहो; अर जो कानां तै सुणौ सों, उसनै छातां पै चढ़ के प्रचार करो। 28 जो देही पे वार करै सै, पर आत्मा पे वार न्ही कर सकदे, उनतै ना डरये; पर उसतै डरयो, जो आत्मा अर देही दोनुआ नै नरक म्ह नाश कर सकै सै। 29 के पिस्या म्ह दो गोरिया न्ही बिकदी? तो भी थारे पिता की मर्जी के बिना उन म्ह तै एक भी धरती पे न्ही गिर सकदी। 30 थारै सिर के बाळ भी सारे गिणे होड़े सै। 31 इस करके डरो ना; थम भोत गोरियां तै बढ के सों। 32 जो कोए मन्त्रै माणसां के स्याम्ही मान लेगा, उसनै मैं भी आपणे सुर्गीय पिता के स्याम्ही मान ल्युंगा। 33 पर जो कोए माणसां के स्याम्ही मेरा इन्कार

करैगा, उसनै मैं भी आपणे सुर्गीय पिता के स्याम्ही इन्कार करूंगा। 34 "यो ना समझो के मैं धरती पे मिलाप करवान आया सूँ; मैं मिलाप करवान न्ही, पर तलवार चलान आया सूँ। 35 मैं तो आया सूँ के; माणस नै उसके पिता तै, अर बेटी नै उसकी माँ तै, अर बहू नै उसकी सास तै न्यारा कर द्यु; 36 माणस के बैरी उसके घर के ए लोग होंगे। 37 "जो माँ या बाप नै मेरै तै घणा प्यारा मान्यै सै, वो मेरै लायक कोणी; अर जो बेटा या बेटी नै मेरै तै घणा प्यारा मान्यै सै, वो मेरै लायक कोणी; 38 अर जो आपणा क्रूस लेके मेरै पाच्छे न्ही चाल्यै वो मेरै लायक कोणी। 39 जो आपणे प्राण/जान बचावै सै, वो उसनै खोवैगा; अर जो मेरै कारण अपना प्राण/जान खोवै सै, वो उसनै पावैगा। 40 "जो थमनै मान ले सै, वो मन्त्रै मान लेवै सै; अर जो मन्त्रै मान ले सै, वो मेरै भेझण आळां नै मान ले सै। 41 जो नब्बियां नै नब्बी जाण के मान्यै, वो नब्बियां का बदला पावैगा; अर जो धर्मी नै धर्मी जाण के मान्यै, वो धर्मी का बदला पावैगा। 42 जो कोए इन छोट्या म्ह तै एक ने मेरा चेल्या जाण के सिर्फ एक कटोरा ठंडा पाणी पियावैगा, मैं थमनै सच कहूँ सूँ, वो किस्से रीति तै आपणा इनाम न्ही खोवैगा।

11 जिब्व यीशु नै आपणे बारहा चेल्यां ताही हुक्म दे दिया, तो वो उनकै नगरां म्ह उपदेश अर प्रचार करण नै ओड़ै तै चल्या गया। 2 युहन्ना नै जेळ म्ह मसीह के काम्मां की खबर सुणी अर आपणे चेल्यां ताही उसतै न्यु बुझण खन्दाया, 3 "के आणआळा तू ए सै, या हम किसे वोर की बाट देख्वा?" 4 यीशु नै जबाब दिया, "जो किमे थम सुणो सो अर देखो सो, यो सारा जाके युहन्ना ताही कह द्यो, 5 के आंधे देखै सै अर लंगड़े चालै-फिरै सै, कोढ़ी शुध्द करे जावै सै अर बहरे सुणै सै, मुर्दे जिन्दे करे जावै सै, अर कंगाला ताही सुसमाचार सुणाया जावै सै। 6 अर धन्य सै वो, जो मेरै बाबत ठोकर कोनी खांदा।" 7 जिब्व वे ओड़ै तै चाल दिये, तो यीशु युहन्ना के बारे म्ह माणसां तै कहण लाया, "थम बण म्ह के देखण गये थे? के बाळ तै हाल्दे होये सरकण्डे नै? 8 फेर थम के देखण गये थे? के सुथरे लत्ते पहरै होड़ माणस ताही? देखो, जो सुथरे लत्ते पहरै सै, वे महल्ला म्ह रहवै सै। 9 तो फेर क्यातै गये थे? के किसे नब्बी नै देखण ताही? हम्बै, मैं थमनै कहूँ सूँ के नब्बी तै भी बड्डे ताही। 10 यो वोए सै जिसके बारे म्ह लिख्या सै: 'देख, मैं आपणे दूत ताही तैरै आगै खन्दाऊँ सूँ, जो तैरै आगै तेरा रास्ता त्यार करैगा।' 11 मैं थमनै कहूँ सूँ के जो लुगाइयां तै जणै सै, उनम्ह तै युहन्ना बपतिस्मा देणआळे तै बड्डा कोए न्ही होया; पर जो सुर्ग के राज म्ह छोटे तै भी छोटा सै वो उसतै बड्डा सै। 12 युहन्ना बपतिस्मा देण आळे के दिनां तै इब ताही सुर्ग के राज म्ह हान्ने तै बड़दा रहया सै, अर ठाड्डा उसनै खोस लेवै सै। 13 युहन्ना ताही सारे नब्बी अर नियम-कायदे भविष्यवाणी करदे रहे। 14 अर चाहो तो मान्त्रो के एलियाह जो आण आळा था, वो योए सै। 15 जिसके सुनण के कान हो, वो सुण ले। 16 "मै इस बखत के माणसां की बराबरी किस तै करूँ? वे उन बाळका की ढाळ सै, जो बजारां म्ह बैठे होड़ एक दुसरे तै रूका मारके कहवै सै: 17 'हमनै थारै खातर बाँसली बजाई, अर थम कोनी नाचे; हमनै बिलाप करया, अर थमनै छात्ती कोनी पिट्टी।' 18 क्यूँके युहन्ना ना खांदा आया अर ना पिन्दा, अर वे कहवै सै, 'उसम्ह औपरी आत्मा सै।' 19 माणस का बेड़ा खांदा-पिन्दा आया, अर वे कहवै सै 'देखो, पेडू अर पियकड़ माणस, महसूल लेणआळे अर पापियां का मित्तर।' पर ज्ञान आपणे काम्मां तै साच्चा ठहराया गया सै।" 20 फेर वो उन नगरा ताही उलाहना देण लाया, जिनम्ह उसनै घणे सामर्थ के काम करे थे, क्यूँके उन्नै आपणा मन कोनी फिराया था। 21 "हाय, खुराजिन! हाय, बैत्तसैदा! जो सामर्थ के काम थारै म्ह करे गये, जै वे सूर-सैदा म्ह करे जान्दे, तो टाट वोढ के, अर राख म्ह बैठ के वे कदे के मन फिरा लेंदे। 22 पर थम नै कहूँ सूँ के न्याय के दिन थारी हालत तै सूर-सैदा की हालत घणी सहण जोगी होवैगी। 23 हे कफरनहूम, के तू सुर्ग ताही ऊँचा करया जावैगा! तू तो अधोलोक तक नीचे जावैगा जो सामर्थ के काम तैरै म्ह करे गये सै, जै सदोम म्ह करे जान्दे, तो वो आज ताही बणया रहन्दा। 24 पर मैं थमनै कहूँ सूँ के न्याय के दिन तेरी हालत तै सदोम की हालत घणी सहण जोगी होवैगी।" 25 उससे टेम यीशु नै कहा, "हे पिता जी, सुर्ग अर धरती के प्रभु, मैं तेरा शुक्रियादा करूँ सूँ के तन्नै इन बात्तां ताही ज्ञानियाँ अर समझदारां तै लकोए राख्या, अर बाळका ताही दिखा दिया सै। 26 हम्बै, हे पिता जी, क्यूँके तन्नै योए भाया। 27 'मेरे पिता नै

मेरे ताही सारा किमे सौप्या सै; अर कोए बेट्टे ताही कोनी जाणदा, सिर्फ पिता; अर कोए पिता ताही कोनी जाणदा, सिर्फ बेट्टा; अर वो जिस पै बेट्टा उस ताही प्रगट करना चाहवै।<sup>28</sup> "हे सारे महनत करण आळयो अर बोझ तै दबे होड माणसों, मेरे धोरै आवो; मै थमनै बिश्राम हूँगा।"<sup>29</sup> मेरा जुआ आपणे ऊपर ठा ल्यो, अर मेरे तै सीकखो; क्यूँके मै नरम अर मन म्ह दीन सूँ; अर थम आपणे मन म्ह बिश्राम पावोगे।<sup>30</sup> क्यूँके मेरा जुआ सोखा अर मेरा बोझ हल्का सै।

**12** उस बखत यीशु सब्त कै दिन खेत्तां म्ह तै होकै जावै था, अर उसके चेल्यां नै भूख लागी तो वे बालें तोड़-तोड़कें खाण लागे।<sup>2</sup> फरीसियाँ नै न्यू देखकें उसतै बोले, "देख, तेरे चेल्ले वो काम करै सै, जो सब्त कै दिन करणा ठीक कोनी।"<sup>3</sup> यीशु बोल्या, "के थमनै न्ही पढ़या, के दाऊद नै, जिब्व वो अर उसके मित्तर भूखे होये तो के करया?"<sup>4</sup> वो किस तरिया पणमेशर कै घरा गया, अर भेंट की रोटी खाई, जिनका खाणा ना तो उस ताही अर ना उसके मित्तरां ताही पर सिर्फ याजकां ताही सही था?<sup>5</sup> या के थमनै नियम-कायदा म्ह न्ही पढ़या के याजक सब्त कै दिन मन्दर म्ह सब्त कै दिन की बिधि ताही तोड़ण पै भी बेकसूर ठहरै सै? <sup>6</sup> पर मै थमनै कहुँ सूँ के उरै वो सै जो मन्दर तै भी बड्डा सै।<sup>7</sup> जै थम इसका मतलब जाणदे, मै दया तै राजी होऊँ सूँ, बलिदान तै न्ही, तो थम बेकसूर ताही कसूरवार कोनी ठहरान्दे।<sup>8</sup> माणस का बेट्टा तो सब्त कै दिन का भी प्रभु सै।<sup>9</sup> ओड़ै तै चालकें वो उनके आराधनालय म्ह आया।<sup>10</sup> ओड़ै एक माणस था, जिसका हाथ सुखरया था। उन्नै यीशु पै दोष लाण खातर उसतै बुझया, "के सब्त कै दिन चंगा करणा ठीक सै?"<sup>11</sup> उसनै उनतै कह्या, "थारै म्ह तै इसा कौण सै जिसकी एक ए भेड हो, अर वा सब्त कै दिन खडहे म्ह पड जावै, तो वो उसताही पकड़कें न्ही काड्डे?"<sup>12</sup> भला, माणस का मोल भेड तै कितना बाध सै! ज्यांतै सब्त कै दिन भलाई करणा ठीक सै।<sup>13</sup> फेर उसनै उस माणस तै कह्या, "आपणा हाथ बढा।" उसनै बढ़ाया, अर वो दूसरे हाथ की तरिया चंगा होया।<sup>14</sup> फेर फरिसियाँ नै बाहरण जाके उसके बिरोध म्ह सलाह करी के उसका नास किस तरिया करया जावै।<sup>15</sup> न्यू जाणके यीशु ओड़ै तै चल्या गया। अर घणे माणस उसके पाच्छे हो लिए, अर उसनै सारया ताही चंगा करया,<sup>16</sup> अर उन ताही चिताया के मेरे बारै म्ह ना बताणा,<sup>17</sup> ताके जो बचन यशायाह नब्बी कै जरिये कहया गया था, वो पूरा हो :  
"देखो, यो मेरा सेवक सै, जिस ताही मन्त्रे छाट्या सै; मेरा प्यारा, जिसतै मेरा मन राजी सै : मै आपणा आत्मा उसपै तारुगाँ, अर वो दूसरी जात्तां नै न्याय की खबर देवैगा।<sup>19</sup> वो ना रोळा करैगा, अर ना किल्की मारैगा, ना बजारां म्ह उसका कोए शब्द सुणैगा।<sup>20</sup> वो कुचले होड सरकण्डया ताही कोनी तोड़ैगा, धुम्मा देन्दी होई बत्ती ताही कोनी बुझावैगा, जीब्व ताही वो न्याय नै प्रबल न्ही करावै।<sup>21</sup> अर दूसरी जात उसके नाम पै आस राखैगी।"<sup>22</sup> फेर माणस एक आंधे-गूँगे नै जिसम्ह औपरी आत्मा थी, उसके धोरै ल्याए; अर उसनै उस ताही चंगा करया, अर वो बोझण अर देखण लाग्या।<sup>23</sup> इस पै सारे माणस हैरान होकें कहण लागे, "यो के दाऊद की ऊलाद सै!"<sup>24</sup> पर फरिसियाँ नै न्यू सुणकें कह्या, "यो तो औपरी आत्मायाँ का सरदार बालजबूल की मदद कै बगैर औपरी आत्मायाँ ताही कोनी काढदा।"<sup>25</sup> उसनै उनकी मन की बात जाणकें उनतै कह्या, "जिस किसे राज म्ह फूट होवै सै, वो उजड़ जावै सै; अर कोए नगर या घराना जिसम्ह फूट होवै सै, बणया कोनी रहवैगा।<sup>26</sup> अर जै शैतान ए शैतान नै काड्डे, तो वो आपणा ए बिरोधी बणया; फेर उसका राज किस तरिया बणया रहवैगा?"<sup>27</sup> भला, जै मै शैतान की मदद तै औपरी आत्मायाँ नै काड्डे सूँ, तो थारी पीढी किसकी मदद तै काड्डे सै? इसकरकें वै थारा न्याय करैगें।<sup>28</sup> पर जै मै पणमेशर की मदद तै औपरी आत्मायाँ ताही काड्डे सूँ, तो पणमेशर का राज थारै धोरै आण पहोच्या सै।<sup>29</sup> या किस तरिया कोए माणस किसे ठाड्डे माणस कै घरा बड़कें उसका माळ लूट सकें सै जिब्व ताही के पहल्या उस ठाड्डे ताही ना जुड़ ले? जिब्व वो उसका घर लूट लेवैगा।<sup>30</sup> जो मेरे गेल्या न्ही वो मेरे बिरोध म्ह सै, अर जो मेरे गेल्या न्ही कड्डा करदा वो खिंडावै सै।<sup>31</sup> ज्यांतै मै थारै तै कहुँ सूँ के माणस का सारे ढाळ का पाप अर बुराई बखशी जावैगी, पर पवित्र आत्मा की बुराई बखशी कोनी जावैगी।<sup>32</sup> जो कोए माणस के बेट्टे कै बिरोध म्ह कोए बात कहवैगा, उसका यो कसूर बखशा जावैगा, पर जो कोए पवित्र आत्मा कै

बिरोध म्ह कीमे कहवैगा, उसका कसूर ना तो इस लोक म्ह अर ना परलोक म्ह बखशा जावैगा।<sup>33</sup> "जै दरखत नै बढिया कहो, तो उसके फळ नै भी बढिया कहो, या दरखत नै निकम्मा कहो, तो उसके फळ नै भी निकम्मा कहो, क्यूँके दरखत आपणे फळ तै ए पिच्छाणा जावै सै।<sup>34</sup> हे नाग के बच्चो, थम भुन्डे होके किस तरिया बढिया बात कह सको सो? क्यूँके जो मन म्ह भरया सै, वोए मुँह पै आवै सै।<sup>35</sup> भला माणस मन कै भले भण्डारै तै भली बात काड्डे सै, अर भुन्डा माणस मन कै भुन्डे भण्डारै तै भुन्डी बात काड्डे सै।<sup>36</sup> अर मै थारै तै कहुँ सूँ के जो-जो निकम्मी बात माणस कहवैगें, न्याय कै दिन वे हरेक उस बात का लेखा देवैगें।<sup>37</sup> क्यूँके तू आपणी बात्तां कै कारण बेकसूर, अर आपणी बात्तां ए कै कारण कसूरवार ठहराया जावैगा।"<sup>38</sup> इस पै कीमे शास्त्रियाँ अर फरिसियाँ नै उसतै कह्या, "हे गुरु, हम तेरै तै एक निशात्री देखना चाहवा सा।"<sup>39</sup> उसनै उन ताही जबाब दिया, "इस युग के भुन्डे अर जार माणस निशात्री टोहवै सै, पर योना नब्बी की निशानी नै छोड़ कोए और निशात्री उन ताही कोनी देई जावैगी।<sup>40</sup> योना तीन रात-दिन व्हेल जल-जन्तु कै पेट म्ह रहया, उससे तरिया ए माणस का बेट्टा तीन रात-दिन धरती कै भीत्तर रहेगा।<sup>41</sup> निनवे के माणस न्याय कै दिन इस युग के माणसां कै गेल्या उठकें उन ताही कसूरवार ठहरावैगें, क्यूँके उन्नै योना का प्रचार सुणकें मन फिराया; अर देखो, उरै वो सै जो योना तै भी बड्डा सै।<sup>42</sup> दक्षिण की रानी न्याय दिन इस युग के माणसां कै गेल्या उठकें उन ताही कसूरवार ठहरावैगी, क्यूँके वा सुलैमान का ज्ञान सुणन कै खातर धरती कै सिरे तै आई; अर देखो, उरै वो सै जो सुलैमान तै भी बड्डा सै।<sup>43</sup> "जिब्व अशुद्ध आत्मा माणस म्ह तै लिकड़ कै जावै सै, तो सुखी जंगहा म्ह आराम टोहन्दी फिरै सै, अर पांटी कोनी।<sup>44</sup> फेर कहवै सै, 'मै आपणे उससे घर म्ह जित तै लिकड़ी थी, बोहड़ जाऊँगी।' अर बोहड़कें उस ताही सुन्ना, झाड़ा-बुहारा अर शज्या-धज्या पावै सै।<sup>45</sup> फेर वा जाके आपणे तै और भुन्डी सात आत्मायाँ ताही आपणे गेल्या लीयावै सै, अर वे उसम्ह बड़कें ओड़ै बास करै सै, अर उस माणस की पाच्छली हालत पहल्या तै भी भुन्डी हो जावै सै। इस युग के भुन्डे माणसां की हालत भी इसी ए होवैगी।"<sup>46</sup> जिब्व वो भीड़ तै बात करण ए लागरया था, तब उसकी माँ अर भाई बाहरणै खडे थे अर उसतै बात करणा चाहवै थे।<sup>47</sup> किसे नै उसतै कह्या, "देख, तेरी माँ अर तेरे भाई बाहरणै खडे सै, अर तेरै तै बात करणा चाहवै सै।"<sup>48</sup> या सुणकें उसनै कहण आळे ताही जबाब दिया, "कौण सै मेरी माँ? अर कौण सै मेरे भाई?"<sup>49</sup> अर आपणे चेल्यां की कात्री आपणा हाथ बढा कै कह्या, "देखो, मेरी माँ अर मेरे भाई ये सै।<sup>50</sup> क्यूँके जो कोए मेरे सुर्गीय पिता की इच्छा पै चालै वो ए मेरा भाई अर मेरी बाहण अर मेरी माँ सै।

**13** उससे दिन यीशु घर तै लिकड़कें झील कै कंटारै पै जा बैठया।<sup>2</sup> अर उसके धोरै इसी भीड़ कड्डी होई के वो किस्ती पै चढ्या, अर सारी भीड़ कंटारै पै खड़ी रही।<sup>3</sup> अर उसनै उनतै उदाहरणा म्ह घणी ए बात कहीं : "एक बोण आळा बीज बोण लिकड़या।<sup>4</sup> बोंदे बखत कीमे बीज राही कै कंटारै पड़े अर पन्छियाँ नै आके चुग लिया।<sup>5</sup> कीमे बीज पथरीली धरती पै पड़े, जडै उनताही घणी माड्डी ना मिली अर डून्धी माड्डी ना मिलण कै कारण वे तोळे जाम आए।<sup>6</sup> पर सूरज लिकड़णै पै वे जळगे, अर जड़ ना पकड़ण कै कारण सुखगे।<sup>7</sup> कीमे बीज झाड़ियाँ म्ह पड़े, अर झाड़ियाँ नै बढ़कें उन ताही दाब लिया।<sup>8</sup> पर कीमे बीज बढिया धरती पै पड़े, अर फळ ल्याए, कोए सौ गुणा, कोए साठ गुणा, अर कोए तीस गुणा।<sup>9</sup> जिसकें कान हो वो सुण लेवै।"<sup>10</sup> चेल्यां नै धोरै आके उसतै कह्या, "तू माणसां तै उदाहरणा म्ह क्यांतै बात करै सै?"<sup>11</sup> उसनै जबाब दिया, "थारै ताही सुर्गराज के भेद्यां की समझ दी गई सै, पर उन ताही न्ही।<sup>12</sup> क्यूँके जिसकें धोरै सै, उसतै दिया जावैगा, अर उसके धोरै घणा हो जावैगा; पर जिसकें धोरै कीमे न्ही सै, उसतै जो कीमे उसके धोरै सै, वो भी ले लिया जावैगा।<sup>13</sup> मै उनतै उदाहरणा म्ह ज्यांतै बात करूँ सूँ के वे देखदे होए कोनी देखदे अर सुणदे होए कोनी सुणदे, अर न्ही समझदे।<sup>14</sup> उनकें बाबत यशायाह की या भविष्यवाणी पूरी होवै सै : 'थम कान्ना तै तो सुणोगे, पर समझोगे कोनी; अर आँखा तै तो देखोगे, पर थमनै कोनी सूझैगा।'<sup>15</sup> क्यूँके इन माणसां का मन मोट्टा होग्या सै, अर वे कान्ना तै उँच्चा सुणै सै अर उन्नै आपणी आँख मूंद ली सै; कदे इसा ना हो के वे आँखा तै देखै, अर कान्ना तै सुणै अर मन तै

समझें, अर पलट जावै, अर मै उन्नै चंगा करूँ।' 16 पर धन्य सै थारी आँख, के वे देखै सै; अर थारे कान के वे सुणै सै। 17 क्यूँके मै थमनै साञ्ची कहुँ सूँ के घण खरे नब्बियाँ नै अर धर्मिया नै चाहया के जो बात थम देखो सो, देखै, पर नी देखी; अर जो बात थम सुणो सो, सुणै, पर नी सुणी। 18 "इब थम बोण आळे के उदाहरण का मतलब सुणो : 19 जो कोए राज्य का बचन सुणकै कोनी समझदा, उसकै मन म्ह जो कीमे बोया गया था, उस ताही दुष्ट आकै खोस ले जावै सै। यो वो ए सै जो राही कै कंठारै बोया गया था। 20 अर जो पथरीली धरती पै बोया गया, यो वो सै, जो वचन सुणकै जिब्वे खुशी कै गेल्या मान लेवै सै। 21 पर आपणे म्ह जड़ नी राखण कै कारण वो माडे से दिन का सै, अर जिब्वे वचन कै कारण क्लेश या संकट होवै सै, तो जिब्वे ठोकर खावै सै। 22 जो झाड़ियाँ म्ह बोया गया, यो वो सै, जो वचन ताही सुणै सै, पर इस दुनिया की फिक्र अर धन का धोखा वचन ताही दाबै सै, अर वो फळ न्ही ल्यादा। 23 जो बढिया धरती पै बोया गया, यो वो सै, जो वचन ताही सुणकै समझै सै, अर फळ ल्यावै सै; कोए सौ गुणा, कोए साठ गुणा, अर कोए तीस गुणा।" 24 यीशु नै उन ताही एक और उदाहरण दिया : "सुर्ग का राज उस माणस के जिसा सै जिसनै आपणे खेत मै बढिया बीज बोया। 25 पर जिब्वे माणस सोवै थे तो उसका बैरी आकै गेहूँ कै बिचाळै जंगली बीज बोके चल्या गया। 26 जिब्वे अंकुर लिकड़े अर बाल लागी, तो जंगली दाण्या के पौधे भी दिखण लागे। 27 इस पै घरेलू नौकरा नै आकै उसतै कहा, 'हे मालिक, के तन्नै आपणे खेत म्ह बढिया बीज कोनी बोया था? फेर जंगली दाण्या के पौधे उसम्ह कित तै आए?' 28 उसनै उनतै कहा, 'यो किसे बैरी का काम सै।' नौकरा नै कहा, 'के तेरी मर्जी सै के हम जाके उन ताही कड़े करा?' 29 उसनै कहा, 'ना, इसा ना हो के जंगली दाण्या के पौधे कड़े करदे हाण थम उनकै गेल्या गेहूँ नै भी पाड़ ल्यो। 30 लामणी ताही दोनुआ नै एक सेत्ती बधण द्यो, अर लामणी के बखत मै काटण आळा तै कहुँगे के पहल्या जंगली दाण्या के पौधे कड़े करके बाळण खातर उनके भरोटे जुड़ ल्यो, अर गेहूँ ताही मेरै खते म्ह कड़ा करो।' 31 उसनै उन ताही एक और उदाहरण दिया : 'सुर्ग का राज राई कै एक दाणै कै जिसा सै, जिस ताही किसे माणस नै लेके आपणे खेत म्ह बो दिया। 32 वो सारे बिजाँ तै छोड़ा तो होवै सै पर जिब्वे बध जावै सै फेर सारे साग-पात तै बड़ा होवै सै; अर इसा दरखत हो जावै सै के अकास के पंछी आकै उसकी डाळीयाँ पै बसेरा करै सै।' 33 उसनै एक और उदाहरण उन ताही सुणाया : 'सुर्ग का राज खमीर कै जिसा सै जिस ताही किसे लुगाई नै लेके तीन पसेरी चून म्ह रळ्या अर होंदे-होंदे वो सारा खमीरा बणग्या।' 34 ये सारी बात यीशु नै उदाहरण म्ह माणसाँ तै कहीं, अर बिना उदाहरण वो उनतै कीमे न्ही कहवै था, 35 के जो वचन नब्बी कै जरिये कहया गया था, वो पूरा होवै: 'मै उदाहरण कहण नै आपणा मुँह खोल्लुंगा: मै उन बात्ताँ नै जो दुनिया की पैदाईस तै लुटकी होई सै, प्रगट करुंगा।' 36 फेर वो भीड़ नै छोड़ कै घरा आया, अर उसके चेल्याँ नै उसकै धोरै आकै कहा, 'खेत म्ह जंगली दाणै का उदाहरण म्हारै ताही समझा दे।' 37 उसनै उन ताही जबाब दिया, 'बढिया बीज का बोण आळा माणस का बेड़ा सै। 38 खेत दुनिया सै, बढिया बीज राज्य की ऊलाद, अर जंगली बीज दुष्ट की ऊलाद सै। 39 जिस बैरी नै उन ताही बोया वो शैतान सै; लामणी दुनिया का खात्मा सै, अर काटण आळे सुर्गदुत सै। 40 आखर म्ह जिस तरिया जंगली दाणे कड़े करे जावै अर बाळ जा सै उस्से तरिया दुनिया का खात्मा होवैगा। 41 माणस का बेड़ा आपणे सुर्गदुता नै खन्दावैगा, अर वे उसकै राज्य म्ह तै सारे ठोकरा के कारण नै अर भुन्डे काम करणीयाँ नै कड़े करैंगे। 42 अर उन्नै आग कै कुण्ड म्ह गेरैंगे, जड़ै रोणा, अर दाँत पिसना होवैगा। 43 उस बखत धर्मी आपणे बाप कै राज्य म्ह सूरज की ढाळ चमकेंगे। जिसके कान हो वो सुण लेवै। 44 सुर्ग का राज्य खेत म्ह लुके होड़ धन की ढाळ सै, जिस ताही किसे माणस नै पाया अर लको दिया, अर मारे खुशी कै आपणा सारा कीमे बेच दिया अर उस खेत ताही मोल ले लिया। 45 'फेर सुर्ग का राज्य एक ब्योपारी की तरिया सै जो आच्छे मोतियाँ की टोह म्ह था। 46 जिब्वे उसनै एक घणा महंगा मोती मिल्या तो उसनै जाके आपणा सारा कीमे बेच दिया अर उस ताही मोल ले लिया। 47 'फेर सुर्ग राज्य उस बड़े जाळ की ढाळ सै जो समुन्दर म्ह गेरया जावै, अर हरेक ढाळ की मच्छी ताही समेट ल्यावै। 48 अर जिब्वे जाळ भरग्या, तो मछियारे उस ताही कंठारै पै

खींच ल्यावै, अर बैठकै बढिया-बढिया तो बासणा म्ह कड़ा करी अर बेकार बगा दीं। 49 दुनिया के अन्त म्ह इस तरिया ए होवैगा। सुर्गदुत आकै दुष्टा नै धर्मिया तै न्यारे करैंगे, 50 अर उन्नै आग कै कुण्ड म्ह गेरैंगे। जड़ै रोणा, अर दाँत पिसना होवैगा। 51 'के थम नै ये सारी बात समझी?' उन्नै उसतै कहा, 'हम्बै।' 52 यीशु नै उनतै कहा, 'इसकरके हरेक शास्त्री जो सुर्ग कै राज्य का चेला बणया सै, उस घरवासे की तरिया सै जो आपणे भण्डार तै नयी अर पुराणी चीज काड़ै सै।' 53 जिब्वे यीशु नै ये सारे उदाहरण कह लिये, तो ओड़ै तै चल्या गया। 54 अर आपणे नगर म्ह आकै उनकै आराधनालय म्ह उन्नै इसा उपदेश देण लाग्या के वे हैरान होके कहण लाग्ये, 'इसनै यो ज्ञान अर सामर्थ के काम कित तै मिले? 55 के यो खात्ती का छोरा कोनी? अर के इसकी माँ का नाम मरियम अर इसके भाईयाँ के नाम याकूब, युसूफ, शमौन अर यहूदा कोनी? 56 अर के इसकी सारी बेब्वे म्हारै बिचाळै कोनी रहन्दी? फेर इसनै यो सारा कित तै मिल्या?' 57 इस तरिया उन्नै उसकै कारण ठोकर खाई, पर यीशु नै उनतै कहा, 'नब्बी का आपणे देश अर घर नै छोड़ और कीते निरादर कोनी होन्दा।' 58 अर उसनै ओड़ै उनके अबिश्वास कै कारण घणे सामर्थ्य के काम कोन्या करै।

14 उस टैम चौथाई देश के राजा हेरोदेस नै यीशु का जिक्रा सुणया, 2 अर उसनै आपणे नौकरा तै कहा, 'यो युहन्ना बपतिस्मा देण आळा सै! वो मरे होया म्ह तै जिन्दा उठ्या सै, ज्यातै उसतै सामर्थ के काम प्रगट होवै सै 3 क्यूँके हेरोदेस नै आपणे भाई फिलिपुस की बीरबान्नी हेरोदियास कै कारण, युहन्ना ताही पकड़ कै जुड़या अर जेळ म्ह गेर दिया था। 4 क्यूँके युहन्ना नै उसतै कहा था के इस ताही राखणा तैरे खातर ठीक कोनी सै। 5 ज्यातै वो उसनै मारणा चाहवै था, पर माणसाँ तै डरै था क्यूँके वे उसनै नब्बी मानै थे। 6 पर जिब्वे हेरोदेस का जन्म-दिन आया, तो हेरोदियास की बेटी नै त्यौहार म्ह नाच दिखाके हेरोदेस ताही राजी करया। 7 इस पै उसनै सूँह खाके बचन भर लिया, 'जो कीमे तू माँगैगी, मै तन्नै द्युंगा।' 8 वा आपणी माँ कै उकसाण तै बोल्यी, 'युहन्ना बपतिस्मा देणआळे का सिर थाळ म्ह उरै मन्नै मँगवा दे।' 9 राजा घणा दुखी होया, पर आपणी सूँह कै, अर गेल्या बैठणीयाँ कै कारण, हुकम दिया के दे दिया जावै। 10 अर उसनै जेळ म्ह माणसाँ ताही खन्दाके युहन्ना का सिर कटवा दिया; 11 अर उसका सिर थाळ म्ह ल्याया गया अर छोरी ताही दिया गया, जिस ताही वा आपणी माँ धोरै ले गयी। 12 फेर युहन्ना के चेले आए अर उसकी लाश ताही ले जाके गाड़ दिया, अर जाके यीशु ताही खबर दी। 13 जिब्वे यीशु नै सुणया, तो वो किस्ती पै चढ़के ओड़ै तै किसे सुनसान जंगहा ताही, एकान्त म्ह चल्या गया। माणस न्यु सुणकै नगर-नगर तै पांये-पांया उसकै पाच्छे हो लिये। 14 उसनै लिकड़के एक बड्डी भीड़ देखी अर उन पै तरस खाया, अर उनके बिमाराँ ताही चंगा करया। 15 जिब्वे साँझ होई तो उसकै चेल्याँ नै उसकै धोरै आकै कहा, 'या सुनसान जंगहा सै, अर वार होरी सै; माणसाँ ताही बिदा करया जावै के वे मोहल्याँ म्ह जाके आपणे खातर खाणा मोल लियावै।' 16 पर यीशु नै उनतै कहा, 'उनका जाणा जरूरी कोनी! थम ए इन्नै खाण नै द्यो।' 17 उन्नै यीशु तै कहा, 'उरै म्हारै धोरै पाँच रोड़ी अर दो मच्छिया नै छोड़ कै और कीमे कोनी सै।' 18 यीशु बोल्यो, 'उन ताही उरै मेरै धोरै लियावो।' 19 फेर यीशु नै माणसाँ ताही घास पै बैठण नै कहा, उन पाँच रोड़ी अर दो मच्छिया ताही लिया; सुर्ग काञ्ची देखके धन्यवाद करया अर रोटिया तोड़-तोड़के चेल्याँ ताही दीं, अर चेल्याँ नै आदमिया ताही। 20 जिब्वे सारे खाके छिकरंगे, तो चेल्याँ नै बचे होए टुकड़याँ तै भरी होई बारहा टोकरियाँ ठाई। 21 अर खाण आळे लुगाइयाँ अर बाळका नै छोड़के, पाँच हजार माणसाँ कै करीबन थे। 22 फेर उसनै जिब्वे आपणे चेल्याँ ताही किस्ती पै चढ़ाण कै खातर बेबस करया के वे उसतै पहल्या पार चले जावै, जिब्वे ताही वो आपणे माणसाँ ताही बिदा करै। 23 वो माणसाँ ताही बिदा करके, प्रार्थना करण नै न्यारा पहाड़ पै चल्या गया; अर साँझ ताही वो ओड़ै एकला था। 24 उस बखत किस्ती झील कै बिचाळै झालाँ तै हालण लागरी थी, क्यूँके बाळ स्याम्ही की थी। 25 अर यीशु रात कै चौथे पहर झील पै चाल्दे होए उनकै धोरै आया। 26 चेले उस ताही झील पै चाल्दे होए देख कै घबरागे। अर बोले, 'यो भूत सै!' अर भय कै मारे किल्की मारण लागे। 27 फेर यीशु नै जिब्वे उन तै बात करी अर बोल्यो, 'ढेठ बाँधो! मै सूँ डरो

मतना!" 28 पतरस नै उसतै जबाब दिया, "हे प्रभु, जै तू ए सै, तो मन्ने आपणे धोरै पाणी पै चालकै आण का हुक्म दे।" 29 यीशु बोल्या, "आ!" फेर पतरस किस्ती पै तै उतरकै यीशु कै धोरै जाण ताही पाणी पै चालण लाग्या। 30 पर बाळ नै देखकै डरग्या, अर जिब्व डुबण लाग्या तो किल्की मारकै बोल्या, "हे प्रभु, मन्ने बचा!" 31 यीशु नै जिब्व हाथ बढ़ाकै थाम लिया अर उसतै बोल्या, "हे अल्पबिश्वासी, तन्नै क्यातै शक करया?" 32 जिब्व वे किस्ती पै चढगे, तो बाळ थमगी। 33 इस पै उन्नै जो किस्ती पै थे, उसताही मुट्टे पड़ के बोले, "साच्चए, तू पणमेशर का बेट्टा सै।" 34 वे पार उतर के गन्नेसरत म्ह पहाचे। 35 ओड़ै के माणसां नै उस ताही पिच्छाण लिया अर वोरै-धोरै के सारे देशां म्ह खबर खन्दाई, अर सारे बिमारां नै उसकै धोरै ल्याए, 36 अर उस तै बिनती करण लागे के वे उन्हण आपणे लत्ते ए के कोर नै छुण दे अर जितन्या नै उस ताहि छुआ वे चंगे होगे। 36 फेर यरुशलैम तै कीमे फरीसी अर शास्त्री यीशु कै धोरै आकै बोले,

15 फेर यरुशलैम तै कीमे फरीसी अर शास्त्री यीशु कै धोरै आकै बोले, 2 "तेरे चेले बुढ्यां के रित-रिवाजां ताही क्यातै टाळै सै, के बिना हाथ धोए रोटी खावै सै?" 3 उसनै उन ताही जबाब दिया, "थम भी आपणी रित-रिवाज के कारण क्यातै पणमेशर का हुक्म टाळै सो?" 4 क्यूँके पणमेशर नै कह्या, 'आपणे बाप अर आपणी माँ का आदर करणा', अर जो कोए बाप या माँ ताही भूंडा कहवे, वो मार दिया जावै।' 5 पर थम कहो सो के जै कीमे तेरै ताही मेरै तै फेयदा होणा था, वो पणमेशर ताही भेंट चढाया जा लिया। 6 तो वो पिता का आदर ना करै, इस तरिया थमनै आपणी रित-रिवाज के कारण पणमेशर का वचन टाळ दिया। 7 हे कपटियो, यशायाह नै थारै बाबत या भविष्यवाणी ठीक करी सै : 8 ये माणस होडां तै तो मेरा आदर करै सै, पर उनका मन मेरै तै दूर सै। 9 अर वे खांम-खा मेरी भगति करै सै, क्यूँके माणसां के तरीक्यां नै धर्म उपदेश करकै सिखावै सै।" 10 फेर उसनै माणसां ताही आपणे धोरै बुलाकै उनतै कह्या, "सुणो, अर समझो : 11 जो मुँह म्ह जावै सै, वो माणस नै अशुद्ध कोनी करदा, पर जो मुँह तै लिकडै सै, वोए माणस नै अशुद्ध करै सै।" 12 फेर चेल्यां नै आकै उसतै कह्या, "के तन्नै बेरा सै के फेरिसियाँ नै यो वचन सुणके ठोकर खाई?" 13 उसनै जबाब दिया, "हरेक पौधा जो मेरै सुर्गीय पिता नै नही लाया, उखाड़ा जावैगा। 14 उन ताही जाण द्यो; वे आंधे राह बताणीये सै अर आंधा जै आंधे नै राह दिखावै, तो दोनु ए घड्डे मह गिरैगें।" 15 न्यू सुणके पतरस नै उसतै कह्या, "यो उदाहरण म्हारै ताही समझा दे।" 16 यीशु बोल्या, "के थम भी इब ताही बेअकले सो? 17 के थमनै नही बेरा के जो कीमे मुँह म्ह जावै वो पेट म्ह पडै सै, अर संडास के जरिये लिकड जावै सै? 18 पर जो कीमे मुँह तै लिकडै सै, वो मन तै लिकडै सै, अर वोए माणस ताही अशुद्ध करै सै। 19 क्यूँके भुन्डे बिचार, हत्या, दूसरी लुगाई धोरै जाणा, जारी, चोरी, झूठी गवाही अर बुराई मन तै ए लिकडै सै। 20 ये ए सै जो माणस ताही अशुद्ध करै सै, पर हाथ बिना धोए खाणा खाना माणस ताही अशुद्ध कोनी करदा।" 21 यीशु ओड़ै तै लिकडकै, सूर अर सैदा के प्रदेश के कात्री चल्या गया। 22 उस प्रदेश तै एक कनानी लुगाई लिकडी, अर किल्की मारकै कहण लागी, "हे प्रभु! दाऊद की ऊलाद, मेरै पै दया कर! मेरी बेटी ताही औपरी आत्मा घणी सतावै सै।" 23 पर यीशु नै उसतै कीमे जबाब कोनी दिया। फेर उसके चेल्यां नै आकै उसतै बिनती करी, "इस ताही बिदा कर, क्यूँके वा म्हारै पाच्छे किल्की मारदी आवण लागरी सै।" 24 यीशु नै जबाब दिया, "इस्राएल के कुन्बे की खोई होड भेडडा नै छोड मै किसे के धोरै कोनी खन्दाया गया।" 25 पर वा आई, अर यीशु ताही प्रणाम करकै बोली, "हे प्रभु, मेरी मदद कर।" 26 यीशु नै जबाब दिया, "छोरया की रोटी लैके कुत्या के आगे गेरना ठीक कोनी।" 27 उसनै कह्या, "साच्ची सै प्रभु, पर कुत्त भी वो चूर-चार खावै सै, जो उनकै मालिकां की मेज्जां तै पडै सै।" 28 इस पै यीशु नै उसताही जबाब दिया, "हे नारी, तेरा बिश्वास बड्डा सै। जिसा तू चाहवै सै, तेरै खातर उसाए हो।" अर उसकी बेटी उरसे घड़ी तै चंगी होगी। 29 यीशु ओड़ै तै गलील की झील के धोरै आया, अर पहाड़ पै चढकै बैठग्या। 30 फेर भीड़ पै भीड़ उसकै धोरै आई। वे आपणे गेल्या लंगड़ा नै, आंधा नै, गूंगया नै, टुंडया नै अर दुसरे घणा ए नै उसकै धोरै ल्याए, अर उन ताही उसके पांया म्ह गेर दिया, अर उसनै उन ताही चंगा करया। 31 जिब्व माणसां नै देख्या के गूंगे बोले सै, अर टुंडे

चंगे होवै सै, अर लंगडे चालै सै, अर आंधे देखे सै तो हैरान होके इस्राएल के पणमेशर की बड़ाई करी। 32 यीशु नै आपणे चेल्यां ताही बुलाया अर कह्या, "मन्ने इस भीड़ पै तरस आवै सै, क्यूँके वे तीन दिनां तै मेरै गेल्या सै अर उनके धोरै कीमे खाण नै कोनी सै। मै उन्नै भूकरा बिदा करणा नही चाहन्दा, कदे इसा ना हो राह म्ह थक हार के रह जावै।" 33 चेल्ले उसतै बोले, "हमनै इस बण म्ह कित तै इतनी रोटी मिलैगी के हम इतनी बड्डी भीड़ ताही छिकावा?" 34 यीशु नै उनतै बुझ्या, "थारै धोरै कितनी रोटी सै?" वे बोले, "सात, अर माड़ी-सी छोटी मच्छी।" 35 फेर उसनै माणसां ताही धरती पै बैठण का हुक्म दिया। 36 अर उन सात रोटी अर मच्छिया ताही लिया, धन्यवाद करके तोड्या, अर आपणे चेल्यां ताही देन्दा गया, चेल्ले आदमिया ताही। 37 इस तरिया सारे खाकै छिकगे अर चेल्यां नै बचे होड टुकड़यां तै सात टोकरे टाए। 38 खाण आळे लुगाईयां अर बाळका नै छोड के चार हजार माणस थे। 39 जिब्व वो भीड़ नै बिदया करके किस्ती म्ह चढ ग्या अर मगदन देश की सीम म्ह आया।

16 फेरिसियाँ अर सदुकियाँ नै धोरै आकै उस ताही परखण के खातर उसतै कह्या, "हमनै सुर्ग की कोई निशात्री दिखा।" 2 उसनै उन ताही जबाब दिया, "साँझ नै थम कहो सो, 'मौसम खुला रहवैगा, क्यातैके अकास लाल सै', 3 अर तडकए नै कहो सो, 'आज आंधी आवैगी, क्यूँके अकास लाल अर धूळ-भरया सै।' थम अकास के लछण देखके उसका भेद बता सको सो, पर टेमा के निशात्रा का भेद कोनी बता सकदे? 4 इस युग के भुन्डे अर जार आदमी निशात्री टोहवै सै, पर योना के निशान ताही छोड उन्नै ओर कोए निशात्री कोनी देई जावैगी।" अर वो उन्नै छोड के चल्या गया। 5 चेल्ले झील के परली वोड पहाचे, पर वे रोटी लेणा भूलगे थे। 6 यीशु नै उनतै कह्या, "देखो, फेरिसियाँ अर सदुकियाँ के खमीर तै चौकन्ने रहियो।" 7 वे आपस म्ह बिचार करण लागे, "हम रोटी कोनी ल्याए ज्यातै वो इस तरिया कहवै सै।" 8 न्यू सुणके यीशु नै उनतै कह्या, "हे अल्पबिश्वासियाँ, थम क्यातै बिचार करो सो के म्हारै धोरै रोटी कोनी सै? 9 के थम इब ताही नही समझे? के थमनै उन पाँच हजार की पाँच रोटी याद कोनी, अर ना यो के थमनै कितनी टोकरियाँ ठाई थी? 10 अर उननै चार हजार की sat रोटी, अर ना यो के थमनै कितने टोकरे टाए थे? 11 थम क्यातै नही समझदे के मन्ने थारै तै रोटियाँ के बाबत नही कहया, पर यो के फेरिसियाँ अर सदुकियाँ के खमीर तै चौकन्ने रहियो।" 12 फेर उनकी समझ आया के उसनै रोटी के खमीर तै नही, पर फेरिसियाँ अर सदुकियाँ की शिक्षा तै चौकन्ने रहण नै कहया था। 13 यीशु कैसरिया फिलिप्पी के प्रदेश म्ह आया, अर आपणे चेल्यां तै बुझण लाग्या, "आदमी माणस के बेट्टे नै के कहवै सै?" 14 वे बोले, "कीमे तो युहन्ना बपतिस्मा देणीया कहवै सै, अर कीमे एलिय्याह, अर कीमे यिर्मयाह या नब्बीयां म्ह तै कोए एक कहवै सै।" 15 उसनै उनतै कह्या, "पर थम मन्ने के कहो सो?" 16 शमौन पतरस नै जबाब दिया, "तू जिन्दे पणमेशर का बेट्टा मसीह सै।" 17 यीशु नै उस ताही जबाब दिया, "हे शमौन, योना के बेट्टे, तू धन्य सै; क्यूँके मांस अर लहू नै नही, पर मेरै पिता नै जो सुर्ग म्ह सै, या बात तेरै पै प्रगट करी सै। 18 अर मै भी तेरै तै कहूँ सूँ के तू पतरस सै, अर मै इस पत्थर पै आपणी कलीसिया बणाऊँगा, अर अधोलोक के फाटक उस पै हावी कोनी होवैगें। 19 मै तन्नै सुर्ग के राज की ताळी दुँगा : जो कीमे तू धरती पै जुडैगा, वो सुर्ग म्ह बंधैगा; अर जो तू धरती पै खोलैगा, वो सुर्ग म्ह खुलैगा।" 20 फेर उसनै चेल्यां ताही चिताया के किसे तै ना कहियो के मै मसीह सूँ। 21 उस बखत तै यीशु आपणे चेल्यां तै बताण लाग्या, "जरूरी सै के मै यरुशलैम नै जाऊँ अर पुरनियो, प्रधान याजकां, शास्त्रियाँ के हाथा तै घणा दुःख ठाऊँ; अर मार दिया जाऊँ; अर तीसरै दिन जी उठूँ।" 22 इस पै पतरस उसनै ले जाके झिडकण लाग्या, "हे प्रभु, पणमेशर ना कर! तेरै गेल्या इसा कदे ना होवैगा।" 23 उसनै पलट के पतरस तै कह्या, "हे शैतान, मेरै स्याम्ही तै दूर हो! तू मेरै खातर टोकर का कारण सै; क्यातैके तू पणमेशर की बात्तां पै नही, पर माणसां की बात्तां पै मन लगावै सै।" 24 फेर यीशु नै आपणे चेल्यां तै कह्या, "जै कोए मेरै पाच्छे आणा चाहवै तो आपणे आपे तै नाटै या इंकार करै अर आपणा क्रूस ठावै, अर मेरै पाच्छे हो लेवै। 25 क्यूँके जो आपणा जी बचाणा चाहवैगा, वो उसनै खोवैगा; अर जो कोए मेरै खातर ज्यान खोवैगा, वो उसनै पावैगा। 26 जै माणस सारी दुनिया नै पा लेवै, अर

आपणी ज्यान का नुकसान ठावै, तो उसनै के फ़ैयदा होगा? या माणस आपणी ज्यान के बदले के देवैगा? 27 माणस का बेड़ा आपणे सुर्गदुत्तां के गेल्या आपणे पिता की महिमा म्ह आवैगा, अर उस बखत 'वो हरेक नै उसकै काम्मां के मुताबिक प्रतिफल देवैगा।' 28 मै थारे ते सच कहूँ सूँ जो आडै खड़े सै उन म्ह तै कुछ इसे सै के जिब्व तक माणस के बेट्टे नै उसके राज म्ह आंटे होए ना देख लेंगे तब ताहि मौत का सवाद कदे भी ना चाकखैंगे।

**17** छः दिनां पाच्छै यीशु नै पतरस अर याकूब अर उसके भाई युहन्ना ताही गेल्या लिया, अर उन ताही एक्के में किसे ऊँचे पहाड़ पै लेग्या। 2 ओडै उनकै स्याम्ही उसका रूप म्ह बदलाव होया, अर उसका मुँह सूरज की ढाळ चमक्या अर उसका लत्ता चाँदणै की ढाळ धोल्या होग्या। 3 अर मूसा अर एलिय्याह उसकै गेल्या बात करदे होड़ दिक्खे। 4 इस पै पतरस नै यीशु तै कह्या, "हे प्रभु, म्हारा उरै रहणा ठीक सै। जै तेरी मर्जी हो तो मै उरै तीन मण्डप बणाऊँ; एक तेरै खातर, एक मूसा खातर, एक एलिय्याह खातर।" 5 वो बोल्लणए लागरया था के एक धोल्या बादळ उन पै छाग्या, अर उस बादळ म्ह तै यो बोल लिकड़या, "यो मेरा प्यारा बेड़ा सै; जिसतै मै राज्जी सूँ: इसकी सुणो।" 6 चेले न्यू सुणकै मुँह के बळ गिरो अर घणे डरगे। 7 यीशु नै धोरै आकै उन ताही छुया, अर बोल्या, "उठो, डरो मतना।" 8 फेर उन्नै आपणी निगाह करी अर यीशु ताही छोड़ और किसे ताही कोनी देख्या। 9 जिब्व वे पहाड़ पै तै उतरै थे फेर यीशु नै उनतै यो हुकम दिया, "जिब्व ताही माणस का बेड़ा मरे होया म्ह तै जिन्दा न्ही उठै, तब ताही जो कीमे थमनै देख्या सै किस्से तै ना कहियो।" 10 इस पै उसके चेल्यां नै उसतै बुझ्झया, "फेर शास्त्री क्यांतै कहवै सै के एलिय्याह का पहल्या आणा जरूरी सै।" 11 उसनै जबाब दिया, "एलिय्याह जरूर आवैगा, अर सारा कीमे सुधरैगा। 12 पर मै थमनै कहूँ सूँ के एलिय्याह आ लिया, अर माणसां नै उस ताही न्ही पिच्छाणा; पर जिसा चाहया उसाए उसके गेल्या करया। इस तरिया तै माणस का बेड़ा भी उनके हाथां तै दुःख ठावैगा।" 13 फेर चेल्यां ने समझया के उसनै म्हारै तै युहन्ना बपतिस्मा देणीये के बाबत कहया सै। 14 जिब्व वे भीड़ के धोरै पहाँचे, तो एक माणस उसके धोरै आया, अर गोड्डे टेक के कहण लाग्या, 15 "हे प्रभु, मेरे बेट्टे पै दया कर! क्यूँके उस ताही मिर्गी आवै सै, अर वो घणा दुःख ठावै सै; अर बार-बार आग म्ह अर बार-बार पाणी म्ह पड़ ज्या सै। 16 मै उसताही तेरे चेल्यां धोरै ल्याया था, पर वे उसनै चंगा कोनी कर सके।" 17 यीशु नै जबाब दिया, "हे अबिश्वासी अर जिद्दी माणसां, मै कद ताही थारै गेल्या रहूँगा? कद ताही थारी सहुँगा? उसनै उरै मेरै धोरै ल्यावो।" 18 फेर यीशु नै औपरी आत्मा ताही धमकाया, वा उसम्ह तै लिकड़ग्यी: अर छोरा उस्से टेम चंगा होग्या। 19 फेर चेल्यां नै एक्के म्ह यीशु के धोरै आकै कह्या, "हम उसनै क्यांतै न्ही काड सके?" 20 उसनै उनतै कह्या, "आपणे बिश्वास की कमी के कारण, क्यूँके मै थमनै साच्ची कहूँ सूँ, जै थारा बिश्वास राई के दाणै के बराबर भी हो, तो इस पहाड़ तै कह सकोगे, 'उरै तै सरककै ओडै चल्या जा', तो वो चल्या जावैगा; अर कोए बात थारै खातर मुश्किल कोनी होवैगी। 21 [पर या जात बिना प्रार्थना अर ब्रत के कोनी लिकड़दी।]" 22 जिब्व वे गलील म्ह थे, तो यीशु नै उन तै कह्या, "माणस का बेड़ा माणसां के हाथां म्ह पकड़वाया जावैगा; 23 वे उसनै मार देवैंगे, अर वो तीसरे दिन जिन्दा उठैगा।" इस पै वे घणे उदास होए। 24 जिब्व वे कफरनहूम पहाँचे, तो मन्दर का कर लेण आळ्यां नै पतरस के धोरै आण के बुझ्झया, "के थारा गुरु, मन्दर का कर कोनी देंदा?" 25 उसनै कह्या, "हम्बै, देवै सै।" जिब्व वो घरा आया, तो यीशु नै उसके बुझ्झण तै पहल्या ए उसतै कह्या, "हे शमौन, तू के सोचै सै? धरती के राजा महसूल या कर किन तै लेवै सै? आपणे बेट्यां तै या बिगान्यां तै?" 26 पतरस नै उसतै कह्या "बैगान्या तै"। यीशु नै उसतै कह्या तो बेट्टे बचगे। 27 तोभी इस खातर के हम उणनै ठोकर ना खुवावा, तू झील के कंठारे जा के कांडा गेर, अर जो मच्छी पहलै लिकड़ै, उसनै ले; उसका मुँह खोल्लण पै तेरै ताहि एक सिक्का मिलैगा, उस्से नै लेकै मेरै अर आपणे बदलै म्ह दे दियो।"

**18** उस घड़ी चेले यीशु के धोरै आकै बुझ्झण लागे, "सुर्ग के राज म्ह बड्डा कौण सै?" 2 इस पै उसनै एक बाळक ताही धोरै बुलाकै उनकै बिचाळै खड़या करया, 3 अर कह्या, "मै थमनै साच्ची कहूँ सूँ के जिब्व ताही थम न्ही बदलो अर बाळका की ढाळ न्ही बणो, थम सुर्ग के राज म्ह बड़ न्ही

सकदे। 4 जो कोए आपणे आप नै इस बाळक की ढाळ छोड़ा करैगा, वो सुर्ग के राज म्ह बड्डा होवैगा। 5 अर जो कोए मेरै नाम तै एक इसे बाळक ताही अपणावै सै वो मन्नै अपणावै सै। 6 "पर जो इन छोट्या म्ह तै जो मेरै पै बिश्वास करै सै एक नै ठोकर खुवावै, उसका खातर भला तो यो होंदा के बड्डी चाक्की का पाट उसके गले म्ह लटकाया जान्दा, अर वो डून्धे समुन्दर म्ह डबोया जान्दा। 7 ठोकरां के कारण दुनिया पै हाय! ठोकरां का लागणा जरूरी सै; पर हाय उस माणस पै जिसकै जरिये ठोकर लागै सै। 8 "जै तेरा हाथ या तेरा पैर तन्नै ठोकर खुवावै, तो उसनै काटके बगा दे; टुंडा या लंगड़ा होकै जिन्दगी पै दाखल होणा इसतै भला सै के दो हाथ या दो पैर रहंदे होए तू अनन्त आग म्ह गेरया जावै। 9 जै तेरी आँख तन्नै ठोकर खुवावै, तो उस ताही लिकड़ के बगा दे; काणा होकै जिन्दगी म्ह बड़ना तेरै खातर भला सै के दो आँख रहंदे होए तू नरक की आग म्ह गेरया जावै। 10 "देक्खो, थम इन छोट्या म्ह तै किसे नै तुच्छ ना जाणीयो; क्यूँके मै थमनै कहूँ सूँ के सुर्ग म्ह उनके दूत मेरे सुर्गीय बाप का मुँह सारी हाण देखै सै। 11 [क्यूँके माणस का बेड़ा खोय होया नै बचाण आया सै।] 12 "थम के सोचो सो? जै किसे माणस की सौ भेड़ हों, अर उनम्ह तै एक भटक जावै, तो के वो निन्थानबे ताही छोड़कै, अर पहाड़ां पै जाकै, उस भटकी होड़ नै कोनी टोहवैगा? 13 अर जै इसा हो के उसनै पावै, तो मै थमनै साच्ची कहूँ सूँ के वो उन निन्थानबे भेड्डा के खातर जो भटकी कोनी थी, इतना आनन्द कोनी करैगा जितना के इस भेड़ के खातर करैगा। 14 इस्से ढाळ थारे बाप की जो सुर्ग म्ह सै या मर्जी कोनी के इन छोट्यां म्ह तै एक भी नास हो। 15 "जै तेरा भाई तेरै खिलाफ कसूर करै, तो जा अर एक्के म्ह बतळा के उसनै समझा, जै वो तेरी सुणै तो तन्नै आपणे भाई ताही पा लिया। 16 जै वो न्ही सुणै, तो एक या दो जणयां नै आपणै गेल्या और ले जा, के 'हरेक बात दो या तीन गवाहा के मुँह तै पक्की करी जावै।' 17 जै वो उनकी भी न्ही मानै, तो कलीसिया तै कह दे, पर जै वो कलीसिया की भी कोनी मानै तो तू उसनै दूसरी जात अर महसूल लेणआळे जिसा जाण। 18 "मै थम नै साच्ची कहूँ सूँ, जो कीमे थम धरती पै जुड़ोगे, वो सुर्ग म्ह बंधेगा अर जो कीमे थम धरती पै खोल्लोगे, वो सुर्ग म्ह खुलेगा। 19 फेर मै थमनै कहूँ सूँ, जै थारै म्ह तै दो जणे धरती पै किसे बात के खातर एक मन होकै उसतै माँगै, तो वा मेरे पिता की वोड़ तै जो सुर्ग म्ह सै, उनकै खातर हो जावैगी। 20 क्यूँके जड़ै दो या तीन मेरै नाम पै कड्डा होवै सै, ओडै मै उनकै बिचाळै म्ह होऊँ सूँ।" 21 जिब्व पतरस नै धोरै आकै उसतै कह्या, "हे प्रभु, जै मेरा भाई कसूर करदा रहवै, तो मै कितनी बै उस ताही बख्शु?" के सात बै?" 22 यीशु नै उसतै कह्या, "मै तेरै तै यो न्ही कहन्दा के सात बै ताही बल्के सात बै के सत्तर गुणे ताही। 23 "इसकरके सुर्ग का राज्य उस राजा के बरगा सै, जिसनै आपणे नौकरां का लेक्खा (ब्योरा) लेणा चाहया। 24 जिब्व वो लेक्खा लेण लाग्या, तो एक जणा उसके स्याम्ही ल्याया गया जो दस हजार तोड़े का कर्जवान था। 25 जिब्व के चुकता करण नै उसके धोरै कीमे कोनी था, तो उसके मालिक नै कह्या, 'यो अर इसकी बीरबान्नी अर बाळ-बच्चे अर जो कीमे इसका सै सारा बेच्या जावै, अर कर्ज चुकता करया जावै।' 26 इस पै उस नौकर नै पड़कै उस ताही प्रणाम करया, अर कह्या, 'हे मालिक धीरज धर, मै सारा कीमे भर चुँगा।' 27 इस पै उस नौकर के मालिक नै तरस खाकै उस ताही छोड़ दिया, अर उसका कर्जा भी बख्श दिया। 28 "पर जिब्व वो नौकर बाहरण लिकड़या, तो उसके गेल्या के नौकरां म्ह तै एक उस तै फेट्या जो उसके सौ दीनार का कर्जदार था; उसनै पकड़कै उसका घेड़ी घोंटी अर कह्या, 'जो कीमे तेरै पै कर्ज सै भर दे।' 29 इस पै उसका गेल का नौकर पड़कै उसतै बिनती करण लाग्या, 'धीरज धर, मै सारा कीमे भर चुँगा।' 30 वो न्ही मान्या, पर जाकै उस ताही जेळ म्ह गेर दिया के जिब्व ताही कर्जा ना भर दे, जिद ताही ओडैए रहवै। 31 उसके गेल्या के नौकर यो जो होया था देखकै घणे उदास होए, अर जाकै आपणे मालिक ताही पूरा हाल बता दिया। 32 फेर उसके मालिक नै उस ताही बुलाकै उसतै कह्या, 'हे दुष्ट नौकर, तन्नै जो मेरै तै बिनती करी, तो मन्नै तेरा वो सारा कर्जा बख्श दिया। 33 ज्यांतै जिस ढाळ मन्नै तेरै पै दया करी, उस्से तरिया के तन्नै भी आपणे गेल के नौकर पै दया न्ही करणी चहिये थी?' 34 अर उसके मालिक नै छोह म्ह आकै उस ताही दण्ड देणआळे के हाथां म्ह सौप दिया, के जिब्व ताही वो सारा कर्जा भर न्ही देवै, जिद ताही उनकै हाथां म्ह रहवै।

35 "इस्से ढाल जे थारे म्ह तै आपणे भाई नै ना बक्शैगा तो मेरा पिता जो सुर्ग म्ह सै थारे तै उसा ए करैगा"।

19 जिब्व यीशु नै ये बात कह ली, तो गलील तै चल्या गया; अर यरदन के परली ओड़ यहूदिया के प्रदेश म्ह आया। 2 फेर बड्डी भीड़ उसके पाछे हो ली, अर उसनै ओड़ै उन ताही चंगा करया। 3 फेर फरीसी उसनै परखण खातर धारे आके बोले, "के हर एक कारण तै आपणी बीरबान्नी ताही छोड़ना ठीक सै?" 4 उसनै जबाब दिया, "के थम नै नही पढ़या के जिसनै उन ताही बनाया, उसनै सरुआत तै नर अर नारी बणाके कहा, 5 इस कारण माणस आपणे माँ-बाप तै न्यारा होके आपणी बीरबान्नी के गेल्या रहैगा अर वे दोनु एक तन होवैगें?" 6 आखर इब दो न्ही, पर एक तन सै। इसकरके जिस ताही पणमेशर जै जोड़या सै, उस ताही माणस न्यारा ना करै।" 7 उन्नै उसतै कहा, "फेर मूसा नै यो क्यातै ठहराया के तलाक देके उस ताही छोड़ दे?" 8 उसनै उनतै कहा, "मूसा नै थारे मन की करडेपण के कारण थारे तै आपणी-आपणी बीरबान्नी ताही छोड़ देण का हुक्म दिया, पर सरुआत म्ह इसा कोनी था। 9 अर मै थमनै कहूँ सूँ के जो कोए जारी नै छोड़ के और किसे कारण तै आपणी बीरबान्नी नै छोड़ के दूसरा ब्याह करै, वो जारी करै सै; जो उस छोड़ि होई तै ब्याह करै, वो भी जारी करै सै।" 10 चेल्यां नै यीशु तै कहा, "जै माणस का लुगाई के गेल्या इसा सम्बन्ध सै, तो ब्याह करणा आच्छा कोनी।" 11 यीशु नै उनतै कहा, "सारे यो बचन अपणा न्ही सकदे, सिर्फ वे जिन ताही यो दान दिया गया सै। 12 क्यूँके कीमे हिजडे इसे सै, जो माँ के पेट या गर्भ ए तै इसे जन्मे; अर कीमे हिजडे इसे सै, जिन ताही माणस नै हिजडे बणाया; अर कीमे हिजडे इसे सै, जिन्नै सुर्ग के खातर खुद ताही हिजड़ा बणाया सै। जो इस ताही अपणा कर सकदा हो, वो अपणावै।" 13 फेर माणस बाळका ताही उसके लोवै ल्याए के वो उनके ऊपर हाथ धरै अर प्रार्थना करै, पर चेल्यां नै उन ताही धमकाया। 14 यीशु नै कहा, "बाळका नै मेरै लोवै आण द्यो, अर उन ताही मना मतना करो, क्यूँके सुर्ग का राज्य इसाए का सै।" 15 अर वो उन पै हाथ धरके ओड़ै तै चल्या गया। 16 एक माणस यीशु के धारे आया अर उसतै कहा, "हे गुरु, मै कौण-सा भला काम करूँ के अनन्त जीवन पाऊँ?" 17 यीशु नै उसतै कहा, "तू मेरै तै भलाई के बाबत क्यातै बुझै सै? भला तो एकए सै, पर जै तू जीवन म्ह दाखल होणा चाहवै सै, तो हुकमां नै मान्या कर।" 18 उसनै यीशु तै कहा, "कौण-से हुकम?" यीशु बोल्या, "खून न्ही करणा, जारी न्ही करणा, चोरी न्ही करणा, झूठी गवाही ना देणा, 19 आपणे बाप अर माँ का आदर करणा, अर आपणे पड़ोसी तै आपणे जिसा प्रेम राखणा।" 20 उस गाबरू नै कहा, "इन सारया ताही तो मन्नै मान्या सै; इब मन्नै किस बात की कमी सै?" 21 यीशु नै उसतै कहा, "जै तू सिद्ध होणा चाहवै सै तो जा, आपणा सारा माळ बेचके कंगाला ताही दे, अर तन्नै सुर्ग म्ह धन मिलैगा; अर आके मेरै पाछे हो ले।" 22 पर वो गाबरू या बात सुणके उदास होके चल्या गया, क्यूँके वो घणा धनवान था। 23 फेर यीशु नै आपणे चेल्यां तै कहा, "मै थमनै साच्ची कहूँ सूँ के धनवान का सुर्ग के राज्य म्ह बड़ना ओक्खा सै।" 24 थारै ताही फेर कहूँ सूँ के पणमेशर के राज्य म्ह धनवान के बड़नै तै ऊँट का सूई के मोरै म्ह तै लिकड़ना सेला सै।" 25 न्यू सुणके चेल्यां नै हैरान होके कहा, "फेर किसका उद्धार हो सकै सै।" 26 यीशु नै उनकी वोड़ लखा के कहा, "माणसां तै तो यो कोनी हो सकदा, पर पणमेशर तै सारा कीमे हो सकै सै।" 27 इस पै पतरस नै उसतै कहा, "देख, हम तो सारा कीमे छोड़ के तेरै पाछे हो लिए सा: तो हमनै के मिलैगा?" 28 यीशु नै उनतै कहा, "मै थमनै साच्ची कहूँ सूँ के नयी सृष्टी म्ह जिब्व माणस का बेटा आपणी महिमा के सिंहासन पै बैठेगा, तो थम भी जो मेरै पाछे हो लिए सो, बारहा सिंहासन पै बैठके इस्राएल के बारहा गोत्रा का न्याय करोगे। 29 अर जिस किसे नै घर, या भाई, या भाण या बेब्बे, या बाप, या माँ, या बाळ-बच्चे, या खेत्तां ताही मेरै नाम के खातर छोड़ दिया सै, उस ताही सौ गुणा मिलैगा, अर वो अनन्त जीवन का हक्कदार होवैगा। 30 पर भोत से जो पहल्यै सै, पाछले होंगे; अर जो पाछले सै, पहल्यै होंगे।

20 "सुर्ग का राज्य" किसे घर के मालिक की ढाळ सै, जो तड़कए लिकड़या के आपणी दाख की बारी म्ह मजदुरां नै लावै। 2 उसनै मजदुरां तै एक दीनार रोज पै लाया अर उन्नै आपणी दाख की बारी म्ह खन्दाया। 3 फेर एक पहर दिन चढ़े पाछे उसनै लिकड़के और माणसां ताही

बजार म्ह खड़े देख्या, 4 अर उसनै कहा, "थम भी दाख की बारी म्ह जावो, अर जो कीमे सई सै, थमनै द्युँगा।" आखर वे भी गये। 5 फेर उसनै दुसरे अर तीसरे पहर के लोवै लिकड़के उससे तरिया करया। 6 दिन बीतण तै एक घंटा पहल्या उसनै फेर लिकड़के दूसरयां ताही खड़े पाया, अर उसनै कहा, "थम क्यातै सारै दिन उरै बेकार खड़े रहे?" उन्नै उसतै कहा, "ज्यांतै के किसे नै म्हारै ताही मजदूरी पै कोनी ल्याया।" 7 उसनै उनतै कहा, "थम भी दाख की बारी म्ह जावो।" 8 "साँझ नै दाख की बारी के मालिक नै आपणे भण्डारी तै कहा, 'मजदुरां ताही बुलाके पाछल्या तै लेके पहल्या ताही उन्नै मजदूरी दे-दे।' 9 जिब्व वे आये जो घंटा-भर दिन रहे लाए गये थे, तो उन्नै एक-एक दीनार मिल्या। 10 जो पहल्या आये उन्नै यो समझया के म्हारै ताही घणा मिलैगा, पर उन्नै भी एक-एक दीनार ए मिल्या। 11 जिब्व मिल्या तो वे घर के मालिक पै बिरडाके कहण लागे, 12 'इन पाछल्यां नै एक घंटा काम करया, अर तन्नै उन ताही म्हारै बराबर कर दिया, जिन्नै दिन-भर का बोझ ठाया अर घाम सहया?' 13 उसनै उनम्ह तै एक ताही जबाब दिया, 'हे मित्तर, मै तेरै तै कीमे अन्याय कोनी करदा। के तन्नै ए मेरै तै एक दीनार कोनी ठहराया था? 14 जो तेरा सै, ठा ले अर चल्या जा; मेरी मर्जी या सै के जितना तन्नै द्युँ उतना ए इस पाछले ताही भी द्युँ। 15 के यो ठीक कोनी के मै आपणे माळ तै जो चाहूँ वो करूँ के मेरै भले होण के कारण तू भुंडी नजर तै देखवै सै?' 16 इस तरिया तै जो पाछले सै, वे पहले होवैगें, जो पहले सै, पाछले होवैगें।" 17 यीशु यरुशलेम नै जान्दे होए बारहा चेल्यां ताही एकै म्ह लेग्या, अर राह म्ह उनतै बोल्या, 18 "देख्यो, हम यरुशलेम नै जावा सा; अर माणस का बेटा प्रधान याजकां अर शास्त्रियाँ के हाथां पकड़वाया जावैगा, वे उसनै मारण के जोगा ठहरावैगें। 19 अर उस ताही गेरजात्तां के हाथां म्ह सौपैगें के वे उस ताही मखौल म्ह उड़ावैगें, अर कोरडे मारैगें, अर क्रूस पै चढ़ावैगें, अर वो तीसरै दिन जिन्दा उठैगा।" 20 फेर जब्दी के बेट्यां की माँ नै, आपणे बेट्यां के गेल्या यीशु के धारे आके प्रणाम करया, अर उसतै कीमे माँण लागी। 21 यीशु नै उसतै कहा, "तू के चाहवै सै?" वा यीशु तै बोली, "यो बचन दे के मेरे ये दो बेटे तेरै राज्य म्ह एक तेरै सोळे अर एक तेरै ओळे बैठे।" 22 यीशु नै जबाब दिया, "थमनै न्ही बेरा के माँगे के सो। जो कटोरा मै पीण पै सूँ के थम पी सको सो?" उन्नै उस ताही कहा, "पी सका सा।" 23 उसनै उनतै कहा, "थम मेरा कटोरा तो पी लोगे, पर आपणे सोळे अर ओळे किसे ताही बिठाणा मेरा काम कोनी, पर जिन के खातर मेरै बाप की वोड़ तै त्यार करया गया, उन्नै खातर सै।" 24 न्यू सुणके दसो चेल्ले उन दोनु भाईयां पै छो करण लागे। 25 यीशु नै उन ताही धारे बुलाके कहा, "थम जाणो सो के गेरजात्तां के हाकिम उन पै राज करै सै; अर जो बड्डे सै, वे उन पै हक्क जमावै सै। 26 पर थारै म्ह इसा कोनी होवैगा; जो कोए थारै म्ह बड्डा होणा चाहवै, वो थारा सेवक बणै; 27 अर जो थारै म्ह प्रधान होणा चाहवै, वो दास बणै; 28 जिस ढाळ के माणस का बेटा; वो ज्यांतै कोनी आया के उसकी सेवा बाड़ी करी जावै, पर ज्यांतै आया के खुद सेवा बाड़ी करै, अर घण-खरयां के छुटकारे के खातर आपणी ज्यान देवै।" 29 जिब्व वे यरीहो तै लिकड़ै थे, तो एक बड्डी भीड़ उसके पाछे हो ली। 30 अर दो आंधे, जो सड़क के कंठारै बैठे थे, न्यू सुणके के यीशु जाण लागरा सै, रुक्का मारके कहण लागे, "हे प्रभु, हे दाऊद की ऊलाद, म्हारै पै दया कर।" 31 माणसां नै उन ताही धमकाया के बोल-बाळ रहवै; पर वे और भी किल्की मारके बोले, "हे प्रभु, दाऊद की ऊलाद, म्हारै पै दया कर।" 32 फेर यीशु नै खड़े होके, उन ताही बुलाया अर कहा, "थम के चाहवो सो के मै थारै खातर करूँ?" 33 उन्नै उसतै कहा, "हे प्रभु, यो के म्हारी आँख खुल जावै।" 34 यीशु नै तरस खाके उन्हकी आँख छुई, अर वे जिब्व देखण लागे; अर उसके पाछे हो लिये।

21 जिब्व वे यरुशलेम के लोवै पहाचे अर जैतून पहाड़ पै बैतफगे के धारे आये, तो यीशु नै दो चेल्यां ताही न्यू कहके खन्दाया, 2 "स्याम्ही के गाम म्ह जावो। ओड़ै पहाचदए एक गधी बंधी होई, अर उसके गेल्या बच्चा थमनै मिलैगा। उन्नै खोलके मेरै धारे ल्याओ। 3 जै थारै तै कोए कीमे कहवै, तो कहियो के प्रभु नै इनतै काम लेणा सै, फेर वो जिब्वे उन्नै खिन्दा देवैगा।" 4 यो ज्यांतै होया के जो बचन नब्बी के जरिये कहया गया था, वो पूरा हो 5 "सिय्योन की बेटटी तै कहो, 'देख, तेरा राजा तेरै धारे आवै सै; वो नम्र सै, अर गधे पै बैठया सै; बल्के लादू के बच्चे पै।'" 6 चेल्यां नै

जाके, जिसा यीशु नै उनतै कहया था, उस्से तरिया करया। 7 अर गधी अर बच्चे ताही ल्याके, उनपै आपणे लत्ते गेरे, अर वो उन पै बैठया। 8 फेर घणखरे माणसां नै आपणे लत्ते राह म्ह बिच्छाये, अर माणसां नै दरखतां तै डाळीयां काटकै राह म्ह बिच्छाई। 9 जो भीड़ आगै-आगै जावै अर पाच्छे-पाच्छे चाली आवै थी, रुक्के मार-मार कै कहवै थी, “दाऊद की ऊलाद को होशाना, धन्य सै वो जो प्रभु के नाम तै आवै सै, अकास म्ह होशाना।” 10 जिब्व वो यरूशलम म्ह बड़या, तो सारे नगर म्ह खलबल्ली माच्ची, अर माणस कहण लागे, “यो कौण सै?” 11 माणसां नै कह्या, “यो गलील के नासरत का नब्बी यीशु सै।” 12 यीशु नै पणमेशर कै मन्दर म्ह जाके उन सारया ताही, जो मन्दर म्ह लेण-देण करे थे, काड दिया, अर सर्राफा के पीढे अर कबूतर बेचणीयां की चौकियां उल्ट दीं; 13 अर उनतै बोलया, “लिख्या सै, ‘मेरा घर प्रार्थना का घर कुहवावैगा’; पर थम उसनै डाकुवां की खोह बणावो सो।” 14 फेर आंधे अर लंगड़े, मन्दर म्ह उसके धोरे आये, अर उसनै उन ताही चंगा करया। 15 पर जिब्व प्रधान याजका अर शास्त्रियां नै इन अनोक्खे काम्मां ताही, जो उसनै करे, अर छोरयां ताही मन्दर म्ह ‘दाऊद की ऊलाद को होशाना’ रुक्के मारदे देख्या, तो वे छो मानगे, 16 अर उसतै कहण लागे, “के तू सुणै सै के ये के कहवै सै?” यीशु नै उनतै कह्या, “हम्बै; के थमनै यो कदे कोनी पदया : ‘बाळका अर दूध पिन्दे बच्या कै मुँह तै तन्नै घणी स्तुति कराई?’ 17 फेर वो उन्नै छोड़के नगर कै बाहरण आके बैतनिय्याह नै गया अर ओड़ै रात बिताई। 18 तड़कए जिब्व वो नगर नै बोहड़ण लागरया था तो उसनै भूख लागी। 19 सड़क कै कंठारै अंजीर का एक दरखत देखके वो उसके धोरे गया, अर पत्त्या नै छोड़ उसमह और कीमे ना पाके उसतै कह्या, “इब तै तेरै म्ह फेर कदे फळ कोनी लागै।” अर अंजीर का दरखत जिब्व सूखया। 20 न्यू देखके चेल्या नै हैरानी होई अर उन्नै कह्या, “यो अंजीर का दरखत जिब्व किस तरिया सूखया?” 21 यीशु नै उन ताही जबाब दिया, “मै थमनै साच्ची कहूँ सूँ, जै थम बिश्वास राकरखो अर शक ना करो, तो ना केवल यो करोगे जो इस अंजीर कै दरखत गेल्या करया गया सै, पर जै इस पहाड़ नै कहोगे, ‘उखड़ जा, अर समुन्दर म्ह जा पड़’, तो यो हो जावैगा। 22 अर जो कीमे थम प्रार्थना म्ह बिश्वास तै माँगोगे वो सारा थमनै मिलेगा।” 23 वो मन्दर जाके उपदेश देवै था, तो प्रधान याजकां अर आदमियां के पुरनियां नै उसके धोरे आके बुझझया, “तू ये काम किसके हक्क तै करै सै? अर तेरै ताही यो हक्क किसनै दिया सै?” 24 यीशु नै उनताही जबाब दिया, “मै भी थारै तै एक बात बुझझु सूँ; जै वो मन्नै बतावोगे, तो मै भी थमनै बताऊंगा के ये काम किस हक्क तै करूँ सूँ। 25 युहन्ना का बपतिस्मा कित तै था? सुर्ग को वोड़ तै या माणसां को वोड़ तै?” फेर वे आपस म्ह बहस करण लागे, “जै हम कहवा ‘सुर्ग की वोड़ तै’ तो वो म्हारै तै कहवैगा, ‘फेर थमनै उसका बिश्वास क्यातै न्ही करया?’ 26 अर जै कहवा ‘माणसां की वोड़ तै’ तो हमनै भीड़ का भय सै, क्युँके वे सारे युहन्ना ताही नब्बी मान्नै सै।” 27 आखर उन्नै यीशु ताही जबाब दिया, “हमनै न्ही बेरा।” यीशु नै भी उनतै कह्या, “तो मै भी थमनै कोनी बतान्दा के ये काम किस हक्क तै करूँ सूँ। 28 ‘थम के सोच्चो सो? किसे माणस कै दो बेटे थे; उसनै पहलये कै धोरे जाके कह्या, ‘हे बेटे, आज दाख की बारी म्ह काम कर।’ 29 उसनै जबाब दिया, ‘मै कोनी जान्दा’, पर पाच्छे पसता कै गया। 30 फेर बाप नै दुसरे कै धोरे जाके न्यू ए कहया, उसनै जबाब दिया, ‘जी हम्बै जाऊँ सूँ’, पर कोनी गया। 31 इन दोनुवां म्ह तै किसनै बाप की मर्जी पूरी करी?” उन्नै कह्या, “पहलये नै।” यीशु नै उनतै कह्या, “मै थारै तै साच्ची कहूँ सूँ के महसूल लेणआळे अर बेश्याए थारै तै पहल्या पणमेशर के राज्य म्ह बड़ै सै। 32 क्युँके युहन्ना धर्म की राह दिखान्दे होए थारै लोवै आया, अर थमनै उसका बिश्वास कोनी करया; पर महसूल लेणआळे अर बेश्यायां नै उसका बिश्वास करया : अर थम न्यू देखके पाच्छे पसताए के उसका बिश्वास कर लेन्दे। 33 एक और उदाहरण सुणो : एक घर का मालिक था, जिसनै दाख की बारी लाई, उसके चौगर देके बाड़ा बाँधया, उसमह रस का कुण्ड खोद्या अर बुर्जी बनाई, अर किसानां ताही उसका ठेका देके प्रदेश चल्या गया। 34 जिब्व फळ का बखत लोवै आया, तो उसनै आपणे नौकरां ताही उसका फळ लेण नै किसानां धोरे खन्दाया। 35 पर किसानां नै उसके नौकरां ताही पकड़ कै, किसे ताही छेत्या, अर किसे ताही मार दिया, अर किसे पै पत्थर बरसाए। 36 फेर उसनै पहल्या तै घणे

और नौकरां ताही खन्दाया, अर उन्नै भी उस्से तरिया करया। 37 आखर म्ह उसनै आपणे बेटे ताही उनके धोरे न्यू सोचके खन्दाया के वे मेरै बेटे का आदर करैगें। 38 पर किसाना नै बेटे ताही देखके आपस म्ह कह्या, ‘यो तो वारिस सै, आवो, इसनै मार देवा अर इसकी वसीयत ले लेवां।’ 39 आखर उन्नै उस ताही पकड़या अर दाख की बारी तै बाहरण काडके मार दिया। 40 इसकरके जिब्व दाख की बारी का मालिक आवैगा, तो उन किसानां कै गेल्या के करैगा?” 41 उन्नै उसतै कह्या, “वो उन भुन्डे माणसां का भूंडी ढाळ नाश करैगा; अर दाख की बारी का ठेका दुसरे किसानां ताही देवैगा, जो बखत पै उस ताही फळ दिया करैगें।” 42 यीशु नै उनतै कह्या, “के थमनै कदे भी पवित्र ग्रन्थ म्ह यो कोनी पदया : जिस पत्थर ताही राजमिस्त्रियां नै निकम्मा ठहरया था, वोए कुणे के सिरे का पत्थर होग्या? यो प्रभु की वोड़ तै होया, अर म्हारी निगाह म्ह अनोक्खा सै।” 43 ज्यातै मै थमनै कहूँ सूँ के पणमेशर का राज्य थारै तै ले लिया जावैगा अर इसी जात ताही, जो उसका फळ ल्यावै, दिया जावैगा। 44 जो इस पत्थर पै पड़ेगा, वो चकनाचूर हो जावैगा; अर जिस पै वो पड़ेगा, उसनै पीस देवैगा।” 45 प्रधान याजक अर फरीसी उसके उदाहरण नै सुणके समझगे के वो उनके बाबत कहवै सै। 46 अर उन्हेनै उस ताहि पकड़ना चाह्या, पर माणसां तै डर ग्ये क्युँके वे उसनै नब्बी माणन थे।

22 इस पै यीशु फेर उनतै उदाहरण म्ह कहण लाग्या, 2 ‘सुर्ग का राज्य उस राजा की ढाळ सै, जिसनै आपणे बेटे का ब्याह करया। 3 अर उसनै आपणे नौकरां ताही खन्दाया, के न्योदे होड़ माणसां ताही ब्याह के जीमणे म्ह बुलावै; पर उन्नै आणा न्ही चाहया। 4 फेर उसनै और नौकरां ताही न्यू कहके खन्दाया, ‘न्योदे होड़ माणसां ताही कहो : लखावो, मन्नै जिमणा त्यार कर लिया सै, अर मेरे बैळद अर पळे होड़ डान्गर मार लि सै : सारा कीमे त्यार सै; ब्याह के जिमणे म्ह आवो।’ 5 पर वे बेपरवाह करके चले गये, कोए आपणे खेत्तां म्ह, कोए आपणे धन्धे पै। 6 और माणसां नै जो बचगे थे उन्नै उसके नौकरां ताही पकड़ कै उनकी बेईज्जती करी अर उन ताही मार दिया। 7 राजा छो म्ह आग्या, अर आपणी फौज खन्दाके उन हत्यारा का नाश करया, अर उनके नगर फूक दिए। 8 फेर राजा नै आपणे नौकरां तै कहया, ब्याह का जिमणा तो त्यार सै, पर के न्योदे होड़ माणस इस जोगे कोनी ठहरे। 9 इसकरके चौराहयां पै जावो, अर जितने माणस थमनै मिलै, सारया ताही ब्याह कै जिमणे म्ह बुला ल्यावो। 10 इस तरिया उसके नौकरां नै सड़कां पै जाके के भुन्डे, के आच्छे, जितने मिले सारया ताही कड़ा करया; ब्याह का घर मेहमाना तै भरग्या। 11 जिब्व राजा मेहाना नै देखण भीत्तर आया, तो उसनै ओड़ै एक माणस ताही देख्या, जो ब्याह के लत्ते कोनी पहररया था। 12 उसनै उसतै बुझझया, ‘हे मित्तर, तू ब्याह के लत्ते पहरे बिना उरै क्यातै आग्या। उसका मुँह बन्द होग्या। 13 फेर राजा नै नौकरां तै कह्या, ‘इसके हाथ-पैर जुड़के उस ताही बाहरण अन्धेरे म्ह गेर द्यो, ओड़ै रोणा, अर दाँत पिसणा होवैगा। 14 क्युँके न्योदे होड़ तो घणे सै पर छाँटे होये घाट सै। 15 फेर फरिसियां नै आके आपस म्ह बिचार करया, के उसनै किस ढाळ बात्तां म्ह फसावा। 16 इस तरिया उन्नै आपण ताही हेरोदिया कै गेल्या उसके धोरे न्यू कहण नै खन्दाया, ‘हे गुरु, हमनै बेरा सै, के तू साच्चा सै, अर पणमेशर की राह सच्चाई तै सिखावै सै; अर किसे की आँट कोनी मान्दा, क्युँके तू माणसां का मुँह देखके बात कोनी करदा। 17 इसकरके हमनै बता तू के सोचै सै? कैसर तै कर देणा ठीक सै के न्ही।’ 18 यीशु नै उनका भुन्डापण जाणके कह्या, ‘हे कपटीयो, मन्नै क्यातै परखो सो? 19 कर का सिक्का मेरै तै दिखावो।’ फेर उसके धोरे एक दीनार लीयाये। 20 उसनै उनतै कह्या, ‘या छाप अर नाम किसका सै?’ 21 उन्नै उसतै कह्या, ‘कैसर का।’ फेर उसनै उनतै कह्या, ‘जो कैसर का सै, वो कैसर ताही; अर जो पणमेशर का सै, वो पणमेशर ताही द्यो।’ 22 न्यू सुणके उन्नै हैरानी होई, उस ताही छोड़के चल्ये ग्ये। 23 उस्से दिन सदुकी जो कहवै सै के मेरे होया का दुबारा जिन्दा उठणा सै ए कोनी, उसके धोरे आये अर उसतै बुझझया, 24 ‘हे गुरु, मूसा नै कहया था के जै कोए माणस बेऊलादा मर जावै, तो उसका भाई उसकी बीरबान्नी तै ब्याह करके आपणे भाई कै खातर पीढ़ी पैदा करै। 25 इब म्हारै उरै सात भाई थे; पहलड़ा ब्याह करके मरग्या, अर ऊलाद ना होण कै कारण आपणी बीरबान्नी आपणे भाई कै खातर छोड़ग्या। 26 इस्से तरिया

दुसरे अर तीसरे नै भी करया, अर सातुवां तक योए होया। 27 सारया पाच्छे वा लुगाई भी मरगी। 28 आखर म्ह जिन्दा होण पै वा सातुवां म्ह तै किसकी बीरबान्नी होवैगी? क्यूँके वा सारया की बीरबान्नी बण ली थी।” 29 यीशु नै उन ताही जबाब दिया, “थमनै पवित्र ग्रन्थ अर पणमेशर के सामर्थ का कोनी बेरा; इस कारण भुल म्ह पड़े सो। 30 क्यूँके उठनै पै वे ब्याह कोनी करैगें अर ना ब्याह म्ह दिये जावैगें पर सुर्ग म्ह पणमेशर के दुत्तां की ढाळ होवैगें। 31 पर मरे होया के जिन्दे उठनै के बाबत के थमनै यो बचन कोनी पढ़या जो पणमेशर नै थारै तै कहया : 32 ‘मै अब्राहम का पणमेशर, अर इसहाक का पणमेशर, याकूब का पणमेशर सूं? वो मरे होया का न्ही, पर जिन्दा का पणमेशर सै।’ 33 न्यू सुणकै माणस उसके उपदेश तै हैरान होये। 34 जिब्व फरिसियों नै सुणया के यीशु नै सदुकियां का मुँह बन्द कर दिया, तो वे कड़े होये। 35 उनम्ह तै इन्तजाम करणीये या व्यवस्थापक नै उस ताही परखण के खातर उसतै बुझया, 36 ‘हे गुरु, नियम-कायदा म्ह कौण-सा हुक्म बड्डा सै?’ 37 यीशु नै उसतै कह्या, ‘तू पणमेशर आपणे प्रभु तै आपणे साबतै मन अर आपणे साबतै जी अर आपणी सारी समझ कै गेल्या प्रेम राख। 38 बड्डा अर खास हुक्म तो योए सै। 39 अर उससे जिसा यो दूसरा भी सै के तू आपणे पड़ोसी तै आपणे जिसा प्रेम राख। 40 यो दो हुक्म सारे नियम-कायदे अर नब्बियाँ का निचोड़ (आधार) सै।’ 41 जिब्व फरीसी कड़े थे, तो यीशु नै उनतै बुझया, 42 ‘मसीह के बारे म्ह थम के सोचो सो? वो किसका बेट्टा सै? उन्नै यीशु तै कह्या, ‘दाऊद का।’ 43 यीशु नै उनतै बुझया, ‘तो दाऊद आत्मा म्ह होके उसनै प्रभु क्योतै कहवै सै? 44 प्रभु नै, मेरै प्रभु तै कहया, मेरै सोळै बैठ, जिब्व ताही के मै तेरे बैरियाँ ताही तेरे पाया तळै ना कर द्युँ।’ 45 भला, जिब्व दाऊद उसनै प्रभु कहवै सै, तो वो उसका बेट्टा किस ढाळ होया?’ 46 अर उन्नह नै उस ताहि पकड़ना चाह्या, पर माणसां तै उर ग्ये क्यूँके वे उसनै नब्बी माणन थे।

23 फेर यीशु नै भीड़ तै अर आपणे चेल्यां ताही कह्या, 2 ‘शास्त्री अर फरीसी मूसा की गद्दी पै बैठे सै; 3 ज्यांतै वे थारै तै जो कीमे कहवै वो करणा अर मानणा, पर उन जिसे काम मतना करणा; क्यूँके वे कहवै तो सै पर करदे कोनी। 4 वे एक इसे भारया बोझ ताही जिनका ठाणा ओक्खा सै, बाँधके उन्नै माणसां के कंध्या पै धरे सै; पर खुद उस ताही आपणी आनळी तै भी सरकाणा कोनी चाहन्दे। 5 वे आपणे सारे काम माणसां ताही दिखाण के खातर करै सै : वे आपणे ताबिजां नै चौड़ा करै सै अर आपणे लत्या की झालर बधावै सै। 6 जिमणै की खास-खास जंगहा, अर पंचायता के खास-खास बैठणया, 7 बजारां म्ह नमस्कार, अर माणसां म्ह रब्बी कुहवाणा उन्नै भावै सै। 8 पर थम रब्बी ना कुहवाणा, क्यूँके थारा एके गुरु सै, अर थम सारे भाई सो। 9 धरती पै किसे नै आपणा बाप न्ही कहणा, क्यूँके थारा एके बाप सै, जो सुर्ग म्ह सै। 10 अर स्वामी भी ना कुहवाणा, क्यूँके थारा एके मालिक सै, यानिके मसीह। 11 जो थारै म्ह बड्डा हो, वो थारा सेवक या नौकर बणै। 12 जो कोए आपणे आप नै बड्डा बनावैगा, वो छोटा करया जावैगा : अर जो कोए आपणे आप नै छोटा बनावैगा, वो बड्डा करया जावैगा। 13 ‘हे कपटी शास्त्रियों अर फरीसियों, थारै पै हाय! थम माणसां के खातर सुर्ग का बारणा बन्द करो सो अर ना उसम्ह बड़ण आळा ताही बड़ण द्यो सो। 14 [हे कपटी शास्त्रियों अर फरीसियों, थारै पै हाय! थम बिधवा के घरा नै खा जावो सो, अर दिखाण के खातर घणी वार ताही प्रार्थना करदे रहो सो : ज्यांतै थारै ताही घणी सजा मिलैगी।] 15 ‘हे कपटी शास्त्रियों अर फरीसियों, थारै पै हाय! थम एक माणस ताही आपणे मत म्ह ल्याण के खातर सारे जल अर थल म्ह हान्डो सो, अर जिब्व वो मत म्ह आ जावै सै तो उसनै आपणे तै दुगणा नारकीय बणया द्यो सो। 16 ‘हे आंधे अगुवो, थारै पै हाय! जो कहो सो के जै कोए मन्दर की सूह खावै तो किम्मे न्ही, पर जै कोए मन्दर के सोन्ने की सूह खावै तो उसतै बन्ध जावैगा। 17 हे बावळो अर आंध्यो, कौण बड्डा सै; सोन्ना या वो मन्दर जिसतै सोन्ना पवित्र होवै सै? 18 फेर कहो सो के जै कोए मंढी की सूह खावै तो किम्मे न्ही, पर जो भेंट उस पै सै, जै कोए उसकी सूह खावै तो बन्ध जावैगा। 19 हे आंध्यो, कौण बड्डा सै; भेंट या मंढी जिसम्ह भेंट पवित्र होवै सै? 20 इसकरके जो मंढी की सूह खावै सै, वो उसकी अर जो कीमे उस पै सै, उसकी भी सूह खावै सै। 21 जो मन्दर की सूह खावै सै, वो उसकी अर उसम्ह रहणीया की भी सूह खावै सै। 22 जो सुर्ग सूह खावै सै, वो

पणमेशर के सिंहासन की अर उसपै बैठण आळै की भी सूह खावै सै। 23 ‘हे कपटी शास्त्रियों अर फरीसियों, थारै पै हाय! थम पुदीनै, अर सौंफ, जीरे का दसमा हिस्सा तो द्यो सो, पर थम नै नियम-कायदा की डून्धी बात्तां ताही यानिके न्याय, अर दया, अर बिश्वास ताही छोड़ दिया सै; चहिये था के इन्नै भी करदे अर उन्नै भी न्ही छोड़दे। 24 हे आंधे अगुवो, थम मच्छरां ताही तो छाण ल्यो सो, पर ऊँट नै निगळ जावो सो। 25 हे कपटी शास्त्रियों अर फरीसियों, थारै पै हाय! थम कटोरे अर थाळी नै ऊप्पर-ऊप्पर तै तो मांजो सो पर वे भित्तर अन्धेर अर असंयम तै भरे होये सै। 26 हे आंधे फरीसी, पहल्या कटोरे अर थाळी नै भीत्तर तै मांज के वे बाहरण तै भी साफ हों। 27 ‘हे कपटी शास्त्रियों अर फरीसियों, थारै पै हाय! थम चुन्ने फिरी होई कब्र के जिसे सो जो ऊप्पर तै तो सुथरी दिखै सै, पर भीत्तर मुर्दा की हाड्डियाँ अर सारे ढाळ की गन्दगी तै टुकी होई सै। 28 इस्से रीती तै थम भी ऊप्पर तै माणसां ताही धर्म दिखो सो, पर भीत्तर अधर्म अर कपट तै भररे सो। 29 ‘हे कपटी शास्त्रियों अर फरीसियों, थारै पै हाय! थम नब्बियाँ की कब्र समारो सो अर धर्मिया की कब्र बणावो सो, 30 अर कहो सो, ‘जै हम आपणे बाप-दादया के दिना म्ह होंदे तो नब्बियाँ की हत्या म्ह उनके साइझी कोनी होंदे।’ 31 इसतै तो थम आपणे पै आप ए गवाही द्यो सो के थम नब्बियाँ के हत्यारां की ऊलाद सो। 32 आखर थम आपणे बाप-दादया के पाप का घड़ा दाऊ ढाळ भर द्यो। 33 हे साँपो, हे करैतो के बाळको, थम नरक की सजा तै किस ढाळ बचोगे? 34 इसकरके देखो, मै थारै धोरै नब्बियाँ अर समझवान अर शास्त्रियाँ ताही खन्दाऊँ सूं; अर थम उनम्ह तै कुछा नै मार द्योगे अर क्रूस पै चढावोगे, अर कुछा नै आपणे मन्दरां म्ह कोरडे मारोगे अर एक नगर तै दुसरे नगर ताही भजांदे फिरोगे। 35 जिसम्ह धर्मो हाबील तै लेकै बिरक्याह के बेट्टे जकरयाह तक, जिस ताही थमनै मन्दर अर मंढी के बिचाळै म्ह मार दिया था, जितने धर्मिया का लहु धरती पै बहाया गया सै वो सारा थारे सिर पै पड़ैगा। 36 मै थम नै साच्ची कहूँ सूं, ये सारी बात इस बखत के माणसां पै आ पड़ैगी। 37 ‘हे यरुशल्लेम, हे यरुशल्लेम! तू नब्बियाँ नै मार देवे सै, अर जो तेरै धोरै खिन्दाए गए, उन पै पत्थर बरसावै सै। कितनी ए बै मन्नै चाहया के जिस तरिया मुर्गी आपणे बच्या ताही आपणे पाखां के तळे कड़े करै सै, उससे तरिया ए मै भी तेरे बाळका ताही कड्डा कर ल्युँ, पर थमनै कोनी चाहया। 38 देखो, थारा घर थारै खातर उजाड़ छोड्या जावै सै। क्यूँके मै थम नै साच्ची कहूँ सूं के इब तै जिब्व ताही थम न्ही कहोगे, ‘धन्य सै वो, जो प्रभु के नाम तै आवै सै’ जित ताही थम मन्नै फेर कदे कोनी देखोगे।’ 39 क्यूँके मै थमनै कहूँ सूं के इब तै जिब्व तक थम न्ही कहोगे, ‘धन्य सै वो जो प्रभु के नाम तै आवै सै’ तब तक थम मन्नै कदे न्ही देखोगे।’

24 जिब्व यीशु मन्दर तै लिकड़ के जाण लागरया था, तो उसके चेले उस ताही मन्दर की बणावट दिखाण के खातर उसके धोरै आये। 2 यीशु नै उनतै कह्या, ‘थम यो सारा देखो सो न! मै थम नै साच्ची कहूँ सूं, उरै पत्थर पै पत्थर भी कोनी छूटेगा जो गेरया ना जावैगा।’ 3 जिब्व यीशु जैतून के पहाड़ पै बैठ्या था, तो चेल्यां नै पकै म्ह उसके धोरै आके कह्या, ‘हमनै बता, ये बात कद होवैगी? तेरै आण का अर दुनिया के अन्त का के निशान होवैगा?’ 4 यीशु नै उन ताही जबाब दिया, ‘चौकन्ने रहियो! कोए थमनै भकाण न्ही पावै, 5 क्यूँके घण-खरे इसे होवैगें जो मेरे नाम तै आके कहवैगें, ‘मै मसीह सूं, अर घणा ए ताही भकावैगें। 6 थम रोळे अर लड़ाई अर लड़ाईया का जिक्रा सुणोगे, तो घबराईयो ना क्यूँके इनका होणा जरूरी सै, पर उस बखत अंत कोनी होवैगा। 7 क्यूँके जात्तां पै जात, अर राज्य पै राज्य चढाई करैगें, अर जंगहा-जंगहा काल पड़ैगें, अर हाल्लण आवैगें। 8 ये सारी बात दुखा की सरूआत होवैगी। 9 फेर वे क्लेश देण के खातर थम नै पकड़वावैगें, अर थमनै मार देवैगें, अर मेरे नाम के कारण सारी जात्तां के माणस थारै तै बैर राखैगें। 10 फेर घण-खरे ठोकर खावैगें, अर एक-दुसरे नै पकड़वावैगें, अर एक-दुसरे तै बैर राखैगें। 11 घण-खरे झूठे नब्बी खड़े हो जावैगें, अर घणा ए ताही भकावैगें। 12 अधर्म के बंधण तै घणा ए का प्रेम शीळा पड़जावैगा, 13 पर जो आखर ताही थावस राक्खैगा, उससे का उद्धार होवैगा। 14 अर राज्य का यो सुसमाचार सारी दुनिया म्ह प्रचार करया जावैगा, के सारी जात्तां पै गवाही होवै, फेर अन्त आ जावैगा। 15 ‘इस करके जिब्व थम उस उजाड़ण आळी हिणी चीज ताही जिसका जिक्रा दानिय्येल



नब्बी के जरिये होया था, पवित्र जंगहा पै खड़े देखो (जो पढ़ें, वो समझें), 16 फेर जो यहूदिया म्ह हो वे पहाड़ा पै भाज जावें। 17 जो छात पै हो, वो आपणे घर म्ह तै समान लेण नै तळें न्ही उतरें; 18 अर जो खेत म्ह हो, वो आपणा लत्ता लेण नै पाचछें न्ही बोहड़ें। 19 उन दिनां म्ह जो गर्भवती अर दूध पिलान्दी होवैगीं, उन कै खातर हाय, हाय! 20 प्रार्थना करया करो के थमनै जाडै म्ह या सब्त कै दिन भाजणा ना पड़ै। 21 क्यूँके उस टेम इसा भारया क्लेश होवैगा, जिसा दुनिया की सरूआत तै ना इब ताही होया ना कदे होवैगा। 22 जै वे दिन घटाए न्ही जांदे तो कोए जीं कोनी बचता, पर छांटे होया कै कारण वे दिन घटाए जावैगें। 23 उस जै कोए बखत थम नै कहवै, 'देखो, मसीह उरै सै!' या 'ओड़ै सै!' तो बिश्वास ना करियो। 24 क्यूँके झूठे मसीह अर झूठे नब्बी उठ खड़े होवैगें, अर बड्डी निशात्री, अर अनोकरे काननाम्मे दिखावैगें के जै हो सक्या तो छांटे होया ताही भी भका देवैगें। 25 देखो, मन्त्रे पहल्या ए थारै तै यो सारा कीमे कह दिया सै। 26 इसकरके जै वे थारै तै कहवै, 'देखो, वो बण म्ह सै', तो बाहरण ना लिकड़यो; या 'देखो, वो कोठड़ीया म्ह सै', तो बिश्वास ना करियो। 27 क्यूँके जिस ढाळ बिजळी पूरब तै लिकड़ कै पश्चिम ताही चमकै सै, उस्से ढाळ माणस के बेट्टे का भी आणा होवैगा। 28 जित लाश हो, उड़ै ए गिद्ध कट्टे होवैगें। 29 "उन दिनां के क्लेश कै पाचछें जिब्वे सूरज अंधेरा म्ह हो जावैगा, चाँद का चांदना जान्दा रहवैगा, अर तारे अकास तै तळें पड़ैगें, अर अकास की सारी शक्ति हलाई ज्यागी। 30 फेर माणस के बेट्टे का निशान अकास म्ह दीखैगा, अर फेर धरती के सारे खानदाना के माणस छात्ती पिटैगें; अर माणस के बेट्टे ताही बड्डी सामर्थ अर एश्वर्य कै गेल्या अकास के बादळा पै आंदे देखोगे। 31 वो तुरही की तेज आवाज कै गेल्या आपणे दूत्तां नै खन्दावैगा, अर वे अकास के इस सिरे तै उस सिरे ताही, च्यारू दिशाया तै उसके छांटे होया नै कट्टे करैगें। 32 "अंजीर के दरख्त तै यो उदाहरण सिकखो : जिब्वे उसकी डाळी कोमल हो जावै अर पत्ते लिकड़ण लाग ज्या सै, तो थम जाण ल्यो के गर्मी का टेम लोवै सै। 33 इस्से तरिया तै जिब्वे थम इन सारी बात्तां नै देखो, तो जाण ल्यो के वो लोवै सै, बल्के बारणै ए पै सै। 34 मै थम नै साच्ची कहुँ सूँ के जिब्वे ताही यें सारी बात पूरी ना हो लेवै, जद ताही इस पीढ़ी का अन्त कोनी होवैगा। 35 धरती अर अकास टळ ज्यांगे, पर मेरी बात कोनी टळैगी। 36 "उस दिन अर उस घड़ी कै बारै म्ह कोए न्ही जाणदा, ना सुर्ग के दूत अर ना बेट्टा, पर सिर्फ पिता। 37 जिस ढाळ नूह के दिन थे, उस्से तरिया ए माणस के बेट्टे का आणा होगा। 38 क्यूँके जिस तरिया जल-प्रलय तै पहल्ये के दिना म्ह, जिस दिन ताही नूह जहाज पै न्ही चढ्या, उस दिन ताही माणस खावै-पीवै थे, अर उनम्ह ब्याह होवै थे। 39 अर जिब्वे ताही जल-प्रलय आकै उन सारया ताही बहा न्ही लेया, जद ताही उन्नै किम्मे बेरा न्ही पाट्या; इस्से तरिया ए माणस के बेट्टे का आणा भी होगा। 40 उस बखत दो जणे खेत म्ह होवैगें, एक ले लिया जावैगा अर दूसरा छोड़ दिया जावैगा। 41 दो लुगाई चक्की पीसदी रहवैगी, एक ले ली ज्यागी, अर दूसरी छोड़ दी ज्यागी। 42 ज्यातै जागदे रहो, क्यूँके थमनै न्ही बेरा के थारा प्रभु किस दिन आवैगा। 43 पर न्यू जाण ल्यो के जै घर का मालिक नै बेरा हो के चोर किस पहर आवैगा तो जागदा रहन्दा, अर आपणे घर म्ह सेंध लागण न्ही देन्दा। 44 ज्यातै थम भी तयार रहो, क्यूँके जिस घड़ी कै बारै म्ह थम सोचदे भी कोनी सो, उस्से घड़ी माणस का बेट्टा आ जावैगा। 45 "आखर म्ह वो बिश्वास जोगा अर श्याणा दास कौण सै, जिस ताही मालिक नै आपणे नौकर-चाकरा पर सरदार ठहराया के बखत पै उन्नै खाणा देवै? 46 धन्य सै वो दास, जिस ताही उसका मालिक आकै इसा ए करदा पावै। 47 मै थम नै साच्ची कहुँ सूँ, वो उसनै आपणी सारी सम्पति पै सरदार ठहरावैगा। 48 पर जै वो दुष्ट दास सोचण लागै के मेरै मालिक कै आण म्ह वार सै, 49 अर आपणे साथी नौकरां नै पिट्टण लागै, अर शराबियाँ कै गेल्या खावै-पीवै। 50 तो उस दास का मालिक इसे दिन आवैगा, जिब्वे वो उसकी बाट न्ही देख्दा हो, अर इसै बखत जिसनै वो जाणदा ना हो, 51 जिब्वे वो उसनै भारी ताड़ना देगा अर उसका हिस्सा कपटिया कै गेल ठहरावैगा: ओड़ै रोणा अर दात पिसना होगा।

25 "सुर्ग का राज्य" उन दस कुँवारियाँ के जिसा होगा जो आपणी मशाल ले के बन्दे तै फेटण लिकड़ी। 2 उनम्ह पाँच बेअक़ अर पाँच श्याणी थीं। 3 बेअक़ली कुँवारियाँ नै आपणी मशाल तो ली, पर आपणे

गेल्या तेल कोनी लिया; 4 पर श्याणीयां नै आपणी मशालां कै गेल्या आपणी कुपियां म्ह तेल भी भर लिया। 5 जिब्वे बन्दे कै आण म्ह वार होई, तो वे सारी ऊँघण लागी अर सो गी। 6 "आधी रात नै धूम माच्ची: 'देखो, बन्दे आण लागरया सै! उसतै फेटण नै चाल्लो।' 7 फेर वे सारी कुँवारियाँ उठकै आपणी मशाल ठीक करण लागी। 8 अर बेअक़ियां नै श्याणीया तै कहा, 'आपणे तेल म्ह तै कीमे हमनै भी द्यो, क्यूँके म्हारी मशाल बुझण लागरी सै।' 9 पर श्याणीया नै जबाब दिया, 'कदे यो म्हारै अर थारै खातर पूरा ना पड़ै; भला तो योए सै के थम बेचणीयां कै धोरै जाकै आपणे खातर मोल लियावो।' 10 जिब्वे वे मोल लेण नै जावै थी तो बन्दे आण पयोच्या, अर जो तयार थी, वे उसके गेल्या ब्याह कै घर म्ह चली गई अर बारणा मूंद दिया गया। 11 इसके पाचछें वे दूसरी कुँवारिया भी आकै कहण लागी, 'हे मालिक, हे मालिक, म्हारै खातर बारणा खोल दे।' 12 उसनै जबाब दिया, 'मै थारै ताही साच्ची कहुँ सूँ, मै थमनै कोनी जाणदा।' 13 इस करके जागदे रहो, क्यूँके थम ना उस दिन नै जाणो सो, ना उस घड़ी नै। 14 "क्यूँके या उस माणस की सी हालत सै जिसनै परदेश जान्दे बखत आपणे नौकरां ताही बुलाकै आपणी सम्पति उन ताही सौप दी। 15 उसनै एक तै पाँच तोड़े (20 किलो चाँदी), दुसरे ताही दो, अर तीसरे ताही एक; यानिके हरेक ताही उसकी योग्यता कै मुताबिक दिया, अर फेर परदेश चल्या गया। 16 फेर, जिस ताही पाँच तोड़े मिले थे, उसनै जिब्वे जाकै उनतै लेण-देण करया, अर पाँच तोड़े और कमाए। 17 इस्से तरिया तै जिस ताही दो मिले थे, उसनै भी दो और कमाए। 18 पर जिस ताही एक मिल्या था, उसनै जाकै माट्टी खोद्री, अर आपणे मालिक के रुपिये लहको दिये। 19 "घणे दिनां पाचछें उन नौकरां का मालिक आकै उन तै हिसाब लेण लाग्या। 20 जिसनै पाँच तोड़े मिले थे, उसनै पाँच तोड़े और ल्याकै कहया, हे मालिक, तन्नै मेरै ताही पाँच तोड़े सौपे थे, लखा, मन्त्रे ये पाँच तोड़े और कमाए सै।' 21 उसकै मालिक नै उसतै कहा, "धन्य, हे बढ़िया अर बिश्वास जोगे नौकर, तू माडै-सै म्ह बिश्वास जोगा लिकड़या; मै तन्नै घणी चिज्जां का अधिकारी बणाऊंगा। आपणे मालिक कै आनन्द म्ह साइझी हो।' 22 "अर जिस ताही दो तोड़ मिले थे, उसनै भी आकै कहा, "हे मालिक, तन्नै मेरै ताही दो तोड़े सौपे थे, देख, मन्त्रे दो तोड़े और कमाए।' 23 उसकै मालिक नै उसतै कहा, "धन्य, हे बढ़िया अर बिश्वास जोगे नौकर, तू माडै-सै म्ह बिश्वास जोगा लिकड़या; मै तन्नै घणी चिज्जां का अधिकारी बणाऊंगा। आपणे मालिक कै आनन्द म्ह साइझी हो।' 24 "फेर जिस ताही एक तोड़ा मिल्या, उसनै आकै कहा, "हे मालिक, मै तन्नै जाणू था के तू करडा माणस सै : तू जित किते न्ही बोन्दा ओड़ै काट्टै सै, अर जित न्ही खिंडान्दा ओड़ै तै कट्टा करै सै। 25 ज्यातै मै डरग्या अर जाकै तेरा तोड़ा माट्टी म्ह लको दिया। देख, जो तेरा सै, वो यो सै।' 26 उसकै मालिक नै उस ताही जबाब दिया, "हे दुष्ट अर आलसी नौकर, जिब्वे तन्नै न्यू बेरा था के जित मन्त्रे न्ही बोया ओड़ै तै काट्टू सूँ, अर जित मन्त्रे न्ही खिंडाया ओड़ै तै कट्टा करूँ सूँ; 27 तो तन्नै चहिये था के मेरा रुपिया सरफां ताही दे दँदा, फेर मै आकै आपणा धन ब्याज सुदा ले लेन्दा। 28 ज्यातै उसतै वो तोड़ा उसतै ले ल्यो, अर जिसकै धोरै दस तोड़े सै उसनै दे द्यो। 29 क्यूँके जिस किसे धोरै सै, उस ताही और दिया जावैगा; अर उसके धोरै घणा हो जावैगा : पर जिसकै धोरै न्ही सै, उसतै वो भी जो उसके धोरै सै, ले लिया जावैगा। 30 अर इस निकम्मे नौकर नै बाहरण कै अन्धेरै म्ह गेर द्यो, जित रोणा अर दाँत पिसणा होगा।' 31 "जिब्वे माणस का बेट्टा आपणी महिमा म्ह आवैगा अर सारे सुर्गदूत उसके गेल्या आवैगें, तो वो आपणी महिमा कै सिंहासन पै बैठैगा। 32 अर सारी जात उसके स्याम्ही कट्टी करी जावैगी; अर जिस ढाळ पाळी भेड्जां नै बकरियाँ तै न्यारी कर देवै सै, उस्से तरिया वो उन्नै एक-दुसरे तै न्यारा करैगा। 33 वो भेड्जां नै आपणी सोळी वोड़ अर बकरियाँ नै वोळी वोड़ खड्या करैगा। 34 फेर राजा आपणी सोळी वोड़ आळ्यां नै कहवैगा, 'हे मेरे पिता के धन्य माणसो, आवो, उस राज्य के हकदार हो जावो, जो दुनिया की सरूआत तै थारै खातर तयार करया गया सै। 35 क्यूँके मै भूख्खा था, अर थमनै मेरै ताही खाण नै दिया; मै तिसाया था, अर थमनै मेरै ताही पाणी पिलाया; मै परदेशी था, अर थमनै मेरै ताही आपणे घरा ठहराया; 36 मै उधाड़ा था, अर थमनै मेरै ताही लत्ते पिहराए; मै बीमार था, अर थमनै मेरा बेरा लिया, मै जेळ म्ह था, अर थम मेरै तै फेटण आये।' 37 "फेर धर्मो उस

ताही जबाब देवेंगे, 'हे प्रभु, हमने कद तेरे ताही भूख्खा देख्या अर खुवाया? या कद तिसाया देख्या अर पाणी पिलाया? 38 हमने कद तेरे ताही परदेशी देख्या अर आपणे घरा ठहराया? या उघाडा देख्या अर लत्ते पिहराये? 39 हमने कद तेरे ताही बीमार या जेळ म्ह देख्या अर तेरा बेरा लेण न्ही आये?' 40 फेर राजा उत्रे जबाब देवेंगा, 'मै थमने साच्ची कहुँ सूँ के थमने जो मेरे इन छोट्या तै छोट्टे भाईया म्ह तै किसे एक कै गेल्या करया, वो मेरे ए गेल्या करया।' 41 "फेर वो वोळें कात्री आळ्यां ताही कहवेंगा, 'हे श्रापित माणसो, मेरे स्याम्ही तै उस अनन्त आग म्ह चले जावो, जो शैतान अर उसके दूत्तां खातर त्यार करी गयी सै।' 42 क्युँके मै भूख्खा था, अर थमने मेरे ताही खाण नै कोनी दिया; मै तिसाया था, अर थमने मेरे ताही पाणी कोनी पिलाया; मै परदेशी था, अर थमने मेरे ताही आपणे घरा कोनी ठहराया; 43 मै नंगा था, अर थमने मेरे ताही लत्ते कोनी पिहराए; मै बीमार था, अर थमने मेरा बेरा कोनी लिया, मै जेळ म्ह था, अर थमने तै फेटण कोनी आये।' 44 "फेर वे जबाब देवेंगे, 'हे प्रभु, हमने तेरे ताही कद भूख्खा, या तिसाया, या परदेशी, या उघाडा, या बीमार, या जेळ म्ह देख्या, अर तेरी सेवा-बाडी न्ही करी?' 45 फेर वो उत्रे जबाब देवेंगा, 'मै थमने साच्ची कहुँ सूँ के थमने जो मेरे इन छोट्या तै छोट्टा म्ह तै किसे एक कै गेल्या न्ही करया, वो मेरे गेल्या भी न्ही करया।' 46 अर ये अनन्त दंड भोगेंगे पर धर्मी अनंत जीवन म्ह दाखल होंगे।

26 जिब्व यीशु नै ये सारी बात कहली तो आपणे चेल्यां तै कहण लाग्या, 2 "थमने बेरा सै के दो दिनां पाचछें फसह का त्यौहार सै, अर माणस का बेडा क्रूस पै चढाण कै खातर पकड़वाया जावेंगा।" 3 फेर प्रधान याजक अर प्रजा के पुरनिये काइफा नामक महायाजक कै आँगन म्ह कड्डे होये, 4 अर आपस म्ह बिचार करण लाग्गे के यीशु ताही छळ तै पकड़कै मार देवा। 5 पर वे कहवें थे, "त्यौहार कै बखत न्ही, कदे इसा ना हो के माणसां म्ह रोळा माच ज्या।" 6 जिब्व यीशु बैतनिय्याह म्ह शमौन कोडी कै घरा था, 7 तो एक लुगाई संगमरमर के बरतन म्ह महंगा सैन्ट लेकै उसके धोरे आई, अर जिब्व वो खाणा खाण नै बैठ्या था तो उसके सिर पै उंडेल दिया। 8 न्यु देखकै उसके चेले खीजकै अर कहण लाग्गे, "इसका क्यातै नास करया गया? 9 इस ताही तो बढिया दाम्मां पै बेचकै कंगालां म्ह बांडया जा सकै था।" 10 न्यु जाण कै यीशु नै उनतै कहा, "लुगाई नै क्यातै सतावो सो? उसने मेरे गेल्या भलाई करी सै।" 11 कंगाल तो थारे गेल्या सारी हाण रहवें सै, पर मै थारे गेल्या सारी हाण कोनी रहूँगा। 12 उसने मेरी देही पै जो यो सैन्ट उंडेला सै, वो मेरे गाडे जाण कै खातर करया सै। 13 मै थमने साच्ची कहुँ सूँ के सारे जगत म्ह जित किते भी यो सुसमाचार प्रचार करया जावेंगा, ओडै उसके इस काम का जिक्का भी उसके याद म्ह करया जावेंगा।" 14 फेर यहूदा इस्करियोती नै, जो बारहा चेल्यां म्ह तै एक था, प्रधान याजकां कै धोरे जाकै कहा, 15 "जै मै यीशु नै थारे हाथां म्ह पकड़वा चुँ, तो मन्त्रे के दोगे?" उत्रे तीस चाँदी के सिक्के तौलकै दे दिये। 16 अर वो उससे बखत तै यीशु नै पकड़वाण का मौक्का टोहण लाया। 17 अरखमीरी रोडी कै त्यौहार कै पहल्डे दिन, चेले यीशु के धोरे आकै बुझण लाग्गे, "तू कित चाहवें सै के हम तेरे खातर फसह खाण की त्यारी करा?" 18 यीशु बोल्या, "नगर म्ह फलाणा माणस नै जाकै उसतै कहो, 'गुरु कहवें सै के मेरा बखत लोवें सै। मै आपणे चेल्यां कै गेल्या तेरे उरे त्यौहार बणाऊँगा।" 19 आखर चेल्यां नै यीशु का हुक्म मान्या अर फसह त्यार करया। 20 जिब्व साँझ होई तो वो बारहा कै गेल्या खाणा खाण कै खातर बैठ्या। 21 जिब्व वे खाण लागरे थे तो यीशु नै कहा, "मै थमने साच्ची कहुँ सूँ के थारे म्ह तै एक मन्त्रे पकड़वावेंगा।" 22 इस पै घणे उदास होये, अर हरेक उसतै बुझण लाग्या, "हे गुरु, के वो मै सूँ?" 23 उसने जबाब दिया, "जिसने मेरे गेल्या थाळी म्ह हाथ घाल्या सै, वो ए मन्त्रे पकड़वावेंगा। 24 माणस का बेडा तो जिसा उसके बारे म्ह लिख्या सै, जावै ए सै; पर उस माणस कै खातर दुःख सै जिसकै जरिये माणस का बेडा पकड़वाया जावै सै : जै उस माणस का जन्म ए न्ही होंदा, तो उसके खातर भला होंदा।" 25 फेर उसके पकड़वाण आळे यहूदा नै कहा, "हे रब्बी, के वो मै सूँ?" यीशु उसतै बोल्या, "तन्त्रे कह लिया।" 26 जिब्व वे फसह खाण लागरे थे, तो यीशु नै रोडी ली, अर आशीष माँगकै तोडी, अर चेल्यां ताही देकै कहा, "ल्यो, खावो; या मेरी देही सै।" 27 फेर यीशु नै आपणा कटोरा लेकै

धन्यवाद करया, अर उन ताही देकै कहा, "थम सारे इस म्ह तै पियो, 28 क्युँके यो वाचा का मेरा वो लहू सै, जो घण-खरया कै खातर पापो की माफी कै खातर बहाया जावै सै।" 29 मै थमने साच्ची कहुँ सूँ के दाख का यो रस उस दिन ताही कदे न्ही पिऊंगा, जिब्व थारे गेल्या आपणे पिता कै राज्य म्ह नया न्ही पीऊँ।" 30 फेर वे भजन गाके जैतून कै पहाड पै गये। 31 फेर यीशु नै उनतै कहा, "थम आज ए रात नै मेरे बाबत ठोकर खावोगे, क्युँके लिख्या सै : 'मै पाळी नै मारूँगा, अर टोळ की भेड़ तितर-बितर हो जावेंगी।' 32 पर मै आपणे जिन्दा उठने कै बाद थारे तै पहल्या गलील नै जाऊँगा।" 33 इस पै पतरस नै उसतै कहा, "जै सारे तेरे बाबत ठोकर खावें तो खावै, पर मै कदे भी ठोकर कोनी खाऊँगा।" 34 यीशु नै उसतै कहा, "मै तेरे तै साच्ची कहुँ सूँ के आज ए रात नै मुर्गे के बाँग देण तै पहल्या, तू तीन बे मेरे बारे म्ह मुकरेगा।" 35 पतरस नै उसतै कहा, "जै मन्त्रे तेरे गेल्या मरणा भी पडै, तोभी मै तेरे तै कदे भी कोनी मुकरूँगा।" अर इससे तरिया सारे चेल्यां नै कहाया। 36 फेर यीशु नै आपणे चेल्यां कै गेल्या गतसमनी नामक एक जंगहा म्ह आया अर आपणे चेल्यां तै कहण लाग्या, "उरे ए बैठे रहियो, जिब्व ताही मै ओडै प्रार्थना करूँ।" 37 वो पतरस अर जब्दी के दोनु बेडा नै गेल्या लेग्या, अर उदास अर काल होण लाग्या। 38 फेर उसने उनतै कहा, "मेरा जी घणा उदास सै, उरे ताही के मेरा जी लिकड़ण नै होरया सै। थम उरे ठहरो अर जागदे रहो।" 39 फेर वो माडा और आगे सरक कै मुँह कै बळ गिरया, अर या प्रार्थना करी, "हे मेरे पिता, जै हो सकै तो यो कटोरा मेरे तै टळ जावै, तोभी जिसा मै चाहूँ सूँ इसा न्ही, पर जिसा तू चाहवें सै उससे तरिया ए होवै।" 40 फेर उसने चेल्यां कै धोरे आकै उन ताही सोन्दे पाया अर पतरस तै बोल्या, "के थम मेरे गेल्या एक घडी भी कोनी जाग सके? 41 जागदे रहो, अर प्रार्थना करदे रहो के थम हिम्तान म्ह ना पडो : आत्मा तो त्यार सै पर देही माडी सै।" 42 फेर उसने दूसरी बै जाकै या प्रार्थना करी, "हे मेरे पिता, जै यो मेरे पिए बिना न्ही हट सकदा, तो तेरी मर्जी पूरी हो।" 43 फेर उसने आकै उन ताही फेर सोन्दे पाया, क्युँके उनकी आँख न्ही द तै भरी थीं। 44 उत्रे छोड़कै वो फेर चल्या गया, अर उत्रे शब्दां म्ह फेर तीसरी बै प्रार्थना करी। 45 फेर उसने चेल्यां कै धोरे आकै उनतै कहा, "इब सोन्दे रहो, अर आराम करो : देखो, बखत आण पहोच्या सै, अर माणस का बेडा पापियो के हाथां पकड़वाया जावै सै।" 46 उठो, चाला; देखो, मेरा पकड़ण आळा लोवै आण पहोच्या सै।" 47 वो न्यु कहण ए लागरया था के यहूदा जो बारहा म्ह तै एक था आया, अर उसके गेल्या प्रधान याजकां अर माणसां के पुरनियां की वोड तै बड्डी भीड, तलवार अर लाठी लिये होये, आई। 48 यीशु कै पकड़वाण आळे यहूदा नै उन ताही यो इशारा दिया था : "जिस ताही म्ह चूम ल्युँ वो ए सै; उस ताही पकड़ लियो।" 49 अर जिब्व यीशु कै धोरे आकै कहा, "हे रब्बी, नमस्कार!" अर उस ताही घणा ए चुम्प्या। 50 यीशु नै उसतै कहा, "हे mitr, जिस काम कै खातर तू आया सै, उसने कर ले।" फेर उत्रे धोरे आकै यीशु पै हाथ गरया अर उस ताही पकड़ लिया। 51 यीशु के मित्तरां म्ह तै एक नै हाथ बढ़ाकै आपणी तलवार खिंच ली अर महायाजक के नौकर पै चला कै उसका कान उड़ा दिया। 52 फेर यीशु नै उसतै कहा, "आपणी तलवार म्यान म्ह धर ले क्युँके जो तलवार चलावै सै वे सारे तलवार तै नास करे जावेंगे। 53 के तन्त्रे न्ही बेरा के मै आपणे पिता तै बिनती कर सकूँ सूँ, अर वो सुर्गदुत्तां की बारहा पलटन तै घणे मेरे धोरे इब्बे हाजर कर देवेंगा? 54 पर पवित्र ग्रन्थ की ये बात के इसा ए होणा जरूरी सै, किस ढाळ पूरी होवेंगी?" 55 उस बखत यीशु नै भीड तै कहा, "के थम तलवार अर लाठी लेकै मन्त्रे डाकु की ढाळ पकड़ण कै खातर लिकड़े सो? मै हरेक दिन मन्दर म्ह बैठ के उपदेश दिया करूँ था, अर थमने मेरे ताही कोनी पकड़या। 56 पर यो सारा ज्यातै होया सै के नब्बियाँ के बचन पुरे होवै।" फेर सारे चेले उसने छोड़ कै भाज्गे। 57 फेर यीशु के पकड़ण आळे उस ताही काइफा नामक महायाजक कै धोरे लेगे, जित शास्त्री अर पुरनिये कड्डे होये थे। 58 पतरस दूर ए दूर उसके पाचछे-पाचछे महायाजक कै आँगन ताही आया, अर भीत्तर जाकै अन्त देखण नै प्यादां कै गेल्या बैठ्या। 59 प्रधान याजक अर सारी बड्डी पंचायत यीशु नै मारण कै खातर उसके बिरोध म्ह झूठी गवाही की टोह म्ह थे, 60 पर घण-खरे झूठे गवाह कै आण पै भी कोनी पाई। आखर म्ह दो जणे आये, 61 अर बोले, "इसनै कहाया सै के मै पणमेशर कै मन्दर नै गेर सकूँ सूँ अर उस ताही तीन

दिन म्ह बना सकूँ सूँ।" 62 फेर महायाजक नै खड़े होकै यीशु तै कहा, "के तू कोए जबाब न्ही देदा? ये माणस तेरै बिरोध म्ह के गवाही देवै सै?" 63 पर यीशु बोल-बाल्ला रहया। फेर महायाजक नै उसतै कहा, "मै तन्नै जिन्दे पणमेशर की सूंह छुँ सूँ के जै तू पणमेशर का बेट्टा सै, तो म्हारै तै कह दे।" 64 यीशु नै उसतै कहा, "तन्नै आप ए कह दिया; बल्के मै तेरै तै यो भी कहूँ सूँ के इब तै थम माणस के बेट्टे ताही सारया तै सब तै ताकतवर की सोळी वोड़ baete, अर अकास के बादलां पै आंदे देकखोगे।" 65 इस पै महायाजक नै आपणे लत्ते पाड़े अर बोल्या, "इसनै पणमेशर की बुराई करी सै, इब हमनै गवाही की के जरूत? देखखो, थमनै इब्बे या बुराई सुणी सै! 66 थम के सोचो सो?" उन्नै जबाब दिया, "यो मारण जोगा सै।" 67 फेर उन्नै उसकै मुँह पै थुक्या अर उसकै घुस्से मारे, दूसरयां नै रैप्ट मारके कहा, 68 "हे मसीह, म्हारै तै भविष्यवाणी करके कह के किसनै तेरै ताही मारया?" 69 पतरस बाहरण आँगन म्ह बैठ्या था के एक नौकरांनी उसकै धोरै आई अर बोल्थी, "तू भी यीशु गलीली के गेल्या था।" 70 उसनै सारया के स्याम्ही कहके नाट्या, "मन्नै न्ही बेरा तू के कहवै सै।" 71 जिब्ब वो बाहरण देहळिया म्ह गया, तो दूसरी नौकरांनी नै उस ताही देखके उन ताही जो ओड़ै थे कहा, "यो भी यीशु नासरी के गेल्या था।" 72 वो सूंह खाके फेर नाट्या : "मै उस माणस नै कोनी जाणदा।" 73 माडी बार पाचछै माणसां नै जो ओड़ै खड़े थे, पतरस के धोरै आके उसतै कहा, "साचए तू भी उनम्ह तै एक सै, क्यूँके तेरी बोल्थी तेरा भेद खोल्लै सै।" 74 फेर वो धिक्कारण अर सूंह खाण लाग्या : "मै उस माणस नै कोनी जाणदा।" जिब्बे मुर्गे नै बाँग देई। 75 जिब्ब पतरस नै यीशु की कही होई बात याद आई "मुर्गे के बाँग देवैण तै पहल्या तीन बै तू मेरा इंकार करैगा।" अर वो बारण ज्याके फूट-फूट के रोया।

27 जिब्ब सुबेरा होया तो सारे प्रधान याजकां अर माणसां के पुरनियां नै यीशु ताही मारण की सलाह करी। 2 उन्नै यीशु ताही बाँध्या अर ले जाके पिलातुस हाकिम के हाथां म्ह सौप दिया। 3 जिब्ब उसके पकड़वाण आळे यहूदा नै देख्या के वो कसूरवार ठहराया गया सै तो वो पसताया अर वे तीस चौंटी के सिक्के प्रधान याजकां अर पुरनियां के धोरै बोहड़ाया 4 अर कहा, "मन्नै बेकसुरावर ताही मारण के खातर पकड़वाके पाप करया सै।" उन्नै कहा, "म्हारै ताही के? तू ए जाण।" 5 फेर वो उन सिक्का नै मन्दर म्ह बगाके चल्या आया, अर जाके आपणे आप ताही फाँसी लगा ली। 6 प्रधान याजका नै उन सिक्का ताही लेके कहा, "इन ताही, भण्डार म्ह धरणा ठीक कोनी, क्यूँके यो लहू का मोल सै।" 7 आखर म्ह उन्नै सलाह करके उन सिक्कां तै परदेशियां के गाड्डे जाण के खातर कुम्हार का खेत मोल ले लिया। 8 इस कारण वो खेत आज ताही लहू का खेत कुहवावै सै। 9 फेर जो बचन यिर्मयाह नब्बी के जरिये कहया गया था वो पूरा होया : "उन्नै वे तीस सिक्के यानिके उस ठहराए होये मोल ताही (जिस ताही इस्राएल की ऊलाद म्ह तै कितन्यां नै ठहराया था) ले लिया, 10 अर जिस तरिया प्रभु नै मेरै ताही हुकम दिया था, उस्से तरिया ए उन्नै कुम्हार के खेत के मोल म्ह दे दिया।" 11 जिब्ब यीशु हाकिम के स्याम्ही खड़या था तो हाकिम नै उसतै बुझया, "के तू यहूदियां का राजा सै?" यीशु नै उसतै कहा, "तू आप ए कहण लागरया सै।" 12 जिब्ब प्रधान याजक अर पुरनिये उस पै तोहमन्द लावै थे, तो उसनै कीमे जबाब कोनी दिया। 13 इस पै पिलातुस नै उसतै कहा, "के तू न्ही सुणदा के ये तेरै बिरोध म्ह कितनी गवाही देवै सै?" 14 पर उसनै उस ताही एक बात का भी जबाब कोनी दिया, उरै ताही के हाकिम ताही घणी हैरानी होई। 15 हाकिम का यो रिवाज था के उस त्योंहार म्ह माणसां के खातर किसे एक कैदी ताही जिसनै वे चाहवै थे, रिहा कर देवै था। 16 उस टेम उनके उरै बरअब्बा नामका एक मान्या होड़ कैदी था। 17 आखर जिब्ब वो कड़े होए, तो पिलातुस नै उनतै कहा, "थम किसनै चाहो सो के मै थारे खातर रिहा करूँ? बरअब्बा ताही, या यीशु ताही जो मसीह कुहवावै सै।" 18 क्यूँके उसनै बेरा था के उन्नै उस ताही डाह तै पकड़वाया था। 19 जिब्ब वो न्याय की गद्दी पै बैठ्या होया था तो उसकी बीरबान्नी नै उस ताही कुहा खन्दाया, "तू उस धर्मी के मामलै म्ह हाथ ना गेरिये, क्यूँके मन्नै आज सपने म्ह उसके कारण घणा दुःख टाया सै।" 20 प्रधान याजकां अर पुरनियां नै माणसां ताही उकसाया के वे बरअब्बा नै माँग ले, अर यीशु का नास कराएँ। 21 हाकिम नै उसतै बुझया, "इन दोनुआ म्ह तै किस नै चाहो सो के मै थारै खातर रिहा

करूँ?" उन्नै कहा, "बरअब्बा ताही।" 22 पिलातुस नै उनतै कहा, "फेर यीशु ताही, जो मसीह कुहवावै सै, के करूँ?" सारया नै उसतै कहा, "यीशु कूस पै चढ़ाया जावै।" 23 हाकिम नै कहा, "क्यातै, उसनै के भूंडा करया सै?" पर वे और भी ठाडू-ठाडू बोलण लागे, "वो कूस पै चढ़ाया जावै।" 24 जिब्ब पिलातुस नै देख्या के किम्मे न्ही बण पडरया पर उल्टा दंगा बढदा जावै सै, तो उसनै पाणी लेके भीड़ के स्याम्ही आपणे हाथ धोए अर कहा, "मै इस धर्मी के लहू तै बेकसूर सूँ: थम ए जाणो।" 25 सारे माणसां नै जबाब दिया, "इसका लहू म्हारै पै अर म्हारी ऊलादा पै हो।" 26 इस पै उसनै बरअब्बा ताही उनके खातर रिहा कर दिया, अर यीशु ताही कोरडे लगवाके सौप दिया, के कूस पै चढ़ाया जावै। 27 फेर हाकिम के सिपाहियां नै यीशु ताही किले म्ह ले जाके सारी पलटण उसके चौगरदे नै कड़ी करी, 28 अर उसके लत्ते तारके उस ताही लाल रंग का चोगा पहिराया, 29 अर कांड्यां का ताज गुन्दके उसके सिर पै धरया, अर उसके सोळे हाथां म्ह सरकण्डा दिया अर उसके आगे गोड्डे टेक के उसका मखौल उड़ाण लागे अर कहा, "हे यहूदिया के राजा, नमस्कार!" 30 अर उसपै थुक्या; अर वो ए सरकण्डा लेके उसके सिर पै मारण लागे। 31 जिब्ब उन्नै उसका मखौल कर लिया, तो वो चोगा उस पै तै तारके फेर उस्से के लत्ते उस ताही पहिराए, अर कूस पै चढ़ाण के खातर ले चाले। 32 बाहरणै जान्दे होये, उन ताही शमौन नाम का एक कुरेनी माणस फेट्या। उन्नै उस ताही बेगार म्ह पकड़या के उसका कूस ठाके ले चाले। 33 उस जंगहा पै जो गुलगुत्ता यानिके खोपड़ी की जंगहा कुहवावै सै, पहाचके 34 उन्नै पित्त मिलाया होड़ दाखरस उस ताही पीण नै दिया, पर उसनै चाखके पिणा न्ही चाहया। 35 फेर उन्नै उस ताही कूस पै चढ़ाया, अर पर्ची गेरके उसके लत्ते बांड लिये, 36 अर ओड़ै बैठके उसका पहरा देण लागे। 37 अर उसकी खोट-चिड़ी उसके सिर पै लाई, के, "यो यहूदिया का राजा यीशु सै।" 38 फेर उसके गेल्या दो डाकू एक सोळी वोड़ अर एक वोळी वोड़, कूस पै चढ़ाए गए। 39 आण-जाण आळे सिर हला-हलाके उसकी बुराई करे थे, 40 अर वे कहवै थे, "हे मन्दर नै ढाण आळे अर तीन दिनां म्ह बनाण आळे, आपणे आप नै तो बचा! जै तू पणमेशर का बेट्टा सै, तो कूस पै तै उतर आ।" 41 इस्से तरिया तै प्रधान याजक भी शास्त्रियों अर पुरनियां सुदा मखौल करके कहवै थे, 42 "इसनै औरा ताही बचाया, अर आपणे आप नै न्ही बचा सकदा। यो तो 'इस्राएल का राजा' सै। इब कूस पै तै उतर आवै तो हम उसपै बिश्वास करया।" 43 उसनै पणमेशर पै भरोसा राख्या सै; जै वो इसनै चाहवै सै, तो इब इसनै फुट्टा लेवै, क्यूँके इसनै कहया था, 'मै पणमेशर का बेट्टा सूँ।' 44 इस्से ढाळ डाकू भी जो उसके गेल्या कूस पै चढ़ाए गए थे, उसकी बुराई करे थे। 45 दोफारी तै लेके तीसरे पहर ताही उस साबते देश म्ह अंधेरा छाया रहया। 46 तीसरे पहर के लोवै यीशु नै ठाडू बोल के कहा, "एली, एली, लमा शबकनी?" यानिके "हे मेरे पणमेशर, हे मेरे पणमेशर, तन्नै मेरै ताही क्यातै छोड़ दिया?" 47 जो उड़ै खड़े थे, कितन्या नै न्यू सुणके कहा, "वो तो एलियाह ताही बुलावै सै।" 48 उनम्ह तै एक जिब्बे भाज्या, अर स्याहीचुस लेके सिरके म्ह डबोया, अर सरकण्डे पै धरके उस ताही चुसाया। 49 औरां नै कहा, "रहज्या, देखवा एलियाह उसनै बचाण आवै सै के न्ही।" 50 फेर यीशु नै ठाडू बोल के किल्की मारके जी दे दिया। 51 अर देखखो, मन्दर का पड़दा ऊप्पर तै तळै ताही पाटके दो टुकड़े होया : अर धरती कांम्बगी चट्टान तड़कगी, 52 अर कब्रे खुलगी, अर सोए होड़ पवित्र माणसां की घण-खरी लाश जिन्दी होगी, 53 अर उसके जिन्दा होण के पाचछे वे कब्र म्ह तै लिकड़के पवित्र नगर म्ह गए अर घणाए ताही दिक्खे। 54 फेर सूबेदार अर जो उसके गेल्या पहरा दे रे थे, हाल्लण अर जो कीमे होया था उस ताही देखके घणे डरगे अर कहा, "साचए यो पणमेशर का बेट्टा था।" 55 ओड़ै घण-खरी लुगाई जो गलील तै यीशु की सेवा करदी होई उसके गेल्या आई थीं, दूर तै यो देखे थीं। 56 उनम्ह मरियम मगदलीनी, अर याकुब अर योसेस की माँ मरियम, अर जब्दी के बेट्टा की माँ थी। 57 जिब्ब साँझ होई तो यूसुफ नामका अरिमतिया का एक साहूकार माणस, जो खुदे यीशु का चेला था। 58 उसनै पिलातुस धोरै जाके यीशु की लाश माँगी। इसकरके पिलातुस नै येशु की लाश देण का हुकम दिया। 59 यूसुफ नै लाश ली, उस ताही धोळी चादर म्ह लपेटया, 60 अर उस ताही आपणी नई कब्र म्ह धरया, जो उसनै चट्टान म्ह खुदवाई थी, अर कब्र के बारणे पै एक बड्डा पत्थर गिरड़ा

कै चल्या गया।<sup>61</sup> मरियम मगदलीनी अर दूसरी मरियम वोडए कब्र कै स्याम्ही बैठी थीं।<sup>62</sup> दूसरा दिन जो तैयारी कै दिन कै पाच्छै का दिन था, प्रधान याजकां अर फरिसियाँ नै पिलातुस कै धोरै कड्डे होकै कहा, <sup>63</sup> "हे महाराज, म्हारै ताही याद सै के उस भकाण आळै नै जिब्व वो जिन्दा था, तो उसनै न्यू कहा था, 'मै तीन दिन पाच्छै जिन्दा हो जाऊँगा।'" <sup>64</sup> इस करकै हुक्म दे के तीसरे दिन ताही कब्र की रुखाळी करी जावै, इसा ना हो के उसके चेले आकै उसनै चुरा ले जावै, अर माणसां तै कहण लागै, 'वो मरे होया म्ह तै जिन्दा होग्या सै।' फेर पाच्छला धोख्खा पहल्ले तै भी भूंडा होगा।"<sup>65</sup> पिलातुस नै उनतै कहा, 'थारै धोरै पहरेदार तो सै। जावो, आपणी समझ कै मुताबिक रुखाळी करो।'" <sup>66</sup> आखर वे पहरेदारां नै गेल लेकै गये, अर पत्थर पै मोहर लगाकै कब्र की रुखाळी करी।

**28** सब्त कै दुसरै दिन पाच्छै हफते कै पहल्ले दिन तडकए-तडकै मरियम मगदलीनी अर दूसरी मरियम कब्र नै देखण आई।<sup>2</sup> अर देक्खो, एक बड्डा हाल्लण आया, क्युके प्रभु का दूत सुर्ग तै उतरया अर धोरै आकै उसनै पत्थर ताही गिरड़ा दिया, अर उस पै बैठग्या।<sup>3</sup> उसकी शिक्र बिजळी बरगा था अर उसका लत्ता पाळे की ढाळ धोळा था।<sup>4</sup> उसकै डर तै पहरेदार काँम्बगें, अर मुर्दे की ढाळ होग्ये।<sup>5</sup> सुर्गदुत नै लुगाईयाँ ताही कहा, "मतना डरो, मन्त्रै बेरा सै के थम यीशु ताही जो क्रूस पै चढाया गया था, टोहवो सो।<sup>6</sup> वो उरै न्ही सै, पर आपणे बचन कै मुताबिक जिन्दा होग्या सै। आवो, या जंगहा देक्खो, जित प्रभु पड्या था,<sup>7</sup> अर तोळी जाकै उसके चेल्यां ताही कहो के वो मरे होया म्ह तै जिन्दा होग्या सै, अर वो थारै तै

पहल्या गलील नै जावै सै, उडै उसका दर्शन पावोगे! देक्खो, मन्त्रै थारै तै कह दिया।"<sup>8</sup> वे भय अर घणी खुशी कै गेल्या कब्र तै तोळी बोहड़ कै उसके चेल्यां ताही खबर देण नै भाज्जी गई।<sup>9</sup> फेर यीशु उन ताही फेट्या। अर कहा, "नमस्ते"। उन्नै धोरै आकै अर उसके पां पकड़कै उस ताही प्रणाम करया।<sup>10</sup> फेर यीशु नै उनतै कहा, "मतना डरो; मेरे भाईयां तै जाकै कहो के गलील नै चले जावै, उडै मन्त्रै देखैगें।"<sup>11</sup> वे जावै ए थे के पहरेदारां म्ह तै कुछा नै नगर म्ह आकै पूरा हाल प्रधान याजकां तै कह सुणाया।<sup>12</sup> फेर उन्नै पुरनिया कै गेल्या कड्डे होकै सलाह करी अर सिपाहीया ताही घणी चाँदी देकै कहा, <sup>13</sup> "न्यू कहियो के जिब्व हम रात नै सोण लागरे थे, तो उसके चेले आकै उसनै चुरा लेगे।<sup>14</sup> जै या बात हाकिम कै कान ताही पहाचैगी, तो हम उसनै समझा लेवागें अर थमनै जोखम तै बचा लेवागें।"<sup>15</sup> आखर उन्नै रपिये लेकै जिसे सिखाए गये थे, उस्से तरिया ए करया। या बात आज ताही यहूदिया म्ह मन्त्री जावै सै।<sup>16</sup> ग्यारहा चेले गलील म्ह उस पहाड़ पै गये, जिस ताही यीशु नै उन ताही बताया था।<sup>17</sup> उन्नै उसका दर्शन पाकै उस ताही प्रणाम करया, पर किसे-किसे नै शक होया।<sup>18</sup> यीशु नै उनकै धोरै आकै कहा, "सुर्ग अर धरती का सारा हक्क मेरै ताही दिया गया सै।"<sup>19</sup> इस करकै थम जावो, सारी जात्तां के माणसां ताही चेल्यां बणावो; अर उन्नै पिता, पुत्र अर पवित्र आत्मा कै नाम तै बपतिस्मा द्यो,<sup>20</sup> अर उन्नै सारी बात जो मन्त्रै थारै ताहि दी सै, माणना सिखावो: अर देक्खो मै जगत कै अंत तक सदा थारै गेल रहूँगा।"

# मरकुस

**युहन्ना बपतिस्मा देण आळे का प्रचार**  
(मत्ती 3:1-12; लूका 3:1-18; युहन्ना 1:19-28)

1 पणमेशर कै बेटे यीशु मसीह के सुसमाचार की सरुआत । 2 जिसा यशायाह नब्बी की किताब म्ह लिख्या सै "लखा, मैं आपणें दूत नै तेरें आगै खन्दाऊँ सूँ, जो तेरें खातर राह सई करैगा। 3 बण म्ह एक रुक्का मारणीये का बोल सुणाई देवै सै के प्रभु की राही बणाओ अर उसकी सड़क सीधी करो। 4 युहन्ना आया, जो बण म्ह बपतिस्मा देवै सै अर पापां की माफी खातर मन बोहड़ण का बपतिस्मा का प्रचार करै था। 5 सारे यहूदिया परदेश के, अर यरूशलेम के सारे बासिन्दे लिकड़के उसके धोरें गए, अर आपणें पापां न मानकें यरदन नदी म्ह उसतैं बपतिस्मा लिया।

6 युहन्ना ऊँट के रूंग के लत्ते पहरे अर आपणी कड़ म्ह चमड़ै का बैल्ट बांधे रहै था अर टिड्डियाँ अर बण-शैद खाया करै था, 7 अर न्यू प्रचार करै था, "मेरे पाच्छै ओ आणआला सै, जो मेरें तै घणा ठाड्डा सै; मैं इस जोगा कोनी के कोड्डा होकें उसके जुत्या के फित्ते खोल्लूं। 8 मन्नै तो थारै ताहीं पाणी तै बपतिस्मा दिया सै पर ओ थमनै पवित्र आत्मा तै बपतिस्मा देवैगा।

**यीशु का बपतिस्मा अर परीक्षा**

(मत्ती 3:13-4:11; लूका 3:21, 22; 4:1-13)

9 उन दिनां म्ह यीशु नै गलील कै नासरत तै होकें, यरदन म्ह युहन्ना तै बपतिस्मा लिया। 10 अर जब ओ पाणी म्ह तै लिकड़ कै ऊप्परान नै आया, तो जिबे उसनै अकास ताहीं खुल्दे अर आत्मा ताहीं कबूतर कै तरियां आपणे ऊप्पर आंदे देख्या। 11 अर या आकाशबाणी होई, "तू मेरा प्यारा बेटा सै, तेरें तै मैं राज्जी सूँ।"

12 फेर आत्मा नै जिबे उसताहीं बण कान्नी खन्दाया। 13 बण म्ह चालीस दिन ताहीं शैतान नै उसका हिम्तान लिया; अर ओ बण म्ह पशुआं कै गेल्या रह्या, अर सुर्गदुत उसकी सेवा करदे रहे।

**यीशु के सेवा के काम की सरुआत**

(मत्ती 4:12-17; लूका 4:14, 15)

14 युहन्ना कै पकड़वाए पाच्छै यीशु नै गलील म्ह आकें पणमेशर कै राज्य का सुसमाचार प्रचार करया, 15 अर कह्या, "बख्त पूरा होया सै, अर पणमेशर का राज्य धोरें आरया सै; मन फिराओ अर सुसमाचार पै बिश्वास करो।"

**मछुआरां का बुलाया जाणा**

(मत्ती 4:18-22; लूका 5:1-11)

16 गलील की झील कै कंठारै-कंठारै जांदे होइ, उसनै शमौन अर उसके भाई अन्द्रियास ताहीं झील म्ह जाळ गेरदे देख्या; क्यूँके वे मछुआरे थे। 17 यीशु नै उनतैं कह्या, "मेरें पाच्छै आओ, मैं थमनै माणसां ताहीं पकड़ण आळे मछुआरे बणाऊँगा।" 18 वे जिबे जाळां नै छोड़ कै उसके पाच्छै हो लिये। 19 कीमे आगै सरकदए, उसनै जब्दी का बेटे याकूब अर उसके भाई युहन्ना ताहीं, किस्ती पै जाळां ताहीं सई करदे देख्या। 20 उसनै जिबे उनताहीं बुलाया; अर वे आपणे पिता जब्दी ताहीं मजदूरी कै गेल्या किस्ती पै छोड़ कै, उसके पाच्छै हो लिये।

**एक माणस ताहीं चंगा करणा जिसम्ह भुंडी औपरी आत्मा थी**  
(लूका 4:31-37)

21 जिब वे कफरनहुम म्ह आए, अर ओ जिबे सब्त कै दिन आराधनालय म्ह जाकें उपदेश देण लाग्या। 22 अर माणसां नै उसके उपदेशां तै अचम्भा होया; क्यूँके ओ उन्नै शास्त्रियां की ढाळ नीं, पर अधिकारियां की तरियां उपदेश देवै था। 23 उससे टेम, उनकें आराधनालय म्ह एक माणस था, जिसम्ह औपरी आत्मा थी। 24 उसनै किलकी मारकें कह्या, "हे यीशु नासरी, हमनै तेरें तै के काम? के तू म्हारा नास करण नै आया सै? मैं तन्नै जाणु सूँ, तू कौण सै? पणमेशर का पवित्र माणस!" 25 यीशु नै उसताहीं धमका कै कह्या, "बोल-बाली रह; अर उसम्ह तै लिकड़ जा।" 26 फेर औपरी आत्मा उसताहीं मरोड़कें, ठाडू बोलकें किलकी मारकें उसम्ह तै लिकड़गी। 27 इस पै सारे माणस अचम्भा करदे होए आपस म्ह बहस करण लागे, "या के बात सै? यो तो कोए नया-ए उपदेश सै! ओ हक्क कै गेल्या औपरी आत्मायाँ नै भी हुक्म देवै सै, अर वे उसका हुक्म मान्नै सैं।" 28 अर उसका नाम जिबे गलील कै ओरै-धोरें कै सारै प्रदेश म्ह हरेक जगहां फैलग्या।

**घणखरे बिमारां ताहीं चंगा करणा**

(मत्ती 8:14-17; लूका 4:38-41)

29 ओ जिबे आराधनालय म्ह तै लिकड़ कै, याकूब अर युहन्ना कै गेल्या शमौन अर अन्द्रियास कै घरा आया। 30 शमौन की सासू ताप चदरया था, अर उन्नै जिबे उसके बाबत उसतैं कह्या। 31 फेर उसनै धोरें जाकें उसका हाथ पकड़ कै उसताहीं ठाया; अर उसका बुखार(ताप) उतरग्या, अर वा उनकी सेवा-बाड़ी करण लागी। 32 साँझ कै बख्त जिब सूरज डूबग्या तो माणस सारे बीमारां ताहीं अर उन्नै, जीनम्ह औपरी आत्मा थीं, उसके धोरें ल्याए। 33 अर साब्ला नगर दरवाजै पै कड्डा होया। 34 उसनै घणखरयां ताहीं जो कई ढाळ की बीमारियाँ तै काल थे, चंगा करया, घणखरी औपरी आत्मायाँ ताहीं काड्या, अर औपरी आत्मायाँ ताहीं बोलण कोनी दिया, क्यूँके वे उसनै पिच्छाणै थीं।

**एकै म्ह यीशु का प्रार्थना करणा**

(लूका 4:42-44)

35 तड़क-ए दिन लिकड़ण तै घणी पहल्ये, ओ उठकें लिकड़या, अर एक जंगळी जंगहा म्ह गया अर उडै प्रार्थना करण लागग्या। 36 फेर शमौन अर उसके ढब्बी उसकी टोह म्ह गए। 37 जिब ओ फेट्या, तो उसताहीं कह्या, "सारे माणस तन्नै टोहवै सैं।" 38 उसनै उनताहीं कह्या, "आओ; हम और किते ओरै-धोरें के बगडां म्ह जावां, के मैं उडै भी प्रचार करूँ, क्यूँके मैं इसे करकें लिकड़या सूँ।" 39 आखर ओ सारे गलील म्ह उनके आराधनालयां म्ह जा-जाकें प्रचार करदा अर औपरी आत्मायाँ ताहीं लिकड़दा रह्या।

**कोढ़ के रोगी ताहीं चंगा करणा**

(मत्ती 8:1-4; लूका 5:12-16)

40 एक कोढ़ी उसके धोरें आया, उसतैं बिनती करी, अर उसके आगै गोड़े टेककें उसताहीं कह्या, "जै तू चाहवै तो मन्नै शुद्ध कर सकें सैं।" 41 उसनै उस पै तरस खाकें हाथ बढाया, अर उसताहीं छुके कह्या, "मैं चाहूँ सूँ तू शुद्ध हो ज्या।" 42 अर जिबे उसका कोढ़ जान्दा रह्या, अर ओ शुद्ध होग्या। 43 फेर उसनै उसताहीं सोदी म्ह ल्याकें जिबे बिदा करया, 44 अर उसतैं कह्या,

“लखा, किसे तै कीमे मतना कहीए, पर जाकै खुद नै याजक ताहीं दिखा, अर आपणे शुद्ध होण के बाबत म्ह जो कीमे मूसा नै ठहराया सै उसताहीं भेंट चढ़ा ताके उन पै गवाही हो” 45 पर ओ बाहरण जाकै इस बात का घणा प्रचार करने अर याडै ताहीं फैलाण लागग्या के यीशु दूबारै सरैआम नगर म्ह कोनी जा सक्या, पर बाहरण जंगली स्थानां म्ह रह्या; अर चोगरदे तै माणस उसकै धोरै आंदे रहे।

### लकवे के रोगी ताहीं चंगा करना

(मत्ती 9:1-8; लूका 5:17-26)

2 घणे दिनां पाच्छै यीशु फेर कफरनहूम म्ह आया, और सुणया गया के ओ घर म्ह सै। 2 फेर इतने माणस कट्टे होए के दरवाजै धोरै भी जंगहा कोनी थी; अर ओ उन्नै बचन सुनाण लागरया था। 3 अर माणस एक लकवै के मरीज नै जो झोळे के मारया होइ था, चार माणसां पै लादकै उसकै धोरै ल्याए। 4 पर जिब वे भीड़ के कारण उसकै धोरै कोनी पहाच सकै, तो उन्नै उस छात ताहीं जिसकै तळै ओ था, खोल दिया; अर जिब वा उन्नै उधेड़ दी, तो उस खात ताहीं जिस पै ओ लकवै का मरीज पड़या था, लटका दिया। 5 यीशु नै उनका बिश्वास देखकै उस लकवे के रोगी ताहीं कह्या, “हे बेट्टे, तेरे पाप माफ होये।” 6 फेर घणे शास्त्री जो उडै बैठे थे, आपणै-आपणै मन म्ह सोचण लागे, 7 “यो माणस न्यु क्यांतै कहवै सै? यो तो पणमेशर की बुराई करै सै! पणमेशर नै छोड़ कै और कौण पाप माफ कर सकै सै?” 8 यीशु नै जिब्बे आपणी आत्मा म्ह जाण लिया के वे आपणै-आपणै मन म्ह इसा बिचार क्यांतै कररे सै? अर उनतै कह्या, “थम आपणै-आपणै मन म्ह यो बिचार क्यांतै करण लागरे सो?” 9 सेल्ला के सै? के लकवे के मरीज ताहीं यो कहणा के तेरे पाप माफ होए, या फेर यो कहणा के उठ आपणी खात ठाकै चाल-फिर? 10 पर जिस तै थम जाण ल्यो के माणस के बेट्टे ताहीं धरती पै पाप माफ करण का हक्क सै।” उसनै उस लकवै के मरीज ताहीं कह्या, 11 “मै तेरै तै कहूँ सूँ, उठ, अपणी खात ठाकै आपणे घरा चल्या जा।” 12 वो उठ्या अर जिब्बे खात ठाकै उसकै श्यामी तै लिङ्ग्या; इस पै सारे हैरान होगे, अर पणमेशर की बड़ाई करके कहण लागे, “हमनै इसा पटल्या कट्टे कोनी देख्या।

### लेवी का बुलाया जाणा

(मत्ती 9:9-13; लूका 5:27-32)

13 ओ दुबारा लिङ्गकै झील के कंठारै गया, अर सारी भीड़ उसकै धोरै आई, अर ओ उन्नै उपदेश देण लाग्या। 14 जान्दे होए उस नै हलफई के बेट्टे लेवी ताहीं चुंगी की चोक्की पै बेट्टे देख्या, अर उसतै कह्या, “मेरै पाच्छै हो लो” अर ओ उठके उसकै पाच्छै हो लिया।

15 जिब ओ उसकै घर म्ह खाणा खाण बैठया, तो भतरे चुंगी लेण आळे अर पाप्पी, यीशु अर उसकै चेल्यां गेल्या खाणा खाण बैठे; क्युंके वे घणे सारे थे, अर उसकै पाच्छै हो लिए थे। 16 शास्त्रिया अर फरिसिया नै न्यु देखकै के ओ तो पापियाँ अर चुंगी लेणआळा गेल्या खाणा खावै सै, उसके चेल्यां ताहीं कह्या, “ओ तो चुंगी लेणआळे अर पापियां गेल्या खावै-पीवै सै।” 17 यीशु नै न्यु सुणकै कह्या, “भले चंग्यां नै वैद्ध की जरूरत कोनी, पर बीमारां नै सै: मै धर्मियां नै नीं, पर पापियाँ नै बुलाण आया सूँ।”

### उपवास का प्रश्न

(मत्ती 9:14-17; लूका 5:33-39)

18 युहन्ना के चेल्ले, अर फरीसी ब्रत करया करै थे, तो उन्नै आकै उसतै कह्या, “युहन्ना के चेल्ले अर फरिसियाँ के चेल्ले ब्रत क्यांतै करै सै, पर तेरे चेल्ले ब्रत कोनी राखदे?” 19 यीशु नै उनताहीं कह्या, “जिब ताहीं बनड़ा बरातियां के गेल्या सै, के वे ब्रत राख सकै सै? आखर जिब ताहीं बनड़ा उनकै गेल्या सै, जद ताहीं वे ब्रत कोनी कर सकदे। 20 पर वे दिन भी आवैगें जिब बनड़ा उनतै न्यारा करया जावैगा; उस बखत वे ब्रत करैगें।

21 “कोरै कपडै की टाक्की पुराणै लत्या पै कोए कोनी लांदा; नीं तो वा टाक्की उसम्ह तै कीमे खीच लेवैगी, यानिके नया, पुराणै तै, अर वो पहल्या तै घणा

पाट जावैगा। 22 नये दाखरस ताहीं पुराणै मशकां म्ह कोए कोनी राखदा, नीं तो दाखरस मशकां नै पाड़ देवैगा, अर दाखरस अर मशक दोनुआ का नास हो जावैगा; पर नया दाखरस नई मशकां म्ह भरया जावै सै।”

### सब्त का प्रभु

(मत्ती 12:1-8; लूका 6:1-5)

23 न्यु होया के ओ सब्त के दिन खेत्तां म्ह तै होकै जाण लागरया था, अर उसके चेल्ले चालदे होए बालं तोड़ण लागे। 24 तो फरीसियां ने उसताहीं कह्या, “लखा, ये सब्त के दिन ओ काम क्यांतै करै सै जो सई कोनी?”

25 उसनै उनताहीं कह्या, “के थमनै न्यु कदे नीं पड़या के जिब दाऊद नै जरूरत होई, अर जिब ओ अर उसके ढब्बी भूखे होए, फेर उसनै के करया था? 26 उसनै किस ढाळ अबियातार महायाजक के बखत, पणमेशर के घर म्ह जाकै भेंट की रोटियाँ खाई, जिनका खाणा याजकां नै छोड़ और किसे भी खातर सई कोनी, अर आपणे ढब्बीयां तै भी दीं?” 27 फेर उसनै उनताहीं कह्या, “सब्त का दिन माणस खातर बनाया गया सै, ना के माणस सब्त के दिन के खातर। 28 इस करके माणस का बेट्टा सब्त के दिन का भी मालिक सै।”

### सुखे हाथ आळे माणस ताहीं चंगा करना

(मत्ती 12:9-14; लूका 6:6-11)

3 अर वो फेर आराधनालय म्ह गया; उडै एक माणस था जिसका हाथ सुख रया था, 2 अर वे उसपै दोष के खातर उसकी टाह म्ह थे के देखे, ओ सब्त के दिन उसनै चंगा करे सै के नीं। 3 उसनै सुखे हाथ आळे माणस तै कह्या, “बिचाले खड़या हो” 4 अर उनताहीं कह्या, “के सब्त के दिन भला करना ठीक सै या भुंडा करना, ज्यान नै बचाणा या मारणा?” पर वे बोल-बाल्ले रहे। 5 उसनै उनके मन की करडाई तै काल होकै, उनताहीं खुन्दक तै चोगरदे नै देख्या, अर उस माणस ताहीं कह्या, “आपणा हाथ बढ़ा।” उसनै बढ़ाया, अर उसका हाथ चंगा हो गया। 6 फेर फरीसी बाहरण जाकै जिब्बे हेरोदियां के गेल्या उसकै बिरोध म्ह सलाह करण लागे के उसका किस ढाळ नास करै।

### भीड़ का यीशु के पाच्छै हो लेणा

7 यीशु आपणे चेल्यां गेल्या झील के कात्री चल्या गया : अर गलील तै एक बड्डी भीड़ उसकै पाच्छै हो ली; 8 अर यहूदिया, अर यरुशलैम, अर इदुमिया, अर यरदन परली ओड़, अर सूर अर सैदा के ओरै-धोरै तै एक बड्डी भीड़ न्यु सुणकै के ओ किसे अचम्भे आळे काम करै सै, उसकै धोरै आई। 9 यीशु नै आपणे चेल्यां तै कह्या, “भीड़ की वजह तै एक छोटी किस्ती मेरै खातर त्यार रहवै ताके वे मन्नै दाब नीं सकै।” 10 क्युंके उसनै घण-खरया ताहीं चंगा करया था, इस करके जितने माणस बीमार थे, उसताहीं छुण खातर उस पै पड़ण लाग रे थे। 11 भूंडी औपरी आत्माए भी, जिब उसताहीं देखै थी, तो उसकै श्यामी गिर ज्या थी, अर किलकी मार कै कहवै थी, तू पणमेशर का बेट्टा सै। 12 अर उसनै उनताहीं घणा जोर देकै कहया के मेरै बारै म्ह किसे तै ना कहियो।

### बारहां प्रेरितां की नियुक्ति

(मत्ती 10:1-4; लूका 6:12-16)

13 फेर ओ पहाड़ पै चढ़या, अर जिन्नै ओ चाहवै था उनताहीं आपणे धोरै बुलाया; अर वे उसकै धोरै आए। 14 फेर उसनै बारहा माणसां ताहीं पक्का करया के वे उसकै गेल्या-गेल्या रहवै, अर ओ उन्नै खन्दावै के वे प्रचार करै, 15 अर भूंडी औपरीआत्मा ताहीं काडुण का हक्क राखै। 16 वे ये सै : शमौन जिसका नाम उसनै पतरस धरया, 17 अर जब्दी का बेट्टा याकूब अर याकूब का भाई युहन्ना, जिसका नाम उसने बूनरगिस यानिके ‘गर्जन का बेट्टा’ धरया। 18 अर अन्द्रीयास, अर फिलिप्पुस, अर बरतुलमै, अर मती, अर थोमा, अर हल्फई का बेट्टा याकूब, अर तदै, अर शमौन कनानी, 19 अर यहूदा इस्करियोती जिसनै उसताहीं पकड़वा भी दिया था।

## यीशु अर बालजबूल

(मत्ती 12:22-32; लूका 11:14-23; 12:10)

20 फेर ओ घरा आया; अर इसी भीड़ कड़ी होई, के उनपै रोटी भी कोनी खाई गई। 21 जिबब उसनै न्यू सुणया, तो वे उसताहीं पकड़ण खातर लिकड़े; क्यूँके वे कहवै थे के उसका दिमाग ठिकाणै कोनी सै।

22 शास्त्री भी जो यरूशलेम तै आये थे, वे कहवै थे, “उसमह शैतान सै, ” अर न्यू भी के “ओ औपरी आत्मायां के सरदार की मदद तै भूंडी औपरी आत्मायां नै काड्डे सै।” 23 ज्यातै ओ उन्नै धोरै बुलाके उदाहरणां म्ह कहण लाग्या, “शैतान क्यूँकर शैतान नै काड सकै सै।” 24 जै किसे राज्य म्ह फूट पड़े, तो ओ राज्य किसतरियां टिकया रह सकै सै? 25 अर जै किसे घर म्ह फूट पड़े, तो ओ घर क्यूँकर डटया रह सकैगा? 26 इसकरके जै शैतान खुद का ए बिरोधी होके आपणे म्ह फूट गेरै, तो ओ किस तरियां बणया रहै सकै सै? उसका तो नास हो जावै सै।

27 “पर कोए माणस किसे ठाड्डे के घर म्ह बड़ के उसका माळ कोनी लूट सकदा, जिब तारीं के ओ पहलै उस ठाड्डे नै जुड़ नीं ले; अर फेर उसके घर नै लूट लेगा। 28 “मे थमनै साच्ची-साच कहुँ सूँ के माणसां की ऊलाद के सारे पाप अर भुण्ड जो वे करै सै, माफ करी जावैगी, 29 पर जो कोए पवित्र आत्मा के बिरुद्ध म्ह भुण्ड करै, ओ कदे माफ कोनी करया जावैगा : बल्के ओ अनन्त पाप का कसूरवार बण ज्यागा।” 30 क्यूँके वे न्यू कहवै थे के उस म्ह भूंडी औपरी आत्मा सै।

## यीशु की माँ अर भाई

(मत्ती 12:46-50; लूका 8:19-21)

31 फेर उसकी माँ अर उसके भाई आए, अर बाहरण खड़े होके उसताहीं बुलावा भेज्या। 32 भीड़ उसके ओरै-धोरै बैठी थी, अर उन्नै उसतै कहा, “लखा, तेरी माँ अर तेरे भाई बाहरण तन्नै टोहवै सै।” 33 उसनै उनतै जबाब दिया, “मेरी माँ अर भाई कौण सै?” 34 अर उन पै जो उसके ओरै-धोरै बैठे थे, निगाह करके कहा, “लखाओ, मेरी माँ अर मेरे भाई ये सै।” 35 क्यूँके जो कोए पणमेश की मर्जी पै चाल्लै, ओए मेरा भाई, मेरी बेब्बे, अर मेरी माँ सै।”

## बीज बोण आळे का उदाहरण

(मत्ती 13:1-9; लूका 8:4-8)

4 ओ फेर झील के कंटारै उपदेश देण लाग्या : अर इसी बड्डी भीड़ उसके धोरै कड़ी होगी के ओ झील म्ह एक किस्ती पै चढ़के बैठग्या, अर सारी भीड़ धरती पै झील के कंटारै खड़ी रही। 2 अर ओ उन्नै उदाहरणां म्ह घणी ए बात सिखाण लाग्या, अर आपणे उपदेश म्ह उन तारीं कहा, 3 “सुणो! एक बोणआळा बीज बोण लिकड़या। 4 बोंदे टेम कीमे राही के कंटारै पड़या अर पन्छियाँ नै आके उसताहीं चुग लिया। 5 कीमे पथरीली धरती पै पड़या जड़ै उसनै घणी माट्टी ना मिली, अर दुंगी माट्टी ना मिलण के कारण तोळाए जामग्या, 6 अर जिबब सूरज लिकड़या तो जळग्या, अर जड़ ना पकड़ण के कारण सुख गया। 7 कीमे झाड़ियाँ म्ह पड़या, अर झाड़ियाँ नै आगे सरक के उसताहीं दाब दिया, अर ओ फळ कोनी ल्याया।” 8 पर कीमे काम्मल धरती पै पड़या, अर ओ जाम्या अर बढ़के फळ ल्याया; अर कोए तीस गुणा, कोए साठ गुणा अर कोए सौ गुणा फळ ल्याया।” 9 फेर उसनै कहा, “जिसके धोरै सुणन नै कान हों, ओ सुण ले।”

## उदाहरणां का उद्देश्य

(मत्ती 13:10-17; लूका 8:9-10)

10 जिबब ओ एकला रहग्या, तो उसके ढब्बीयां नै उन बारहां सुदा उसतै इन उदाहरणां के बारै म्ह बुझया। 11 उसनै उनतै कहा, “थारै तारीं तो पणमेश के राज्य के भेद की समझ दे राखी सै, पर बाहरल्यां खातर सारी बात उदाहरणां म्ह होवै सै। 12 इसकरके के “वे देखदे होए देखै अर उन्नै सुझाई कोनी देवै अर सुणदे होए सुणै भी अर कोनी समझै; इसा ना हो के वे मुडै, अर माफ करे जावै।”

## बीज बोण आळे का उदाहरण की व्याख्या

(मत्ती 13:18-23; लूका 8:11-15)

13 फेर उसनै उनतै कहा, “के थम यो उदाहरण कोनी समझे? तो फेर और सारे उदाहरणां नै किसतरियां समझोगे? 14 बोणआळा बचन बोवै सै। 15 जो राही के कंटारै के सै जित बचन बोया जावै सै, ये वे सै के जिबब उन्नै सुणया, तो शैतान जिबबे आके बचन नै जो उनमह बोया गया था, ठा ले जावै सै। 16 उससे तरियां-ए जो पथरीली धरती पै बोये जावै सै, ये वे सै जो बचन सुणके जिबबे राजी होके अपना लेवै सै। 17 पर उनके भीतर जड़ नीं पकड़नै के कारण माडे से दिनां के खातर रहै सै; इसके बाद जिबब बचन के कारण उन पै कळेश या बिपदा आवै सै, तो वै जिबबे ठोकर खावै सै। 18 जो झाड़ियाँ म्ह बोये गए ये वे सै जिन्नै बचन सुणया, 19 अर दुनिया की सोच-फिक्र, अर धन-माया का धोक्खा, अर दूसरी चीजां का लालच म्ह पड़के बचन नै दाब देवै सै अर ओ फळदा कोनी। 20 अर जो काम्मल धरती पै बोये गए, ये वे सै जो बचन सुणके अपना लेवै सै अर फळ ल्यावै सै, कोई तीस गुणा, कोई साठ गुणा अर कोई सौ गुणा।”

## दीवै का उदाहरण

(लूका 8:16-18)

21 उसनै उनतै कहा, “के दीवै नै इसकरके लावां सां के माप या खाट के तळै धरया जावै?” के इसकरके नीं के दीवट पै धरया जावै? 22 क्यूँके कोई चीज लुक्की कोनी, पर ज्यातै सै के दीख जावै; अर ना कीमे लुक्या सै, पर ज्यातै सै के दीख जावै। 23 जै किसे के सुणन नै कान हों, तो सुण ले।” 24 फेर उसनै उनतै कहा, “चौकस रहियो कि के सुणो सो। जिस नाप तै थम नाप्यो सो उससे तै थारै खातर भी नापया जावैगा, अर थारै तारीं घणा दिया जावैगा। 25 क्यूँके जिसके धोरै सै, उसताहीं दिया जावैगा, अर जिसके धोरै कोनी सै, उसतै ओ भी जो उसके धोरै सै, ले लिया जावैगा।”

## उण आळे बीज का उदाहरण

26 फेर उसनै कहा, “पणमेश का राज्य इसा सै, जिसा कोई माणस धरती पै बीज खिंडावै, 27 अर रात नै सोवै अर दिन नै जागै, अर ओ बीज इसा उगै अर बढ़के ओ कोनी जाणै। 28 धरती खुद-बै-खुदे फळ लावै सै, पहल्या अंकुर, फेर बाळ, अर फेर बाळां म्ह त्यार दाणा। 29 पर जिबब दाणा पक जावै सै, फेर ओ जिबबे दांती लावै सै, क्यूँके लामणी आण पहोची सै।”

## राई के दाणै का उदाहरण

(मत्ती 13:31-32, 34; लूका 13:18-19)

30 फेर उसनै कहा, “हम पणमेश का राज्य की बराबरी किस तै करया अर किस उदाहरण तै उसका खुलासा करया? 31 ओ राई के दाणे के ढाळ सै : जिबब धरती म्ह बोया जावै सै तो धरती के सारे बीजां तै छोडा होवै सै, 32 पर जिबब बोया गया, तो जामके सारै सागपात तै बड्डा हो जावै सै, अर उसकी इतनी बड्डी डाळी लिकड़ै सै के अकास के पंछी उसकी छाह तळै बसेरा कर सकै सै।” 33 ओ उन्नै इस तरियां के घणे उदाहरण दे देके उसकी समझ के मुताबिक बचन सुनावै था, 34 अर बिना उदाहरण कहे ओ उनतै कीमे भी कोनी कहै था; पर एक्के म्ह ओ आपणे चेल्यां तारीं सारी बात्तां का मतलब बतावै था।

## आँधी तारीं शान्त करणा

(मत्ती 8:23-27; लूका 8:22-25)

35 उससे दिन जिबब साँझ होई, तो उसनै चेल्यां तै कहा, “आओ, हम परली ओड चाल्लां।” 36 अर वे भीड़ नै छोड़के जिसा ओ था, उसाए उसताहीं किस्ती पै गेल्या ले चाल्ले; अर उसके गेल्या और भी किस्ती थी। 37 फेर बड्डीए आंधी आई, अर झाळ किस्ती के उरै तारीं लागी के वा पाणी तै भरण नै होगी। 38 पर ओ खुद पाच्छलै हिस्से म्ह गद्दी पै सोण लागरया था। फेर उन्नै उसताहीं जगाके उसतै कहा, “हे गुरु, के तन्नै सोच कोनी के हम नास

होग आले सां?" 39 फेर उसनै उठ कै आँधी ताहीं धमकाया, अर पाणी तै कह्या, "शांत रहै, थम ज्या।" अर आँधी थमगी अर बड्डा चैन होग्या; 40 उसनै कह्या, "थम क्यातें डरो सो? के थमनै इबताहीं बिश्वास कोनी?" 41 वे घणे डरगे, अर आपस म्ह बोले, "यो कौण सै के आँधी अर पाणी भी उसका हुक्म मानै सैं?"

### एक माणस ताहीं चंगा करणा जिसम्ह भूडी औपरी आत्मा थी (मत्ती 8:28-34; लूका 8:26-39)

5 वे झील कै परली ओड़ गिरासेनिया के देश म्ह पहाचे, 2 जिब्ब ओ किस्ती पै तै उतरया तो जिब्बे एक माणस जिसम्ह भूडी औपरी आत्मा थी, कब्रों म्ह तै लिकड़ कै उसतै फेटया। 3 ओ कब्रों म्ह रह्या करे था अर कोए उसताहीं बेलां तै भी कोनी जुड़ सकै था, 4 क्युँके ओ घणी-ए बै बेडियां अर बेलां तै जुड़या गया था, पर उसनै बेलां ताहीं तोड़ दिया था अर बेडियां के टुकड़े-टुकड़े कर दिये थे, अर कोए उसताहीं बस म्ह कोनी कर सकै था। 5 ओ सारीहाण रात-दिन कब्रिस्तानां अर पहाड़ा म्ह किलकी मारदा अर खुद नै पत्थरां तै जखमी करै था।

6 ओ यीशु नै दूर तै ए देखकै भाज्या, उसताहीं प्रणाम करया, 7 अर ठाडु बोल तै किलकी मारकै कह्या, "हे यीशु, परमप्रधान पणमेशर के बेटे, तन्नै मरै तै के काम? मै तन्नै पणमेशर की सुंह छुँ सुँ के मन्नै काल ना करै।" 8 क्युँके उसनै उसताहीं कह्या था, "हे भूडी औपरी आत्मा, इस माणस म्ह तै लिकड़ आ!" 9 उसनै उसताहीं बुझया, "तेरा के नाम सै?" उसनै उसताहीं कह्या, "मेरा नाम फौज सै; क्युँके हम घणे सां।" 10 अर उसनै उसतै घणी बिनती करी, "हमनै इस देश तै बाहरण ना खन्दावै।"

11 उडै पहाड़ पै सुअरां का एक बड्डा टोल चरै था। 12 उन्नै उसताहीं बिनती करकै कह्या, "हमनै उन सुअरां म्ह खन्दा दे के हम उनकै भीत्तर जावां।" 13 आखर म्ह उसनै उनताहीं हुक्म दिया अर भूडी औपरी आत्मा लिकड़ कै सुअरां कै भीत्तर पैठ गई अर टोल, जो कोई दो हजार का था, कड़ाड़े पै तै झपटकै झील म्ह जा पड़या अर डूब मरया।

14 उनके पाळियां नै भाजकै कस्बे अर गाम्माँ म्ह खबर सुणाई, अर जो होया था, माणस उसताहीं देखखण आए। 15 यीशु कै धोरै आकै वे उसताहीं जिसम्ह भूडी औपरी आत्मा थीं, यानिके जिसम्ह फौज बड़री थी, लत्ते पहेरे अर सोद्री म्ह बैठे देखकै डरगे। 16 देखणआळ्यां नै उसका, जिसम्ह भूडी औपरी आत्मा थीं, अर सुअरां का पूरा किस्सा उनताहीं कह सुणाया। 17 फेर वे उसतै बिनती करकै कहण लागे के म्हारी सीम तै लिकड़ ज्या।

18 18 जिब्ब ओ किस्ती पै चढ़ण लाग्या, तो ओ जिस म्ह पहल्या भूडी औपरी आत्मां थीं, उसतै बिनती करण लाग्या, के मन्नै आपणी गेल रहण दे। 19 19 पर यीशु नै उस ताहीं इजाजत कोनी देई, अर उसतै बोल्या, "अपणे घरा जाकै अपणे माणसां नै बता, के तेरै पै दया करकै प्रभु नै तेरै खातर किस ढाळ बड्डे काम करे सैं।" 20 ओ जाकै दिकापुलिस म्ह इस बात का प्रचार करण लाग्या, के यीशु नै मेरै खातर किस ढाळ बड्डे काम करे; अर सारे अचम्भा करै थे।

### याईर की मरी होड़ बेट्टी अर एक रोगी लुगाई (मत्ती 9:18-26; लूका 8:40-56)

21 जिब्ब यीशु दुबारा किस्ती तै परली ओड़ गया, तो एक बड्डी भीड़ उसकै धोरै कट्टी हो गी; अर ओ झील कै कंठारै था। 22 याईर नामका आराधनालया के सरदारों म्ह तै एक आया, अर उसनै देखकै उसकै पायां के म्ह पड़्या, 23 अर न्यू कहकै उसताहीं बिनती करी, "मेरी छोटी छोरी मरण नै होरी सै: तू आकै उस पै हाथ धर, के वा चंगी होकै जिन्दी रहवै।" 24 24 फेर ओ उसकै गेल्या चाल्या; अर बड्डी भीड़ उसकै पाच्छै हो ली, याडै ताहीं के माणस उसपै पड़ण लागरे थे।

25 एक लुगाई थी, जिसकै बारहा साल तै लहू बहण की बीमारी थी, 26 उसनै घणे डाक्टरां तै बड्डी कालीं ठाई, अर आपणा सारा रपिया खर्चा करकै भी कीमे फेयदा कोनी होया था, पर और भी बीमारी बढ गी थी। 27 वा यीशु का जिक्का सुण कै भीड़ म्ह उसकै पाच्छै तै आई अर उसकै लत्या ताहीं छू लिया, 28 क्युँके वा कहवै थी, "जै मै उसकै लत्ते नै छू ल्युगी, तो चंगी हो

जाऊँगी।" 29 अर जिब्बे उसका लहू बहणा बन्द हो गया, अर उसनै आपणे गात तै बेरा लाग्या के मै उस बीमारी तै चंगी होगी सूं। 30 यीशु नै जिब्बे खुद तै बेरा पाटया के मेरे म्ह तै सामर्थ लिकड़ी सै, अर भीड़ कै पाच्छै फिरकै बुझया, "मेरे लत्ते किसनै छुए?" 31 उसके चेल्यां नै उसताहीं कह्या, "तू देखै सै के भीड़ तेरपै गिरण-पड़ण लागरी सै, अर तू कहवै सै के किसनै मेरताहीं छुया?" 32 फेर उसनै उसताहीं देखण खातर जिसनै यो काम करया था, चोगरदेण निगांह घुमाई। 33 फेर वा लुगाई न्यू जाणकै के मेरी किसी भलाई होई सै, डरगी अर काम्बदी होई आई, अर उसकै पायां म्ह पड़कै उसताहीं सारा हाल साची-साच कह दिया। 34 उसनै उसतै कह्या, "बेटी, तेरै बिश्वास नै तेरैताहीं चंगा करया सै: राज्जी-राज्जी जा, अर आपणी इस बीमारी तै बची रहा।

35 ओ न्यू कह ए रह्या था के आराधनालयां कै सरदार कै घर तै माणसां नै आकर कह्या, "तेरी छोरी तो मर ली, इब गुरु नै क्यातें काल करै सै?" 36 जो बात वे कहरे थे, उसताहीं यीशु नै बेगौरी करकै, आराधनालय के सरदार तै कह्या, "डरै मतना; सिर्फ बिश्वास राखा।" 37 अर उसनै पतरस अर याकूब अर याकूब कै भाई युहन्ना नै छोड़, दुसरै किसे ताहीं आपणे गेल्या आण ना दिया। 38 आराधनालय के सरदार कै घर म्ह पहाचकै, उसनै माणसां ताहीं घणे रोंदे अर किलकी मारदे देख्या। 39 फेर उसनै भीत्तर जाकै उनतै कह्या, "थम क्यातें रोळा मचाओ अर रोवो सो, छोरी मरी कोनी, पर सोवै सै।" 40 वे उसका मखौल करण लागे, पर उसनै सारया ताहीं लिकाड़ कै छोरी कै माँ-पिता अर आपणे ढबियां कै गेल्या भीत्तर, जित छोरी पड़ी थी, गया। 41 अर छोरी का हाथ पकड़कै उसतै कह्या, "तलिता कूमी, जिसका मतलब सै, "हे छोरी, मै तेरै तै कहुँ सूं, उठ।" 42 अर छोरी जिब्बे उठकै चाल्लण-फिरण लाग गी; क्युँके वा बारहा साल की थी। अर इस पै माणस घणे हैरान हो गे। 43 फेर उसनै उनताहीं हिम्मत बंधा कै हुक्म दिया के इस बात का किस्से नै भी बेरा ना पाटण दियो अर कह्या, "इसनै कीमे खाण नै द्यो।"

### नासरत म्ह यीशु का अनादर (मत्ती 13:53-58; लूका 4:16-30)

6 1 उडै तै लिकड़ कै ओ आपणे देश म्ह आया, अर उसके चेल्ले भी उसकै पाच्छै गए। 2 सब्त कै दिन ओ आराधनालय म्ह उपदेश देण लाग्या, अर घणखरे माणसां नै सुण कै अचम्भा करया अर कहण लागे, "इसनै इतनी बात कित तै आ गी?" यो कौण-सा ज्ञान सै जो उसताहीं दिया होया सै? किस ढाळ के सामर्थ के काम उसकै हाथां तै दिक्खै सैं? 3 के यो ओए खात्ती कोनी, जो मरियम का छोरा, अर याकूब, योसेस, यहूदा, अर शमौन का भाई सै? के उसकी बाण याडै म्हारै बिचाळै कोनी रहन्दी? इसकरकै उन्नै उसकै कारण ठोकर खाई। 4 यीशु नै उनताहीं कह्या, "नब्बी का आपणे देश, अर आपणे कुन्बे, अर आपणे घर नै छोड़ और किते भी निरादर कोनी होन्दा।" 5 ओ उडै कोए सामर्थ का काम नीं कर सक्या, सिर्फ माडे-से बीमारां पै हाथ धरकै उनताहीं चंगा करया।

6 अर उसनै उनकै अबिश्वास पै हैरानी होई के अर चौगरदे के गाम्माँ म्ह उपदेश करदा हांडया।

### बारहां प्रेरितां का खन्दाया जाणा (मत्ती 10:5-15; लूका 9:1-6)

7 उसनै बारहा ताहीं आपणे धोरै बुलाया अर उन्नै दो-दो करकै खन्दाण लाग्या; अर उन्नै भूडी औपरी आत्मां पै हक्क दिया। 8 उसनै उनताहीं हुक्म दिया, "रास्तै खातर लाठी छोड़ और कीमे ना लीयो; ना तो रोट्टी, ना झोळी, ना बटुए म्ह पिस्से, 9 पर जुत्तीं पहरों अर दो-दो कुरते ना पहरों।" 10 अर उसनै उनताहीं कह्या, "जित किते थम किसे घर म्ह उतरो, तो जिब्ब ताहीं उडै तै बिदा ना हो ल्यो जदताहीं उस्से घर म्ह ठहरे रहो।" 11 जिस जंगहा के माणस थमनै नीं अपणावै अर थारी नीं सुणे, उडै तै चाल्दे-ए आपणे ताल्यां की धूळ झाड़ दो के उन पै गवाही होवै।" 12 फेर उन्नै जाकै प्रचार करया के मन फिराओ, 13 अर घणी ए भूडी औपरी आत्मां ताहीं काड्या, अर घणे बीमारां पै तेल मळ कै उनताहीं चंगा करया।



### युहन्ना बपतिस्मा देणआळे की हत्या

(मत्ती 14:1-12; लूका 9:7-9)

14 हेरोदेस राजा नै भी उसका जिक्रा सुणया, क्यूँके उसका नाम फैल गया था, अर उसनै कह्या, “युहन्ना बपतिस्मा देणआळा मरया होया म्ह तै जिन्दा होया सै, इस्से करकै उसतै ये सामर्थ के काम दिक्खै सौं।” 15 दुसरे माणसां नै कह्या, “यो एलिय्याह सौं।” पर कीमे दुसरयां नै कह्या, “नब्बी या नब्बियाँ म्ह तै किस्से कै बरगा सौं।” 16 हेरोदेस नै न्यू सुण कै कह्या, “जिस युहन्ना का सिर मन्नै कटवाया था, ओए जिन्दा होया सौं।” 17 हेरोदेस नै आपणे भाई फिलिप्पुस की बीरबान्नी हेरोदियास के कारण, जिसतै उसनै ब्याह कर लिया था, माणसां ताहीं खन्दा के युहन्ना ताहीं पकड़वाके जेळ म्ह गेर दिया था; 18 क्यूँके युहन्ना नै हेरोदेस तै कह्या था, “आपणे भाई की बीरबान्नी ताहीं राखणा सई कोनी।” 19 इस करकै हेरोदियास उस तै बैर राख्या करै थी अर वा चाहवै थी के उसनै मरवा देवै; पर इसा ना हो सक्या, 20 क्यूँके हेरोदेस युहन्ना नै धर्मी अर पवित्र माणस जाण कै उसतै डरै था, अर उसका बचाव करै था, अर उसकी बात सुण कै घणा घबरावै था, पर उसकी बात्तां नै आनन्द तै सुणै था।

21 सई मौक्का आया जिब्ब हेरोदेस नै आपणे जन्म दिन म्ह आपणे प्रधानां अर सेनापतियां, अर गलील के बड्डे माणसां के खातर जीमणा करया। 22 तो हेरोदियास की छोरी भीत्तर आई, अर नाचके हेरोदेस ताहीं अर उसके गेल्या बैठण आळ्यां ताहीं राजी करया। फेर राजा नै छोरी तै कह्या, “तू जो चाहवै मेरै तै माँग मै तन्नै द्युगाँ।” 23 उसनै सुह खाई, “मै आपणा आधा राज्य ताहीं जो कीमे तू मेरै तै माँगगी मै तन्नै द्युगाँ।” 24 उसनै बाहरण जाके आपणी माँ तै बुझया, “मै के माँगू?” वा बोळी, “युहन्ना बपतिस्मा देणआळे का सिर।” 25 वा जिब्बे राजे कै धोरै भीत्तर आई अर उसतै बिनती करी, “मै चाहूँ सूँ के तू इब्बे युहन्ना बपतिस्मा देणआळे का सिर एक थाळ म्ह मन्नै मंगवा दे।”

26 फेर राजा घणा काल होया, पर आपणी सूह के कारण अर गेल्या बैठण आळ्यां के कारण उसताहीं टाळणा कोनी चाहया। 27 आखर म्ह राजा नै जिब्बे एक सिपाही ताहीं हुक्म देके खन्दाया के उसका सिर काट ल्याए। 28 उसनै जेळ खाने म्ह जाके उसका सिर काट्या, अर एक थाळ म्ह धरके ल्याया अर छोरी तै दिया, अर छोरी नै आपणी माँ तै दिया। 29 न्यू सुण कै युहन्ना के चेले आए, अर उसकी लाश नै लेगे अर कन्न म्ह धरया।

### प्रेरितां की वापसी अर एकांतवास

(मत्ती 14:13-14; लूका 9:10)

30 प्रेरितां नै यीशु के धोरै कड्डे होके, जो कीमे उन्नै करया अर सिखाया था, सब कीमे उसताहीं बताया। 31 उसनै उनतै कह्या, “थम खुद न्यारे किसे एक्की जंगहा म्ह चालके माडा आराम करो।” क्यूँके घणे माणस आवै-जावै थे, अर उन्नै खाण का मौक्का भी कोनी मिलै था। 32 ज्यांतै वे किस्ती पै चढके बीयाबान जंगहा म्ह न्यारे चले गए।

### पाँच हजार आन्धियाँ ताहीं खिलाणा

(मत्ती 14:15-21; लूका 9:11-17; युहन्ना 6:1-14)

33 घणा नै उनताहीं जान्दे देख कै पीछाण लिया, अर सारे नगरां तै कड्डे होके उडै पांए-पां भाज लिए अर उनतै पहल्या जा पहोचे। 34 उसनै उतर कै बड्डी भीड़ देखी, अर उन पै तरस खाया, क्यूँके वे उन भेड्डां की तरियां थे, जिनका कोए रुखाळा ना हो; अर ओ उन्नै घणी ए बात सिखाण लाग्या।

35 जिब्बे दिन घणा ढळ्या, तो उसके चेले उसके धोरै आके कहण लागगे, “या बियाबान जंगहा सै, अर दिन घणा ढळ्या सौं।” 36 उन्नै बिदा कर के चोगरदे के गाम्मां अर बगडां म्ह जाके, आपणे कीमे खाण ताहीं मोल लियावां। 37 यीशु नै जबाब दिया, “थमे उन्नै खाण नै द्यो।” उन्नै उसताहीं कह्या, “के हम सौं दीनार की रोटी ल्यावां, अर उन्नै खुआवां?” 38 उसनै उनताहीं कह्या, “जाके देखो थारै धोरै कितनी रोटी सै?” उन्नै बेरा पाड़ कै कह्या, “पाँच रोटी अर दो मच्छी भी।”

39 फेर यीशु नै उनता हीं हुक्म दिया के सारया नै हरी घास पै लैनपतार म्ह बिटा द्यो। 40 वे सौं-सौं अर पचास-पचास करके लैनपतार बैठगे। 41 यीशु नै उन पाँच रोटी अर दो मच्छीयां ताहीं लिया, अर सुर्ग के कान्नी लखाके धन्यवाद करया, अर रोटी तोड़-तोड़ कै चेल्यां ताहीं देन्दा गया के वे माणसां ताहीं परोसे, अर वे दो मच्छिया भी उन सारया म्ह बांड दी। 42 सारे खाके छिकगे, 43 अर उन्नै टुकड्यां तै बारहा टोकरी भर कै ठाई, अर कीमे मच्छियां तै भी। 44 जिन्नै रोटी खाई, वे पाँच हजार माणस थे।

### यीशु का पाणी पै चालणा

(मत्ती 14:22-33; युहन्ना 6:15-21)

45 फेर उसनै जिब्बे आपणे चेल्यां ताहीं किस्ती पै चढण कै खातर मजबूर करया के वे उसतै पहल्या उस पार बैतसेदा नै चले जावै, जिब्बे ताहीं के ओ माणसां ताहीं बिदा करै। 46 उन्नै बिदा करके यीशु पहाड़ पै प्रार्थना करण नै गया। 47 जिब्बे साँझ होई, तो किस्ती झील कै बिचाळै थी, अर यीशु एक्का धरती पै था। 48 जिब्बे उसनै देख्या के वे खेते-खेते घबरा गए सैं, क्यूँके बाळ उनके पलट म्ह थी, तो रात कै चौथे पहर कै धोरै ओ झील पै चाल्दे होए उनके धोरै आया; अर उनतै आगे लिकड जाणा चाहवै था। 49 पर उन्नै उसताहीं झील पै चाल्दे देखके समझया के भूत सैं, अर किलकी मारण लागे; 50 क्यूँके सारे उसनै देखके घबरा गे थे। पर उसनै जिब्बे उनतै बात करी अर कह्या, “हौसला राक्खो: मै सूँ; डरो मतना!” 51 फेर ओ उनके धोरै किस्ती पै आया, अर बाळ थम्बगी: अर वे घणा अचम्भा करण लागे। 52 वे उन रोटी के बारे म्ह कोनी समझै थे, क्यूँके उनके दिल करडे होरे थे।

### गन्नेसरत म्ह रोमियाँ ताहीं चंगा करणा

(मत्ती 14:34-36)

53 वे परली ओड़ उतर के गन्नेसरत म्ह पहोचे, अर किस्ती घाट पै लाई। 54 जिब्बे वे किस्ती पै तै उतरे, तो माणस जिब्बे उसनै पिच्छाण कै, 55 ओरै-धोरै के सारे देश म्ह भाजे, अर बीमारां नै खाट्टां पै लादके, जित-जित खबर मिली के यीशु ओड़ै सैं, उडै-उडै लिए हान्डे। 56 अर जित किते भी ओ गाम्मां, नगरां, या मोहल्यां म्ह जावै था, माणस बीमारां नै बजारा म्ह धरके उसतै बिनती करै थे के ओ उन्नै आपणे लत्ते के पल्ले तै ए छू लेण दे: अर जितने उसनै छूवै थे, सारे चंगे हो जावै थे।

### परम्परा-पालन का सवाल

(मत्ती 15:1-9)

7 फेर फरीसी अर कीमे शास्त्री जो यरुशलम तै आए थे, उसके धोरै कड्डे होए, 2 अर उन्नै उसके कुछ चेल्यां ताहीं बिना सुचे होए यानिके बिना हाथ धोए रोटी खांदे देख्या— 3 क्यूँके फरीसी अर सारे यहूदी, बड्डे बुजर्गा के रित-रिवाजां पै चाल्लै सैं अर जिब्बे ताहीं सई ढाळ हाथ नीं धो लेंदे जदताहीं कोनी खान्दे; 4 अर बजार तै आके, जब ताहीं नहा नीं लेन्दे, जदताहीं कोनी खान्दे; और घणी सी बात सैं, जो उनके धोरै मानण के खातर पहोचाई गई सैं, जिस तरियां कटोरे, अर लोटे, अर ताम्बे के बासणां ताहीं धोणा मान्जणा। 5 इस करके उन फरीसियां अर शास्त्रियां नै उसतै बुझ्या, “तेरै चेले क्यांतै बड्डे बुजर्गा के रित-रिवाजां पै कोनी चाल्दे, अर बिना धोए हाथां तै रोटी खावै सैं?” 6 उसनै उनताहीं कह्या, “यशायाह नै थम कपटियां के बारे म्ह घणी सई भविष्यवाणी करी; जिसा लिख्या सै: ‘ये माणस होडां तै तो मेरी इज्जत करै सैं, पर उनका मन मेरै तै दूर रहवै सौं।’ 7 वे खामखां मेरी पूजा करै सैं, क्यूँके माणसां कै हुक्मां नै धर्म का उपदेश करके सिखावै सैं।”

8 क्यूँके थम पणमेशर कै हुक्म नै टाळके माणसां कै रिवाजां ताहीं मान्जो सो। 9 उसनै उनताहीं कह्या, “थम आपणे रिवाजां नै मानण कै खातर पणमेशर का हुक्म कितनी बढिया ढाळ टाळ द्यो सो। 10 क्यूँके मूसा नै कह्या सैं, ‘आपणे माँ-पिता की इज्जत कर’ अर ‘जो कोए आपणे माँ-पिता नै भुंडा कहवै, ओ जरूर मारया जावै।’ 11 पर थम कहो सो के जै कोए आपणे माँ-पिता तै कहवै, ‘जो कीमे थमनै मेरै तै फैंयदा पहोच सकै था, ओ कुरबान (पणमेशर ताहीं अर्पण) हो लिया।’ 12 तो थम उस ताहीं पिता या उसकी माँ

की कीमे सेवा करण नीं देन्दे | 13 इस तरियां थम आपणी रीत-रिवाजां तै, जिन ताहीं थमनै ठहराया सै, पणमेशर का बचन टाळ द्यो सो; अर इसे-इसे घण खरे काम करो सो |”

### माणस ताहीं अशुद्ध करण आळी बात (मत्ती 15:10-20)

14 फेर उसनै आदमियां ताहीं आपणे धोरै बुलाके कह्या, “थम सारे मेरी सुणो, अर समझो | 15 15 इसी कोए चीज कोनी जो माणस म्ह बाहरण तै बड़के उस ताहीं अशुद्ध करै; पर जो चीज माणस कै भीत्तर तै लिकडै सै, वैए उस ताहीं अशुद्ध करै सै | 16 [जै किसे के सुणन नै कान हो तो सुण ले |]” 17 जिब्व ओ भीड़ कै धोरै तै घरा गया, तो उसके चेल्यां नै इस उदाहरण कै बारै म्ह उसतै बुझया | 18 उसनै उनतै कह्या, “के थम भी इसे नासमझ सो? के थम कोनी समझदे के जो चीज बाहरण तै माणस कै भीत्तर जावै सै वा उसनै अशुद्ध कोनी कर सकदी? 19 क्यूँके वा उसकै मन म्ह नीं, पर पेट म्ह जावै सै, अर संडास म्ह लिकड जावै सै?” न्यू कहके उसनै सारी खाणै की चिजां ताहीं शुद्ध ठहराया | 20 फेर उसनै कह्या, “जो माणस म्ह तै लिकडै सै, ओए माणस नै अशुद्ध करै सै | 21 क्यूँके भीत्तर तै, यानिके माणस कै मन तै, भुन्दे-भुन्दे ख्याल, जारी, चोरी, हत्या, बिगानी लुगाई धोरै जाणा, 22 लोभ, दुष्टता, छळ, लुचपण, भुंडी नजर, बुराई, घमण्ड, अर बेअक्री लिकडै सै | 23 ये सारी भुंडी बात भीत्तर तैए लिकडै सै अर माणस नै अशुद्ध करै सै |”

### सुरुफिनिकी जात की लुगाई का बिश्वास (मत्ती 15:32-39)

24 फेर ओ उडै तै उठके सूर अर सैदा के देशां म्ह आया; अर एक घर म्ह गया अर चाहवै था के किस्से न बेरा नी लागै, पर ओ लुहक नीं सक्या | 25 अर जिब्वे एक लुगाई जिसकी छोटी छोरी म्ह भूंडी औपरी आत्मा थी, उसका जिक्का सुण कै आई, अर उसकै पायां म्ह पड़गी | 26 या यूनानी अर सुरुफिनिकी जात की थी | उसनै उसतै बिनती करी के मेरी छोरी म्ह तै औपरी आत्मा लिकाड दे | 27 उसनै उसतै कह्या, “पहल्या छोरयां नै छिक लेण दे, क्यूँके छोरया की रोटी लेके कुत्यां कै आगै गेरणा सई कोनी |” 28 उसनै उसताहीं जबाब दिया, “साच्चो सै प्रभु; फेरभी कुत्ते भी तो मेज कै तळै बाळकां की रोटी का चूर-चार खा लेवै सै |” 29 उसनै उसतै कह्या, “इस बात कै कारण चली जा; भूंडी औपरी आत्मा तेरी छोरी म्ह तै लिकडयी सै |” क्यूँके वा लुगाई प्रभु यीशु कै श्यामी जमा-ए दीनता दिखाण लागी थी | 30 उसनै आपणे घरा आके देख्या के छोरी खाट प पड़ी सै, अर भूंडी औपरी आत्मा लिकडयी सै |

### बहरे अर हाक्ळे माणस ताहीं चंगा करणा

31 फेर ओ सूर अर सैदा के देशां तै लिकड कै दिकापुलिस तै होंदा होड गलील की झील पँ पहोच्या | 32 तो आदमियां नै एक बैहरै ताहीं जो हाक्ळा भी था, उसकै धोरै आके उसतै बिनती करी के आपणा हाथ उस पँ धरै | 33 फेर ओ उसनै भीड़ तै न्यारा लेग्या, आपणी आन्गली उसकै कानां म्ह सुडी, अर थूकके उसकी जीभ ताहीं छुया; 34 अर सुर्ग कान्नी देखके आह भरी, अर उसतै कह्या, “इप्फत्तह!” यानिके “खुल ज्या” ! 35 उसके कान खुलगे अर उसकी जीभ की गॉठ भी खुलगी, अर ओ सुथरी-ढाल बोल्लण लाग्या | 36 फेर उसनै उनताहीं सोद्री दुवाके कह्या के किस्से तै ना कहियो; पर जितना उसनै उन ताहीं चिताया उतना ए वे और प्रचार करण लागे | 37 वे घणे हैराण होके कहण लागे, “उसनै जो कीमे करया सारा ठीक करया सै; ओ बैहरया नै सुणन की, गूँगा नै बोल्लण की ताकत देवै सै |”

### चार हजार माणसां ताहीं खुवाणा (मत्ती 15:32-39)

8 उन दिनां म्ह जिब्व भीड़ कट्टी होई, अर उनकै लोवै कीमे खाण नै कोनी था, तो उसनै आपणे चेल्यां ताहीं धोरै बुलाके उनतै कह्या, “मन्नै इस भीड़ पँ तरस आवै सै, क्यूँके ये तीन दिनां तै बराबर मेरै गेल्या सै,

अर उनकै धोरै कीमे खाण नै भी कोनी | 3 जै मै उन्नै भूक्खा खन्दा द्यु, तो राह म्ह थक हार कै रह ज्यांगे; क्यूँके इन म्ह तै कई दूर तै आरे सै |” 4 उसकै चेल्यां नै जबाब दिया, “उरै बण म्ह इतनी रोटी कोए कित तै ल्यावै के वे छिक ज्यां?” 5 यीशु मसीह नै उनतै कह्या, “थारै धोरै कितनी रोटी सै?” उन्नै कह्या, “सात |”

6 फेर उसनै माणसां ताहीं धरती पँ बैठण का हुक्म दिया, अर वे सात रोटी लीं अर धन्यवाद करके तोड़ी, अर आपणे चेल्यां नै देन्दा गया के उनकै आगै धरै, अर माणसां आगै परोस दिया | 7 उनकै धोरै माडी-सी छोटी मच्छियां भी थीं; उसनै धन्यवाद करके उनताहीं माणसां कै आगै धरण का हुक्म दिया | 8 वे खाके छिकगे अर चेल्यां नै बचे होड टुकडया के सात टोकरे भरके ठाए | 9 अर आदमी चार हजार कै करीबन थे; फेर उसनै उनताहीं बिदा करया, 10 अर ओ जिब्वे आपणे चेल्यां कै गेल्या किस्ती पँ चढ़के दलमनूता प्रदेश नै चल्या गया |

### फरिसियां कै जरिये सुर्गीय निशान की माँग (16:1-4)

11 फेर फरीसी आके उसतै बहस करण लागे, अर उस ताहीं परखण खातर उसतै कोए सुर्गीय निशान माँग्या | 12 उसनै आपणी आत्मा म्ह आह भरके कह्या, “इस टेम के आदमी क्यातै निशान टोहवै सै? मै थमनै साच्चि-साच कहुँ सू के इस टेम के आदमियां नै कोए निशान नीं दिया जावैगा |” 13 अर ओ उन्नै छोड़के फेर किस्ती पँ चढ़ग्या अर परली ओड़ चल्या गया |

### फरिसियां अर हेरोदेस का खमीर (मत्ती 16:5-12)

14 चेल्ले रोटी लेणा भुल गे थे, अर किस्ती म्ह उनकै धोरै एक-ए रोटी थी | 15 उसनै उनतै चिताया, “लखाओ, फरिसियां के खमीर अर हेरोदेस के खमीर तै चौकन्ने रहो |” 16 वे आपस म्ह बिचार करके कहण लागे, “म्हारै धोरै रोटी कोनी सै |” 17 न्यू जाण कै यीशु नै उनतै कह्या, “थम क्यातै आपस म्ह यो बिचार करे सो के म्हारै धोरै रोटी कोनी?” के इब ताहीं नीं जाणदे अर नीं समझदे? के थारा मन करडा होग्या सै? 18 के आँख राखदे होये भी कोनी देखदे, अर कान राखदे होये भी कोनी सुणदे? के थारै याद कोनी | 19 के जिब्व मन्नै पाँच हजार कै खातर पाँच रोटी तोड़ी थी तो थमनै टुकडया के कितनी टोकरियां भरके ठाई?” उन्नै उसतै कह्या, “बारहा टोकरियां |” 20 “अर जिब्व सात हजार कै खातर सात रोटियां थीं तो थमनै टुकडयां के कितने टोकरे भरके ठाए थे?” उन्नै उसतै कह्या, “सात टोकरे |” 21 उसनै उनतै कह्या, “के थम इब ताहीं नीं समझदे?” 22 वे बैतसैदा म्ह आए; अर आदमी एक आंधे नै उसकै धोरै ली याये अर उसतै बिनती करी के उसनै छुवै |

### बैतसैदा म्ह एक आंधे ताहीं चंगा करणा

23 ओ उस आंधे का हाथ पकड़के गाम तै बाहरण लेग्या, अर उसकी आँखां म्ह थूकके उसपँ हाथ धरे, अर उसतै बुझया, “के तू कीमे देखवै सै?” 24 उसनै निगांठ ठाके कह्या, “मै माणसां नै देखवूँ सू; वे मन्नै चाल्दे होये दरखतां की ढाळ दीक्खे सै |” 25 फेर उसनै दुबारा उसकी आँखां पँ हाथ धरे, अर आंधे नै ध्यान तै देख्या | ओ चंगा होग्या, अर सारा कीमे सुथरी-ढाळ देक्खण लाग्या | 26 उसनै उसताहीं न्यू कहके खन्दाया, “इस गाम म्ह पां भी नी धरणा |”

### आपणी मौत कै बारै म्ह यीशु की भविष्यवाणी (मत्ती 16:21-23; लूका 9:22)

27 यीशु अर उसकै चेल्ले कैसरिया फिलिप्पी के गाम्मां म्ह चले गये | राह म्ह उसनै आपणे चेल्यां तै बुझया, “माणस मन्नै के कहवै सै?” 28 उन्नै जबाब दिया, “युहन्ना बपतिस्मा देण आळा, पर कोई एलियाह अर कोई नब्बियां म्ह एक भी कहवै सै |” 29 उसनै उनतै बुझया, “पर थम मन्नै के कहो सो?” पतरस नै जबाब दिया, “तू मसीह सै |” 30 फेर उसनै उन ताहीं सोद्री दुवा कै

कह्या के मेरें कारण यो किसे तैं नीं कहणा | 31 फेर ओ उन्नै सिखाण लाग्या के माणस के बेटे खातर जरूरी सैं के ओ घणा दुःख ठावै, अर पुरनिए अर प्रधान याजक, अर शास्त्री उसनै माड़ा समझ के मार देवें, अर ओ तीन दिन म्ह जिन्दा उठै | 32 उसनै या बात उनतै साफ-साफ कह दी | इस पै पतरस उसनै न्यारा ले जाके झिडकण लाग्या, 33 पर उसनै पलटके आपणे चेल्यां कात्री देख्या, अर पतरस नै झिडकके कह्या, “हे शैतान, मेरें श्यामी तैं दूर हो; क्यूँके तू पणमेशर की बात्तां पै नीं, पर माणसां की बात्तां पै मन ल्यावै सैं |”

### यीशु के पाच्छे चालण का मतलब (16:24-28; लूका 9:23-27)

34 उसनै भीड़ ताहीं आपणे चेल्यां सुदा बुलाके कह्या, “जो कोई मेरें पाच्छे आणा चाहवै, ओ आपणे आप्पे तैं नाहूँ अर आपणा कूस ठाके, मेरें गेल हो ले | 35 क्यूँके जो कोई आपणी ज्यान बचाणा चाहवै ओ उसनै खोवैगा, पर जो कोई मेरें अर सुसमाचार खातर आपणी ज्यान खोवैगा, ओ उसनै बचावैगा | 36 जे माणस सारी दुनिया नै पा लेवै अर आपणी ज्यान का नुकसान ठावै, तो उसनै के फेयदा होगा? 37 माणस आपणी ज्यान के बदलै के देवैगा? 38 जो कोए इस जार अर पाप्पी जात के बिचाळै मेरें तैं अर मेरी बात्तां तैं सरमावैगा, माणस का बेटा भी जिबब ओ पवित्र दुत्तां के गेल्या आपणे पिता की महिमा सुदा आवैगा, फेर उसतै भी सरमावैगा |”

9 अर उसनै उनतै कह्या, “मैं थारै तैं साच्ची-साच कहुँ सूँ के जो उरै खड़ें सैं, उनम्ह तैं कोए-कोए इसे सैं, के जिबब ताहीं पणमेशर के राज नै सामर्थ सुदा आया होया नीं देख लेवें, जद तक मौत का सुवाद कद्रे भी नीं चाखें |”

### यीशु का रूपांतर

(मत्ती 17:1-13; लूका 9:28-36)

2 छः दिन के पाच्छे यीशु नै पतरस अर याकूब अर युहन्ना ताहीं गेल लिया, अर एक्के म्ह किसे ऊँचै पहाड़ पै लेग्या | ओड़ै उनके श्यामी उसकी शिक्क बदल गी, 3 अर उसका लत्ता इसा चमकण लाग्या उरै ताहीं जमां धोळा-धप होया, के धरती पै कोए धोब्बी भी उसा धोळा कोनी कर सकदा | 4 अर उन्नै मूसा के गेल्या एलियाह दिख्या; वें यीशु के गेल्या बात करै थे | 5 इस पै पतरस नै यीशु तै कह्या, “हे रब्बी, म्हारा उरै रहणा सई सैं : इसकरके हम तीन मण्डप बणावा; एक तेरें खातर, एक मूसा खातर, एक एलियाह खातर |” 6 क्यूँके उसनै कोनी बेरा था, के ओ के जबाब देवें, ज्यांतै के वे घणे डरगे थे | 7 फेर एक बादळ उनपै छाग्या, अर उस बादळ म्ह तैं एक बाणी लिकडी, “यो मेरा लाडला बेटा सैं, इसकी सुणो |” 8 फेर उन्नै चाणचक चौगरदे के निगांठ घुमाई, अर यीशु नै छोड़ आपणे गेल्या और कोए कोनी देख्या |

9 पहाड़ तैं उतरदे टेम उसनै उनताहीं हुक्म दिया के जिबब ताहीं माणस का बेटा मरे होया म्ह तैं जिन्दा नीं उठै, जद तक जो कीमे थमनै देख्या सैं ओ किसे तैं ना कहियो | 10 उन्नै इस बात ताहीं याद राख्या; आपस म्ह बहस करण लागे, “मरे होया म्ह जिन्दा उठण का के मतलब सैं?” 11 अर उन्नै उसतै बुझ्या, “शास्त्री क्यांतै कहवें सैं के एलियाह का पहल्या आणा जरूरी सैं?” 12 उसनै उनताहीं जबाब दिया, “एलियाह साच्चै पहल्या आके सारा कीमे सुधारैगा, पर माणस के बेटे के कारण यो क्यांतै लिख्या सैं के ओ घणा दुःख ठावैगा, अर माड़ा गिणया जावैगा? 13 पर मैं थारै ताहीं कहुँ सूँ के एलियाह तो आ लिया, अर जिसा उसके कारण लिख्या सैं, उन्नै जो कीमे चाह्या उसके गेल्या करया |”

### बाळक ताहीं चंगा करणा जिसम्ह औपरी आत्मा थी

मत्ती 17:14-21; लूका 9:37-43)

14 जिबब ओ चेल्यां के धोरै आया, तो देख्या के उनके चौगरदे नै बड्डी भीड़ लागरी सैं अर शास्त्री उनके गेल्या बहस कररे सैं | 15 उस ताहीं देखदे ए सारे घणे हैरान होण लागे, अर उस कात्री भाज के नमस्कार करया | 16 उसनै उनतै बुझ्या, “थम इन तैं के बहस कररे सो?” 17 भीड़ म्ह तैं एक नै उसतै

जबाब दिया, “हे गुरु, मैं आपणे बेटे ताहीं जिसम्ह गूंगी आत्मा बड्डी सैं, तेरें धोरै ल्याया था | 18 जित किते वा उसनै पकड़ै सैं, उड़ए पटक देवें सैं : अर ओ मुँह म्ह तैं झाग भर लावै सैं, अर दांत पिसदा, अर सुखदा जावै सैं | मन्नै तेरे चेल्यां तैं कह्या के उस ताहीं काड देवें, पर वे काड नीं सके |” 19 न्यू सुण के उसनै उनतै जबाब देके कह्या, “हे अबिश्वासी माणसो, मैं कद ताहीं थारै गेल्या रहूंगा? अर कद ताहीं थारी सहूंगा? उस ताहीं मेरें धोरै ल्याओ |”

20 फेर वे उसनै उसके धोरै लियाये : अर जिबब उसनै उस ताहीं देख्या, तो उस आत्मा नै जिबबे उस ताहीं मरोड्या, अर ओ धरती पै पडग्या, अर मुँह तैं झाग बगान्दे होये लोड्डण लाग्या | 21 यीशु मसीह नै उसके पिता तैं बुझ्या, “इसकी या हालत कद तैं सैं?” उसनै कह्या, “बाळकपण तैं | 22 उसनै इस ताहीं नास करण खातर कदे आग अर कदे पाणी म्ह गेरया, पर जै तू कीमे कर सकै, तो म्हारै पै तरस खाके म्हारा भला कर |” 23 यीशु नै उसतै कह्या, “जै तू कर सकै सैं? या के बात सैं ! बिश्वास करण आळ्यां खातर सारा कीमे हो सकै सैं |” 24 बाळक के पिता नै जिबबे हाडे खाके कह्या, “हे प्रभु, मैं बिश्वास करूँ सूँ, मेरें अबिश्वास का उपाय कर |” 25 जिबब यीशु नै देख्या के माणस भाजके भीड़ लावें सैं, तो उस भूंडी औपरी आत्मा ताहीं न्यू कहके धमकाया, “हे गूंगी अर बैहरी आत्मा, मैं तन्नै हुक्म हूँ सूँ, उसम्ह तैं लिकड आ, अर उसम्ह फेर कदे ना बडीये |” 26 फेर वा किल्की मारके अर उसताहीं घणा मरोड के, लिकड आई; अर बाळक मरया होया-सा होग्या, उरै ताहीं के घणे आदमी कहण लागे के ओ मरग्या | 27 पर यीशु नै उसका हाथ पकड़ के उस ताहीं ठाया, अर ओ खड्या होग्या | 28 जिबब ओ घरा आया, तो उसके चेल्यां नै एक्के म्ह उसतै बुझ्या, “हम उस ताहीं क्यांतै नीं काड सके?” 29 उसनै उनतै कह्या, “या जात, बिना प्रार्थना किसे और उपाय तैं कोनी लिकड सकदी |”

### आपणी मौत के बारै म्ह यीशु की पुनः भविष्यवाणी

(मत्ती 17:22-23; लूका 9:43-45)

30 फेर वे ओड़ै तैं चाले, अर गलील म्ह होंदे होये जावै थे | ओ नीं चाहवै था के कोए जाणै, 31 क्यूँके ओ उपदेश देन्दा अर अपणे बारै म्ह उनतै कहवै था, “माणस का बेटा माणसां के हाथ तैं पकड़वाया जावैगा, अर वे उस ताहीं मार देवेंगे, अर ओ मरण के तीन दिन पाच्छे जिन्दा उठैगा |” 32 पर या बात उनकी समझ म्ह कोनी आई, अर वे उसतै बुझण तैं डरै थे |

### सारया तैं बड्ठा कौण?

(मत्ती 18:1-5; लूका 9:46-48)

33 फेर वे कफरनहूम म्ह आये; अर घर म्ह आके उसनै उनतै बुझ्या, “राह म्ह थम किस बात पै बहस कररे थे?” 34 वे बोल-बाले रहे, क्यूँके राह म्ह उन्नै आपस म्ह या बहस करी थी के म्हारै म्ह तैं बड्ठा कौण सैं | 35 फेर उसनै बैठके बारहा ताहीं बुलाया अर उनतै कह्या, “जै कोए बड्ठा होणा चाहवै, तो सारया तैं छोड्वा अर सारया का सेवक बणै |” 36 अर उसनै एक बाळक नै लेके उनके बिचाळे खड्या करया अर उस ताहीं गोद्री म्ह लेके उनताहीं कह्या, 37 “जो कोए मेरें नाम तैं इसे बाळकां म्ह तैं किसे एक नै भी अपणावै सैं, ओ मन्नै अपणावै सैं; अर जो कोए मन्नै अपणावै सैं, ओ मन्नै नीं, बल्के मेरें खन्दाण आळे नै अपणावै सैं |”

### जो बिरोध म्ह नीं, ओ मेर म्ह

(लूका 9:49-50)

38 फेर युहन्ना नै उस ताहीं कह्या, “हे गुरु, हमनै एक माणस ताहीं तेरें नाम तैं भूंडी औपरी आत्मां नै काडदे देख्या अर हम उसनै मना करण लागे, क्यूँके ओ म्हारै पाच्छे कोनी आवै था |” 39 यीशु नै कह्या, “उस ताहीं मना मत करो; क्यूँके इसा कोए नीं जो मेरें नाम तैं सामर्थ का काम करै, अर तावळ तैं मन्नै भुंडा कह सकै, 40 क्यूँके जो म्हारै बिरोध म्ह नीं, ओ म्हारै कात्री सैं | 41 जो कोए एक कटोरा पाणी थमनै ज्यांतै प्यावै के थम मसीह के सो तो मैं थमनै साच्ची-साच कहुँ सूँ के ओ आपणा प्रतिफळ किसे तरियां भी नीं खोवैगा |”

### टोकर का कारण बनना (मत्ती 18:6-9; लूका 17:1-2)

42 "जो कोए इन छोट्या म्ह तै जो मेरै पै बिश्वास करै सै, किसे नै टोकर खुवावै तो उसकै खातर भला योए सै के एक बड्डी चाक्री का पाट उसकै गळ म्ह लटकाया जावै अर ओ समुंदर म्ह गेरया जावै। 43 जै तेरा हाथ तन्नै टोकर खुवावै तो उसनै काट दे। टुंडा होके जिन्दगी म्ह बड़ना तेरै खातर भला सै के दो हाथ रहंदे होये नरक की आग म्ह गेरया जावै जो कदे नीं बुझै। 44 [जड़ै उनका कीड़ा कोनी मरदा अर आग कोनी बुझदी।] 45 जै तेरा पैर तन्नै टोकर खुवावै तो उस ताहीं काट दे। लंगड़ा होके जिन्दगी म्ह बड़ना तेरै खातर भला सै के दो पैर रहंदे होये नरक की आग म्ह गेरया जावै। 46 [जड़ै उनका कीड़ा कोनी मरदा अर आग कोनी बुझदी।] 47 जै तेरी आँख तन्नै टोकर खुवावै तो उसनै लिकाड़ दे। काणा होके पणमेशर के राज म्ह बड़ना भला सै के दो आँख रहंदे होये तू नरक म्ह गेरया जावै। 48 जड़ै उनका कीड़ा कोनी मरदा अर आग कोनी बुझदी। 49 क्यूँके हरेक माणस आग तै नमकीन करया जावैगा। 50 नून आच्छा सै, पर जै नून का सुवाद जांदा रहवै तो उसनै किस तरियां नमकीन करोगे? आपणे म्ह नून राक्खो, अर आपस म्ह मेल-मिलाप तै रहो।"

### तलाक के बारे म्ह यीशु की शिक्षा (मत्ती 19:1-12; लूका 16:18)

10 फेर ओ ओड़ै तै उठकै यहुदियाँ की सीम म्ह यरदन के पार आया। भीड़ उसकै धोरै कही होगी, अर आपणी रीत के मुताबिक उन्नै दुबारै उपदेश देण लाग्या।

2 फेर फरिसियाँ नै यीशु धोरै आके उस ताहीं परखण खातर उसतै बुझया, "के यो ठीक सै के माणस आपणी बीरबान्नी नै छोड़ै?" 3 उसनै उनताहीं जबाब दिया, "मूसा नै थारै ताहीं के हुकम दिया सै?" 4 उन्नै कह्या, "मूसा नै तो तलाक देके अर छोड़ण का हुकम दिया सै।" 5 यीशु नै उनतै कह्या, "थारे मन के करडै पण के कारण उसनै थारै खातर यो हुकम लिख्या। 6 पर सुष्टि की सरुआत तै पणमेशर नै नर अर नारी करके उन ताहीं बणाया सै। 7 इस कारण माणस आपणे माँ-पिता तै न्यारा होके आपणी बीरबान्नी गेल्या रहवैगा, 8 अर वे एक देही होवैगें; ज्यांतै के वे इब दो नीं पर एक देही सै। 9 इस करके जिस ताहीं पणमेशर नै जोड़या सै उस ताहीं माणस न्यारा ना करै।" 10 घर म्ह चेल्यां नै उसकै कारण उसतै फेर बुझया। 11 यीशु मसीह नै उनतै कह्या, "जो कोए आपणी बीरबान्नी नै छोड़कै दुसरी तै ब्याह करै तो ओ उस पहलडी के बिरोध म्ह जारी करै सै; 12 अर जै बीरबान्नी आपणे धणी नै छोड़कै दुसरे तै ब्याह करै तो वा जारी करै सै।"

### बाळकां ताहीं आशरीवाद (मत्ती 19:13-15; लूका 18:15-17)

13 फेर माणस बाळकां नै उसकै धोरै ल्याण लागे के ओ उन पै हाथ धरै, पर चेल्यां नै उन ताहीं धमकाया। 14 यीशु नै न्यू देख छोह म्ह होके कह्या, "बाळकां नै मेरै धोरै आण द्यो अर उन्नै मना ना करो, क्यूँके पणमेशर का राज्य इसा ए का सै। 15 मै थमनै साच्ची-साच कहुँ सूँ के जो कोए पणमेशर के राज्य नै बाळक की तरियां नीं अपणावै, ओ उसम्ह कदे नीं बड़न पावैगा। 16 अर उसनै उन ताहीं गोद्री म्ह लिया, अर उन पै हाथ धरके उन ताहीं आशीष दी।

### अमीर माणस अर अनन्त जीवन (मत्ती 19:16-30; लूका 18:18-30)

17 जिब्व ओ ओड़ै तै लिक्डके राह म्ह जावै था, तो एक माणस उसके धोरै भाज्दा होया आया, अर उसके आगे घुटने टेक के उसतै बुझया, "हे उत्तम गुरु, अनन्त जीवन का हकदार होण खातर मै के करुँ?" 18 यीशु नै उसतै कह्या, "तू मन्नै उत्तम क्यांतै कहवै सै? कोए उत्तम कोनी, सिर्फ एक यानिके पणमेशर। 19 तन्नै हुकमां का तो बेराए सै: 'खून नीं करणा, जारी नीं करणा,

झूठी गवाही नीं देणा, छळ नीं करणा, चोरी नीं करणा, आपणे माँ-पिता का आदर करणा।" 20 उसनै यीशु तै कह्या, "हे गुरु, इन सारया नै मै बाळकपण तै मान्दा आऊँ सूँ।" 21 यीशु नै उसपै निगांह करके उसतै प्रेम करया, अर उसतै कह्या, "तेरै म्ह एक बात की कमी सै। जा, जो कीमे तेरा सै उसनै बेच के कन्नालां नै दे, अर तन्नै सुर्ग म्ह धन मिलेगा, अर आके मेरै गेल्या हो ले।" 22 इस बात तै उसके मुँह पै उदासी छाग्यी, अर ओ दुखी होंदा होया चल्या गया, क्यूँके ओ घणा साहूकार था।

23 यीशु नै चौगर देके देखके आपणे चेल्यां तै कह्या, "साहूकारां का पणमेशर के राज्य म्ह बड़ना घणा ओकरा सै।" 24 चेल्ले उसकी बात तै हैरान होये। इस पै यीशु नै उनतै दुबारै कह्या, "हे बाळको, जो धन पै भरोसा राखै सै, उनके खातर पणमेशर के राज्य म्ह बड़ना किसा ओकरा सै। 25 पणमेशर के राज्य म्ह साहूकार के बड़नै तै ऊँट का सुई के मोरै म्ह तै लिक्डना सेला सै।" 26 वे घणे ए हैरान होके आपस म्ह कहण लागे, "तो फेर किसका उद्धार हो सके सै?" 27 यीशु नै उनकी ओड़ देखके कह्या, "माणसां तै तो यो नीं हो सकदा, पर पणमेशर तै हो सके सै; क्यूँके पणमेशर तै सारा कीमे हो सके सै।" 28 पतरस उसतै कहण लाग्या, "लखा, हम तो सारा कीमे छोड़ के तेरै गेल्या हो लिये सा।" 29 यीशु नै कह्या, "मै थमनै साच्ची-साच कहुँ सूँ के इसा कोए कोनी, जिसनै मेरै अर मेरै सुसमाचार के खातर घर या भाई-बाण या माँ-पिता या बाळ-बच्चे आळों या खेत ताहीं छोड़ दिया हो, 30 अर इब इस टेम सौ गुणा नीं पावै, घर, भाई-बाण, माँ-पिता या बाळ-बच्चे आळों व खेत ताहीं, पर सताव गेल्या अर परलोक म्ह अनन्त जीवन। 31 पर घण खरे जो पहल्या सै, पाच्छले होंगे; अर जो पाच्छले सै, वे पहल्या होंगे।"

### आपणी मौत के बारे म्ह यीशु मसीह की तीसरी भविष्यवाणी (मत्ती 20:17-19; लूका 18:31-34)

32 वे यरुशलेम म्ह जान्दे होये राह म्ह थे, अर यीशु उनके आगे-आगे जाण लाग रहया था: चेल्ले हैरान थे अर जो उसके गेल-गेल चाल्ले थे, वे डररे थे। फेर ओ दुबारा उन बारहां नै लेके उनतै ये बात कहण लाग्या, जो उस पै आण आळी थीं, 33 "लखाओ, हम यरुशलेम नै जावां सा, अर माणस का बेड़ा प्रधान याजकां अर शास्त्रियाँ के हाथां पकड़वाया जावैगा, अर वे उसनै मारण जोग्गा ठहरावैगें, अर गैर-जात के हाथां म्ह सौंपैगें। 34 वे उसका मखौल करैगें, उस पै थूकैगें, उसके कोरडे मारैगें अर उसनै मार देवैगें, अर तीन दिन के पाच्छे ओ जिन्दा उठैगा।"

### याकूब अर युहन्ना की बिनती (मत्ती 20:20-28)

35 फेर जब्दी के बेड़े याकूब अर युहन्ना नै उसके धोरै आके कह्या, "हे गुरु, हम चाहवां सां के जो कीमे हम तेरै तै माँगा, ओ तू म्हारै खातर करै।" 36 उसनै उनतै कह्या, "थम के चाहो सो के थारै खातर करुँ?" 37 उन्नै उसतै कह्या, "हमनै यो दे के तेरी महिमा म्ह म्हारै म्ह तै एक तेरै सोळै अर दूसरा तेरै ओळै बैट्टै।" 38 यीशु नै उन ताहीं कह्या, "थम नीं जाणदे के थम के माँगे सो? अर जो कटोरा मै पीण पै सूँ के थम पी सको सो? अर जो बपतिस्मा मै लेण पै सूँ के थम ले सको सो?" 39 उन्नै उसतै कह्या, "म्हारै तै हो सके सै।" यीशु नै उनतै कह्या, "जो कटोरा मै पीण पै सूँ, थम पीओगे; अर जो बपतिस्मा मै लेण पै सूँ, उसनै लेओगे। 40 पर जिन खातर त्यार करया गया सै, उन ताहीं छोड़ और किसे नै आपणी सोळी अर आपणी ओळी ओड़ बिठाणा मेरा काम कोनी।"

41 न्यू सुण के दसां नै याकूब अर युहन्ना ताहीं चिड़या। 42 तो यीशु नै उन ताहीं धोरै बुलाके उनतै कह्या, "थमनै बेरा सै के जो और जात के हाकिम समझे जावै सै, वे उन पै राज करै सै; अर उनम्ह जो बड्डे सै, उन पै हक्क जमावै सै। 43 पर थारै म्ह इसा कोनी सै, बल्के जो कोए थारै म्ह बड्डा होणा चाहवै ओ थारा सेवक बणै; 44 अर जो थारै म्ह प्रधान होणा चाहवै, ओ सारया का दास बणै। 45 क्यूँके माणस का बेड़ा ज्यांतै कोनी आया के उसकी सेवा-पाणी करी जावै, पर ज्यांतै आया के खुद सेवा-पाणी करै, अर घणा नै छुड़ाण खातर आपणी ज्यान देवै।"

### आंधे बरतिमाई तारीं आंखां का दान

(मत्ती 20:29-34; लूका 18:35-43)

46 वे यरीहो म्ह आये, अर जिब्व ओ अर उसके चेले, अर एक बड्डी भीड यरीहो तै लिकडै थीं, फेर तिमाई का बेट्टा बरतिमाई, एक आन्धा भिखारी, सड़क के कंठारै बैठ्या था। 47 उसनै न्यू सुणकै यीशु नासरी सै, रुक्रे मार-मारकै कहण लाग्या, “हे दाऊद की ऊलाद, यीशु मेरै पै दया करा!” 48 घणाए नै उस तारीं धमकाया के बोल-बाला रह, पर ओ और भी रुक्रे मारण लाग्या, “हे दाऊद की ऊलाद, मेरै पै दया करा!” 49 फेर यीशु नै ठहरकै कह्या, “उसतारीं बुलाओ।” अर आदमियां नै उस आंधे तारीं बुलाकै उसतै कह्या, “ढेठ करा! उठ! ओ तन्नै बुलावे सै।” 50 ओ आपणा लत्ता बगाकै तोळा उठ्या, अर यीशु के धोरै आया। 51 इस पै यीशु नै उसतै कह्या, “तू के चाहवै सै के मै तेरै खातर करूँ?” आंधे नै उसतै कह्या, “हे रब्बी, न्यू कर के मै देखण लागूँ।” 52 यीशु नै उसतै कह्या, “चल्या जा, तेरै बिश्वास नै तेरै तारीं चंगा करया सै।” ओ जिब्वे देखण लाग्या, अर राह म्ह उसके गेल्या हो लिया।

### यरुशलम म्ह विजय-प्रवेश

(मत्ती 21:1-11; लूका 19:28-40; युहन्ना 12:12-19)

11 जिब्व वे यरुशलम के लोवै, जैतून पहाड़ पै बैतफगे अर बैतनिय्याह के धोरै आये तो उसनै आपणे चेल्यां म्ह तै दोआ तारीं न्यू कहकै खन्दाया, 2 “श्यामी के गाम म्ह जाओ, अर उसम्ह पहोचदये एक गधी का बच्चा, जिस पै कदे कोए नीं चढ़्या, बन्ध्या होया थमनै पावैगा। उसनै खोल ल्याओ। 3 जै थमनै कोए बुझै, ‘यो के करो सो?’ तो कहियो, ‘प्रभु नै इस तै काम लेणा सै,’ अर ओ तोळा उसनै खन्दा देवैगा।” 4 उन्नै जाके उस बच्चे तारीं बाहरण दरवाजे के धोरै आंगन म्ह जुड़्या होया पाया, अर खोल्लण लागे। 5 उनम्ह तै जो ओडै खडे थे, कई कहण लागे, “यो के करो सो, गधी के बच्चे नै क्यातै खोल्लो सो?” 6 जिसा यीशु नै कह्या था, उससे तरियां उन्नै कह दिया; फेर माणसां नै उन तारीं जाण दिया। 7 उन्नै बच्चे तारीं यीशु के धोरै ल्याकै उस पै आपणे लत्ते गेरे अर ओ उसपै बैठग्या। 8 फेर घणखरया नै आपणे लत्ते राह म्ह बिछाए अर औरां नै खेततां म्ह तै डालीं काट-काट के फैला दीं। 9 जो उसके आगे-आगे जावै अर पाच्छै-पाच्छै चाल्ले थे, रुक्रे मार-मार के कहन्दे जावै थे, “होशाना! धन्य सै ओ जो प्रभु के नाम तै आवै सै! 10 म्हारै पिता दाऊद का राज जो आवै सै; धन्य सै! अकास म्ह होशाना!”

11 ओ यरुशलम पहोचकै मन्दर म्ह आया, अर चौगरदे की सारी चिजां नै देखकै बारहां के गेल्या बैतनिय्याह गया, क्युँके साँझ होग्यी थी।

### अंजीर का बिना फळ आळा दरख्त

(मत्ती 21:18-19)

12 दुसरे दिन जिब्व वे बैतनिय्याह तै लिकडे तो उसनै भूख लागी। 13 ओ दूर तै अंजीर का हरया दरख्त देख के लोवै गया के, के बेरा उसम्ह कीमे पा ज्या : पर पत्या नै छोड़ के कीमे नीं पाया; क्युँके फळ का टेम कोनी था। 14 इस पै उसनै कह्या, “इब तै पाच्छै कोए तेरा फळ नीं खावै!” अर उसके चेले सुणण लागरे थे।

### मंदर तै बिपारियाँ का काड्या जाणा

(मत्ती 21:12-17; लूका 19:45-48; युहन्ना 2:13-22)

15 फेर वे यरुशलम म्ह आये, अर ओ मन्दर म्ह गया; अर ओडै जो लेण-देण करै थे उन्नै बाहरण लिकाड़ण लाग्या, सर्राफां के पीढे अर कबूतर बेचण आळ्यां की पाटडी पलट दी, 16 अर मन्दर म्ह तै किसे तारीं बासण लेकै आण-जाण कोनी दिया। 17 अर उपदेश करकै उनतै कह्या, “के न्यू नीं लिख्या सै के मेरा घर सारी जात्तां के खातर प्रार्थना का घर कुहवावैगा? पर थमनै इस तारीं डाकुआं की खोह बणा दी सै।” 18 न्यू सुणकै प्रधान याजक अर शास्त्री उसके नास करण का मौक्का टोहण लागे; क्युँके वे उसतै डरै थे,

ज्यांतै के सारे माणस उसके उपदेश तै हैरान होवै थे। 19 अर हरेक दिन साँझ होए ओ नगर तै बाहरण जाया करै था।

### सुखे अंजीर के दरख्त तै शिक्षा

(मत्ती 21:20-22)

20 फेर तड़कए नै जिब्व वे ओडै के जावै थे तो उन्नै उस अंजीर के दरख्त को जड़ तारीं सुख्या होया देख्या। 21 पतरस नै वा बात याद आई, अर उसनै उसतै कह्या, “हे रब्बी, लखा! यो अंजीर का दरख्त जिस तारीं तन्नै श्राप दिया था, सूख गया सै।” 22 यीशु नै उस तारीं जबाब दिया, “पणमेशर पै बिश्वास राखो।” 23 मै थमनै साच्ची-साच कहुँ सूँ के जो कोए इस पहाड़ नै कहवै, ‘तू उखड़ जा, अर समुन्दर म्ह जा पड़,’ अर आपणे मन म्ह शक नीं करै, बल्के बिश्वास करै के जो कहुँ सूँ ओ हो जावैगा, तो उसके खातर ओये होवैगा। 24 ज्यांतै मै थमनै कहुँ सूँ के जो कीमे थम प्रार्थना करके माँगे, तो बिश्वास कर ल्यो के थमनै मिलग्या, अर थारै खातर हो जावैगा। 25 अर जिब्व कदे थम खड़े होके प्रार्थना करो तो जै थारै मन म्ह किसे के कारण कीमे बिरोध हो, तो उसनै माफ करो : ज्यांतै के थारा सुर्गीय पिता भी थारै अपराध माफ करै। 26 [अर जै थम माफ ना करो तो थारा पिता भी जो सुर्ग म्ह सै, थारा कसूर माफ कोनी करैगा।”]

### यीशु के अधिकार पै सवाल

(मत्ती 21:23-27; लूका 20:1-8)

27 वे फेर यरुशलम म्ह आये, अर जिब्व ओ मन्दर म्ह टहलरया था तो प्रधान याजक अर शास्त्री अर पुरनिए उसके धोरै आके बुझण लागे, 28 “तू ये काम किस हक तै करै सै? अर यो हक तेरै तारीं किसनै दिया सै के तू ये काम करै?” 29 यीशु नै उनतै कह्या, “मै भी थारै तै एक बात बुझूँ सूँ: मन्नै जबाब दियो तो मै थमनै बताऊँगा के ये काम किस हक तै करूँ सूँ। 30 युहन्ना का बपतिस्मा के सुर्ग की ओड तै था या माणसां की ओड तै था। मन्नै जबाब द्यो।” 31 फेर वे आपस म्ह बहसण लागे के जै हम कहवां ‘सुर्ग की ओड तै,’ तो ओ कहवैगा, ‘फेर थमनै बिश्वास क्यांतै नीं करया?’ 32 अर जै हम कहवां, ‘माणसां की ओड तै,’ तो माणसां की भीड़ का भय सै, क्युँके सारे जाणै सै के युहन्ना साच्चीये नब्बी था। 33 आखर म्ह उन्नै यीशु तारीं जबाब दिया, “हमनै नीं बेरा।” यीशु नै उनतै कह्या, “मै भी थारै तै कोनी बतान्दा के ये काम किस हक तै करूँ सूँ।”

### दुष्ट किसानां का उदाहरण

(मत्ती 21:33-46; लूका 20:9-19)

12 फेर ओ उदाहरणां म्ह उनतै बात करण लाग्या : “किसे माणस नै दाख की बारी लगाई, अर उसके चौगरदे नै बाड़ा बांध्या, अर रस का कुण्ड खोद्या, अर बुरजी बनाई; अर किसानां तारीं उसका ठेका देकै प्रदेश चल्या गया। 2 फेर फळ की सम्मो म्ह उसनै किसानां के धोरै एक नौकर खन्दाया के किसानां तै दाख की बारी के फळां का हिस्सा लेवै। 3 पर उन्नै उस तारीं पकड़कै छेत्या अर रिक्ते हाथां बोहड़ा दिया। 4 फेर उसनै एक और नौकर तारीं उनकै धोरै खन्दाया; उन्नै उसका सिर फोड़ दिया अर उसकी बेईजती करी। 5 फेर उसनै एक और तारीं खन्दाया; उन्नै उस तारीं मार दिया। फेर उसनै और घणया तारीं खन्दाया; उनम्ह तै उन्नै कीमे तो छेत्ते अर कीमे मार दिये। 6 इब एक ए रहग्या जो उसका प्यारा बेट्टा था; आखर म्ह उसनै उस तारीं भी उनकै धोरै न्यू सोच के खन्दाया के वे मेरै बेड़े की इजत करैगें। 7 पर उन किसानां नै आपस म्ह कह्या, “थोए तो वारिस सै; आओ, हम इसनै मार द्यो, फेर वसीयत म्हारी हो जावैगी।” 8 अर उन्नै उस तारीं पकड़ के मार दिया, अर दाख की बारी म्ह बाहरण बगा दिया। 9 “इसकरके दाख की बारी का मालिक के करैगा? ओ आके उन किसानां का नास करैगा, अर दाख की बारी दुसरयां नै दे देवैगा। 10 के थमनै पवित्र ग्रन्थ म्ह यो बचन कोनी पढ़्या : ‘जिस पत्थर तारीं राजमिस्त्रियां नै निकम्मा ठहराया था, ओए कुणै का सिरा होग्या; 11 यो प्रभु की ओड तै होया, अर म्हारी निगांह म्ह अनोक्खा सै।” 12 फेर उन्नै उस तारीं पकड़ना चाहया;

क्यूँके समझगे थे के उसनै म्हारे बिरोध म्ह यो उदाहरण कहा सै | पर वे माणसां तै डरगे, अर उसनै छोड़ के चले गये |

### कैसर ताहीं कर देणा

(मत्ती 22:15-22; लूका 20:20-26)

13 फेर उसनै उस ताहीं बात्तां म्ह उलझाण खातर कीमे फरिसियाँ अर हेरोदियाँ ताहीं उसकै धोरै खन्दाया | 14 उन्नै आकै उसतै कहा, "हे गुरु, हमनै बेरा सै, के तू साच्चा सै, अर किसे की परवाह नीं करदा, क्यूँके तू माणसां का मुँह देखकै बात कोनी करदा, पर पणमेशर की राही सच्चाई तै बतावै सै | तो के कैसर ताहीं कर देणा सई सै या कोनी? 15 हम देवां, या नीं देवां?" उसनै उनका कपट जाणकै उनतै कहा, "मन्नै क्यातै परखो सो? एक दीनार मेरै धोरै ल्याओ, के मै उसनै देखूँ।" 16 वे लीयाए, अर उसनै उनतै कहा, "या छाप अर नाम किसका सै?" उन्नै कहा, "कैसर का।" 17 यीशु नै उनतै कहा, "जो कैसर का सै ओ कैसर ताहीं, अर जो पणमेशर का सै पणमेशर ताहीं द्यो।" फेर वे उसपै घणे हैरान होण लागे |

### पुनरुत्थान अर ब्याह

(मत्ती 22:23-33; लूका 20:27-40)

18 फेर सदुकियाँ नै भी, जो कहवै सै के मरे होया का जी उठणा सै ए कोनी; उसकै धोरै आकै उसतै बुझया, 19 "हे गुरु, मूसा नै म्हारे खातर लिख्या सै के जै किसे का भाई बेऊलादा मर जावै अर उसकी बीरबान्नी रह जावै, तो उसका भाई उसकी बीरबान्नी तै ब्याह कर लेवै अर आपणे भाई खातर पीढ़ी पैदा करे। 20 सात भाई थे। पहलडा भाई ब्याह करके बेऊलादा मरग्या। 21 फेर दुसरे भाई नै उसकी बीरबान्नी तै ब्याह कर लिया अर बेऊलादा मरग्या; अर उससे तरियां तीसरे नै भी करया। 22 अर सात्वां कै ऊलादा कोनी होई। सारया तै पाच्छे वा लुगाई भी मरगी। 23 आखर जिन्दा उठण पै वा उनम्ह तै किसकी बीरबान्नी होवैगी? क्यूँके वा सात्वां की बीरबान्नी हो ली थी।"

24 यीशु नै उनतै कहा, "के थम इस कारण तै भूल म्ह नीं पड़े सो के थम ना तो पवित्र ग्रन्थ ए नै जाणो सो, अर ना पणमेशर के सामर्थ नै? 25 क्यूँके जिब्व वे मरे होया म्ह तै जिन्दा उठैगें, तो वे ना ब्याह करैगें, अर ना ब्याह म्ह दिये जावैगें, पर सुर्ग म्ह दुतां कै जिसे होवैगें। 26 मरे होया कै जिन्दा होण कै कारण के थमनै मूसा की किताब म्ह झाड़ी की कहानी म्ह कोनी पढ़या के पणमेशर नै उसतै कहा, 'मै अब्राहम का पणमेशर, अर इसहाक का पणमेशर, अर याकूब का पणमेशर सूं? 27 पणमेशर मरे होया का नीं बल्के जिन्द्यां का पणमेशर सै; आखर म्ह थम बड्डी भूल म्ह पड़े सो।"

### सारया तै बड्डी आज्ञा

(मत्ती 22:34-40; लूका 10:25-28)

28 शास्त्रियाँ म्ह तै एक नै आकै उनताहीं बहस करदे सुणया, अर न्यू जाण कै उसनै उन ताहीं सई ढाल तै जबाब दिया, उसतै बुझया, "सारया तै खास हुक्म कौण-सा सै?" 29 यीशु नै उस ताहीं जबाब दिया, "सारे हुक्मां म्ह तै यो खास सै : 'हे इस्राएल सुण! प्रभु म्हारा पणमेशर एक ही प्रभु सै, 30 अर तू प्रभु आपणे पणमेशर तै आपणे सारे मन तै, अर आपणे सारे प्राण तै, अर आपणी सारी समझ तै, अर आपणी सारी शक्ति तै प्रेम राखणा।' 31 अर दूसरा यो सै, 'तू आपणे पड़ोसी तै आपणे जिसा प्रेम राखणा।' इस तै बड्डी और कोए हुक्म कोनी।" 32 शास्त्री नै उसतै कहा, "हे गुरु, जमा सई! तन्नै साच्ची कही के ओ एक-ए सै, अर उस ताहीं छोड़ और कोए कोनी। 33 अर उसतै सारे मन तै, अर सारे प्राण तै, अर सारी समझ तै, अर सारी शक्ति तै प्रेम राखणा; अर पड़ोसी तै आपणे जिसा प्रेम राखणा, सारे होमबलीयाँ अर बलिदानां तै बाध सै।" 34 जिब्व यीशु नै देख्या के उसनै समझ तै जबाब दिया, तो उसतै कहा, "तू पणमेशर के राज तै दूर कोनी।" अर किसे नै फेर उसतै बुझण की हिम्मत कोनी होई।

### मसीह किसका बेटा सै?

(मत्ती 22:41-46; लूका 20:41-46)

35 फेर यीशु नै मन्दर म्ह उपदेश करदे होये न्यू कहा, "शास्त्री किस तरियां कहवै सै के मसीह दाऊद का बेटा सै? 36 दाऊद नै खुद ए साच्ची आत्मा म्ह होकै कहा सै : 'प्रभु नै मेरै प्रभु तै कहा, 'मेरै सोळी ओड़ बैठ, जिब्व ताहीं के मै तेरे बैरियाँ नै तेरै पायां की पीढ़ी नीं कर दूँ।' 37 दाऊद तो खुद ए उसनै प्रभु कहवै सै, फेर ओ उसका बेटा किस-तरा होग्या?' अर भीड़ के माणस उसकी राज्जी होकै सुणै थे।

### शास्त्रियाँ तै सावधान

(मत्ती 23:1-36; लूका 20:45-46)

38 उसनै आपणे उपदेश म्ह उनतै कहा, "शास्त्रियाँ तै चौकन्ने रहो, जो लाम्बे-लाम्बे चोगे पहरे होड़ हांडे अर बजारां म्ह नमस्कार, 39 अर मन्दरां म्ह खास-खास बैठणा अर जिमण म्ह खास-खास जंगहा भी चाहवै सै। 40 वे बिधवा के घरां नै खा जावै सै, अर दिखावै खातर घणी वारी ताहीं प्रार्थना करदे रहवै सै। ये घणा दण्ड पावैगें।"

### कंगाल बिधवा का दान

(लूका 21:1-4)

41 ओ मन्दर कै भण्डार कै श्यामी बैठकै देखे था के आदमी मन्दर कै भण्डार म्ह किस ढाल पिस्से घाले सै; अर घण खरे साहुकारां नै घणाए कीमे घालया। 42 इतनै म्ह एक कंगाल बिधवा नै आकै दो दमदियाँ, जो एक अधले के बराबर होवै सै, घालीं। 43 फेर उसनै आपणे चेल्यां ताहीं धोरै बुलाकै कहा, "मै थमनै साच्ची-साच कहुँ सूं के मन्दर कै भण्डार म्ह घालण आळयां म्ह तै इस कंगाल बिधवा नै सारया तै बाध घालया सै; 44 क्यूँके सारया नै आपणे धन की बढदी म्ह तै घालया सै, पर इसनै आपणी घटदी म्ह तै जो कीमे उसका था, यानिके आपणी सारी कमाई घाल दी सै।"

### मन्दर कै विनाश की भविष्यवाणी

(मत्ती 24:1-2; लूका 21:5-6)

13 जिब्व ओ मन्दर तै लिकड़े था, तो उसकै चेल्यां म्ह तै एक नै उसतै कहा, "हे गुरु, लखा, किसे बड्ड़े-बड्ड़े पत्थर अर किसे सुथरे भवन सै!" 2 यीशु नै उनतै कहा, "के थम ये बड्ड़े-बड्ड़े भवन देखो सो : उरै पत्थर पै पत्थर भी बच्या कोनी रहवैगा जो गेरया नीं जावैगा।"

### संकट अर क्लेश

(मत्ती 24:3-14; लूका 21:7-19)

3 जिब्व ओ जैतून कै पहाड़ पै मन्दर कै श्यामी बैठया था, तो पतरस अर याकूब अर युहन्ना अर अद्रियास नै न्यारे जाके उसतै बुझया, 4 "हमनै बता के ये बात कद होवैगी? अर जिब्व ये सारी बात पूरी होण पै होवैगी उस टेम का के निशान होवैगा?" 5 यीशु नै उनतै कहण लाग्या, "चौकन्ने रहो के कोए थमनै भकावै नीं। 6 घण खरे मेरै नाम तै आके कहवैगें, 'मै ओए सूं!' अर घणा ए नै भकावैगें। 7 जिब्व थम रोळें, अर रोळां का जिक्रा सुणो, तो घबराईयो ना; क्यूँके इनका होणा जरूरी सै, पर उस टेम खात्मा कोनी होवैगा। 8 क्यूँके जात पै जात, राज पै राज चढाई करैगा। हर किते हालण आवैगें, अर अकाल पड़ैगें, ये तो दुःखां की सरुआत ए होवैगी।

9 "पर थम आपणे बारै म्ह चौकन्ने रहो; क्यूँके माणस थारे ताहीं बड्डी पंचायतां म्ह सौपैगें अर थम पंचायतां म्ह छित्तोगे, अर मेरै कारण हाकिमां अर राजयां कै आगे खड़े करे जाओगे, ताके उन खातर गवाही होवै। 10 पर जरूरी सै के पहल्या सुसमाचार सारी जात्तां म्ह प्रचार करया जावै। 11 जिब्व वे थमनै ले जाके सौपैगें, तो पहल्या तै फ़िक्र ना करियो इब हम के कहवांगें; पर जो कीमे थमनै उससे टेम बताया जावै ओए कहियो; क्यूँके बोलण आळे थम कोनी सो, पर पवित्र आत्मा सै। 12 भाई नै भाई, पिता नै बेटा घात खातर सौपैगें, अर बाळक माँ-पिता कै बिरोध म्ह खड़े होके उन

ताही मरवां देवेंगे। 13 अर मेरै नाम कै कारण सारे माणस थारै तै बैर करैंगे; पर जो आखर ताही धीरज धरैगा, उस्से का उद्धार होवैगा।

### महासंकट-काल

(मत्ती 24:15-28; लूका 21:20-24)

14 "आखर म्ह जिब्व थम उस उजाड़णआळी भुंडी चीज ताहीं जित सई कोनी ओड़ै खड़ी देकखो, (पढ़णआळा समझ लेवै) फेर जो यहूदियां म्ह सो, वे पहाड़ां म्ह भाज जावें; 15 जो छात पै हो, ओ आपणे घर म्ह कीमे लेण खातर तळै नीं उत्तरें अर ना भीत्तर जावें; 16 अर जो खेत म्ह हो, ओ आपणा लत्ता लेण खातर पाच्छै नीं बोहड़ें। 17 उन दिनां म्ह जो पेट तै हो अर दूध पिलान्दी होंगी, उनके खातर हाय-हाय। 18 अर प्रार्थना करया करो के यो जाड्या म्ह नीं हो। 19 क्यूँके वे दिन इसे कळेश के होवेंगे के सृष्टी की सरूआत तै, जो पणमेशर नै रचाई सै, इब ताहीं ना तो होये अर ना फेर कदे होवेंगे। 20 जै प्रभु उन दिनां नै नीं घटान्दा, तो कोए जीव भी कोनी बचदा; पर उन छांटे होया के कारण जिन ताहीं उसनै छाटया सै, उन दिनां ताहीं घटया। 21 उस टेम जै कोए थारै तै कहवै, 'लखाओ, मसीह उरै सै,' या 'लखाओ, ओड़ै सै,' तो बिश्वास ना करियो; 22 क्यूँके झूठे मसीह अर झूठे नब्बी उठ खड़े होवेंगे, अर निशान अर अनोकखे काम दिखावेंगे के जै हो सकै तो छांटे होया नै भी भका देवें। 23 पर थम चौकन्ने रहियो; लखाओ, मन्त्रै थारै तै सारी बात पहल्या ए तै बता दी सै।

### माणस के बेट्टे का पुनरागमन

(मत्ती 24:29-31; लूका 21:25-28)

24 "उन दिनां म्ह, उस कळेश के पाच्छै सूरज अन्धेरा हो जावैगा, अर चाँद चाँदणा कोनी देवैगा; 25 अर अकास के तारे पड़ण लागेंगे; अर अकास की शक्ति हैलाई जावैगी। 26 फेर माणस के बेट्टे नै बड्डी सामर्थ अर महिमा के गेल्या बादळां पै आंदे देकखो। 27 उस टेम ओ आपणे दुतां नै खन्दाके, धरती के इस सिरे तै अकास के उस सिरे ताहीं, च्यारू दिशायां तै आपणे छांटे होये माणसां नै कडा करैगा।

### अंजीर के दरखत का उदाहरण

(मत्ती 24:32-35; लूका 21:29-33)

28 "अंजीर के दरखत तै यो उदाहरण सीकखो : जिब्व उसकी डाळी कोमल हो जावै, अर पत्ते लिकड़ण लागें सैं; तो थम जाण ल्यो सो के गर्मी का टेम लोवै सै। 29 इस्से तरियां जिब्व थम इन बात्तां नै होंदे देकखो, तो जाण ल्यो के ओ लोवै सै बल्के दरवाजए पै सै। 30 मै थमनै साच्ची-साच कहुँ सूँ के जिब्व ताहीं ये बात नीं हो लेंदी, जदताहीं ये पीढ़ी जान्दी नीं रहवेंगे। 31 अकास अर धरती टळ जावेंगे, पर मेरी बात कदे नीं टळैगी।

### जागदे रहो

(मत्ती 24:36-44)

32 "उस दिन या उस टेम के बारै म्ह कोए नीं जाणदा, ना सुरग के दूत अर ना बेट्टा; पर सिर्फ पिता। 33 लखाओ, जागदे अर प्रार्थना करदे रहो; क्यूँके थमनै नीं बेरा के ओ टेम कद आवैगा। 34 या उस माणस की जिसी हालत सै, जो प्रदेश जान्दे टेम आपणा घर छोड़ जावै, अर आपणे नौकरां ताहीं हक्क देवै : अर हरेके नै उसका काम बता देवै, अर पहरेदार ताहीं जागदे रहण का हुकम देवै। 35 इसकरके जागदे रहो, क्यूँके थमनै नीं बेरा के घर का मालिक कद आवैगा, साँझ नै या आधी रात नै, या मुर्गे के बाँग देण के टेम या तड़कए तड़कै नै। 36 इसा ना हो के ओ चाणचक आके थमनै सोंदे पावै। 37 अर जो मै थमनै कहुँ सूँ ओए सारया नै कहुँ सूँ : जागदे रहो!"

### यीशु के खिलाफ षडयंत्र

(मत्ती 26:1-5; लूका 22:3-6; युहन्ना 11:45-53)

14 दो दिनां पाच्छै फसह अर अखमीरी रोटी का त्यौहार होण आळा था। प्रधान याजक अर शास्त्री इस बात की टाह म्ह थे के उस ताहीं

किस ढाळ कपट तै पकड़ कै मार देवै; 2 पर वे कहवै थे, "त्यौहार के दिन नीं, कदे इसा ना हो के माणसां म्ह रोळा माचै।"

### बैतनिय्याह म्ह यीशु का अभ्यंजन

(मत्ती 26:6-13; युहन्ना 12:1-8)

3 जिब्व ओ बैतनिय्याह म्ह शमोन कोढ़ी कै घरा भोजन खाण बैठ्या होया था, फेर एक लुगाई संगमरमर कै बासण म्ह जटामांसी का महंगा शुद्ध शैन्ट लेकै आई; अर बासण तोड़ कै शैन्ट ताहीं उसकै सिर पै पलटया। 4 पर कोए-कोए आपणे मन म्ह चीड़कै कहण लागे, "इस शैन्ट क्यातै सत्यानास करया गया? 5 क्यूँके यो शैन्ट तो तीन सो दीनार तै घणी कीमत पै बेच कै कंगालां म्ह बांडया जा सकै था।" अर उस ताहीं झिड़कण लागे। 6 यीशु नै कह्या, "उस ताहीं छोड़ घो; उसनै क्यातै काल करो सो? उसनै मेरे गेल्या भलाई करी सै। 7 कंगाल थारै गेल्या सारी हाण रहवें सैं, अर थम जिब्व चाहो जद उनतै भलाई कर सको सो; पर मै थारै गेल्या सारी हाण कोनी रहुँगा। 8 जो कीमे वा कर सकी, उसनै करया; उसनै मेरे गाड्डे जाण की त्यारी म्ह पहलए शैन्ट मेरी देही म्ह मळ्या सै। 9 मै थमनै साच्ची कहुँ सूँ के सारी दुनिया म्ह जित किते भी सुसमाचार प्रचार करया जावैगा, ओड़ै उसकै इस काम का जिक्रा भी उसकी याद म्ह करया जावैगा।"

### यहूदा का बिश्वासघात

(मत्ती 26:14-16; लूका 22:3-6)

10 फेर यहूदा इस्करियोती जो बारहा म्ह तै एक था, प्रधान याजका कै धोरै गया के उस ताहीं उनके हाथ पकड़वा देवै। 11 वे न्यू सुणके राजी होये, उस ताहीं रपिये देण खातर मानगें; अर ओ मौक्का टोहण लाग्या के उस ताहीं किस्से ढाळ पकड़वा दे। 12 अखमीरी रोटी कै त्यौहार के पहलड़े दिन, जिसम्ह वे फसह का बलिदान करै थे, उसके चेल्यां नै उसतै बुझ्या, "तू कित जाणा चाहवै सै के हम जाके तेरै खातर फसह खाण की त्यारी करा?" 13 उसनै आपणे चेल्यां म्ह तै दोवां ताहीं न्यू कहके खन्दाया, "नगर म्ह जाओ, अर एक माणस पाणी का पैण्डा ठाए होए थमनै मिलैगा, उसकै पाच्छै हो लियो; 14 अर ओ जिस घर म्ह जावै, उस घर के मालिक ताहीं कहणा, 'गुरु कहवै सै के मेरी बैठक जिसम्ह म्ह आपणे चेल्यां गेल्या फसह खाऊँ, कित सै?' 15 ओ थमनै एक सजे-धजे, अर त्यार करया होड़ बड्डा चुबारा दिखा देवैगा, ओड़ै म्हारै खातर त्यारी करो।" 16 चेले लिकड़के नगर म्ह आये, अर जिसा उसनै उनतै कहया था, उसाए पाया; अर फसह त्यार करया।

### चेलां के गेल्या फसह का अंतिम भोज

(मत्ती 26:17-25; लूका 22:7-14, 21-23; युहन्ना 13:21-30)

17 जिब्व साँझ होई, तो ओ बारहा के गेल्या आया। 18 जिब्व वे बेट्टे खाणा खावै थे, तो यीशु नै कह्या, "मै थमनै साच्ची कहुँ सूँ के थारै म्ह तै एक, जो मेरै गेल्या खाणा खाण लागरया सै, मन्त्रै पकड़वावैगा।" 19 उनपै उदासी छाग्यी अर वे एक-एक करके उसतै कहण लागे, "के ओ मै सूँ?" 20 उसनै उनतै कह्या, "ओ बारहां म्ह तै एक सै, जो मेरै गेल्या थाळी म्ह हाथ घालै सै। 21 क्यूँके माणस का बेट्टा तो, जिसा उसकै कारण लिख्या सै, जावै ए सै; पर उस माणस पै हाय जिसकै जरिये माणस का बेट्टा पकड़वाया जावै सै। जै उस माणस का जन्म ए नीं होंदा, तो उसकै खातर भला होंदा।"

### प्रभु-भोज

(मत्ती 26:26-30; लूका 22:14-20; 1 कुरिन्थियों 11:23-25)

22 जिब्व वे खाण ए लागरे थे, उसनै रोटी ली, अर आशीष माँगके तोड़ी, अर उन ताहीं दी, अर कह्या, "ल्यो, या मेरी देही सै।" 23 फेर उसनै कटोरा लेके धन्यवाद करया, अर उन ताहीं दिया; अर उन सारया नै उसम्ह तै पीया। 24 अर उसनै उनतै कह्या, "यो वाचा का मेरा ओ लहू सै, जो घणा ए खातर बहाया जावै सै। 25 थम नै साच्ची कहुँ सूँ के दाख का रस उस दिन

ताहीं दुबारा कदे नीं पिऊंगा, जिबब ताहीं पणमेशर का राज म्ह नया नीं पिऊंगा।" 26 फेर वे भजन गाके बाहरण जैतून के पहाड़ पै गए।

### पतरस के इंकार की भविष्यवाणी

(मत्ती 26:31-35; लूका 22:31-34; युहन्ना 13:36-38)

27 फेर यीशु नै उनतै कह्या, "थम सारे ठोकर खाओगे, क्यूँके लिख्या सै : 'मै रूखाले नै मारूंगा, अर भेड़ तितर-बितर हो जावैगी।' 28 पर मै आपणे जिन्दा उठण के बाद थारै तै पहल्या गलील जाऊंगा।" 29 पतरस नै उसतै कह्या, "जै सारे ठोकर खावै तो खावै, पर मै ठोकर कोनी खाऊंगा।" 30 यीशु नै उसतै कह्या, "मै तेरै तै साच्ची कहूँ सू ले आज ए इस्से रात मुर्गा के दो बर बांग देण तै पहल्या, तू तीन बर मेरै तै मुकरैगा।" 31 पर उसनै और भी दाब देके कह्या, "जै मन्ने तेरै गेल्या मरणा भी पड़े, तौभी मै तेरा इन्कार कदे कोनी करूँगा।" इस्से तरियां और सारया नै भी कहया।

### गतसमनी म्ह प्रार्थना

(मत्ती 26:36-46; लूका 22:39-46)

32 फेर वे गतसमनी नामक एक जंगहा म्ह आए, अर उसनै आपणे चेल्यां तै कह्या, "उरै बैठे रहो, जिबब ताहीं मै प्रार्थना करूँ।" 33 अर ओ पतरस अर याकूब अर युहन्ना ताहीं आपणे गेल्या ले गया; घणा ए काल अर दुखी होण लाग्या, 34 अर उनतै कह्या, "मेरा मन घणा उदास सै, उरै ताहीं के मै मरण पै सूँ : थम उरै ठहरो, अर जागदे रहो।" 35 फेर ओ माड़ा आगै सरकया अर धरती पै पड़के प्रार्थना करण लाग्या के जै हो सकै तो या घड़ी मेरै पै तै टळ जावै, 36 अर कह्या, "हे अब्बा, हे पिता, तू सारा कीमे करै सकै सै; इस कटोरे ताहीं मेरै धोरै तै हटा ले : तौभी जिसा मै चाहूँ सूँ उसा नीं, पर जो तू चाहवै सै ओये हो।" 37 फेर ओ आया अर उन ताहीं सोदे पाके पतरस तै कह्या, "हे शमोन, तू सोवै सै? के तू एक घड़ी भी कोनी जाग सकया? 38 जागदे रहो अर प्रार्थना करदे रहो के थम हिम्तान म्ह नीं पड़ो। आत्मा तो त्यार सै, पर देही कमजोर सै।" 39 अर ओ फेर चल्या गया अर उन्ने शब्दां म्ह प्रार्थना करी। 40 फेर आके उन ताहीं सोदे पाया, क्यूँके उनकी आँख नींद तै भरी थीं; अर कोनी जाणै थे के उसनै के जबाब देवै। 41 फेर तीसरी बर आके उनतै कह्या, "इब सोदे रहो अर आराम करो, बस, टेम आण पहोच्या; लखाओ, माणस का बेट्टा पापियाँ के हाथां पकड़वाया जावै सै।" 42 उठो, चाल्ला! लखाओ, मेरा पकड़वाण आळा लोवै आण पहोच्या सै।"

### यीशु का धोक्खे तै पकड़वाया जाणा

(मत्ती 26:47-56; लूका 22:47-53; युहन्ना 18:3-12)

43 ओ न्यू कहवै था के यहूदा जो बारहा म्ह तै एक था, आपणे गेल्या प्रधान याजकां अर शास्त्रियाँ अर पुरनियां की ओड़ तै एक बड्डी भीड़ लेके जिबबे आण पहोच्या, जो तलवार अर लाट्टी लेरी थे। 44 उसके पकड़वाण आळे नै उन ताहीं यो पता दिया था के जिस ताहीं मै चुम्पूँ ओए सै, उस ताहीं पकड़के दाऊ ढाळ ले जाणा। 45 ओ आया, अर जिबबे उसके धोरै जाके बोल्या, "हे रब्बी!" अर उस ताहीं घणा चुम्प्या। 46 फेर उन्ने उस पै हाथ गेरके उस ताहीं पकड़ लिया। 47 उन म्ह जो धोरै खड़े थे, एक नै तलवार खिचके महायाजक के नौकर पै चलाई, अर उसका कान उड़ा दिया। 48 यीशु नै उनतै बोल्या, "के थम डाकू सोच के मन्ने पकड़ण के खातर तलवार अर लाट्टी लेके लिकड़े सो? 49 मै तो हरेक दिन मन्दर म्ह थारै गेल्या रहके उपदेश दिया करूँ था, अर जिबब थमनै मेरै ताहीं कोनी पकड़या : पर न्यू ज्यांतै होया सै के पवित्र ग्रन्थ की बात पूरी होवै।" 50 इस पै सारे चेल्ले उसनै छोड़के भाजगे।

51 एक गाबरू आपणी उघाड़ी देही पै चादर ओढ़े होड़ उसके पाच्छे हो लिया; अर माणसां नै उस ताहीं पकड़या। 52 पर ओ चादर छोड़के उघाड़ा भाजया।

### महासभा के स्यामी यीशु

(मत्ती 26:57-68; लूका 22:54-55, 63-71; युहन्ना 18:13-14, 19-24)

53 फेर वे यीशु ताहीं महायाजक के धोरै लेगे; अर सारे प्रधान याजक अर पुरनिये अर शास्त्रीं उसके उरै कड़े होगे। 54 पतरस दूर ए दूर उसके पाच्छे-पाच्छे महायाजक के आँगन के भीत्तर ताहीं गया, अर चमच्या के गेल्या बैठ के आग पै सिकण लाग्या। 55 प्रधान याजक अर सारी बड्डी पंचायत यीशु ताहीं मारण के खातर उसके बिरोध म्ह गवाही की टोह म्ह थे, पर कोन्या मिली। 56 क्यूँके घण-खरे उसके बिरोध म्ह झूठी गवाही देवै थे, पर उनकी गवाही एक-सी कोनी थी। 57 फेर कीमे माणसां नै उठके उसके बिरोध म्ह या झूठी गवाही दी, 58 "हमनै इस ताहीं कहन्दे सुणया सै, 'मै इस हाथ के बनाए होड़ मन्दर नै गेर द्युगाँ, अर तीन दिन म्ह दूसरयां बणाऊंगा, जो हाथां तै नीं बणया हो।'" 59 इस पै भी उनकी गवाही एक-सी कोनी लिकड़ी।

60 फेर महायाजक नै बिचाळे खड़या होके यीशु तै बुझया, "तू कोए जबाब कोनी देंदा? ये माणस तेरै बिरोध म्ह के गवाही देवै सै?" 61 पर वो बोल-बाल्ला रहया, अर कीमे जबाब दिया। महायाजक नै उसतै दुबारा बुझया, "के तू उस परम धन्य का बेट्टा मसीह सै?" 62 यीशु नै कह्या, "मै सूँ : अर थम माणस के बेट्टे ताहीं सबतै ठाड़े की सोळी ओड़ बैठे, अर अकास के बादळां के गेल्या आंदे देखखोगे।" 63 फेर महायाजक नै आपणे लत्ते पाड़के कह्या, "इब हमनै गवाह की और के जरूत सै?" 64 थमनै या बुराई सुणी। थारी के राय सै?" उन सारया नै कहया के यो मारण के जोग्मा सै। 65 फेर कोए तो उसपै थूकण, अर कोए उसका मुँह ढक्कन नै, कोए उसके घुस्से मारण, अर उसतै कहण लागे, "भविष्यवाणी कर!" अर चम्मच्या नै उस ताहीं पकड़के रैप्ट मारे।

### पतरस का इंकार

(मत्ती 26:69-75; लूका 22:56-62; युहन्ना 18:15-18, 25-27)

66 जिबब पतरस तळै आँगन म्ह था, तो महायाजक की नौकराणियां म्ह तै एक उड़ै आई, 67 अर पतरस ताहीं आग सिक्दे देखके उस ताहीं गौर तै देख्या अर कहण लागी, "तू भी तो उस यीशु नासरी के गेल्या था।" 68 ओ मुकरग्या, अर बोल्या, "मै ना ए जाणदा अर ना ए समझूँ सूँ के तू के कहवै सै।" फेर ओ बाहरण देहळीया म्ह गया; अर मुर्गे नै बाँग दी। 69 वा नौकरणी उसनै देखके उनतै जो धोरै खड़े थे, दुबारा कहण लागी, "यो उनम्ह म्ह तै एक सै।" 70 पर ओ फेर मुकरग्या। माड़ी वार पाच्छे उन्ने जो धोरै खड़े थे फेर पतरस ताहीं कह्या, "पक्का तू उनम्ह तै एक सै; क्यूँके तू गलीली भी सै।" 71 फेर ओ धिक्कारण अर सूह खाण लाग्या, "मै उस माणस नै, जिसका थम जिक्रा करो सो, कोनी जाणदा।" 72 फेर जिबबे दूसरी बर मुर्गे नै बाँग दी। पतरस ताहीं वा बात जो यीशु नै उसतै कही थी याद आई : "मुर्गे के दो बर बाँग देण तै पहल्या तू तीन बर मेरा कारण नाटैगा।" अर ओ इस बात नै सोच के रोण लाग्या।

### पिलातुस के स्यामी यीशु

(मत्ती 27:1-2, 11-14; लूका 23:1-4; युहन्ना 18:28-38)

15 सबेरा होंदए जिबबे प्रधान याजकां, पुरनियां, अर शास्त्रियाँ नै बल्के सारी बड्डी पंचायत नै सलाह करके यीशु ताहीं बंधवाया, अर उस ताहीं ले जाके पिलातुस के हाथां म्ह सौप्या। 2 पिलातुस नै उसतै बुझया, "के तू यहूदियां का राजा सै?" उसनै उसताहीं जबाब दिया, "तू आपए कहवै सै।" 3 प्रधान याजक उस पै घणी बात्तां की दोष लावै थे। 4 पिलातुस नै उसतै फेर बुझया, "के तू कीमे जबाब कोनी देंदा, लखा, ये तेरै पै कितनी बात्तां की दोष लावै सै?" 5 यीशु नै फेर कीमे जबाब कोनी दिया; उरै ताहीं के पिलातुस नै घणी हैरानी होई।



### मृत्यु-दण्ड की आज्ञा

(मत्ती 27:15-26; लूका 23:13-25; युहन्ना 18:39, 19:16)

6 पिलातुस उस त्योंहार म्ह किसे एक कैदी नै जिसनै वे चाहवै थे, उनकै खातर छोड़ दिया करै था। 7 बरअब्बा नाम का एक माणस उन रोळे करणीयां गेल्या कैद था, जिन्नै रोळे म्ह खून करया था। 8 अर भीड़ ऊप्पर जाकै उसतै बिनती करण लागी, के जिसा तू म्हारै खातर करदा आया सै उससे तरियां कर। 9 पिलातुस नै उन ताहीं जबाब दिया, “के थम चाहवो सो के मै थारै खातर यहूदियां के राजै ताहीं छोड़ द्युँ?” 10 क्युँके ओ जाणै था के प्रधान याजका नै उसताहीं चाल तै पकड़वाया था। 11 पर प्रधान याजकां नै माणसां ताहीं उकसाया के ओ बरअब्बा नै ए उनकै खातर छोड़ दे। 12 न्यू सुण पिलातुस नै उनतै फेर बुझ्या, “तो जिसनै थम यहूदियां का राजा कहे सो, उसका मै के करुँ?” 13 वे फेर रुक्रे मारण लागे, “उसनै क्रूस पै चढ़ा द्यो!” 14 पिलातुस नै उनतै फेर कहा, “क्यातै इसम्ह के बुराई सै?” पर वे और भी रुक्रे मारण लागे, “उसनै क्रूस पै चढ़ा द्यो!” 15 फेर पिलातुस नै भीड़ ताहीं राजी करण की चाहना तै, बरअब्बा ताहीं उनकै खातर छोड़ दिया, अर यीशु नै कोरडे लुवाके सौप दिया के क्रूस पै चढ़ाया जावै।

### सैनिकां कै जरिये यीशु का अपमान

(मत्ती 27:27-31; युहन्ना 19:2-3)

16 सिपाही उस ताहीं कीलै कै भीत्तर कै आँगन म्ह ले गये जो प्रिटोरियुम कुहवावै सै, अर सारी पलटन ताहीं बुलया लाये। 17 फेर उन्नै उस ताहीं बैजनी लत्ते पिहराए अर काण्डयाँ का मुकट गूँथके उसकै सिर पै धरया, 18 अर न्यू कहके उस ताहीं नमस्कार करण लागे, “हे यहूदियां के राजा, नमस्कार!” 19 वे उसकै सिर पै सरकण्डे मारदे, अर उस पै थूकदे, अर गोड्डे टेक के उसनै प्रणाम करदे रहे। 20 जिब्व उन्नै उसका मखौल कर लिया, तो उस पै तै बैजनी लत्ते उतारके उससे के लत्ते पिहराए; अर फेर उसताहीं क्रूस पै चढ़ाण के खातर बाहरण ले गये।

### यीशु का क्रूस पै चढ़ाया जाणा

(मत्ती 27:32-44; लूका 23:26-43; युहन्ना 19:17-27)

21 सिकन्दर अर रूफुस का पिता शमौन, एक कुरेनी माणस, जो गाम तै आवै था ओडै तै लिकड़या; उन्नै उस ताहीं बेगार म्ह पकड़या के उसका क्रूस ठा लेवै। 22 वे यीशु ताहीं गुलगुता नामक जंगहा पै, जिसका मतलब खोपड़ी की जंगहा सै, लियाए। 23 ओडै उस ताहीं मुर्र मिल्या होड़ दाखरस देण लागे, पर उसनै कोनी लिया। 24 फेर उन्नै उसताहीं क्रूस पै चढ़ाया अर उसकै लत्तया पै पर्चीं गेरके, के किसनै के मिलै, उन्नै बांड लिये। 25 अर एक पहर दिन चढ़ आया था, जिब्व उन्नै उस ताहीं क्रूस पै चढ़ाया। 26 अर उसकी खोट-चिड़ी लिखके उसकै ऊप्पर लगा दिया के “यहूदियां का राजा”। 27 उन्नै उसकै गेल्या दो डाकू, एक उसकी सोळी अर एक उसकी ओळी ओड़ क्रूस पै चढ़ाए। 28 [फेर पवित्र ग्रन्थ का ओ बचन के ओ आपराधियां गेल्या गिणया गया, पूरा होया।] 29 अर राह जाण आळे सिर हल्ला-हल्लाके अर न्यू कहके उसकी बुराई करै थे, “वाह! मन्दर के गेरण आळे, अर तीन दिन म्ह बनाण आळे! 30 क्रूस पै तै ऊतर के आपणै आप नै बचा ले।” 31 इस्से तरियां याजक भी, शास्त्रियाँ सुदा, आपस म्ह मखौल करके कहवै थे, “इसनै औरां ताहीं बचाया, पर आपणै ताहीं कोनी बचा सकदा। 32 इस्राएल का राजा, मसीह, इब क्रूस पै तै ऊतर आवै के हम देखके विश्वास करया।” अर जो उसकै गेल्या क्रूस पै चढ़ाए गये थे, वे भी उसकी बुराई करै थे।

### यीशु का जी देणा

(मत्ती 27:45-56; लूका 23:44-49; युहन्ना 19:28-30)

33 दोफारी होण पै सारे देश म्ह अँधेरा छाग्या, अर तीसरै पहर ताहीं रहया। 34 तीसरै पहर यीशु नै बड्डे बोल तै रुक्रे मारके कहा, “इलोई, इलोई, लमा शबकनी?” जिसका मतलब यो सै, “हे मेरे पणमेशर, हे मेरे पणमेशर,

तन्नै मेरै ताहीं क्यातै छोड़ दिया?” 35 जो धोरै खड़े थे, उनम्ह तै कुछा नै न्यू सुणके कहा, “लखाओ, ओ एलिय्याह ताहीं रुक्रे मारै सै।” 36 अर एक नै भाजके स्पंज(स्याही चूस) ताहीं सिरके म्ह डुबोया, अर सरकण्डे पै धरके उस ताहीं चुसाया अर कहा, “ठहर जाओ, देकरां, एलिय्याह उस ताहीं ऊतारण खातर आवै सै के नीं।” 37 फेर यीशु नै बड्डे बोल तै किल्की मारके जी दे दिया। 38 अर मन्दर का पड़वा ऊप्पर तै तळैताहीं पाटके दो टुकड़यां म्ह होग्या। 39 जो सूबेदार उसके श्यामी खड़या था, जिब्व उस ताहीं इस ढाळ किल्की मारके जी देन्दे देख्या, तो उसनै कहा, “साच्चए यो माणस, पणमेशर का बेटा था!”

40 कई लुगाई भी दर तै देकरै थीं : उनम्ह मरियम मगदलीनी, छोडै याकूब अर योसेस की माँ मरियम, अर सलोमी थीं। 41 जिब्व ओ गलील म्ह था तो ये उसके पाच्छै हो लेवै थीं अर उसकी सेवा-बाड़ी करया करै थीं; अर दुसरी घणीए लुगाई भी थीं, जो उसके गेल्या यरुशलैम तै आई थीं।

### यीशु का गाड्या जाणा

(मत्ती 27:57-61; लूका 23:50-56; युहन्ना 19:38-42)

42 जिब्व साँझ होई तो ज्यातै के त्यारी का दिन था, जो सब्त के एक दिन पहल्या होवै सै, 43 अरिमतिया का बासिन्दा युसूफ आया, जो बड्डी पंचायत का मौजिज माणस था अर खुद भी पणमेशर के राज की बाट देकरै था। ओ डेट करके पिलातुस के धोरै गया अर यीशु की लाश माँगी। 44 पिलातुस नै हैरानी होई के ओ इतनी तोळी मरग्या; उसनै सूबेदार ताहीं बुलाके बुझ्या, “के उस ताहीं मरे होये वार होई?” 45 जिब्व उसनै सूबेदार के जरिये हालत जाण ली, तो लाश युसूफ ताहीं दुवा दी। 46 फेर उसनै मलमल की एक चादर मोल ली, अर लाश ताहीं उतारके उस चादर म्ह लपेटा, अर एक कब्र म्ह जो चढ़ान म्ह खोद राखी थी धरया, अर कब्र के दरवाजे पै एक पत्थर गिरड़ा दिया। 47 मरियम मगदलीनी अर योसेस की माँ मरियम देकरै थी के ओ कित धरया गया सै।

### यीशु का पुनरुत्थान

(मत्ती 28:1-8; लूका 24:1-12; युहन्ना 20:1-10)

16 जिब्व सब्त का दिन बीतग्या, तो मरियम मगदलीनी, अर याकूब की माँ मरियम, अर सलोमी नै खसबूदार चीज मोल लीं, के आके उस पै मळै। 2 हफते के पहलडे दिन तड़कए तड़के सूरज लिकड़ाए था, वे कब्र पै आई, 3 अर आपस म्ह कहवै थीं, “म्हारै खातर कब्र के दरवाजे पै तै पत्थर कौण गिरड़ावैगा?” 4 जिब्व उन्नै निगांह करी, तो देख्या के पत्थर गिरड़ाया होया सै— यो घणाये बड्डा था। 5 कब्र के भीत्तर जाके उन्नै एक गाबरू ताहीं धोळे लत्ते पहरे होड़ सोळी ओड़ बैडे देख्या, अर घणी हैरान होई। 6 उसनै उनतै कहा, “हैरान मतना होवो, थम यीशु नासरी नै, जो क्रूस पै चढ़ाया गया था, टोहो सो। ओ जिन्दा होग्या सै, उरै कोनी सै; लखाओ, याए वा जंगहा सै, जित उन्नै उस ताहीं धरया था। 7 पर थम जाओ, अर उसके चेल्यां अर पतरस नै कहो के ओ थारै तै पहल्या गलील नै जावैगा। जिसा उसनै थारै तै कहाया था, थम ओड़ए उसनै देखोगे।” 8 अर वे लिकड़के कब्र तै भाजग्या; क्युँके वे काँबगी अर उनके घबराट होगी थी; अर उन्नै किसे तै कीमे नीं कहाया, क्युँके वे डरै थीं।

### मरियम मगदलीनी नै यीशु का दिखणा

(मत्ती 28:9-10; युहन्ना 20:11-18)

9 हफते के पहलडे दिन तड़का होँदए ओ जिन्दा होके पहलम-पहल्या मरियम मगदलीनी ताहीं जिसम्ह तै उसनै सात भूँडी औपरी आत्मां काड्डी थीं, दिख्या। 10 उसनै जाके यीशु के ढब्बियाँ ताहीं जो दुःख म्ह डूबरे थे अर रोवै थे, समाचार दिया। 11 उन्नै न्यू सुणके के ओ जिन्दा सै अर उसनै उस ताहीं देख्या सै, विश्वास कोनी करया।

### दो चेल्यां नै यीशु का दिखणा

(लूका 24:13-35)

12 इसकै बाद ओ दुसरै रूप म्ह उनम्ह तै दोयां ताहीं जिब्ब वे गाम कात्री जावै थे, दिख्या | 13 उन्नै भी जाकै दुसरया ताहीं खबर दी, पर उन्नै उनका भी बिश्वास कोनी करया |

### ग्यारहां नै यीशु का दिखणा

(मत्ती 28:16-20; लूका 24:36-49; युहन्ना 20:19-23; प्रेरितां 1:6-8)

14 पिच्छै ओ उन ग्यारहां ताहीं भी, जिब्ब वे खाणा खाण बैट्टे थे दिख्या, अर उनकै अबिश्वास अर मन कै करडैपण पै उलाहणा दिया, कयूँके जिन्नै उसकै जिन्दा होण कै पाच्छै उस ताहीं देख्या था, इन्नै उनका बिश्वास कोनी करया था | 15 अर उसनै उनतै कह्या, “थम सारी दुनिया म्ह जाकै सारी सृष्टि

के माणसां ताहीं सुसमाचार प्रचार करो | 16 जो बिश्वास करै अर बपतिस्मा लेवै उस्से का उद्धार होवैगा, पर जो बिश्वास कोनी करैगा ओ दोषी ठहराया जावैगा; 17 बिश्वास करण आळ्यां म्ह या निशात्री होवैगी के वे मेरै नाम तै औपरी आत्मायाँ नै काडुँगें, नई-नई बोली बोलैंगें, 18 साँप नै ठा लेवैंगें, अर जै वे जहर भी पी जावै फेरभी उनका कीमे नीं बिगडैगा; वे बिमारां पै हाथ धरैंगें, अर वे चंगे हो जावैंगें |”

### यीशु का सुर्ग म्ह जाणा

(लूका 24:50-53; प्रेरितां 1:9-11)

19 प्रभु यीशु उनतै बात करण कै पाच्छै सुर्ग पै ठा लिया गया, अर पणमेशर कै सोळी ओड़ बैठग्या | 20 अर उन्नै लिकडकै हरेक जंगहा प्रचार करया, अर प्रभु उनकै गेल्या काम करदा रहया, अर उन निशानियाँ कै जरिये जो गेल-गेल होवै थी, बचन ताहीं पक्का करदा रहया |

# लूका

## परिचय

1 ज्यांतें के घणखरयां नै उन बात्तां का जो म्हारें बिचाळें घटी सैं, इतिहास लिखण म्ह मेहनत करी सैं, 2 जिसा कें उन्नै जो पहल्याए तै इन बात्तां नै देखण आळे अर वचन के माणन आळे थे, ये सारी बात म्हारें ताहीं पूह्चायी। 3 हे जनाब थियुफिलुस, इस करकें, मन्नै भी यो सई लाग्या के उन सारी बात्तां का सारा हाल सरु तै आच्छी दाहूं परख कें, उन्नै नै तेरें खात्तर लंगपतार म्ह लिखूं 4 के तू या जाण ले के वो बात जिनकी तन्नै शिक्षा पाई सैं वो किसी पक्की सैं।

## यहूजा के जन्म की घोषणा

5 यहूदिया कें राजा हेरोदेस कें बख्त म्ह अबिय्याह कें टोळ म्ह जकरयाह नाम का एक याजक था, अर उसकी घरआळी हारुन की पीढी की थी जिसका नाम एलीशिबा था। 6 वे दोन्नू पणमेशर कें स्याम्ही धर्मी थे, अर प्रभु कें सारे हुक्म अर नियमां पै बैखोट चालण आळे थे। 7 उनकें कोए भी ऊलाद कोनी थी, क्यूँके इलीशिबा बाँझ थी, अर वे दोन्नू ए बूढे थे।

8 जिब्व ओ आपणे टोळ की बारी पै पणमेशर कें स्याम्ही याजक का काम करै था, 9 तो याजकां की रीत कें मुताबिक उसकें नाम की चिड्डी लिकडी के प्रभु कें मंदर म्ह जाके धूप जळावै। 10 धूप जळाण कें बख्त आदमियां की सारी टोळी बाहरणे प्रार्थना करै थीं। 11 उस बख्त प्रभु का एक सुर्गदूत धूप की मंडही कें सोळी ओड खड्या दिख्या। 12 जकरयाह देख कें घबरा ग्या अर घणा डर ग्या। 13 पर सुर्गदूत उसतै बोल्या, "हे जकरयाह, डरै ना, क्यूँके तेरी प्रार्थना सुणली सैं; अर तेरी घरआळी इलीशिबा तै तेरें खात्तर एक बेट्टा जाम्मैगी, अर तू उसका नाम यहूजा धरिये। 14 तेरें खुशी अर ठाठ होंगे: अर घणै ए माणस उसकें जन्म कें कारण राज्जी होंगे, 15 क्यूँके वो प्रभु कें स्याम्ही घणा महान् होगा; अर अंगूर का रस अर दारु कदे भी ना पीवैगा; अर अपनी माँ की कुख तैए पवित्र आत्मा तै भर ज्यागा; 16 अर इस्रएलियो म्ह तै घणाए नै प्रभु पणमेशर की ओड मोड देवैगा। 17 वो एलियाह नबी की तरियां सामर्थ्य म्ह होकें उसकें आगै-आगै चालैगा के पित्तरां/ पिता का मन बाळकां की ओड मोड देवैगा; अर हुक्म ना मानण आळे नै धर्मियां की समझ पै लावैगा; अर प्रभु कें खात्तर एक काबिल प्रजा त्यार करै।"

18 जकरयाह नै सुर्गदूत तै बुझया, "यो मै किस तरियां मान्नु? क्यूँके मै तो बुढा सूं; अर मेरी घरआळी भी बूढी होरी सै।" 19 सुर्गदूत नै उसतै जबाब दिया, "मै जिब्राईल सूं जो पणमेशर कें आगै खड्या रहू सूं; अर मै तेरें तै बात करण अर सुसमाचार देण खात्तर खन्दाया सूं। 20 देख्ये जिब्व ताहीं ये बात पूरी ना हो लेगी, तू गूंगा रहैगा अर बोल नीं पावैगा इस खात्तर कें तन्नै मेरी बात्तां का जो आपणें टैम पै पूरी होंगी, बिश्वास नीं करया।" 21 माणस जकरयाह की बाट देखतें रह्ये अर अचम्भा करण लाग्ये कें उसणें मंदर म्ह इतनी वार क्यूँ लाग्यी। 22 जिब्व वो बाहर आया, तो उन ताहीं बोल नीं पाया: आखर वो जाण्ये कें उसणें मंदर म्ह कोई दर्शन पाया सैं; अर वो उन ताहीं इशारे करता रह्या, अर गूंगा हो ग्या। 23 जिब्व उसकी सेवा कें दिन पुरे होए, तो ओ अपनै घरां चला ग्या।

24 इन दिनां कें पाछें उसकी घरआली एलीशिबा गर्भवती होग्यी; अर पाँच महीने तैई अपनै आप नै या कह कें ल्हकोए राख्या, 25 के माणसां म्ह मेरा अपमान दूर करण खात्तर, प्रभु नै इन दिनां म्ह दया की मेहर करकें मेरें खात्तर इसा करया सैं।

## यीशु के जन्म की घोषणा

26 एलीशिबा के छठे महीने म्ह पणमेशर की ओड तै जिब्राईल सुर्गदूत, गलील देश कें नासरत नगर म्ह, 27 एक कुँवारी कें धोरें खन्दाया जिसकी सगाई युसूफ नाम कें दाऊद कें घराने कें एक माणस तै होई थी; उस कुँवारी का नाम मरियम था। 28 सुर्गदूत नै उसके धोरें भीत्तर आकें कह्या, आनन्द अर जय जयकार तेरी हो तेरें पै ईश्वर का अनुग्रह होया सै! प्रभु तेरें गेल्या सैं! 29 वा उस वचन/बोल तै घबरा ग्यी, अर सोचण लाग्यी कें यो किस तरीह का अभिवादन सैं? 30 सुर्गदूत नै उसतै कह्या, "हे मरियम, डरै ना, क्यूँके पणमेशर का अनुग्रह तेरें पै होया सै। 31 अर देख, तू गर्भवती होगी, अर तेरें एक छोरा पैदा होगा; तू उसका नाम यीशु धरिये। 32 वो महान् होगा अर परमप्रधान का बेट्टा कहवावैगा; अर प्रभु पणमेशर उसकें पिता दाऊद का सिंहासन उसनै देवैगा, 33 अर वो इस्राइल कें घराने पै सदा राज करैगा; अर उसकें राज्य का अंत नीं होगा। 34 मरियम नै सुर्गदूत तै कह्या, "यो किस तरियां होगा। मै तो किसे माणस नै जानुए कोनी।" 35 सुर्गदूत नै उस ताहीं जबाब दिया, "पवित्र आत्मा तेरें पै उतरगी अर परमप्रधान की सामर्थ्य तेरें पै छाया करैगी; इस खात्तर वो जो बच्चा पैदा होण आळा पवित्र सैं, पणमेशर का बेट्टा कहवावैगा। 36 अर देख, तेरी रिश्तेदार जो एलीशिबा सैं उसकें भी बुढापे म्ह बेट्टा होण आळा सैं, जो बाँझ कहवावै थी यो उसका, छटा महिन्ना सैं। 37 क्यूँके जो वचन पणमेशर की ओड तै होवें सैं वो बेअसर नीं होंदा।" 38 मरियम नै कह्या, देख, मै प्रभु की दासी सूं, मेरें तेरें कहैए वचन कें मुताबिक हो।" फेर सुर्गदूत उसके धोरें तै चल्या ग्या।

## मरियम का इलीशिबा तै फेटण जाणा

39 उन दिनां म्ह मरियम उठकें ताव्ली सी पहाडी देश म्ह यहूदा कें नगर म्ह ग्यी, 40 अर जकरयाह कें घर म्ह जाके इलीशिबा ताहीं नमस्कार करया। 41 ज्योए इलीशिबा नै मरियम का नमस्कार सुण्य, त्योए बाळक उसके पेट म्ह उछल्या, अर इलीशिबा पवित्र आत्मा तै भरगी। 42 अर उसनै ऊच्चे वचन म्ह बोल कें कह्या, "तू लुगाईया म्ह धन्य सैं, अर तेरी कोख का फल धन्य सैं! 43 यो अनुग्रह मेरें पै कित्त तै होया कें प्रभु की माँ मेरें धोरें आई? 44 देख, ज्यो ए तेरें नमस्कार का बोल मेरें कान्नां म्ह पड्या, त्यो ए बाळक मेरें पेट म्ह खुशी तै उछल पड्या। 45 धन्य सैं वो जिसनै बिश्वास करया कें जो बातें प्रभु की ओड तै उस ताहीं कही गयी, वे पूरी होंगी!"

## मरियम का स्तुति गान

46 फेर मरियम नै कह्या, "मेरा मन प्रभु की बड़ाई करै सैं 47 अर मेरी आत्मा मेरें उध्दार करण आळे पणमेशर तै खुश होई, 48 क्यूँके उसनै अपनी दासी की लाचारी पै निगांह करी सैं; इस खात्तर देख्यो, इब तै सारे युग-युग कें माणस मेनै धन्य कहवैगे, 49 क्यूँके उस ठाड्डे नै मेरें खात्तर बड्डे-बड्डे काम करै सैं। उसका नाम पवित्र सैं, 50 अर उसकी दया उण पै, जो उसतै डरै सैं, पीढी तै पीढी बणी रहवें सैं। 51 उसनै अपनै बाजुआ की ताकत दिखाई, अर जो अपने-आप नै बड्डा समझें थे, उन ताहीं तितर-बितर कर दिया। 52 उसनै ठाड्ड्यां ताहीं उनकें सिंहासनां पै तै गिरा दिया; अर लाचारां ताहीं ऊँचा उठा दिया। 53 उसनै भूख्या ताहीं बढिया चीजां तै धपाया सैं, अर साहूकारां ताहीं खाली हाथ लिकाड दिया सैं। 54 उसनै अपनै सेवक इस्राएल ताहीं सम्भाल लिया, कें अपनी उस दया नै याद करै, 55 जो अब्राहम अर उसकी पीढी पै

सदा बणी रहगी, जिसां उसनै म्हारै बाप दादयां तै कह्या था । 56 मरियम करीब तीन महीने उसकै गैल्या रहकै उलटी अपनै घरा चली गी।

### यूहन्ना बपतिस्मा देण आळे का जन्म

57 फेर इलीशिबा कै दिन पुरे होए अर उसनै बेड़ा जाग्या । 58 उसके पड़ोसी अर रिश्तेदारों नै या सुणकै के प्रभु नै उसपै बड़ी दया करी सै, उसकै गैल्या खुशी मनाई, 59 अर इसा होया कै आठवे दिन वे बाळक का खतना करण ताहीं आये अर उसका नाम उसकै पिता के नाम पै जकरयाह धरण लाग्ये। 60 इस पर उसकी माँ नै जबाब दिया, “ना; इसका नाम यूहन्ना धरया जावै । 61 “उन्नै उस ताहीं कह्या, “तेरै रिश्तेदारा म्ह किसे का या नाम नी सै!” 62 फेर उसकै पिता तै इशारा करकै पुच्छ्या कै तू उसका नाम कै धरना चाहवै सै? 63 उसनै लिखण की पट्टी पै लिख दिया, उसका नाम यूहन्ना सै,” अर सारा नै अचम्भा होया । 64 फेर उसका मुँह अर जिभ जिबबे खुली; अर वो बोलण अर पणमेशर का धन्यवाद करण लाग्या । 65 उसके लोवे-धोरै कै सब रहण आळे डरगे; अर उन सारी बात्तां की चर्चा यहूदिया कै सारे पहाड़ी देश म्ह फैलगी, 66 अर सब सुणण आळ्यां नै अपनै-अपनै मन म्ह विचार करकै कह्या, “यो बाळक किसा होगा ?” क्यूँके प्रभु का हाथ उसकै गैल्या था।

### जकरयाह का स्तुति-गान

67 उसका पिता जकरयाह पवित्रआत्मा तै भर ग्या, अर भविश्यवाणी करण लाग्या : 68 “प्रभु इस्राएल का पणमेशर धन्य सै, क्यूँके उसनै अपनै माणसां पै निंगाह करी अर उनका छुटकारा किया, 69 अर अपनै दास दाऊद कै घराने म्ह म्हारै खात्तर एक उध्दार का एक सींग काड्या सै, 70 (जिसा उसनै अपनै पवित्र भविष्यावक्ता कै जरिये जो जगत कै शुरु तै होदे आये सै, कह्या था,) 71 बल्के म्हारै दुश्मनां तै अर म्हारै सब बैरियां कै हाथां तै म्हारा उध्दार करया, 72 कै म्हारै बाप दादयां पै दया कर कै अपनी पवित्र वाचा नै याद करै, 73 अर वो कसम जो उसनै म्हारै पिता अब्राहम तै खाई थी, 74 कै वो हमनै यो देवैगा कै हम अपनै दुश्मनां कै हाथ तै छुठ कै, 75 उसकै आग्ये पवित्रता अर धार्मिकता तै जिन्दगी भर बिना डरै उसकी सेवा करते रह्यां। 76 अर तू हे बाळक, परमप्रधान का भविष्यावक्ता कहवावै, क्यूँके तू प्रभु का रास्ता त्यार करण कै खात्तर आगै-आगै चाल्येगा, 77 कै उसकै माणसां कै उध्दार का ज्ञान दे, जो उसकै पापां की माफ़ी तै मिलै सै । 78 यो म्हारै पणमेशर की उस्से बड़ी दया तै होगा; जिसकै कारण ऊप्पर तै म्हारै पै सबेर का चाँदणा उगै सै, 79 कै अन्धेरे अर माँत की छाया म्ह बैठण आळ्यां नै रोशनी दे, अर म्हारै पैरां नै आच्छे रास्ता पै सीधे चलावै ।” 80 अर वो बाळक बढ़ा अर आत्मा म्ह ठाड्डा होन्दा ग्या, अर इस्राएल पै प्रकट होण कै दिन ताहीं जंगलां म्ह रह्या।

### यीशु का जन्म

(मत्ती 1:18-25)

2 उन दिनां म्ह औगुस्तुस कैसर की कात्री तै हुक्म लिक्ड्या के, उसके सारे राज्य कै माणसां गिणती करकै उनके नाम लिक्खे जावै। 2 या पहली नाम लिखाई उस टैम होई, जिब किवरिनियुस सीरिया कै इलाकै का हाकिम था। 3 सारे माणस नाम लिखाण कै खात्तर आपणे-आपणे नगर म्ह गए। 4 आखर युसूफ भी इस करकै के ओ दाऊद कै कुन्बै अर पीढी का था, गलील कै नगर तै यहूदिया म्ह दाऊद कै नगर बैतलहम नै गया, 5 के आपणी मंगेतर मरियम कै गेल्या जो पेट तै थी, उस गिणती म्ह नाम लिखवाए। 6 उनकै ओड़ै रहन्दे होए उसके जाम्मण के दिन पुरे होए, 7 अर उसनै आपणा जेड्डा छोरा जाम्मया अर उसताहीं लत्ते म्ह लपेटके खोर म्ह धरया; क्यूँके उनकै खात्तर सराये म्ह जंगहा कोनी थी, इसकरकै के शहर म्ह माणसां की उस टैम घणी-ए भीड़ होरी थी।

### सुर्गदुत्तां द्वारा चरवाहां ताहीं संदेश

8 अर उस देश म्ह कितने पाळी थे, जो रात नै मदानां म्ह रहकै आपणी भेड्डा के टोळ की रुखाळ करै थे। 9 अर उस्से रात नै प्रभु का एक दूत उसकै धोरै आण खड्या होया, अर प्रभु का प्रताप उसकै चौगरदे नै चमक्या, अर वे घणे डरगे। 10 सुर्गदुत नै उनतै कह्या, “मतना डरो; क्यूँके लखाओ, मै थमनै घणी खुशी की खबर सूनाऊँ सूँ जो सारे माणसां खातर होगी, 11 के आज दाऊद कै नगर म्ह थारै खातर एक उध्दारकर्ता जाग्या सै, अर योए मसीह प्रभु सै। 12 अर इसकी थारै खातर या निशान्नी सै के थम एक बाळक नै लत्ते म्ह लिपट्या होड अर खोर म्ह पड्या होड पाओगे।” 13 फेर चाणचक उस सुर्गदुत गेल्या सुर्गदुत्तां का टोळ पणमेशर की भगति करदे होए अर न्यू कहदें दिख्या, 14 अकास म्ह पणमेशर की महिमा अर धरती पै उन माणसां म्ह जिनतै ओ राजी सै, शान्ति होवै।”

15 जिबब सुर्गदुत उसकै धोरै तै सुर्ग नै चले गए, तो पाळीयां नै आपस म्ह कह्या, “आओ, हम बैतलहम जाकै देख्यां, या बात जो होई सै, अर जो प्रभु नै म्हारैताहीं बताई सै।” 16 अर उन्नै जिबब जाकै मरियम अर युसूफ ताहीं अर खोर म्ह उस बाळक ताहीं पड्या देख्या। 17 इन्नै देखकै उन्नै वा बात जो इस बाळक कै बाबत उनतै कही थी, बताई। 18 अर सारे सुणणआळ्यां नै उन बात्तां तै जो पाळीयां नै उनतै कहीं अचम्भा करया। 19 पर मरियम ये बात आपणे दिल म्ह धरकै सोचदी रई। 20 अर पाळी जिसा उनतै कह्या था, उस्साए सारा सुणकै अर देखकै पणमेशर की महिमा अर जय-जयकार करदे होए बोहडगे।

### यीशु का नामकरण

21 जिबब आठ दिन पुरे होए अर उसकै खतने का टैम आया, तो उसका नाम यीशु धरया गया, जो सुर्गदुत नै उसकै पेट म्ह आण तै पहल्या कह्या था।

### मंदर म्ह यीशु का अर्पण

22 जिबब मूसा कै व्यवस्था कै मुताबिक उनके सूँचे होण के दिन पुरे होए, तो वे उसनै यरुशलम म्ह लेगे के प्रभु कै स्याम्ही ल्याए, 23 (जिसा के प्रभु के व्यवस्था म्ह लिख्या होड सै : हरेक जेड्डा या पहलडा प्रभु कै खातर पवित्र ठहरैगा।) 24 अर प्रभु कै व्यवस्था कै बचन कै मुताबिक : “पंडूका का एक जोड़ा, या कबूतर कै दो बच्चे” ल्याकै बली करै।

### शमौन का गीत

25 यरुशलम म्ह शमौन नामका एक माणस था, अर ओ माणस धर्मी अर भगत था; अर इसराएल की शान्ति की बाट देखण लागरया था, अर पवित्र आत्मा उस पै था। 26 अर पवित्रआत्मा के जरिये उस पै प्रगट होया था के जिबब ताहीं वो प्रभु के मसीह नै देख नी लेगा, जद ताहीं मौत नै कोनी देखेगा। 27 ओ आत्मा कै सिखाण तै मन्दर म्ह आया; अर जिबब माँ-बाप उस बाळक यीशु ताहीं भीत्तर ल्याए, के उसकै खातर व्यवस्था के रिवाज कै मुताबिक करै, 28 फेर उसनै उसताहीं आपणी गोद्री म्ह लिया अर पणमेशर का धन्यवाद करकै कह्या: 29 “हे मालिक, इब तू आपणे दास नै आपणे बचन कै मुताबिक शान्ति तै बिदा करै सै, 30 क्यूँके मेरी आँखां नै तेरै उध्दार ताहीं देख लिया सै, 31 जिस ताहीं तन्नै सारे देशां के माणसां कै स्याम्ही त्यार करया सै, 32 के ओ दूसरी जात्तां ताहीं चाँदणा देण कै खातर उजाळा, अर तेरे आपणे माणस इस्राएल की महिमा हो।”

33 उसका बाप अर उसकी माँ इन बात्तां तै जो उसकै बाबत कही जावै थी, अचम्भा करै थे। 34 फेर शमौन नै उनताहीं आशीवाद देकै, उसकी माँ मरियम तै कह्या, “देख, वो तो इस्राएल म्ह घणा खातर पडण, अर उड्डण कै खातर, अर एक इसी निशान्नी होण खातर ठहराया सै, जिसकै बिरोध म्ह बात करी जावैगी 35 बल्के तेरा जी भी तलवार तै आरम-पार चिर जावैगा -- इसतै घणे मनां के बिचार प्रगट होज्यांगे।”

### हन्ना की गवाही

36 आशेर के गोत म्ह तै हन्ना नामक फनूएल की बेटी एक नब्बी थी। वा घणी बूढी थी, अर ब्याह होण के पाछे सात साल आपणे घणी के गेल्या रहण पाई थी। 37 वा चौरासी साल तै बिधवा थी: अर मन्दर नै कोनी छोड्या करै थी, पर ब्रत अर प्रार्थना कर-करके रात-दिन भगति करया करै थी। 38 अर वा उस बखत उडै आके प्रभु का धन्यवाद करण लागी, अर उन सारया तै, जो यरुशलेम के छुटकारे की बाट देखै थे, उस बाळक के बाबत बात करण लागी।

### नास्रत नै वापस लौटना

39 जिब्व वे प्रभु के व्यवस्था के मुताबिक सारा कीमे पूरा कर चुके तो गलील म्ह आपणे नगर नासरत नै दुबारा चले गए। 40 अर बाळक बढ़दा, अर ठाड्डा होन्दा, अर अक्ल तै भरया-पूरा होन्दा गया; अर पणमेशर का अनुग्रह उस पै था।

### बाळक यीशु मंदर म्ह

41 उसके माँ-बाप हरेक साल फसह के त्यौहार म्ह यरुशलेम जाया करै थी। 42 जिब्व यीशु बारहा साल का होया, तो वे त्यौहार की रित के मुताबिक यरुशलेम नै गए। 43 जिब्व वे उन दिनां नै पुगा के बोहड़ण लागे, तो बाळक यीशु यरुशलेम म्ह रहया; अर इसका उसके माँ-बाप नै कोनी बेरा था। 44 वे न्यू समझ के के ओ दुसरे मुसाफिरां के गेल्या होगा, एक दिन का सफर पार करगे: अर उसताही आपणे कुन्बे आळ्यां म्ह अर जाण-पिच्छाण आळ्यां म्ह टोहण लागे। 45 पर जिब्व कोनी मिल्या, टोन्दे-टोन्दे यरुशलेम नै दुबारे बोहड़गे, 46 अर तीन दिन के पाछे उन्नै ओ मन्दर म्ह उपदेशकां के बिचाळै बैडे, उनकी सुणदे अर उनतै सवाल बुझते पाया। 47 जितने उसकी सुणै थे, वे सारे उसकी समझ अर उसके जबाबा तै हैरान थे। 48 फेर वे उसताही देखके हैरान होए अर उसकी माँ नै उसतै कहया, “हे बेडे, तन्नै म्हारै गेल्या इसा बिवार क्यातै करया?” लखा, तेरा बाप अर मै तन्नै कांल होन्दे तन्नै टोहवां थे?” 49 उसनै उनतै कह्या, “थम मन्नै क्यातै टोहवो सो?” कोनी बेरा के मन्नै मेरे बाप के घरा होणा जरूरी सै?” 50 पर जो बात उसनै उनतै कही, उन्नै कोनी समझया। 51 फेर ओ उनके गेल्या गया, अर नासरत म्ह आया, अर उनके बस म्ह रह्या; अर उसकी माँ नै ये सारी बात आपणे मन म्ह राखी। 52 अर यीशु समझ अर डील-डोल म्ह, अर पणमेशर अर माणसां के अनुग्रह म्ह बढ़दा गया।

### यूहन्ना बपतिस्मा देणआळे का संदेश

(मत्ती 3:1-12; मरकुस 1:1-8; यूहन्ना 1:19-28)

3 तिबिरियुस कैसर के राज्य के पंद्रहवें साल म्ह जिब्व पुन्तियुस पीलातुस यहूदिया का हाकिम था, अर गलील म्ह हेरोदेस नाम चौथाई का इतुरैया अर त्रखोनितिस म्ह उसका भाई फिलिप्पुस, अर अबिलेने म्ह लिसनियास, चौथाई के राजा थे, 2 अर जिब्व हन्ना अर कैफा महायाजक थे, उस बखत पणमेशर का बचन बण म्ह जकरयाह के बेडे यूहन्ना के धोरै पहांच्या। 3 ओ यरदन के ओरै-धोरै के साबते परदेश म्ह जाके, पापां नै बखसण खातर मन पलटण का बपतिस्मा का प्रचार करण लागया। 4 जिसा यशायाह नब्बी के कहे होए बचनां की किताब म्ह लिख्या सै: “बण म्ह एक रुक्के मारणीये का बचन होरया सै के, ‘प्रभु की राही त्यार करो, उसकी सडक सीधी बणाओ। 5 हरेक घाटी भर दी जावैगी, अर हरेक पहाड़ अर टिला तळै करया जावैगा; अर जो टेढा सै सीधा, अर जो ऊँचा निचा सै ओ चौरस राह बणैगा। 6 अर हरेक जीव पणमेशर के उद्धार नै देखैगा।”

7 जो भीड़ की भीड़ उसतै बपतिस्मा लेण नै लिकड के आवै थी, उनतै ओ कहवै था, “हे साँप के बच्चो, थारै तै कौण बताग्या के आण आळै छो तै भाजो। 8 आखर मन पलटके लायक फळ ल्याओ, अर आपणे-आपणे मन म्ह न्यू मतना सोचो के म्हारा बाप अब्राहम सै; क्यूँके मे थमनै कहुँ सूँके पणमेशर इन पत्थरां तै अब्राहम के खातर उल्लाद पैदा कर सकै सै। 9 इब कुहाड़ा

दरखतां की जड़ पै धरया सै, इसकरके जो-जो दरखत बढ़िया फळ नीं ल्यांदा, ओ काट्या अर आग म्ह झोक्या जावैगा। 10 फेर माणसां नै उसतै बुझया, “तो हम के करां?” 11 उसनै जबाब दिया, “जिसके धोरै दो कुरते हों, ओ उसके गेल्या जिसके धोरै नीं सै उसके गेल बांड ल्यो अर जिसके धोरै खाणा हो, ओ भी न्यूए करै।” 12 महसूल लेण आळे भी बपतिस्मा लेण आए, अर उसतै बुझया, “हे गुरु, हम के करां?” 13 उसनै उनतै कह्या, “जो थारै खातर ठहरा राख्या सै, उस तै घणा नीं लेणा।” 14 सिपाहियां नै भी उसतै बुझया, “हम के करां?” उसनै उनतै कह्या, “किसे पै जुल्म नीं करणा, अर ना झूठी तोहमन्द लाणा, अर आपणी तन्खा पै संतोष करणा।”

15 जिब्व माणस आस लाए होए थे, अर सारे आपणे-आपणे मन म्ह यूहन्ना के बाबत बिचार कररे थे के योए मसीह तो नीं सै, 16 तो यूहन्ना नै उस सारया तै कह्या, “मै तो थमनै पाणी तै बपतिस्मा हूँ सूँ, पर ओ आण आळा सै, जो मेरै तै घणा ठाड्डा सै, मै तो इस लायक भी कोनी के उसके जुत्या के फित्ते खोल सकूँ; ओ थमनै पवित्र आत्मा अर आग तै बपतिस्मा देवैगा। 17 उसका सूप, उसके हाथ म्ह सै; अर ओ आपणा खलिहाण बढ़िया तरियां साफ करैगा; अर नाज नै आपणे खते (ठेके) म्ह कट्टा करैगा; पर भुरळी ताहीं उस आग म्ह जो बुझदी कोनी जळा देवैगा।”

18 आखर ओ घणीए शिक्षा दे देके माणसां तै खुशी की खबर सुणान्दा रह्या। 19 पर जिब्व उसनै चौथाई देश के राजा हेरोदेस तै उसके भाई फिलिप्पुस की बीरबानी हेरोदियास के बाबत अर सारे भुण्डे काम्मां के बाबत जो उसनै करे थे, उलाहणा दिया, 20 तो हेरोदेस नै उन सारया तै बढ़के यों भुण्डा काम भी करया के यूहन्ना ताहीं जेळ म्ह गर दिया।

### यीशु का बपतिस्मा

(मत्ती 3:13-17; मरकुस 1:9-11)

21 जिब्व सारे माणसां नै बपतिस्मा लिया अर यीशु भी बपतिस्मा लेके प्रार्थना कर रह्या था, तो अकास खुलया, 22 अर पवित्र आत्मा देही रूप म्ह कबूतर की तरियां उस पै उतरया, अर या आकाशवाणी होई: “तू मेरा प्यारा बेटा सै, मै तेरतै राजी सूँ।”

### यीशु की वंशावली

(मत्ती 1:1-17)

23 जिब्व यीशु खुद उपदेश देण लागया, तो करीबन तीस साल की उम्र का था अर (जिसा समझा जावै सै) युसूफ का बेटा था; अर ओ एली का, 24 अर ओ मत्तात का, अर ओ लेवी का, अर ओ मलकी का, अर ओ यन्ना का, अर ओ युसूफ का, 25 अर ओ मत्तित्याह का, अर ओ आमोस का, अर ओ नहुम का, अर ओ असल्याह का, अर ओ नोगाह का, 26 अर ओ मात का, अर ओ मत्तित्याह का, अर ओ शिमी का, अर ओ योसेख का, अर ओ योदाह का, 27 अर ओ यूहन्ना का, अर ओ रेसा का, अर ओ जरुब्बाबिल का, अर ओ शालतियेल का, अर ओ नेरी का, 28 अर ओ मलकी का, अर ओ अद्वी का, अर ओ कोसाम का, अर ओ इलमोदाम का, अर ओ एर का, 29 अर ओ येशु का, अर ओ इलाजार का, अर ओ योरीम का, अर ओ मत्तात का, अर ओ लेवी का, 30 अर ओ शमौन का, अर ओ यहुदाद का, अर ओ युसूफ का, अर ओ योनान का, अर ओ इलयाकिम का, 31 अर ओ मलेआह का, अर ओ मिन्नाह का, अर ओ मत्तात का, अर ओ नातान का, अर ओ दाऊद का, 32 अर ओ यीशै का, अर ओ ओबेद का, अर ओ बोअज का, अर ओ सलमोन का, अर ओ नहशोन का, 33 अर ओ अम्मिनादाब का, अर ओ अरनी का, अर ओ हिस्त्रोन का, अर ओ फिरिस का, अर ओ यहुदाह का, 34 अर ओ याकूब का, अर ओ इसहाक का, अर ओ अब्राहम का, अर ओ तिरह का, अर ओ नाहोर का, 35 अर ओ सरुग का, अर ओ रऊ का, अर ओ फिलिग का, अर ओ एबिर का, अर ओ शिलह का, 36 अर ओ केनान का, अर ओ अरफक्षद का, अर ओ शेम का, अर ओ नूह का, अर ओ लिमिक का, 37 अर ओ मथुशीलह का, अर ओ हनोक का, अर ओ यिरिद का, अर ओ महललेल का, अर ओ केनान का, 38 अर ओ एनोश का, अर ओ शेत का अर ओ आदम का, अर ओ पणमेशर का बेटा था।

### यीशु की परीक्षा

(मत्ती 4:1-11; मरकुस 1:12-13)

4 फेर यीशु पवित्र आत्मा तै भरया होया, यरदन तै बोहड़या; अर चालीस दिन ताहीं आत्मा कै सिखाण तै बण म्ह हाण्डदा रहया; 2 अर शैतान उसकी परीक्षा लेन्दा रहया | उन दिनां म्ह उसनै कीमे नीं खाया, अर जिब्व वे दिन पुरे होए, तो उसनै भूख लागी। 3 फेर शैतान नै उसतै कह्या, “जै तू पणमेशर का बेटा सै, तो इस पत्थर तै कह, के रोड़ी बणज्या।” 4 यीशु नै उसताहीं जबाब दिया, “लिख्या सै: ‘माणस सिर्फ रोड़ी तै जिन्दा कोनी रहन्दा।’” 5 फेर शैतान उसनै लेगा अर उसताहीं माड़ी वार म्ह दुनिया के सारे राज्य दिखाए, 6 अर उसतै बोल्या, “मै यों सारा हक्क, अर एश-आराम तन्नै ह्युंगा, क्युँके ओ मेरैतै सौप्या गया सै: अर जिसनै चाहूँ उसनै दे ह्युँ सूँ। 7 इसकरके जै तू मन्नै प्रणाम करै, तो यों सारा तेरा हो ज्यागा।” 8 यीशु नै उसताहीं जबाब दिया, “लिख्या सै: ‘तू प्रभु आपणे पणमेशर नै प्रणाम कर; अर सिर्फ उस्से की भगति कर।’” 9 फेर उसनै उसताहीं यरुशलम म्ह ले जाके मन्दर की चोटी पै खड़या करया अर उसतै बोल्या, “जै तू पणमेशर का बेटा सै, तो खुद नै उरै तै तळै गेर ले। 10 क्युँके लिख्या सै: ‘ओ तेरै बाबत आपणे सुर्गदुत्ता नै हुक्म देगा, के वे तेरी रुखाळी करै,’ 11 अर ‘वे तन्नै हाथो-हाथ उठा लैवैगें, इसा ना हो के तेरे पायां म्ह पत्थर तै ठेस लागै।’” 12 यीशु नै उसताहीं जबाब दिया, “न्यू भी कह्या गया सै: ‘तू प्रभु आपणे पणमेशर का हिम्तान ना लिए।’” 13 जिब्व शैतान सारा हिम्तान ले चुका, फेर कुछे टैम खातर उसकै धोरै तै चल्या गया।

### यीशु के सेवा के काम की सरूआत

(मत्ती 4:12-17; मरकुस 1:14-15)

14 फेर यीशु आत्मा की सामर्थ तै भरया होइ गलील बोहड़या, अर उसकी चर्चा ओरै-धोरै के सारे देशां म्ह फैलगी। 15 ओ उनके आराधनालयां म्ह उपदेश देंदा रह्या, अर सारे उसकी बड़ाई करै थे।

### नासरत म्ह यीशु का अनादर

(मत्ती 13:53-58; मरकुस 6:1-6)

16 फेर ओ नासरत म्ह आया, जड़ै पाळा-पोस्या गया था; अर आपणी रित कै मुताबिक सब्त कै दिन आराधनालय म्ह जाके पढ़ण कै खातर खड़या होया। 17 यशयाह नब्बी की किताब उसताहीं दी गई, अर उसनै किताब खोलके, वा जंगहा लिकाड़ी जड़ै लिख्या था: 18 “प्रभु का आत्मा मेरै पै सै, इसकरके के उसनै कंगालां ताहीं खुशी की खबर सुनाण कै खातर मेरा अभिषेक करया सै, अर मेरैताहीं इसकरके खन्दाया सै के कैदीयां नै छुड़ाण की अर आंध्यां नै देखण जोग्गा बनाण की खुशी की खबर का प्रचार करुं अर कुचले होया नै छुड़ाऊँ, 19 अर प्रभु कै राज्जी रहण कै साल का प्रचार करुं।” 20 फेर उसनै किताब बन्द करके सेवक कै हाथां म्ह दे दी अर बैठया; अर मन्दर के सारे माणसां की निगाह उसपै थी। 21 फेर ओ उन तै कहण लाग्या, “आज ए यों लिख्या होइ थारै स्याम्ही पूरा होया। 22 सारया नै उसताहीं सराहया, “अर जो अनुग्रह की बात उसकै मुँह तै लिकड़ै थी, उनतै हैरान होए; अर कहण लागे, “के यों युसूफ का बेटा कोनी?” 23 उसनै उनतै कह्या, “थम मेरैपै या कहावत जरूर कहोगे के ‘हे बैद, खुद नै सई कर! जो कीमे हमनै सुणयां के कफरनहुम म्ह करया गया सै, उसनै उरै खुद कै देश म्ह भी कर।’” 24 अर उसनै कह्या, “मै थमनै साच्ची-साच कहूँ सूँ कोई नब्बी आपणे देश म्ह इज्जत-मान कोनी पान्दा। 25 मै थमनै साच्ची-साच कहूँ सूँ के एलियाह के दिनां म्ह जिब्व साढ़े तीन साल ताहीं अकास बन्द रहया, उरै ताहीं के सारे देश म्ह बड्डा अकाल पड़या, तो इस्राएल म्ह घणीए बिधवा थीं। 26 पर एलियाह उनम्ह तै किस्से के धोरै कोनी खन्दाया गया, सिर्फ सैदा के सारफत म्ह एक बिधवा कै धोरै। 27 अर एलिशा नब्बी के बख्त इस्राएल म्ह घणे कोढी थे, पर सिरियावासी नामान नै छोड़के उनम्ह तै कोए शुद्ध कोनी करया गया।” 28 ये बात सुणद-ए जितने आराधनालय म्ह थे, सारया कै छोह उठया, 29 अर उठके उसताहीं नगर तै बाहरण लिकाड़या, अर जिस पहाड़

पै उनका नगर बसरया था, उसकी चोटी पै ले चाले के उसनै उड़ै तै तळै गेर दे। 30 पर ओ उनकै बिचाळै तै लिकड़ कै चल्या गया।

### एक माणस ताहीं चंगा करना जिस म्ह भूंडी औपरी आत्मा थी

(मरकुस 1:21-28)

31 फेर ओ गलील कै कफरनहुम नगर म्ह गया; अर सब्त कै दिन माणसां ताहीं उपदेश देवै था। 32 वे उसके उपदेश तै हैरान होगे क्युँके उसका बचन हक्क सुदा था। 33 मन्दर म्ह एक माणस था, जिसम्ह भूंडी औपरी आत्मा थी, उसनै ठाडू बोल तै किल्की मारी, 34 हे यीशु नासरी, हमनै तेरैतै के काम? के तू म्हारा नास करण नै आया सै? मन्नै तेरा बेरा सै तू कौण सै? तू पणमेशर का पवित्र माणस सै! 35 यीशु नै उसतै धमकाके कह्या, “बोल-बाल्ला रहै, उसम्ह तै लिकड़ जा!” फेर भूंडी औपरी आत्मा उसनै बिचाळै पटकके बिना नुकसान करे उसम्ह तै लिकड़ गी 36 इस पै सारे हैरान होए, अर वे आपस म्ह बतळाण लागे, “यों किसा बचन सै? क्युँके ओ हक्क अर सामर्थ कै गेल्या भूंडी औपरी आत्मायाँ नै हुक्म देवै सै, अर लिकड़ जावै सै।” 37 इस करके चौगरदे नै हरेक जंगहा उसका जिक्रा होण लाग्या।

### पतरस की सास अर अन्य लोगां ताहीं चंगा करना

(मत्ती 8:14-17; मरकुस 1:29-34)

38 यीशु मसीह का मन्दर म्ह तै उठके शमौन कै घर म्ह गया। शमौन की सासू कै ताप या बुखार चढ़रया था, अर उन्नै उस खातर उसतै बिनती करी। 39 उसनै उसके धोरै खड़े होके ताप ताहीं धमकाया अर ताप उतर गया, अर ओ जिब्वे उठके उनकी सेवा-बाड़ी म्ह लागी। 40 सूरज डूबदे बख्त, जिन-जिन कै उरै माणस कई ढाळ की बीमारियाँ म्ह पड़े होये थे, वे सारे उन्नै उसके धोरै ल्याए, अर उसनै एक-एक पै हाथ धरके उनताहीं चंगा करया। 41 अर भूंडी औपरी आत्मां भी किल्की मारदी अर न्यू कहन्दी होई के, “तू पणमेशर का बेटा सै,” घणखरया म्ह तै लिकड़गी। पर ओ उन्नै धमकांदा अर बोलण नीं देवै था, क्युँके वे जाणै थीं के ओ मसीह सै।

### आराधनालयां म्ह प्रचार करना

(मरकुस 1:35-39)

42 जिब्व सबेरे होई तो ओ लिकड़ कै एक बियाबान जंगहा म्ह गया, अर भीड़ की भीड़ उसनै टोहन्दी होई उसके धोरै आई, अर उसनै रोकण लागी के ओ उनकै धोरै तै नीं जावै। 43 पर उसनै उनतै कह्या, “मन्नै दुसरे नगरां म्ह भी पणमेशर के राज्य की सुसमाचार सुनाणा जरूरी सै, क्युँके मै इसे खातर खन्दाया गया सूँ।” 44 अर ओ गलील के आराधनालयां म्ह प्रचार करदा रह्या।

### प्रथम चेलां का बुलाया जाणा

(मत्ती 4:18-22; मरकुस 1:16-20)

5 जिब्व भीड़ पणमेशर का बचन सुणण कै खातर उस पै गीरै पड़ै थी, अर ओ गन्नेसरत की झील कै कंठारै पै खड़या था, तो इसा होया 2 के उसनै झील कै कंठारै दो किस्ती लागी होइ देखीं, लखाओ, अर मछुए उन पै उतरके जाळ धोवै थे। 3 उन किस्तियां म्ह तै एक पै, जो शमौन की थी, चढ़के उसनै उसतै बिनती करी के कंठारै तै माड़ा डिगा ले चालै। फेर ओ बैठके माणसां नै किस्ती पै तै उपदेश देण लाग्या। 4 जिब्व उन्नै ये बात कर ली तो शमौन तै बोल्या, “डुंगे म्ह ले चाल, अर मच्छी पकड़ण नै आपणा जाळ गेर।” 5 शमौन नै उसतै जबाब दिया, “हे मालिक, हमनै सारी रात मैहनत करी अर कीमे नीं ठायां; फेरभी तेरै कहण तै जाळ गेरुंगां।” 6 जिब्व उन्नै इसा करया, तो घणी मच्छी घेर ल्याए, अर उनके जाळ पाहुण नै होण लागे। 7 इस पै उन्नै आपणे ढब्बीयां नै भी जो दूसरी किस्ती पै थे, इशारा करया के आके म्हारी मदद करो, अर उन्नै आके दोन्नु किस्ती उरै ताहीं भर लीं के डूबण लागी। 8 न्यू देखके शमौन पतरस यीशु कै पायां म्ह पड़या, अर बोल्या, “हे प्रभु, मेरै धोरै तै जा, क्युँके मै पापी माणस सूँ।” 9 क्युँके इतनी मच्छियां कै पकड़े जाण तै उसनै अर उसके ढब्बीयां नै घणा अचम्भा होया,

10 अर उस्से तरियां जबूदी के बेटे याकूब अर युहन्ना नै भी, जो शमौन के याड़ी थे, अचम्भा होया | फेर यीशु नै शमौन तै कह्या, "मतना डरो; इब तै तू माणसां नै जिन्दा पकड़या करैगा।" 11 अर वे किस्तियां नै कंठारै पै लीयाए अर सारा कीमे छोड़कै उसकै पाच्छै हो लिए।

### कोढ़ तै रोगी ताहीं चंगा करणा

12 जिब्व ओ किसे नगर म्ह था, तो उड़ै कोढ़ तै भरया होया एक माणस आया; अर उसनै यीशु पै लखाकै अर मुद्दा पड़कै बिनती करी, "हे प्रभु, जै तू चाहवै तो मन्त्रै शुद्ध करै सकै सै।" 13 उसनै हाथ बढ़ाकै उसताहीं छुया अर बोल्या, "मै चाहूँ सँ, तू शुद्ध होज्या।" अर उसका कोढ़ जिब्वे जांदा रह्या। 14 फेर उसनै उसताहीं सोद्वी दुवाकै कहया, "किस्से तै ना कहिए, पर जाकै खुद नै याजक ताहीं दिखा, अर आपणै शुद्ध होण के बारै म्ह जो कीमे मूसा नै चढ़ावा ठहराया सै उसनै चढ़ा, के उन पै गवाही हो।" 15 पर उसका जिक्का और भी फैलदा गया, अर भीड़ की भीड़ उसकी सुनण के खातर अर आपणी बीमारियाँ तै चंगा होण के खातर कड़ी होई। 16 पर ओ बण म्ह न्यारा जाकै प्रार्थना करया करै था।

### लकवे के रोगी ताहीं चंगा करणा

17 एक दिन इसा होया के ओ उपदेश देण लागरया था, अर फरीसी अर व्यवस्थापक उड़ै बैठे होए थे जो गलील अर यहूदिया के हरेक गाम तै अर यरूशलेम तै आए थे, अर चंगा करण खातर प्रभु की सामर्थ उसकै गेल्या थी। 18 उस बख्त कई माणस एक माणस नै जो लकवै का बीमार अर झोळै का मारया होड़ था, खात पै ल्याए, अर वे उसनै भीत्तर ले जाण अर यीशु के स्याम्ही धरण का जुगाड़ टोहण लागरे थे। 19 पर जिब्व भीड़ के बाबत उसनै भीत्तर कोनी ले जा सके तो उनै छत पै चढ़ के अर खरपैल हटाके, उसताहीं खात सुदा बिचाळै यीशु के स्याम्ही उतार दिया। 20 उसनै उनका बिश्वास देखकै उसतै बोल्या, "हे माणस, तेरे पाप माफ होए।" 21 फेर शास्त्री अर फरीसी बहस करण लागे, "यो कौण सै जो पणमेशर की बुराई करै सै? पणमेशर नै छोड़ और कौण पापां नै माफ कर सकै सै?" 22 यीशु नै उनके मन की बात जाणकै, उनतै कह्या, "थम आपणे मन म्ह के बहस कररे सो? 23 सोकरा के सै? के यो कहणा के 'तेरे पाप बखस दिए, 'या यो कहणा के 'उठ अर हाँड-फिर'? 24 पर इसकरकै के थम जाणो के माणस के बेटे नै धरती पै पाप बखसण का भी हक सै।" --- उसनै उस लकवै के बीमार तै कह्या, "मै तेरैतै कहुँ सँ के आपणी खात ठा अर आपणे घरा चल्या जा।" 25 ओ जिब्वे उनकै स्याम्ही उठ्या, अर जिस पै पड़या था उसनै ठाकै, पणमेशर की बड़ाई करदा होया आपणे घरा चल्या गया। 26 फेर सारे हैरान होये अर पणमेशर की बड़ाई करण लागे अर घणे डरकै बोले, "आज हमनै अनोक्खी बात देख्खी सै।"

### लेवी का बुलाया जाणा

27 इसकै बाद ओ बाहरण गया अर लेवी नामका एक चुंगी लेणआळे ताहीं पीढ़ी पै बैठे देख्या, अर उसतै बोल्या, "मेरै पाच्छै हो ले।" 28 फेर ओ सारा कीमे छोड़कै उठ्या अर उसकै पाच्छै हो लिया। 29 फेर लेवी नै आपणे घरा उसकै खातर बड़ा जिम्मण का न्यौंदा दिया; अर चुंगी लेणआळे अर दुसरे माणसां की जो उसकै गेल्या खाणा खाण नै बैठे थे, एक बड़ी भीड़ थी। 30 इस पै फरीसी अर उनके शास्त्री उसके चेल्यां तै न्यू कहकै बीरडण लागे, "थम चुंगी लेणआळे अर पापियाँ के गेल्या क्यातै खाओ-पीओ सो?" 31 यीशु नै उनतै जबाब दिया, "बैद ठीक-ठाक खातर कोनी, पर बीमारां के खातर जरूरी सै। 32 मै धर्मियां नै नीं, पर पापियाँ नै मन फिराण के खातर बुलाण आया सँ।" 33 उनै उसतै कह्या, "युहन्ना के चेल्ले तो बराबर ब्रत अर प्रार्थना करया करै सै अर उस्से तरियां फरिसियाँ के चेल्ले भी, पर तेरे चेल्ले तो खावै-पीवै सै।" 34 यीशु नै उनतै कह्या, "के थम बरातिया तै, जिब्वताहीं बनड़ा उनकै गेल्या रहवै, ब्रत करा सको सो?"

### उपवास का प्रश्न

35 पर वे दिन आवैगें, जिनम्ह बनड़ा न्यारा करया जावैगा, फेर वे उन दिनां म्ह ब्रत करैगें।" 36 उसनै एक और उदाहरण भी उनतै कह्या, "कोए माणस नये लत्ते म्ह तै पाड़कै पुराने लत्ते पै टांकी कोनी लांदा, नीं तो नया पाट ज्यागा अर वा टांकी पुराने पै मेळ भी नीं खावैगी। 37 अर कोए नया दाखरस पूराणी मशकां म्ह कोनी भरदा, नीं तो नया दाखरस मशकां नै पाड़कै बह ज्यागा, अर मशक भी नास हो जावैगी। 38 पर नया दाखरस नई मशकां म्ह भरणा चाहिए। 39 कोए माणस पुराणा दाखरस पीकै नया कोनी चाहन्दा क्यूँके ओ कहवै सै, के पुराणा-ए बढ़िया सै।"

### सब्त का प्रभु

6 फेर सब्त के दिन ओ खेत्तां म्ह तै होकै जाण लागरया था, अर उसके चेल्ले बालें तोड़-तोड़कै अर हाथां तै मसळ-मसळ के खाण लागरे थे। 2 फेर फरिसियां म्ह तै कीमे कहण लागे, "थम यो काम क्यातै करो सो जो सब्त के दिन करणा सई कोनी?" 3 यीशु नै उनतै जबाब दिया, "के थमनै न्यू नीं पढ़या के दाऊद नै, जिब्व ओ अर उसके ढब्बी भूखे थे तो के करया?" 4 ओ किसतरियां पणमेशर के घर म्ह गया, अर भँट की रोटीयाँ खाई, जिन्नै खाना याजकां नै छोड़ और किस्से खातर सई कोनी, अर आपणे ढब्बियां तै भी दी?" 5 अर उसनै उनतै कह्या, "माणस का बेटा सब्त के दिन का भी प्रभु सै।"

### सुखे हाथ आळे रोगी ताहीं चंगा करणा

6 इसा होया के किसे और सब्त के दिन ओ आराधनालय म्ह जाकै उपदेश देण लाग्या; अर उड़ै एक माणस था जिसका सोळा हाथ सूख रया था। 7 शास्त्री अर फरीसी उसपै दोष लाण के मौके की टाह म्ह थे के देखै ओ सब्त के दिन चंगा करै सै के नीं।" 8 पर ओ उनकी सोच जाणै था, इसकरकै उसनै सूखे हाथ आळे माणस कह्या, "उठ, बिचाळै खड़या होज्या।" ओ उठ खड़या होया। 9 यीशु नै उनतै कह्या, "मै थारै तै बुझ्झू सँ के सब्त के दिन के सई सै, भला करणा या भुण्डा करणा; जीव नै बचाणा या नास करणा?" 10 फेर उसनै चोगरदेनै उन सारया कान्नी देखकै उस माणस तै बोल्या, "आपणा हाथ बढ़ा।" उसनै न्युए करया, अर उसका हाथ दुबारा चंगा होग्या। 11 पर वे आप्पै तै बाहर होकै आपस म्ह बहस करण लागे के हम यीशु के गेल के करां?

### बारह प्रेरीतां की नियुक्ति

12 उन दिनां म्ह ओ पहाड़ पै प्रार्थना करण लाग्या, अर पणमेशर तै प्रार्थना करण म्ह सारी रात बिताई। 13 जिब्व दिन लिक्डया तो उसनै आपणे चेल्यां ताहीं बुलाकै उनम्ह तै बारहा छांट लिए, अर उनताहीं प्रेरित कह्या, 14 अर वे ये सै : शमौन जिसका नाम उसनै पतरस भी धरया, अर उसका भाई अन्द्रियास, अर याकूब, अर युहन्ना, अर फिलिप्पुस, अर बरतुल्मै, 15 अर मत्ति, अर थोमा, अर हलफई का बेटा याकूब, अर शमौन जो जेलोतेस कुहावै सै, 16 अर याकूब का बेटा यहूदा, अर यहूदा इस्करियोती जो उसका पकड़वाणआळा बणया।

### शिक्षा देणा अर चंगा करणा

17 फेर ओ उनकै गेल्या उतरकै चौरस जंगहा म्ह खड़या होया, अर उसके चेल्यां की बड़ी भीड़, अर सारे यहूदिया, यरूशलेम, अर सूर अर सैदा के समुन्दर के कंठारै तै घणे माणस, 18 जो उसकी सूणने अर आपणी बीमारियाँ तै चगे होण खातर उसकै धोरै आए थे, उड़ै थे। अर भूंडी औपरी आत्मां तै सताए होए भी ठीक करे जावै थे। 19 सारे उसनै छूणा चाहवै थे, क्यूँके उसम्ह तै सामर्थ लिक्डकै सारया नै चंगा करै थी।

### आशीष अर शोक बचन

20 फेर उसनै आपणे चेल्यां कात्री लखाकै कह्या, "धन्य सो थम जो दीन सो, क्यूँके पणमेशर का राज्य थारा सै। 21 "धन्य सो थम जो इब भूक्खे सो, क्यूँके छिकाए जाओगे। "धन्य सो थम जो इब रोओ सो, क्यूँके हांसोगे। 22 धन्य सो थम जिब्व माणस कै बेट्टे कै बाबत माणस थारै तै बैर करैगे, अर थमनै लिकाड देवैगे, अर थारी बुराई करैगे, अर थारा नाम भुण्डा जाणकै काट देवैगे। 23 "उस दिन आनन्द करकै कूदीयो, क्यूँके लखाओ, थारे खातर सुर्ग म्ह बड्डा प्रतिफळ सै; उनके बाप-दादे नब्बीयाँ कै गेल्या भी इसाए करया करै थे। 24 "पर हाय थारै पै जो साहूकार सो, क्यूँके थमनै आपणी शान्ति मिलगी। 25 "हाय थारै पै जो छिकरे सो, क्यूँके भूक्खे होओगे। "हाय थारै पै जो इब हाँसो सो, क्यूँके मात्तम करोगे अर रोओगे। 26 "हाय थारै पै जिब्व सारे माणस थारैताही आच्छा कहवै, क्यूँके उनके बाप-दादे झूठे नब्बियाँ कै गेल्या भी इसाए करै थे।

### बेरियाँ तै प्रेम

27 "पर मै थम सूनने आळ्यां तै कहुँ सूँ के आपणे बेरियां तै प्रेम राक्खो; जो थारै तै बैर करै, उनका भला करो। 28 जो थमनै सराप देवै, उन्नै आशीष दो; जो थारी बेइज्जती करै, उनके खातर प्रार्थना करो। 29 जो तेरै एक गाल पै रैट मारै उसकी ओड़ दूसरा भी फेर द्यो; अर जो तेरी धोती खोस ले, उसनै कुरता लेण तै भी मना मत करो। 30 जो कोए तेरैतै माँगे, उसनै दे; अर जो तेरी चीज खोस ले, उसतै माँगे ना। 31 जिसा थम चाहो सो के माणस थारे गेल्या करै, थम भी उनके गेल्या उस्साए करो।" 32 "जै थम आपणे प्रेम राखण आळ्यां प्रेम राक्खो, तो थारी के बडाई? क्यूँके पापी भी आपणे प्रेम राखण आळ्यां के गेल्या प्रेम राक्खे सै। 33 जै थम आपणे भलाई करणआळ्यां ए गेल्या भलाई करो सो, तो थारी के बडाई? क्यूँके पापी भी इसाए करै सै। 34 जै थम उन्नै उधार द्यो सो जिनतै दुबारै मिलण की आस राक्खो सो तो थारी के बडाई? क्यूँके पापी पापियाँ नै उधार देवै सै के उतनाए दुबारै पावै। 35 बल्के आपणे बैरी तै प्रेम राक्खो, अर भलाई करो, अर दुबारै मिलण की उम्मीद राख कै उधार ना द्यो; अर थारे खातर बड्डा फळ होवैगा, अर थम परमप्रधान की ऊलाद बणोगे, क्यूँके ओ उनपै जो धन्यवाद कोनी करदे अर भुण्डयां पै भी दया करै सै। 36 जिसा थारा बाप दयालु सै, उस्से ए ढाळ थम भी दयालु बणो।

### दोष ना लाओ

37 "खोट ना काड्डो, तो थारै म्ह भी कोए खोट कोनी काड्या जावैगा। दोषी ना ठहराओ, तो थमनै भी कोए दोषी कोनी ठहरावैगा। बखसो, तो थम भी बखसे जाओगे। 38 दिया करो तो थारै ताहीं भी दिया जावैगा। माणस पूरा नाप दबा दबाकै अर हला-हलाकै अर उभरदा होया थारी गोद्री मह घाल्लैगे, क्यूँके जिस नाप तै थम नाप्पो सो, उस्से तै थारै खातर भी नाप्पा जावैगा।" 39 फेर उसनै उनतै एक उदाहरण कह्या, "के आन्धा, आंधे नै राह बता सकै सै? के दोन्नु खुड्डे म्ह कोनी गिरैगे? 40 चेल्हा आपणे गुरु तै बड्डा नीं, पर जो कोए सिद्ध होगा, ओ आपणे गुरु की ढाळ होगा। 41 तू आपणे भाई की आँख कै तिनके नै क्यातै देखै सै, अर आपणी ए आँख का लड्डा तन्नै कोनी सूँझदा? 42 जिब्व तू आपणी ए आँख का लड्डा कोनी देख्दा; तो आपणे भाई तै किस तरियां कह सकै सै, 'हे भाई; ठहर ज्या तेरी आँख म्ह तै तिनका काड द्यु' ? हे कपटी, पहल्या आपणी आँख का लड्डा तो काड, फेर जो तिनका तेरै भाई की आँख म्ह सै, उसनै सई तरियां तै देख कै काड सकैगा।

### जिसा दरखत उसा फळ

43 "कोए आच्छा दरखत कोनी जो बेकार फळ ल्यावै, अर ना तो कोए बेकार दरखत सै जो आच्छा फळ ल्यावै। 44 हरेक दरखत आपणे फळ तै पिच्छाणा जावै सै; क्यूँके माणस झाड़ियाँ तै अंजीर कोनी तोड़दे अर ना झड़बेरी तै अंगूर। 45 भला माणस आपणे मन के भले भण्डार तै भली बात

लिकाडै सै, अर भुण्डा माणस आपणे मन के भुण्डे भण्डार तै भुण्डी बात लिकाडै सै; क्यूँके जो मन म्ह भरया सै ओए उसकै मुँह पै आवै सै।

### घर बनाण आळे दो माणस

46 "जिब्व थम मेरा कहणा नीं मान्दे तो क्यातै मन्नै 'हे प्रभु, हे प्रभु' कहो सो? 47 जो कोए मेरै धोरै आवै सै अर मेरी बात्तां नै सुणकै उन्नै मन्नै सै, मै थम नै बताऊँ सूँ के ओ किसकी तरियां सै : 48 ओ उस माणस की ढाळ सै, जिसनै घर बनादे टैम धरती डून्धी खोदकै चट्टान पर नीव बणाई, अर जिब्व बाढ आई तो धारा उस घर पै लागी पर उसनै हल्ला नीं सकी; क्यूँके ओ पक्का बगरा था। 49 पर जो सुणकै कोनी मान्दा ओ उस माणस की ढाळ सै, जिसनै माट्टी पै बिना नीव घर बणाया, जिब्व उस पै धारा लागी तो ओ जिब्व पड़ग्या अर पड़कै उसका सत्यानास होग्या।"

### एक सूबेदार का बिश्वास

7 जिब्व उसनै माणसां तै ये सारी बात कह दी, तो कफरनहूम म्ह आया। 2 उडै किसे सूबेदार का एक नौकर जो उसका प्यारा था, बीमारी तै मरण नै था। 3 उसनै यीशु का जिक्का सुण कै यहूदियां के कई पुरनियां ताहीं उसतै या बिनती करण नै उसकै धोरै खन्दाया के आकै मेरै नौकर नै चंगा करै। 4 वे यीशु कै धोरै आए, अर उसतै घणी बिनती करकै कहण लागे, "ओ इस जोग्गा सै के तू उसकै खातर न्यू करै, 5 क्यूँके ओ म्हारी जात तै प्रेम राखै सै, अर उस्से नै म्हारे आराधनालय ताही बणवाया सै।" 6 ज्यांतै यीशु उनकै गेल्या गया, पर जिब्व ओ घर तै माडी-सी दूर था, तो सूबेदार नै उसके धोरै कई ढब्बीयां तै न्यू कुहवा भेज्या, "हे प्रभु, कांल ना होवै, क्यूँके मै इस जोग्गा कोनी के तू मेरी छात तळै आवै। 7 इसे करकै मन्नै खुद ताही इस जोग्गा भी कोनी समझया के तेरै धोरै आऊँ, पर बचन बोल दे, तो मेरा नौकर चंगा होज्या गा। 8 मै भी दुसरयां के आधीन माणस सूँ, अर सिपाहीं मेरै हाथ म्ह सै; अर जिब्व एक नै कहुँ सूँ, 'जा,' तो ओ जावै सै; अर आपणे किसे नौकर ताहीं के, 'न्यू कर,' तो ओ उसनै करै सै।" 9 न्यू सुण कै यीशु नै हैरानी होई अर उसनै मुँह फेरकै उस भीड़ तै जो उसकै गेल्या आवै थी, कह्या, "मै थमनै कहुँ सूँ के मन्नै इस्राएल म्ह भी इसा बिश्वास कोनी मिल्या।" 10 अर खन्दाय होये माणसां नै घरा बोहड़कै उस नौकर ताहीं चंगा पाया।

### बिधवा के बेट्टे ताहीं जीवन-दान

11 माडे-से दिनां पाच्छे ओ नाईन नाम के एक नगर म्ह गया। अर उसके चेल्हे अर बड्डी भीड़ उसकै गेल्या जाण लागरी थी। 12 जिब्व ओ नगर कै फाटक कै धोरै पहोच्या, तो लखाओ, माणस एक मुरदे नै बाहरण ले कै जावै थे; जो आपणी माँ का एक्का बेट्टा था, अर वा बिधवा थी; अर नगर के घणखरे माणस उसकै गेल्या थे। 13 उसनै देखकै प्रभु नै तरस आया, अर उसतै कह्या, "मतना रोवै।" 14 फेर उसनै धोरै आकै अर्थी ताहीं छुया, अर टाण आळे थमगे। फेर उसनै कह्या, "हे गाबरू, मै तन्नै कहुँ सूँ, उठ!" 15 फेर ओ मुर्दा उठ बैठ्या, बोल्ण लाग्या। उसनै उसताहीं उसकी माँ तै थमा दिया। 16 इसतै सारे डरगे, अर वे पणमेशर की बडाई करकै कहण लागे, "म्हारे बिच्चाळै एक बड्डा नब्बी उठया सै, अर पणमेशर नै आपणे माणसां पै दया की निंगाह फेरी सै।" 17 अर उसकै बारै म्ह या बात सारे यहूदिया अर ओरै-धोरै के सारे देशां म्ह फैलगी।

### यूहन्ना बपतिस्मा देणआळे का प्रश्न

18 यूहन्ना ताहीं उसके चेल्यां नै इन बात्तां की खबर दी। 19 फेर यूहन्ना नै आपणे चेल्यां म्ह तै दोवा ताहीं बुलाकै प्रभु कै धोरै न्यू बुझ्णण खातर खन्दाया, "के आणआळा तूए सै, या हम किसे और की बाट देक्खां?" 20 उन्नै उसकै धोरै आकै कह्या, "यूहन्ना बपतिस्मा देणआळे नै म्हारैताहीं तेरै धोरै न्यू बुझ्णण नै खन्दाया सै के आणआळा तूए सै, या किसे दुसरे की बाट देक्खां?" 21 उस्से बखत उसनै घणाए ताहीं बीमारियाँ, अर कांल्ली, अर भूंडी औपरी आत्मां तै छुटाया; अर घणाए की आँख खोल दीं; 22 अर उसनै उनतै



कह्या, “जो कीमे थमनै देख्या अर सुणया सै, जाकै यूहन्ना तै कह घो; के आंधे देक्खें सैं, लंगड़े चालें-फिरें सैं, कोढ़ी शुद्ध करे जावें सैं, बहरे सुणें सैं, मुरदे जिन्दे करे जावें सैं, अर कन्नालां ताहीं खुश-खबरी सुणयाई जावें सैं। 23 धन्य सैं वे जो मेरै बाबत ठोकर नीं खांदें।” 24 जिब्व यूहन्ना के खन्दाये होड माणस चले गये तो यीशु यूहन्ना के बारै म्ह माणसां तै कहण लाग्या, “थम बण म्ह के देखण गये थे? के बाळ म्ह हाल्दे होये सरकंडे नै? 25 तो फेर थम बण म्ह के देखण गये थे? के कोमल लत्ते पहरे होये माणस नै? लखाओ, जो चमकदे लत्ते पहरै अर अश-आराम म्ह रहवै सैं, वे राजघरां म्ह रहवै सैं। 26 तो फेर थम बण म्ह के देखण गये थे? के किसे नब्बी नै? हम्बै, मै थमनै कहूँ सूँ, बल्के नब्बी तै भी बड्डे नै। 27 यों ओए सैं, जिसकै बारै म्ह लिख्या सै : ‘लखा, मै आपणे दूत नै तेरै आगै-आगै खन्दाऊँ सूँ, जो तेरै आगै तेरी राही सीधी करेगा।’ 28 मै थारैते कहूँ सूँ के जो लुगाई तै जण्या सै, उनम्ह तै यूहन्ना तै बड्डा कोए कोनी : पर जो पणमेशर के राज्य म्ह छोटै तै छोटा सै, ओ उसतै भी बड्डा सै।” 29 अर सारे सीधे माणसां नै सुणकै अर चुंगी लेणआळे नै भी यूहन्ना का बपतिस्मा लेकै पणमेशर ताहीं साच्चा मान लिया सै। 30 पर फरिसियाँ अर व्यस्थापकां नै उसतै बपतिस्मा कोनी लेकै पणमेशर के मनसां ताहीं आपणे बारै म्ह टाळ दिया।” 31 आखर मै इस युग के माणसां की बराबरी किसतै करुं के वे किसकै बरगे सैं? 32 वे उन बाळकां के बरगे सैं जो बजार म्ह बैट्टे होये एक दुसरै तै रुक्के मारकै कहवें सैं, ‘हमनै थारै खातर बाँसली बजाई, अर थम कोनी नाचे; हमनै बिलाप करया, अर थम कोनी रोए!’ 33 क्यूँके यूहन्ना बपतिस्मा देणआळा ना रोटी खांदा आया, ना दाखरस पिन्दा आया, अर थम कहो सो, ‘उसम्ह भूंडी औपरी आत्मा सै।’ 34 माणस का बेड्डा खान्दा-पिन्दा आया सै, अर थम कहो सो, ‘लखाओ, पेड्डु अर पियकड माणस, चुंगी लेणिये का अर पापियाँ का ढब्बी।’ 35 पर ज्ञान आपणी सारी ऊलादा तै साच्चा ठहराया गया सै।”

### फरीसी के घरा पापण लुगाई ताहीं माफ़ी

36 फेर किसे फरीसी नै उसतै बिनती करी के ओ उसके गेल्या खाणा खावें, आखर ओ उस फरीसी के घरा जाकै खाणा खाण बैठ्या। 37 उस नगर की एक पापण लुगाई न्यु जाणकै के यीशु फरीसी के घर म्ह खाणा खाण बैठ्या सै, संगमरमर के बासण म्ह शैंट ल्याई, 38 अर उसके पायां के धोरै, पाच्छै खड़ी होकै, रोंदी होई उसके पायां नै आंसूआ तै भेण लागी अर आपणे सिर के बाळां तै पुन्जण लागी, अर उसके पायां नै बार-बार चूमकै उन पै शैंट मळ्या। 39 न्यु देखकै ओ फरीसी जिसनै उसताहीं बुलाया था, आपणे मन म्ह सोचण लाग्या, “जै यों नब्बी होन्दा तो जाण जांदा के या जो उसनै छूण लागरी सै, वा कौण अर कीसी लुगाई सै, क्यूँके वा तो पापण सै।” 40 यीशु नै उसतै जबाब दिया, “हे शमौन, मन्त्रै तेरै तै कीमे कहणा सै।” ओ बोल्या, “हे गुरु, कह।” 41 किसे साहूकार के दो देणदार थे, एक पांच सौ अर दूसरा पचास दिनार का देणदार था। 42 जिब्व उनकै धोरै चूकाण नै कीमे नीं रह्या तो उसनै दोनुआ ताहीं माफ़ कर दिया। इसकरकै उनम्ह तै कौण उसतै घणा प्रेम राखेगा? 43 शमौन नै जबाब दिया, “मेरी समझ म्ह ओ, जिसका घणा कर्जा माफ़ होया।” यीशु नै उसतै कह्या, “तन्त्रै सई कह्या सै।” 44 अर उस लुगाई कान्नी पलटकै उसनै शमौन तै कह्या, “के तू इस लुगाई नै देखै सै? मै तेरै घरा आया पर तन्त्रै मेरे पैर धौण नै पाणी कोनी दिया, पर इसनै मेरे पैर आंसूआं तै भये अर आपणे बाळां तै पूंजे। 45 तन्त्रै मेरैताहीं चूम्या नीं, पर जिब्व तै मै आया सूँ जिब्वे तै इसनै मेरे पायां ताहीं चूमणा नीं छोड्या। 46 तन्त्रै मेरे सिर पै तेल कोनी मळ्या, पर इसनै मेरे पायां पै शैंट मळ्या सै। 47 इसकरकै मै तन्त्रै कहूँ सूँ के इसके पाप जो घणे थे, माफ होये, क्यूँके इसनै घणा प्रेम करया; पर जिसका घाट माफ होया सै, ओ घाट प्रेम करै था।” 48 अर उसनै लुगाई तै कह्या, “तेरे पाप माफ होए।” 49 फेर जो माणस उसके गेल्या खाणा खाण नै बैट्टे थे, वे आपणे-आपणे मन म्ह सोचण लागे, “यों कौण सै जो पाप नै भी माफ करै सै?” 50 पर उसनै उस लुगाई ताहीं कह्या, “तेरै बिश्वास नै तेरै ताहीं बचा लिया, राज्नी-खुशी चली जा।”

### यीशु की शिक्षां

8 इसके बाद ओ नगर-नगर अर गाम-गाम प्रचार करदा होया, अर पणमेशर के राज्य की सुसमाचार सुणान्दा होया हांडण लाग्या, अर वे बारहा उसके गेल्या थे, 2 अर कीमे लुगाई भी थी जो भूंडी औपरी आत्मायाँ तै अर बीमारियाँ तै छुटाई गई थीं, अर वे ये सैं : मरियम जो मगदलीनी कुह्वावै थी, जिसम्ह तै सात भूंडी औपरी आत्मा लिकडी थीं, 3 अर हेरोदेस के भण्डारी खोजा की बीरबान्नी योअन्ना, अर सुंसन्नाह, अर घणखरी दूसरी लुगाई। ये आपणे धन तै उसकी सेवा-बाडी करै थीं।

### बीज बोण आळे का उदाहरण

4 जिब्व बड्डी भीड़ कडी होई अर नगर-नगर के माणस उसके धोरै चालके आवे थे, तो उसनै उदाहरण म्ह कह्या 5 “एक बोण आळा बीज बोण लिकड्या। बोंदे होये कीमे बीज राही के कंठारै पड्या, अर रोंद्या गया, अर अकास के पन्धियां नै उसताहीं चुग लिया। 6 कीमे बीज चट्टान पै पड्या, अर जाम्या, पर आल ना मिलण के कारण सूख्या। 7 कीमे झाड़ियाँ के बिचाळै पड्या, अर झाड़ियाँ नै गेलै-गेलै सरककै उसताहीं दबा दिया। 8 कीमे बढ़िया धरती पै पड्या, अर उगकै सौ गुणा फळ ल्याया।” न्यु कहकै उसनै ठाडू बोल तै कह्या, “जिसके सुणण के कान हो ओ सुण ले।”

### उदाहरणां का मकसद

9 उसके चेल्यां नै उसतै बुझ्या के इस उदाहरण का के मतलब सै? 10 उसनै कह्या, “थारै ताहीं पणमेशर के राज्य के भेदां की समझ दे राक्खी सैं, पर औरां नै उदाहरणां म्ह सुणयां जावें सैं, इसकरकै के ‘वे देखदे होए भी कोनी देखै, अर सुणदे होए भी कोनी समझें।’”

### बीज बोण आळे उदाहरण का मतलब

11 उदाहरण का मतलब यों सै : बीज पणमेशर का बचन सैं 12 राही के कंठारै के वे सैं, जिन्ने सुणयां; फेर शैतान आकै उनकै मन म्ह तै बचन ठा ले जावें सैं के कदे इसा ना हो के वे बिश्वास करकै उद्धार पावें। 13 चट्टान पै के वे सैं के जिब्व सुणें सैं, तो राज्नी होकै बचन नै अपणावें सैं, पर जड कोनी पकडदे वे माडी वार ताहीं बिश्वास राक्खें सैं अर हिम्तान के बखल बहक जावें सैं। 14 जो झाड़ियाँ म्ह पड्या, यों वे सैं जो सुणें सैं, पर आगै जाकै चिन्ता, अर धन, अर जिन्दगी के ऐश-आराम म्ह फँस जावें सैं अर उनका फळ कोनी पकदा। 15 पर बढ़िया धरती के वे सैं, जो बचन सुणकै भले अर आच्छे मन तै साम्मे राखें सैं, अर धीरज तै फळ ल्यावें सैं।

### दीवै का उदाहरण

16 “कोए दिवा बाळ के बास्सण तै कोनी ढकदा, अर ना खाट तळै धरै सैं, पर दीवट पै धरै सैं के भीत्तर आणआळे चाँदणा पावें। 17 कीमे लुहक्या कोनी जों दिखाया कोनी जावै, अर ना कीमे लहको सैं जो जाणी नीं जावै अर दिख्डी ना हो। 18 ज्यांतै चौकस रहो के थम किस तरियां सुणो सो? क्यूँके जिसकै धोरै सैं उसतै दिया जावैगा, अर जिसकै धोरै नीं सैं उसतै ओ भी ले लिया जावैगा, जिसनै ओ आपणा समझै सैं।”

### यीशु के माँ अर भाई

19 उसकी माँ अर उसके भाई उसके धोरै आए, पर भीड़ के बाबत उसतै फेट नीं सके 20 उसतै कह्या गया, “तेरी माँ अर तेरे भाई बाहरण खड़े होए, तेरे तै फेटणा चाहवें सैं।” 21 उसनै इसके जबाब म्ह उनतै कह्या, “मेरी माँ अर मेरे भाई यए सैं, जो पणमेशर का बचन सुणें अर मन्त्रै सैं।”

### आँधी ताहीं शान्त करणा

22 फेर एक दिन ओ अर उसके चेल्ले किस्ती पै चढे, अर उसनै उनतै कह्या, “आओ, झील के परली ओड चाला।” आखर उनै किस्ती खोल दी। 23 पर

जिब्व किस्ती चालरी थी, तो ओ सोग्या : अर झील पै आंधी आ गी, अर किस्ती पाणी तै भरण लाग गी अर वे खतरै म्ह थे। 24 फेर उत्रै धोरै आकै उसताही जगाया, अर कह्या, “हे मालिक! हे मालिक! म्हारा नास होण नै होरया सै।” फेर उसनै उठकै आंधी ताहीं अर पाणी की झालां ताहीं धमकाया अर वे थमो अर शान्ति होई। 25 फेर उसनै उनतै कह्या, “थारा बिश्वास कित था?” पर वे डरगे अर हैरान होकै आपस म्ह कहण लागे, “यो कौण सै जो आंधी अर पाणी नै भी हुक्म देवै सै, अर वे उसकी मात्रै सै?”

### एक माणस ताहीं चंगा करणा जिस म्ह भूंडी औपरी आत्मा थी

26 फेर वे गिरासेनियां कें देश म्ह पहोचे, जो उस पार गलील कें स्याम्ही सै। 27 जिब्व ओ कंटारै पै उतरया तो उस नगर का एक माणस उसतै फेट्या जिसम्ह भूंडी औपरी आत्मा थी। ओ घणे दिनां तै उघाडा था अर ना घरा रहवै था बल्के चांणीयां ( कब्रिस्तान) म्ह रहवै था। 28 ओ यीशु नै देखकै किल्की मारण लाग्या अर उसकै स्याम्ही पडकै ठाडु बोल तै कह्या, “हे परम प्रधान पणमेशर के बेट्टे यीशु! मन्त्रै तेरैतै के काम? मै तेरैतै बिनती करूं सूं, मन्त्रै कांल ना करै।” 29 क्यूँके ओ उस भूंडी औपरी आत्मा ताहीं उस माणस म्ह तै लिकड़ण का हुक्म देवै था, इसकरकै के ओ उस पै बार-बार हावी होवै थी। ऊतो माणस उसनै साँकळां अर बेलां तै जुडै थे फेरभी ओ बंधना नै तोड़ देवै था, अर भूंडी औपरी आत्मा उसनै बण म्ह भजाए फिरै थी। 30 यीशु नै उसतै बुझया, “तेरा के नाम सै? उसनै कह्या, “फौज,” क्यूँके घणी औपरी आत्मां उसम्ह रहवै थीं। 31 उत्रै उसतै बिनती करी के हमनै अथाह खड्डे म्ह जाण का हुक्म ना देवै। 32 उडै पहाड़ पै सूंअरां का एक बड्डा टोळ चरै था, इसकरकै उत्रै उसतै बिनती करी के हमनै उनम्ह पैठने दे। उसनै उनताहीं जाण दिया। 33 फेर भूंडी औपरी आत्मां उस माणस म्ह तै लिकड़ कें सूंअरां म्ह जा पडी अर ओ टोळ कडाडे पै तै झपटकै झील म्ह जा पड्या अर डूब मरया। 34 पार्ली यों जो होया था देखकै भाजे, अर नगर म्ह अर गाम्मां म्ह जाकै उसकी खबर दी। 35 माणसां जो होया था उसनै देखण नै लिकडे, अर यीशु कें धोरै आकै जिस माणस तै भूंडी औपरी आत्मां लिकडी थी, उसनै यीशु के पायां कें धोरै लत्ते पहरै अर होश म्ह बड्डे होये पाकै डरगे; 36 अर देखणआळे नै उनताहीं बताया के ओ भूंडी औपरी आत्मायां का कांल करया होड़ माणस किस तरियां ठीक होया। 37 फेर गिरासेनियां कें ओरै-धोरै के सारे माणसां नै यीशु तै बिनती करी के म्हारै उरै तै चल्या जा; क्यूँके वे घणे डरगे थे। आखर म्ह ओ किस्ती पै चढकै बोहड़ आया। 38 जिस माणस म्ह भूंडी औपरी आत्मां लिकडी थीं ओ उसतै बिनती करण लाग्या के मन्त्रै आपणे गेल्या रहण दे, पर यीशु नै उस ताहीं बिदा करकै कह्या, 39 “आपणे घरा बोहड़ जा अर माणसां तै बता के पणमेशर नै तेरै खातर किसे बड्डे-बड्डे काम करे सै।” ओ जाकै सारे नगर म्ह प्रचार करण लाग्या के यीशु नै मेरै खातर किसे बड्डे-बड्डे काम करे।

### याईर की मरी होई बेट्टी अर रोगी लुगाई

40 जिब्व यीशु बोहड़या तो माणस उसतै राजी होकै फेट्टे, क्यूँके वे सारे उसकी बाट देखवै थे। 41 इतनै म्ह याईर नामक एक माणस जो आराधनालय का सरदार था, आया अर यीशु कें पायां म्ह पडकै उसतै बिनती करण लाग्या के मेरै घरा चाल, 42 क्यूँके उसकी बारहा साल की एकल्ली बेट्टी थी, अर वा मरण नै होरी थी। जिब्व ओ जावै था, जद माणस उस पै गीरै पडै थे। 43 एक लुगाई नै जिसकै बारहा साल तै लहू बहण की बीमारी थी, अर जो आपणी सारी कमाई डाक्टरां कें पाचछै बरतगी थी, फेरभी किसे कें हाथ तै चंगी कोनी हो सकी थी, 44 पाचछै तै आकै उसके लत्ते कें पल्ले नै छुया, अर जिब्वे उसका लहू बहणा बन्द होगा। 45 इस पै यीशु नै कह्या, “मेरैताहीं किसनै छुया?” जिब्व सारे नाट्टण लागे, तो पतरस अर उसके ढब्बीया नै कह्या, “हे मालिक, तन्नै तो भीड़ दबाण लागरी सै अर तेरैपै पडण लागरी सै।” 46 पर यीशु नै कह्या, “किसे नै मेरै ताहीं छुआ सै, क्यूँके मन्त्रै बेरा पाटया के मेरै म्ह तै सामर्थ लिकडी सै।” 47 जिब्व लुगाई नै देख्या के मै लुहक कोनी सकदी, फेर काम्बदी होई आई अर उसके पायां पै पडकै सारे माणसां के स्याम्ही बताया के उसनै किस कारण उस ताहीं छुया,

अर किस तरियां जिब्वे चंगी होई। 48 उसनै उसतै कह्या, “बेट्टी, तेरै बिश्वास नै तेर ताहीं चंगा करया सै, राजी-राजी चली जा।” 49 वा न्यू कहे री थी के किसे नै आराधनालय कें सरदार कें उरै तै आकै कह्या, “तेरी छोरी मर ली सै : गुरु नै कांल ना करै।” 50 यीशु नै न्यू सुण कें उसतै जबाब दिया, “मतना डर; सिर्फ बिश्वास रख, तो वा बच जावैगी।” 51 घर म्ह आकै उसनै पतरस, यूहन्ना, याकूब, अर छोरी के माँ-बाप नै छोड़ दूसरे किसे नै आपणे गेल्या भीत्तर कोनी आण दिया। 52 सारे उसके बाबत रोण-पिट्टण लागरे थे, पर उसनै कह्या, “रोओ मतना; वा मरी कोनी पर सोवै सै।” 53 वे न्यू जाण कें के वा मरगी सै उसका मखौल करण लागे। 54 पर उसनै उसका हाथ पकड़या, अर रुक्का मारकै कह्या, “हे छोरी, उठा!” 55 फेर उसका जी बोहड़ आया अर वा जिब्वे उठ बैट्टी। फेर उसनै हुक्म दिया के उसनै कीमे खाण नै द्यो। 56 उसके माँ-बाप हैरान होए, पर उसनै उन ताहीं चिताया के यो जो होया सै किसे तै ना कहियो।

### बारहां प्रेरितां का खन्दाया जाणा

9 फेर उसनै बारहा ताहीं बुलाकै उत्रै सारी भूंडी औपरी आत्मायां अर बीमारियां ताहीं दूर करण की सामर्थ अर हक्क दिया, 2 अर उत्रै पणमेशर कें राज्य का प्रचार करण अर बिमारां ताहीं आच्छा करण खातर खन्दाया। 3 उसनै उनतै कह्या, राह खातर कीमे ना लियो, ना तो लाठी, ना झोळी, ना रोटी, ना रपिये अर ना दो-दो कुरते। 4 जिस किसे घर म्ह उतरो, उड़ए रहो, अर उड़ए तै बिदा होइयो। 5 जो कोए थमनै नीं अपणावै, उस नगर तै जांदे होये आपणे पायां की धुळ झाड़ दियो के उन पै गवाही होवै। 6 आखर म्ह वे लिकड़ कें गाम-गाम सुसमाचार सुणान्दे, अर हरेक माणसां नै चंगा करदे होये हांडदे रहे।

### हेरोदेस की उलझन

7 देश के चौथाई राजा हेरोदेस यों सारा सुण कें घबराग्या, क्यूँके कीमे नै कह्या, के यूहन्ना मरे होया म्ह तै जिन्दा होया सै, 8 अर कुछां नै न्यू कह्या के एलिय्याह दिख्या सै, अर औरां नै न्यू के पुराणे नब्बियां म्ह तै कोए जिन्दा होया सै। 9 पर हेरोदेस नै कह्या, “यूहन्ना का तो मन्त्रै सिर कटवाया, इब यो कौण सै जिसकै बाबत इसी बात सुणु सूं?” अर उसनै उसताहीं देखण की चाहना करी।

### पाँच हजार माणसां ताहीं खुवाणा

10 फेर प्रेरितां नै बोहड़कै जो कीमे उत्रै करया था, उसताहीं बता दिया; अर ओ उत्रै न्यारे करकै बैतसैदा नामक नगर म्ह लेग्या। 11 न्यू जाण कें भीड़ उसकै गेल्या हो ली, अर ओ राजी होकै उनतै फेट्या, अर उन तै पणमेशर कें राज्य की बात करण लाग्या, अर जो चंगे होणा चाहवै थे उन ताहीं चंगा करया। 12 जिब्व दिन छिपण लाग्या तो बारहा नै आकै उसतै कह्या, “भीड़ नै जाण दे के चौगरदे के गाम्मां अर बगडां म्ह जाकै ठहरै अर खाणै का जुगाड करै, क्यूँके हम उरै बियाबान जंगहा म्ह सां।” 13 उसनै उनतै कह्या, “थमए उत्रै खाण नै द्यो।” उत्रै कह्या, “म्हारै धोरै पाँच रोटी अर दो मच्छियां नै छोड़ कें और कीमे कोनी; पर हम्बै, जै हम जाकै इन सारया खातर खाणा मोल ल्यावां, फेर हो सकै सै।” वे माणस तो पाँच हजार माणसां कें करीबन थे। 14 फेर उसनै आपणे चेल्यां तै कह्या, “उत्रै पचास-पचास करकै लैणपतार बिठा द्यो।” 15 उत्रै न्यूए करया, अर सारया ताहीं बिठा दिया। 16 फेर उसनै वे पाँच रोटियां अर दो मच्छियां ली, सुर्ग कात्री लखाके धन्यवाद करया, अर तोड़-तोड़कै चेल्यां ताहीं दँदा गया के माणसां ताहीं बाँडे। 17 फेर सारे खाकै छिकगे, अर चेल्यां नै बचे होड़ टुकड़यां तै बारहां टोकरी भरकै ठाई।

### पतरस का यीशु ताहीं 'मसीह' स्वीकार करणा

18 जिब्व ओ एकै म्ह प्रार्थना करै था अर चेल्ले उसकै गेल्या थे, तो उसनै उनतै बुझया, “माणस मन्त्रै के कहवै सै?” 19 उत्रै जबाब दिया, “यूहन्ना बपतिस्मा देवण आळा, अर कोए एलिय्याह, अर कोए यों के पुराणे नब्बियां म्ह तै कोए जिन्दा होया सै।” 20 उसनै उनतै बुझया, “पर थम मन्त्रै के कहो

सो? पतरस नै जबाब दिया, “पणमेशर का मसीह।” 21 फेर उसनै उनतै चिताकै कह्या के न्यू किस्से ना कहियो।

### अपणी मौत कै बारै म्ह यीशु की भविष्यवाणी

22 फेर उसनै कह्या, “माणस कै बेट्टे खातर जरूरी सै के ओ घणा दुःख ठावै, अर पुर्णीए अर प्रधान याजक अर शास्त्री उसनै माड़ा समझ कै मार देवै, अर ओ तीसरै दिन जिन्दा होज्या।”

### यीशु कै पाच्छै चालण का मतलब

23 उसनै सारया तै कह्या, जै कोए मेरै गेल्या आणा चाहवै, तो खुद तै नाट्टे अर हरेक दिन आपणा क्रूस ठाए मेरै गेल्या हो ले। 24 क्यूँके जो कोए आपणी ज्यान बचाणा चाहवैगा ओ उसनै खोवैगा, पर जो कोए मेरी खातर आपणी ज्यान खोवैगा ओए उसनै बचावैगा। 25 जै माणस सारी दुनिया नै पा ले अर आपणी ज्यान खो दे या उसका नुकसान ठावै, तो उसनै के फैंयदा? 26 जो कोए मेरैतै अर मेरी बात्तां तै सरमावैगा, माणस का बेट्टा भी, जिबब आपणी अर आपणे बाप की अर पवित्र सुर्गदुत्तां की महिमा सुदा आवैगा, तो उसतै सरमावैगा। 27 मै थमनै साची कहुँ सूँ, के जो याडै खडे सैं, उनम्ह तै कीमे इसे सैं के जिबब ताहीं पणमेशर का राज्य ना देख लवैं, जद ताहीं मौत का सुआद कोनी चाखें।”

### यीशु का रूपान्तर

28 इन बात्तां कै कोए आठ दिनां पाच्छै ओ पतरस, यूहन्ना अर याकूब नै गेल्या लेकै प्रार्थना करण खातर पहाड़ पै गया। 29 जिबब ओ प्रार्थना करै था, तो उसकै मुँह का रूप बदलग्या, अर उसके लत्ते धोळे होकै चमकण लागे। 30 अर लखाओ, मूसा अर एलिय्याह ये दो माणस उसकै गेल्या बतळावै थे। 31 ये महिमा सुदा दिख्खे अर उसकै मरण का जिक्रा करै थे, जो यरुशलेम म्ह होण आळा था। 32 पतरस अर उसके ढब्बी नीद म्ह होरे थे, अर जिबब सई तरियां सोद्री म्ह आए, तो उसकी महिमा अर उन दो माणसां नै, जो उसकै गेल्या खडे थे, देख्या। 33 जिबब वे उसकै धोरै तै जाण लागे, तो पतरस नै यीशु तै कह्या, “हे मालिक, म्हारा उरै रहणा भला सै : आखर म्ह हम तीन मण्डप बणावां, एक तेरै खातर, एक मूसा खातर, एक एलिय्याह कै खातिर।” उसनै बेरा कोनी था के कह के रह्या सै। 34 ओ न्यू कहवैए था के एक बादळ नै आकै उन पै छाया करी, अर जिबब वे उस बादळ तै घिरण लागे तो भय मानगे। 35 फेर उस बादळ म्ह तै यों बचन लिंकड्या, “यो मेरा बेट्टा अर मेरा छांटया होया सै, इसकी सुणो।” 36 या आवाज होंए यीशु एक्का होग्या; अर वे बोल-बात्ते रहे, अर जो कीमे देख्या था उसकी कोए बात उन दिनां म्ह किस्से तै नीं कही।

### एक बाळक ताहीं चंगा करणा जिस म्ह भूंडी औपरी आत्मा थी

37 दुसरै दिन जिबब ओ पहाड़ तै उतरया तो एक बड्डी भीड़ उस तै आ फेटी। 38 अर लखाओ, भीड़ म्ह तै एक माणस नै किल्की मारकै कह्या, “हे गुरु, मै तेरै तै बिनती करुँ सूँ के मेरै बेट्टे पै दया की निगाह फेर दे; क्यूँके ओ मेरा एक्का बेट्टा सै।” 39 अर लखा, एक भूंडी औपरी आत्मा उसनै पकड़ै थी, अर ओ चाणचक किल्की मारै था; अर वा उसनै इसा मरोड़ै थी के ओ मुँह तै झाग फैंकै था; उसनै रोंदकै घणी मुश्किल तै छोड़ै थी। 40 मन्त्रै तेरे चेल्यां तै बिनती करी के उसनै लिकाड़ै, पर वे कोनी काड सके।” 41 यीशु नै जबाब दिया, “हे अबिश्वासी अर जिद्दी माणसो, मै कद ताहीं थारै गेल्या रहूँगा अर थारी ओट्टुगाँ? आपणे बेट्टे नै उरै लिया।” 42 जिबब ओ आवै था तो भूंडी औपरी आत्मा नै उस ताहीं पटक कै मरोड़या, पर यीशु नै उस भूंडी औपरी आत्मा ताहीं धमकाया अर छोरै ताहीं ठीक करके बाप तै थमा दिया। 43 फेर सारे माणस पणमेशर कै घणे सामर्थ तै हैरान होए।

### अपणी मौत का बारै म्ह यीशु की दुबारा भविष्यवाणी

पर जिबब सारे माणस उन सारे कारनाम्यां तै जो ओ करै था, हक्के-बक्के थे, तो उसनै आपणे चेल्यां तै कह्या, 44 “थम इन बात्तां पै गौर करो, क्यूँके माणस का बेट्टा माणसां कै हाथां तै पकड़वाया जाण नै सै।” 45 पर वे इस बात नै कोनी समझै थे, अर या बात उनतै लुहकी रही के उन्नै उसका बेरा नीं पाट्टै; अर वे इस बात कै बारै म्ह उसतै बुझण तै उरै थे।

### सारया तै बड्डा कौण

46 फेर उनम्ह या बहस होण लागी के म्हारै तै बड्डा कौण सै। 47 पर यीशु नै उनके मन के बिचारां ताहीं पढ़ लिया, अर एक बाळक नै लेके आपणै धोरै खड्या करया, 48 अर उनतै कह्या, “जो कोए मेरै नाम तै इस बाळक नै अपणावै सै, ओ मन्त्रै अपणावै सै; अर जो कोए मन्त्रै अपणावै सै, ओ मेरै खन्दाण आळै नै भी अपणावै सै, क्यूँके जो थारै म्ह सारया म्ह छोटे तै छोटा सै, ओए बड्डा सै।”

### जो बिरोध म्ह नीं, ओ मेर म्ह सै

49 फेर यूहन्ना नै कह्या, “हे मालिक, हमनै एक माणस ताहीं तेरै नाम तै भूंडी औपरी आत्मा लिकाड़दे देख्या, अर हमनै उस तै मना करया, क्यूँके ओ म्हारै गेल्या तेरै पाच्छै कोनी आन्दा।” 50 यीशु नै उसतै कह्या, उसनै नाट्टो ना; क्यूँके जो थारै बिरोध म्ह नीं, ओ थारै कात्री सै।”

### सामरियाँ द्वारा यीशु का बिरोध

51 जिबब उसके उप्पर ठाए जाण के दिन पुरे होण पै थे, तो उसनै यरुशलेम जाण का बिचार पक्का करया। 52 उसनै आपणै आगै दूत खन्दाए। वे सामरियाँ कै एक गाम म्ह गए के उसकै खातर जंगहा तयार करै। 53 पर उन माणसां नै उसताहीं उतरण कोनी दिया, क्यूँके ओ यरुशलेम जावै था। 54 न्यू देखके उसके चेल्ले याकूब अर यूहन्ना नै कह्या, “हे प्रभु, तू के चाहवै सै के हम हुक्म देवां, के अकास तै आग गिरकै उन्नै भस्म कर दे?” 55 पर उसनै बोहड़ कै उनताहीं धमकाया [अर कह्या, “थम नीं जाणदे के थम किसी आत्मा के सो। क्यूँके माणस के बेट्टा लोग्गां नै ज्यान तै मारण कोनी आया, बल्के उन्नै बचाण आया सै।”] 56 अर वे किसे दुसरै गाम म्ह चले गये।

### यीशु का चेल्ला बनण का मूल्य

57 जिबब वे राह म्ह जावै थे, तो किसे नै उस तै कह्या, “जित-जित तू जावैगा, मै तेरै पाच्छै हो लूँगा।” 58 यीशु नै उस तै कह्या, “लोमडीयां के घुरकुली अर अकास के पन्छियां के घोसले होवैं सैं, पर माणस के बेट्टे खातर सिर लहकोण नै जंगहा कोनी।” 59 उसनै दुसरै तै कह्या, “मेरै पाच्छै हो ले।” पर उसनै जबाब दिया, “हे प्रभु, मन्त्रै पहल्या जाण दे के मै आपणै बाप नै गाड़ आऊँ।” 60 उसनै उसतै कह्या, “मरे होया नै आपणे मुरदे गाड़ण घो, पर तू जाकै पणमेशर कै राज्य की कहानी सुणा।” 61 एक और नै भी कह्या, “हे प्रभु, मै तेरै पाच्छै हो लूँगा; पर पहल्या मन्त्रै जाण दे के आपणे घरा के माणसां तै बिदा ली याऊँ।” 62 यीशु नै उसतै कह्या, “जो कोए आपणा हाथ हळ पै धरकै पाच्छै देखवै सै, ओ पणमेशर के राज्य कै जोग्गा कोनी।”

### सत्तर चेल्यां का खन्दाया जाणा

10 इन बात्तां कै बात प्रभु नै सत्तर और माणस पक्के करे, अर जिस-जिस गाम अर जंगहा पै ओ खुद जाण आळा था, उडै उन्नै दो-दो करके आपणे आगै खन्दाया। 2 उसनै उनतै कह्या, “पके होये खेत घणे सैं, पर लमणीयारे घाट सैं; इसकरके खेत कै मालिक तै बिनती करो के ओ आपणे खेत काटण नै लमणीयारे खन्दावै। 3 जाओ; लखाओ, मै थमनै भेड्डां कै तरियां भेडीयां कै बिचाळै म्ह खन्दाऊँ सूँ। 4 इसकरके ना बटुआ, ना झोळी, ना जुत्ते ल्यो; अर ना राह म्ह किसे तै नमस्कार करो। 5 जिस किसे घर म्ह जाओ, पहलै कहो, 'इस घर पै उद्धार हो।' 6 जै उडै कोए उद्धार कै

जोगा होगा, तो थारा उद्धार उस पै थमैगा, नीं तो थारै धोरै बोहड़ आवैगा। 7 उस्से घर म्ह रहो, अर जो कीमे उनतै मिलै, ओए खाओ-पीओ, क्यूँके मजदूर नै आपणी मजदूरी मिलणी चाहिए; घर-घर नीं हांडणा। 8 जिस नगर मै जाओ, अर उडै के माणस थमनै उतारै, तो जो कीमे थारै स्याम्ही धरया जावै ओए खाओ। 9 उडै के बिमारों नै चंगा करो अर उनतै कहो, 'पणमेशर का राज्य थारै धोरै आण पहोच्या सै।' 10 पर जिस नगर म्ह जाओ, अर उडै के माणस थमनै नीं अपणावै, तो उसके बजारां म्ह जाकै कहो, 11 'थारै नगर की धूळ भी, जो म्हारे पायां म्ह लागी सै, हम थारै स्याम्ही झाड़ देवां सां; फेरभी न्यु जाण ल्यो के पणमेशर का राज्य थारै धोरै आण पहोच्या सै।' 12 मै थमनै कहूँ सूँ के उस दिन उस नगर हालत घणी सहण जोगी होवैगी।

### अबिश्वासी नगरां नै धिक्कार

13 "हाय खुराजिन ! हाय बैतसैदा ! जो सामर्थ के कारनाम्मे थारै म्ह करे गए, जै सूर-सैदा म्ह करे जांदे तो टाट ओढकै अर राख पै बैठ कै वे कद के मन पलटदे। 14 पर न्याय कै दिन थारी हालत तै सूर-सैदा की हालत घणी सहण जोगी होगी। 15 अर हे कफरनहूम, के तू सुर्ग ताहीं ऊँचा करया जावैगा? तू तो अधोलोक ताहीं तळै जावैगा। 16 "जो थारी सुणै सै, ओ मेरी सुणै सै; अर जो थमनै निच्चा समझै सै, ओ मन्ने निच्चा समझै सै; अर जो मन्ने निच्चा समझै सै; ओ मेरे खन्दाणआळै ताहीं निच्चा समझै सै।"

### सत्तर चेल्यां का लौटना

17 वे सत्तर राज्जी होंदे होये बोहड़े अर बोले, "हे प्रभु, तेरै नाम तै भूंडी औपरी आत्मा भी म्हारे काबू म्ह सै।" 18 उसनै उनतै कह्या, "मै शैतान ताहीं बिजळी की तरियां सुर्ग तै पडया होड़ देख रह्या था। 19 लखाओ, मन्ने थारै ताहीं साँपां अर बिच्छुआं ताहीं रोंदण का, अर बैरी की सारी सामर्थ पै हक्क दिया सै; अर किसे चीज तै थम नै कीमे टोड्या कोनी होवैगा। 20 फेरभी इतने राज्जी मतना होवो के आत्मा थारै काबू म्ह सै, पर इसतै राज्जी होवो थारे नाम सुर्ग पै लिक्खे सै।"

### यीशु का आनन्दित होणा

21 उस्से बख्त ओ पवित्रआत्मा म्ह होकै खुशी तै भरया, अर बोल्या, "हे पिता, सुर्ग अर धरती के प्रभु, मै तेरा धन्यवाद करूँ सूँ के तन्नै इन बात्तां ताहीं ज्ञानियाँ अर श्याणा तै ल्कोए राख्या, अर बाळकां पै प्रगट करया। हम्बै, हे पिता, क्यूँके तन्नै योए भाया। 22 मेरे बाप नै मेरै तै सारा कीमे सौप दिया सै; अर किस्से नै नीं बेरा के बेटा कौण सै, सिवा बाप के, अर बाप कौण सै न्यु भी किस्से नै कोनी बेरा सिवाए बेटे कै, अर ओ जिस पै बेटा उस ताहीं प्रगट करणा चाहवै।" 23 फेर चेल्यां की ओड़ बोहड़ कै एक्के म्ह बोल्या, "धन्य सै वे आँख, जो ये बात जो थम देखो सो, देखै सै। 24 क्यूँके मै थारै तै कहूँ सूँ के घण खरे नब्बियाँ अर राजायां नै चाह्या के जो बात थम देखो सो, देखै, पर कोनी देखी, अर जो बात थम सुणो सो सुणै पर कोनी सुणी।"

### दयालु सामरी का उदाहरण

25 अर लखाओ, एक व्यस्थापक उत्था अर न्यु कहकै उसका हिम्तान लेण लाग्या, "हे गुरु, अनन्त जीवन का वारिस होण खातर मै के करुं?" 26 उसनै उसतै कह्या, "व्यवस्था म्ह के लिख्या सै? तू किस तरियां पढ़ै सै?" 27 उसनै जबाब दिया, "तू प्रभु, आपणे पणमेशर तै आपणे सारै मन अर आपणे सारै जी अर आपणे सारै दम अर आपणी सारी अक्क कै गेल्या प्रेम राख; अर आपणे पड़ोसी तै आपणे जिसा प्रेम राख।" 28 उसनै उसतै कह्या, "तन्नै सई कह्या, "न्यु करिये जिबे तू जिन्दा रहवैगा।" 29 पर उसनै खुद ताहीं धर्मी ठहराण की मर्जी तै यीशु तै बुझया, "तो मेरा पड़ोसी कौण सै? 30 यीशु नै जबाब दिया, "एक माणस यरूशलेम तै यरीहो नै जावै था के डाकुआं नै घेर कै उसके लत्ते तार लिये, अर पिट-छेत कै उसताहीं अधमरा छोड़कै चले गये। 31 अर इसा होया के उस्से राही तै एक याजक जावै था, पर उसनै देखकै टळकै चल्या गया। 32 इस्से ढाळ एक लेवी उस ठोड़ या जंगहा पै आया, ओ भी टळकै चल्या गया। 33 पर एक सामरी मुसाफर ओड़ै तै

लिकडया, अर उस ताहीं देखकै तरस खाया। 34 उसनै उसके लोवै आकै उसके घायों पै तेल अर दाखरस गेरकै पट्टी बाँधी, आपणी सवारी पै चढ़ा कै सराय म्ह लेग्या, अर उसकी सेवा-पाणी करी। 35 दुसरे दिन उसनै दो दीनार काड कै सराय कै मालिक तै दिये, अर कह्या, "इसकी सेवा-पाणी करिये, अर जो कीमे तेरा और लागैगा, ओ मै बोहड़दा होया भर घुगां।" 36 इब तेरी समझ म्ह जो डाकुआं म्ह घिरग्या था, इन तीनां म्ह तै उसका पड़ोसी कौण ठहरया?" 37 उसनै कह्या, "ओए जिसनै उस पै दया करी।" यीशु नै उसतै कह्या, "जा, तू भी न्युए करया कर।"

### मार्था अर के घर यीशु

38 जिब्व वे जावै थे तो ओ एक गाम म्ह गया, अर मार्था नाम की एक लुगाई नै उसताहीं आपणे घरा तारया। 39 मरियम नाम की उसकी एक बेबे थी। वा प्रभु कै पायां म्ह बैठकै उसका बचन सुणै थी। 40 पर मार्था सेवा-पाणी करदे-करदे घबरा गी, अर उसके लवै आकै कहण लागी, "हे प्रभु, के तन्नै कीमे भी फिक्र कोनी के मेरी बेबे नै मेरै ताहीं सेवा-पाणी कै खातर एक्की छोड़ दिया सै?" इस करकै उसतै कह के मेरी मदद करै।" 41 प्रभु नै उसतै जबाब दिया, "मार्था, हे मार्था; तू घणी बात्तां खातर फिक्र करै अर घबरावै सै। 42 पर एक बात जरूर सै, अर उस बढ़िया हिस्से ताहीं मरियम नै छोट लिया सै जो उस तै खोस्या कोनी जावैगा।"

### चेल्यां ताहीं प्रार्थना करणा सिखाणा

11 फेर उसनै बारहां ताहीं बुलाकै उन्नै सारी भूंडी औपरी आत्मायां अर बीमारियाँ ताहीं दूर करण की सामर्थ अर हक्क दिया, 2 अर उन्नै पणमेशर कै राज्य का प्रचार करण अर बिमारां ताहीं आच्छा करण खातर खन्दाया। 3 उसनै उनतै कह्या, राह खातर कीमे ना लियो, ना तो लाठी, ना झोळी, ना रोटी, जा रपिये अर ना दो-दो कुरते। 4 जिस किसे घर म्ह उतरो, उड़ए रहो, अर उड़ए तै बिदा होइयो।

### प्रार्थना के सम्बन्ध म्ह यीशु की शिक्षा

5 जो कोए थमनै नीं अपणावै, उस नगर तै जांदे होये आपणे पायां की धुळ झाड़ दियो के उन पै गवाही होवै।" 6 आखर म्ह वे लिकड कै गाम-गाम सुसमाचार सुणयान्दे, अर हरेक माणसां नै चंगा करदे होये हांडदे रहे। 7 देश के चौथाई राजा हेरोदेस यों सारा सुण कै घबराग्या, क्यूँके कीमे नै कह्या, के यूहन्ना मरे होया म्ह तै जिन्दा होया सै, 8 अर कुछां नै न्यु कह्या के एलिय्याह दिख्या सै, अर औरां नै न्यु के पुराणे नब्बियाँ म्ह तै कोए जिन्दा होया सै। 9 पर हेरोदेस नै कह्या, "यूहन्ना का तो मन्ने सिर कटवाया, इब यो कौण सै जिसकै बाबत इसी बात सुणु सूँ?" अर उसनै उसताहीं देखण की चाहन्ना करी। 10 फेर प्रेरितां नै बोहड़कै जो कीमे उन्नै करया था, उसताहीं बता दिया; अर ओ उन्नै न्यारे करकै बैतसैदा नामक नगर म्ह लेग्या। 11 न्यु जाण कै भीड़ उसके गेल्या हो ली, अर ओ राज्जी होकै उनतै फेट्या, अर उन तै पणमेशर कै राज्य की बात करण लाग्या, अर जो चंगे होणा चाहवै थे उन ताहीं चंगा करया। 12 जिब्व दिन छिपण लाग्या तो बारहा नै आकै उसतै कह्या, "भीड़ नै जाण दे के चौगरदे के गाम्मां अर बगड़ां म्ह जाकै ठहरै अर खाणै का जुगाड़ करै, क्यूँके हम उरै बियाबान जंगहा म्ह सां।" 13 उसनै उनतै कह्या, "थमए उन्नै खाण नै द्यो।" उन्नै कह्या, "म्हारै धोरै पाँच रोटी अर दो मच्छियां नै छोड़ कै और कीमे कोनी; पर हम्बै, जै हम जाकै इन सारया खातर खाणा मोल ल्यावां, फेर हो सकै सै।" वे माणस तो पाँच हजार माणसां कै करीबन थे।

### यीशु अर बालजबूल

14 फेर उसनै आपणे चेल्यां तै कह्या, "उन्नै पचास-पचास करकै लैणपतार बिठा द्यो।" 15 उन्नै न्युए करया, अर सारया ताहीं बिठा दिया। 16 फेर उसनै वे पाँच रोटियाँ अर दो मच्छियाँ ली, सुर्ग कात्री लखाके धन्यवाद करया, अर तोड़-तोड़कै चेल्यां ताहीं दँदा गया के माणसां ताहीं बाँडे। 17 फेर सारे खाकै छिकगे, अर चेल्यां नै बचे होड़ टुकड्यां तै बारहां टोकरी भरकै ठाई।

18 जिबब ओ एकूँ म्ह प्रार्थना करै था अर चेल्ले उसकै गेल्या थे, तो उसनै उनतै बुझ्या, "माणस मन्त्रे के कहवै सै?" 19 उन्नै जबाब दिया, "यूहन्ना बपतिस्मा देवण आळा, अर कोए एलिय्याह, अर कोए यों के पुराण नब्बियाँ म्ह तै कोए जिन्दा होया सै।" 20 उसनै उनतै बुझ्या, "पर थम मन्त्रे के कहो सो? पतरस नै जबाब दिया, "पणमेशर का मसीह।" 21 फेर उसनै उनतै चिताकै कह्या के न्यू किस्से ना कहियो। 22 फेर उसनै कह्या, "माणस कै बेटे खातर जरूरी सै के ओ घणा दुःख ठावै, अर पुर्णिए अर प्रधान याजक अर शास्त्री उसनै माडा समझ कै मार देवै, अर ओ तीसरै दिन जिन्दा होज्या।" 23 उसनै सारया तै कह्या, जै कोए मेरै गेल्या आणा चाहवै, तो खुद तै नाटै अर हरेक दिन आपणा क्रूस ठाए मेरै गेल्या हो ले।

### अधूरे सुधार तै बिपदा

24 क्यूँके जो कोए आपणी ज्यान बचाणा चाहवैगा ओ उसनै खोवैगा, पर जो कोए मेरी खातर आपणी ज्यान खोवैगा ओए उसनै बचावैगा। 25 जै माणस सारी दुनिया नै पा ले अर आपणी ज्यान खो दे या उसका नुकसान ठावै, तो उसनै के फायदा? 26 जो कोए मेरैतै अर मेरी बात्तां तै सरमावैगा, माणस का बेटा भी, जिबब आपणी अर आपणे बाप की अर पवित्र सुर्गदुत्तां की महिमा सुदा आवैगा, तो उसतै सरमावैगा।

### धन्य कौण सै?

27 मै थमनै साची कहुँ सूँ के जो याडूँ खड़े सै, उनम्ह तै कीमे इसे सै के जिबब ताहीं पणमेशर का राज्य ना देख लेवै, जद ताहीं मौत का सुआद कोनी चाखै। 28 इन बात्तां कै कोए आठ दिनां पाच्छै ओ पतरस, यूहन्ना अर याकूब नै गेल्या लेकै प्रार्थना करण खातर पहाड़ पै गया।

### स्वर्गीय निशान की माँग

29 जिबब ओ प्रार्थना करै था, तो उसकै मुँह का रूप बदलग्या, अर उसके लत्ते धोळे होकै चमकण लागे। 30 अर लखाओ, मूसा अर एलिय्याह ये दो माणस उसकै गेल्या बतळावै थे। 31 ये महिमा सुदा दिखखे अर उसकै मरण का जिक्रा करै थे, जो यरुशलेम म्ह होण आळा था। 32 पतरस अर उसके ढब्बी नींद म्ह होरे थे, अर जिबब सई तरियां सोद्री म्ह आए, तो उसकी महिमा अर उन दो माणसां नै, जो उसकै गेल्या खड़े थे, देख्या।

### देही का दिवा

33 जिबब वे उसकै धोरै तै जाण लागे, तो पतरस नै यीशु तै कह्या, "हे मालिक, म्हारा उरै रहणा भला सै: आखर म्ह हम तीन मण्डप बणावा, एक तेरै खातर, एक मूसा खातर, एक एलिय्याह कै खातिर।" उसनै बेरा कोनी था के कह के रह्या सै। 34 ओ न्यू कहवैए था के एक बादळ नै आकै उन पै छाया करी, अर जिबब वे उस बादळ तै घिरण लागे तो भय मानगे। 35 फेर उस बादळ म्ह तै यों बचन लिक्डया, "यो मेरा बेटा अर मेरा छांटया होया सै, इसकी सुणो।" 36 या आवाज होंदए यीशु एक्का होग्या; अर वे बोल-बाल्ले रहे, अर जो कीमे देख्या था उसकी कोए बात उन दिनां म्ह किस्से तै नीं कही।

### शास्त्रीयां अर फरिसियाँ की भर्त्सना

37 दुसरै दिन जिबब ओ पहाड़ तै उतरया तो एक बड्डी भीड़ उस तै आ फेटी। 38 अर लखाओ, भीड़ म्ह तै एक माणस नै किल्की मारकै कह्या, "हे गुरु, मै तेरै तै बिनती करुँ सूँ के मेरे बेटे पै दया की निगाह फेर दे; क्यूँके ओ मेरा एक्का बेटा सै।" 39 अर लखा, एक भूंडी औपरी आत्मा उसनै पकड़ै थी, अर ओ चाणचक किल्की मारै था; अर वा उसनै इसा मरोड़ै थी के ओ मुँह तै झाग फैकै था; उसनै रोदकै घणी मुश्किल तै छोड़ै थी। 40 मन्त्रे तेरे चेल्या तै बिनती करी के उसनै लिकाड़ै, पर वे कोनी काड सके।" 41 यीशु नै जबाब दिया, "हे अबिश्वासी अर जिद्दी माणसो, मै कद ताहीं थारै गेल्या रहूँगा अर थारी ओहूँगा? आपणे बेटे नै उरै लिया।" 42 जिबब ओ आवै था तो भूंडी औपरी आत्मा नै उस ताहीं पटक कै मरोड़या, पर यीशु नै उस भूंडी औपरी

आत्मा ताहीं धमकाया अर छोरै ताहीं ठीक करके बाप तै थमा दिया। 43 फेर सारे माणस पणमेशर कै घणे सामर्थ तै हैरान होए। पर जिबब सारे माणस उन सारे कारनाम्यां तै जो ओ करै था, हक्के-बक्के थे, तो उसनै आपणे चेल्यां तै कह्या, 44 "थम इन बात्तां पै गौर करो, क्यूँके माणस का बेटा माणसां कै हाथां तै पकड़वाया जाण नै सै।"

45 पर वे इस बात नै कोनी समझै थे, अर या बात उनतै लुहकी रही के उन्नै उसका बेरा नीं पाटै; अर वे इस बात कै बारै म्ह उसतै बुझण तै उरै थे। 46 फेर उनम्ह या बहस होण लागी के म्हारै तै बड्ठा कौण सै। 47 पर यीशु नै उनकै मन के बिचारा ताहीं पढ़ लिया, अर एक बाळक नै लेकै आपणे धोरै खड़या करया, 48 अर उनतै कह्या, "जो कोए मेरै नाम तै इस बाळक नै अपणावै सै, ओ मन्त्रे अपणावै सै; अर जो कोए मन्त्रे अपणावै सै, ओ मेरै खन्दाण आळै नै भी अपणावै सै, क्यूँके जो थारै म्ह सारया म्ह छोटे तै छोटा सै, ओए बड्ठा सै।" 49 फेर यूहन्ना नै कह्या, "हे मालिक, हमनै एक माणस ताहीं तेरे नाम तै भूंडी औपरी आत्मा लिकाड़दे देख्या, अर हमनै उस तै मना करया, क्यूँके ओ म्हारै गेल्या तेरै पाच्छै कोनी आन्दा।" 50 यीशु नै उसतै कह्या, उसनै नाटो ना; क्यूँके जो थारै बिरोध म्ह नीं, ओ थारै कात्री सै।" 51 जिबब उसके उप्पर ठाए जाण के दिन पुरे होण पै थे, तो उसनै यरुशलेम जाण का बिचार पक्का करया। 52 उसनै आपणे आगै दूत खन्दाए। वे सामरियाँ कै एक गाम म्ह गए के उसकै खातर जंगहा त्यार करै।

53 पर उन माणसां नै उसताहीं उतरण कोनी दिया, क्यूँके ओ यरुशलेम जावै था। 54 न्यू देखकै उसके चेल्ले याकूब अर यूहन्ना नै कह्या, "हे प्रभु, तू के चाहवै सै के हम हुक्म देवां, के अकास तै आग गिरकै उन्नै भस्म कर दे?"

### पाखण्ड कै बिरुद्ध चेतावनी

12 इतनै म्ह जिब हजारां की भीड़ लागी, उरै ताहीं के वे एक-दुसरे पै पडण लागे थे, तो ओ सारया तै पहल्या अपणे चेल्यां तै कहण लाग्या, "फरिसियाँ कै कपटी खमीर तै चौकन्ने रहे। 2 कीमे ढक्या कोनी, जो उधाड़या जावैगा; ना कीमे लुक्या सै, जिसका बेरा नीं पटै। 3 इस करके जो कीमे थमनै अन्धेरे म्ह कह्या सै, ओ उजाळै म्ह सुणया जावैगा; अर जो थमनै कोठोड़ियाँ म्ह कात्रो कान कह्या सै, ओ छात पै तै प्रचार करया जावैगा।

### किस तै डरां?

4 "मै थारै तै जो मेरे ढब्बी सो कहुँ सूँ के जो देही नै घात करै सै पर उसकै पाच्छै और कीमे कोनी कर सकदे, उन तै डरियो मतना। 5 मै थमनै सोद्री दुवाऊँ सूँ के थमनै किसतै डरणा चाहिये, घात करण कै पाच्छै जिस ताहीं नरक म्ह गेरण हक्क सै, उस्से तै डरियो। हम्बै, मै थारै तै कहुँ सूँ उस्से तै डरियो। 6 के दो पिस्या की पांच गौरियाँ कोनी बिकदी? फेरभी पणमेशर उनम्ह तै एक नै भी कोनी भुल्दा। 7 थारै सिर के सारे बाळ भी गिणे होये सै, इस करके डरो मतना, थम घणी गौरियाँ तै बढकै सो।

### यीशु ताहीं स्वीकार या अस्वीकार करणा

8 "मै थारै तै कहुँ सूँ जो कोए माणसां कै स्याम्ही मन्त्रे मान लेवैगा उसनै माणस का बेटा भी पणमेशर कै सुर्गदुत्तां कै स्याम्ही मान लेवैगा। 9 पर जो माणसां कै स्याम्ही मेरै बारै म्ह मुकर जावैगा, उसका पणमेशर कै सुर्गदुत्तां कै स्याम्ही इन्कार करया जावैगा। 10 "जो कोए माणस कै बेटे कै बिरोध म्ह कोए बात कहवै, उसका वो खोट बखस्या जावैगा, पर जो पवित्रआत्मा की बुराई करै, उसका वो खोट बखस्या कोनी जावैगा।" 11 जिबब माणस थमनै पंचायतां अर हाकीमां अर अधिकारियां कै स्याम्ही ल्यावै, तो फिक्र ना करियो के हम किस तरियां तै या के जबाब देवां, या के कहवां। 12 क्यूँके पवित्रआत्मा उस्से टैम थमनै सिखा देगा के, के कहणा चाहिये।"

### एक साहूकार बेअक्के का उदाहरण

13 फेर भीड़ म्ह तै एक नै उसतै कह्या, "हे गुरु, मेरे भाई तै कह के बाप कै धन नै मेरै गेल्या बांड लेवै।" 14 उसनै उसतै कह्या, "हे माणस, किसनै मेरै ताहीं थारा न्यायी या बांडणआळा बणा दिया सै?" 15 अर उसनै उनतै कह्या,

“चौकन्ने रहो, अर सारी तरियां कै लोभ-लालच तै खुद नै बचा कै राख्खो; क्युँके किसे की जिन्दगी उसकै आब्ल धन तै कोनी होंदी।” 16 उसनै उनतै एक उदाहरण कइया, “किसे साहूकार की धरती म्ह घणी पैदावार होई।” 17 फेर ओ आपणे मन म्ह बिचार करण लाग्या, “मै के करुं? क्युँके मेरै उरै जंगहा कोनी जित आपणी उपज वैगरा धरुं।” 18 अर उसनै कइया, “मै न्यू करुंगा : मै आपणी बखारियाँ (खलिहान) तोड़ कै उनतै कुठला बनाऊंगा; अर उड़ै आपणा सारा नाज अर धन धरुंगा; 19 अर आपणे जी तै कहुँगा के जी, तेरै धोरै घणे साल खातर घणा धन धरया सै; चैन कर, खा, पी, सुख तै रह।” 20 पर पणमेशर नै उसतै कइया, “हे बेअकू, इस्से रात तेरा जी तेरै तै ले लिया जावैगा; फेर जो कीमे तन्नै कइया करया सै ओ किसका होगा?” 21 इस्से तरियां ओ माणस भी सै जो आपणे खातर धन कइया करै सै, पर पणमेशर की निगाह म्ह साहूकार कोनी।”

### पणमेशर पै भरोस्सा राख्खो

22 फेर उसनै आपणे चेल्यां तै कइया, “इस करके तै थम नै कहुँ सूँ, आपणे प्राण की फ़िक्र ना करो के हम के खावांगे; ना आपणी देही की के, के पहरांगे। 23 क्युँके खाणै तै जी, अर लत्यां तै देही बढ़के सै। 24 कागां पै ध्यान द्यो: वे ना बोवै सै, ना काट्टे सै; अर ना उनके भण्डार अर कुठले होवै सै; फेरभी पणमेशर उन्नै पाळै सै। थारा मोल पन्छियाँ तै बाध सै। 25 थारे म्ह तै इसा कौण सै जो फ़िक्र करण तै आपणी उम्र की एक घड़ी भी बाध कर सकै सै? 26 इस करके जै थम सारया तै छोड़ा काम भी कोनी कर सकदे, तो और बात्तां खातर क्यातै फ़िक्र करो सो? 27 सोसनां कै दरख्तां पै गौर करो के वे किस तरियां बढ़ै सै: वे ना मैहनत करदे, ना कातदे सै; फेरभी मै थारै तै कहुँ सूँ के सुलेमान भी आपणे एश-आराम म्ह उनम्ह तै किसे एक के बरगे लत्ते कोनी पहर रह्या था। 28 इस करके जै पणमेशर मैदान की घास नै, जो आज सै अर काल भाड़ म्ह झोक्की जावैगी, इसा पहरावै सै; तो हे अल्प बिश्वासियाँ, ओ थमनै क्यातै नीं पहरावैगा? 29 अर थम इस बात की टोह म्ह ना रहो के, के खावांगे अर के पिवांगे, अर शक ना करो। 30 क्युँके दुनिया की जात इन सारी चिजां की टोह म्ह रहवै सै: अर थारे बाप नै बेरा सै के थमनै इन चिजां की आंट सै। 31 पर उसकै राज्य की टोह म्ह रहो, तो ये चीज भी थमनै मिल ज्यागीं।

### स्वर्गीय धन

32 “हे छोटे टोळ, मतना उरै; क्युँके थारे बाप नै न्यू भाया सै, के थमनै राज्य देवै।” 33 आपणा धन बेचके दान कर द्यो; अर आपणे खातर इसे बटुए बनाओ जो पूराणे कोनी होन्दे, यानिके सुर्ग पै इसा धन कइया करो जो सापड़दा कोनी अर जिसके धोरै चोर कोनी जांदा, अर कीड़ा कोनी बिगाड़दा। 34 क्युँके जड़ै थारा धन सै, उड़ै थारा मन भी लाग्या रहवैगा।

### जागदे रहो

35 “थारी कड़ बन्धी रहवै अर थारे दिवे बळदे रहवै, 36 अर थम उन माणसां कै बरगे बणो, जो आपणे मालिक की बाट देख रहे हो के ओ ब्याह तै कद बोहड़ैगा, के जिब्व आके दरवाजा खटखटावै तो जिब्वे उसकै खातर खोल दें। 37 धन्य सै वे नौकर जिन ताहीं मालिक आके जागदा पावै, मै थमनै साच्चि कहुँ सूँ के ओ कड़ बान्ध कै उन्नै खाणा खाण ताहीं बिठावैगा, अर धोरै आके उनकी सेवा-बाड़ी करेगा। 38 जै ओ रात कै दुसरे पहर या तीसरे पहर म्ह आके उन ताहीं जागदा पावै, तो वे नौकर धन्य सै। 39 जै थम बेरा पाड़ो के जै घर का मालिक जाणदा के चोर किस बख्त आवैगा, तो जागदा रहन्दा अर आपणे घर म्ह पड़ या सेंध कोनी लागण देवै। 40 थम भी त्यार रहो; क्युँके जिस घड़ी की थम सोचदे भी कोनी, उस्से घड़ी माणस का बेड़ा आ जावैगा।”

### बिश्वास जोग्गा या अबिश्वास जोग्गा दास

41 फेर पतरस बोल्या, “हे प्रभु, के यो उदाहरण तू म्हारै तए या सारया नै कहवै सै।” 42 प्रभु बोल्या, “ओ बिश्वासजोग्गा अर अकलमंद भण्डारी कौण

सै, जिसका मालिक उस ताहीं नौकर-चाकरां पै सरदार ठहरावै के उन्नै टैम पै खाणा-सामां दे। 43 धन्य सै ओ नौकर, जिस ताहीं मालिक आके इसाए करदे पावै। 44 मै थमनै साच्चि कहुँ सूँ, ओ उस ताहीं आपणी सारी धन-माया का सरदार ठहरावैगा। 45 पर जै ओ नौकर सोचण लागे के मेरा मालिक आण म्ह वार कर रह्या सै, दासां अर दासियाँ ताहीं छेत्तण-पिट्टण लागज्या अर खाण-पीण अर दारुबाज होण लागे। 46 तो उस नौकर का मालिक इसे दिन, जिब्व ओ उसकी बाट देख्दा कोनी रहवै, अर इसा टैम जिसका उसनै ना बेरा हो, आवैगा अर उसनै भारया सजा देके उसका हिस्सा अबिश्वासियाँ गेल्या ठहरावैगा। 47 ओ नौकर जो आपणे मालिक की मर्जी जाणै था, अर त्यार ना रह्या अर ना उसकी मर्जी कै मुताबिक चाल्या, घणा छितैगा। 48 पर जो नीं जाणके मार खाण के काम करै ओ माड़ा-सा छितै। इस करके जिस ताहीं घणा दिया गया सै, उसतै माँगया जावैगा; अर जिस ताहीं घणा सौप्या सै, उस तै घणा लिया जावैगा।

### यीशु कै आण का नतिजा

49 “मै धरती पै आग लाण नै आया सूँ: अर के चाहुँ सूँ सिर्फ यो के इब सुलग जांदी! 50 मन्ने तो एक बपतिस्मा लेणा सै, अर जिब्व ताहीं ओ ना हो ले जद ताहीं मै कीसी बिपदा म्ह रहूँगा! 51 के थम समझो सो के मै धरती पै मिलाप करण आया सूँ? मै थम नै कहुँ सूँ: ना, बल्के न्यारे करण आया सूँ। 52 क्युँके इब तै एक घर म्ह पाँच माणस आपस म्ह बिरोध राख्खेगें, तीन दो तै अर दो तीन तै। 53 बाप बेटे तै, अर बेटा बाप तै बिरोध राख्खेगा; माँ बेट्टी तै, अर बेट्टी माँ तै, सासूँ बहूँ तै, अर बहूँ सासूँ तै बिरोध राख्खेगी।”

### समय के लक्षण

54 उसनै भीड़ तै कइया, “जिब्व थम बादळ नै पश्चिम तै उठदे देक्खो सो तो जिब्वे कहो सो के मिह आवैगा, अर न्यूर हो सै; 55 अर जिब्व दक्षिणी बाळ चालदी देक्खो सो तो कहो सो के लूह चालेगी, अर न्यूर हो सै। 56 हे बेअकू ! थम धरती अर अकास कै रूप-रंग म्ह भेद कर सको सो, पर इस युग कै बाबत भेद करणा क्यातै नीं जाणदे?

### अपणे मुददई तै समझौता

57 “थम खुद फैसला क्यातै कोनी कर लेंदे के सई सै?” 58 जिब्व तू आपणे मुददई के गेल्या हाकिम कै धोरै जावै सै तो राही म्ह उसतै छुटण की कोशिश कर ले, इसा ना हो के तन्नै न्यायी कै धोरै खिच ले जावै, अर न्यायी तन्नै सिपाही ताहीं थमावै अर सिपाही तन्नै जेळ म्ह गेर दे। 59 मै तेरै तै कहुँ सूँ के जिब ताहीं तू दमड़ी-दमड़ी नीं भर देवैगा जिद ताहीं ओड़ै तै छुटण नीं पावैगा।

### मन फिराओ या नाश हो

13 उस बख्त कुछ माणस आण पहोच्चे, अर उसतै उन गलीलियाँ का जिक्रा करण लागे, जिनका लहू पिलातुस नै उन ए कै बलिदानां कै गेल्या मिलाया था। 2 न्यू सुण कै उसनै उनतै जबाब म्ह कइया, “के थम समझो सो के ये गलीली और सारे गलीलीयां तै घणे पापी थे के उन पै इसी बिपदा आण पड़ी? 3 मै थमनै कहुँ सूँ के ना; पर जै थम मन नीं पलटोगे तो थम भी इस्से तरियां नास होओगे। 4 या, के थम समझो सो के वे अठारह जणे जिनपै शिलोह का गुम्मत पड़या, अर वे दब कै मरगे: यरुशलेम के और सारे बासिन्द्यां तै घणे अपराधी थे? 5 मै थमनै कहुँ सूँ के ना; पर जै थम मन ना पलटोगे तो थम भी इस्से तरियां नास होओगे।”

### फळ-रहित अंजीर के दरख्त का उदाहरण

6 फेर उसनै यो उदाहरण भी कइया, “किसे की अंगूर की बारी म्ह अंजीर का दरख्त लागरया था। ओ उसम्ह फळ टोहण आया, पर कोनी मिल्या। 7 फेर उसने बारी कै रुखाळै तै कइया, “लखा, तीन साल तै म्ह इस अंजीर कै दरख्त पै फळ टोहण आऊँ सूँ, पर कोनी पान्दा। इसनै काट बगा के यो

धरती ने भी क्यों रुंदै। 8 उसने उसतै जबाब दिया, "हे मालिक, इस साल और रहण दे के मै इसकै चौरदे के खोदके खाद गरु। 9 जै आगे फळ आग्या तो ठीक, नी तो काट दियो।"

### सब्त के दिन कुबड़ी लुगाई तार्ही चंगा करणा

10 सब्त के दिन ओ एक आराधनालय म्ह उपदेश देवै था। 11 उडै एक लुगाई थी जिसम्ह अठारह साल तै एक माड़ा करण आळी भूडीओपरी आत्मा थी, अर वा कुबड़ी होगी थी अर किस्से तरियां भी सीधी कोनी हो सकै थी। 12 यीशु नै उस तार्ही देखकै बुलाया अर कह्या, "हे नारी, तू आपणी कमजोरी तै छुटागी।" 13 फेर उसनै उस पै हाथ धरया, अर वा जिब्वे सीधी होगी अर पणमेशर की बड़ाई करण लागी। 14 इसकरके के यीशु नै सब्त के दिन उस तार्ही चंगा करया था, आराधनालय का सरदार चीडके माणसां तै कहण लाग्या, "छः दिन सै जिनम्ह काम करणा चहिये, आखर म्ह उन्ने दिनां म्ह आके चंगे होवो, पर सब्त के दिन नी।" 15 न्यू सुण के प्रभु नै जबाब दिया, "हे कपटियों, के बचन के दिन थारै म्ह तै हरेक आपणे बैळद या गधे नै थान म्ह तै खोलके पाणी पिलाण कोनी ले जान्दा? 16 तो के सई कोनी था के या लुगाई जो अब्राहम की बेटी सै जिस तार्ही शैतान नै अठारह साल तै जुड़ राख्या था, सब्त के दिन इस बन्धन तै छुटाई जावै?" 17 जिब्वे उसनै ये बात कही, तो उसके सारे बिरोधी सर्मिन्दा होंगे, अर साबती भीड़ उन महिमा के कारनाम्यां तै जो ओ करै था, राजी होई।

### राई के दाने का उदाहरण

18 फेर उसनै कह्या, "पणमेशर का राज्य किस जिसा सै? अर मै उसका उदाहरण किसतै द्यु? 19 ओ राई के दाणे की ढाळ सै, जिस तार्ही किसे माणस नै लेके आपणी बारी म्ह बोया : अर ओ बढ़के दरख्त बणग्या; अर अकास के सारे पन्धियाँ नै उसकी ढाळीयाँ पै बसेरा करया।"

### खमीर का उदाहरण

20 उसनै दुबारै कह्या, "मै पणमेशर के राज्य का उदाहरण किस तै द्यु? 21 ओ खमीर की ढाळ सै, जिस तार्ही किसे लुगाई नै लेके तीन पसेरी आटे म्ह रळया, अर होन्दे-होन्दे सारा आटा खमीर होग्या।"

### सकेत द्वार

22 ओ नगर-नगर, अर गाम-गाम होके उपदेश देन्दा होया यरुशलेम की ओड़ जावै था, 23 तो किसे नै उसतै बुझया, "हे प्रभु, के उद्धार पाण आळे घाट सै?" उसनै उनतै कह्या, 24 "भीडे दरवाजे तै बड़ण की कोशिश करो, क्यूँके मै थम नै कहुँ सूँ के घण खरे उसम्ह बड़ना चाहवैगें, अर कोनी बड़ सकैगें। 25 जिब्वे घर का मालिक उठके दरवाजा भेड़ देगा, अर थम बाहरण खड़े होये खटखटाके कहण लागो, "हे प्रभु, म्हारे खातर खोल दे," अर ओ जबाब देवै, "मै थमनै कोनी जाणदा, थम कित के सो?" 26 फेर थम कहण लागो, "हमनै तेरे स्याम्ही खाया-पिया अर तनै म्हारे बजारां म्ह उपदेश दिया।" 27 पर ओ कहवैगा, "मै थमनै कहुँ सूँ मै कोनी जाणदा, थम कित के सो। हे भुन्डे काम करणीयो, थम सारे मेरै तै दूर रहो।" 28 उडै रोणा अर दाँद पिसणा होगा; जिब्वे अब्राहम अर इसहाक अर याकूब अर सारे नब्बियाँ तार्ही पणमेशर राज्य म्ह बैट्टे, अर खुद नै बाहरण लिकाड़े होये देखोगे; 29 अर पूरब अर पच्छिम; जबाब अर दक्खिन तै माणस आके पणमेशर के राज्य म्ह जीमणे म्ह जीमैगें। 30 अर लखाओ, जो पाच्छले सै वे पहलड़े होंगें, अर जो पहलड़े सै वे पाच्छले होंगें।"

### हेरोदेस की दुश्मनी

31 उससे टैम कीमे फरिसियाँ नै आके उसतै कह्या, "उरै तै लिकड़या, क्यूँके हेरोदेस तन्नै मार देणा चाहवै सै।" 32 उसनै उनतै कह्या, "जाके उस लोमड़ी तै कह द्यो के लखा, मै आज अर काल भूडीओपरी आत्मायाँ नै काडू सूँ अर बीमारां नै चंगा करुँ सूँ, अर तीसरे दिन आपणा काम पूरा करुंगा।

33 फेर भी आज अर काल अर परसो चालणा जरुर सै, क्यूँके हो नी सकदा के कोए नब्बी यरुशलेम के बाहरण जावै।

### यरुशलेम के खातर बिलाप

34 "हे यरुशलेम ! हे यरुशलेम ! तू जो नब्बियाँ नै मारै सै, अर जो तेरै धोरै खन्दाए गए सै उन पै पत्थर बरसावै सै। कितनी ए बर मन्नै न्यू चाहया के जिस ढाळ मुर्गी आपणे बाळकां नै आपणे पाक्खां तळै कड्डे करै सै, उससे तरियां ए मै भी तेरे बाळकां नै कड्डा करुं, पर थमनै न्यू नी चाहया। 35 लखाओ, थारा घर थारे खातर उजाड़ छोड्या जावै सै, मै थमनै कहुँ सूँ : जिब्वे तार्ही थम ना कहोगे, 'धन्य सै ओ, जो प्रभु के कान्नी तै आवै सै, 'जद तार्ही थम मन्नै दुबारै कदे नी देखोगे।"

### फरीसी के घरा यीशु

14 फेर ओ सब्त के दिन फरिसियाँ के सरदारां म्ह तै किसे के घरा रोटी खाण नै गया; अर वे उसकी टाह म्ह थे। 2 उडै एक माणस उसके स्याम्ही था; जिसम्ह जलन्धर की बीमारी थी। 3 इस पै यीशु नै व्यवस्थापकां अर फरिसियाँ तै कह्या, "के सब्त दिन आच्छा करणा सई सै अक नी?" 4 पर वे बोल-बाले रहे। फेर उसनै उस तार्ही छू के चंगा करया अर जाण दिया, 5 अर उनतै कह्या, "थारै म्ह तै इसा कौण सै, जिसका गधा या बैळद कुअ म्ह पड़या अर ओ सब्त के दिन उसनै जिब्वे बाहरण कोनी लिकड़ै?" 6 वे इन बात्तां का कीमे जबाब कोनी दे पाए।

### नम्रता अर मेहमान-नवाजी

7 जिब्वे उसनै देख्या के न्योदे होये माणस किस तरियां खास- खास जंगहा छांट लेवै सै तो एक उदाहरण देके कह्या, 8 "जिब्वे कोये तन्नै ब्याह म्ह बुलावै, तो खास जंगहा पै नी बैठणा, कदे इसा ना हो के उसनै तेरै तै भी बड्डे तार्ही न्योद राख्या हो, 9 अर जिसनै तेरै तार्ही अर उस तार्ही दोनुआ तार्ही न्योदा दिया सै, आके कहवै, 'इसनै जंगहा दे, ' अर फेर तन्नै सर्मिदा होके सारया तै तळै बैठणा पडै। 10 पर जिब्वे तू न्योदा जावै तो सारया तै तरली जंगहा बैठ के जिब्वे ओ, जिसनै तेरै तार्ही न्योदा सै आवै, तन्नै कहवै, "हे याडी, आगे बढ़के बैठ, फेर तेरै गेल्या बैठण आळ्यां के स्याम्ही तेरी बड़ाई होवैगी। 11 क्यूँके जो कोए खुद नै बड्डा बणावैगा, ओ छोटा करया जावैगा, अर जो कोए खुद नै छोटा बणावैगा, ओ बड्डा करया जावैगा।"

12 फेर उसनै आपणे न्योदा देणीयै तै भी कह्या, "जिब्वे तू दिन का या रात का जिमणा करै, तो आपणे ढब्बियाँ या भाईयां या कुन्बे या साहूकार पड़ोसीयां नै ना न्योद, कदे इसा ना हो के वे भी तन्नै न्योदा देवै, अर तेरा बदला हो जावै। 13 पर जिब्वे तू जिमणा करै तो कंगाल, टुंडे, लंगड़े अर आंध्यां नै न्योद। 14 जिब्वे तू धन्य होवैगा, क्यूँके उनके धोरै तेरै तार्ही बदला देण नै कीमे कोनी, पर तन्नै धर्मियां के जिन्दा होण का ईनाम मिलैगा।"

### बड्डे जिमणै का उदाहरण

15 उसके गेल्या खाणा खाण आळ्यां म्ह तै एक नै ये बात सुण के उस तै कह्या, "धन्य सै ओ जो पणमेशर राज्य म्ह रोटी खावैगा।" 16 यीशु नै उसतै कह्या, "किसे माणस नै बड्डा जिमणा करया अर घणा तार्ही न्योदा। 17 जिब्वे खाणा त्यार होग्या तो उसनै आपणे नौकर के हाथां न्योदे होये माणसां तार्ही कुह्ना खन्दाया, 'आओ, इब खाणा त्यार सै।' 18 पर वे सारे के सारे माफी माँगण लागे। पहलड़ै नै उसतै कह्या, "मन्नै खेत मोल लिया सै, अर जरुरी सै के उसनै देखुँ; मै तेरै तै बिनती करुँ सूँ मन्नै बखस दे।" 19 दूसरे नै कह्या, "मन्नै पाँच जोड़े बैळद मोल लिए सै, उन्नै परखण जाऊँ सूँ; मै तेरै तै बिनती करुँ सूँ, मन्नै बखस दे।" 20 एक और नै कह्या, "मन्नै ब्याह करया सै, इसकरके मै नी आ सकदा।" 21 उस नौकर नै आके आपणे मालिक तार्ही ये बात कह सुणाई। फेर घर के मालिक नै खुन्दक म्ह आके, आपणे नौकर तार्ही कह्या, "नगर के बजारां अर गळीयां म्ह इब्बे जाके कन्नालाँ नै, टुंड्यां नै, लंगड्यां नै, अर आंध्यां नै उरै लेके आओ।" 22 नौकर नै दुबारै कह्या, "हे मालिक, जिस ढाळ तन्नै कह्या था, उससे तरियां ए करया गया सै; अर फेर भी जंगहा सै।"

23 मालिक नै नौकर तै कह्या, “सड़कां पै अर बाड़या की कात्री जा अर माणसां नै मजबूर करके लिया ताके मेरा घर भरज्या। 24 क्यूँके मै थमनै कहुँ सूँ के उन न्योदे होइ माणसां म्ह तै कोए मेरै खाणै नै कोनी चाखैगा।”

### चेला बनण का मूल्य

25 जिब्व बड्डी भीड़ उसकै गेल्या जावै थी, तो उसनै बोहड़ के उनतै कह्या, 26 जै कोए मेरै धोरै आवै, अर आपणे माँ-बाप अर बीरबात्री अर बाळकां नै अर भाईयां नै अर भाणां नै बल्के आपणे जीवन तै भी प्यार कोनी करदा, तो ओ मेरा चेला कोनी हो सकदा। 27 अर जो कोए आपणा कूस ना ठावै; अर मेरै पाचछै नी आवै; ओ भी मेरा चेला कोनी हो सकदा। 28 “थारै म्ह तै कौण सै जो गढ़ बनाणा चाहन्दा हो, अर पहल्या बैठकै खर्चा नी फैलावै के पूरा करण की गुंजास मेरै धोरै सै के नी? 29 कदे इसा ना हो जिब्व ओ नीव बणा ले पर त्यार ना कर सकै, तो सारे देखखण आळे न्यू कहकै उसका मखौल उड़ाण लागे, 30 ‘यो माणस बनाण तो लाग्या पर त्यार कोनी कर सक्या?’ 31 या कौण इसा राजा सै जो दुसरे राजा तै युद्ध करण जान्दा हो, अर जो बिचार कर ले के जो बीस हजार लेकै मेरै पै चढ़या आवै सै, के मै दस हजार लेकै उसका सामणा कर सकूँ सूँ के नी? 32 नी तो उसके दूर रहन्दे होये ओ दूत्तां नै खन्दा कै मिलाप करणा चाहवैगा। 33 इस्से ढाळ थारै म्ह तै कोए आपणा सारा कीमे त्याग नी देवै, ओ मेरा चेला कोनी हो सकदा।

### बेसुवाद नूण

34 “नूण तो बढ़िया सै, पर जै नूण का सुवाद बिगड़ जावै, तो ओ किस चीज तै नमकीन करया जावैगा। 35 ओ ना तो धरती कै अर ना खाद कै खातर काम म्ह आवै सै : उसनै तो माणस बाहरण बगा देवै सै। जिसके सुणन के कान हों ओ सुण ले।”

### खोई होइ भेड का उदाहरण

15 सारे चुंगी लेण आळे अर पापी उसकै धोरै आया करै थे ताके उसकी सुणै। 2 पर फरीसी अर शास्त्री बरड़कै कहण लागे, “यो तो पापियां तै मिलै सै अर उनके गेल्या खावै भी सै।” 3 फेर उसनै उनतै यो उदाहरण कह्या : 4 “थारै म्ह तै कौण सै जिसकी सौ भेड हों, अर उनम्ह तै एक खुज्या, तो निन्यानमै नै बण म्ह छोड़कै, उस खुई होइ नै जिब्व ताहीं पा नी लेन्दी टोहन्दा ना रहवै? 5 अर जिब्व पा ज्या सै, फेर ओ घणा राज्जी होके उस ताहीं कंधे पै ठा लेवै सै; 6 अर घरा आके ढब्बीयां अर पड़ोसियां नै कट्टा करके कहवै सै, ‘मेरै गेल्या खुशी मनाओ, क्यूँके मेरी खुई होइ भेड पा गी सै।’ 7 मै थारै तै कहुँ सूँ के इस्से तरियां तै एक मन पलटण आळे पापी कै बाबत भी सुर्ग म्ह इतनाए आनन्द होवैगा, जितना के निन्यानमै इसे धर्मियां कै बाबत कोनी होन्दा, जिन्नै मन पलटण की आंट कोनी।

### खोए होए सिक्के का उदाहरण

8 “या कौण इसी लुगाई होगी जिसकै धोरै दस सिक्के हों, अर उनम्ह तै एक खुज्या, तो वा दिवा बाळ कै अर घर झाड़-बुहारकै, जिब्व ताहीं पा नी जावै जो लाके टोहन्दी ना रहवै? 9 अर जिब्व पा ज्या सै, तो वा आपणी ढब्बणां अर पड़ोसणां नै कट्टा करके कहवै सै, ‘मेरै गेल्या खुशी मनाओ, क्यूँके मेरा खुया होया सिक्का पाग्या सै।’ 10 मै थमनै कहुँ सूँ के इस्से तरियां तै एक मन पलटण आळे पापी कै बाबत भी पणमेशर के सुर्गदुतां कै स्याम्ही आनन्द होवै सै।”

### उड़ाऊ बेटे का उदाहरण

11 फेर यीशु बोल्या, “किसे माणस के दो बेटे थे। 12 उनम्ह तै छोटलै नै बाप तै कह्या, “हे बाबू, सम्पत्ति म्ह तै जो मेरा बांडा मेरा हो ओ मन्त्रै दे द्यो।” इस करके उसनै उन ताहीं आपणी सम्पत्ति का बंडवारा कर दिया। 13 घणे दिन कोनी बीते थे के छोटा बेटा सारा कीमे कट्टा करके दूर देश म्ह चल्या गया। अर उड़ै भुण्डे काम्मां म्ह आपणा धन उड़ा दिया। 14 जिब्व ओ सारा

कीमे खर्च करग्या, तो उस देश म्ह भारया अकाल पड़या, अर ओ कंगाल होग्या। 15 इस करके ओ उस देश के बाशिंदयां म्ह तै एक कै उरै जा पड़या। उसनै उस ताहीं आपणे खेत्तां म्ह सूअर चरण खातर खन्दाया। 16 अर ओ चाहवै था के उन फलियां म्ह तै जिन्नै सूअर खावै थे, आपणा पेट भरै; अर उस ताहीं कोए कीमे कोनी देवै था। 17 जिब्व ओ आपणे आपै म्ह आया फेर कहण लाग्या, “मेरै बाप कै कितने मजदुरां नै खाणे तै घणी रोटी मिलै सैं, अर मै उरै भूखा मरण लाग रहा सूँ। 18 मै इब उठके आपणे बाबू धोरै जाऊँगा अर उसतै कहुँगा के बाबू जी, मन्त्रै सुर्ग कै बिरोध म्ह अर तेरी निंगाह म्ह पाप करया सै। 19 इब इस जोग्या कोनी रखा के तेरा बेटा कुहाऊँ, मन्त्रै आपणे एक मजदूर की ढाळ राख ले।”

20 “फेर ओ उठके, आपणे बाप कै धोरै गया : ओ इबे दुरे था के उसकै बाप नै उस ताहीं देखके तरस आया, अर भाज कै उस ताहीं छात्ती कै लाया, अर घणा चुम्या यानिके प्यार करया। 21 बेटे नै उसतै कह्या, “बाबू जी, मन्त्रै सुर्ग कै बिरोध म्ह अर तेरी निंगाह म्ह पाप करया सै; अर इब इस जोग्या कोनी रखा के तेरा बेटा कुहाऊँ।” 22 पर बाप नै आपणे नौकरां तै कह्या, “तोळ करके सुथरे-सुथरे लत्ते लिकाड़के उसनै पहिराओ, अर उसकै हाथां म्ह गुंठी, अर पायां म्ह जुत्ती पहिराओ, 23 अर पळा होइ डांगर ल्याके मारो ताके हम खावां अर खुशी मनावां। 24 क्यूँके मेरा यों बेटा मरग्या था, दूबारै जीग्या सै : खुग्या था अर इब पाग्या सै।” अर वे खुशी मनाण लागे। 25 “पर उसका जेठा बेटा खेत म्ह था। जिब्व ओ आंदे होये घर कै लामणै पहाच्या, तो उसनै गाण-बजाण अर नाचण का बोल सुणया। 26 आखर म्ह उसनै एक नौकर बुलाके बुझया, “यो के होण लाग रहा सै? 27 उसनै उस ताहीं कह्या, “तेरा भाई आया सै, अर तेरे बाप नै पळा होइ डांगर कटवाया सै, इसकरके के उस ताहीं ठीक-ठाक पाया सै।” 28 न्यू सुणके ओ छोह तै भरग्या अर भीत्तर जाणा कोनी चाहया, पर उसका बाप बाहरण आके उसनै मनाण लाया। 29 उसनै बाप ताहीं जबाब दिया, लखा, मै इतने साल तै तेरी सेवा-पाणी कर रहा सूँ अर कदे भी तेरा हुक्म कोनी टाळया, फेरभी तन्नै मेरै ताहीं कदे भी एक बकरी का बच्चा भी कोनी दिया के मै आपणे ढब्बीयां गेल्या आनन्द करदा। 30 पर जिब्व तेरा यो बेटा, जिसनै तेरी सम्पत्ति रणडीयां म्ह उड़ा दी सै, आया, तो उसकै खातर तन्नै पळा होइ डांगर कटवाया। 31 उसकै बाप नै उसतै कह्या, “बेटा, तू सारी हाण मेरै गेल्या सै; अर जो कीमे मेरा सै ओ सारा तेराए सै। 32 पर इब आनन्द अर मगन होणा चहिये क्यूँके यो तेरा भाई जो मरग्या था दुबारा जी ग्या सै, खुग्या था, इब पाग्या सै।

### श्याणा भण्डारी

16 फेर उसनै चेल्यां तै कह्या, “किसे साहूकार का एक भण्डारी था, अर आदमियां नै उसकै स्याम्ही उस पै या तोहमन्द लायी के ओ तेरा सारा धन उड़ा देवै सै। 2 आखर म्ह उसनै उसतै बुलाके कह्या, “यो के सै मै तेरै बाबत के सुणु सूँ? आपणे भण्डारीपण का हिसाब दे, क्यूँके तू आगै तै भण्डारी कोनी रह सकदा।” 3 फेर भण्डारी सोचण लाग्या, “इब मै के करुं? क्यूँके मेरा मालिक इब भण्डारी का काम मेरै तै खोस्सै सै। माट्टी मेरै पै खुदै नी; अर भीख भी माँगदे हाणी सर्म आवैगी। 4 मै जाणग्या के मै के करुं, ताके मै जिब्व भण्डारी कै काम तै हटया जाऊँ तो माणस मन्त्रै आपणे घरा म्ह ले लेवै। 5 फेर उसनै आपणे मालिक के देणदारां ताहीं एक-एक करके बुलाया अर पहल्या तै बुझया, ‘तेरै ऊप्पर मेरै मालिक का कितना कर्जा सै?’ 6 उसनै कह्या, “सौ मण तेल, फेर उसनै उसतै कह्या, ‘आपणा खाता अर बही ले अर बैठके तोळा-तोळा पचास लिख दे।’ 7 फेर उसनै दुसरे तै बुझया, ‘तेरै पै कितना कर्जा सै?’ दुसरे नै कह्या, ‘सौ मण गेहूँ, फेर उसनै उसतै कह्या, ‘आपणा खाता अर बही लेके अर बैठके अस्सी लिख दे।’ 8 “मालिक नै उस अधर्मी भण्डारी ताहीं सराहया के उसनै कितनी श्याणपत तै काम करया सै। क्यूँके इस दुनिया के माणस आपणे टैम के आदमियां गेल्या रीत-बीवार म्ह चाँदणै के आदमियां तै घणे श्याणे सैं। 9 अर मै थम नै कहुँ सूँ के अधर्म कै धन तै आपणे खातर ढब्बी बणा ल्यो, ताके जिब्व ओ जाँदा रहवै तो वे थारै ताहीं अनन्त घरा म्ह ले लेवै। 10 जो माड़े-तै भी माड़े म्ह साचा सै, ओ घणा म्ह भी साचा सै, जो माड़े-तै भी माड़े म्ह अधर्मी सै,



ओ घणा म्ह भी अधर्मी सैं। 11 इस करकै जिब्व थम अधर्म कै धन म्ह साच्चे नीं ठहरे, तो साच्चा धन थम नै कौण थमावैगा? 12 अर जै थम बिगान्ने धन म्ह साच्चे कोनी ठहरे, तो जो थारा सैं, वो थमनै कौण देवैगा? 13 कोए नौकर दो मालिकां की सेवा-पाणी कोनी कर सकदा : क्युँके ओ तो एक तै बैर अर दुसरे तै प्रेम राक्खैगा; या एक तै मिल्या रहवैगा अर दुसरे नै छोड्या या तुच्छ जाणैगा। थम पणमेशर अर धन दोनुआ की सेवा कोनी कर सकदे।”

### यीशु के कुछ उपदेश

14 फरीसी जो लोभ्मी थे, ये सारी बात सुणकै, मखौल करण लाग्गे। 15 उसनै उनतै कह्या, “थम तो माणसां कै स्याम्ही खुद नै धर्मी ठहराओ सो, पर पणमेशर थारै मन नै जाणै सैं, क्युँके जो चीज माणसां की निगाह म्ह महान सैं, वा पणमेशर कै लवै भुण्डी सैं। 16 “व्यवस्था अर नब्बी यूहन्ना ताहीं रहे; उस टैम तै पणमेशर कै राज्य की खुश-खबरी सुणयाई जाण लागरी थी, अर हरेक उस म्ह हावी होकै बड़ै था। 17 अकास अर धरती का टळ जाणा व्यवस्था कै एक बिंदी तै खु जाण तै सेला सैं। 18 “जो कोए आपणी बीरबान्नी नै छोड़ कै दूसरी तै ब्याह करै सैं, ओ जारी करै सैं, अर जो कोए इसी छोड्डी होई लुगाई तै ब्याह करै सैं, ओ भी जारी करै सैं।”

### साहूकार माणस अर गरीब लाजर

19 “एक साहूकार माणस था जो बैजनी लत्ते अर मलमल पहरवा अर हरेक दिन एश तै अर आनन्द तै रहवै था। 20 लाजर नाम का एक कंगाल जिसकै घा: होरे थे उसकी देहली पै छोड़ दिया जावै था, 21 21 अर ओ चाहवै था के साहूकार की मेज पै की जूठण तै आपणा पेट भरै; उरै ताहीं के कुत्ते भी आकै उसके घा: नै चाट्या करै थे। 22 इसा होया के ओ कंगाल मरग्या, अर सुर्गदुत्ता नै उसताहीं लेकै अब्राहम की गोद्वी म्ह पहीच्यो। ओ साहूकार भी मारया अर गाड्या गया, 23 अर नरक म्ह दर्द म्ह पड़े होए आपणी निगाह ठाई, दूर तै अब्राहम की गोद्वी म्ह लाजर ताहीं देख्यो। 24 फेर उसनै रुक्का मारकै कह्या, “हे पिता अब्राहम, मेरै पै दया करकै लाजर नै खन्दा दे, ताके ओ आपणी आन्गली का कुणा पाणी म्ह डबोकै मेरी जीभ नै शीळी करै, क्युँके मै इस आग तै तड़फू सूं।” 25 पर अब्राहम बोल्या, “हे बेट्टा, याद कर के तन्नै आपणी जिन्दगी म्ह बढिया चीज ले ली सैं, अर उस्से तरियां लाजर भूंडी चीज : पर इब ओ आपणी शान्ति पा रह्या सैं, अर तू तड़फ रह्या सैं। 26 इन बात्तां नै छोड़ म्हारै अर थारै बिचाळै एक भारया खुड्डा ठहराया सैं के जो उरै तै उस परली ओड़ नै थारै लवै जाणा चाहवै, वे कोनी जा सकैंगे; अर ना कोए उड़ै इस पाससै म्हारै लवै आ सकैंगे।” 27 ओ बोल्या, “तो हे पिता, मै तेरै तै बिनती करूं सूं के उस ताहीं मेरै बाप कै घरा खन्दा, 28 क्युँके मेरे पांच भाई सैं; ओ उनकै स्याम्ही इन बात्तां की गवाही दे, इसा ना हो के वे भी दुःख की जंगहा म्ह आवै।” 29 अब्राहम नै उसतै कह्या, “उनकै धोरै तो मूसा अर नब्बीयां की किताब सैं, वे उनकी सुणै।” 30 ओ बोल्या, “कोनी, हे पिता अब्राहम, पर जै कोए मरे होया म्ह तै उसकै लवै जावै, तो वे मन फिरावैंगे।” 31 उसनै उसतै कह्या, “जिब्व वे मूसा अर नब्बियाँ की नीं सुणदे, तो जै मरे होया म्ह तै कोए जी भी जा, तो भी उसकी कोनी मान्नेंगे।”

### ठोकर का कारण बनणा

17 फेर उसनै आपणे चेल्यां तै कह्या, “हो नीं सकदा के ठोकर ना लागै, पर हाय, उस माणस पै जिसकै बाबत वे लागै सैं। 2 जो इन छोट्यां म्ह तै किसे एक नै ठोकर खुआवै सैं, उसके खातर न्यु बढिया होन्दा के चाक्की के पाट उसके गळ म्ह लटकाया जान्दा, अर ओ समुन्दर म्ह गेर दिया जान्दा। 3 डेट राक्खो; जै तेरा भाई जुल्म करै तो उसनै समझा, अर जै पछतावै तो उसनै बखस। 4 जै साब्त दिन म्ह ओ सात बर तेरा अपराध करै अर सात्तू बर तेरै लवै आकै कहवै, “तो उसनै बखस।”

### बिश्वास

5 फेर प्रेरितां नै प्रभु तै कह्या, “म्हारा बिश्वास बधा।” 6 प्रभु बोल्या, “जै थमनै राई के दाणे बराबर भी बिश्वास होन्दा, तो थम इस शहतूत कै दरख्त नै कन्हन्दे के जड़ तै उखड़के समुन्दर म्ह जा लाग, तो ओ थारी मान लेन्दा।”

### एक दास का कर्तव्य

7 “थारै म्ह तै इसा कौण सैं, जिसका नौकर हळ जोतदा या भेड़ चरान्दा हो, अर जिब्व ओ खेत तै आवै, तो उसतै कह्यै, ‘तोळा आकै खाणा खाण बेट?’ 8 अर न्यु ना कहवै, ‘मेरा खाणा त्यार कर, अर जिब्व ताहीं मै खाऊँ पीऊँ तब ताहीं कड़ बाँध मेरी सेवा-पाणी कर; इसके पाच्छै तू भी खा पी लिये?’ 9 के ओ उस नौकर का श्यान मान्नेगा के उसनै वैए काम करे जिसका हुकम दिया था? 10 इस्से तरियां तै थम भी जिब्व उन सारे काम्मां नै कर ल्यो जिसका हुकम थारै ताहीं दिया था, तो कहो, ‘हम बेकार नौकर सां; जो हमनै करणा चाहिये था हमनै सिर्फ ओए करया सैं।”

### कोढ़ के दस रोगियाँ ताहीं चंगा करणा

11 इसा होया के ओ यरूशलेम जांदे होड़ सामरिया अर गलील कै बिचाळै तै होन्दा होया जावै था। 12 किसे गाम म्ह बड़दे बख्त उसनै दस कोढ़ी फेट्टे। 13 उन्ने दूर खड़े होके ठाडू बोल तै कह्या, “हे यीशु, हे मालिक, म्हारै पै दया कर!” 14 उसनै उन पै लखा कै कह्या, “जाओ, अर खुद ताहीं याजकां नै दिखाओ।” अर जांदे ए जांदे वे चंगे होग्ये। 15 फेर उनम्ह तै एक न्यु देख कै के मै चंगा होग्या सूं, ठाडू बोल तै पणमेशर की बड़ाई करदा होया बोहड़या; 16 अर यीशु कै पायां पै मुह कै बळ पड़ कै उसका धन्यवाद करण लाग्या, अर ओ सामरी था। 17 इस पै यीशु नै कह्या, “के दस चंगे कोनी होए, तो फेर नौ कित सैं? 18 के इस परदेसी नै छोड़ कोए और नीं लिकड़या जो पणमेशर की बड़ाई करदा?” 19 फेर उसनै उस ताहीं कह्या, “उठके चल्या जा, तेरै बिश्वास नै तेरै ताहीं चंगा करया सैं।”

### पणमेशर के राज्य का आगमन

20 जिब्व फरिसियां नै उसतै बुड़झया के पणमेशर का राज्य कद आवैगा, तो उसनै उनतै जबाब दिया, “पणमेशर का राज्य प्रगट रूप म्ह कोनी आन्दा। 21 अर माणस न्यु नीं कह्यैंगे, ‘आड़ै सैं या उड़ै सैं।’ क्युँके लखाओ, पणमेशर का राज्य थारै बिचाळै सैं।” 22 फेर उसनै चेल्यां तै कह्या, “वे दिन आवैंगे, जिसम्ह थम माणस के बेट्टे के दिनां म्ह तै एक दिन नै देखणा चाहोगे, अर कोनी देखोगे। 23 माणस थारै तै कहवैंगे, ‘लखाओ, उड़ै सैं।’ या लखाओ, आड़ै सैं।” पर थम जाईयो ना अर ना उनकै पाच्छै लागियो। 24 क्युँके जिस तरियां बिजळी अकास कै एक छोर तै कोंध कै अकास कै दुसरे छोर ताहीं चमके सैं, उस्से तरियां माणस का बेट्टा भी आपणे दिनां म्ह प्रगट होवैगा। 25 पर पहल्या जरूरी सैं के ओ घणे काल होवै, अर इस युग कै माणस उस ताहीं तुच्छ ठहरावै। 26 जिसा नूह के दिनां होया था, उस्से तरियां माणस के बेट्टे के दिनां म्ह भी होवैगा। 27 जिस दिन ताहीं नूह जहाज नीं चढ्या, उस दिन ताहीं माणस खावै-पीवै थे, अर उनम्ह ब्याह होवै थे। फेर जल-प्रळय नै आकै उन सारया का नास करया। 28 अर जिसा लूत कै दिनां म्ह होया था के माणस खावै-पीवै, लेणा-देणा करदे, दरख्त लान्दे अर घर चीणै थे; 29 पर जिस दिन लूत सदोम तै लिकड़या, उस दिन आग अर गन्धक अकास तै बरसी सारा कीमे नास कर दिया। 30 माणस का बेट्टे कै प्रगट होण कै दिन भी इसाए होवैगा।

31 “उस दिन जो छात पै हो, अर उसका सामान घरा म्ह हो, अर ओ उसनै लेण नै नीं उतरै; अर उस्से तरियां जो खेततां म्ह हो ओ पाच्छै नीं बोहड़ै। 32 लूत की बीरबान्नी नै याद राखियो! 33 जो कोए आपणा जी बचाणा चाहवै, ओ उसनै खोवैगा, अर जो कोए उसनै खोवै ओ उसनै जिन्दा राक्खैगा। 34 मै थमनै नै कहूँ सूं, उस रात नै दो माणस एक खाट पै होंगे; एक ठाया जावैगा अर दूसरा छोड़ दिया जावैगा। 35 दो लुगाई एक सेत्ती चाक्की पीसदी होवैगी, एक ठा ली जावैगी अर दूसरी छोड़ दी जावैगी। 36 [दो जणे खेत म्ह होंगे, एक

ठायी जावैगा अर दूसरा छोड्या जावैगा।” 37 न्यू सुण उत्रै उसतै बुझ्या, “हे प्रभु, यो कित होवैगा?” उसनै उनतै कह्या, “जडै लाश सैं, उडै गिद्ध कडे होंगे।”

### अधर्मी जज अर बिधवा का उदाहरण

**18** फेर उसनै इसके बाबत म्ह के रोज प्रार्थना करणा अर डेट नीं छोडना चाहिये, उनतै यो उदाहरण कह्या, 2 “किसे नगर म्ह एक जज रहवै था, जो ना पणमेशर तै डरै था अर ना किसे माणस की आँट मानै था। 3 उससे नगर म्ह एक बिधवा भी रहवै थी, जो उसके धोरै आ-आके कह्या करै थी, मेरा न्याय चुकाके मन्त्रै मुद्दई तै बचा।” 4 कीमे टैम ताहीं तो ओ कोनी मान्या पर आखर म्ह मन म्ह सोच के बोल्या, “ऊ तै मैं पणमेशर तै कोनी डरदा, अर ना माणसां की कीमे आँट मानूँ; 5 फेरभी या बिधवा मन्त्रै कांल राक्खै सैं, इस करके मैं उसका न्याय चूकाऊंगा, कदे इसा ना हो के घडी-घडी आके आखर म्ह मेरी नास्सा म्ह दम करदे।” 6 प्रभु नै कह्या, “सुणो, यो अधर्मी जज के कहवै सैं? 7 इसकरके के पणमेशर आपणे छाँटे होया का न्याय कोनी चुकावैगा, जो दिन-रात उसकी दुहाई देंदे रहवै सैं? के ओ उनके बाबत वार करेगा? 8 मैं थमनै कहूँ, “ओ जिबे उनका न्याय चुकावैगा। फेरभी माणस का बेडा जिबे आवैगा, तो के ओ धरती पै बिश्वास पावैगा?”

### फरीसी अर चुंगी लेणआळे का उदाहरण

9 उसनै उनतै जो खुद पै भरोसा राक्खै थे, के हम धर्मी सां, अर दूसरयां नै तुच्छ जाणै थे, यो उदाहरण कह्या : 10 “दो माणस मन्दर म्ह प्रार्थना करण नै गए; एक फरीसी था अर दूसरा चुंगी लेण आळा, 11 फरीसी खड्या होके आपणे मन म्ह न्यू प्रार्थना करण लाग्या, “हे पणमेशर मैं तेरा धन्यवाद करूँ सूँ के मैं और माणसां की तरियां अन्धेर करण आळा, जुल्मी, अर जार कोनी, अर ना इस चुंगी लेण आळे की तरियां सूँ। 12 मैं हफते म्ह दो बर ब्रत राक्खु सूँ; मैं आपणी सारी आमन्त्री का दसमाँ हिस्सा भी द्यु सूँ। 13 “पर चुंगी लेण आळे नै दूर खडे होके, सुरग के कात्री निगाह ठाणा भी कोनी चाह्या, बल्के आपणी छात्ती पीट-पीटके कह्या, “हे पणमेशर, मुझ पापी पै दया कर !” 14 मैं थम नै कहूँ सूँ के ओ दूसरा कोनी, पर योए माणस धर्मी ठहराया जाके आपणे घरा गया; क्यूँके जो कोए खुद नै बड्डा बणावैगा, ओ छोटा करया जावैगा; जो कोए खुद नै छोटा बणावैगा, ओ बड्डा करया जावैगा।”

### बाळ कां ताहीं आशरिवाद

15 फेर माणस आपणे बाळकां नै भी उसके धोरै ल्याण लागे के ओ उन पै हाथ धरै; पर चेल्यां नै लखाके उन ताहीं धमकाया। 16 यीशु नै बाळकां ताहीं धोरै बुलाके कह्या, “बाळकां नै मेरै धोरै आण द्यो अर उत्रै रोक्को मतना : 17 मैं थम नै साच्ची कहूँ सूँ के जो कोए पणमेशर के राज्य नै बाळकां की तरियां कोनी अपणावै ओ उसम्ह कदे नीं बड सकदा।”

### साहूकार माणस अर अनन्त जीवन

18 किसे सरदार नै उस तै बुझ्या, “हे उत्तम गुरु, अनन्त जीवन का हक्क दार होण खातर मैं के करूँ?” 19 यीशु नै उसतै कह्या, “तू मन्त्रै उत्तम क्यातै कहवै सैं? कोए उत्तम कोनी, सिवा एक, यानिके पणमेशर। 20 तन्नै हुक्मां का तो बेराए सैं : ‘जारी नीं करणा, खून नीं करणा, अर चोरी नीं करणा, अर झूठी गवाही नीं देणा, आपणे माँ-बाप का आदर-मान करणा’।” 21 उसनै कह्या, “मैं तो इन सारया नै बाळकपण तैए मान्दा आऊँ सूँ।” 22 न्यू सुण के यीशु नै उसतै कह्या, “तेरै म्ह इब भी एक बात की घटी सैं, आपणा सारा कीमे बेचके कंगाल तै बांड दे; अर तन्नै सुरग म्ह धन मिलेगा, अर आके मेरै गेल हो ले।” 23 ओ न्यू सुण के घणा उदास होया, क्यूँके ओ घणा साहूकार था। 24 यीशु नै उसताहीं देखके कह्या, “साहूकारां का पणमेशर के राज्य के बडना कितना ओख्खा सैं। 25 पणमेशर राज्य म्ह साहूकार का बडना ऊँट का सूँई के मोरै म्ह तै काडना सेला सैं।” 26 इस पै सुनण आळ्यां नै कह्या, “तो फेर किसका उद्धार हो सके सैं?” 27 उसनै कह्या, “जो माणसां तै नीं हो सकदा ओ पणमेशर तै हो सके सैं।” 28 पतरस नै कह्या, “लखा, हम तो घर-बार छोड़ के

तेरै गेल हो लिये सां।” 29 उसनै उनतै कह्या, “मैं थम तै साच्ची कहूँ सूँ के इसा कोए कोनी जिसनै पणमेशर राज्य के खातर घर, या बीरबात्री, भाई, या माँ-बाप, या बाळक बचच्या नै छोड़ दिया हो; 30 अर इस टैम कई गुणा घणा नीं पावै अर आणआळे युग म्ह अनन्त जीवन।”

### अपणी मौत के बारे म्ह यीशु की तीसरी भविष्यवाणी

31 फेर उसनै बारहा ताहीं गेल ले जाके उनतै कह्या, “लखाओ, हम यरुशलेम नै जांवां सां, अर जितनी बात माणस के बेडे खातर नब्बियाँ तै लिक्खी होई सैं, वे सारी पूरी होवैगी। 32 क्यूँके ओ दूसरी जात्ता के हाथां म्ह सौप्या जावैगा, अर वे उसका मखौल करैंगे; उसकी बेइज्जती करैंगे, अर उस पै थूकैंगे, 33 अर उसके कोरडे मारैंगे, अर घात करैंगे छेतैंगे; अर ओ तीसरै दिन जिन्दा होज्यागा।” 34 पर उत्रै इन बात्तां म्ह तै कोए बात नीं समझी; अर या बात उनतै लुहकी रही, अर जो कह्या गया था ओ उसकी समझ कोनी आया।

### आंधे भिखारी का उदाहरण

35 जिबे ओ यरीहो के लवै पहाच्या, तो एक आंधा सडक के कंठारै बैठ्या होया भीख माँगण लागरया था। 36 ओ भीड़ के चालण की पैड सुण के बूझण लाग्या, “यो के होरया सैं?” 37 उत्रै उसतै बताया, “यीशु नासरी जाण लागरया सैं।” 38 फेर उसनै रुक्का मारके कह्या, “हे यीशु, दाऊद की उलाद, मेरै पै दया कर !” 39 जो आगै-आगै जाण लागरे थे, वे उसनै धमकाण लाग्ये के बोल-बाला रहै; पर ओ और भी किल्की मारण लाग्या, “हे दाऊद की उलाद, मेरै पै दया कर !” 40 फेर यीशु नै खडे होके हुक्म दिया के उसनै मेरै धोरै ल्याओ, अर जिबे ओ धोरै आया तो उसनै उसतै बुझ्या, 41 “तू के चाहवै सैं के मैं तेरै खातर करूँ?” उसनै कह्या, “हे प्रभु, योए के मैं देखण लागूँ।” 42 यीशु नै उसतै कह्या, “देखण लाग; तेरै बिश्वास नै तेरै ताहीं आच्छा करया सैं।” 43 फेर ओ जिबे देखण लाग्या अर पणमेशर की बडाई करदा होया उसके गेल हो लिया; अर सारे आदमीयां नै देखके पणमेशर की जय-जयकार स्तुति करी।

### चुंगी लेण आळा जक्कई

**19** ओ यरीहो म्ह बडण लागरया था। 2 ओडै जक्कई नाम का एक माणस था जो चुंगी लेण आळ्यां का सरदार था अर साहूकार था। 3 ओ यीशु नै देखणा चाहवै था के ओ कौण-सा सैं। पर भीड़ के कारण देख नीं सके था, क्यूँके ओ बोना था। 4 फेर उस ताहीं खातर ओ आगै भाज के गुलर के दरखत पै चढ्या, क्यूँके यीशु नासरी उससे राह तै जाण आळा था। 5 जिबे यीशु नासरी उस ठोड़ पहाच्या, तो ऊप्पर लखाके उसनै कह्या, “हे जक्कई, तोळा उतरया; क्यूँके आज मन्त्रै तेरै घरा जरूर रहणा सैं।” 6 ओ जिबे उतरके राजी होके यीशु नै आपणे घरा लेग्या। 7 न्यू देखके सारे माणस बरडाण लागे, “ओ तो एक पापी माणस के घरा रुकरया सैं।” 8 जक्कई नै खडे होके प्रभु तै कह्या, “हे प्रभु, लखा, मैं आपणी आधी सम्पति कंगालां नै द्यु सूँ, अर किसे का कीमे भी जुल्म करके ले लिया सैं तो उस ताहीं चौगुणा बोहडा द्यु सूँ।” 9 फेर यीशु नै उसतै कह्या, “आज इस म्ह उद्धार आया सैं, इसकरके के यो भी अब्राहम का बेडा सैं।” 10 माणस का बेडा खुवे होया नै टोहण अर उनका उद्धार करण आया सैं।”

### दस मुहरां का उदाहरण

11 जिबे वे ये बात सुणै थे, तो उसनै एक उदाहरण कह्या, इसकरके के ओ यरुशलेम के धोरै था, अर वे समझै थे के पणमेशर का राज्य इबे प्रगट होण आळा सैं। 12 आखर उसनै कह्या, “एक साहूकार माणस दूर देश तै चल्या के राजपद पाके बोहडै। 13 उसनै आपणे नौकरां म्ह तै दस ताहीं बुलाके उन ताहीं दस मोहर दीं अर उनतै कह्या, “मेरै बोहडण ताहीं लेण-देण करणा।” 14 पर उसके नगर के बासिन्दे उस तै बैर राक्खै थे, अर उसके पाछे दुत्तां तै कुहवा भेज्या, “हम नीं चाहन्दे के यो म्हारै पै राज करै।” 15 “जिबे ओ राजपद पाके बोहड्या, तो इसा होया के उसनै आपणे नौकरां ताहीं जिन

ताहीँ रपिये दिये थे, आपणे धोरें बुलाया ताके बेरा करे के उन्नै लेण-देण म्ह के-के कमाया। 16 फेर पहलड़े नै आकै कह्या, “हे मालिक, तेरी मोहर तै दस और मोहर कमाई सैं।” 17 उसनै उसतै कह्या, “धन्य, हे बढ़िया नौकर ! तू घणए थोड़े म्ह बिश्वासजोग्गा लिकड़या इब दस नगरां का हक्क राख।” 18 दुसरे नै आकै कह्या, “हे मालिक, तेरी मोहर तै पाँच और मोहर कमाई सैं।” 19 उसनै उसतै कह्या, “तू भी पाँच नगरां पै हाकिम होज्या।” 20 तीसरे नै आकै कह्या, “हे मालिक, देख, तेरी मोहर या सैं : जिस ताहीं मन्ने अंगोछे म्ह जुड़ राक्खी थी। 21 क्यूँके मै तेरें तै उरु था, इस करके के तू करड़ा माणस सैं : जो तन्नै नीं धरया उसनै ठा ले सैं, अर जो तन्नै नीं बोया, उस ताहीं काट्टे सैं।” 22 उसनै उसतै कह्या, “हे दुष्ट नौकर, मै तेरें ए मुँह तै तन्नै कसूरवार ठहराऊँ सूँ। जिब्व तन्नै मेरा बेरा सैं के करड़ा माणस सूँ, जो मन्ने नीं धरया उसनै ठा ल्यु सूँ, अर जो मन्ने नीं बोया, उस ताहीं काट्टे सूँ; 23 तो तन्नै मेरे रपिये महाजनां के धोरें क्यातै कोनी धरे के मै आकै ब्याज सुदा ले लेन्दा?” 24 अर जो माणस धोरें खड़े थे, उसनै उनतै कह्या, “वा मोहर उसतै ले ल्यो, अर जिसके धोरें दस मोहर सैं उसनै दे द्यो।” 25 उन्नै उसतै कह्या, “हे मालिक, उसके धोरें दस मोहर तो सैं।” 26 “मै थम नै कहुँ सूँ के जिसके धोरें सैं, उस ताहीं दिया जावैगा; अर जिसके धोरें नीं सैं, उसतै वो भी जो उसके धोरें सैं ले लिया जावैगा। 27 पर मेरे उन बैरियां ताहीं जो नीं चाहवें थे के मै उन पै राज करुं, उनताहीं उरै ल्याके मेरें स्याम्ही घात करो।”

### यरुशलम म्ह विजय-प्रवेश

28 ये बात कहके ओ यरुशलम के कात्री उनके आगै-आगै चाल्या। 29 जिब्व ओ जैतून नामका पहाड़ पै बैतफगे अर बैतनिय्याह के धोरें पहाच्या, तो उसनै आपणे चेल्यां म्ह तै दोगां ताहीं न्यू कहके खन्दाया, 30 “स्याम्ही के गाम म्ह जाओ; अर उसम्ह पहाचदये एक गधी का बच्चा जिसपै कोए कदे नीं बैठ्या हो, बन्ध्या होड़ थमनै मिलेगा, उसनै खोल के लियाओ। 31 जै कोए थारें तै बुझ्झे के क्यातै खोल्लो सो, तो न्यू कह दियो के प्रभु नै इस ताहीं काम म्ह ल्याणा सैं।” 32 जो खन्दाए गए थे, उन्नै जाके जिसा उसनै कह्या था, उस्से तरियां पाया। 33 जिब्व वे गधी के बच्चे नै खोल्ले रहे थे, तो उसके मालिका नै उनतै बुझ्झया, “इस बच्चे नै क्यातै खोल्लो सो?” 34 उन्नै कह्या, “प्रभु नै इस ताहीं काम म्ह ल्याणा सैं।” 35 वे उसनै यीशु धोरें लियाए, अर आपणे लत्ते उस बच्चे पै लादके यीशु ताहीं उस पै बिठा दिया। 36 जिब्व ओ जाण लाग रया था, तो वे आपणे लत्ते राह म्ह बिछान्दे जावै थे। 37 धोरें आंदे होये जिब्व ओ जैतून पहाड़ की ढलाण पै पहाच्या, तो चेल्यां का सारा टोळ उन सारे सामर्थ के काम्मां के कारण जो उन्नै देखे थे, राजी होके ठाडू बोल तै पणमेशर की जय-जयकार करण लागे : 38 “धन्य सैं ओ राजा, जो प्रभु के नाम तै आवै सैं ! सुर्ग म्ह शान्ति अर अकास मण्डप म्ह महिमा हो !” 39 फेर भीड़ म्ह तै कीमे फरीसी उसतै कहण लागे, “हे गुरु, आपणे चेल्यां नै धमका।” 40 उसनै जबाब दिया, “मै थमनै कहुँ सूँ, जै ये बोल-बाले रहे तो पत्थर किल्की मारण लाग ज्यागें।”

### यरुशलम के खातर बिलाप

41 जिब्व ओ धोरें आया तो नगर नै देखके रोया 42 अर बोल्या, “के भला ए होन्दा के तू, हम्बे, तू ए इसे दिन म्ह खुशी की बात जाणदा, पर इब वे तेरी आँखां तै ओझल होगी सैं। 43 क्यूँके वे दिन तेरें पै आवैगें के तेरे बैरी मोर्चा बाँध के तन्नै घेर लेवेंगें, अर चौगरदे तै तन्नै दबावेंगें; 44 अर तन्नै अर तेरे बाळकां ताहीं जो तेरें म्ह सैं, माट्टी म्ह मिलावेंगें, अर तेरें म्ह पत्थर पै पत्थर भी कोनी छोडेंगें; क्यूँके तन्नै उस मौके ताहीं जिब्व तेरें पै दया की निंगाह होई थी कोनी पिच्छाण।”

### मंदर तै व्यापारियां का काड्या जाणा

45 फेर ओ मन्दर म्ह जाके बेचण आळ्यां ताहीं बाहरण लिकाडण लाग्या, 46 अर उनतै कह्या, “लिख्या सैं, मेरा घर प्रार्थना का घर होगा, पर थम नै इस ताहीं डाकुआ की खोह बैणा दिया।” 47 ओ हरेक दिन मन्दर म्ह उपदेश दिया करै था; अर प्रधान याजक अर शास्त्री अर माणसां के मुखिया उसका

नास करण का मौक्का टोहवें थे। 48 पर कोए जुगाड़ कोनी काड सकै थे के यो किस तरियां करां, क्यूँके सारे माणस घणे चा: तै उसकी सुणें थे।

### यीशु के अधिकार का प्रश्न

20 एक दिन इसा होया के जिब्व यीशु मसीह मन्दर म्ह माणसां नै उपदेश देवै था अर सुसमाचार सुणावै था, तो प्रधान याजक अर शास्त्री, पुरनिया के गेल्या धोरें आकै खड़े होये; 2 अर कहण लागे, “म्हारें ताहीं बता, तू इन काम्मां नै किसके हक्क तै करै सैं, अर ओ कौण सैं जिसनै तेरें ताहीं यो हक्क दिया सैं?” 3 उसनै उनतै कह्या, “मै भी थारें तै एक बात बुझ्झु सूँ; मन्ने बताओ। 4 युहन्ना का बपतिस्मा सुर्ग की ओड़ था या माणसां की ओड़ तै था?” 5 फेर वे आपस म्ह कहण लागे, “जै हम कहवां, ‘सुर्ग की ओड़,’ तो ओ कहवैगा, ‘फेर थम नै उसका बिश्वास क्यातै नीं करया?’ 6 अर जै हम कहवां, ‘माणसां की ओड़,’ तो सारे माणस म्हारें पै पत्थर बरसावेंगें, क्यूँके उन्नै साच्ये बेरा था के युहन्ना नब्बी था।” 7 आखर म्ह उन्नै जबाब दिया, “हमनै नीं बेरा के ओ किस ओड़ तै था।” 8 यीशु नै उनतै कह्या, “तो मै भी नीं बतान्दा के मै ये काम किस हक्क तै करुं सूँ।”

### दुष्ट किसानां का उदाहरण

9 फेर ओ माणसां तै यो उदाहरण कहण लाग्या : “किसे माणस दाख की बारी लाई, अर किसानां तै उसनै ठेका दे दिया अर घणे दिनां खातर परदेश चल्या गया। 10 जिब्व टैम आया तो उसनै किसानां के धोरें एक नौकर ताहीं खन्दाया के वे दाख की बारी के कीमे फळां का बान्डा उसनै देवै, पर किसानां नै उसताहीं छेतके रिक्ते हाथां बोहड़ा दिया। 11 फेर उसनै एक और नौकर ताहीं खन्दाया, अर उन्नै उसताहीं भी छेतके अर उसकी बेइज्जती करके रिक्ते हाथां बोहड़ा दिया। 12 फेर उसनै तीसरा खन्दाया, उन्नै उस ताहीं भी घायल करके लिकाड़ दिया। 13 फेर दाख की बारी के मालिक नै कह्या, “मै के करुं? मै आपणे प्यारे बेटे नै खन्दाऊँगा, हो सकै सैं वे उसकी इज्जत करे।” 14 जिब्व किसानां नै उसताहीं देख्या तो आपस म्ह बिचार करण लागे, “यो तो वारिस सैं; आओ, हम इसनै मार दया के विरासत म्हारी हो जावै।” 15 अर उन्नै उसताहीं दाख की बारी तै बाहरण लिकाड़ के मार दिया। इसकरके दाख की बारी का मालिक उनके गेल्या के करैगा? 16 ओ आकै उन किसानां का नास करैगा, दाख की बारी औरां नै सोपेगा।” न्यू सुणके उन्नै कह्या, “पणमेशर करै इसा ना हो।” 17 उसनै उनकी ओड़ देखके कह्या, “फेर यो के लिख्या सैं : जिस पत्थर नै राजमिस्त्रियाँ नै निकम्मा ठहराया था, ओए कुणै का सिरा होग्या। 18 जो कोए उस पत्थर पै पडैगा ओ चकणाचूर होज्यागा, अर जिस पै ओ पडैगा, उस ताहीं पीस देवैगा।

### कैसर ताहीं कर देणा

19 उस्से टैम शास्त्रीयाँ अर प्रधान याजकां नै उस ताहीं पकडणा चाहया, क्यूँके वे समझगे थे के उसनै महारें पै यो उदाहरण कह्या, पर वे आदमियाँ तै उरगे। 20 अर वे उसकी टाह म्ह लागे अर भेदिए खन्दाए के धर्म का भेष धरके उसकी कोए ना कोए बात पकड़ै, ताके उसताहीं हाकिम के हाथ अर अधिकार म्ह सौंप दें। 21 उन्नै उसतै न्यू बुझ्झया, “हे गुरु, हमनै बेरा सैं के तू ठीक कहवै अर सिखावै भी सैं, अर किस की मेर कोनी करदा, बल्के पणमेशर की राह सच्चाई तै बतावै सैं। 22 के म्हारा कैसर तै कर देणा सई सैं या कोनी?” 23 उसनै उनकी श्याणपत ताहीं ताड़के उनतै कह्या, 24 “एक दीनार मन्ने दिखाओ। इस पै किसकी छाप अर नाम सैं?” उन्नै कह्या, “कैसर का।” 25 उसनै उन ताहीं कह्या, “तो जो कैसर का सैं, ओ कैसर नै द्यो; अर जो पणमेशर का सैं, ओ पणमेशर नै द्यो।” 26 वे माणसां के स्याम्ही इस बात म्ह उसनै पकड़ कोनी सके, बल्के उसके जबाब तै हैरान होके बोल-बाले रहगे।

### पुनरुत्थान अर ब्याह

27 फेर सदुकी जो कहवै सैं के मरे होया का जिन्दा होणा सैं ए कोनी उनम्ह तै कीमे नै उसके धोरें आकै बुझ्झया, 28 “हे गुरु, मूसा नै महारें खातर यो

लिख्या सै : 'जै किस्से का भाई आपणी बीरबान्नी के रहन्दे बेऊलादा मर जावै, तो उसका भाई उसकी बीरबान्नी तै ब्याह करले, अर आपणे भाई के खातर पीढ़ी पैदा करे।' 29 सात भाई थे, पहलड़ा भाई ब्याह करके बेऊलादा मरग्या। 30 फेर दुसरे नै उस लुगाई तै ब्याह कर लिया, फेर ओ भी बेऊलादा मरग्या। 31 फेर तीसरे नै भी उस लुगाई तै ब्याह कर लिया। इस तरियां तै सात्तु बेऊलादे मरगे। 32 आखर म्ह वा लुगाई भी मरगी। 33 इसकरके जिन्दा होणे पै वा उनम्ह तै किसकी बीरबान्नी होगी, क्यूँके उसनै सातूवां तै ब्याह कर लिया था।" 34 यीशु नै उनतै कहा, "इस युग की ऊलादा म्ह ब्याह होवै सै, 35 पर जो माणस इस जोगे ठहरैके के उस युग नै अर मरे होया म्ह तै जिन्दा उठण नै पा लेवै, वे ना ब्याह करैके अर ना ब्याह म्ह दिये जावैके। 36 वे दूबारै मरण के भी कोनी; क्यूँके वे सुर्गदुत्तां की तरियां होवैके, अर पुनरुत्थान की ऊलादा होणे तै पणमेशर की भी ऊलादा होवैके। 37 पर इस बात ताहीं के मरे होये जिन्दा होवै सै, मूसा नै भी झाड़ी की कहानी म्ह प्रगट करी सै के ओ प्रभु ताहीं 'अब्राहम का पणमेशर, अर इसहाक का पणमेशर अर याकूब का पणमेशर कहवै सै। 38 पणमेशर तो मुर्दा का कोनी पर जिन्दा का पणमेशर सै : क्यूँके उसके लवै सारे जिन्दे सै।" 39 फेर न्यू सुणके शास्त्रीयां म्ह तै कीमे नै न्यू कहा, "हे गुरु, तन्नै सई कहा।" 40 अर उन्नै दूबारै उसतै कीमे और बुझण की हिम्मत कोनी करी।

### मसीह किसका बेटा सै?

41 फेर उसनै उनतै बुझया, "मसीह नै दाऊद की ऊलादा किस तरियां कहवै सै? 42 दाऊद खुदे भजन संहिता की किताब म्ह कहवै सै : 'प्रभु नै मेरै प्रभु तै कहा, 43 मेरै सोळै कात्री बैठ, जिब्व ताहीं के मै तेरे बैरियां तेरै पायां तळै नीं कर गु।' 44 दाऊद तो उसनै प्रभु कहवै सै; तो फेर ओ उसकी ऊलादा किस तरियां होया?"

### शास्त्रीयां तै सावधान

45 जिब्व सारे सुणै थे, तो उसनै आपणे चेल्यां तै कहा, 46 शास्त्रीयां तै चौकन्ने रहियो, जिनताहीं लाम्बे-लाम्बे लत्ते पहरके हांडणा आच्छा लागै सै, अर जिन्नै बजारां म्ह नमस्कार, अर आराधनालयां म्ह खास बैठणा अर जिमणा म्ह खास जंगहा प्यारी लागै सै। 47 वे बिधवायां के घर खा जावै सै, अर दिखावै खातर घणी वार ताहीं प्रार्थना करै सै : ये घणी सजा पावैके।"

### कंगाल बिधवा का दान

21 फेर उसनै निंगाह ठाके सहकारां ताहीं आपणा-आपणा दान भण्डार म्ह घालदे देख्या। 2 उसनै एक कंगाल बिधवा ताहीं भी उसम्ह दो दमड़ी घालदे देख्या। 3 फेर उसनै कहा, "मै थम नै साच्चि कहुँ सूँ के इस कंगाल बिधवा नै सारया तै बाध घाल्या सै। 4 क्यूँके उन सारया नै आपणी-आपणी बढती म्ह तै दान म्ह कीमे घाल्या सै, पर इसनै आपणी घटी म्ह तै आपणी सारी आमन्त्री घाली सै।"

### मंदर कै विनाश की भविष्यवाणी

5 जिब्व घण-खरे माणस मन्दर कै बाबत कहरै थे के वो किसे सूथरे पत्थरां अर भेटां की चिज्जां तै समारया गया सै, तो उसनै कहा, 6 "वे दिन आवैके, जिनम्ह यो सारा जिन्नै थम देखो सो, उनम्ह तै उरै किसे पत्थर पै पत्थर भी कोनी छुटैगा जो गेरया नीं जावैगा।"

### संकट अर क्लेश

7 उन्नै उसतै कहा, "हे गुरु, यो सारा कद होवैगा? अर ये बात जिब्व पूरी होण पै होवैगी, तो उस टैम की के निशात्री होवैगी?" 8 उसनै कहा, "चौकन्ने रहियो के भकाए ना जाओ, क्यूँके घण खरे मेरै नाम तै आके कहवैके, 'मै ओए सूँ,' अर न्यू भी के, 'बख्त लवै आण पहाच्यो सै,।' थम उनके पाचछै ना चले जाइयो। 9 जिब्व थम रोळे अर झगड़े का जिक्रा सुणो तो घबराइयो ना, क्यूँके इनका पहल्या होणा जरूरी सै; पर उस टैम जिब्वे खात्मा कोनी होवैगा।"

10 फेर उसनै उनतै कहा, "जात पै जात अर राज्य पै राज्य चढाई करैगा, 11 अर बड्डे-बड्डे हालण आवैके, अर जंगहा-जंगहा अकाल अर महामारियां पडैगी, अर अकास म्ह खरतनाक बात अर बड्डे-बड्डे निशान प्रगट होवैके। 12 पर इन सारी बात्तां तै पहल्या मेरै नाम कै बाबत थमनै पकडैके, अर कांल करैके, अर पंचायतां म्ह सौंपैके, राजाओं अर हाकिमां कै स्याम्ही ले जावैके। 13 पर यो थारै खातर गवाही देण का मौक्का हो जावैगा। 14 इसकरके आपणे-आपणे मन म्ह ठान ल्यो के हम पहल्या तै जबाब देण की फिक्र कोनी करंगे। 15 क्यूँके मै थारै ताहीं इसा बोल अर समझ छुँगा के थारे सारे बिरोधी सामणा या खण्डन कोनी कर सकैके। 16 थारे माँ-बाप, अर भाई, अर कुन्बा, अर ढब्बी भी थमनै पकडवावैके; उरै ताहीं के थारै म्ह तै कईयां नै मरवा देवैके। 17 मेरै नाम कै बाबत सारे माणस थारै तै बैर राखैके। 18 पर थारे सिर का एक बाळ भी बान्ना कोनी होवैगा। 19 आपणे धीरज तै थम आपणे जीवन नै बचाए राखोके।"

### यरुशलेम के विनाश की भविष्यवाणी

20 "जिब्व थम यरुशलेम की फौजां तै घिरया होया देखो, तो जाण लियो के उसका उजड़ जाणा लवै सै। 21 फेर जो यहूदियां म्ह हों पहाड़ां म्ह भाज जावै; अर जो यरुशलेम कै भीत्तर हों वे बाहरण लिकड़ जावै। अर जो गाम्मां म्ह हों वे उस म्ह नीं जावै। 22 क्यूँके ये बदला लेण के इसे दिन होंगे, जिनम्ह लिक्खी होई सारी बात पूरी हो जावैगी। 23 उन दिनां म्ह जो पेट तै हों या दूध पिलान्दी होगी, उनके खातर हाय, हाय ! क्यूँके देश म्ह बड्डा केश अर इन माणसां पै बड्डा प्रकोप होवैगा। 24 वे तलवार की कौर हो जावैके, अर सारे देश के माणसां म्ह कैदी होके पहाचये जावैके; अर जिब्व ताहीं और जात्तां का टैम पूरा कोनी होवै, जद ताहीं यरुशलेम और जात्तां तै रोँदा जावैगा।"

### माणस के बेटे का पुनरागमन

25 "सूरज, चाँद, अर तारां म्ह निशात्री दिखैगी; अर धरती पै देश-देश के आदमिया पै संकट होगा, क्यूँके वे समुन्दर के गरजण अर लहरां के रोळें तै घबरां जावैके। 26 भय के कारण अर दुनिया पै आण आळी घटनायां की बाट देखदे-देखदे माणसां के जी म्ह जी कोनी रहवैगा, क्यूँके अकास की शक्तियां हलाई जावैगी। 27 फेर वे माणस के बेटे नै सामर्थ अर बड्डी महिमा के गेल्या बादळा पै आंदे देखैके। 28 जिब्व ये बात होण लागै, तो सीधे होके आपणे सिर ऊप्पर ठाईयो; क्यूँके थारा छुटकारा लवै होगा।"

### अंजीर के दरख्त का उदाहरण

29 उसनै उन तै एक उदाहरण भी कहा, "अंजीर के दरख्त अर सारे दरखतां नै देखो। 30 ज्योंही उनम्ह कोंपले लिकड़ै सै, तो थमनै खुद बेरा लाग ज्यागा के गर्मी का टैम लवै सै। 31 इस तरियां तै जिब्व थम ये बात होन्दे देखो, तो जाण ल्यो के पणमेशर का राज्य लवै सै। 32 मै थम नै साच्चि कहुँ सूँ के जिब्व ताहीं ये सारी बात नीं हो लें, जद तक इस पीढ़ी का कद्वे भी अन्त कोनी होवैगा। 33 अकास अर धरती टळ ज्यागें, पर मेरी बात कद्वे कोनी टळैगी।"

### जागदे रहो

34 "इसकरके चौकन्ने रहियो, इसा ना हो के थारा मन खुमार, अर मतवालापण, अर इस जिन्दंगी की फिक्र तै सुस्त हो जावै, अर वो दिन थारै पै फन्दे की ढाळ चाणचक आण पडै। 35 क्यूँके ओ सारी धरती के सारे बासिन्दा पै इस तरियां आण पडैगा। 36 इसकरके जागदे रहो अर हर टैम प्रार्थना करदे रहो के थम इन सारी आणआळी घटनायां तै बचण अर माणस के बेटे के स्याम्ही खड़े होण के जोगे बण सको।" 37 वो दिन म्ह मन्दर म्ह उपदेश देवै था, अर रात नै बाहरण जाके जैतून नामक पहाड़ पै रह्या करै था; 38 अर सबेरे नै तड़के सारे माणस उसकी सुणन की खातर मन्दर म्ह उसके धोरै आया करै थे।

### यीशु के खिलाफ साजिस

22 अखमीरी रोड़ी का त्यौहार जो फसह कहवावें सैं, धोरै था; 2 अर प्रधान याजक अर शास्त्री इस बात की टोह म्ह था के उसनै किस तरियां मारै, पर वे माणसां ते डरै थें।

### यहूदा का बिश्वासघात

3 फेर शैतान यहूदा म्ह बडग्या , जो इस्करियोती कहवावै अर बारह चेल्यां म्ह गिना जावै था। 4 उसनै जाके प्रधान याजकां अर पहरदार के सरदारां के गैल्या बातचीत करयी के किस तरियां इसनै उनके हाथ पकडवावा। 5 वे राजी होए, अर उस ताहीं रुपिये देण का वादा किया। 6 वो मान ग्या अर मोक्का टोहण लाग्या के जिब्ब भीड़ नीं हो तो उसनै उनके हाथ पकडवा दे।

### चेल्यां के गैल्या फसह का आखरी जिमणा या भोज

7 फेर अखमीरी रोड़ी के त्यौहार का दिन आया , जिसमै फसह का मेम्ना बलि करना जरूरी था। 8 यीशु नै पतरस अर यहूदा ताहीं यो कहके भेज्या; " जा के म्हारै खान खात्तर फसह त्यार करो। " 9 उन्नै उसतै बुझ्या, "तू कित्त चाहवै सैं के हम उसनै त्यार करां? " 10 उसनै उन ताहीं कह्या, देख्यो, नगर म्ह बडतेए एक आदमी थम नै पाणी का पण्डा ठाए होए थम नै मिलैगा ;जिस घर म्ह वो जावै थम उसके पाच्छे चले जाइयो, 11 अर उसके घर के मालिक तै कहियो; गुरु तेरै तै बुझ्यै सैं के वा बैडक कित्त सैं जिस म्ह मै अपनै चेल्यां के गैल्या फसह खाऊँ? 12 वो थम नै एक सजी-सजाई बड़ी अटारी दिखा देवैगा; ओडैए त्यारी करयो। 13 उन्नै जाके ,जिसा उसनै उन ताहीं कह्या था, उस्से तरियां पाया अर फसह त्यार करया।

### प्रभु-भोज

14 जद वा घड़ी आग्यी, के वो प्रेरितां गैल्या खाणा जिम्मण बैठ्या। 15 अर उसनै उन ताहीं कह्या "मन्नै बड़ी लालसा थी के दुःख भोगण तै पहल्या यो फसह थारै गैल्या खाऊँ। 16 क्यूँके मै थम नै कहुँ सूँ के जिब्ब ताहीं वो पणमेशर के राज्य म्ह पूरा नीं हो जद ताहीं मै उसनै कदे नीं खाऊँगा।" 17 फेर उसनै कटोरा लेके धन्यवाद करया अर कह्या, "इसने ल्यो अर आपस म्ह बाँट ल्यो। 18 क्यूँके के मै थम नै कहुँ सूँ के जिब्ब ताहीं पणमेशर का राज नीं आवै तब तक मै दाख का रस इब तै कदे नीं पिऊँगा। " 19 फेर उसनै रोड़ी ली अर धन्यवाद करके तोड़ी ,अर उन ताहीं या कहके दी , " या मेरी देह सैं जो थारै खात्तर दी जा सैं : मेरी याद म्ह न्यूप करया करो। " 20 इसै रीति तै उसनै खाण के पाच्छे कटोरा भी यो कहन्दे होए दिया, यो कटोरा मेरै उस लहू म्ह जो थारै खात्तर बाह्या जा सैं नई वाचा सैं। 21 पर देख्यो, मेरै पकडण आळे का हाथ मेरै गैल्या मेज पै सैं। 22 क्यूँके माणस का बेडा तो जिसा उसके खात्तर ठहराया गया सैं, जावै सैं, पर हाय उस आदमी पै जिसके जरिये वो पकडवाया जा सैं! " 23 फेर वे आपस म्ह पूच्छताछ करण लाग्ये के म्हारै म्ह तै कोण सैं, जो यो काम करैगा।

### महान कौण? पर वाद-विवाद

24 उन म्ह या बहस भी होगी के उन मै तै कोण बड्डा समझा जावै सैं। 25 उसनै उन ताहीं कह्या , "और जातियां के राजा उनपै प्रभुता करै सैं; अर जो उनपै हक जमावै सैं वे भले कहवावै सैं। " 26 पर थम इसे ना होइओ ; बल्के जो थारै म्ह बड्डा सैं वो छोटे के बरोब्बर अर जो प्रधान सैं, वो सेवक के बरोब्बर बणै। 27 क्यूँके बड्डा कौण सैं ,वो जो खाण पै बैठ्या सैं, या वो जो सेवा करै सैं? के वो नीं जो जिम्मण बैठ्या सैं? पर मै थारै बिचाळै सेवक बरोब्बर सूँ। 28 " थम वो सों, जो मेरै परीक्षाओं म्ह लगातार मेरै गैल्या रहे; 29 अर जिस तरियां मेरै पिता ने मेरै खात्तर एक राज्य ठहराया सैं, उसे तरियां मै भी थारै खात्तर ठहराऊँ सूँ, 30 ताके थम मेरै राज्य म्ह मेरी मेज पै खाओ-पिओ बल्के सिंहासनां पै बैठके इस्त्राएल के बारह गोत्रां का न्याय करो।

### पतरस के इनकार की भविष्यवाणी

31 "शमौन, हे शमौन ! देख शैतान नै थारै ताहीं माँग लिया सैं के गेहूँ की ढाळ पिछोडे, 32 पर मन्नै तेरै खात्तर बिनती करी के तेरा बिश्वास कम नीं हो; अर जिब्ब तू फिरे तो, अपने भाइयां ने मजबूत करणा।" 33 उसनै उस ताहीं कह्या, "हे प्रभु मै, तेरै गैल्या जेल जाण, बल्के मरण नै भी त्यार सूँ।" 34 उसनै कह्या, "हे पतरस, मै तन्नै कहुँ सूँ के आज मुर्गा बाँग नीं देवैगा जब ताहीं तू तीन बर मेरा इन्कार नीं कर लेवैगा के मै तन्नै नीं जाणदा।"

### बटुआ, झोळी अर तलवार

35 फेर उसनै उन ताहीं कह्या, "जिब्ब मन्नै थारै ताहीं बटुए, अर झोळी, अर जूत्या बिना भेज्या था, तो के थम नै किसे चीज की कमी होई थी?" उन्नै कह्या, "किसे चीज की नीं।" 36 उसनै उन तै कह्या, "पर इब जिसके धोरै बटुआ हो वो उसनै ले अर उसी ए झोळी, अर जिसके धोरै तलवार नीं हो तो वो अपने लत्ते बेच के एक मोल लेवै। 37 क्यूँके मै थम नै कहुँ सूँ, यो जो लिख्या सैं : 'वो गुन्हेगार गैल्या गिना गया,' उसका मेरै म्ह पूरा होणा जरूरी सैं; क्यूँके मेरै बारे में लिखी बात पूरी होण पै सैं।" 38 उन्नै कह्या, "हे प्रभु याडै दो तलवार सैं।" उसनै उन ताहीं कह्या, भतेरी सैं।"

### जैतून के पहाड़ पै यीशु की प्रार्थना

39 फेर वो बारणै लिकड के अपनी रीत के मुताबिक जैतून के पाहड़ पै गया, अर चेल्ले उसके पाच्छे हो लिये। 40 उस जगहा पहोंच के उसनै उन ताहीं कह्या, "प्रार्थना करो के थम हिम्तान म्ह ना पडो।" 41 अर आप उन तै न्यारा एक डळा फेकण के बराबर जितनी दूर गया, अर घुटणै/गोड्डे टेक के प्रार्थना करण लाग्या, 42 "हे पिता जै तू चाहवे तो इस कटोरै नै मेरै धोरै तै हटा ले, तो भी मेरी नीं पर तेरी मर्जी पूरी हो।" 43 फेर सुर्ग तै एक दूत उसनै दिख्या जो उसनै सामर्थ दिया करै था। 44 वो और घणे संकट म्ह काल होके और भी मन तै प्रार्थना करण लाग्या; अर उसका पसीना मानों लहू की बड्डी-बड्डी बूँदों के जू धरती पै गीरै था। 45 फेर वो प्रार्थना तै उठ्या अर अपने चेल्यां के धोरै आके उन ताहीं उदासी के मारै सोन्दे पाया। 46 अर उनतै कह्या, "क्यूँ सोवों सों? उठो, प्रार्थना करो के थम हिम्तान म्ह ना पडो।"

### यीशु का धोकखे तै पकड्या जाणा

47 वो या कहण ए लाग रहा था के एक भीड़ आई, अर उन बारह म्ह तै एक जिसका नाम यहूदा था उसके आगै-आगै आण लाग रहा था। वो यीशु के धोरै आया के उसनै चूम लो। 48 यीशु नै उसतै कह्या , "हे यहूदा, के तू चूमा ले के माणस के बेडा नै पकडवावै सैं?" 49 उसके साथियां नै जद देख्या के, के होण आळा सैं, तो कह्या "हे प्रभु, के हम तलवार चलावां ?" 50 अर उन म्ह तै एक नै महायाजक के नौकर पै तलवार चला के उसका सोळा कान उड़ा दिया। 51 इस पै यीशु नै कह्या, "इब बस करो।" अर उसका कान छु के उसताहीं ठीक करया। 52 फेर यीशु नै प्रधान याजकां अर मंदर के पहरदारां के सरदारां अर पुरनियां तै, जो उसपै चढ़ गये थे, कह्या, "के थम मन्नै डाकू जान के तलवार अर लाठीयां ले के लिकडे सों? 53 जद मै मंदर में हर दिन थारै गैल्या था, तो थम नै मेरै हाथ भी कोनी लाया; पर यो थारा बख्त सैं, अर अन्धकार का हक सैं।"

### पतरस का इन्कार

54 फेर वे उसनै पकडके ले चाल्ले, अर महायाजक के घर म्ह लाये। पतरस दूरे ए दूर उसके पाच्छे-पाच्छे चाल्ले था; 55 अर जद वे आँगन म्ह आग सुलगाके कड़े बैट्टे, अर पतरस भी उसके बिचाळै बैठ गया। 56 फेर एक नौकराणी उस ताहीं आग के चाँदणै म्ह बैठ्या देखके अर उस कात्री ताकके कहण लाग्यी, यो भी तो उसके गैल्या था।" 57 पर उसनै यो कह के मना कर दिया, के "हे, जनानी मै उसनै कोनी ज्यान्दा।" 58 थोड़ी हाण पाच्छे किसे और ने उस ताहीं कह्या, "तू भी तो उन म्ह तैए सैं।" पतरस नै कह्या, "हे

भाई, मैं वो कोनी I" 59 कोए घंटे एकै म्ह एक और माणस पक्के बिश्वास तै कहण लाग्या, "सई म्ह यो भी तो उसकै गैल्या था, क्यूँके यो गलीली सै।" 60 पतरस नै कहा, "हे भाई, मैं नीं जाण्दा के तू के कहवै सै।" वो या कहवैए था के मुर्गे नै बांग देदी 61 फेर घूम के प्रभु नै पतरस की ओड़ देख्या अर पतरस नै प्रभु की बात याद आई जो उसनै कही थी: "आज मुर्गे के बाँग देण तै पहल्या, तू तीन बर इनकार करैगा।" 62 अर वो बारणै लिकड़ के नै फुट-फुट कै रोया।

### यीशु का अपमान

63 जो माणस यीशु नै पकड़े होए थे, वे उसनै मखौल बना के पिटण लागे; 64 अर उसकी आँख ढक के उसतै बुझ्या, "भविष्यबाणी करके बता के तेरै किसनै मारया!" 65 अर उन्नै घणीए बुराई की बात उसकै बिरोध म्ह कहीं।

### महासभा के श्यामी यीशु

66 जद दिन लिकड़या तो लोगां के पुरनिए अर प्रधान याजक अर शास्त्री कड़े होये, अर उस ताहीं अपनी बड्डी पंचायत म्ह ल्या के बुझ्या, 67 "जै तू मसीह सै, तो हम नै कहदे!" उसनै उन तै कह्या, "जै मै थारै तै कहूँ, तो बिश्वास कोनी करोगे; 68 अर जै बुझ्हु, तो जबाब नीं दोगे। 69 पर इब तै माणस का बेट्टा पणमेशर के सोळी ओड़ बैठ्या रहवैगा।" 70 इस पै सब नै कहा, "तो के तू पणमेशर का बेट्टा सै?" उसनै उनतै कहा, "थम अपनै आपे कहो सों, क्यूँके मै सूँ।" 71 "फेर उन्नै कहा, "इब हमनै गवाही की के जुरत सै; क्यूँके हमनै आप्पे उसकै मुँह तै सुण लिया सै।"

### पिलातुस के श्यामी यीशु

23 फेर सारी मंडळी उठ के उसनै पिलातुस के धोरै लेग्यी I 2 वो ये कहके उसपै इल्जाम लागण लागे; "हमनै इस ताहीं माणसां नै भकांदे, अर कैसर ने चुंगी देण तै मना करदे, अर खुद नै मसीह, राजा कहन्दे होए सुणयां सै I" 3 पिलातुस नै उसतै बुझ्या, "के तू यहूदियां 'का राजा सै?" उसनै उस ताहीं जबाब दिया, "तू आपै कहवै सै।" 4 फेर पिलातुस नै प्रधान याजकां तै अर माणसां तै कहा, "मन्नै इस आदमी म्ह कोए खोट नीं पाया I" 5 पर वे और भी बिश्वास के गैल्या कहण लागे, "यो गलील तै लेके याडै ताहीं, सारे यहूदियां नै उपदेश देके माणसां नै बहकाव सै।" 6 या सुणके पिलातुस नै बुझ्या, "के यो आदमी गलीली सै?" 7 अर या जाणके के वो हेरोदेस की रियासत का सै, उस ताहीं हेरोदेस के धोरै खन्दा दिया, क्यूँके उन दिनां म्ह वो भी यरूशलेम म्ह था I

### हेरोदेस के श्यामी यीशु

8 हेरोदेस यीशु नै देखके घणा राजी होया, क्यूँके वो घणै दिनां तै उसनै देखणा चाहवै था; इस खात्तर के उसके बारे म्ह सुणयां था, अर उसतै किमे चमत्कार देखण की आस राख्यै था 9 वो उसतै भोत-सीं बात बूझता रहे, अर उसनै उस ताहीं कोए भी जबाब नीं दिया। 10 प्रधान याजक अर शास्त्री खड़े होये तन मन तै उसपै इल्जाम लगान्दे रहे। 11 फेर हेरोदेस नै अपनै सिपाहियां के गैल्या उसकी बेज्ती करके मजाक उड़ाया, अर भडकीले लत्ते पिराह के उस ताहीं पिलातुस के धोरै खन्दा दिया। 12 उसै दिन पिलातुस अर हेरोदेस ढब्बी बणगे; इसतै पहल्या वे एक दूसरे के दुश्मन थे I

### पिलातुस द्वारा यीशु ताहीं मौत की सजा

13 पिलातुस नै प्रधान याजकां, सरदारां अर माणसां नै बुलाके उन ताहीं कहा, 14 "थम इस आदमी नै माणसां का भकान आळा बताके मेरै धोरै ल्याए सों, अर देखो, मन्नै थारै स्याम्ही उसकी जाँच करी, पर जिन बात्तां का थम उसपै इल्जाम लगाओ सों उन बात्तां के बारे म्ह मन्नै इसमे कोए भी खोट कोनी पाया; 15 ना हेरोदेस नै, क्यूँके उसनै इस ताहीं म्हारै धोरै खन्दा दिया सै: अर देखो, उसतै इसा कुछ कोनी होया के वो मौत की सजा के काबिल ठहराया जावै। 16 इस खात्तर मै इसनै छित्वा के छोड़ द्यु सूँ।" 17 [पिलातुस

त्यौहार के बख्त उनकै खात्तर एक कैदी नै छोड़ण पै मजबूर था।] 18 फेर सारे मिलके चिल्ला उठ्ये, "इसका काम तमाम करदे, अर म्हारै खात्तर बरअब्बा नै छोड़ दे!" 19 वो किसै बलवै के कारण जो नगर म्ह होया था, अर हत्या के कारण जेल म्ह गेरया ग्या था 20 पर पिलातुस ने यीशु ताहीं छोड़ण की इच्छा तै माणसां ताहीं फेर समझाया, 21 आखर उन्नै रुक्के मारके कहा, "उसनै क्रूस पै चढा, क्रूस पै !!" 22 उसनै तीसरी बर उन ताहीं कहा, "क्यूँ उसनै कोण सी बुराई करी सै? मन्नै उसमें मौत की सजा के काबिल कोए बात कोनी पाई। इस तरियां मै इसनै छित्वा के छोड़ देऊ सूँ।" 23 पर ओ रुक्के मार-मार के पाच्छे पड़ ग्ये के वो क्रूस पै चढाया जावै, अर उनका रुक्के मारना तेज होग्या। 24 आखर पिलातुस नै हुक्म दिया के उनकी बिनती के मुताबिक करया जावै। 25 उसनै उस आदमी के जो बलवे अर हत्या के कारण जेल म्ह गेरा ग्या था, अर जिसनै वो मांगे थे, छोड़ दिया; अर यीशु नै उनकी इच्छा के मुताबिक सोंप दिया।

### यीशु का क्रूस पै चढाया जाणा

26 जद ओ उसनै लेके जावै थे, तो उन्नै एक कुरेनी नै जो गाम म्ह तै आवै था, पकड़के उसपै क्रूस लाद दिया के उसै यीशु के पाच्छे-पाच्छे ले चाले। 27 माणसां की भीड़ उसकै पाच्छे-पाच्छे हो ली उन म्ह घणीए लुगाई भी थी जो उसकै खात्तर छात्ती पीट्टे अर रोवै धोवै थी I 28 यीशु नै उनके कानीं मुडके कहा, " हे यरूशलेम की बेटियों, मेरे खात्तर ना रोओ; पर अपने अर आपने बाळाकां के खात्तर रोओ 29 क्यूँके देखो, वे दिन आवै सैं, जिन म्ह माणस कहवैगें, 'धन्य सैं वे जो बाँझ सैं अर वे गर्भ नीं जन्ये अर वे दुद्धी जिन्ने दूध नीं पियाया।' 30 उस बखत 'वे पहाडां तै कहण लाग्ये के म्हारै पै आण पंडो, अर टीलां तै के हन्नै ढक ल्यो। 31 क्यूँके वे जिब हरे रुखां गैल्या इसा करै सैं, तो सूख्या के गैल्या के किम्मी नीं करया ज्यागा ?" 32 वे और दो माणसां नै भी जो भुन्डे काम करण आळे थे उसकै गैल्या मारण नै ले चाले। 33 जद वे उस जगहा पोहचे, जिसनै खोपड़ी कहवै थे, तो उन्नै ओड़ै उस ताहीं अर भुन्डे काम करण आळे ताहीं भी, एक नै सोळी अर दूसरे नै ओळी ओड़ क्रूस पै चढावै I 34 फेर यीशु नै कहा, "हे पिता इन्है माफ कर, क्यूँके ये नीं जाणदे के ये के करै सैं।" अर उन्नै पर्ची गेर के उसके लत्ते बाट लिए। 35 माणस खड़े-खड़े देखै थे, अर सरदार भी मजाक करके कहवै थे : इसनै दूसरयां ताहीं बचाया, जै यो पणमेशर का मसीह सै, अर उसका छाटया होए सै, तो अपने आप नै बचा लो।" 36 सिपाही भी धोरै आके अर सिरका देके उसका मजाक बणा के कहवै थे, 37 जै तू यहूदियां का राजा सै, तो अपने आप नै बचाले!" 38 अर उसकै ऊप्पर एक दोषपत्र भी लगा दिया : यो यहूदियां का राजा सै। "

### मन फिराण आळा भुन्डे काम करणीया

39 जो भुन्डे काम करणीये ओड़ै लटकाए गये थे, उन म्ह तै एक नै उसकी बुराई करके कहा, " के तू मसीह कोनी? फेर आपणै आप नै अर हमनै बचा!" 40 इस पै दूसरै ने उस ताहीं धमका के कहा, " के तू पणमेशर तै भी कोनी उरदा? तू भी तो वाए सजा पा रया सै, 41 हम तो न्याय के मुताबिक सजा पारे सां, क्यूँके हम आपनै काम्मां की सई सजा पारे सां, पर उसनै कोए गलत काम नीं करया।" 42 फेर उसनै कहा, "हे यीशु, जद तू अपणै राज्य म्ह आवै, तो मेरी ख्यास करियो।" 43 उसनै उस ताहीं कहा, "मै तन्नै सच्च कहूँ सूँ के आजै तू मेरै गैल्या सुर्गलोक म्ह होगा।" 44 करीबन दोषफारै तै तीसरे पहर ताहीं सारे देश म्ह अन्धेरा होया रह्या, 45 अर सूरज का चाँदणा जांदा रह्या, अर मंदर का पर्दा बिचाळे तै पाट ग्या, 46 अर यीशु नै बड्डे जोर तै कहा, "हे पिता, मै अपनी आत्मा तेरै हाथां म्ह सोंपू सूँ।" अर या कह के दम तोड़ दिया। 47 सूबेदार नै जो किम्मे होया था देखके पणमेशर की बड़ाई करी, अर कहा, "पक्का यो आदमी धर्मी था।" 48 अर भीड़ जो यो देखण नै कड्डी होई थी, इस घटना ने देखके छात्ती पीटती होई बोहङ्गी। 49 पर उसकै सब जाण पिच्छाण, अर जो लुगाईयां गलील तै उसकै गैल्या आई थी, दूर खड़ी यो सब देखण लागरी थी।

### यीशु का गाड्या जाणा

50 ओडे युसूफ नाम का बड्डी पंचायत का एक सदस्य था जो आच्छा अर धर्मी आदमी था 51 उनकी बिचार अर उनके इस काम तै राज्जी कोनी था। वो यहूदियां के नगर अरिमतिया का रहण आळा अर पणमेशर के राज्य की बाट देखण आळा था। 52 उसनै पिलातुस के धोरै जाकै यीशु की लाश माँगी; 53 अर उस ताहीं उतार के मलमल की चादर म्ह लपेटया, अर एक कब्र म्ह धरया, जो पत्थरां म्ह खुदी होए थी; अर उस म्ह कोए कदे नीं राख्या ग्या था। 54 वो तयारी का दिन था, अर सब्त का दिन सरू होण आळा था। 55 उन लुगाईयां नै जो उसके गैल्या गलील तै आई थी, पाच्छे-पाच्छे जाकै उस कब्र नै देख्या, के अर यो भी के उसकी लाश किस रीति तै राखी गयी सै। 56 फेर उन्नै बोहड के खुशबूदार चीज अर इत्र तयार करया; अर सब्त के दिन उन्नै हुक्म के मुताबिक आराम करया।

### यीशु का पुनरुत्थान

24 पर हफते के पहल्ले दिन तड़कै-तड़कै नै वे उन खरबुदार चिजां नै जो उन्नै बणाई थी, ले के कब्र पै आग्यी। 2 उन्नै पत्थर कब्र पै तै हट्या पाया, 3 पर भीत्तर जाकै प्रभु यीशु की लाश कोनी पाई। 4 जब वे इस बात तै हैरान होरी थी तो देखो दो माणस चमकते होए लत्ते पहरी होए उनकै धोरै आण खड्ये होए। 5 जिब्व वे डर ग्यी अर धरती की ओड मुँह झुकाए रही तो उन्नै उन ताहीं कह्या, "थम जिन्दै नै मरै होया म्ह क्यूँ टोहो 6 वो याडै कोनी, पर जी उठ्या सै। याद करो के उसनै गलील म्ह रहदे होए थारै तै के कह्या था, 7 जरूरी सै के माणस का बेडा पपियां के हाथां म्ह पकड़वाया जावै, अर क्रूस पै चढाया जावै, अर तीसरे दिन जी उठै।" 8 फेर उसकी बात उसकै याद आई, 9 अर कब्र पै तै उल्टे आके उन्नै उन ग्यारहां नै अर, सारया ताहीं ये सब बात कहदी। 10 जिन्नै प्रेरितां तै ये बात कही वे मरियम मगदलीनी अर योअन्ना अर याकूब की माँ मरियम अर उसकै साथ की और भी लुगाई थी। 11 पर उसकी बात उण ताहीं कहानी-सी लागी, अर उन्नै उसका बिश्वास नीं करया। 12 फेर पतरस कब्र पै भाज्या ग्या, अर झुककै देख्या तो सिर्फ लत्ते पड़े देख्ये, अर जो होया था उसतै अचम्भा करता होया अपणे घरां चला ग्या। 13 उसै दिन उन म्ह तै दो माणस इम्माऊस नाम गाम म्ह जाण लागरै थे, जो यरूशलेम तै कोई सात कौंस की दुरी पै था। 14 वे इन सब बात्तां पै जो होई थी, आपस म्ह बातचीत करदे जाण लागरे थे, 15 अर जद वे आपस म्ह बात चीत अर पूछताछ करै थे तो यीशु खुद धोरै आके उनकै गैल्या हो लिया। 16 पर उनकी आँख न्यु बंद कर दी थी के उसनै पिच्छाण ना सकै। 17 उसनै उन तै बुझ्या, "ये के बात सै, जो थम चाल्दे-चाल्दे आपस म्ह करो सों?" "वे उदास सँ खड्ये होगे। 18 या सुण के उन म्ह तै किलयोपास नाम के एक माणस नै कह्या, "के तू यरूशलेम म्ह एकला परदेशी सै, जो नीं जाणदा के इन दिनां म्ह उस म्ह के-के होया सै?" 19 उसनै उन तै बुझ्या, "कौण सी बात? उन्नै उस ताहीं कह्या, यीशु नासरी के बारे म्ह जो पणमेशर अर सारे माणसां के धोरै काम अर वचन म्ह सामर्थी नब्बी था, 20 अर प्रधान याजकां अर म्हारै सरदारों नै उस ताहीं पकडवा दिया के उसतै मौत का हुक्म दिया जा; अर उसनै क्रूस पै चड़वाया। 21 पर हमनै उम्मीद थी के योए इस्राएल नै छुटकारा देवैगा। इन सारी बात्तां के सिवा इस घटना नै होए आज तीसरा दिन सै, 22 अर म्हारै म्ह तै कई लुगाई नै भी म्हार ताहीं उलझन म्ह गेर दिया, जो सबेरै कब्र पै ग्यी थी; 23 अर जिब्व उसकी लाश कोनी पाई तो वा या कहन्दी आई के हमनै सुर्गदुतां के दर्शन पाये, जिन्नै कह्या

के वो जिन्दा सै। 24 फेर म्हारै साथियां म्ह तै कई कब्र पै ग्ये, अर जिसा लुगाई नै कह्या था उसाए पाया; पर वो कोनी देख्या।" 25 फेर उसनै उन ताहीं कह्या, "हे सब बावळो अर नब्बियां की सारी बात्तां पै बिश्वास करण म्ह नासमझो! 26 के जरूरी कोनी था के मसीह ये दुःख उठा के अपनी महिमा म्ह दाखल हो?" 27 फेर उसनै मूसा तै अर सारे नब्बियां तै सरू करके सारे पवित्र शास्त्रां म्ह तै अपने बारै म्ह लिक्खी बात्तां का मतलब, उन ताहीं समझा दिया।

28 इतनै म्ह वो उस गाम के धोरै पहोचे जित वे जावै थे, अर उसके ढंग तै इसा लाग्या के वो आगे जाणा चाहवै सै। 29 पर उन्नै यो कह के उस ताहीं रोक्या, म्हारै गैल्या रह, क्यूँके साँझ होल्यी सै अर दिन इब घणा ढळ ग्या सै।" फेर वो उनकै गैल्या रहण के खात्तर भीत्तर ग्या। 30 जद वो उन के गैल्या खाना खाण बैठ्या, तो उसनै रोटी लेके धन्यवाद करया अर उस ताहीं तोड़के उन्नै देण लाग्या। 31 फेर उनकी आँख खुल ग्यी; अर उन्नै उस ताहीं पिच्छाण लिया, अर वो उनकी आँखां तै ओन्झळ होग्या। 32 उन्नै आपस म्ह कह्या, "जद वो म्हारै तै रास्ते म्ह बात करै था अर पवित्र शास्त्र का मतलब हमनै समझावै था, तो के म्हारै मन म्ह जोस नीं आया?" 33 वो उसै बख्त उठके यरूशलेम म्ह चले ग्ये, अर उन ग्यारहां अर उनकै साथियां ताहीं उन्नै कट्टे मिलो। 34 वो कहवै थे, प्रभु साचेए जी उठ्या, अर शमौन नै दिख्या।" 35 फेर उन्नै रास्ते की बात उन ताहीं बता दी अर या भी के रोटी तोड़दे बख्त किस तरियां उस ताहीं पिच्छाणा।

### यीशु का चेल्या ताहीं दिखणा

36 वे ये बात करये थे के ओ खुद ए उनके बिचाळै आण खड्या होया, अर उन ताहीं कह्या, "थमनै शान्ति मिलै।" 37 पर वे घबरागै अर डरगै, अर समझे के हम किसे भुत नै देख्वां सां। 38 उसनै उन तै कह्या के, "क्यूँ घबराओ सों? अर थारै मन म्ह क्यूँ बैहम हो सै? 39 मेरै हाथ-पायां नै देखो के मै ओए सूँ मन्नै छु के देखो, क्यूँके आत्मा के हाड-माँस कोनी होंदे जिसा मेरै म्ह देखो सों।"

40 यो कहके उसनै उन ताहीं अपनै हाथ पैर दिखाए। 41 जद खुशी के मारै उन्नै बिश्वास कोनी होया, अर ओ अचम्भा मात्रै थे, तो उसनै उन ताहीं बुझ्या, "के याडै थारै धोरै किम्मे खाणनै सै?" 42 उन्नै उस ताहीं भुनी होई मच्छी का टुकड़ा दिया। 43 उसनै लेके उनकै आगे खाय। 44 फेर उसनै उन ताहीं कह्या, "ये मेरी वे बात सै, जो मन्नै थारै गैल्या रहदे होए थारै तै कही थी के जरूरी सै जितनी बात मूसा की व्यवस्था अर नब्बियां अर भजनां की किताबां म्ह मेरै बारे म्ह लिक्खी सै, सारी पूरी हों।" 45 फेर उसनै पवित्र शास्त्र बुझण के खात्तर उनकी बुद्धि खोल दी, 46 अर उनतै कह्या, "यो लिख्या सै के मसीह दुःख ठावैगा, अर तीसरै दिन मरै होया म्ह तै जी उठैगा, 47 अर यरूशलेम तै लेके सारी जातां म्ह मन बदलण का अर पापां की माफी का प्रचार, उसकै-ए नाम तै करया जावैगा। 48 थम इन सारी बात्तां के गवाह सों। 49 अर देखो, जिसकी सूँह मेरै पिता नै खाई सै, मै उन्नै थारै पे उतारूंगा अर जिब्व तैई सुर्ग तै सामर्थ नीं पाओगे, जब ताहीं इसै नगर म्ह रुके रहो।

### यीशु का स्वर्गारोहण

50 फेर ओ उन्नै बैतनिय्याह ताहीं बाहर लेग्या, अर अपणे हाथ ठाके उन ताहीं आशीष दी; 51 अर उन्नै आशीष देंदे होए ओ उनतै न्यारा होग्या अर सुर्ग पै उठा लिया। 52 फेर वो उसनै नमस्कार करके बडी खुशी तै यरूशलेम चले गये; 53 अर वे लगातार मंदर म्ह हाज़र होके पणमेशर की भक्ति करया करै थे।

# यूहन्ना

## वचन देही की शिक्क म्ह आया

1 सबतै पहल्या शब्द था, अर शब्द पणमेशर गेल्या था, अर शब्द पणमेशर था। 2 योए सबतै पहल्या पणमेशर के गेल्या था। 3 सारा किमै उसके जरिये बण्या सै, अर जो कीमे उसके जरिये बण्या सै उसम्ह तै कोए भी चीज उसके बिना नीं बणी। 4 उसमै जीवन था अर ओ जीवन माणसां का चाँदणा था। 5 चाँदणा अन्धेरै म्ह चमके सै, अर अन्धेरै नै उस ताहीं कोन्या अपणाया।

6 एक माणस पणमेशर के ओड़ तै हाजर होया जिसका नाम युहन्ना था। 7 ओ गवाही देण खातर आया के चाँदणै की गवाही देवै, अक सारे उसके जरिये बिश्वास ल्यावै। 8 ओ खुद तै ओ चाँदणा कोनी था, पर उस्से चाँदणै की गवाही देण खातर आया था।

9 साच्चा चाँदणा जो हरेक माणस नै चमकावै सै, दुनिया म्ह आण आळा था। 10 ओ दुनिया म्ह था, अर दुनिया उसके जरिये जणी, अर दुनिया नै उस ताहीं ना पिच्छाणया। 11 ओ अपणै घरा आया अर उसके अपणयां नै उस ताहीं कोन्या अपणाया। 12 पर जितन्यां नै उस ताहीं अपणाया, उसनै उन ताहीं पणमेशर के ऊलाद होण का हक्क दिया यानि उन्नै जो उसके नाम पै बिश्वास राखै सै। 13 वे ना तै लहु तै, ना देही की मर्जी तै, ना माणसां की मर्जी तै, पर पणमेशर तै जणे होए सै।

14 अर वचन देही की शिक्क म्ह आया; अर अनुग्रह अर सच्चाई तै भरके म्हारै बिचाळै रहण लाग्या, अर हमनै उसकी इसी महिमा देखी, जिसी बाप के ऐकलै की महिमा। 15 युहन्ना नै उसके बारे म्ह गवाही दी, अर रुक्का मारके बोल्या, "यो ओए सै, जिसका मन्ने जिक्का करया के जो मेरै पाछै आण लागरया सै, ओ मेरतै बाध सै क्यूँके ओ मेरतै पहल्या था।" 16 अके उसकी भरपुरी म्ह तै हम सारया नै मित्ती यानिके अनुग्रह पै अनुग्रह। 17 ज्यातै के व्यवस्था तै मूसा तै मिले, पर अनुग्रह अर सच्चाई यीशु मसीह तै पहाँची। 18 पणमेशर ताहीं किसे नै कदे कोन्या देख्या, ऐकला बेडा जो बाप की गोद्री म्ह सै, उस्से नै उस ताहीं दिखाया।

## यूहन्ना बपतिस्मा देणआळे की गवाही

(मत्ती 3:1-12; मरकुस 1:1-8; लूका 3:1-18)

19 युहन्ना की गवाही या सै, के जिब्ब यहुदियां नै यरूशलेम तै याजकां अर लेवियां नै उसतै यो बुइझण नै खन्दाया, "तू कौण सै?" 20 फेर उसनै यो मान लिया अर नाट्या कोनी, पर मान लिया, "मै मसीह कोनी सूँ।" 21 फेर उन्नै उसतै बुइझया, "तो फेर तू कौण सै? के तू एलियाह सै?" उसनै कहया, "मै कोनी सूँ।" "तो के तू ओ नबी सै?" उसनै जबाब दिया, "ना।" 22 फेर उन्नै उसतै बुइझया, "फेर तू सै कौण? ताके हम आपणे खन्दाण आळ्यां ताहीं जबाब देवां। तू अपणै बारे म्ह के कहवै सै?" 23 ओ बोल्या, "जिसा यशायाह नबी नै बोल्या सै: 'मै बण म्है एक रुक्का देवण आळे का बोल सूँ, के थम प्रभु का रास्ता सीधा करो।'"

24 वे फरीसियों के कात्री तै खन्दाए होड़ थे। 25 उन्नै उसतै यो सवाल बुइझया, "जै तू ना मसीह सै, अर ना एलियाह, अर ना ओ नबी सै, तै फेर बपतिस्मा क्यातै देवै सै?" 26 युहन्ना नै उन ताहीं जबाब दिया, "मै तै पाणी तै बपतिस्मा द्यु सूँ, पर थारे बिचाळै एक माणस खड्या सै जिसनै थम कोनी जाणदे। 27 यानि मेरै पाछै आणआळा सै, जिसकी जुत्ती के फीत्ते मै खोल्लण

जोगा कोनी।" 28 ये बात यरदन तै परली ओड़ बैतनिय्याह म्ह होई, जडै यूहन्ना बपतिस्मा दिया करदा।

## पणमेशर का मेम्ना

29 दूसरै दिन उसनै यीशु ताहीं आपणी ओड़ आन्दे देखके बोल्या, "देकखो, यो पणमेशर का मेम्ना सै जो दुनिया का पाप ठावै सै। 30 यो ओए सै जिसके बारे म्ह मन्ने कहया था, 'एक माणस मेरै पाछै आवै सै जो मेरतै घणा काम्मल सै, ज्यातै ओ मेरतै पहल्या था। 31 मै तै उसनै पिच्छाणु कोनी था, पर इस्से खातर मै पाणी तै बपतिस्मा देन्दा होया आया के वो इस्नाएल पै दीख जावै।" 32 अर युहन्ना नै या गवाही दी: "मन्ने आत्मा ताहीं कबूतर की तरियां अकास तै उतरदे देख्या सै, अर ओ उस पै ठहरया। 33 मै तै उसनै पिच्छाणु कोनी था, पर जिसनै मेरैताहीं पाणी तै बपतिस्मा देण के खात्तर खन्दाया, उस्से नै मेरैताहीं कहया, 'जिस पै तू आत्मा नै उतरदे अर ठहरदे देखै, ओए पवित्र आत्मा तै बपतिस्मा देणिया सै।' 34 अर मन्ने देख्या, अर गवाही दी सै, के योए पणमेशर का बेडा सै।"

## यीशु के प्रथम चेले

35 दूसरै दिन दुबारै यूहन्ना अर उसके चेल्यां म्ह तै दो जणे खडे होए थे, 36 अर उसनै यीशु पै जो जाण लागरया था, उसकी ओड़ लखाके बोल्या, "देकखो, यो पणमेशर का मेम्ना सै।" 37 जिब्ब वे दोन्नु चेल्ले उसकी न्यु सुणके यीशु के गेल हो लिए। 38 यीशु नै बोहड़के उनताहीं गेल आन्दे देख्या अर उनतै बोल्या, "थम किसनै टोव्हो सो?" वे उसतै बोले, "हे रब्बी यानि हे गुरु, तू कडै रहवै सै?" 39 ओ उनतै बोल्या, "चाल्लो, तै देख लियो।" फेर उन्नै उसके रहण की जगहां देखी, अर उस दिन उसके गेल्या रए। यो दसवें घन्टै के करीबन था।

40 उन दोनुआ म्है तै, जो यूहन्ना की बात सुणके यीशु के गेल्या हो लिए थे, एक तो शमौन पतरस का भाई अन्दियास था। 41 उसनै पहल्या अपणै संगे भाई शमौन तै फेटके उसतै बोल्या, "हमनै ख्रिस्त यानि मसीह, मिलग्या। 42 ओ उसनै यीशु के धोरै ल्याया। यीशु नै उसकी ओड़ लखाके कहया, "तू यूहन्ना का बेडा शमौन सै: तू कैफा यानिके पतरस कुआवैगा।

## फिलिप्पुस अर नतनएल का बुलाया जाणा

43 दूसरै दिन यीशु का जी गलील जाण नै करया। ओ फिलिप्पुस तै फेटया अर बोल्या, "मेरे गेल्या हो ले।" 44 फिलिप्पुस, अन्दियास अर पतरस के नगर बैतसैदा का रहणिया था। 45 फिलिप्पुस नतनएल तै फेटया अर उसतै बोल्या, "जिसका जिक्का मूसा नै व्यवस्थायां म्ह अर नब्बियां नै करया सै, ओ म्हारै तै फेटगा सै! ओ युसुफ का बेडा, यीशु नासरी सै।" 46 नतनएल उसतै बोल्या, "के कोए काम्मल चीज भी नासरत तै लिकड़ सकै सै? फिलिप्पुस उसतै बोल्या, "चालके देख ले। 47 यीशु नै नतनएल को आपणी ओड़ आन्दे देख के उसके बारे म्ह कहया, "देकखो, यो साच्चा इस्नाएली सै: इसम्ह कपट कोनी।" 48 नतनएल उसतै बोल्या, "तू मन्ने किस तरियां जाणे सै?" यीशु नै उस ताहीं जबाब दिया, "इसतै पहल्या के फिलिप्पुस नै तेरे ताहीं बुलाया, जिब्ब तू अंजीर के दरखत तळै था, जिब्ब मन्ने तेरैताहीं देख्या था।" 49 नतनएल नै उस ताहीं जबाब दिया, "हे रब्बी, तू पणमेशर का बेडा सै; तू इस्नाएल का महाराजा सै।" 50 यीशु नै उस ताहीं जबाब दिया, "मन्ने जो तेरैते कहया के मन्ने तेरैताहीं अंजीर के दरखत तळै देख्या, के तू इस्से ताहीं



बिश्वास करै सै? तू इसतै भी बड़े-बड़े काम देखेगा।" 51 फेर उसतै बोल्या, "मैं तेरैतै साच्च-साच्च कहूँ सूँ, के थम सुर्ग नै खुल्या होइ अर पणमेशर के सुर्गदुत्ता नै माणस के बेटे पै उतरदे अर ऊपरान जान्दे देखोगे।"

### गलील के काना म्ह पहला अनोकरा काम

2 फेर तीसरै दिन गलील के काना म्ह किसे का ब्याह था, अर यीशु की माँ भी ओड़ए थी। 2 यीशु अर उसके चेले भी उस ब्याह म्ह न्योद राखे थे। 3 जिबब दाखरस सापड़या, फेर यीशु की माँ उसतै बोली, "उनके धोरै दाखरस कोनी रहया।" 4 यीशु नै उसतै कहया, "हे नारी, मन्नै तेरैतै के काम? इबे मेरा टेम कोनी आया।" 5 उसकी माँ नै नौकरां तै कहया, "जो किमै यो थारे ताहीं कहवै, न्युए करियो।" 6 ओड़ै यहूदियां ताहीं पवित्र करण के रिवाज के मुताबिक पत्थर के छः पैण्डे धरे थे, जिनम्ह दो-दो, तीन-तीन मण पाणी आवै था। 7 यीशु नै उनतै कहया, "पैण्डां मै पाणी भर दयो। अर उन्नै वे मुँह ताहीं भर दिए। 8 फेर उसनै उन ताहीं कहया, "इब काडके भोज के प्रधान धोरै ले जाओ।" अर वे लेगे। 9 जिबब भोज के प्रधान नै ओ पाणी चाख्या, जो दाखरस बणया था अर नीं जाणै था के ओ कड़ै तै आया सै (पर जिन नौकरां नै पाणी काड्या था वे जाणै थे) फेर भोज के प्रधान नै बन्दडे ताहीं बुलाके उसतै कहया, 10 "हरेक माणस पहल्या बढिया दाखरस देवै सै, अर जिबब माणस पीके छिक जावै सै, फेर हल्का देवै सै; पर तन्नै बढिया दाखरस इब ताहीं राख राख्या सै।" 11 यीशु नै गलील के काना म्ह आपणा यो पहलडा कारनाम्मा दिखाके आपणी महिमा दिखा दी अर उसके चेल्यां नै उसपै बिश्वास करया।

12 इसके पाच्छे ओ अर उसकी माँ अर उसके भाई अर उसके चेले कफरनहूम नै गए अर ओड़ै किमै दिन रहे।

### मंदर तै व्यापारियाँ का काड्या जाणा

(मत्ती 21:12-13; मरकुस 11:15-17; लूका 19:45-46)

13 यहूदियां का फसह का त्यौहार लोवै था, अर यीशु यरुशलेम म्ह गया। 14 उसनै मन्दर म्ह बळद, भेड़ अर कबूतर नै बेचण आळे अर सर्राफां ताहीं बड़े होए पाया। 15 फेर उसनै जेवड़ियां का कोरडा बणाके, सारी भेड़ां अर बळदा ताहीं मन्दर तै काड दिया, अर सर्राफां के पिस्से खिन्डा दिए अर पीडे पलट दिए, 16 अर कबूतर बेचणआळ्यां ताहीं बोल्या, "इन्है उरै तै ले जाओ। मेरै बाप के घर नै धन्धे का घर ना बणाओ।" 17 फेर उसके चेल्यां नै याद आया के लिख्या होइ सै, "तेरै घर की सिरड मनै खा ज्यागी। 18 इस पै यहूदियां नै उसतै कहया, "तू जो इस तरियां करै सै तो म्हारैताहीं कौण-सा निशान दिखावै सै?" 19 यीशु नै उन ताहीं जबाब दिया, "इस मन्दर ने ढा दो, मैं इसनै तीन दिनां म्ह खड्या कर दूँगा। 20 यहूदियां नै कहया, "इस मन्दर के बनाण म्ह छियालिस साल लागे सै, अर के तू इसनै तीन दिनां म्ह खड्या कर देवैगा?" 21 पर उसनै आपणी देह के मन्दर के बारै म्ह बोल्या था। 22 खर म्ह जिबब ओ मरे होया म्ह तै जिन्दा होया जिबब उसके चेल्यां नै याद आई के उसनै यो कहया था; अर उन्नै पवित्र ग्रन्थ अर उस शब्द का जो यीशु नै बोल्या था, बिश्वास करया।

### यीशु माणस के मन नै जाणै सै

23 जिबब ओ यरुशलेम म्ह फसह के टेम त्यौहार म्ह था, तो घणाए नै उसके निशान नै जो वो दिखावै था देखके उसके नाम पै बिश्वास करया। 24 पर यीशु नै अपणै-आप ताहीं उनके भरोसै पै कोनी छोड्या, ज्यातै ओ सारया नै जाणै था; 25 अर उसनै जरूत कोनी थी के माणस के बारै म्ह कोए गवाही देवै, ज्यातै ओ खुदे जाणै था के माणस के मन म्ह के सै?

### यीशु अर नीकुदेमुस

3 फरीसियां म्ह तै नीकुदेमुस नाम का एक माणस था, जो यहूदियां का प्रधान था। 2 उसनै रात नै यीशु के धोरै आके उस ताहीं कहया, "हे रब्बी, हमनै बेरा सै के तू पणमेशर की ओड़ तै गुरु बणके आया सै; ज्यातैए कोए इन निशान नै जिन्है तू दिखावै सै, जै पणमेशर उसके गेल्या ना हो, तै

कोन्या दिखा सकदा।" 3 यीशु नै उस ताहीं जबाब दिया, "मै थारै ताहीं साच्च-साच्च कहूँ सूँ, जै कोए नए सिरे तै ना जण्य तै पणमेशर का राज देख नी सकदा।" 4 नीकुदेमुस नै उस ताहीं कहया, "माणस जिबब बुढा होज्या, तै किस ढाळ जन्म ले सकै सै? के ओ आपणी माँ के गर्भ म्ह दुसरी बर भीत्तर बड़के जन्म ले सकै सै।" 5 यीशु नै जबाब दिया, "मै तेरैतै साच्च-साच्च कहूँ सूँ; जिबब ताहीं कोए माणस पाणी अर आत्मा तै ना जण्य तै ओ पणमेशर के राज्य म्ह बड़ नी सकदा। 6 ज्यातै जो देह तै जण्य सै, ओ देह सै; अर जो आत्मा तै जण्य सै, ओ आत्मा सै। 7 हैरान ना होवै, के मन्नै तेरैतै कहया; के थारै ताहीं नए सिरे तै जन्म लेणा जरूरी सै। 8 बाळ जितोड़ चाहवै सै उतोड़ चालै सै, अर तू उसका शब्द सुणै सै, पर ना जाणदा, के वा कड़ै तै आवै सै अर कितोड़ नै जावै सै? जो कोए आत्मा तै जण्य सै ओ इसाए सै।" 9 नीकुदेमुस नै उस ताहीं जबाब दिया; के या बात किसढाळ हो सकै सै? 10 या सुणके यीशु नै उस ताहीं कहया, "तू इस्रालियां का गुरु होके भी के इन बात्तां नै कोनी समझदा?" 11 मैं तेरैतै साच्च-साच्च कहूँ सूँ के हम जो जाणां सां, ओ कहवां सां, अर जिस ताहीं हमनै देख्या सै उसकी गवाही देवां सां, अर थम म्हारी गवाही अपणादे कोनी। 12 जिबब मन्नै थारैतै धरती की बात कहीं, अर थम बिश्वास नी करदे, तै जै मैं थमनै सुर्ग की बात कहूँ, तै फेर किसढाळ बिश्वास करोगे? 13 अर कोए सुर्ग पै कोनी चढा, सिर्फ ओए जो सुर्ग तै उतरा यानिके माणस का बेटा जो सुर्ग म्ह सै। 14 अर जिस ढाळ तै मूसा नै बण म्ह नाग ताहीं ऊंचे पै चढाया, उस्से ढाळ तै जरूरी सै के माणस का बेटा भी ऊंचे पै चढाया जावै। 15 ताके जो कोए उसपै बिश्वास करै उसम्ह अनन्त जीवन पावै।

16 क्युँके पणमेशर नै दुनिया तै इसा प्यार राख्या के उसनै आपणा एक्का बेटा दे दिया, ताके जो कोए उसपै बिश्वास करै, ओ नास कोनी होवै, पर अनन्त जीवन पावै। 17 पणमेशर नै आपणै बेटे ताहीं दुनिया म्ह ज्यातै कोनी खन्दाया, के दुनिया पै दण्ड का हुक्म देवै, पर ज्यातै के दुनिया उसके जरिये उद्धार पावै। 18 उसपै बिश्वास करै सै, उस पै दण्ड का हुक्म कोन्या होन्दा, पर जो उसपै बिश्वास नी करदा, ओ कसूरवार बणैगा; ज्यातै के उसनै पणमेशर के एक्के बेटे के नाम पै बिश्वास कोनी करया। 19 अर दण्ड के हुक्म का कारण यो सै के चान्दणा दुनिया म्ह आया सै, अर माणसां नै अन्धेरै ताहीं चान्दणै तै घणा प्यारा जाणया क्युँके उनके काम भुण्डे थे। 20 युँके जो कोए भुण्ड करै सै, ओ चान्दणै तै बैर राखवै सै, अर चान्दणै के धोरै कोनी आन्दा, इसा ना हो के उसके काम्मां म्ह तै खोट काड्या जावै। 21 पर जो सचाई पै चालै सै ओ चान्दणै के धोरै आवै सै, ताके उसके काम दिखै, के ओ पणमेशर की ओड़ तै करे होइ सै।

### यीशु के बारै म्ह यूहन्ना की गवाही

22 फेर यीशु अर उसके चेले यहूदिया देश म्ह पहांचे; अर ओ ओड़ै उनके गेल्या रहके बपतिस्मा देण लाग्या। 23 यूहन्ना भी शालेम के धोरै ऐनोन् म्ह बपतिस्मा देवै था, क्युँके ओड़ै घणाए पाणी था, अर माणस आके बपतिस्मा लेवै थे— 24 यूहन्ना उस टेम ताहीं जेळखाणै म्ह कैद नी करया था— 25 ओड़ै यूहन्ना के चेल्यां का किसे यहूदी गेल्या पवित्रपणै के बारै म्ह बहस होगी। 26 अर उन्नै यूहन्ना के धोरै आके उस ताहीं कहया, "हे रब्बी, जो माणस यरदन के परली ओड़ तेरी गेल्या था, अर जिसकी तन्नै गवाही दी सै; देख, ओ बपतिस्मा देवै सै, अर सारे उसके धोरै आवै सै।" 27 यूहन्ना नै जबाब दिया, "जिबब ताहीं माणस नै सुर्ग कान्ही तै ना दिया जावै, जद ताहीं ओ किम्मे नी ले सकदा।" 28 थम तै खुदे मेरे गवाह सो के मन्नै कहया, "मैं मसीह कोनी, पर उसके आगे खन्दाया गया सूँ।" 29 जिसकी बन्दडी सै, ओए बन्दडा सै; पर बन्दडे का ढब्बी जो खड्या होया उसकी सुणै सै, बन्दडे के शब्द तै घणा राजी होवै सै; इब मेरा यो आनन्द पूरा होया सै। 30 जरूरी सै के ओ बधै अर मैं घट्टै।

31 "जो ऊपरान तै आवै सै, ओ सारया म्ह काम्मल सै; जो धरती कान तै आवै सै ओ धरती का सै, अर धरतीए की बात कहवै सै: जो सुर्ग कान तै आवै सै, ओ सारया म्ह ऊपरला सै। 32 जो किम्मे उसनै देख्या अर सुणया सै, उस्से की गवाही देवै सै; अर कोए उसकी गवाही कोनी अपणान्दा।

33 जिसने उसकी गवाही अपणाई उसने इस बात पे छाप लगा दी के पणमेशर साक्षात् सैं। 34 क्यूँके जिसताही पणमेशर नै खन्दाया सैं, ओ पणमेशर की बात कहवै सैं; क्यूँके ओ आत्मा नाप-नापके कोनी देन्दा। 35 बाप बेट्टे तै प्यार करै सैं, अर उसने सारी चीज उसके हाथां म्ह दे दी सैं। 36 जो बेट्टे पै बिश्वास करै सैं, अनन्त जीवन उससे का सैं; पर जो बेट्टे नै कोनी मान्दा, ओ जीवन नै कोनी देखवै, पर पणमेशर का छौह उस पै रहवै सैं।

### यीशु अर सामरी लुगाई

4 फेर जिब्ब प्रभु नै बेरा पाट्या के फरीसियां नै सुण्या सैं के यीशु युहन्ना तै घणे चेल्ले बणावै सैं अर उन्हे बपतिस्मा देवै सैं- 2 ऊँ तै यीशु खुद नै बल्कि उसके चेल्ले बपतिस्मा देवै थे— 3 फेर ओ यहूदियां नै छोड़के दुबारे गलील नै चल्या गया, 4 अर उसने सामरिया होन्दा ओड़ जाणा जरूरी था। 5 इस करके ओ सूखार नामक सामरिया के एक नगर ताहीं आया, जो उस धरती के धोरै सैं जो याकूब नै आपणे बेट्टे युसुफ ताहीं दी थी। 6 अर याकूब का कुवां भी ओड़ए था। आखर म्ह यीशु रास्ते का थकया होड़ उस कुअ पै न्यूप बैठया। या बात छठे घण्टे के करीबन होई।

7 इतने म्ह एक सामरी लुगाई पाणी भरण आई। यीशु नै उस ताहीं कहया, “मन्ने पाणी प्या।” 8 क्यूँके उसके चेल्ले नगर म्ह खाणा मोल लेण जारे थे। 9 उस सामरी लुगाई नै उस ताहीं कहया, “तू यहूदी होके मुझ सामरी लुगाई तै पाणी क्यातै माँगै सैं?” (क्यूँके यहूदी सामरिया के गेल्या किस्से ढाळ का बिवार कोनी राखदे।) 10 यीशु नै जबाब दिया, “जै तू पणमेशर के वरदान नै जाणदी, अर न्यु भी जाणदी के ओ कौण सैं जो तेरैतै कहवै सैं, ‘मन्ने पाणी प्या, फेर तू उसतै माँगदी, अर ओ तन्नै जीवन का पाणी देन्दा।’” 11 लुगाई नै उस ताहीं कहया, “हे प्रभु, तेरै धोरै पाणी भरण नै तै किमे सैं भी कोनी, अर कुवां डून्धा सैं; तै फेर ओ जीवन का पाणी तेरै धोरै कड़ै तै आया? 12 के तू म्हारै बाप याकूब तै बड्डा सैं, जिसने म्हारै ताहीं यो कुआं दिया, अर खुद भी आपणे ऊलादा, अर अपणे डान्गरां सुदा इस म्ह तै पीया?” 13 यीशु नै उसताहीं जबाब दिया, “जो कोए यो पाणी पीवैगा ओ फेर तिसाया होगा, 14 पर जो कोए उस पाणी म्ह तै पीवैगा जो में उस ताहीं दयुंगां ओ फेर अनन्त काल ताहीं तिसाया कोनी होवैगा, बल्के जो पाणी में उस ताहीं दयुंगां ओ उसम्ह एक सोत्ता बण ज्यागा जो अनन्त जीवन खातर उमड़दा रहवैगा।” 15 लुगाई नै उस ताहीं कहया, “हे प्रभु, ओ पाणी मन्ने दे ताके में तिसाई ना होऊँ अर ना पाणी भरण नै इतनी दूर आऊँ।” 16 यीशु नै उस ताहीं कहया, “जा आपणे धणी नै याड़े बुला ल्या।” 17 लुगाई नै जबाब दिया, “मैं बिना धणी की सूँ।” यीशु नै उस ताहीं कहया, “तू सई कहवै सैं, ‘मैं बिना धणी की सूँ।’” 18 क्यूँके तन्नै पाँच धणी कर लिए सैं, अर जिसके गेल्या तू इब सैं ओ भी तेरा धणी कोनी। या तन्नै साच्ची-ए कही सैं।” 19 लुगाई नै उस ताहीं कहया, “हे प्रभु, मन्ने लागै सैं तू नब्बी सैं।” 20 म्हारै बापदादां नै इस्से पहाड़ पै भगति करी, अर थम कहो सो के वा जगहा जड़ै भगति करणी चहिए यरुशलेम म्ह सैं।” 21 यीशु नै उस ताहीं कहया, “हे नारी, मेरी बात का भरोस्सा कर के ओ टेम आवै सैं के थम ना तै इस पहाड़ पै बाप की भगति करोगे, ना यरुशलेम म्ह। 22 थम जिसने कोनी जाणदे, उसकी भगति करो सो; अर हम जिसने जाणा सा उसकी भगति करया सां; क्यूँके उद्धार यहूदियां म्ह तै सैं। 23 पर ओ टेम आवै सैं, बल्कि इब भी सैं, जिसम्ह साच्चे भगत पिता की भगति आत्मा अर सच्चाई तै करैगें, क्यूँके पिता अपणे खातर इसेए भगतां नै टोहवै सैं। 24 पणमेशर आत्मा सैं अर जरूरी सैं के उसकी भगति करण आळे आत्मा अर सच्चाई तै उसकी भगति करै। 25 लुगाई नै उस ताहीं कहया, “मैं जाणु सूँ के मसीह जो ख्रिस्त कुहावै सैं, आणआळा सैं; जिब्ब ओ आवैगा, फेर म्हारै ताहीं सारी बात बता देवैगा। 26 यीशु नै उस ताहीं कहया, “मैं जो तेरैतै बोलण लागरया सूँ, ओए सूँ।”

### चेल्यां की वापसी

27 इतने म्ह उसके चेल्ले आण पडोचे, अर हैरान होण लागे के ओ लुगाई तै बतळावै था, फेर भी किस्से नै कोनी बुझया, “तू के चाहवै सैं? या क्यातै उसतै बतळावै सैं?” 28 फेर लुगाई आपणा पन्डा छोड़के नगर म्ह चली गई,

अर माणसां तै कहण लागी, 29 “आओ एक माणस नै देखखो, जिसने सारा किमे जो मन्ने करया मेरै तै बता दिया। कदे योए तो मसीह नी सैं?” 30 आखर म्ह वे नगर तै लिकड़के उसके धोरै आण लागे। 31 इस बिच्चाळे उसके चेल्यां नै यीशु तै या बिनति करी, “हे गुरु, किमे खा ले।” 32 पर उसने उन ताहीं कहया, “मेरै धोरै खाण खातर इसा खाणा सैं जिसने थम कोनी जाणदे।” 33 फेर चेल्यां नै आपस म्ह कहया, “के कोए उसके खातर खाणा लेके आया सैं? 34 यीशु नै उन ताहीं कहया, “मेरा खाणा यो सैं के अपणे खन्दाण आळे की मर्जी के बैळ चालुं अर उसका काम पुगाऊँ। 35 के थम कोनी कहन्दे, ‘लामणीयां के इबे चार महीने रहरे सैं?’ देखखो, मैं थारैताहीं कहुँ सूँ, आपणी निगांठ ठाके खेत्तां कात्री लखाओ के वे लामणी खातर पकरे सैं। 36 लमणयारे मजदूरी पावै अर अनन्त जीवन के खातर फळ कड्डे करै सैं, ताके बोणआळा अर लमणयारे दोन्नु मिलके आनन्द करै। 37 क्यूँके याड़े या कहावत सई बैठह सैं: बोणआळा ओर सैं अर लमणयारा ओर। 38 मन्ने थारैताहीं ओ खेत काटण खातर खन्दाया जिसम्ह थमने मैहनत कोन्या करी: दुसरयां नै मैहनत करी अर थमने उनकी मैहनत के फळ म्ह बान्डा करया।”

### सामरियाँ का बिश्वास करणा

39 उस नगर के घणखरे सामरियां ने उस लुगाई के कहण तै यीशु पै बिश्वास करया; क्यूँके उसने या गवाही दी थी: ‘उसने सारा किमे जो मन्ने करया सैं, मेरै तै बता दिया, बिश्वास करया।’ 40 ज्यातै जिब्ब सामरी उसके धोरै आए, तो उसतै बिनती करण लागे के म्हारै याड़े रै। आखर म्ह ओ ओड़ै दो दिन ताहीं रहया। 41 उसके शब्दां के कारण ओर भी घणखरे माणसां नै बिश्वास करया 42 अर उस लुगाई तै कहया, “इब हम तेरे कहण तए बिश्वास कोनी करदे; क्यूँके हमने खुदे सुण लिया, अर जाणगे सा के योए साच्चा म्ह दुनिया का उद्धार करणिया सैं।

43 फेर उन दो दिनां के पाछे ओ ओड़ै तै लिकड़के गलील नै गया। 44 क्यूँके यीशु नै खुदे गवाही दी के नब्बी आपणे देश म्ह आदर मान कोनी पान्दा। 45 जिब्ब ओ गलील म्ह आया, तो गलीली राजी होके उसतै फेट्टे; क्यूँके जितने काम उसने यरुशलेम म्ह त्यौहार के टेम करे थे, उन्ने उन सारया ताहीं देखया था, क्यूँके वे भी त्यौहार म्ह जारे थे।

### राजकर्मचारी के बेट्टे ताहीं चंगा करणा

46 फेर ओ दुबारे गलील के काना नगर म्ह आया, जड़ै उसने पाणी ताहीं दाखरस बणाया था। ओड़ै राजा का एक कर्मचारी था जिसका बेट्टा कफरनहूम म्ह बीमार था। 47 ओ या सुणके के यीशु यहूदिया तै गलील म्ह आरहया सैं, उसके धोरै गया अर उसतै बिनती करण लागया के चालके मेरै बेट्टे नै ठीक कर दे: क्यूँके ओ मरण आळा था। 48 यीशु नै उस ताहीं कहया, “जिब्ब ताहीं थम कारनाम्मा अर अचम्भे के काम कोनी देखदे जद ताहीं कदे भी बिश्वास कोनी करोगे।” 49 राजा के कर्मचारी नै उसतै कहया, “हे प्रभु, मेरै बाळक की मौत होण तै पहल्या चाल।” 50 यीशु नै उस ताहीं कहया, “जा, तेरा बेट्टा जिन्दा सैं।” उस माणस नै यीशु की कहीं होई बात का बिश्वास करया अर चल्या गया। 51 ओ रास्तेए म्ह था के उसके नौकर उसतै आ फेट्टे अर कहण लागे, “तेरा छोरा जिन्दा सैं।” 52 उसने उसतै बुझया, “किस टेम ओ ठीक होण लागया?” उन्ने उस ताहीं कहया, “काल सातमें घण्टे म्ह बुखार उतर गया।” 53 फेर बाप जाण गया के यो उससे टेम होया जिस टेम यीशु नै उस ताहीं कहया, “तेरा बेट्टा जिन्दा सैं,” अर उसने अर उसके सारे कुणबे नै बिश्वास करया। 54 यो दूसरा अचम्भे का काम था जो यीशु नै यहूदिया तै गलील म्ह आके दिखाया।

### अड़तीस साल के रोगी ताहीं चंगा करणा

5 इन बात्तां के पाछे यहूदियां का एक त्यौहार होया, अर यीशु यरुशलेम नै गया। 2 यरुशलेम म्ह भेड़-बाड़ै के धोरै एक कुण्ड सैं जो इब्रानी भाषा म्ह बैतहसदा कुहावै सैं; उसके पाँच घाट सैं। 3 इनम्ह घणखरे बीमार, आंधे, लंगड़े अर सुखे अंगआळे (पाणी के हालण के आस म्ह) पड़े रहवै थे। 4 (क्यूँके खास टेम पै पणमेशर के सुर्गदूत कुण्ड म्ह उतरके पाणी नै

हलाया करै थे। पाणी हालदए जो कोए पहल्या उतरदा ओए चंगा हो जान्दा चाहे उसके कोए बीमारी क्यूँ ना हो।<sup>5</sup> उड़ै एक माणस था, जो अड़तीस साल तै बीमारी म्ह पड़या था।<sup>6</sup> यीशु नै उस ताहीं पड़या होया देखकै अर न्यु जाणकै के ओ घणे दिनां तै इसी हालत म्ह पड़या सै, उसतै बुझया, “के तू चंगा होणा चाहवै सै?”<sup>7</sup> उस बीमार ने उस ताहीं जबाब दिया, “हे प्रभु, मेरै धोरै कोए माणस कोनी के जिब पाणी हलाया जावै, तो मन्त्रै कुण्ड म्ह तारै; पर मेरे पहाचदे-पहाचदे दूसरा मेरतै पहल्या उतर जावै सै।”<sup>8</sup> यीशु नै उस ताहीं कहया, “उठ, आपणी खाट ठा, अर हाँड-फिर।”<sup>9</sup> ओ माणस जिब्वे चंगा होया, अर आपणी खाट ठाकै हाँडण-फिरण लागया।

<sup>10</sup> ओ सब्द का दिन था। ज्यांतै यहूदी उस ताहीं जो चंगा होया था, कहण लागे, “आज तै सब्द का दिन सै, तेरा खाट ठाणा सई कोनी।”<sup>11</sup> उसनै उन ताहीं जबाब दिया, “जिसनै मेरैताहीं चंगा करया, उस्से नै मेरैताहीं कहया, ‘आपणी खाट ठा अर हाँड-फिर।’”<sup>12</sup> उनतै बुझया, “ओ कौण माणस सै जिसनै तेरैतै कह्या, ‘खाट ठा, अर हाँड-फिर?’”<sup>13</sup> पर जो चंगा होया था ओ कोनी जाणै था के ओ कौण सै, क्यूँके उस ठोड़ पै भीड़ होण के कारण यीशु ओड़ै तै टहलया था।<sup>14</sup> इन बात्तां के पाच्छै ओ यीशु नै मन्दर म्ह फेटया। यीशु नै उस ताहीं कहया, “देख, तू चंगा होया सै: दुबारा पाप ना करिये, इसा ना हो के इसतै कोए भारया बिपदा तेरै पै आण पड़े।”<sup>15</sup> उस माणस नै जाकै यहूदियां तै कह दिया के जिसनै मेरैताहीं चंगा करया ओ यीशु सै।<sup>16</sup> इस कारण यहूदी यीशु नै तंग करण लागे, क्यूँके ओ इसे काम सब्द के दिन करया करदा।<sup>17</sup> इस पै यीशु नै उन ताहीं कहया, “मेरा बाप इब ताहीं काम करै सै, अर मैं भी काम करूँ सूँ।”<sup>18</sup> इस कारण यहूदी और भी घणे उसके मारण खातर कोशिश करण लागे, क्यूँके ओ ना सिर्फ सब्द के दिन का कायदा तोड़या करदा, पर पणमेशर नै आपणा बाप कहकै खुद ताहीं पणमेशर कै बरोबर भी ठहरावै था।

### बेट्टे का अधिकार

<sup>19</sup> इसपै यीशु नै उस ताहीं कहया, “मैं थारैताहीं साच्ची-साच कहुँ सूँ, बेट्टा खुद तै किमे नीं कर सकदा, सिर्फ ओ जो बाप नै करदे देखवै सै; क्यूँके जिन-जिन काम्मां नै ओ करै सै उन्नए बेट्टा भी उस्से ढाल करै सै।<sup>20</sup> क्यूँके बाप बेट्टे तै प्यार करै सै अर जो-जो काम ओ खुद करै सै, ओ सारे उसतै दिखावै सै: अर ओ इसतै भी बड्डे काम उसताहीं दिखावैगा, ताके थम हैरान होओ।<sup>21</sup> जिसा बाप मरे होया नै ठावै अर जिवावै सै उस्से ढाल बेट्टा भी जिन्है चाहवै सै उन्है जिवावै सै।<sup>22</sup> बाप किस्से का न्याय कोनी करदा, पर न्याय करण का सारा काम बेट्टे ताहीं सौंप राखया सै,<sup>23</sup> के सारे माणस जिस ढाल बाप की इज्जत करै सै उस्से ढाल बेट्टे की भी इज्जत करै। जो बेट्टे की इज्जत कोनी करदा, ओ बाप की, जिसनै उस ताहीं खन्दाया सै, इज्जत कोनी करदा।<sup>24</sup> मैं थारैतै साच्ची-साच कहुँ सूँ, जो मेरा शब्द सुणकै मेरै खन्दाए होए पै भरोस्सा करै सै, अनन्त जीवन उस्से का सै, अर उसपै दण्ड का हुक्म कोनी होन्दा, पर ओ मौत नै पार करकै जीवन म्ह बड़ लिया सै।<sup>25</sup> मैं थारैतै साच्ची-साच कहुँ सूँ, ओ टेम आवै सै, अर इब सै, जिसम्ह मरेहोड़ पणमेशर कै बेट्टे का शब्द सुणैगे, अर जो सुणैगे वे जिवैगे।<sup>26</sup> क्यूँके जिस ढाल तै बाप खुद म्ह जीवन राखै सै, उस्से ढाल तै उसनै बेट्टे ताहीं भी यो हक्क दिया सै के खुद जीवन राखै।<sup>27</sup> बल्के उसनै न्याय करण का भी हक्क दिया सै, ज्यांतै के ओ माणस का बेट्टा सै।<sup>28</sup> इसतै हैरान मतना होओ: क्यूँके ओ टेम आवै सै के जितने कब्रं म्ह सै वे उसका शब्द सुणकै लिकड़ आवैगे।<sup>29</sup> जिन्नै भलाई करी सै वे जीवन के पुनरुत्थान कै खातर जी जावै गे अर जिन्नै भुण्ड करी सै वे दण्ड के पुनरुत्थान कै खातर जी जावैगे।

### यीशु के समबन्ध म्ह गवाही

<sup>30</sup> मैं खुद तै किमे कोनी कर सकदा, जिसा सुणु सूँ, उस्से तरियां न्याय करूँ सूँ, अर मेरा न्याय साच्चा सै, क्यूँके मैं आपणी मर्जी कोनी पर अपणे खन्दाण आळे की मर्जी चाहूँ सूँ।<sup>31</sup> जै मैं खुदे आपणी गवाही दूँ, तो मेरी गवाही साच्ची कोनी।<sup>32</sup> एक और सै जो मेरी गवाही देवै सै, अर मैं जाणु सूँ, के मेरी जो गवाही ओ देवै सै, वा साच्ची सै।<sup>33</sup> थमणै युहन्ना तै बुझवाया अर

उसनै सच्चाई की गवाही दी सै।<sup>34</sup> पर मैं अपणै बारे म्ह माणसां की गवाही कोनी चाहन्दा; फेरभी मैं ये बात ज्यांतै कहुँ सूँ के थारा उद्धार हो।<sup>35</sup> ओ तो बळदा होया अर चमकदा होया दीवा था, अर थमणै किमे वार ताहीं उसके चान्दणै म्ह मगण होणा भाया।<sup>36</sup> पर मेरै धोरै जो गवाही सै वा युहन्ना की गवाही तै बड्डी सै; क्यूँके जो काम बाप नै मेरै ताहीं निपटण नै सौंप्यां सै यानिके योए काम जो मैं करूँ सूँ, वे मेरे गवाह सै के बाप नै मेरैताहीं खन्दाया सै।<sup>37</sup> अर बाप जिसनै मेरैताहीं खन्दाया सै, उस्से नै मेरी गवाही दी सै। थमनै ना कदे उसका शब्द सुण्या, अर ना उसकी शिक्क देखी सै;<sup>38</sup> अर उसके शब्द ताहीं मन म्ह बणाए कोनी राखदे, क्यूँके जिस ताहीं उसनै खन्दाया थम उसका भरोस्सा कोनी करदे।<sup>39</sup> थम पवित्र ग्रन्थ म्ह टोव्हो सो, क्यूँके समझों सो के उसम्ह अनन्त जीवन थारैताहीं मिलै सै; अर यो ओए सै जो मेरी गवाही देवै सै;<sup>40</sup> फेर भी थम जीवन पाण खातर मेरै धोरै आणा कोनी चाहन्दा।<sup>41</sup> मैं माणसां तै इज्जत कोनी चाहन्दा।<sup>42</sup> पर मैं थमणै जाणु सूँ के थारै म्ह पणमेशर का प्रेम कोनी।<sup>43</sup> मैं अपणे बाप के नाम तै आया सूँ, अर थम मेरैताहीं अपणादे कोनी; जै दुसरा कोए खुदे नाम तै आवै, तो उसनै अपणा लोगे।<sup>44</sup> थम जो एक-दुसरे तै इज्जत चाहो सो अर वा इज्जत जो एकलै पणमेशर की ओड़ तै सै, कोनी चाहन्दा, किसतरियां बिश्वास कर सको सो?<sup>45</sup> न्यु ना समझियों के मैं बाप के श्यामी थारै म्ह खोट कादू सूँ; थारै म्ह खोट काढणिया तो मूसा सै, जिसपै थमणै भरोस्सा राखया सै।<sup>46</sup> क्यूँके जै थम मूसा पै भरोस्सा करदे, तो मेरा भी भरोस्सा करदे, ज्यांतै के उसनै मेरै बारे म्ह लिखया सै।<sup>47</sup> पर जै थम उसकी लिक्खी होई बात्तां पै बिश्वास कोनी करदे, तो मेरी बात्तां पै किसतरियां बिश्वास करोगे?

### पाँच हजार माणसां ताहीं खिलाणा

(मत्ती 14:13-21; मरकुस 6:30-44; लूका 9:10-17)

**6** इन बात्तां के पाच्छै यीशु गलील की झील यानिके तिबिरियास की झील के धोरै गया।<sup>2</sup> अर एक बड्डी भीड़ उसके गेल्या हो ली क्यूँके जो अचम्भै के काम ओ बीमारां पै दिखावै था वे उन्नै देख्या करै थे।<sup>3</sup> फेर यीशु पहाड़ पै चढ़के आपणे चेल्यां के गेल्या बैठग्या।<sup>4</sup> यहूदियां के फसह का त्यौहार लोवै था।

<sup>5</sup> जिब्वे यीशु नै आपणी आँख ठाकै एक बड्डी भीड़ ताहीं अपणै कान्नी आन्दे देख्या, फेर फिलिप्पुस ताहीं कहया, “हम इनके खाणै के खातर कड़ै तै रोटी मोल ल्यावां?”<sup>6</sup> उसनै या बात उस ताहीं आजमाण ताहीं बोली, क्यूँके ओ खुदे जाणै था के ओ के करैगा।<sup>7</sup> फिलिप्पुस नै उस ताहीं जबाब दिया, “दो सौ दिनार की रोटी भी उन खातर पूरी कोनी पड़े के उनम्ह तै हरेक नै माड़ी-माड़ी ठया जा।”<sup>8</sup> उसके चेल्यां म्ह तै शमौन पतरस का भाई अन्द्रियास नै उस ताहीं कहया,<sup>9</sup> “याड़ै एक छोरा सै जिसके धोरै जौ की पाँच रोटी अर दो मच्छीं सै; पर इतने माणसां खातर वे के सै?”<sup>10</sup> यीशु बोल्या, “माणसां नै बिठा दयो।” उस जगहां घणी घास थी: फेर माणस जिनम्ह आदमियां की गिनती करीबण पाँच हजार की थी, बैठगे।<sup>11</sup> फेर यीशु नै रोटी ली अर धन्यवाद करके बैठणआळ्यां ताहीं बान्ड दी: अर उस्से ढाल मच्छीयां म्ह तै जितनी वे चाहवै थे, बान्ड दी।<sup>12</sup> जिब वे खाके छिकगे फेर ओ चेल्यां तै बोल्या, “बचे होड़ टुकड़े कड़े करल्यो के किमे बगायां नीं जावै।”<sup>13</sup> आखर म्ह उन्नै कट्टा करया, अर जौ की पाँच रोटियां के टुकड़यां तै जो खाणआळ्यां तै बची होड़ थी, बारहां छाबड़ी भरि।<sup>14</sup> फेर जो अचम्भे के काम उसनै कर दिखाये उसनै वे माणस देखकै कहण लागे, “ओ नब्बी जो दुनिया म्ह आणआळा था, पक्का योए सै।”<sup>15</sup> यीशु न्यु जाणकै के वे मन्त्रै राजा बनाण खातर पकड़णा चाहवै सै, फेर पहाड़ पै एकला चल्या गया।

### यीशु का पाणी पै चालणा

(मत्ती 14:22-33; मरकुस 6:45-52)

<sup>16</sup> जिब्वे सांझ होई, तो उसके चेले झील के कन्ठारै गए,<sup>17</sup> अर किस्ती पै चढ़के झील के परली ओड़ कफरनहूम नै जाण लागे। उस टेम अन्धेरा होया था, अर यीशु इब ताहीं उनके धोरै कोनी आया था।<sup>18</sup> आंधी के कारण झील म्ह झाल उड्डण लागी।<sup>19</sup> जिब वे खेते-खेते तीन-चार कोस के करीबन लिकड़गे, फेर उन्नै यीशु ताहीं झील पै चाल्दे अर किस्ती के धोरै आन्दे

देखा, अर डरगे। 20 पर उसनै उनतै कहया, “मैं सूं: डरो मतना।”

21 आखरम्ह वे उसनै किस्ती पै चढ़ाण नै राजी होए अर जिब्बए वा किस्ती उस जगहां पै जा पहोच्ची जड़ै वे जाण लागरे थे।

### लोगां का यीशु ताहीं टोहणा

22 दुसरै दिन उस भीड़ नै, जो झील कै परली ओड़ खड़ी थी, न्यू देखा के याड़ै एक नै छोड़ और कोए छोटी किस्ती कोनी थी; अर यीशु आपणे चेल्यां गेल्या उस किस्ती पै कोनी चढ़या था, पर सिर्फ उसके चेल्ले ए गए थे। 23 फेर दुसरी किस्ती तिबिरियास तै उस जगहां कै धोरै आई, जड़ै उन्नै प्रभु के धन्यवाद करण कै पाच्छे रोटी खाई थी। 24 ज्यांतै जिब्ब भीड़ नै देखा के याड़ै ना यीशु सै अर ना उसके चेल्ले, फेर वे भी छोटी-छोटी किस्तीयां पै चढ़कै यीशु नै टोन्दे होए कफरनहूम पहोच्चे।

### यीशु जीवन की रोटी

25 झील कै परली ओड़ जिब्ब वे उसतै फेट्टे तो बोले, “हे रब्बी, तू याड़ै कद आया?” 26 यीशु ने उनताहीं जबाब दिया, “मैं थारैताहीं साच्ची-साच कहुँ सूं, थम मन्नै ज्यांतै कोनी टोव्हो सो के थमणै अचम्भै के काम देखके, पर ज्यांतै के थम रोटी खाके छिके। 27 नाश होण आळे खाणै कै खातर मैहनत मतना करो, पर उस खाणै खातर जो अनन्त जीवन ताहीं रहवै सै, जिसनै माणस का बेट्टा थारैताहीं देवैगा; क्यूँके बाप यानिके परमेश्वर नै उससे पै छाप लाई सै। 28 वे उसतै बोले, “पणमेश्वर के काम करण खातर हम के करां?” 29 यीशु नै उनताहीं जबाब दिया, “पणमेश्वर का काम यो सै के थम उसपै, जिस ताहीं उसनै खन्दाया सै, बिश्वास करो।” 30 फेर वे उसतै बोले, “फेर तू कौण सा निशान दिखावै सै के हम उसनै देखके तेरा बिश्वास करां? तू कौण सा काम दिखावै सै? 31 म्हारै बापदादयां नै बाण म्ह मन्ना खाया; जिसा लिख्या सै, ‘उसनै उन ताहीं खाण खातर सुर्ग तै रोटी देई।’ 32 यीशु उनतै बोल्या, “मैं थारैताहीं साच्ची-साच कहुँ सूं, के मूसा थारैताहीं वा रोटी सुर्ग तै कोनी दी, पर मेरा बाप थमणै साच्ची रोटी सुर्ग तै देवै सै। 33 क्यूँके पणमेश्वर की रोटी वाए सै, जो सुर्ग तै उतरके दुनिया म्ह जिन्दगी देवै सै।” 34 फेर वे उसतै बोले, “हे प्रभु, वा रोटी हमनै सारीहाण दिया कर।”

35 यीशु उनतै बोल्या, “जीवन की रोटी मैं सूं: जो मेरै धोरै आवैगा, ओ कदे भूखका कोनी रहवैगा, अर जो कोए मेरै पै बिश्वास करैगा, ओ कदे तिसाया कोनी होवैगा। 36 पर मन्नै थारैताहीं कहया था के थमणै मेरैताहीं देख भी लिया सै फेरभी बिश्वास कोनी करदे। 37 जो किमे बाप मन्नै देवै सै ओ सारा कीमे मेरै धोरै आवै सै, अर जो कोए मेरै धोरै आवैगा उसनै मैं कद्वेभी कोनी लिकाडु। 38 पर मैं आपणी मर्जी कोनी पर आपणै खन्दाण आळे की मर्जी पूरी करण नै सुर्ग तै उतरया सूं; 39 अर मेरै खन्दाण आळे की मर्जी या सै के जो किमे उसनै मेरैताहीं दिया सै, उसम्ह तै मैं किमे कोनी खोजूँ, पर उसनै आखर के दिनां म्ह दुबारै जिन्दा कर दूँ। 40 क्यूँके मेरै बाप की मर्जी या सै के जो कोए बेट्टे नै देखके अर उसपै बिश्वास करै, ओ अनन्त जीवन पावै; अर मैं उसनै आखर के दिनां म्ह दुबारै जिन्दा करूंगा।”

41 इसपै यहूदी उसपै बिरडाण लागगे, क्यूँके उसनै कहया था, “जो रोटी सुर्ग तै उतरती, वा मैं सूं।” 42 अर वे बोले, “के यो युसुफ का बेट्टा यीशु कोनी, जिसके माँ-बाप नै हम जाणां सां? फेर ओ किस ढाळ कह सकै सै के मैं सुर्ग तै उतरया सूं?” 43 यीशु नै उन ताहीं जबाब दिया, “आपस म्ह मतना बिरडाओ। 44 कोए मेरै धोरै कोनी आ सकदा जिब्ब ताहीं बाप, जिसनै मेरैताहीं खन्दाया सै, उसनै खींच नी लेवै; अर मैं उसनै आखर के दिनां म्ह फेर जिन्दा करूंगा। 45 नब्बीयां के लेखां म्ह यो लिख्या सै: ‘वे सारे पणमेश्वर की ओड़ तै सिखाए होए होवेंगे।’ जिस किसे नै बाप तै सुणया अर सिख्या सै, ओ मेरै धोरै आवै सै। 46 न्यू कोनी के किसे नै बाप ताहीं देखा सै; पर जो पणमेश्वर की ओड़ तै सै, सिर्फ उससे नै बाप ताहीं देखा सै। 47 मैं थारैताहीं साच्ची-साच कहुँ सूं, के जो कोए बिश्वास करै सै, अनन्त जीवन उससे का सै। 48 जीवन की रोटी मैं सूं। 49 थारै बापदादयां नै बाण म्ह मन्ना खाया अर मरगे। 50 या वा रोटी सै जो सुर्ग तै उतरै सै ताके माणस उसम्ह तै खावै अर ना मरै। 51 जीवन की रोटी जो सुर्ग तै उतरती सै, मैं सूं। जे कोए इस रोटी म्ह तै खावै,

तो सारीहाण जिन्दा रहवैगा; अर जो रोटी मैं दुनिया कै जीवन खातर दयुंगा, ओ मेरा मांस सै।

52 इसपै यहूदी न्यू कहकै आपस म्ह रोळां करण लागगे, “यो माणस किस ढाळ हमनै आपणा मांस खाण नै दे सकै सै?” 53 यीशु नै उन ताहीं कहया, “मैं थारैताहीं साच्ची-साच कहुँ सूं, के जिब्ब ताहीं थम माणस कै बेट्टे का मांस ना खाओ, अर उसका लहू ना पियो, थारै म्ह जीवन कोनी। 54 जो मेरा मांस खावै अर मेरा लहू पीवै सै, अनन्त जीवन उससे का सै; अर आखर के दिनां म्ह मैं उसनै दुबारै जिन्दा कर दयुंगा। 55 क्यूँके मेरा मांस सई म्ह खाण की चीज सै, अर मेरा लहू सई म्ह पीवण की चीज सै। 56 जो मेरा मांस खावै अर मेरा लहू पीवै सै ओ मेरै म्ह डटया रहवै सै, अर मैं उसम्ह। 57 जिसा जिन्दै बाप नै मेरैताहीं खन्दाया सै, अर मैं बाप के कारण जिन्दा सूं, उससे ढाळ ओ भी जो मन्नै खावैगा मेरै कारण जिन्दा रहवैगा। 58 जो रोटी सुर्ग तै उतरती सै याए सै, उस रोटी बरगी कोनी जो बापदादयां नै खाई अर मरगे; जो कोए या रोटी खावैगा, ओ कदे ताहीं जिन्दा रहवैगा।” 59 ये बात उसनै कफरनहूम कै एक आराधनालय म्ह उपदेश देन्दे टेम कहीं।

### अनन्त जीवन के बचन

60 उसके चेल्यां म्ह तै घणखरा नै या सुणके कहया, “या करडी बात सै; इसनै कौण सुण सकै सै?” 61 यीशु नै आपणै मन म्ह न्यू जाणके के मेरे चेल्ले आपस म्ह इस बात पै बिरडावै सै, उन ताहीं बुझया, “के इस बात तै थारैताहीं ठेस लागै सै?” 62 जै थम माणस कै बेट्टे नै जड़ै ओ पहल्या था, ओड़ए ऊप्पर जान्दे देखोगे, तो के होगा? 63 आत्मा तो जिन्दगी देण आळी सै, देह तै किम्मे फैयदा कोनी; जो बात मन्नै थारैतै कहीं सै वे आत्मा सै, अर जीवन भी सै। 64 पर थारैम्ह तै किमे इसे सै जो बिश्वास कोनी करदे। क्यूँके यीशु पहल्या तैए जाणै था के जो बिश्वास नी करदे, वे कौण सै; अर कौण मेरैताहीं पकड़वावैगा। 65 अर ओ बोल्या, “ज्यांतै मन्नै थारैताहीं कहया था के जिब्ब ताहीं किसे नै बाप की ओड़ तै यो बरदान ना मिलै तब ताहीं ओ मेरै धोरै कोनी आ सकदा।

### पतरस का बिश्वास

66 इसपै उसके चेल्यां म्ह तै घणखरे उल्टे पलटगे अर उसके पाच्छे उसके गेल्या कोनी चाल्ले। 67 फेर यीशु नै उन बारहां तै कहया, “के थम भी चले जाणां चाहो सो?” 68 शमौन पतरस नै उसताहीं जबाब दिया, “हे प्रभु, हम किसके धोरै जावां? अनन्त जीवन की बात तो तेरैए धोरै सै, 69 अर हमनै बिश्वास करया अर जाणगे सै के पणमेश्वर का पवित्र माणस तूए सै।” 70 यीशु नै उन ताहीं जबाब दिया, “के मन्नै थम बारहां ताहीं कोन्या छांटया? फेरभी थारै म्ह तै एक माणस शैतान सै।” 71 यो उसनै शमौन इस्करियोती के बेट्टे यहूदा कै बारै म्ह कहया था, क्यूँके ओए जो बारहां म्ह तै एक था, उस ताहीं पकड़वाने नै था।

### यीशु अर उसके भाई

7 इन बात्तां कै पाच्छे यीशु गलील म्ह हान्डदा रहया; क्यूँके यहूदी उसताहीं मारण खातर कोशिश करण लागरे थे, ज्यांतै ओ यहूदियां म्ह हान्डणा कोनी चाहवै था। 2 यहूदियां का मण्डपां (झुगियां) का त्यौहार लोवै था। 3 ज्यांतै उसके भाईयां नै उसताहीं कहया, “याड़ै तै यहूदियां नै जा, के जो कोए काम तू करै सै उन्नै तेरे चेल्ले ओड़ै भी देखके। 4 क्यूँके इसा कोए कोनी होगा जो मश्शुर होणा चाहवै, अर लुहक कै काम करै। जै तू यो काम करै सै, तो खुद नै दुनिया पै प्रगट कर।” 5 क्यूँके उसके भाई भी उसपै बिश्वास कोनी करै थे। 6 फेर यीशु उनतै बोल्या, “मेरा टेम इबे ताहीं कोनी आया, पर थारै खातर सारा टेम सै। 7 दुनिया थारै तै बैर कोनी कर सकदी, पर वा मेरै तै बैर करै सै क्यूँके मैं उसके बिरोध म्ह या गवाही दयुँ सूं के उसके काम भुन्दे सै। 8 थम त्यौहार म्ह जाओ, मैं इबे इस त्यौहार म्ह कोनी जान्दा, क्यूँके इबे मेरा टेम पूरा कोनी होया।” 9 ओ उनतै ये बात कहकै गलील म्ह रहया।

### झोंपड़ीयां के त्यौहार म्ह यीशु

10 पर जिब्व उसके भाई त्यौहार म्ह जा लिए तो ओ खुद भी, प्रगत म्ह नीं पर मान्ना गुप्ती तै गया। 11 यहूदी त्यौहार म्ह उन्नै न्यू कहकें टोव्हण लाग गे, “ओ कडै सै?” 12 अर माणसां म्ह उसके बाबत लुहक-लुहकके घणखरी बात होई: किमे कहवै थे, “ओ काम्मल माणस सै।” अर किमे कहवै थे, “ना, ओ माणसां नै बहकावै सै।” 13 फेरभी यहूदियां के डर के मारे कोए माणस उसके बारे म्ह खुलके कोनी बोले था।

### त्यौहार म्ह यीशु का उपदेश

14 जिब्व त्यौहार के आधे दिन बीतगे; फेर यीशु मन्दर म्ह जाके उपदेश देण लागया। 15 फेर यहूदियां नै हैरान होके कहा, “इसनै बिना पढ़े विद्या किसतरियां आगी?” 16 यीशु नै उन्नै तै जबाब दिया, “मेरा उपदेश मेरा कोनी, पर मेरे खन्दाण आळै का सै। 17 जै कोए उसकी मर्जी पै चालणा चाहवै, तो ओ इस उपदेश के बारे म्ह जाणैगा के यो पणमेशर की ओड़ तै सै या मैं आपणी ओड़ तै कहूँ सूँ। 18 जो आपणी ओड़ तै किमे कहवै सै, ओ खुद की बड़ाई चाहवै सै, पर जो अपणै खन्दाण आळै की बड़ाई चाहवै सै ओए साच्चा सै, अर उसमह अधर्म कोनी। 19 के मूसा नै थारैताहीं व्यवस्था कोनी दिये? फेरभी थारैह तै कोए नियम-कायदा पै कोनी चाल्दा। थम मन्नै क्यातै मारणा चाहो सो?” 20 माणसां नै जबाब दिया, “तेरे म्ह भुन्डी औपरी आत्मा सै! कौण तन्नै मारणा चाहवै सै?” 21 यीशु नै उन्नै तै जबाब दिया, “मन्नै एक काम करया, अर थम सारे अचम्भा करो सो। 22 इस्से खातर मूसा नै थारैताहीं खतन्नै का हुक्म दिया सै(न्यू नीं के यो मूसा की कात्री तै सै पर बापदादयां तै लाग लागरी सै) अर थम सब्द के दिन माणस का खतना करो सो। 23 जिब्व सब्द के दिन माणस का खतना करया जावै सै ताके मूसा के नियम-कायदा का हुक्म नीं टळे। फेर थम मेरै पै क्यातै छोह करो सो के मन्नै सब्द के दिन एक माणस ताहीं सई ढाळ चंगा करया। 24 मुँह देख्या न्याय मतना करो, पर सई-सई न्याय करो।”

### के यीशु ए मसीह सै

25 फेर किमे यरुशलम म्ह रहणआळे बोले, “के यो ओए कोनी जिसताहीं मारण की कोशिश करण लागरे सै?” 26 पर लखाओ, ओ तै सरैआम बात करै सै अर कोए उसतै किम्मे कोनी कहन्दा। के सरदारान नै सांच्ये बेरा पाट्या सै के योए मसीह सै? 27 इसके बारे म्ह हमनै बेरा सै यो कितका सै; पर मसीह जिब्व आवैगा तो कोए कोनी जाणै के ओ कितका सै।” 28 फेर यीशु नै मन्दर म्ह उपदेश देन्दे होए रुक्का मारके कहा, “थम मन्नै जाणो सो, अर न्यू भी जाणो सो के मैं कितका सूँ। मैं तै खुद कोनी आया, पर मेरा खन्दाण आळा साच्चा सै, उसनै थम कोनी जाणदे। 29 मैं उसनै जाणूँ सूँ, क्यूँके मैं उसके कात्री तै सूँ, अर उससे नै मेरैताहीं खन्दाया सै।” 30 इसपै उन्नै उसताहीं पकड़णा चाहया, फेरभी किस्से नै उसके हाथ कोनी लाया क्यूँके उसका टेम इबताहीं कोनी आया था। 31 फेर भी भीड़ म्ह तै घणखरे माणसां नै उसपै बिश्वास करया, अर बोले, “मसीह जिब्व आवैगा तो के इसतै घणे अचम्भै के काम दिखवैगा जो इसनै दिखारे?”

### यीशु ताहीं पकड़न की कोशिश

32 फरीसियां नै माणसां ताहीं उसके बारे म्ह या बात लुहक-लुहकके कहन्दे सुणया; अर प्रधान याजकां अर फरीसियां नै उसताहीं पकड़ण के खातर सिपाही खन्दाए। 33 इसपै यीशु बोल्या, “मैं माड़ी वार ताहीं और थारै गेल्या सूँ, फेर आपणै खन्दाण आळै धारै चल्या जाऊँगा। 34 3थम मन्नै टोव्होगे, पर कोनी पाओगे; अर जडै मैं सूँ, ओड़ै थम कोनी आ सकदे।” 35 इसपै यहूदियां नै आपस म्ह कहा, “यो कडै जावैगा के हम इसनै कोनी टोह सकदे? के ओ उनके धारै चल्या जावैगा, जो यूनानियां म्ह खिन्डके रहवै सै, अर यूनानियां ताहीं भी उपदेश देवैगा? 36 या के बात सै जो उसनै बोली सै, के थम मन्नै टोहवो गे, पर कोनी पाओगे; अर जडै मैं सूँ, ओड़ै थम नीं आ सकदे।”

### जीवन-जल की नदियाँ

37 त्यौहार के आखर दिन, जो खास दिन सै, यीशु खड़या होया अर रुक्का देके बोल्या, “जै कोए तिसाया हो तो मेरै धारै आवै अर पीवै। 38 जो कोए मेरै पै बिश्वास करैगा, जिसा पवित्र ग्रन्थ म्ह आया सै, ‘उसके हृदय म्ह तै जीवन के पाणी की नदी बह लिक्डैगी।’ 39 उसनै यो शब्द पवित्र आत्मा के बारे म्ह कहा, जो बिश्वास करण आळयां नै मिलणआळी थी; क्यूँके इब ताहीं आत्मा कोनी उतरया था; क्यूँके यीशु इब ताहीं आपणी महिमा ताहीं कोनी पहोचया था। 40 फेर भीड़ म्ह तै किसे-किसे नै या बात सुणके कहा, “सांच्ये योए ओ नब्बी सै।” 41 दूसरयां नै कहा, “यो मसीह सै।” पर किमे बोले, “क्यातै?” के मसीह गलील म्ह आवैगा? 42 के पवित्र ग्रन्थ यो कोनी आया के मसीह दाऊद की पीढ़ी तै अर बैतलहम गाम तै आवैगा, जडै दाऊद रहवै था? 43 आखर म्ह उसके कारण माणसां म्ह फूट पड़ी। 44 उनम्ह तै किमे उसताहीं पकड़णा चाहवै थे, पर किस्से नै उसके हाथ कोनी लाया।

### यहूदी अगुवां का अबिश्वास

45 फेर सिपाही प्रधान याजकां अर फरीसियां के धारै बोहड़ आए; उन्नै उनताहीं कहा, “थम उसनै क्यातै नीं ल्याए?” 46 सिपाहियां नै जबाब दिया, “किसे माणस नै कदे भी इसी बात कोनी करीं।” 47 फरीसियां नै उनताहीं जबाब दिया, “के थम भी भळोई म्ह आ गे? 48 के सरदारान या फरीसियां म्ह तै किसे नै भी उसपै बिश्वास करया सै? 49 पर ये माणस जो व्यवस्था कोनी जाणदे, सरापित सै।” 50 नीकुदेमुस नै, जो पहल्या उसके धारै आया था अर उन म्ह तै एक था, उनताहीं बोल्या, 51 “के म्हारे व्यवस्था किसे माणस नै, जिब्व ताहीं पहल्या उसकी सुणके जाण ना लेवै के ओ के करै सै, कसूरवार मान्नै सै?” 52 उन्नै उस ताहीं जबाब दिया, “के तू भी गलील का सै? टोह अर लखा के गलील तै कोए नब्बी कोनी प्रगत होवै। 53 फेर सारे कोए आपणै-आपणै घराने चले गए।

### जार लुगाई ताहीं माफ़ी

8 पर यीशु जैतन के पहाड़ पै गया। 2 तडकेए ओ फेर मन्दर म्ह आया; सारे माणस उसके धारै आए अर ओ बैठके उन्नै उपदेश देण लागया। 3 फेर शास्त्री अर फरीसी एक लुगाई नै ल्याए जो जारी म्ह पकड़ी होड़ थी, अर उसनै बिच्चाळे खड़या करके यीशु ताहीं कहा, 4 “हे गुरु, या लुगाई जारी करदी पकड़ी गई सै। 5 नियम कायदयां म्ह मूसा नै म्हारै ताहीं हुक्म दिया सै के इसी लुगाई पै पत्थर बरसाओ। आखर म्ह तू इस लुगाई के बारे म्ह के कहवै सै?” 6 उन्नै उसताहीं परखण खातर या बात कहीं ताके उसपै खोट काडुणै नै कोए बात पावै। पर यीशु कोड्डा होके आन्गळी तै धरती पै लिक्खण लाग्या। 7 जिब्व वे उसताहीं बुझदे रहे, फेर उसनै सीधा होके उनताहीं कहा, “थारै म्ह जो पापी ना हो, ओए पहल्या उसनै पत्थर मारै।” 8 फेर यीशु कोड्डा होके आन्गळी तै धरती पै लिक्खण लाग्या। 9 पर वे या सुणके बडुया तै लेके छोट्या ताहीं, एक-एक करके लिक्डगे अर यीशु ऐकला रहया, अर वा लुगाई ओड़ै-ए बिच्चाळे खड़ी रहगी। 10 यीशु नै सीधा होके उस ताहीं कहा, “हे नारी, वे कित गए? के किसे नै तेरै पै दण्ड का हुक्म कोनी दिया?” 11 वा बोली, “हे प्रभु, किस्से नै नीं। यीशु बोल्या, “मैं भी तेरै पै दण्ड का हुक्म कोनी देन्दा; जा, अर जा, दुबारा पाप ना करिए।”]

### यीशु जगत का चाँदणा

12 यीशु नै दुबारे माणसां तै कहा, “दुनिया का चाँदणा मैं सूँ; जो कोए मेरै गेल्या लाग लेगा ओ अन्धेरै म्ह कोनी चालैगा, पर जीवन का चाँदणा पावैगा।” 13 फरीसियां नै उसताहीं कहा, “तू आपणी गवाही खुद देवै सै, तेरी गवाही सई कोनी।” 14 यीशु नै उनताहीं जबाब दिया, “भलाए मैं आपणी गवाही खुद देऊँ सूँ, फेर भी मेरी गवाही सई सै, क्यूँके मैं जाणूँ सूँ के मैं कित तै आया सूँ, अर कितोड़ जाऊँ सूँ? पर थम कोनी जाणदे के मैं कित तै आऊँ सूँ या कितोड़ जाऊँ सूँ। 15 थम देह के बळ न्याय करो सो; मैं किसे का न्याय कोनी करदा। 16 अर जै मैं न्याय करूँ भी तै मेरा न्याय साच्चा सै; क्यूँके मैं ऐकला

कोनी, पर मैं सूँ, अर बाप सै जिसने मेरैताहीं खन्दाया। 17 थारे नियम-कायदयां म्ह भी लिख्या सै के दो जणयां की गवाही मिलकै सई होवै सै; 18 एक तै मैं खुद आपणी गवाही दयूँ सूँ, अर दुसरा बाप मेरी गवाही देवै सै, जिसने मेरैताहीं खन्दाया।" 19 उन्नै उसताहीं कहया, "तेरा बाप कित सै? यीशु नै जबाब दिया," ना थम मन्नै जाणो सो, ना मेरै बाप नै, जै मन्नै जाणदे तै मेरै बाप नै भी जाणदे। 20 ये बात उसने मन्दर म्ह उपदेश देन्दे होए भण्डार कोठै म्ह बोली, अर किस्से नै उसताहीं कोनी पकड़या, क्यूँके उसका टेम इब ताहीं कोनी आया था।

### अपणे बारै म्ह यीशु का कथन

21 उसने फेर उनताहीं कहया, "मैं जाऊँ सूँ, अर थम मन्नै टोहवोगे अर आपणै पाप म्ह मरोगे; जड़ै मैं जाऊँ सूँ, ओड़ै थम नीं आ सकदे।" 22 इसपै यहूदियां नै कहया, "के ओ खुद नै मार देवैगा, जो कहवै सै, 'जड़ै मैं जाऊँ सूँ, ओड़ै थम नीं आ सकदे?'" 23 उसने उसताहीं कहया, "थम नीचै के सो, अर मैं ऊप्पर का सूँ; थम इस दुनिया सो, मैं दुनिया का कोनी। 24 ज्यांतै मन्नै थारैताहीं कहया के थम आपणै पापां म्ह मरोगे, क्यूँके जै थम बिश्वास नीं करोगे के मैं ओए सूँ, तो आपणे पापां म्ह मरोगे।" 25 उन्नै उसताहीं कहया, "तू कौण सै?" यीशु उनतै बोल्या, "ओए सूँ, जो सरू तै थारैतै कहन्दा आया सूँ। 26 थारै बारै म्ह मन्नै घणाए किमे बोल्लणा अर फेसला करणा सै; पर मेरा खन्दाणआळा साच्चा सै, अर जो मन्नै उसतै सुणया सै ओए दुनिया तै कहूँ सूँ। 27 वे न्यू नीं समझै के म्हारै तै बाप के बारै म्ह कहवै सै। 28 फेर यीशु बोल्या, "जिब्व थम माणस कै बेट्टै नै ऊँचै पै चढाओगे, जिब्व जाणोगे के मैं ओए सूँ; मैं खुद तै किमे कोनी करदा पर जिसतरियां मेरै बाप नै मेरैताहीं सिखाया उस्से ढाळ ये बात कहूँ सूँ। 29 मेरा खन्दाण आळा मेरै गेल्या सै, उसने मेरैताहीं एकला कोनी छोडया क्यूँके मैं सारी हाण वै ए काम करूँ सूँ, जिसतै ओ राजी होवै सै।" 30 ओ ये बात कहणे लागरया था के घणखरयां नै उसपै बिश्वास करया।

### सच थारै ताहीं आजाद करैगा

31 फेर यीशु नै उन यहूदियां तै जिन्नै उसपै बिश्वास करया था, बोल्या, "जै थम मेरै शब्द म्ह बणे रहोगे, तो साच-ए मेरे चेले ठहरोगे। 32 थम सच नै जाणोगे अर सच थमनै आजाद करैगा। 33 उन्नै उसताहीं जबाब दिया, "हम तै अब्राहम की पीढी के सा, कदे किसे के गुलाम कोनी बणे। फेर तू किसतरा कहवै सै के थम आजाद हो जाओगे?"

34 यीशु नै उनताहीं जबाब दिया, "मैं थारैतै साच्ची-साच कहूँ सूँ, के जो कोए पाप करे से ओ पाप का गुलाम सै। 35 गुलाम सारी हाण घर म्ह कोनी रहन्दा, बेड्डा सारी हाण घरा रहवै सै। 36 ज्यांतै जै बेड्डा थमनै आजाद करैगा, तो साच्ये थम आजाद हो जाओगे। 37 मैं जाणू सूँ, के थम अब्राहम की पीढी के सो; फेरभी मेरा शब्द थारै मन म्ह जगहां कोनी पान्दा, ज्यांतै थम मन्नै मारणा चाहो सो। 38 मैं ओए कहूँ सूँ, जो मन्नै आपणै बाप कै हाड़ै देख्या सै; अर थम ओए करदे रहो सो जो थमणै आपणै बाप तै सुणया सै।"

39 उन्नै उसताहीं जबाब दिया, "म्हारा बाप तो अब्राहम सै। यीशु उनतै बोल्या, "जै थम अब्राहम के ऊलाद होन्दे, तो अब्राहम जिसे काम करदे। 40 पर इब थम मेरै जिसे माणस नै मारणा चाहो सो, जिसने थारैताहीं ओ साच्चा शब्द बताया जो पणमेशर तै सुणया; इसतरियां तो अब्राहम नै कोनी करया था। 41 थम आपणै बाप कै जिसे काम करो सो।" उन्नै उसताहीं कहया, "हम जारी तै कोनी जणे, म्हारा एक बाप सै यानिके पणमेशर।" 42 यीशु उनतै बोल्या, "जै पणमेशर थारा बाप होन्दा, तो थम मेरैतै प्यार राखदे; क्यूँके मैं पणमेशर म्ह तै लिकड़ कै आया सूँ। मैं खुद तै कोनी आया, पर उस्से नै मेरैताहीं खन्दाया। 43 थम मेरी बात क्यांतै नीं समझदे? ज्यांतै के थम मेरा शब्द सुण नीं सकदे। 44 थम आपणै बाप शैतान कान तै सो अर आपणै बाप की मर्जी पूरा करणा चाहो सो। ओ तै सरू तैए खून्नी सै अर सच पै टिक्याए कोनी रहया, क्यूँके सच उसम्ह सैए कोनी। जिब्व ओ झूठ बोले सै, तो आपणै सुभा तैए बोले सै; क्यूँके ओ झूठा सै बल्के झूठ का बाप सै। 45 पर मैं जो सच बोले सूँ, इस्से करके थम मेरा बिश्वास कोनी करदे। 46 थारै म्ह तै कौण मन्नै

पापी ठहरावे सै? जै मैं सच बोले सूँ, तो थम मेरा बिश्वास क्यांतै नीं करदे? 47 जो पणमेशर कात्री तै होवै सै, ओ पणमेशर की बात सुणै सै; अर थम ज्यांतै कोनी सुणदे के पणमेशर की ओड़ तै कोनी सो।"

### यीशु अर अब्राहम

48 न्यू सुण यहूदियां नै उसताहीं कहया, "के हम सई कोनी कहन्दे के तू सामरी सै, अर तेरै म्ह भुन्डी औपरी आत्मा सै?" 49 यीशु नै जबाब दिया, "मेरै म्ह भुन्डी औपरी आत्मा कोनी; पर मैं आपणै बाप की इज्जत करूँ सूँ, अर थम मेरी बेइज्जती करो सो। 50 पर मैं आपणा मान-सम्मान कोनी चाहन्दा; हम्बै, एक सै जो चाहवै सै अर न्याय करै सै। 51 मैं थमनै साच्ची-साच कहूँ सूँ, के जै कोए माणस मेरे शब्दां पै चालैगा, तो ओ अनन्त काल ताहीं मौत नै कोनी देखवैगा। 52 यहूदियां नै उसताहीं कहया, "इब हम जाणगे के तेरै म्ह भुन्डी औपरी आत्मा सै। अब्राहम मरया अर नब्बी भी मरये सै; अर तू कहवै सै, 'जै कोए मेरे शब्दां पै चालैगा तै ओ अनन्त काल ताहीं मौत का सुवाद कोनी चाखैगा।' 53 म्हारा बाप अब्राहम तै मरया। के तू उसतै भी बड्डा सै? अर नब्बी भी मरये। तू अपणै आपै नै के मान्नै सै?" 54 यीशु नै जबाब दिया, "जै मैं खुद आपणी महिमा करूँ, तो मेरी महिमा किमे कोनी; पर मेरी महिमा करणआळा मेरा बाप सै, जिसने थम कहो सो के ओ थारा पणमेशर सै। 55 थमनै तै उसताहीं कोनी जाणया: पर मैं उसताहीं जाणू सूँ। जै मैं कहूँ के मैं उसताहीं कोनी जाणदा, तो मैं थारी ढाळ झूठा ठहरूँगा; पर मैं उसताहीं जाणू अर उसके शब्दां पै चालू सूँ। 56 थारा बाप अब्राहम मेरा दिन देखखण की आस म्ह घणा मगन था; अर उसने देख्या अर आनन्द करया।" 57 यहूदियां नै उसताहीं कहया, "इब ताहीं तू पचास साल का कोनी, फेरभी तन्नै अब्राहम ताहीं देख्या सै?" 58 यीशु उनतै बोल्या, "मैं थमणै साच्ची-साच कहूँ सूँ, के पहल्या इसकै के अब्राहम पैदा होया, मैं सूँ।" 59 फेर उन्नै उसताहीं मारण खातर पत्थर टाए, पर यीशु लुटके मन्दर तै लिकड़या।

### जन्म के आंधे ताहीं दृष्टिदान

9 फेर जान्दे होए उसने एक माणस ताहीं देख्या जो जन्म तै आंधा था। 2 उसके चेल्यां नै उसतै बुझया, "हे गुरु, किसने पाप करया था के यो आंधा जण्या, इस माणस नै या इसके माँ-बाप नै?" 3 यीशु नै जबाब दिया, "ना तै इसने पाप करया था, ना इसके माँ-बाप नै, पर यो ज्यांतै होया के पणमेशर के काम उस म्ह को दिखवै। 4 जिसने मेरैताहीं खन्दाया सै, हमने उसके काम दिन-ए-दिन म्ह करणा जरूरी सै; वा रात आणआळी सै जिसम्ह कोए काम नीं कर सकदा। 5 जिब्व ताहीं मैं दुनिया म्ह सूँ, जद ताहीं दुनिया का चान्दणा सूँ।" 6 न्यू कहके उसने धरती पै थूक्या, अर उस थूक तै माट्टी सात्री, अर वा माट्टी उस आंधे की आँखां पै लाके। 7 उसतै बोल्या, "जा, शीलोह कै कुण्ड म्ह धो ले" (शीलोह का मतलब खन्दाया होया सै)। उसने जाके धोया, देखदा होया बोहड़ आया। 8 फेर पड़ोसी अर जिन्नै पहल्या उसताहीं भीख माँगदे देख्या था, कहण लागे, "के यो ओए नीं, जो बैठ्या भीख माँगया करै था?" 9 किमे माणस बोले, "यो ओए सै," दूसरे बोले, "कोनी, पर उसके जिसा सै।" उसने कहया, "मैं ओए सूँ।" 10 फेर वे उसतै बुझण लागे, "तेरी आँख किसतरियां खुलगी?" 11 उसने जबाब दिया, "यीशु नामक एक माणस नै माट्टी सात्री, अर मेरी आँखां पै लाके मेरैताहीं बोल्या, 'जा, शीलोह म्ह जाके धो ले, बस फेर के था मैं गया अर धोया अर देखखण लाग्या।' 12 उन्नै उसतै बुझया, "ओ कित सै?" वो बोल्या, "मैं कोनी जाणदा।"

### फरिसियाँ द्वारा चंगाई की जाँच-पड़ताल

13 माणस उसने जो आंधा था फरीसियां के धोरे लीआए। 14 जिस दिन यीशु नै माट्टी सानके उसकी आँख खोली थीं, ओ सब्द का दिन था। 15 फेर फरीसियां नै भी उसतै बुझया के उसकी आँख किसढाळ खुलगी। उसने उनताहीं कहया, "उसने मेरी आँखां पै माट्टी लाई, फेर मन्नै धो लिया, अर इब देखूँ सूँ।" 16 इसपै किमे फरीसी कहण लागे, "यो माणस पणमेशर की ओड़ तै कोनी, क्यूँके ओ सब्द कै दिन नै कोनी मान्दा। दूसरे बोले, "पापी माणस

इसे कारनाम्मे किसद्वारा दिखा सकें सै?" आखर म्ह उनम्ह फूट पड़गी। 17 उन्नै उस आंधै तै फेर कहया, "उसनै जो तेरी आँख खोली सै। तू उसकै बारै म्ह के कहवै सै?" उसनै कहया, "ओ नब्बी सै।"

18 पर यहूदियां नै बिश्वास कोनी होया के ओ आन्धा था अर इब देखवै सै जिब्ब ताहीं उन्नै उसकै, जिसकी आँख खुलगी थी, माँ-बाप नै बुलाकै 19 उनतै नै बुझया, "के यो थारा बेट्टा सै, जिसनै थम कहया करदे के आन्धा जणया था? फेर इब ओ किसतरियां देखवै सै?" 20 उसकै माँ-बाप नै जबाब दिया, "हम तै जाणा सा के यो म्हारा बेट्टा सै, अर आन्धा जणया था; 21 पर न्यू कोनी जाणदे के इब किसतरियां देखवै सै, अर ना न्यू जाणदे के किसनै इसकी आँख खोली। ओ श्याणा सै, उस्से तै बुझ ल्यो; ओ आपणै बारै म्ह खुद कह देवैगा।" 22 ये बात उसकै माँ-बाप नै ज्यांतै कहीं क्यूँके वे यहूदियां तै डरै थे, क्यूँके यहूदियां नै एक्का कर लिया था के जै कोए कहवै के ओ मसीह सै, तो आराधनालय तै लिकाड़या जावै। 23 इस्से कारण उसकै माँ-बाप नै कहया, "ओ श्याणा सै, उस्से तै बुझल्यो।"

24 फेर उन्नै उस माणस ताहीं जो आन्धा था, दूसरी बर बुलाकै उसतै कहया, "पणमेशर की भजन कर। हम जाणां सां के ओ माणस पापी सै।" 25 उसनै जबाब दिया, "मैं नीं जाणदा के ओ पापी सै के नीं; मैं एक बात जाणूं सूँ, के मैं आन्धा था अर इब देखवूं सूँ।" 26 उन्नै उसताहीं दुबारै कहया, "उसनै तेरै गेल्या के करया? अर किस द्वाळ तेरी आँख खोली?" 27 उसनै उसताहीं कहया, "मन्नै तै थारैताहीं कह लिया, अर थम नै कोनी सुणया; इब दूसरी बर क्यांतै सुणना चाहवो सो? के थम भी उसके चेल्ले होणा चाहवो सो?" 28 फेर वे उसतै भुन्डा-आच्छा कहकै बोले, "तूए उसका चेल्ला सै, हम तै मूसा के चेल्ले सां। 29 हम जाणा सा के पणमेशर नै मूसा तै बात करी; पर इस माणस नै कोनी जाणदे के कितका सै।" 30 उसनै उसताहीं जबाब दिया, "या तै अचम्भै की बात सै के थम नीं जाणदे के ओ कितका सै, फेरभी उसनै मेरी आँख खोल दीं। 31 हम जाणां सां के पणमेशर पापियां की कोनी सुणदा, पर जै कोए पणमेशर का भगत हो अर उसकी मर्जी पै चाल्दा हो, तो ओ उसकी सुणै सै। 32 दुनिया के सरुआत तै यो कदे सुणनै म्ह कोनी आया के किसे न जन्म तै आन्धै की आँख खोली हों। 33 जै यो माणस पणमेशर के कान तै नीं होन्दा, तै किमे भी कोनी कर सकदा।" 34 उन्नै उसताहीं जबाब दिया, "तू तै जमाए पापां तै जन्मा सै, तू हमनै के सिखावै सै?" अर उन्नै उसताहीं बाहरणै लिकाड़ दिया।

### आत्मिक अन्धापण

35 यीशु नै सुणया के उन्नै उसताहीं बाहरणै लिकाड़ दिया सै, अर जिब्ब उसतै फेटया तै बोल्या, "के तू पणमेशर के बेट्टे पै बिश्वास करै सै?" 36 उसनै जबाब दिया, "हे प्रभु, ओ कौण सै, के मैं उसपै बिश्वास करूं?" 37 यीशु नै उसताहीं कहया, "तन्नै उसताहीं देख्या भी सै, अर जो तेरै गेल्या बात कररया सै, यो ओए सै।" 38 उसनै कहया, "हे प्रभु, मैं बिश्वास करूं सूँ।" अर उस ताहीं मुद्दा पड़कै प्रणाम करया। 39 फेर यीशु बोल्या, "मैं इस दुनिया म्ह न्याय खातर आया सूँ, ताके जो कोनी देखदे वे देखवै, अर जो देखवै वे आन्धे हो जावै।" 40 जो फरीसी उसकै गेल्या थे उन्नै या बात सुणकै उसताहीं कहया, "के हम भी आन्धे सां?" 41 यीशु नै उनताहीं कहया, "जै थम आन्धे होन्दे तै पापी कोनी ठहरदे, पर इब कहां सो के हम देख्या सा, ज्यांतै थारा पाप बणया रहै सै।"

### चरवाहा अर भेड्डां का उदाहरण

10 "मैं थारैताहीं साच्ची-साच कहूं सूँ, के जो कोए दरवाजै तै रेवड़ म्ह नीं बड़दा, पर किसे दूसरै कान तै चढ़ जावै सै, ओ चोर अर डाकू सै। 2 पर जो दरवाजै तै भीत्तर बड़ै सै ओ भेड्डां का पाळी सै। 3 उस खातर द्वारपाल दरवाजा खोल देवै सै, अर भेड्डां उसका बोल सुणै सै, अर ओ आपणी उन भेड्डां के नाम ले लेकै बुलावै सै अर बाहरणै ले जावै सै। 4 जिब्ब ओ आपणी सारी भेड्डां नै बाहरणै काड लेवै सै, तो उनके आगै-आगै चाल्ले सै, अर भेड्डां उसकै गेल-गेल हो ले सै, क्यूँके वे उसका बोल पिच्छाणै सै। 5 पर वे बिगान्ने के गेल्या कोनी जान्दी, पर उसतै भाजैगी, क्यूँके वे बिगान्ने का बोल

कोनी पिच्छाणदी।" 6 यीशु नै उनताहीं यो उदाहरण कहया, पर वे कोनी समझे के ये के बात सै जो ओ म्हारै ताहीं कहवै सै।

### यीशु आच्छा चरवाहा

7 फेर यीशु नै उनताहीं दुबारै कहया, "मैं थारैताहीं साच्ची-साच कहूं सूँ, भेड्डां का दरवाजा मैं सूँ। 8 जितने मेरै तै पहल्या आए वे सारे चोर अर डाकू सै, पर भेड्डां नै उनकी एक नीं सुणी। 9 दरवाजा मैं सूँ: जै कोए मेरै जरिये भीत्तर बड़ै सै, तो उद्धार पावैगा, अर भीत्तर बाहर आण-जाण लागज्या गा अर चारा पावैगा। 10 चोर किसे और काम खातर कोनी पर सिर्फ चोरी करण अर घात करण अर नुकसाण करण नै आवै सै; मैं ज्यांतै आया के वे जिन्दगी पावै अर भोत-ए घणी पावै। 11 काम्मल पाळी मैं सूँ; काम्मल पाळी भेड्डां के खातर आपणी ज्यान देवै सै। 12 मजदूर जो ना पाळी सै अर ना भेड्डां का मालिक सै, भेड्डां नै आन्दे देखके भेड्डां नै छोड़के भाज जावै सै; अर भेड्डां उन्नै पकड़ै अर खिन्ड-मिन्ड कर देवै सै। 13 ओ ज्यांतै भाज जावै सै के ओ मजदूर सै, उसनै भेड्डां की फिक्र कोनी। 14 काम्मल चरवाहा मैं सूँ; मैं आपणी भेड्डां नै जाणूं सूँ, अर मेरी भेड्डां मन्नै जाणै सै। 15 जिसद्वारा बाप मन्नै जाणै सै अर मैं बाप नै जाणूं सूँ --अर मैं भेड्डां खातर आपणी ज्यान द्युं सूँ। 16 मेरी और भी भेड्डां सै, जो इस रेवड़ की कोनी। मन्नै उनताहीं भी ल्याणा जरूरी सै। वे मेरा बोल सुणैगी, फेर एकर रेवड़ अर एकर पाळी होगा। 17 बाप ज्यांतै मेरै तै प्यार राखे सै के मैं आपणी ज्यान द्युं सूँ, के उसनै दुबारै ले लूं। 18 कोए उसनै मेरै तै खोसदा कोनी, बल्के मैं उसनै खुदे द्युं सूँ; मन्नै उसकै देण का भी हक्क सै, अर उसताहीं दुबारा लेण का भी हक्क सै: यो हुक्म मेरै बाप नै मेरैताहीं दिया सै।" 19 इन बाततां के कारण यहूदियां म्ह दुबारै फूट पड़ी। 20 उन म्ह तै घणखरे कहण लागगे, "उसम्ह भूडी औपरी आत्मा सै, अर ओ बावळा सै; उसकी क्यांतै सुणो सो?" 21 दुसरे माणसां नै कहया, "ये बात इसे माणस की कोनी जिसम्ह भूडी औपरी आत्मा हो। के भूडी औपरी आत्मा आन्ध्यां की आँखां नै खोल सकै सै?"

### यहूदियां का अबिश्वास

22 यरुशलैम म्ह मुहरत का त्यौहार मणया जायया था; अर जाडयां का मौसम था। 23 यीशु मन्दर म्ह सुलैमान के ओसारे म्ह हान्डण लागरया था। 24 फेर यहूदियां नै उसताहीं आ घेरया अर बुझया, "तू म्हारै मन नै कद ताहीं दुबिधा म्ह गेरे राखे गा? जै तू मसीह सै, तो म्हारै तै सई-सई कह दे।" 25 यीशु नै उनताहीं जबाब दिया, "मन्नै थारैतै कह दिया पर थम बिश्वास करदेए कोनी। जो काम मैं आपणै बाप के नाम तै करूं सूँ, वैए मेरे गवाह सै, 26 पर थम ज्यांतै बिश्वास कोनी करदे क्यूँके मेरी भेड्डां म्ह तै कोनी सो। 27 मेरी भेड्डां मेरा बोल सुणै सै; मैं उन्नै जाणूं सूँ, अर वे मेरै गेल-गेल चाल्ले सै 28 अर मैं उनताहीं अनन्त जीवन द्युं सूँ। वे कददे बरबाद कोनी होवैगी, अर कोए उन्नै मेरै हाथ तै खोस नीं सकदा। 29 मेरा बाप, जिसनै उनताहीं मेरै तै दिया सै, सारया तै बड्डा सै अर कोए उन्नै बाप के हाथां तै खोस कोनी सकदा। 30 मैं अर बाप एक सै।"

31 यहूदियां नै उस पै पत्थर बरसाण नै दुबारै पत्थर ठाए। 32 इस पै यीशु नै उनताहीं कहया, "मन्नै थारैतै आपणै बाप की कान तै घणे भले काम दिखाए सै; उन म्ह तै कौण सै काम खातर थम मेरै पै पत्थर बरसाओ सो?" 33 यहूदियां नै उसताहीं जबाब दिया, "भले काम खातर हम तेरै पै पत्थर कोनी बरसान्दे पर पणमेशर की बुराई करण के कारण; अर ज्यांतै के तू माणस होके खुद नै पणमेशर बणावै सै।" 34 यीशु नै उनताहीं जबाब दिया, "के थारे व्यवस्था म्ह कोनी लिख्या सै, मन्नै कहया, थम ईश्वर सो?" 35 जै उसनै उनताहीं ईश्वर कहया जिनके धोरै पणमेशर का शब्द पढोचयां (अर सुत्र ग्रन्थ की बात झूठ नीं हो सकदी), 36 तो जिसताहीं बाप नै पवित्र ठहराके दुनिया म्ह खन्दाया सै, थम उसताहीं कहां सो, 'तू बुराई करै सै, ज्यांतै के मन्नै कहया, 'मैं पणमेशर का बेट्टा सूँ?' 37 जै मैं आपणै बाप के काम कोनी करदा, तो मेरा बिश्वास ना करो। 38 पर जै मैं करूं सूँ, तो चाहे मेरा बिश्वास ना भी करो, पर उन काम्मां का तो बिश्वास करो, ताके थम जाणो अर समझे के

बाप मेरै म्ह सै अर मैं बाप म्ह सूँ।<sup>39</sup> फेर उन्नै दुबारै उसताहीं पकड़ण की कोशिश करी पर ओ उनके हाथां तै लिकड़या।

<sup>40</sup> दुबारै ओ यरदन कै परली ओड़ै उस जगहां पै चल्या गया, जड़ै यूहन्ना पहल्या बपतिस्मा दिया करै था, अर ओड़ै रहया। <sup>41</sup> घणखरे माणस उसके धोरै आकै कहवै थे, “यूहन्ना नै तो कोए निशान कोनी दिखाया, पर जो किमे यूहन्ना नै इसके बारै म्ह कहया था, ओ सारा कीमे साची था।” <sup>42</sup> अर ओड़ै घणाए नै यीशु पै बिश्वास करया।

### लाजर की मौत

**11** मरियम अर उसकी बेब्बे मार्था के गाम बैतनिय्याह का लाजर नामका एक माणस बीमार था <sup>2</sup> या वाए मरियम थी जिसनै प्रभु पै इत्र गेरकै उसके पायां ताहीं बाळां तै पुन्जयां था, इस्से का भाई लाजर बीमार था। <sup>3</sup> इसकरकै उसकी बाणां नै उस ताहीं कुहवा भेज्या, “हे प्रभु, लखा, जिस तै तू प्रेम करै सै, ओ बीमार सै।” <sup>4</sup> न्यू सुणके यीशु न्यू बोल्या, “या बीमारी मरण की कोनी; पर पणमेशर की महिमा खातर सै, के उसके द्वारा पणमेशर कै बेटे की महिमा होवै।” <sup>5</sup> यीशु मार्था अर उसकी बेब्बे अर लाजर तै प्रेम राखै था। <sup>6</sup> फेर भी जिब्ब उसने सुणया के ओ बीमार सै, तो जिस ठोड़ पै ओ था, ओड़ै दो दिन और रुक्या <sup>7</sup> फेर उसनै चेल्यां ताहीं कह्या, “आओ, हम फेर यहूदिया नै चालां।” <sup>8</sup> चेल्यां नै उसताहीं कह्या, “हे गुरु, इब तो यहूदी तेरै पै पत्थर बरसाणां चाहवै थे, अर के तू फेर भी उड़ै जावै सै?” <sup>9</sup> यीशु नै जबाब दिया, “के दिन के बारहा घण्टे कोनी होदे? जै कोए दिन म्ह चालै तो टोकर कोनी खान्दा, क्यूँके इस दुनिया का उजाळा देखवै सै।” <sup>10</sup> पर जै कोए रात म्ह चालै तो टोकर खावै सै, क्यूँके उसम्ह उजाळा कोनी।” <sup>11</sup> उसनै ये बात कहीं, अर इसके पाछै उनताहीं कहण लाग्या, “के म्हारा ढब्बी लाजर सुत्या सै, पर मैं उसनै जगाण जाऊँ सूँ।” <sup>12</sup> फेर चेल्यां नै उसताहीं कह्या, “हे प्रभु, जै ओ सुत्या सै तो ओ चंगा हो ज्यागा।” <sup>13</sup> यीशु नै तो उसकी मौत कै बाबत कह्या था; पर उन्नै सोच्या के उसनै नींद तै सोण कै बाबत कह्या। <sup>14</sup> फेर यीशु नै उनताहीं सुथरी-ढाळ कह दिया, “लाजर मर लिया सै, <sup>15</sup> अर मैं थारै बाबत राजी सूँ, के मैं उड़ै कोनी था जिसपै थम बिश्वास करो, पर इब आओ, हम उसके धोरै चालां।” <sup>16</sup> फेर थोमा नै जो दिचुस कुहावै सै, आपणै गेल्या के चेल्यां ताहीं कह्या, “आओ, हम भी उसके गेल्या मरण नै चालां।”

### यीशु पुनरुत्थान अर जीवन

<sup>17</sup> उड़ै पहोच्चे पाछै यीशु नै न्यू बेरया पाट्या के लाजर नै कब्र म्ह धरे चार दिन हो लिए सैं। <sup>18</sup> बैतनिय्याह यरुशलम कै धोरै कोए दो कोस की दूरी पै था, <sup>19</sup> घणखरे यहूदी मार्था अर मरियम कै धोरै उनके भाई की मौत कै बाबत दीलासा देण नै आरे थे। <sup>20</sup> जिब मार्था नै यीशु कै आणै की खबर सुणी तो उसतै फेटण नै गई, पर मरियम घराए बैठी रही। <sup>21</sup> मार्था नै यीशु ताहीं कह्या, “हे प्रभु, जै तू आड़े होँदा, तो मेरा भाई कदे नी मरदा।” <sup>22</sup> अर इब भी मन्नै बेरा सै जो कीमे तू पणमेशर तै माँग्या, पणमेशर तन्नै देवैगा।” <sup>23</sup> यीशु नै उनताहीं कह्या, “तेरा भाई जीं ज्यागा।” <sup>24</sup> मार्था नै उसताहीं कह्या, “मन्नै बेरा सै के आखर के दिन म्ह पुनरुत्थान के टेम ओ जीं ज्यागा।” <sup>25</sup> यीशु नै उसताहीं कह्या, “पुनरुत्थान अर जीवन मैए सूँ, जो कोए मेरै पै बिश्वास करैगा ओ जै मर भी जावै फेर भी जिवैगा, <sup>26</sup> अर जो कोए जीवै सै अर ओ मेरै पै बिश्वास करै सै, ओ अनन्तकाल ताहीं कोनी मरैगा। के तू इस बात पै बिश्वास करै सै।” <sup>27</sup> उस नै उनताहीं कह्या, “हम्बै, हे प्रभु, मैं बिश्वास करूँ सूँ, के पणमेशर का बेटा मसीह जो दुनिया म्ह आणआळा था, ओ तूए सै।”

### यीशु रोया

<sup>28</sup> न्यू कहकै वा चली गयी, अर आपणी बेब्बे मरियम ताहीं बुलाकै चुपकदे-सी कह्या, “गुरु याडैए सै अर तन्नै बुलावै सै।” <sup>29</sup> न्यू सुण दए वा जिब्बे उठकै उसके धोरै आई। <sup>30</sup> यीशु इबे गाम म्ह कोनी पहोच्या था पर उस्से ठोड़ था जड़ै मार्था उसतै फेटी थी। <sup>31</sup> फेर जो यहूदी उसके गेल्या घर म्ह थे अर उसताहीं दीलासा देवै थे, न्यू देखकै के मरियम जिब्बे उठकै बारणै चली गयी

सै न्यू समझे के वा कब्र पै रोण नै जावै सै तो उसके पाछै हो लिये। <sup>32</sup> जिब्ब मरियम उड़ै गई जड़ै यीशु था, तो उसनै देखदए उसके पायां म्ह पड़कै कह्या, “हे प्रभु, जै तू आड़े होन्दा फेर मेरा भाई कोनी मरदा।” <sup>33</sup> जिब्ब यीशु नै जो उसके गेल्या आये थे, रोदे होए देख्या, तो आत्मा म्ह घणाए दुखी अर माड़े मन का होग्या, <sup>34</sup> अर कह्या, “थमनै उसताहीं कित धर राख्या सै?” उन्नै उसताहीं कह्या, “हे प्रभु, चालकै देख ले।” <sup>35</sup> यीशु रोण लाग्या। <sup>36</sup> फेर यहूदी कहण लागे, “लखाओ, ओ उनतै कितना प्यार राखै था।” <sup>37</sup> पर उनम्ह तै कीमे नै कह्या, “के यो जिसनै आंध्या की आंख खोलदी, न्यू भी कर सक्या के यो माणस नीं मरदा?”

### लाजर का जिन्दा करणा

<sup>38</sup> यीशु मन म्हए फेर घणाए दुखी होकै कब्र पै आया। वा एक गुफा थी अर एक पत्थर उस पै धरया था। <sup>39</sup> यीशु नै कह्या, “पत्थर हटादो।” लाजर की बेब्बे मार्था उसनै कहण लागी, “हे प्रभु, उस म्ह तै इब तै सिङ्गंध आवै सै, क्यूँके उसनै मरे चार दिन हो लिए सैं।” <sup>40</sup> यीशु नै उनताहीं कह्या, “के मन्नै तेरै कोनी कह्या था के जै तू बिश्वास करैगी, तो पणमेशर की महिमा नै देखवैगी।” <sup>41</sup> फेर उन्नै पत्थर ताहीं हटायो। यीशु नै नजर ठाकै कह्या, “हे पिता, मैं तेरा धन्यवाद करूँ सूँ, के तन्नै मेरी सुण ली सै।” <sup>42</sup> अर मन्नै बेरा था के तू सारी हाण मेरी सुणे सै, पर जो भीड़ आसै-पासै खड़ी सै, उनके बाबत मन्नै कह्या, ताके वे बिश्वास करै, के तन्नै मेरैताहीं खन्दाया सै।” <sup>43</sup> न्यू कहकै ठाड़ु आवाज म्ह रुक्का मारया, “हे लाजर, लिकड़ आ।” <sup>44</sup> जो मर लिया था ओ कफन तै हाथ पैर बंदे होड़ लिकड़ आया, अर उसके मुह पै अँगोछा लिपटरया था। यीशु नै उनताहीं कह्या, “उसनै खोलदो अर जाणदो।”

### यीशु कै बिरुद्ध साजिस

(मत्ती 26:1-5; मरकुस 14:1-2; लूका 22:1-2)

<sup>45</sup> फेर जो यहूदी मरियम धोरै आरे थे अर उसका यो कारनाम्मा देख्या था, उनम्ह तै घणखरयां नै उसपै बिश्वास करया। <sup>46</sup> पर उनम्ह तै कइया नै फरिसियां धोरै जाके यीशु के कारनाम्मां की खबर दी। <sup>47</sup> ज्यातै प्रधान याजकां अर फरिसियां नै बड्डी पंचायत करी, अर कह्या, “हम करां के सां? यो माणस तो घणे कारनाम्मे दिखावै सै।” <sup>48</sup> जै हम उसनै न्यूए छोड़दया, फेर सारे उसपै बिश्वास करैगें, अर रोमी आकै म्हारी जगहां अर जात दोनुवां पै कब्जा कर लेवैगें।” <sup>49</sup> फेर उनम्ह तै काइफा नामका एक माणस नै जो उस साल का महायाजक था, उनताहीं कह्या, “थमनै कीमे नीं बेरा।” <sup>50</sup> अर ना न्यू समझो सो के थारै खातर यो ठीक सै के म्हारै माणसां खातर एक आदमी मरै, अर ना न्यू के सारी जात का नास ना हो।” <sup>51</sup> पर बात उसनै आपणी ओड़ तै कोणया कहीं, पर उस साल का महायाजक होण तै भविष्यवाणी करी, के यीशु उस जात खातर मरैगा; <sup>52</sup> अर ना सिर्फ उस्से जात खातर बल्के ज्यातै के पणमेशर की खिड-मीड उलाटां नै एक करदे। <sup>53</sup> आखर म्ह उस्से दिन तै वे उसताहीं मारण खातर साजिस रचाण लागे।

<sup>54</sup> ज्यातै यीशु उस टेम तै यहूदिया म्ह घाट दिक्खण लाग्या, पर उड़ै तै, बण कै लोवै लागण आळे प्रदेश के इफ्राईम नामक एक नगर कात्री चल्या गया; अर आपणै चेल्यां गेलै उड़ैए रहण लाग्या। <sup>55</sup> यहूदिया का फसह का त्योहार लोवै था, अर घणैए माणस फसह तै पहल्या गाम्मां म्ह तै यरुशलम नै गए, के खुद नै पवित्र करै। <sup>56</sup> आखर म्ह वे यीशु नै टोहण लागे अर मन्दर म्ह खड़े होके आपस म्ह बतलाण लागे, “थम के सोचो सो? के ओ त्योहार म्ह कोनी आवैगा?” <sup>57</sup> अर प्रधान याजकां अर फरिसियां नै हुक्म दे राख्या था के जै कोए न्यू जाणै के यीशु कित सै बतावै, ताके वे उसनै पकड़ ले।

### यीशु के पायां पै शैंट गेरणा

(मत्ती 26:6-13; मरकुस 14:3-9)

**12** फेर यीशु फसह तै छः दिन पहल्या बैतनिय्याह आया जित लाजर था, जिस ताहीं यीशु नै मरयां होड़ म्ह तै जिन्दा करया था। <sup>2</sup> उड़ै उन्नै उसके खातर खाणा पकाया; अर मार्था सेवा करण लागरी थी, अर लाजर उन म्ह तै एक था जो उसके गेल्या खाणा खाण नै बड्ठे थो। <sup>3</sup> फेर



मरियम नै जटामांसी का आधा सेर घणा मंहगा शैंट लेकै यीशु के पायां पै  
गेरया, अर आपणे बांळों तै उसके पैर पूंजे; अर शैंट की खसबू तै घर  
खसबुदार होगया। 4 पर उसके चेल्यां म्ह तै यहूदा इस्करियोती नामका एक  
चेल्ला जो उसताहीं पकड़वाणा चाहवै था, कहण लाग्या, 5 “यो शैंट तीन सौ  
दीनार म्ह बेचकै कंगालां ताहीं क्यातै कोनी दिया गया?” 6 उसनै या बात  
ज्यातै कोनी कहीं के उसनै कंगालां की फिक्र थी बल्के ज्यातै के ओ चोर  
था, अर उसके धोरै पिस्व्या का झोळा रह्या करै था अर उस म्ह जो कीमे गेरा  
जांदा, ओ काड लेवै था। 7 यीशु नै कह्या, “उसनै रहण दो। उस ताहीं मेरै  
गाड्डे जाण के दिन खातर राखण द्यो। 8 क्यूँके कंगाल तो थारै गेल्या  
सारीहाण रहवै सै, पर मैं थारै गेल्या सारीहाण कोनी रहूँगा।”

### यीशु के बिरुद्ध साजिस

9 जिब्व यहूदिया की बड्डिए भीड़ नै बेरा लाग्या के ओ उडै सै, तो वे ना  
सिर्फ यीशु के बाबत आये पर ज्यातै भी के लाजर नै देखवै, जिसताहीं यीशु  
मसीह नै मरयां होइ म्ह तै जिन्दा करया था। 10 फेर प्रधान याजकां नै लाजर  
ताहीं भी मारण की सलाह करी। 11 क्यूँके उसके बाबत घणखरे यहूदी चले  
गये अर यीशु पै बिश्वास करया।

### युरुशलैम म्ह विजय-प्रवेश

(मत्ती 21:1-11; मरकुस 11:1-11; लूका 19:28-40)

12 दुसरै दिन घणखरे माणसां नै जो त्योहार म्ह आरे थे न्यू सुणया के यीशु  
युरुशलैम म्ह आ रया सै। 13 ज्यातै उन्नै खजूर की डालीं लीं अर उसतै  
फेडण नै लिक्के, अर रुक्के मारण लागे, “होशाना! धन्य इस्त्राएल का राजा,  
जो प्रभु के नाम तै आवै सै।” 14 जिब्व यीशु नै एक गधे का एक बच्चा मिल्या,  
फेर ओ उसपै बैठग्या, 15 जिसा लिख्या सै, “हे सियोन की बेट्टी, मतना डरै;  
लखा, तेरा राजा गधे के बच्चे पै चढ़ा होइ चाल्या आवै सै।” 16 उसके चेल्ले यें  
बात पहल्या कोनी समझे थे, पर जिब्व यीशु की महिमा दिक्खी फेर उनके  
याद आया के यें बात उसके बाबत लिक्खी होइ थी अर माणसां नै उसके  
गेल्या न्यूए बिवार करया था। 17 फेर भीड़ के उन माणसां नै गवाही दी, जो  
उस टेम उसके गेल्या थे, जिब्व उसनै लाजर ताहीं कब्र म्ह तै बुलाकै मरयां  
होया म्ह तै जिन्दा करया था। 18 ज्यातै माणस उसतै फेडण नै आरे थे क्यूँके  
उन्नै सुणया था के उसनै यो अचम्भे का कारनाम्मा करया था। 19 फेर  
फेरिसियों नै आपस म्ह कह्या, “सोचो के तो देखो, के थारे तै कीमे भी  
कोनी बणदा। लखाओ, दुनिया उसके गेल हो ली सै।”

### युनानियाँ का यीशु ताहीं टोहणा

20 जो माणस उस त्योहार म्ह भगति करण नै आये थे उन म्ह तै कीमे  
यूनानी थे। 21 उन्नै गलील के बैतसेदा का बासिन्दे फिलिप्पुस के धोरै आकै  
उसतै बिनती करी, “श्रीमान, हम यीशु तै फेटणा चाहवां सा।” 22 फिलिप्पुस  
नै आकै अन्द्रियास तै कह्या, फेर अन्द्रियास अर फिलिप्पुस नै जाकै यीशु  
ताहीं कह्या। 23 इसपै यीशु नै उनताहीं कह्या, “ओ टेम आग्या सै के माणस के  
बेट्टे की महिमा हो। 24 मैं थारै तै साच्ची-साच कहूँ सूँ, के जिब्व ताहीं गिहूँ का  
दाणा धरती म्ह पड़कै मर नीं जांदा, ओ एकला रहवै सै; पर जिब्व मर ज्यावै  
सै, तो घणा फळ ल्यावै सै। 25 जो आपणै जीं नै प्यारा जाणै सै, ओ उसनै  
खो देवै सै; अर जो इस दुनिया म्ह आपणै जीं नै प्यारा कोनी जाणदा, ओ  
अनन्तजीवन ताहीं उसकी रूखाली करैगा। 26 जै कोए मेरी सेवा करै, तो मेरै  
गेल्या हो ले; अर जडै मैं सूँ, उडै मेरा सेवक भी होवैगा। जै कोए मेरी सेवा  
करै, तो बाप उसकी ईज्जत करैगा।

### कूस की मौत का इशारा

27 “इब मेरा जीं कांल सै। ज्यातै इब मैं के कहूँ? हे पिता, मन्नै इस घडी तै  
बचा?” पर मैं इस्से कारण इस घडी नै पहोच्या सूँ। 28 हे पिता जी, आपणै  
नाम की महिमा कर।” फेर या आकाशबाणी होई, “मन्नै उसकी महिमा करी  
सै, अर फेर भी करूँगा।” 29 फेर जो माणस खड़े होए सुणरे थे उन्नै कह्या के  
बादळ गरज्या। दुसरयां नै कह्या, “कोए सुर्गदुत उसतै बोल्यो।” 30 इसपै यीशु

नै कह्या, “यो शब्द मेरै खातर कोनी, पर थारै खातर आया सै। 31 इब इस  
दुनिया का न्याय होवै सै, इब इस दुनिया का सरदार काड्या जावैगा; 32 अर  
मैं जै धरती पै तै ऊँचे पै चढ़ाया जाऊंगा, तो सारया नै आपणै कात्री  
खिचूंगा।” 33 न्यू कहकै उसनै यो बता दिया के ओ किस ढाळ की मौत तै  
मरैगा। 34 इसपै माणसां नै उसताहीं कह्या, “हमनै नियम-कायदा की या बात  
सुणी सै के मसीह सारी हाण रहवै गा, फेर तू क्यातै कहूँ सै के माणस का  
बेट्टा ऊँचे पै चढ़ाया जाणा जरूरी सै? यो माणस का बेट्टा कौण सै?” 35 यीशु  
नै उनताहीं कह्या, “चाँदणा इब माड़ी वार ताहीं थारै बिचाळै सै। जिब्व ताहीं  
चाँदणा थारै गेल्या सै जद ताहीं चाल्दे रहो, इसा ना हो के अँधेरा थारै ताहीं  
घेर लेवै; जो अँधेरे म्ह चाळै सै ओ कोनी जाणदा के कडै जावै सै। 36 जिब्व  
ताहीं चाँदणा थारै गेल्या सै, चाँदणै पै बिश्वास राक्खो ताके थम चाँदणै की  
उलाद बणो।”

### यहुदियाँ का अबिश्वास म्ह बणे रहणा

ये बात कहकै यीशु बिगगा अर उनतै लुक्या रह्या। 37 यीशु मसीह नै उनकै  
श्यामी इतने कारनाम्मे दिखाए, फेरभी उन्नै उसपै बिश्वास कोनी करया;  
38 ताके यशायाह नब्बी का शब्द पूरा हो जो उसनै कह्या: “हे प्रभु, म्हारी  
खबर का किसनै बिश्वास करया सै? अर प्रभु की हाथां का हान्ना किस नै  
दिख्या सै?” 39 इस बाबत वे बिश्वास कोनी कर सके, क्यूँके यशायाह नै न्यू  
भी कह्या सै: 40 “उसनै उनकी आँख आंधी, अर उनके मन करडे कर दिए  
सैं; कदे इसा ना हो के वे आँखां तै देखवै, अर मन तै समझै, अर पलटै, अर  
मैं उन्नै चंगा करूँ।” 41 यशायाह नै ये बात ज्यातै कहीं के उसनै उसकी महिमा  
देक्खी, अर उसनै उसके बाबत बात करी। 42 फेरभी सरदारों म्ह तै घणाए नै  
उस पै बिश्वास करया, पर फेरिसिया के कारण खुलकै कोनी मात्रै थे, कदे  
इसा ना हो के वे आराधनालय म्ह तै लिकाडे जावै: 43 क्यूँके माणसां की  
ओड़ तै बड़ाई उन्नै पणमेशर की ओड़ तै बड़ाई की बरोबरी म्ह घणी प्यारी  
लागै थी।

### यीशु के बचन : न्याय का आधार

44 यीशु नै रूक्का मारकै कह्या, “जो मेरै पै बिश्वास करै सै, ओ मेरै पै नीं  
बल्के मेरै खन्दानआळें पै बिश्वास करै सै। 45 अर जो मन्नै देखवै सै, ओ मेरै  
खन्दानआळें नै देखवै सै। 46 मैं दुनिया म्ह चाँदणा बण के आया सूँ, ताके जो  
कोए मेरै पै बिश्वास करै ओ अँधेरे म्ह कोनी रहवै। 47 जै कोए मेरी बात सुणकै  
कोनी मात्रै, तो मैं उसनै कसूरवार कोनी ठहरान्दा; क्यूँके मैं दुनिया ताहीं  
कसूरवार ठहराण खातर कोनी, पर दुनिया का उद्धार करण खातर आया सूँ।  
48 जो मन्नै खामखाँ समझै सै अर मेरी बात कोनी अपणावै सै उसताहीं दोषी  
ठहराण आळा तो एके सै: यानिके जो शब्द मन्नै कह्या सै, ओए पाछलै दिन  
म्ह उसताहीं कसूरवार ठहरावै गा। 49 क्यूँके मन्नै आपणै कात्री तै बात कोनी  
करी; पर बाप जिसनै मेरै ताहीं खन्दाया सै उसनै मेरैताहीं हुक्म दिया सै के,  
के- के कहूँ अर के, के बोळूँ? 50 अर मन्नै बेरा सै के उसका हुक्म  
अनन्तजीवन सै। ज्यातै मैं जो कीमे बोळूँ सूँ, ओ जिसा बाप नै मेरै ताहीं  
कह्या सै उसाए बोळूँ सूँ।”

### यीशु का चेल्यां के पैर धोणा

13 फसह के त्योहार तै पहल्या, जिब्व यीशु नै बेरा लाग्या के मेरा ओ  
टेम आ लिया सै के दुनिया छोड़कै बाप के घरा जाऊँ, तो आपणै  
माणसां तै जो दुनिया म्ह थे जिसा प्यार ओ राख्या करदा, आखर ताहीं  
उसाए प्यार राख्या रह्या। 2 जिब्व शैतान शमौन के बेट्टे यहूदा इस्करियोती के  
दिल म्ह न्यू घाल ग्या था के उसताहीं पकड़वाऊँ, खाणै के टेम 3 यीशु नै, न्यू  
बेरा लाग्या के बाप नै सारा कीमे मेरै बस म्ह कर दिया सै अर मैं पणमेशर के  
धोरै तै आया सूँ, अर पणमेशर के धोरै जाऊँ सूँ। 4 खाणै पै तै उठ के आपणै  
ऊपरले लत्ते उतार दिये, अँगोछा लेकै आपणी कमर पै के बांध्या। 5 फेर  
बास्सन म्ह पाणी भरकै चेल्यां के पैर धोये अर जो अँगोछा कमर पै बांध  
राख्या था उस्से तै पुन्जण लाग्या। 6 जिब्व ओ शमौन पतरस के धोरै  
आया, फेर पतरस नै उसताहीं कह्या, “हे प्रभु, के तू मेरे पैर धोवै सै?” 7 यीशु

नै उसताहीं जबाब दिया, “जो मै करूं सूँ, तन्नै इबे कोनी बेरा, पर इसके पाच्छे समझैगा।” 8 पतरस नै उसताहीं कह्या, “तू मेरे पैर कोनी धोण पावैगा।” न्यू सुणकै यीशु नै उसताहीं कह्या, “जै मै तन्नै ना धोऊँ, तो मेरे गेल्या तेरा कीमे भी सीर कोनी।” 9 शमौन पतरस नै उसताहीं कह्या, “हे प्रभु, फेर मेरे पैर नै बल्के मेरे हाथ अर सिर भी धोदे।” 10 यीशु नै उसताहीं कह्या, “जो न्हा लिया हो उसताहीं पैर कै सिवाय और कीमे धोण की आंट कोनी, पर ओ जमाए शुद्ध सै; अर थम शुद्ध सो, पर सारे-के-सारे कोनी।” 11 ओ तो आपणे पकड़ण आळे नै जाणै था ज्यांतै उसनै कह्या, “थम सारे-के-सारे शुद्ध कोनी।”

12 जिब्व उसनै पैर धो लिये, अर आपणे लत्ते पहरकै फेर बैठग्या, तो उनताहीं कहणै लागग्या, “के थम समझे के मन्नै थारै गेल्या के करया? 13 थम मन्नै गुरु अर प्रभु कहो सो, अर सई कहो सो, क्युँके मै ओए सूँ। 14 जिब्व मन्नै गुरु अर प्रभु होके थारै पैर धोए, तो थमनै भी एक-दुसरे के पैर धोणे चाहिये। 15 क्युँके मन्नै थारैताहीं नमूना करके दिखाया सै के जिसा मन्नै थारै गेल्या करया सै, थम भी उसाए करया करो। 16 मै थारैतै साच्ची-साच कहुँ सूँ, नौकर आपणै मालिक तै बड्डा कोनी, अर ना खन्दाया होया आपणे खन्दाण आळे तै। 17 थमनै ये बात बेरा सै, जै उनपै चाल्लो तो धन्य सो। 18 मै थम सारया कै बाबत कोनी कहंदा; जिनताहीं मन्नै छंट लिया सै, उन्नै मै जाणु सूँ; पर न्यू ज्यांतै के पवित्र ग्रन्थ का यो शब्द पूरा हो, ‘जो मेरी रोटी खावै सै, उसनै मेरे पै लात ठाई।’ 19 इब मै उसके होण तै पहल्याए थमनै बता द्युँ सूँ, के जब न्यू हो जावै तो थम बिश्वास करियो के मै ओए सूँ। 20 मै थारैताहीं साच्ची-साच कहुँ सूँ, के जो मेरे खन्दाए होइ नै अपणावै सै, ओ मन्नै अपणावै सै; अर जो मन्नै अपणावै सै, ओ मेरे खन्दाण आळे नै अपणावै सै।”

### बिश्वासघात कै कात्री इशारा

(मत्ती 26:20-25; मरकुस 14:17-21; लूका 22:21-23)

21 ये बात कहकै यीशु आत्मा म्ह दुखी होया अर या गवाही दी, “मै थारैताहीं साच्ची-साच कहुँ सूँ, के थारै म्ह तै एक मन्नै पकड़वावै गा।” 22 चेल्ले शक सुब्हा तै के ओ किसके बाबत कहवै सै, एक-दुसरे के कान्ही लखाण लागगे। 23 उसके चेल्यां म्ह तै एक जिसताहीं यीशु प्रेम राखै था, यीशु की छाती की कात्री कोड्डा होया बैठ्या था। 24 शमौन पतरस नै उसके कान इशारा करके उसताहीं बुझ्या, “बता तो, ओ किसके बाबत कहवै सै?” 25 फेर उसनै उससे ढाल यीशु की छाती कै कात्री कोड्डे होके उसताहीं बुझ्या, “हे प्रभु, ओ कौण सै?” यीशु नै जबाब दिया, “जिसताहीं मै यो रोटी का टुकड़ा डुबोकै द्युगां ओए सै।” 26 अर उसनै टुकड़ा डुबोकै शमौन के बेट्टे यहूदा इस्करियोती ताहीं दिया। 27 टुकड़ा लेनदए शैतान उसम्ह बड़ग्या। फेर यीशु नै उसताहीं कह्या, “जो तू करै सै, तोळा करा।” 28 पर बैठण आळ्यां म्ह तै किस्से नै कोनी बेरा लागग्या के उसनै या बात उसतै क्यारै कहीं। 29 यहूदा कै धोरै थैली रह्या करै थी, ज्यांतै किसे-किसे नै समझा के यीशु उसताहीं कहवै सै के जो कीमे हमनै त्योंहार खातर चाहवै ओ मोल लिया, या न्यू के कंगालां नै कीमे दे। 30 आखर म्ह ओ टुकड़ा लेके जिबे बाहरण निकड़्या; अर रात का टेम था।

### नई आज्ञा

31 जिब्व ओ बाहरण निकड़्या तो यीशु नै कह्या, “इब माणस के बेट्टे की महिमा होई सै, अर पणमेशर की महिमा उसम्ह होई सै; 32 [जै उसम्ह पणमेशर की महिमा होई सै] तो पणमेशर भी आपणे म्ह उसकी महिमा करैगा। 33 हे बाळको, मै और माडी वार थारै धोरै सूँ: फेर थम मन्नै टोहोगे, अर जिसा मन्नै यहूदियां ताहीं कह्या, ‘जडै मै जाऊँ सूँ, उडै थम कोनी आ सकदे, न्यू इब मै थारैताहीं भी कहुँ सूँ।’ 34 मै थमनै नया हुकम द्यु सूँ, के एक दुसरे तै प्यार राखियो; जिसा मन्नै थारैतै प्यार राख्या सै, उसाए थम भी एक दुसरे तै प्यार राखो। 35 जै आपस म्ह प्यार राखोगे, तो इसतै सारया नै बेरा पाट्टेगा के थम मेरे चेल्ले सो।”

### पतरस के इन्कार का इशारा

(मत्ती 26:31-35; मरकुस 14:27-31; लूका 22:31-34)

36 शमौन पतरस नै उसताहीं कह्या, “हे प्रभु, तू कित जा सै?” यीशु नै जबाब दिया, “जडै मै जाऊँ सूँ, उडै तू इबे मेरे पाच्छे कोनी आ सकदा; पर इसके बाद मेरे गेल्या आवैगा।” 37 पतरस नै उसताहीं कह्या, “हे प्रभु, इबे मै तेरे पाच्छे क्यारै नै आ सकदा? मै तो तेरी खातर आपणी ज्यान भी दे द्युगा।” 38 यीशु नै जबाब दिया, “के तू मेरी खातर आपणी ज्यान दे देवैगा? मै तेरेतै साच्ची-साच कहुँ सूँ, के मुर्गा बाग कोनी देवै गा जिब्व ताहीं तू तीन बर मेरे बाबत नाट नै लेनदा।

### पणमेशर तक पोछण का रास्ता

14 “थारा मन काल नीं पावै; थम पणमेशर पै बिश्वास राखो सो अर मेरे पै भी बिश्वास राखो। 2 मेरे बाप के घर म्ह घणीए रहण की जगहां सै, जै नी होंदीं तो मै थारै ताहीं कह देंदा; क्युँके मै थारै खातर जगहां त्यार करण नै जाऊँ सूँ। 3 अर जै मै जाके थारै खातर जगहां त्यार करूं, तो फेर आके थमनै आपणे उरै ले जाऊँगा के जडै मै रहुँ उडै थम भी रहो। 4 जडै मै जाऊँ सूँ, थम उडै का राह जाणो सो।” 5 थोमा नै उसताहीं कह्या, “हे प्रभु, हमनै कोनी बेरा के तू कितोड़ जावै सै; तो राह का हमनै के बेरा?” 6 यीशु नै उसताहीं कह्या, “राह अर सच अर जिन्दगी मै ए सूँ, बिना मेरे जरिये कोए बाप धोरै कोनी पहोच सकदा। 7 जै थम मन्नै जाणदे होंदे, तै मेरे बाप नै भी जाणदे; अर इब उसनै जाणो सो, अर उसताहीं देख्या भी सै।” 8 फिलिप्पुस नै उसताहीं कह्या, “हे प्रभु, बाप नै म्हारै ताहीं दिखा दे, योए हमारै खातर भतेरा सै।” 9 यीशु नै उसताहीं कह्या, “हे फिलिप्पुस, मै इतने दिन तै थारै गेल्या सूँ, के तू मन्नै कोनी जाणदा? जिसनै मेरेताहीं देख्या सै उसनै बाप ताहीं देख्या सै। फेर क्यारै कहवै सै के बाप नै म्हारताहीं दिखा? 10 के तू बिश्वास कोनी करदा के मै बाप म्ह सूँ, अर बाप मेरे म्ह सै? ये बात जो मै थारैताहीं बताऊँ सूँ, आपणी ओड़ तै कोनी बतान्दा, पर बाप मेरम्ह रहके आपणे काम करै सै। 11 मेरा-ए बिश्वास करो के मै बाप म्ह सूँ, अर बाप मेरे म्ह सै; ना तो कारनाम्यां कै बाबतए मेरा बिश्वास करो। 12 मै थारैतै साच्ची-साच कहुँ सूँ, के जो मेरे पै बिश्वास राखै सै, ये काम जो मै करूं सूँ, ओ भी करैगा, बल्के इनतै भी बड्डे-बड्डे काम करैगा, क्युँके मै बाप धोरै जाऊँ सूँ। 13 जो कीमे थम मेरे नाम तै माँगो, ओए मै करूँगा, के बेट्टे कै जरिये बाप की महिमा हो। 14 जै थम मेरे तै मेरे नाम तै कीमे माँगो, तो मै उसताहीं करूँगा।

### पवित्र आत्मा की प्रतिज्ञा

15 “जै थम मेरे तै प्यार राखो सो, तो मेरे हुकमां नै मानोगे। 16 मै बाप तै बिनती करूँगा, अर थारैताहीं एक और सहारा देणीया देवैगा के ओ सारीहाण थारै गेल्या रहवै। 17 यानिके सच का आत्मा, जिसताहीं दुनिया कोनी अपणा सकदी, क्युँके ओ ना उसनै देखे सै, अर ना उसताहीं जाणै सै; थम उसनै जाणो सो, क्युँके ओ थारै गेल्या सै, अर ओ थारै म्ह होगा। 18 “मै थारैताहीं बेवार्सा कोनी छोड्डुगा; मै थारै धोरै आऊँ सूँ। 19 और माडी वार रहरी सै के फेर दुनिया मेरे ताहीं कोनी देखे गी, पर थम मन्नै देखोगे; ज्यांतै के मै जिऊँ सूँ, थम भी जिन्दे रहोगे। 20 उस दिन थमनै बेरा लागैगा के मै आपणे बाप म्ह सूँ, अर थम मेरे म्ह, मै थारै म्हा। 21 जिस कै धोरै मेरे हुकम सै अर ओ उन्नै मन्नै सै, ओए मेरतै प्यार राखै सै; अर जो मेरतै प्यार राखै सै उसतै मेरा बाप प्यार राखै गा, अर मै उसतै प्यार राखूँगा, आपणे आप ताहीं उसपै प्रगत करूँगा।” 22 उस यहूदा नै जो इस्करियोती कोनी था, उसताहीं कह्या, “हे प्रभु, के होया के तू आपणे आप ताहीं म्हारपै प्रगत करना चाहवै सै अर दुनिया पै नीं?” 23 यीशु नै उसताहीं जबाब दिया, “जै कोए मेरे तै प्रेम राखैगा तो ओ मेरे शब्द नै मानैगा, अर मेरा बाप उसतै प्रेम राखैगा, अर हम उसके धोरै आवांगे अर उसके गेल्या बसांगे। 24 जो मेरतै प्यार कोनी राख्दा, ओ मेरे शब्द नै कोनी मान्दा; अर जो शब्द थम सुणो सो ओ मेरे कोनी बल्के बाप के सै, जिसनै मेरेताहीं खन्दाया। 25 “ये बात मन्नै थारै गेल्या रहंदे होए थारैतै कहीं। 26 पर सहयोगी यानिके पवित्र आत्मा जिसताहीं बाप मेरे नाम तै

खन्दावैगा, ओ थारै ताहीं सारी बात सिखावैगा, अर जो कीमे मन्त्रै थारैतै कहाँ सै, ओ सारा कीमे थारैताहीं याद दुआवैगा। 27 मै थारै ताहीं शान्ति देकै जाऊँ सूँ, आपणी शान्ति थारै ताहीं छुँ सूँ, जिसे दुनिया देवै सै, मै थमनै कोनी देवा : थारा मन काल ना हो अर ना डरै। 28 थमनै सुणया के मन्त्रै थारैताहीं के कहाँ, 'मै जाऊँ सूँ, अर थारै धोरै फेर आऊँगा।' जै थम मेरै तै प्यार राख्दे, तो इस बात तै राजी होंदे के मै बाप के धोरै जाऊँ सूँ, क्यूँके बाप मेरै तै बड्डा सै। 29 अर मन्त्रै इब इसके होण तै पहल्या थारै तै कह दिया, के जिब ओ हो जावै, तो थम बिश्वास करो। 30 मै इब थारै गेल्या और बात कोनी करूँगा, क्यूँके इस दुनिया का सरदार आवै सै। मेरै पै उसका कोए हक कोनी; 31 पर न्यू ज्यातै होवै सै के दुनिया नै बेरा लागे के मै बाप तै प्रेम राखु सूँ, अर जिसा बाप नै मेरतै हुकम दिया मै उसाए करुँ सूँ उठो, याडै तै चालो।

### यीशु सच्ची दाखलता

15 "साच्ची अंगूर की बेल मै सूँ, अर मेरा बाप किसान सै। 2 जो डाळी मेरै म्ह सै अर कोनी फळदी, उसताहीं ओ काट देवै सै; अर जो फळ सै, उसताहीं ओ छाट्टै सै ताके और फळो। 3 थम तो उस शब्द के कारण जो मन्त्रै थारताहीं कहाँ सै, शुद्ध सो। 4 थम मेरै म्ह बणे रहो, अर मै थारै म्ह, जिस तरियां डाळी जै अंगूर की बेल म्ह बणी नी रहवै तो खुद तै कोनी फळ सकदी, उससे तरियां थम भी जै मेरै म्ह बणे ना रहो तो कोनी फळ सकदे। 5 मै अंगूर की बेल सूँ अर थम डाळी सो। जो मेरै म्ह बणया रहवै सै अर मै उसम्ह, ओ घणाए फळ फळ सै, क्यूँके मेरै तै न्यारे पाटके थम कीमे नी कर सकदे। 6 जै कोए मेरै म्ह नी बणया रहदा, तो ओ डाळी की तरियां बगा दिया जावैगा, अर सुख जावै सै; अर माणस उनताहीं कट्टे करके आग म्ह झोक देवै सै, अर वे बळ जावै सै। 7 जै थम मेरै म्ह बणे रहो अर मेरी बात थारै म्ह बणी रहवै, तो जो जी म्ह आवै मांगो अर ओ थारे खातर हो ज्यांगा। 8 मेरै बाप की महिमा इस्से म्ह सै के थम घणाए फळ ल्याओ, फेर थम मेरे चले ठहरोगे। 9 जिसा बाप नै मेरै तै प्यार राख्या, उसाए मन्त्रै थारैतै प्यार राख्या, मेरै प्यार म्ह बणे रहो। 10 जै थम मेरे हुकमां नै मानोगे, तो मेरै प्यार म्ह बणे रहोगे, जिसाढाळ के मन्त्रै आपणे बाप का हुकम मान्या सै, अर उसके प्यार म्ह बणा रहूँ सूँ। 11 मन्त्रै येँ बात थारै तै ज्यातै कहीं, के मेरा आनन्द थार म्ह बणा रहवै, अर थारा आनन्द पूरा होज्या।

12 "मेरा हुकम यो सै, के जिसा मन्त्रै थारतै प्यार राख्या, उसाए थम भी एक-दुसरे तै प्यार राख्यो। 13 इस्तै बड्डा प्यार किस्से का कोनी के कोए आपणे यारां के खातर आपणी ज्यान दे। 14 जो कीमे मै थारै हुकम छुँ सूँ, जै उसताहीं मानो तो थम मेरे ढब्बी सो। 15 इब पाच्छे मै थारैताहीं नौकर कोनी कहूँगा क्यूँके नौकर कोनी जान्दा के उसका मालिक के करै सै; पर मन्त्रै थारैताहीं ढब्बी कहाँ सै, क्यूँके मन्त्रै जो बात आपणे बाप तै सुणीं, वे सारी थारतै बता दीं। 16 थमनै मेरैताहीं कोनी छांट्या पर मन्त्रै थारैताहीं छांट्या सै अर थारैताहीं काम पै लाया सै के थम जाके फळ ल्याओ अर थारा फळ बणा रहवै के थम मेरै नाम तै जो कीमे बाप तै मांगो, ओ थारैताहीं दे। 17 इन बात्तां का हुकम मै थारैताहीं इसकरके छुँ सूँ के थम एक-दुसरे तै प्यार राख्यो।

### संसार का बैर

18 "जै दुनिया थारैतै बैर राखे सै, तो जाण लो के उसनै थारैतै पहल्या मेरै तै बैर राख्या। 19 जै थम दुनिया के होंदे, तो दुनिया आपण्यां तै प्यार राखे सै; पर इसकरके के थम दुनिया के कोनी, बल्के मन्त्रै थारैताहीं दुनिया म्ह तै छांट लिया सै, इसकरके दुनिया थारै तै बैर राखे सै। 20 जो बात मन्त्रै थारैतै कही सै, 'नौकर आपणे मालिक तै बड्डा कोनी होंदा,' उसनै याद राख्यो। जिब उन्ने मेरताहीं सताया, तो थारैताहीं भी सतावेंगे; जै उन्ने मेरी बात मान्नी, तो थारी भी मान्नेंगे। 21 पर यो सारा कीमे वे मेरै नाम के बाबत थारै गेल्या करैंगे, क्यूँके वे मेरै खन्दानआळे नै कोनी जाणदे। 22 जै मै नीं आंदा, अर उनतै बात नीं करदा, फेर वे पापी कोनी ठहरदे; पर इब उन्ने उनके पाप खातर कोए बहाना कोनी। 23 जो मेरै तै बैर राखे सै, ओ मेरै बाप तै भी बैर राखे सै। 24 जै मै उन म्ह वे कारनाम्मे नीं करदा, जो और किसे नै कोनी करे, तो वे पापी कोनी

ठहरदे; पर इब तो उन्ने मेरैताहीं अर मेरै बाप दोनुआ ताहीं देख्या अर दोनुआ तै बैर करया। 25 न्यू इसकरके होया के ओ शब्द पूरा हो, जो उनके व्यवस्था म्ह लिख्या सै, 'उन्ने मेरै तै खामखाँ बैर करया।' 26 पर जिब ओ सहयोगी आवैगा, जिसनै मै थारै धोरै बाप की ओड़ तै खन्दाऊँगा, यानिके सच का आत्मा जो बाप की कान तै लिक्डै सै, तो ओ मेरी गवाही देवैगा; 27 अर थम भी मेरे गवाह सो क्यूँके थम सरु तै मेरै गेल्या रहे सो।

16 "ये बात मन्त्रै थारैतै ज्यातै कहीं के थारै ठोकर ना लागै। 2 वे थमनै आराधनालयां म्ह तै काड देवेंगे, बल्के ओ टेम आवै सै, के जो कोए थमनै मार देवैगा ओ न्यू समझैगा के मै पणमेशर की सेवा करुँ सूँ। 3 इसा वे ज्यातै करैंगे के उन्ने ना बाप ताहीं जाणया सै अर ना मन्त्रै जाणै सै। 4 पर ये बात मन्त्रै ज्यातै थारैतै कहीं, के जिब इनका टेम आवै तो थमनै याद आ जावै के मन्त्रै थारैतै पहल्याए कह दिया था।

### पवित्र आत्मा के काम

"मन्त्रै सरु म्ह थारैतै ये बात ज्यातै कोनी कहीं क्यूँके मै थारे गेल्या था। 5 पर इब मै आपणे खन्दानआळे के धोरै जाऊँ सूँ, अर थारै म्ह तै कोए मेरै तै कोनी बुझता, 'तू कित जावै सै?' 6 पर मन्त्रै जो ये बात थारैतै कहीं सै, ज्यातै थारा मन दुःख तै भरया सै। 7 फेरभी मै थारैतै साच्ची कहूँ सूँ, के मेरा जाणा थारै खातर ठीक सै, क्यूँके जै मै ना जाऊँ तो ओ सहयोगी थारै धोरै कोनी आवैगा; पर जै मै जाऊँगा, तो उसताहीं थारै धोरै खन्दाऊँगा। 8 ओ आके दुनिया ताहीं पाप अर धार्मिकता अर न्याय के बाबत लाजबाब करैगा। 9 पाप के बारे म्ह ज्यातै के वे मेरै पै बिश्वास कोनी करदे; 10 अर धार्मिकता के बारे म्ह ज्यातै के मै बाप के धोरै जाऊँ सूँ, अर थम मन्त्रै दूबारै कोनी देख्योगे; 11 न्याय के बारे म्ह ज्यातै के दुनिया का सरदार कसूरवार ठहराया गया सै। 12 मन्त्रै थारैतै और भी घणीए बात कहणी सै, पर इबे थम उन्ने सह नीं सकदे। 13 पर जिब ओ यानिके सच का आत्मा आवैगा, तो थम सारया नै सच का रास्ता बतावैगा, क्यूँके ओ आपणी ओड़ तै कोनी कहूँगा पर जो कीमे सुणैगा ओए कहूँगा, अर आण आळी बात थारैताहीं बतावैगा। 14 ओ मेरी महिमा करैगा, क्यूँके ओ मेरी बात्तां म्ह तै लेके थारैताहीं बतावैगा। 15 जो कीमे बाप का सै, ओ सारा मेरा सै; ज्यातै मन्त्रै कहाँ के ओ मेरी बात्तां म्ह तै लेके थारैताहीं बतावैगा।

### दुःख सुख म्ह बदल जावैगा

16 "माडी वार म्ह थम मन्त्रै कोनी देख्योगे, अर फेर माडी वार म्ह मन्त्रै देख्योगे।" 17 फेर उसके कीमे चेल्यां नै आपस म्ह कहाँ, "यो के सै जो ओ म्हारैताहीं कहूँ सै, 'माडी वार म्ह थम मन्त्रै कोनी देख्योगे, अर फेर माडी वार म्ह मन्त्रै देख्योगे?' अर यो 'ज्यातै के मै बाप के धोरै जाऊँ सूँ?'" 18 फेर उन्ने कहाँ, "यो 'माडी वार' जो ओ कहूँ सै, या के बात सै? हम कोनी जाणदे के ओ के कहूँ सै।" 19 यीशु नै न्यू जाणके के वे मेरतै बुझणा चाहवै सै, उनताहीं कहाँ, "के थम आपस म्ह मेरी इस बात बाबत जाँच-पड़ताल करो सो, 'माडी वार म्ह थम मन्त्रै कोनी देख्योगे, अर फेर माडी वार म्ह मन्त्रै देख्योगे?'" 20 मै थारैतै साच्ची-साच कहूँ सूँ, के थम रोओगे अर बिलाप करोगे, पर दुनिया राजी होवैगी; थमनै दुःख होगा, पर थारा दुःख आनन्द म्ह बदल जावैगा। 21 जाप्ये के टेम लुगाई नै दुःख होवै सै, क्यूँके उसके दुःख का बख्त आरया सै, पर जिब वा बाळक नै जण दे सै, तो इस खुशी तै, के दुनिया म्ह एक माणस पैदा होया, उस दुःख नै फेर याद कोनी करदी। 22 उससे तरियां थारै म्ह भी इब तो दुःख सै, पर मै थारैतै दुबारा फेडूँगा अर थारे मन आनन्द तै भर जावैंगे; थारा आनन्द कोए थारैतै खोस नीं सकदे। 23 उस दिन थम मेरतै कीमे नीं बुझ्योगे। मै थारैतै साच्ची साच कहूँ सूँ, जै बाप तै कीमे माँगो, तो ओ मेरै नाम तै थारैताहीं देवैगा। 24 इब ताहीं थमनै मेरै नाम तै कीमे नीं माँगो; माँगो, तो पा ल्योगे ताके थारा आनन्द पूरा हो जावै।

### संसार पै जीत

25 "मन्त्रै ये बात थारैताहीं उदाहरणां म्ह कहीं सै, पर ओ टेम आवै सै के मै थारैतै फेर उदाहरणां म्ह ये बात कोनी कहूँगा, पर खोलके थारे बाप के बारै

मह बतारुँगा। 26 उस दिन थम मेरै नाम तै माँगोगे; अर मै थारैतै न्यु कोनी कहंदा के मै थारै खातर बाप तै बिनती करूंगा; 27 क्यूँके बाप तो खुदे थारैतै प्यार राखे सै, ज्यांतै के थमनै मेरतै प्यार राख्या सै अर न्यु भी बिश्वास करया सै के मै बाप की ओड़ तै आया। 28 मै बाप की ओड़ तै दुनिया मह आया सूं; मै दुबारै दुनिया नै छोड़के बाप के धोरै जाऊँ सूं। 29 उसके चेल्यां नै कहा, “लखा, इब तो तू खोलके कहवै सै, अर कोए उदाहरण कोनी कहंदा। 30 इब हमनै बेरा पाटग्या सै के तन्नै सारा कीमे बेरा सै, अर इसकी आंट कोनी के कोए तेरैतै कीमे बुझै; इसतै हम बिश्वास करां सां के तू पणमेशर कै कान्नी तै आया सै।” 31 न्यु सुण कै यीशु नै उनताहीं कहा, “के थम इब बिश्वास करो सो? 32 लखाओ, ओ बख्त आवै सै बल्के आण पहाँचा सै के थम सारे खिंड-मीन्ड होके आपणा-आपणा रास्ता नापोगे, अर मन्नै एकला छोड़ दोगे; फेरभी मै एकला कोनी क्यूँके बाप मेरै गेल्या सै। 33 मन्नै ये बात थारैतै ज्यांतै कहीं सै के थम मेरै मह शान्ति पाओ। दुनिया मह थारै पै क्लेश होवै सै, पर हिम्मत राखिओ, मन्नै दुनिया ताहीं जीत लिया सै।”

### यीशु की महायाजकीय प्रार्थना खुद के खातर

17 यीशु नै ये बात कहीं अर आपणी नजर अकास कानी ठाके कहा, “हे पिता, ओ बख्त आण पहाँच्या सै; आपणे बेटे की महिमा कर, के बेड़ा भी तेरी महिमा करै, 2 क्यूँके तन्नै उसताहीं सारे जीवां पै हक्क दिया, के जो तन्नै उसताहीं दिया सै उन सारया ताहीं ओ अनन्त जीवन दे। 3 अर अनन्तजीवन यो सै के वे तुझ, जो के एकमात्र साच्चा पणमेशर सै, नै अर यीशु मसीह नै, जिसताहीं तन्नै खन्दाया सै, जाणै। 4 जो काम तन्नै मेरैताहीं करण नै दिया था, उसताहीं पूरा करके धरती पै तेरी महिमा करी सै। 5 इब हे पिता जी, तू आपणे गेल्या मेरी महिमा उस महिमा तै कर जो दुनिया की सृष्टी तै पहल्ये, मेरी तेरै गेल्या थी।

### अपणे चेल्यां के खातर

6 “मन्नै तेरा नाम उन माणसां पै प्रगट करया सै जिनताहीं तन्नै दुनिया मह तै मेरैताहीं दिया। वे तेरे थे अर तन्नै उनताहीं मेरै तै दिया, अर उनै तेरै शब्द ताहीं मान लिया सै। 7 इब उनै बेरा पाटग्या सै के जो कीमे तन्नै मेरैताहीं दिया सै ओ सारा तेरी ओड़ तै सै; 8 क्यूँके जो शब्द तन्नै मेरैताहीं दिये, मन्नै उनताहीं उनकै धोरै पहाँचा दिये; अर उनै उनताहीं अपणा लिया, अर साच्ची-साच जाण लिया के मै तेरी ओड़ तै आया सूं, अर बिश्वास कर लिया सै के तन्नै मेरैताहीं खन्दाया। 9 मै उन खातर बिनती करूं सूं; दुनिया के खातर बिनती कोनी करदा पर उनै के खातर जिनताहीं तन्नै मेरैताहीं दिया सै, क्यूँके वे तेरे सैं; 10 अर जो कीमे मेरा सै ओ सारा तेरा सै, अर जो तेरा सै ओ मेरा सै, अर इनतै मेरी महिमा प्रगट होई सै। 11 मै इस दुनिया मह कोनी रहूंगा, पर ये दुनिया मह रहवैगें, अर मै तेरै धोरै आऊँ सूं हे पवित्र पिता, आपणे उस नाम तै जो तन्नै मेरै ताहीं दिया सै, उनकी रुखाळी कर के वे म्हारै बरोबर एक्से हों। 12 जिब्व मै उनकै गेल्या था, तो मन्नै तेरे उस नाम तै, जो तन्नै मेरैताहीं दिया सै उनकी रुखाळ करी, अर नास के बेटे नै छोड़ उनम्ह तै कोए नास कोनी होया, ज्यांतै के पवित्र ग्रन्थ मह जो कहा ओ पूरा हो। 13 पर इब मै तेरै धोरै आऊँ सूं, अर ये बात दुनिया मह कहूँ सूं, के वे मेरा आनन्द आपणे मह पूरा पावै। 14 मन्नै तेरा शब्द उनताहीं पहाँचा दिया सै; अर दुनिया नै उनतै बैर करया, क्यूँके जिस तरियां मै इस दुनिया का कोनी, उससे तरियां वे भी इस दुनिया के कोनी। 15 मै या बिनती कोनी करदा के उनै दुनिया तै ठा ले; पर न्यु के तू उनै उस दुष्ट तै बचाए राखा। 16 जिस तरियां मै दुनिया का कोनी, उससे तरियां वे भी दुनिया के कोनी। 17 सच कै गेल्या उनै पवित्र कर : तेरा शब्द साच्चा होवै। 18 जिस तरियां तन्नै मेरैताहीं दुनिया मह खन्दाया, उससे तरियां मन्नै भी उनताहीं दुनिया मह खन्दाया; 19 अर उनकै खातर मै खुद नै पवित्र करूं सूं, ताके वे भी सच कै गेल्या पवित्र करे जावै।

### सारे बिश्वासियाँ के खातर

20 “मै केवल इन्ने खातर बिनती कोनी करदा, पर उनकै खातर भी जो इनकै शब्द कै जरिये मेरपै बिश्वास करैगें, 21 के वे सारे एक हों; जिस तरियां हे

पिता तू मेरै मह सै, अर मै तेरै मह सूं, उससे तरियां वे भी हमारै मह सै, जिसतै दुनिया बिश्वास करै के तन्नै मेरैताहीं खन्दाया सै। 22 वा महिमा जो तन्नै मेरैताहीं दी मन्नै उनताहीं दी सै, के वे उससे तरियां ए एक हों जिस तरियां हम एक सा, 23 मै उन मह अर तू मेर मह के वे सिद्ध होके एक हो जावै, अर दुनिया नै बेरा पाटके तन्नै ए मेरैताहीं खन्दाया, अर जिस तरियां तन्नै मेरतै प्यार राख्या उससे तरियां उनतै प्यार राख्या। 24 हे पिता, मै चाहूँ सूं, के जिन ताहीं तन्नै मेरैताहीं दिया सै, जड़ै मै सूं उड़ै वे भी मेरै गेल्या हो, के वे मेरी उस महिमा नै देखै जो तन्नै मेरैताहीं दी सै, क्यूँके तन्नै दुनिया नै बनाण तै पहल्ये मेरतै प्यार राख्या। 25 हे धार्मिक पिता, दुनिया मन्नै कोनी जाणदी, पर मै तन्नै जाणु; अर इन्ने भी जाणयां के तन्नै ए मेरैताहीं खन्दाया सै। 26 मन्नै तेरा नाम उनताहीं बताया अर बतान्दा रहूंगा के जो प्यार तन्नै मेरतै था ओ उन मह रहवै, अर मै उन मह रहूँ।”

### यीशु का पकड़वाया जाणा

(मत्ती 26:47-56; मरकुस 14:43-50; लूका 22:47-53)

18 यीशु ये बात कहके आपणे चेल्यां कै गेल्या किद्रॉन नाळै कै परली ओड़ गया। उड़ै एक फुल्लां की क्यारी थी, जिस मह ओ अर उसके चेल्ले गए। 2 उसका पकड़ाणआळा यहूदा भी उस जगहां नै जाणै था, क्यूँके यीशु आपणे गेल्या उड़ै जाया करै था। 3 फेर यहूदा, सिपाहीयाँ कै एक टोळ नै अर प्रधान याजकां अर फरिसिया की ओड़ तै चमच्या नै लेके, दिवे अर मशाल अर हथियारां नै लेके उड़ै आया। 4 फेर यीशु, उन सारी बात्तां नै जो उस पै बीत्तण आळी थी जाणके, लिक्ड़के उनताहीं कहा, “किसनै टोहो सो?” 5 उनै उसताहीं जबाब दिया, “यीशु नासरी नै।” यीशु नै उनताहीं कहा, “मैए सूं।” उसका पकड़ाणआळा यहूदा भी उनकै गेल्या खड़या था। 6 उसकै न्यु कहंदर, “मै सूं, “पाच्छे हटके धरती पै पड़ो।” 7 फेर उसनै दुबारै उनताहीं बुझया, “थम किसनै टोहो सो?” वे बोले, “यीशु नासरी नै।” 8 यीशु नै जबाब दिया, “मन्नै तो थारैताहीं कह दिया सै के मै सूं, जे मन्नै टोहो सो तो इन्नह जाण दो।” 9 न्यु ज्यांतै होया के ओ शब्द पूरा हो जो उसनै कहा था : “जिनताहीं तन्नै मेरतै दिया उनम्ह तै मन्नै एक भी नीं खोया।” 10 फेर शमौन पतरस नै तलवार, जो उसकै धोरै थी, खींची अर महायाजक कै नौकर पै चलाके उसका सोळा कान उड़ा दिया, उस नौकर का नाम मलखुस था। 11 फेर यीशु नै पतरस तै कहा, “आपणी तलवार म्यान मह धरा जो कटोरा बाप नै मेरैताहीं दिया सै, के मै उसनै नीं पिऊँ?”

### हन्ना कै श्यामी यीशु

12 फेर सिपाहीयाँ अर उनकै सूबेदार अर यहूदिया कै चमच्या नै यीशु ताहीं पकड़के जुड़ लिया, 13 अर पहल्ये उसताहीं हन्ना कै धोरै ले गए, क्यूँके ओ उस साल का महायाजक काइफा का ससुरा था। 14 यो ओए काइफा था, जिसनै यहूदिया ताहीं सलाह दी थी के म्हारे माणसां खातर एक आदमी का मरणा सई सै।

### पतरस का इनकार

15 शमौन पतरस अर एक और दूसरा चेल्ला भी यीशु सै पाच्छे हो लिए। यो चेल्ला महायाजक का जाण-पिच्छाण का था, ज्यांतै ओ यीशु कै गेल्या महायाजक कै आँगन मह गया, 16 पर पतरस बाहरणै दरवाजे पै खड़या रह्या। फेर ओ दूसरा चेल्ला जो महायाजक का जाण-पिच्छाण का था, बाहरणै लिक्ड़या अर पहरेदारणी तै कहके पतरस ताहीं भीत्तर लीयाया। 17 उस नौकराणी नै, जो पहरेदारणी थी, पतरस तै कहा, “कदे तू भी इस माणस के चेल्यां मह तै तो नीं सै?” उसनै कहा, “मै कोनी सूं।” 18 नौकर अर चमच्ये जाडू के बाबत कोल्ले धधका कै खड़े आग सेकै थे, अर पतरस भी उनकै गेल्या खड़या आग सेकै था।

### महायाजक द्वारा यीशु तै पूछताछ

19 फेर महायाजक नै यीशु तै उसकै चेल्यां कै बाबत अर उसकै उपदेश कै बाबत जाँच-पड़ताल करी। 20 यीशु नै उसताहीं जबाब दिया, “मन्नै दुनिया तै

खुलकै बात करी; मन्त्रै सभायां अर आराधनालयां म्ह, जडै सारे यहूदी कहे होया करै सै, सारी हाण उपदेश करया अर लुहक कै कीमे कोनी कहा। 21 तू मन्त्रै क्यातै बुझै सै? सुणनआळयां तै बुझ के मन्त्रै उनताहीं के कहा। लखा, उन्नै बेरा सै के मन्त्रै के-के कहा। 22 जिब्व उसनै न्यू कहा, तो चमच्या म्ह तै एक नै जो धोरै खडया था, यीशु कै रैट मारकै कहा, “के तू महायाजक नै इस तरियां जबाब देवै सै?” 23 यीशु नै उसतै जबाब दिया, “जै मन्त्रै भुंजा कहा, तो उस भुंज का सबूत दे; पर जै भला कहा, तो मन्त्रै क्यातै मारै सै?” 24 हन्ना नै उसताहीं जुड़े होए, काइफा महायाजक कै धोरै खन्दा दिया।

### पतरस का दुबारा इन्कार

25 शमौन पतरस खडया होया आग सेकै था, फेर उन्नै उसतै कहा, “कदे तू भी उसकै चेल्यां म्ह तै तो नीं सै?” उसनै नाट-कै कहा, “मै कोनी सूँ।” 26 महायाजक के नौकरां म्ह तै एक, जो उसकै कुन्बै म्ह तै था, जिसका कान पतरस नै काट दिया था, बोल्या, “के मन्त्रै तेरैताहीं उसकै गेल्या फुल्लां की क्यारी म्ह कोनी देख्या था?” 27 पतरस फेर नाट्या, अर जिबे मुरगै नै बाँग दी।

### पिलातुस कै श्यामी यीशु

28 फेर वे यीशु ताहीं काइफा कै धोरै तै किले म्ह ले गए, अर तड़कए का टेम था, पर वे खुद किलै कै भीत्तर कोनी गए ताके अशुद्ध ना हों पर फसह खा सकै। 29 फेर पिलातुस उनकै धोरै बाहरणै लिकड़ कै आया अर कहा, “थम इस माणस पै किस बात का दोष लाओ सो?” 30 उन्नै उसताहीं जबाब दिया, “जै ओ भुण्डे काम करणीया नीं होंदा तो हम उसनै तेरै हाथ कोनी सोंपदे।” 31 पिलातुस नै उनतै कहा, “थमए इसनै ले जाके आपणे नियम-कायदा कै मुताबिक उसका न्याय करो।” यहूदिया नै उसतै कहा, “हमनै हक कोनी के किसे की ज्यान लेवां।” 32 न्यू ज्यातै होया के यीशु की वा बात पूरी हो जो उसनै यो इशारा देदे होड़ कहीं थी के उसकी मौत किसदाळ होगी।

33 फेर पिलातुस दूबारै किलै कै भीत्तर गया, यीशु नै बुलाकै उसतै बुझया, “के तू यहूदिया का राजा सै?” 34 यीशु नै जबाब दिया, “के तू या बात आपणी ओड़ तै कहै सै या दूसरयां नै मेरै बाबत तेर तै न्यू कहा सै?” 35 पिलातुस नै जबाब दिया, “के मै यहूदी सूँ? तेरी ए कोम अर प्रधान याजकां नै तेरैताहीं मेरै हाथ म्ह सोंप्या सै। तन्नै के करया सै?” 36 यीशु नै जबाब दिया, “मेरा राज्य इस दुनिया का कोनी; जै मेरा राज्य इस दुनिया का होंदा, तो मेरे सेवादार लड़के के मै यहूदियां कै हाथां सोंप्या कोनी जांदा : पर मेरा राज्य आडै का कोनी।” 37 पिलातुस नै उसतै कहा, “के तू राजा सै?” यीशु नै जबाब दिया, “तू कहै सै के मै राजा सूँ। मन्त्रै ज्यातै जन्म लिया अर ज्यातै दुनिया म्ह आया सूँ, के सच की गवाही ह्युँ।” जो कोए सच का सै, ओ मेरा शब्द सुणै सै। 38 पिलातुस नै उसतै कहा, “सच के सै?”

### मृत्यु-दण्ड की आज्ञा

न्यू कहकै ओ फेर यहूदियां कै धोरै लिकड़ आया अर उनताहीं कहा, “मै तो उसम्ह कीमे खोट कोनी पांदा। 39 पर थारै न्यू रिवाज सै के मै फसह पै थारै खातर एक माणस नै छोड़ ह्युँ। आखर के थम चाहो सो के मै थारै खातर यहूदिया कै राजै नै छोड़ ह्युँ?” 40 फेर उन्नै रुकै मारकै कहा, “इसनै नीं, पर म्हारै खातर बरअब्बा नै छोड़ दे।” अर बरअब्बा डाकू था।

19 इसपै पिलातुस नै यीशु कै कोरडे लगवाए। 2 सिपाहियां नै काण्डया का मुकुट गूथकै उसकै सिर पै धरया, अर उसताहीं बैजणी लत्ते पिराये, 3 अर उसकै धोरै आ-आकै कहण लागे, “हे यहूदियों के राजा, प्रणाम!” अर उसकै रैट भी मारै। 4 फेर पिलातुस नै दूबारै बाहरण लिकड़ कै माणसां ताहीं कहा, “लखाओ, मै उसनै थारै धोरै फेर ल्याया सूँ: ताके थमनै बेरा लागै के मै उसम्ह कीमे भी खोट कोनी पांदा।” 5 फेर यीशु कान्डया का मुकुट अर बैजनी लत्ते पहरे होड़ बाहरण लिकड़या; अर पिलातुस नै उनताहीं कहा, “लखाओ, यो माणस!” 6 जिब्व प्रधान याजकां आ चमच्या नै उसताहीं देख्या, तो रुकै मारकै कहा, “उसताहीं क्रूस पै चढ़ा, क्रूस पै!” पिलातुस नै उनताहीं कहा, “थमए उसनै ले जाके क्रूस पै चढ़ाओ, क्यूँके मै

उसम्ह कोए खोट कोनी पांदा।” 7 यहूदियां नै उसताहीं जबाब दिया, “म्हारे भी व्यवस्था सै अर उस व्यवस्था कै मुताबिक ओ मरण कै जोग्गा सै, क्यूँके उसनै खुद ताहीं पणमेशर का बेड़ा बणाया।” 8 जिब पिलातुस नै या बात सुणी तो और भी डरया, 9 अर दूबारै किलै कै भीत्तर गया अर यीशु तै कहा, “तू कितका सै?” पर यीशु नै उसतै कीमे भी जबाब कोनी दिया। 10 इस पै पिलातुस नै उसतै कहा, “मेरतै क्यातै नीं बोल्दा? के तन्नै कोनी बेरा के तेरैताहीं छोड़ देण का हक मेरै ताहीं सै, अर तेरै ताहीं क्रूस पै चढ़ाण का भी मेरै ताहीं हक सै।” 11 यीशु नै जबाब दिया, “जै तेरै ताहीं ऊपर तै नीं दिया जान्दा, तो तेरा मेरै पै कीमे हक कोनी होंदा; ज्यातै जिसनै मेरैताहीं तेरै हाथ पकड़आया सै उसका पाप घणा सै।”

12 इसपै पिलातुस नै उसताहीं छोड़ देणा चाहया, पर यहूदियां नै रुकै मार-मारकै कहा, “जै तू इसनै छोड़ देवैगा, तो तेरी भगति कैसर कान्नी कोनी। जो कोए खुद नै राजा बणावै सै ओ कैसर का सामणा करै सै।” 13 ये बात सुणकै पिलातुस यीशु नै बाहरण ल्याया अर उस ठोड़ एक चोतरा था जो इब्रानी म्ह ‘गबता’ कुहावै सै, अर उडै न्याय की गद्दी पै बैठया। 14 यो फसह की त्यारी का दिन था, अर छठे पहर कै करीबन था। फेर उसनै यहूदियां ताहीं कहा, “लखाओ थारा राजा!” 15 पर उन्नै किलकी मारी, “ले जा ! ले जा ! उसताहीं क्रूस पै चढ़ा।” पिलातुस नै उनते कहा, “के मै थारे राजा नै क्रूस पै चढ़ाऊँ?” प्रधान याजकां नै जबाब दिया, “कैसर नै छोड़ म्हारा और कोए राजा कोनी।” 16 फेर उसनै उसताहीं उनकै हाथ सोंप्या ताके ओ क्रूस पै चढ़ाया जावै।

### क्रूस पै चढ़ाया जाणा

17 फेर वे यीशु नै ले गए, अर ओ आपणा क्रूस ठाए होए उस जगहां ताहीं बाहरण गया, जो ‘खोपड़ी की जगहां’ कुहावै सै अर इब्रानी म्ह ‘गुल्युता’। 18 उडै उन्नै उसताहीं अर उसकै गेल्या और दो माणसां ताहीं क्रूस पै चढ़ाया, एक नै इसकानै अर एक नै उसकानै, अर बिचाळै यीशु ताहीं। 19 पिलातुस नै एक खोट-चिड्डी लिखकै क्रूस पै लगा दी, अर उसपै लिख्या होया था, “यीशु नासरी, यहूदियों का राजा।” 20 या खोट-चिड्डी घणखरे यहूदियां नै पढ़ी, क्यूँके वा जगहां जडै यीशु क्रूस पै चढ़ाया गया था कस्बे कै धोरै थी; अर चिड्डी इब्रानी अर लतीनी अर यूनानी म्ह लिक्खी होई थी। 21 फेर यहूदियां के प्रधान याजकां नै पिलातुस तै कहा, “यहूदियां का राजा” मतना लिखै पर यो के ‘उसनै कहा, मै यहूदियां का राजा सूँ।’ 22 पिलातुस नै जबाब दिया, “मन्त्रै जो लिखणा था, लिख दिया।”

23 जिब्व सिपाही नै यीशु ताहीं क्रूस पै चढ़ा दिया, तो उसके लत्ते लेकै चार ठोड़ बांड लिए, हरेक सिपाही खातर एक हिस्सा, अर कुरता भी लिया, पर कुरता बिन सीअन ऊपर तै तळै ताहीं सिम्या होया था। 24 इसकरकै उन्नै आपस म्ह कहा, “हम इसताहीं पाड़ा नीं, पर इसपै लाटरी-चिड्डी गेरकै के यो किसका होवैगा।” न्यू इसकरकै होया के पवित्र ग्रन्थ म्ह जो लिख्या होया ओ पूरा हो, “उन्नै मेरे लत्ते आपस म्ह बांड लिए अर मेरे लत्ते पै लाटरी-चिड्डी गेरी।” 25 आखर म्ह फौजियां नै इसाए करया। यीशु कै क्रूस कै धोरै उसकी माँ, अर उसकी माँ की बेबे, क्लोपास की बहु मरियम, अर मरियम मगदलीनी खड़ी थीं। 26 जिब्व यीशु नै आपणी माँ, अर उस चेल्ले ताहीं जिसतै ओ प्यार राखै था, धोरै खड़े देख्या तो आपणी माँ तै कहा, “हे नारी, लखा, यो तेरा बेड़ा सै।” 27 फेर उस चेल्ले तै कहा, “या तेरी माँ सै।” अर उससे टेम ओ चेल्ला उसताहीं आपणे घरा लेग्या।

### यीशु की मौत

28 इसकै पाच्छै यीशु नै बेरा लागया के इब सारा कीमे पूरा हो लिया, ज्यातै के पवित्र ग्रन्थ म्ह जो कहा गया ओ पूरा हो, कहा, “मै तिसाया सूँ।” 29 उडै सिरकै तै भरया होड़ एक बास्सन धरया था, आखर म्ह उन्नै सिरकै म्ह भे कै स्याही चूस ताहीं जुफे पै धर के उसकै मुँह तै ल्याया। 30 जिब्व यीशु नै ओ सिरका लिया, तो कहा, “पूरा होया”; अर सिर झुकाकै जी दे दिया।

### भाले तै बेधा जाणा

31 ज्यांतें के ओ त्यारी का दिन था, यहूदियां नै पिलातुस तै बिनती करी के उनकी टाँग तोड़ दी जावै अर वे उतारे जावै, ताके सब्द के दिन वे क्रूस पै ना रहवै, क्यूँके ओ सब्द का दिन बड्डा दिन था। 32 आखर म्ह फौजियां नै आके उन माणसां म्ह तै पहल्लै की टाँग तोड़ी फेर दुसरे की भी, जो उसके गेल्या क्रूस पै चढ़ाए गए थे; 33 पर जिब्व यीशु के धोरै आके देख्या के ओ मर लिया सै, तो उसकी टाँग कोनी तोड़ी। 34 पर सिपाहीयां म्ह तै एक बरछी तै उसका पंजर चिर दिया, अर उसम्ह तै जिबे लहू अर पाणी लिकड्या। 35 जिसनै यो देख्या, उसनै गवाही दी सै, अर उसकी गवाही साच्ची सै; अर उन्नै बेरा सै के ओ साच्ची कह सै के थम भी बिश्वास करो। 36 ये बात ज्यांतें होई के पवित्र ग्रन्थ म्ह जो कह्या गया ओ पूरा हो, “उसकी कोई हाड्डी कोनी तोड़ी जावैगी।” 37 फेर एक और जगहां पै न्यू लिख्या सै, “जिस ताहीं उन्नै चिरया सै, उस पै वे देखवैंगे।”

### यीशु का गाड्या जाणा

38 इन बात्तां पाच्छै अरिमतिया के युसुफ नै जो यीशु का चेला था, पर यहूदियां के डर के मारे इस बात नै लकोए राखै था, पिलातुस तै बिनती करी, के ओ यीशु की लाश ले जा सकै सै। पिलातुस नै उसकी बिनती सुणी, अर ओ आके उसकी लाश लेग्या। 39 निकुदेमुस भी, जो पहेल्ले यीशु के धोरै रात नै गया था, पचास सेर के करीबन रखा होइ गन्धरस अर एलवा लीयाया। 40 फेर उन्नै यीशु की लाश ली, अर यहूदिया के गाड्डण के रिवाज के मुताबिक उस ताहीं खसबुदार द्रव्य के गेल्या कफन म्ह लपेटया। 41 उस जगहां पै जडै यीशु क्रूस पै चढ़ाया गया था, एक फुल्लां की क्यारी थी, अर उस फुल्लां की क्यारी म्ह एक नई कब्र थी जिसम्ह कदे कोए कोनी धरया था। 42 ज्यांतें यहूदिया की त्यारी के दिन के बाबत उन्नै यीशु ताहीं उससे म्ह धरया, क्यूँके वा कब्र लोवै थी।

### खाली कब्र

20 हफ्तै के पहल्ले दिन मरियम मगदलीनी तडकए नै अन्धरै रहंदे ए कब्र पै गई, अर पत्थर नै कब्र पै तै हटया होइ देख्या। 2 फेर वा भाज्जी अर शमौन पतरस अर उस दुसरे चेले के धोरै जिसतै यीशु प्यार राखै था, आके कह्या, “वे प्रभु नै कब्र म्ह तै काड ले गे सै, अर हमनै नीं बेरा के उसताहीं कित धर दिया सै।” 3 फेर पतरस अर ओ दूसरा चेला लिकड के कब्र के कात्री चाल्ले। 4 वे दोनु गेल-गेल भाजरे थे, पर दूसरा चेला पतरस तै आगै बढ़के कब्र पै पहल्या पहोच्या; 5 अर कोडडे होके लत्ते पडे देखे, फेरभी वे भीत्तर कोनी गया। 6 फेर शमौन पतरस उसके पाच्छै-पाच्छै पहोच्या, अर कब्र के भीत्तर गया अर लत्ते पडे देखे; 7 अर ओ अंगोछा जो उसके सिर पै बन्धा होइ था, लत्या के गेल्या कोनी पड्या था, पर न्यारा एक ठोड लपेट के धरया होया देख्या। 8 फेर दूसरा चेला भी जो कब्र पै पहल्या पहोच्या था, भीत्तर गया अर देखके बिश्वास करया। 9 वे तो इब ताहीं पवित्र ग्रन्थ की वा बात कोनी समझे थे के उसनै मरे होया म्ह तै जी उठना होगा। 10 फेर चेले आपणे घरा बोहडगे।

### मरियम मगदलीनी पै प्रगट होणा

11 पर मरियम रोंदी होई कब्र के धोरै ए बहरण खड़ी रही, अर रोंदे-रोंदे कब्र के कात्री कोड्डी होके, 12 दो सुर्गदुत्तां ताहीं धोळे-चमकदे लत्ते पहरे होइ एक सिरहाणै अर दूसरै ताहीं पात्यां नै बड्डे देख्या, जडै यीशु की लाश धरी गई थी। 13 उन्नै उसताहीं कह्या, “हे नारी, तू क्यातै रोवै सै?” उसनै उनताहीं कह्या, “वे मेरै प्रभु नै ठा लगे अर मन्नै कोनी बेरा के उसनै कित धर राख्या सै।” 14 न्यू कहके वा पाच्छै मुडी अर यीशु ताहीं खडे देख्या, पर पिच्छाणया कोनी के यो यीशु सै। 15 यीशु नै उसतै कह्या, “हे नारी, तू क्यातै रोवै सै? किसनै टोहवै सै?” उसनै माळी समझ के उसताहीं कह्या, “हे महाराज, जै तन्नै उसताहीं ठा लिया सै तो मन्नै बता के उस ताहीं कित धर राख्या सै, अर मै उसनै ले जाऊँगी।” 16 यीशु नै उसताहीं कह्या, “मरियम!” उसनै बोहड के

उसताहीं इब्रानी म्ह कह्या, “रब्बुनी!” यानिके ‘हे गुरु’। 17 यीशु नै उसताहीं कह्या, “मन्नै छूवै मतना, क्यूँके मै इब ताहीं बाप के धोरै ऊप्पर कोनी गया, पर मेरे भाईयां के धोरै जाके उनतै कह दे, के मै अपणे पिता अर थारे पिता, अर अपणे पणमेशर अर थारे पणमेशर के धोरै ऊप्पर जाके आऊँ सूँ।” 18 मरियम मगदलीनी नै जाके चेल्यां ताहीं बताया, “मन्नै प्रभु ताहीं देख्या, अर उसनै मेरै तै यें बात कहीं।”

### चेल्यां पै प्रगट होणा

19 उससे दिन जो हफ्तै का पहल्ले दिन था, साँझ के टेम जिब्व उडै के किवाड जडै चेले थे, यहूदिया के डर के मारे मूंदे होइ थे, फेर यीशु आया अर उनके बिचाळै खड्या होके उनतै कह्या, “थमनै शान्ति मिलौ।” 20 अर न्यू कहके उसनै आपणा हाथ अर आपणा पंजर उनतै दिखाए। फेर चेले यीशु नै देखके राज्जी होए। 21 यीशु नै फेर उनतै कह्या, “थमनै शान्ति मिलै: जिस तरियां बाप नै मेरताहीं खन्दाया सै, उससे तरियां ए मै थमनै खन्दाऊँगा।” 22 न्यू कहके उसनै उन पै फूँक मारी अर उसनै कह्या, “पवित्र आत्मा ल्यो। 23 जिनके पाप थम माफ करो, वे उनके खातर माफ करे गए सैं; जिनके थम राखो, वे राखे गए सैं।”

### थोमा पै प्रगट होणा

24 पर बारहा म्ह तै एक, यानिके थोमा जो दिद्युस कुहावै सै, जिब्व यीशु आया तो उनके गेल्या कोनी था। 25 जिब्व दुसरे चेले उसतै कहण लागे, “हम नै प्रभु ताहीं देख्या सै,” फेर उसनै उनतै कह्या, “जिब्वताहीं मै उसके हाथां म्ह किल्लां के घट्टे नीं देख ल्युँ, अर किल्लां के घट्टयां म्ह आपणी आंगळी नै घाल ल्युँ, अर उसके पंजर म्ह आपणा हाथ ना घाल ल्युँ, जद ताहीं बिश्वास कोनी करूँगा।”

26 आठ दिन के पाच्छै उसके चेले फेर घर के भीत्तर थे, अर थोमा उनके गेल्या था; अर किवाड मूंद राखे थे, फेर यीशु आया अर उनके बिचाळै खड्या होके कह्या, “थमनै शान्ति मिलौ।” 27 फेर उसनै थोमा तै कह्या, “आपणी आंगळी याडै ल्याके मेरै हाथां नै देख अर आपणा हाथ ल्याके मेरै पंजर म्ह घाल, अर अविश्वासी नीं पर बिश्वासी बणा।” 28 न्यू सुणके थोमा नै जबाब दिया, “हे मेरे प्रभु, हे मेरे पणमेशर!” 29 यीशु नै उसतै कह्या, “तन्नै मेरै ताहीं देख्या सै, के ज्यातै बिश्वास करया सै? धन्य वे सैं जिन्नै बिन देखे बिश्वास करया।”

### इस किताब का मकसद

30 यीशु नै और भी घणखरे कारनाम्मे चेल्या के आगै दिखाए, जो इस किताब म्ह कोनी लिखे गए; 31 पर ये ज्यांतें लिखे गए सैं के थम बिश्वास करो के यीशु ए पणमेशर का बेटा मसीह सै, अर बिश्वास करके उसके नाम म्ह जिन्दगी पाओ।

### तिबिरियास झील के कंठारै चेल्यां पै प्रगट होणा

21 इन बात्तां के पाच्छे यीशु नै खुद ताहीं तिबिरियास झील के कंठारै चेल्यां पै प्रगट करया, अर इस ढाळ प्रगट करया : 2 शमौन पतरस, अर थोमा जो दिद्युस कुहावै सै, अर गलील के काना नगर का नतनएल, अर जब्दी के बेटे, अर उसके चेल्यां म्ह तै दो और जणे कट्टे थे। 3 शमौन पतरस नै उनताहीं कह्या, “मै मच्छी पकडण नै जाऊँ सूँ।” उन्नै उसतै कह्या, “हम भी तेरै गेल्या चाल्लां सां।” आखर उस रात नै कीमे कोनी पकड्या।

4 तडका होंदे-ए यीशु कंठारै पै आ खड्या होया; फेरभी चेल्यां नै कोनी पिच्छाणा के यो यीशु सै। 5 फेर यीशु नै उन ताहीं कह्या, “हे बाळको, के थारै धोरै कीमे खाण नै सै?” उन्नै जबाब दिया, “कोनी।” 6 उसनै उनताहीं कह्या, “किस्ती के सोळै कात्री जाळ गेरो फेर पाओगे।” आखर उन्नै जाळ गेरया, अर इब घणी मच्छीयां के बाबत जाळ उनपै खिच्यो कोनी। 7 फेर उस चेल्यां नै जिसतै यीशु प्यार करै था, पतरस तै कह्या, “यो तो प्रभु सै।” शमौन नै न्यू सुणके के ओ प्रभु सै, कड म्ह अंगोछा कस लिया, क्यूँके ओ ऊघाडा था, अर झील म्ह छाल मार दी। 8 पर दुसरे चेले डोंगी पै मच्छी तै भरया होइ

जाळ खिंचदे होए आए, क्युंके वे कंठारै तै घणी दूर कोनी, पर कोए दो सौ हाथ पै थै।

9 जिब्ब वे कंठारै पै उतरे, तो उन्नै कोयले की आग अर उस पै मच्छीं धरी होई, अर रोटी देखी। 10 यीशु नै उनतै कह्या, “जो मच्छी थमनै इबे पकडी सै, उनम्ह तै कीमे ल्याओ।” 11 फेर शमौन पतरस नै डोंगी पै चढकै एक सौ तिरपन बड्डी मच्छीयां तै भरया होड जाळ कंठारै पै खिंच्या, अर इतनी मच्छी होंदे होए भी जाळ कोनी पाट्या। 12 यीशु नै उनतै कह्या, “आओ, खाणा खाओ।” चेल्यां म्ह तै किसे का ढेठ कोनी होया के उसतै बुझ्झै, “तू कौण सै?” क्युंके उन्नै बेरा था के हो ना हो यो प्रभु ए सै। 13 यीशु आया अर रोटी लेकै उनताहीं दी, अर उससे ढाळ मच्छीं भी। 14 यो तीसरी बै सै के यीशु मरे होया म्ह तै जिन्दा उठणै कै पाचछै चेल्यां नै दिखाई दिया।

### यीशु अर पतरस

15 खाणा खाणै कै पाचछै यीशु नै शमौन पतरस तै कह्या, “हे शमौन, युहन्ना के बेट्टे, के तू इन तै बाध मेरतै प्रेम करै सै?” उसनै उसतै कह्या, “हम्बै प्रभु; तन्नै तो बेरा सै के मै तेरै तै प्रीति राखु सू।” उसनै उसतै कह्या, “मेरे मेम्नां नै चरा।” 16 उसनै दूसरी बर उसतै कह्या, “हे शमौन, युहन्ना के बेट्टे, के तू मेरै तै प्रेम राखै सै?” उसनै उसतै कह्या, “हम्बै प्रभु; तन्नै तो बेरा सै के मै तेरै तै प्रीति राखु सू।” उसनै उसतै कह्या, “मेरी भेड्डां की रूखाळी कर।” 17 उसनै तीसरी बर उसताहीं कह्या, “हे शमौन, युहन्ना के बेट्टे, के तू मेरतै प्रीति राखै सै?” पतरस कांल होया के उसनै उसतै तीसरी बर इसा कह्या, “हे शमौन, युहन्ना के बेट्टे, के तू मेरतै प्रीति राखै सै?” अर उसतै कह्या, “हे प्रभु, तन्नै तो सारा कीमे बेरा सै; तन्नै न्यू बेरा सै के मै तेरै तै प्रीति राखु सू।” यीशु नै उसतै

कह्या, “मेरी भेड्डां नै चरा। 18 मै तेरै तै साच्ची-साच कहुं सू, “जिब्ब तू गाबरू था तो आपणी कड बाँधकै जडै चाहवै था उडै हॉडै था; पर जिब्ब तू बुढा होगा तो आपणे हाथ पसारैगा, अर दूसरा तेरी कड बाँधकै जडै तू ना चाहवैगा उडै तन्नै ले जावैगा।” 19 उसनै इन बाततां तै इशारा करया के पतरस किसी मौत तै पणमेशर की महिमा करैगा। अर फेर उसनै उसतै कह्या, “मेरै पाचछै हो ले।”

### यीशु अर उसका प्रिय चेल्ला

20 पतरस नै बोहडकै उस चेल्ले ताहीं पाचछै आंदे देख्या, जिसतै यीशु प्यार राखै था, अर जिसनै खाणै कै टेम उसकी छात्ती की ओड कोड्डा होकै बुझ्झया था, “हे प्रभु, तेरा पकडवाणआळा कौण सै?” 21 उसताहीं देखकै पतरस नै यीशु तै कह्या, “हे प्रभु, इसका के हाल होगा?” 22 यीशु नै उसतै कह्या, “जै मै चाहुं के ओ मेरै आण ताहीं रुक्या रहवै, तो तन्नै इसतै के? तू मेरै पाचछै हो ले।” 23 ज्यांतै भाईयां म्ह या बात फैलगी के ओ चेल्ला कोनी मरैगा; फेरभी यीशु नै उसतै न्यू कोनी कह्या के ओ कोनी मरैगा, पर यो के, “जै मै चाहुं के ओ मेरै आण ताहीं रुक्या रहवै, तो तन्नै इसतै के?”

### उपसंहार

24 यो ओए चेल्ला सै जो इन बाततां की गवाही देवै सै अर जिसनै इन बाततां ताहीं लिख्या सै, अर हमनै बेरा सै के उसकी गवाही साच्ची सै। 25 और भी घणेए काम सै, जो यीशु नै करे; जै वे एक-एक करकै लिखये जांदे, तो मै समझू सू के किताब जो लिक्खी जांदी वा दुनिया म्ह भी कोनी न्योडै।

## प्रेरितों के काम

### परिचय

1 हे थियुफिलुस, मन्त्रे पहलड़ी किताब उन सारी बात्तां के बाबत लिखीं जो यीशु नै सरुआत करी करदा अर सिखान्दा रहया, 2 उस दिन ताहीं जिबब ताहीं ओ उन प्रेरितां नै जिन ताहीं उसनै छाट्या था पवित्र आत्मा के जरिये हुक्म देके ऊपर ठाया नीं गया। 3 उसनै दुःख ठाण के पाछे घणे पके सबुतां तै अपणे आप नै उन ताहीं जिन्दा दिखाया, अर चालीस दिन ताहीं ओ उन्नै दिखदा रहया, अर पणमेशर के राज्य की बात करदा रहया। 4 अर उनतै फेटके उन ताहीं हुक्म दिया, “यरुशलेम नै ना छोडो, पर बाप की उस प्रतिज्ञा की पुरे होण की बाट देखदे रहो, जिसका जिक्रा थम मेरै तै सुण चुके सो। 5 क्यूके युहन्ना नै तो पाणी तै बपतिस्मा दिया सै पर माडे-से दिनां पाछे थम पवित्र आत्मा तै बपतिस्मा पाओगे।”

### यीशु का सुर्ग म्ह जाणा

6 आखर उन्नै कहे होके उसतै बुझया, “हे प्रभु, के तू इस्से टेम इस्राएल ताहीं राज्य दुवा देगा?” 7 उसनै उनतै कह्या, “उन टेम्मां या कालां ताहीं जाणना, जिन ताहीं बाप नै आपणे अधिकार म्ह कर राख्या सै, थारा काम कोनी। 8 पर जिबब पवित्र आत्मा थारै पै आवैगा फेर थम सामर्थ पाओगे; अर यरुशलेम अर सारे यहूदिया अर सामरिया म्ह, अर धरती के सिरे ताहीं मेरे गवाह होंगे।” 9 न्यू कहेके ओ उनके देखदे-देखदे ऊपर ठा लिया गया, अर बादळ नै उस ताहीं उनकी आँखां तै लको लिया। 10 उसके जान्दे टेम जिबब वे अकास की ओड़ देखे थे, तो देखो, दो माणस धोळे लत्ते पहर ओड़ उनके लोवै आण खड़े होये, 11 अर उनतै कह्या, “हे गलीली माणसो, थम खड़े अकास कात्री क्यांतै लखाओ सो? योए यीशु, जो थारै धोरै तै सुर्ग पै ठा लिया गया सै, जिस तरियां तै थमनै उस ताहीं सुर्ग नै जांदे देख्या उस्से तरियां तै ओ दुबारा आवैगा।”

### मत्तियाह ताहीं यहूदा का ओद्दा मिलणा

12 जिबब वे जैतून नामक पहाड़ तै जो यरुशलेम के लोवै एक सब्त के दिन की दूरी पै सै, यरुशलेम नै बोहड़े। 13 जिबब वे ओड़ै पहाचे तो उस चुबारे पै गये, जित पतरस अर युहन्ना अर याकूब अर अद्रियास अर फिलिप्पुस अर थोमा अर बरतुलमै अर मती अर हलफई का बेडा याकूब अर शमौन, जेलोतेस अर याकूब का बेडा यहूदा रहवै थे। 14 ये सारे कई लुगाईयां अर यीशु की माँ मरियम अर उसके भाईयां के गेल्या एक मन होके प्रार्थना म्ह लागे रहे।

15 उन्ने दिनां म्ह पतरस भाईयां का बिच्चाळे म्ह जो एक सौ बीस आदमियां के करीबन थे, खड़या होके कहण लाग्या, 16 हे भाइयो, जरूरी था के पवित्र ग्रन्थ का ओ लिख्या पूरा हो जो पवित्र आत्मा नै दाऊद के मुँह तै यहूदा के बाबत, जो यीशु के पकड़वाण आळ्यां का अगुवा था, पहल्या ए तै कहया था। 17 क्यूके ओ तो म्हारै म्ह गिणया गया, अर इस सेविकाई म्ह साइझी होया। 18 (उसनै पाप की कमाई तै एक खेत मोल लिया, अर सिर के बळ गिरया अर उसका पेट पाट्या अर उसकी सारी आन्द्ड़ी लिकड़गी। 19 इस बात ताहीं यरुशलेम के सारे रहणीये जाणगे, उरै ताहीं के उस खेत का नाम उनकी भाषा म्ह ‘हकलदमा’ यानिके ‘लहू का खेत’ पड़या।) 20 भजन संहिता म्ह लिख्या सै, ‘उसका घर उजड़ जावै, अर उसम्ह कोए नीं बसै,’ अर ‘उसका ओद्दा कोए और ले लवै।’

21 इसकरके जितनै दिन ताहीं प्रभु यीशु म्हारै गेल्या आन्दा-जान्दा रहया---यानिके युहन्ना बपतिस्मा तै लेके उसके म्हारै धोरै तै ठाए जाण तक---जो आदमी बराबर म्हारै गेल्या रहे, 22 सई सै के उनम्ह तै एक माणस म्हारै गेल्या उसके जिन्दा होण का गवाह हो जावै।” 23 फेर उन्नै दो जणयां ताहीं खड़या करया, एक यूसुफ जो बर-सबा कुहवावै था, जिसका उपनाम यूसतुम सै, दूसरा मत्तियाह ताहीं, 24 अर या प्रार्थना करी, “हे प्रभु, तू जो सारया के मनां नै जाणै सै, न्यू बता के इन दोनुआ म्ह तै किस नै छाट्या, 25 के ओ इस सेविकाई अर प्रेरिताई का ओद्दा लेवै, जिस नै यहूदा छोड़ के आपणी जंगहा चल्या गया।” 26 फेर उन्नै उनके बाबत पर्चीं गेरी, अर पर्चीं मत्तियाह के नाम लिकड़ी। आखर ओ उन ग्यारहा प्रेरितां के गेल्या गिणया गया।

### पवित्र आत्मा का उतरणा

2 जिबब पिन्तेकुस्त का दिन आया, तो वे सारे एक जंगहा कहे थे। 2 चाणचक अकास तै घणी आँधी किसा हल्का-सा शब्द होया, अर उसतै सारा घर जित वे बैठे थे, गूँज्या। 3 अर उन्नै आग जिसी जीभ पाट्दी होई दिखण लागी अर उनम्ह तै हरेक पै आ उतरी। 4 वे सारे पवित्र आत्मा तै भरोगे, अर जिस ढाळ पवित्र आत्मा नै उन ताहीं बोलण की सामर्थ दी, वे न्यारी-न्यारी भाषा बोलण लागे।

5 अकास के तळै की हरेक जात म्ह तै भगत यहूदी यरुशलेम म्ह रै रे थे। 6 जिबब यो शब्द होया तो भीड़ लागी अर आदमी घबरागे, क्यूके हरेक नै योए सुणायी देवै था के वे मेरीए भाषा म्ह बोलण लागे सै। 7 वे सारे हैरान अर अचम्भा करके कहण लागे, “देखो, जो वे बोलण लागे सै के सारे गलीली कोनी? 8 तो फेर क्यांतै म्हारै म्ह तै हरेक आपणी-आपणी जन्म-भूमि की भाषा सुणै सै? 9 हम जो पारथी अर मेदी अर एलामी अर मेसोपोटामिया अर यहूदिया अर कप्टुकिया अर पुन्तुस अर आसिया, 10 अर फ्रुगिया अर पंफुलिया अर मिस्र अर लीबिया देश जो कुरेन के लोवै-धोरै सै, इन सारे देशां के रहण आळे अर रोमी प्रवासी, 11 यानिके यहूदी अर यहूदी मत धारण करण आळे, क्रेतो अर अरबी भी सै, पर आपणी-आपणी भाषा म्ह उनतै पणमेशर के बड़े-बड़े काम्यां का जिक्रा सुणै सै।” 12 अर वे सारे हैरान होए अर घबराके एक-दुसरै तै कहण लागे, “यो के होण लागरया सै? 13 पर औरां नै मखौल करके कह्या, “वे तो नयी दारु के नशै म्ह चूर सै।”

### पतरस का भाषण

14 जिबब पतरस उन ग्यारहा के गेल्या खड़या होया, अर ठाडू आवाज म्ह बोल्या, “हे यहूदियों अर हे यरुशलेम के सारे रहणीयो, न्यू जाण ल्यो, अर कान लाके मेरी बात सुणो। 15 जिसा थम समझ रे सो, ये आदमी नशे म्ह सै, न्यू कोनी सै, क्यूके इब्बे दिन लिकड़याए सै। 16 पर या वा बात सै योएल नब्बी के जरिये कही गई थी :

17 पणमेशर कहवै सै, के अन्त के दिनां म्ह इसा होवैगा के मै आपणा आत्मा सारे माणसां पै ढाळूँगाँ, अर थारे बेटे अर थारी बेट्टी भविष्यवाणी करैगीं, अर थारे गाबरु दर्शन देखैंगे, अर थारे पुरनिए सपना देखैंगे। 18 बल्के मै आपणे दासां अर दासियां पै भी, उन दिनां म्ह आपणी आत्मा म्ह तै ढाळूँगाँ, अर वे भविष्यवाणी करैंगे। 19 अर मै ऊपर अकास म्ह अनोकखे काम अर तळै धरती पै निशान, यानिके लहू अर आग अर धुम्मे का बादळ दिखाऊँगा। 20 प्रभु के महान अर तेजस्वी दिन के आण तै पहल्या सूरज



अंधेरा अर चाँद लहू-सा हो जावैगा | 21 अर जो कोए प्रभु का नाम लेवैगा, उसका उद्धार होवैगा |

22 "हे इस्राएलियों, इन बात्तां नै सुणो : यीशु नासरी एक माणस था जिसका पणमेशर की ओड़ होण का सबूत उन सामर्थ के काम्मां अर हैरानी के काम्मां अर निशानां तै प्रगट सै, जो पणमेशर नै थारै बिचाळै उसके जरिये कर दिखाए जिसके बारे म्ह थमनै खुदे बेरा सै | 23 उस्से यीशु ताहीं, जो पणमेशर की ठहराई होई योजना अर पूर्व ज्ञान के मुताबिक पकड़वाया गया, थमनै अधर्मियां के हाथां तै क्रूस पै चढ़ाके मार दिया | 24 पर उस्से ताहीं पणमेशर नै मौत के बन्धनां तै छुड़ाके जिन्दा करया, क्यूँके यो अनहोणा था के ओ उसके बस म्ह रहन्दा | 25 क्यूँके दाऊद उसके बारे म्ह कहवै सै, 'मै प्रभु नै सारी हाण आपणे श्यामी देख्दा रहया क्यूँके ओ मेरी सोळी ओड़ सै, ताके मै डिग नीं जाऊँ | 26 इस्से कारण मेरा मन आनन्दित होया, अर मेरी जीभ मग्न होई; बल्के मेरी देही भी आस म्ह बणी रहैगी | 27 क्यूँके तू मेरै प्राणां नै अधोलोक म्ह कोनी छोड़ैगा; अर ना आपणे पवित्र माणस नै सड़न ए देवैगा | 28 तन्नै मेरै ताहीं जीण का राह बताया सै; तू मन्नै दर्शन के जरिये आनन्द तै भर देवैगा |'

29 "हे भाईयो, मै कुलपति दाऊद के बारे म्ह थारै तै हिम्मत करके कहुँ सू के ओ तो मरया अर गाड्या भी गया अर उसकी कब्र आज ताहीं म्हारै उरै न्यू-की-न्यू सै | 30 ओ नब्बी था अर उसनै बेरा था के पणमेशर नै मेरै तै सूँह खाई सै के मै तेरी पीढ़ी म्ह तै एक माणस नै तेरै सिहांसन पै बिठाऊँगा; 31 उसनै होण आळी बात ताहीं पहल्या ए तै देख के मसीह के जिन्दा उठण के बारे म्ह भविष्यवाणी करी के ना तो उसका प्राण अधोलोक म्ह छोड्या गया अर ना उसकी देही सड़न पाई | 32 इस्से यीशु ताहीं पणमेशर नै जिन्दा करया, जिसके हम सारे गवाह सां | 33 इस तरियां पणमेशर के सोळे हाथ तै सबतै उँचा ओद्दा पाके, अर बाप तै ओ पवित्र आत्मा पाके जिसका प्रण लिया गया था, उसनै यो ढाळ दिया सै जो थम देखो अर सुणो सो | 34 क्यूँके दाऊद तो सुर्ग पै कोनी चढ्या; पर ओ खुद कहवै सै, 'प्रभु नै मेरे प्रभु तै कहया, मेरै सोळी ओड़ नै बैठ, 35 जिब्व ताहीं के मै तेरे बैरियां नै तेरे पायां तळै की चोकी नीं कर हूँ |' 36 आखर इस्राएल का सारा खानदान पक्की तरियां तै जाण लेवै के पणमेशर नै उस्से यीशु ताहीं जिस ताहीं थमनै क्रूस पै चढ़ाया, प्रभु भी ठहराया अर मसीह भी |"

37 फेर सुणण आळ्यां के दिल छिदगे, अर वे पतरस अर बाकी प्रेरितां तै बुझण लागे, "हे भाईयो, हम के करां?" 38 पतरस नै उनतै कहा, "मन फिराओ, अर थारै म्ह तै हरेक आपणे-आपणे पापां की माफी के खातर यीशु मसीह के नाम तै बपतिस्मा लेवै; जिब्व थम पवित्र आत्मा का दान पाओगे | 39 क्यूँके या प्रतिज्ञा थम, अर थारी ऊलादां, अर उन सारे दूर-दूर के आदमियां खातर भी सै जिन ताहीं प्रभु म्हारा पणमेशर आपणे धोरै बुलावैगा |" 40 उसनै भतेरी और बात्तां तै भी गवाही दे-देके समझाया के आपणे आप नै इस टेढ़ी जात तै बचाओ | 41 आखर जिन्नै उसका बचन अपणया उन्नै बपतिस्मा लिया, अर उस्से दिन तीन हजार माणसां के करीबन उनम्ह मिलगे | 42 अर वे प्रेरितां तै शिक्षा लेन्दे, अर संगति राखदे, अर रोटी तोड़ने, अर प्रार्थना करण म्ह मग्न रहे |

### बिश्वासियाँ की संगति

43 अर सारे आदमी डरगे, अर घणे अनोखे काम अर निशान प्रेरितां के जरिये प्रगट होवै थे | 44 अर सारे बिश्वास करणीये कड़े रहवै थे, अर उनकी सारी चीज साझे म्ह थीं | 45 वे आपणी-आपणी जायदाद अर सामान बेच-बेचके जिसकी जरूरत होवै थी बांड दिया करै थे | 46 वे हरेक दिन एक मन होके मन्दर म्ह कड़े होवै थे, घर-घर रोटी तोड़दे होए आनन्द अर मन की सीधई तै खाणा खावै थे, 47 अर पणमेशर की जय-जयकार करै थे, अर सारे माणस उनतै राजी थे : जो उद्धार पावै थे, उन ताहीं प्रभु हरेक दिन उनम्ह मिला देवै था |

### लंगडै भिखारी का चंगा होणा

3 पतरस अर युहन्ना तीसरै पहर प्रार्थना के टेम मन्दर म्ह जाण लागे थे | 2 अर माणस एक जन्म तै लंगडे नै ल्यावै थे, जिस ताहीं वे हरेक दिन मन्दर के बाहरण पै जो 'सुन्दर' कुहवावै सै, बिठा देवै थे के ओ मन्दर म्ह जाण आळ्यां तै भीख माँगे | 3 जिब्व उसनै पतरस अर युहन्ना ताहीं मन्दर म्ह जान्दे देख्या, तो उनतै भीख माँगे | 4 पतरस नै युहन्ना के गेल्या उसकी ओड़ गौर तै देखके कहा, "म्हारी ओड़ लखा!" 5 आखर ओ उनतै कीमे पाण की आस राखदे होये उनकी ओड़ ताकण लागे |

6 फेर पतरस नै कहा, "चाँदी अर सोना तो मेरै धोरै सै नीं, पर जो मेरै धोरै सै ओ तन्नै हूँ सू; यीशु नासरी के नाम तै चाल-फिर |" 7 अर उसनै उसका सोळा हाथ पकड़ के उस ताहीं ठाया; अर जिब्व उसके पायां अर टाखणयां म्ह हिम्मत आग्यी | 8 ओ उछळके खड्या होग्या अर चालण-फिरण लाग्या; अर चाल्दा, अर कुद्दा, अर पणमेशर की जय-जयकार करदा होया उनके गेल्या मन्दर गया | 9 सारे आदमियां नै उस ताहीं चाल्दे-फिरदे अर पणमेशर की जय-जयकार करदे होये देखके, 10 उस ताहीं पिच्छाण लिया के यो ओए सै जो मन्दर के 'सुन्दर' फाटक पै बैठके भीख माँग्या करै था; अर उस घटना तै जो उसके गेल्या होई थी वे घणे अचम्भित अर हैरान होए |

### मंदर म्ह पतरस का उपदेश

11 जिब्व ओ पतरस अर युहन्ना ताहीं पकड़े होये था, तो सारे माणस घणे हैरान होंदे होये उस ओसारे म्ह जो सुलैमान का कुहवावै सै, उनके धोरै भाजे आये | 12 न्यू देखके पतरस नै माणसां तै कहा, "हे इस्राएलियों, थम इस माणस पै क्यातै हैरान होवो सो, म्हारी ओड़ क्यातै इस ढाळ लखाओ सो के मान्ना हमनै-ए आपणी सामर्थ या भगति तै इस ताहीं चालण-फिरण जोग्या बणा दिया | 13 अब्राहम अर इसहाक अर याकूब के पणमेशर, म्हारे बाप-दाद्यां के पणमेशर नै आपणे सेवक यीशु मसीह की महिमा करी, जिस ताहीं थमनै पकड़वा दिया, अर जिब्व पिलातुस नै उस ताहीं छोड़ देण का बिचार करया, फेर थमनै उसके श्यामी उसका इन्कार करया | 14 थमनै उस धर्मी अर पवित्र का इन्कार करया, अर बिनती करी के एक खूनी ताहीं थारै खातर छोड़ दिया जावै; 15 अर थमनै जीवन के कर्ता ताहीं मार दिया, जिस ताहीं पणमेशर नै मरे होया म्ह तै जिन्दा करया; अर इस बात के हम गवाह सां | 16 अर उस्से के नाम नै, उस बिश्वास के जरिये जो उसके नाम पै सै, इस माणस नै जिस ताहीं थम देखो सो अर जाणो भी सो सामर्थ दी सै | उस्से बिश्वास नै जो उसके जरिये सै, इस ताहीं थम सारया के श्यामी जमा भला-चंगा कर दिया सै |

17 "इब हे भाईयो, मन्नै बेरा सै के थमनै यो काम बेअक्की म्ह करया, अर उसाए थारे सरदारां नै भी करया | 18 पर जिन बात्तां ताहीं पणमेशर नै सारे नब्बियाँ के मुँह तै पहल्या ए तै बता दिया था, के उसका मसीह दुःख ठावैगा, उन ताहीं उसनै इस्से ढाळ पूरा करया | 19 इस करके, मन फिराओ अर बोहड़ आओ के थारे पाप मिटाए जावै, जिसतै प्रभु के श्यामी तै विश्रान्ति के दिन आवै, 20 अर ओ यीशु ताहीं खन्दावै जो थारै खातर पहल्या तै ए मसीह ठहराया गया सै | 21 जरूरी सै के ओ सुर्ग म्ह उस टेम ताहीं रहवै जिब्व ताहीं के ओ सारी बात्तां का सुधार ना कर लेवै जिसका जिक्रा पुराने टेम तै पणमेशर नै आपणे पवित्र नब्बियाँ के मुँहां तै करी सै | 22 जिसा ढाळ के मूसा नै कहा, 'प्रभु पणमेशर थारे भाईयां म्ह तै थारै खातर मेरै जिसा एक नब्बी ठावैगा, जो कीमे ओ थारै तै कहवै उसकी सुणीयो | 23 पर हरेक माणस जो उस नब्बी की नीं सुणै, आदमियां म्ह तै नास करया जावैगा |' 24 अर शमूएल तै लेके उसके पाछे आळ्यां ताहीं जितने नब्बी बोले उन सारया नै इन दिनां का सन्देशा दिया सै | 25 थम नब्बियाँ की ऊलाद अर उस वाचा के हिस्सेदार सो, जो पणमेशर नै थारै बाप-दाद्यां तै बाँधी, जिब्व उसनै अब्राहम तै कहा, 'तेरी पीढ़ी के जरिये धरती के सारे खानदान आशीष पावैगें |' 26 पणमेशर नै आपणे सेवक ताहीं ठाके पहल्या थारै धोरै खन्दाया, के थारै म्ह तै हरेक ताहीं उसकी बुराइयां तै पलटाके आशीष देवै |'

### महासभा के श्यामी पतरस अर युहन्ना

4 जिब्व वे आदमियां तै न्यु कहण लागरे थे, तो याजक अर मन्दर के सरदार अर सदुकी उन पै चढ आये। 2 क्यूँके वे घणे खुन्दक म्ह थे के वे आदमियां ताहीं सिखावै थे अर यीशु का उदाहरण दे-देकै मरे होया का जिन्दा उठण का प्रचार करै थे। 3 उन्नै उन ताहीं पकड़कै दुसरे दिन तक हवालात म्ह राख्या क्यूँके साँझ होगी थी। 4 पर बचन के सुणन आळ्यां म्ह तै घणा ए नै बिश्वास करया, अर उनकी गिणती पाँच हजार माणसां कै करीबन होगी थी।

5 दुसरे दिन इसा होया के उनके सरदार अर पुरनिये अर शास्त्री 6 अर महायाजक हन्ना अर कैफा अर युहन्ना अर सिकन्दर अर जितने महायाजक के कुणबै के थे, सारे यरुशलेम म्ह कड़े होये। 7 वे उन ताहीं बिचाळै खड़या करके बुझण लागे के थमनै यो काम किसकै सामर्थ तै अर किसकै नाम तै करया सै। 8 फेर पतरस नै पवित्र आत्मा तै भरकै उनतै कह्या, 9 “हे आदमियां के सरदारो अर पुरनियो, इस कमजोर माणस गेल्या जो भलाई करी गयी सै, जै आज म्हारै तै उसकै बारै म्ह पूछताछ करी जावै सै, के ओ किस ढाळ चंगा होया। 10 तो थम सारे अर सारे इस्राएली आदमी जाण लैवै के यीशु मसीह नासरी के नाम तै जिस ताहीं थमनै क्रूस पै चढाया, अर पणमेशर नै मरे होया म्ह तै जिन्दा करया, यो माणस थारै स्याम्ही भला चंगा खड़या सै। 11 यो ओए पत्थर सै जिस ताहीं थम राज मिस्त्रियों नै तुच्छ जाणया अर ओ सिरै का पत्थर होगया। 12 किसे दुसरे के जरिये उद्धार कोनी; क्यूँके सुर्य के तळै माणसां म्ह और कोए दूसरा नाम कोनी दिया गया, जिसकै जरिये हम उद्धार पा सकां।”

13 जिब्व उन्नै पतरस अर युहन्ना की हिम्मत देखी, अर न्यु बेरा लाग्या के ये अणपढ अर साधारण से माणस सै, तो अचम्भा करया, फेर उन ताहीं पिच्छाणया के ये यीशु कै गेल्या रहे सै। 14 उस माणस ताहीं जो चंगा होया था, उनकै गेल्या खड़े देखकै, वे बिरोध म्ह कीमे नीं कह सके। 15 पर उन ताहीं पंचायत तै बाहर जाण का हुक्म देकै, वे आपस म्ह बिचार करण लागे, 16 “हम इन माणसां कै गेल्या के करा? क्यूँके यरुशलेम के सारे रहणीया नै बेरा पाटरया सै, के इनकै जरिये एक मसूर कारनाम्मा दिखाया गया सै; अर हम उसकै बारै म्ह नाट नीं सकदे। 17 पर ज्यांतै के ये बात आदमियां म्ह और घणी फैल नीं जावै, हम उन ताहीं धमकावां, के वे इस नाम तै फेर किसे माणस तै बात नीं करै।” 18 फेर उन ताहीं बुलाया अर चेतावनी देकै न्यु कह्या, “यीशु कै नाम तै किम्मे नीं बोलणा अर ना सिखाणा।” 19 पर पतरस अर युहन्ना नै उन ताहीं जबाब दिया, “थम ए न्याय करो; के यो पणमेशर कै धोरै भला सै के हम पणमेशर की बात तै बढकै थारी बात मान्नां। 20 क्यूँके यो तो म्हारै तै नीं हो सकदा के जो हमनै देख्या अर सुणया सै, ओ नीं कहवां।” 21 फेर उन्नै उन ताहीं और धमकाकै छोड़ दिया, क्यूँके आदमियां के कारण उन ताहीं सजा देण का कोए मौक्का नीं मिल्या, इस करके के जो घटना होई थी उसकै कारण सारे आदमी पणमेशर की बड़ाई करै थे। 22 ओ माणस, जिस पै यो चंगा करण का निशान दिखाया गया था, चालीस बरस तै घणी उम्र का था।

### बिश्वासियाँ की प्रार्थना

23 वे छुटकै आपणे याड़ियाँ कै धोरै आए, अर जो कीमे प्रधान याजकां अर पुरनियां नै उन तै कहया था, उन ताहीं सुणया दिया। 24 न्यु सुणकै उन्नै एक मन होके ठाडु आवाज तै पणमेशर तै कह्या, “हे मालिक, तू ओए सै जिसनै सुर्य अर धरती अर समुन्दर अर जो कीमे उनम्ह सै बणाया। 25 तन्नै पवित्र आत्मा के जरिये आपणे सेवक म्हारे बाप दाऊद के मुँह तै कह्या, गैर-जात्तां नै रोळा क्यांतै मचाया? अर देश-देश के आदमियां नै क्यांतै बेकार म्ह बात सोची? 26 प्रभु अर उसके मसीह के बिरोध म्ह धरती के राजा खड़े होए, अर हाकिम एक-सेत्ती कड़े होये।”

27 क्यूँके साच्च ए तैरे सेवक यीशु कै बिरोध म्ह, जिसका तन्नै अभिषेक करया, हेरोदेस अर पुन्तियुस पिलातुस भी गैर-जात्तां अर इस्राएलियां कै गेल्या इस नगर म्ह कड़े होए, 28 के जो कीमे पहल्या तै तेरी सामर्थ अर बुद्धि

तै ठहरा था ओए करै। 29 इब हे प्रभु, उनकी धमकियां नै देख; अर आपणे दासां ताहीं यो बरदान दे के तेरा बचन बड़ी हिम्मत तै सुणावै। 30 चंगा करण कै खातर तू आपणा हाथ बढा के निशान अर अनोक्खे काम तेरे पवित्र सेवक यीशु कै नाम तै करे जावै।” 31 जिब्व उन्नै प्रार्थना कर ली, तो वा जंगहा जित वे कड़े थे कांम्बगी, अर वे सारे पवित्र आत्मा तै भरगे, अर पणमेशर का बचन हिम्मत तै सुणान्दे रहे।

### बिश्वासियाँ का सामूहिक जीवन

32 बिश्वास करण आळ्यां का टोळ एक चित अर एक मन का था, उरै ताहीं के कोए भी आपणी सम्पत्ति आपणी नीं कहवै था, पर सारा कीमे साइझै म्ह था। 33 प्रेरित बड़ी सामर्थ तै प्रभु यीशु के जिन्दा होण की गवाही देन्दे रहे, अर उन सारया पै घणा अनुग्रह था। 34 उनम्ह कोए भी गरीब कोनी था; क्यूँके जिनकै धोरै धरती या घर थे, वे उन्नै बेच-बेचकै, बिकी होई चिज्जां का दाम ल्यावै थे, अर उस ताहीं प्रेरितां के पायां म्ह धरै थे; 35 अर जिसी जिसकी जरूत होवै थी, उसकै मुताबिक हरेक ताहीं बांड दिया करै थे।

36 यूसुफ नाम साइप्रस का एक लेवी था जिसका नाम प्रेरितां नै बरनबास (यानिके शान्ति का बेडा) धरया था। 37 उसकी कीमे धरती थी, जिस ताहीं उसनै बेच्या, अर दाम के रपिये प्रेरितां के पायां म्ह धर दिए।

### हन्याह अर सफीरा

5 हनन्याह नामका एक माणस अर उसकी बीरबान्नी, सफीरा नै कीमे धरती बेची 2 अर उसकै दाम म्ह तै कीमे राख लिया; अर या बात उसकी बीरबान्नी भी जाणै थी, उसका एक हिस्सा ल्याकै प्रेरितां के पायां कै आगे धर दिया। 3 पतरस बोल्या, “हे हनन्याह! शैतान नै तेरै मन म्ह या बात क्यांतै घाली के तू पवित्र आत्मा तै झूठ बोळै, अर धरती के दाम म्ह तै कीमे राख लेवै? 4 जिब्व ताहीं वा तेरै धोरै रही, के तेरी कोनी थी? अर जिब्व बिकगी के तेरै बस म्ह नीं थी? तन्नै या बात आपणे मन म्ह क्यांतै बिचारी? तन्नै माणसां तै नीं, पर पणमेशर तै झूठ बोल्या सै।” 5 या बात सुणदए हनन्याह ढह पड़या अर जी लिकड़या, सारे सुणन आळे घणे डरगे। 6 फेर गाबरूआ नै उठकै उसकी अर्थी बणाई अर बाहरण ले जाकै गाड़ दिया।

7 करीबन तीन घंटया के पाच्छै उसकी बीरबान्नी, जिसनै बेराए कोनी था जो कीमे होया था, भीत्तर आई। 8 फेर पतरस नै उसतै कह्या, “मन्नै बता के थमनै वा धरती इतनै ए म्ह बेची थी?” वा बोली, “हम्बै, इतनै ए म्ह।” 9 पतरस नै उसतै कह्या, “या के बात सै के थम दोनुआं नै प्रभु की आत्मा का हिम्तान लेण कै खातर एक्का करया? लखा, तेरै धणी के गाडुण आळे बाहरण ए खड़े सै, अर तन्नै भी बाहरण ले जावैगे।” 10 फेर वा जिब्वे उसकै पायां म्ह ढह पड़ी, अर जी लिकड़या; अर गाबरूआं नै भीत्तर आकै उस ताहीं मरया पाया, अर बाहरण ले जाकै उसकै धणी गेल्या गाड़ दिया। 11 सारी कलीसिया अर इन बात्तां के सारे सुणनिये घणे डरगे।

### निशान अर अनोक्खे काम

12 प्रेरितां के हाथां तै घणे निशान अर अनोक्खे काम आदमियां कै बिचाळै दिखाए जावै थे, अर वे सारे एक चित्त होके सुलैमान के ओसारे म्ह कड़े होया करै थे। 13 पर औरां म्ह तै किस्से म्ह या हिम्मत कोनी होवै थी के उनम्ह जा मिलै; फेरभी आदमी उनकी बड़ाई करै थे। 14 बिश्वास करण आळे घण-खरे माणस अर लुगाई प्रभु की कलीसिया म्ह घणी संख्या म्ह मिलदे रहे। 15 उरै ताहीं के आदमी बीमारां ताहीं सड़कां पै ल्या-ल्याकै, खाट्ठां अर खटोल्यां पै लिटा देवै थे के जिब्व पतरस आवै, तो उसकी छोल्ली-ए उनम्ह तै किसे पै पड़ जावै। 16 यरुशलेम कै औरै-धोरै के नगरां तै भी घणे माणस बीमारां अर भुंडी औपरी आत्मायां के सताए होया ताहीं ल्या-ल्याकै, कड़े होवै थे, अर सारे चंगे कर दिए जावै थे।

### प्रेरितां की गिरफ्तारी

17 फेर महायाजक अर उसके सारे याडी जो सदुकीया के पंथ के थे, उाह तै भरगे 18 अर प्रेरितां ताहीं पकड़कै जेळ म्ह बन्द कर दिया। 19 पर रात नै

प्रभु के एक सुर्गदूत नै जेळ के किवाड खोलके उन ताहीं बाहरण ल्याके कहा, 20 "जाओ, मन्दर म्ह खड़े होके इस जीवन की सारी बात आदमियां ताहीं सुणाओ।" 21 वे न्यू सुणके सबेरा होंदए मन्दर म्ह जाके उपदेश देण लागे। फेर महायाजक अर उसके याडीयां नै आके बड्डी पंचायत ताहीं इस्राएलियां के सारे पुरनियां ताहीं कड़े करया, अर जेळ म्ह कुहवा खन्दाया के उन ताहीं ल्याओ।

22 पर चमच्यां नै उडै पहोचके उन ताहीं जेळ म्ह कोन्या पाया, अर बोहड़के संदेशां दिया, 23 "हमनै जेळ ताहीं घणी चौकसी तै भेड़ राख्या था, अर पहरेदारां ताहीं बाहरण दरवाज्यां पै खड़े पायां; पर जिबब खोल्या, तो भीत्तर कोए ना मिल्या।" 24 जिबब मन्दर के सरदार अर प्रधान याजकां नै या बात सुणी, तो उनके बाबत घणी फिक्र करी के उनका के होया! 25 इतनै म्ह किसे नै आके उन ताहीं बताया, "देखो, जिन ताहीं थमनै जेळ म्ह बन्द कर राख्या था, वे माणस मन्दर म्ह खड़े होके आदमियां नै उपदेश देण लागरे सैं।" 26 फेर सरदार, चमच्यां के गेल्या जाके, उन ताहीं लीआया, पर हागे तै नीं, क्युँके वे आदमियां तै डरै थे के कदे म्हारै पै पत्थर ना बरसा देवैं।

27 उत्रै उन ताहीं ल्याके बड्डी पंचायत के श्यामी खड़या कर दिया; फेर महायाजक नै उनतै बुझया, 28 "के हमनै थारै ताहीं चिताके हुकम नीं दिया था के थम इस नाम तै उपदेश ना करियो? फेरभी देखो, थमनै सारे यरुशलेम ताहीं आपणे उपदेश तै भर दिया सैं अर उस माणस का लहू म्हारी घेष्टी पै ल्याणा चाहो सो।" 29 फेर पतरस अर दुसरे प्रेरितां नै जबाब दिया, "माणसां के हुकम तै बढ़के पणमेशर के हुकम का पालन करणा ए म्हारा फर्ज सैं। 30 म्हारै बाप-दाद्यां के पणमेशर नै यीशु ताहीं जिन्दा करया, जिस ताहीं थमनै क्रूस पै लटकाके मार दिया था। 31 उस्से ताहीं पणमेशर नै प्रभु अर उद्धारकर्ता ठहराके, आपणे सोळे हाथ पै ऊँचा करया, के ओ इस्राएलियां ताहीं मन पलटाण की ताकत अर पापां की माफी देवैं। 32 हम इन बात्तां के गवाह सां अर उस्से तरियां पवित्र आत्मा भी, जिस ताहीं पणमेशर नै उन ताहीं दिया सैं जो उनका हुकम मान्ने सैं।

33 न्यू सुणके जळगे, अर उन ताहीं मारणा चाहया। 34 पर गमलीएल नामक एक फरीसी नै जो व्यवस्थापक अर सारे आदमियां म्ह आदर-मान राखे था, अदालत म्ह खड़े होके प्रेरितां ताहीं माडी वार के खातर बाहरण करण का हुकम दिया। 35 फेर ओ बोल्या, "हे इस्राएलियों, थम जो कीमे इन माणसां तै करणा चाहवो सो, सोच-समझ के करणा। 36 क्युँके इन दिनां तै पहल्या थियूदास यो कहन्दा होया उठ्या, के मै भी कीमे सू; अर कोए चार सौ माणस उसके गेल्या हो लिये, पर ओ मारया गया अर जितने आदमी उसनै मान्ने थे, सारे तितर-बित्तर होग्ये अर मिटग्ये। 37 उसके पाच्छे नाम लिखाई के दिनां म्ह यहूदा गलीली उठ्या, अर कीमे आदमी आपणी ओड़ कर लिये; उसका भी नास होया अर जितने आदमी उसनै मान्ने थे, सारे तितर-बित्तर होग्ये। 38 ज्यांतै मै थारै तै कहूँ सू, इन माणसां तै दूर ए रहो अर इनतै कीमे काम ना राखो; क्युँके जै यो धर्म या काम माणसां की ओड़ तै हो फेर तो मिट जावैगा; 39 पर जै पणमेशर की ओड़ तै सैं, तो थम उन ताहीं कदे भी नीं मिटा सकदे। कदे इसा ना हो के थम पणमेशर तै भी लडणआळे ठहरो।"

40 फेर उत्रै उसकी बात मान ली; अर प्रेरितां ताहीं बुलाके छितवाया; अर यो हुकम देके छोड़ दिया के यीशु के नाम तै दुबारा कोए बात ना करणा। 41 वे इस बात तै राजी होके बड्डी पंचायत के श्यामी तै चले गये, के हम उसके नाम के खातर बेईज्जत होण के जोगे तो ठहरे। 42 वे हरेक दिन मन्दर म्ह अर घर-घर म्ह उपदेश करण तै, अर इस बात का सुसमाचार सुणान तै के यीशु ए मसीह सैं नीं रुके।

### सात सेवकां का छाट्या जाणा

6 उन दिनां म्ह जिबब चेल्यां की गिणती घणी बधण लागी, फेर यूनानी भाषा बोलण आळे इब्रानी भाषा बोलण आळ्यां पै बिरडाण लागी, के हरेक दिन की सेविकाई म्ह म्हारी बिधवायां की सुध कोनी ली जान्दी। 2 फेर उन बारहां नै चेल्यां के टोळ ताहीं आपणे धोरै बुलाके कहा, "न्यू सई कोनी के हम पणमेशर का बचन छोड़के खिलाण-पिलाण की सेवा म्ह रह्यां।

3 इसकरके, हे भाईयो, आपणे म्ह तै सात बढ़िया नाम्नी माणसां ताहीं जो पवित्र आत्मा अर बुद्धि तै भरे-पुरे हो, छांट ल्यो, के हम उत्रै इस काम पै ला देवां। 4 पर हम तो प्रार्थना म्ह अर बचन की सेवा म्ह लागे रह्यांगे।" 5 या बात सारे टोळ नै आच्छी लागी, अर उत्रै स्तिफनुस नामक एक माणस ताहीं जो बिश्वास अर पवित्र आत्मा तै भरया-पूरा था, अर फिलिप्पुस, अर प्रुखुरुस, अर नीकानोर, अर तीमोन, अर परमिनास, अर अन्ताकियावासी निकुलाउस ताहीं जो यहूदी मत म्ह आग्या था, छांट लिया। 6 इन ताहीं प्रेरितां के श्यामी खड़या करया अर उत्रै प्रार्थना करके उनपै हाथ धरे।

7 पणमेशर का बचन फैलदा गया अर यरुशलेम म्ह चेल्यां की गिणती घणी बढ़दी गई; अर याजकां का एक बड्डी समाज इस मत ताहीं मानणआळा होया।

### स्तिफनुस की गिरफ्तारी

8 स्तिफनुस अनुग्रह अर सामर्थ तै भरया-पूरा होके आदमियां म्ह बड्ड़े-बड्ड़े अनोखे काम अर निशान दिखाया करे था। 9 फेर ओ आराधनालय म्ह तै जो लिबिरितियों की कुहवावै थीं, अर कुरेनी अर सिकन्दरिया अर किलिकिया अर एशिया के आदमियां म्ह तै कई एक उठके स्तिफनुस तै बहसण लागे। 10 पर उस ज्ञान अर उस आत्मा का जिसतै ओ बात करे था, वे सामणा नीं कर सके। 11 इस पै उत्रै कई आदमियां ताहीं उकसाया जो कहण लागे, "हमनै इस ताहीं मूसा अर पणमेशर के बिरोध म्ह बुराई की बात कहन्दे होये सुणया सैं।" 12 अर आदमियां अर प्राचीनों अर शास्त्रियों ताहीं भड्काके चढ़ आये अर उस ताहीं पकड़के बड्डी पंचायत म्ह लीयाए। 13 अर झूठे गवाह खड़े करे, जिन्नै कहा, "यो माणस इस पवित्र जंगहा अर व्यवस्था के बिरोध म्ह बोलणा नीं छोड़दा। 14 क्युँके हमनै उस ताहीं न्यू कहन्दे सुणया सैं के योए यीशु नासरी इस जंगहा नै गेर देवैगा, अर उन रिवाज्जां नै बदल देवैगा जो मूसा नै म्हारै ताहीं सौपी सैं।" 15 फेर सारे आदमियां नै बड्डी पंचायत म्ह बैठे थे, उस पै निगां ह गड़ाई तो उसका मुँह सुर्गदूत जिसा दिख्या।

### स्तिफनुस का भाषण

7 फेर महायाजक नै कहा, "के ये बात साच्ची सैं?" 2 स्तिफनुस बोल्या, "हे भाईयो, अर पितरो सुणो। म्हारा बाप अब्राहम हारान म्ह बसण तै पहल्या जिबब मेसोपोटामिया म्ह था, तो तेजोमय पणमेशर नै उस ताहीं दर्शन दिया, 3 अर उसतै बोल्या, 'तू आपणे देश अर आपणे कुन्बे म्ह तै लिकड़के उस देश म्ह जा, जिस ताहीं मै तन्नै दिखाऊँगा।' 4 फेर ओ कसदियो के देश तै लिकड़के हारान म्ह जा बसया। उसके बाप की मौत के पाच्छे पणमेशर नै उस ताहीं ओड़ै तै इस देश म्ह ल्याके बसाया जिसम्ह इब थम बसां सो, 5 अर उस ताहीं कीमे वसीयत बल्के पै धरण भर की भी उसम्ह जंगहा कोनी देई, पर प्रण करया के मै यो देश तेरै अर तेरै बाद तेरै बंश के हाथ कर दूँगा; हालाकि उस टेम उसके कोए बेडा कोनी था। 6 अर पणमेशर नै न्यू कहा, 'तेरी ऊलाद के आदमी पराये देश म्ह परदेशी होवेंगे, अर वे उत्रै नौकर बणावेंगे अर चार सौ साल ताहीं दुःख देवेंगे।' 7 फेर पणमेशर नै कहा, 'जिस जात के वे नौकर होवेंगे, उस ताहीं म्ह सजा देऊँगा, अर इसके बाद वे लिकड़के इस्से जंगहा मेरी सेवा करेंगे।' 8 अर उसनै उसतै खतनै की वाचा बाँधी; अर इस्से हालात म्ह इसहाक उसतै पैदा होया अर आँदवै दिन उसका खतना करया गया; अर इसहाक तै याकूब अर याकूब तै बारहां कुलपति पैदा होए।

9 "कुलपतियां नै यूसुफ तै जळण करके उस ताहीं मिस्र देश जाण आळ्यां ताहीं बेच्या। पर पणमेशर उसके गेल्या था, 10 अर उस ताहीं उसके सारे क्लेशां तै छुटाके मिस्र के राजा फिरौन की निगां म्ह अनुग्रह अर बुद्धि प्रदान करी, अर उसनै उस ताहीं मिस्र पै अर आपणे सारे घर पै हाकिम लगा दिया। 11 फेर मिस्र अर कनान के सारे देश म्ह अकाल पड़या, जिसतै भारया क्लेश होया, अर म्हारे बाप-दाद्यां ताहीं अन्न कोनी मिलै था। 12 पर याकूब नै न्यू सुणके के मिस्र म्ह नाज सैं, म्हारे बाप-दादा ताहीं पहलडी बर खन्दाया। 13 दूसरी बै यूसुफ नै खुद ताहीं आपणे भाईया पै प्रगट करया अर यूसुफ की जात फिरौन नै बेरा पाटगी। 14 फेर यूसुफ नै आपणे बाप याकूब अर आपणे

साबतै कुन्बे ताहीं, जो पचत्तर माणस थे, बुलवा भेज्या। 15 फेर याकूब मिस्र गया; अर ओड़ै ओ अर म्हारे बाप-दादे मरग्ये। 16 उनकी लाश शकेम म्ह पहुँचाके उस कब्र म्ह धरे गये, जिस ताहीं अब्राहम नै चाँदी देके शकेम म्ह हमोर की ऊलाद तै मोल लिया था।

17 “पर जिब्व उस वादें के पुरे होण का टेम लवै आया जो पणमेशर नै अब्राहम तै करी थी, तो मिस्र म्ह वे आदमी बढग्ये अर घणे होग्ये। 18 फेर मिस्र म्ह दूसरा राजा होया जो यूसुफ ताहीं कोनी जाणै था। 19 उसनै म्हारी जात तै हेरा-फेरी करके म्हारे बाप-दादा के गेल्या उरै ताहीं भुंदा बीवार करया, के उत्रै आपणे बाळकां ताहीं बगाणा पडया के वे जिन्दे ना रहवें। 20 उस टेम मूसा पैदा होया। ओ पणमेशर की निगाह घणा म्ह सुथरा था। ओ तीन महीने ताहीं आपणे बाप के घरा पाळया गया। 21 जिब्व बगा दिया तो फिरौन की बेटी नै उस ताहीं ठा लिया, अर आपणा बेट्टा करके पाळया। 22 मूसा नै मिस्रियां की सारी बिद्या पढाई गई, अर ओ बचन अर कर्म म्ह, दोनुआ म्ह सामर्थी था।

23 “जिब्व ओ चालीस साल का होया, तो उसके मन म्ह आया के मैं आपणे इस्राएली भाईयां तै फेहू। 24 उसनै एक माणस पै जुल्म होंदे देखके उस ताहीं बचाया, अर मिस्री ताहीं मार के सताए होए का बदला लिया। 25 उसनै सोच्या के उसके भाई समझैगें के पणमेशर उसके हाथां तै उनका उद्धार करैगा, पर उत्रै कोनी समझया। 26 दुसरे दिन जिब्व वे आपस म्ह लडै थे, तो ओ उडै तै आण लिकडया; अर न्यू कहके उत्रै मेल करण के खातर समझया, ‘हे माणसो, थम तो भाई-भाई सो, एक दुसरे पै क्यांतै जुल्म करो सो?’ 27 पर जो आपणे पड़ोसी पै जुल्म करै था, उसनै उस ताहीं न्यू कहके हटा दिया, ‘तेरै ताहीं किसनै म्हारै पै हाकिम अर जज ठहरया सै?’ 28 के जिस ढाळ तै तन्नै काल मिस्री ताहीं मार दिया मन्नै भी मार देणा चाहवै सै?’ 29 या बात सुणके मूसा भाज्या अर मिधान देश म्ह परदेशी होके रहण लाया, अर ओड़ै उसके दो बेट्टे पैदा होए।

30 “जिब्व पुरे चालीस साल बीतगे, तो एक सुर्गदुत ने सिनै पहाड़ के बण म्ह उस ताहीं बळदी होई झाड़ी की ज्वाला म्ह दर्शन दिया। 31 मूसा नै यो दर्शन देखके हैरानी होई, अर जिब्व देखण खातर लवै गया, तो प्रभु का शब्द होया, 32 ‘मैं तेरै बाप-दादा, अब्राहम, इसहाक, याकूब का पणमेशर सूँ, फेर मूसा कांम्बग्या, उरै ताहीं के उसनै देखण की हिम्मत भी कोनी होई। 33 फेर प्रभु नै उसतै कह्या, ‘आपणे पायां तै जुत्ते उत्तार ले, क्युँके जिस जंगहा तू खडया सै, वा पवित्र धरती सै। 34 मन्नै साच्ये आपणे आदमियां की जो मिस्र म्ह सै, भुन्डी हालत देखी सै; अर उनकी आह अर उनका रोणा सुणया सै; ज्यांतै उन ताहीं छुटाण के खातर उत्तरया सूँ। इब आ, मैं तन्नै मिस्र खन्दाऊँगा।’

35 “जिस मूसा ताहीं उत्रै न्यू कहके नाट दिया था, ‘तेरै ताहीं किसनै म्हारै पै हाकिम अर जज ठहरया सै?’ उससे ताहीं पणमेशर नै हाकिम अर छुटाणआळा ठहराके उस सुर्गदुत के जरिये जिसनै उस ताहीं झाड़ी म्ह दर्शन दिया था, खन्दाया। 36 योए माणस मिस्र अर लाल समुन्दर अर जंगळ म्ह चालीस साल ताहीं अनोक्खे काम अर निशान दिखा-दिखाके उन ताहीं लिकाड़ ल्याया। 37 यो ओए मूसा सै, जिसनै इस्राएलियां तै कह्या, ‘पणमेशर थारै भाईयां म्ह तै थारै खातर मेरै जिसा एक नब्बी ठावैगा।’ 38 यो ओए सै, जिसनै जंगळ म्ह कलीसिया के बिचाळै उस सुर्गदुत के गेल्या सिनै पहाड़ पै उसतै बात करी अर म्हारे बाप-दादा के गेल्या था, उससे ताहीं जिन्दा बचन मिल्या के म्हारै ताहीं पहोचाए। 39 पर म्हारे बाप-दादां उसकी मानणी कोनी चाह्नी, बल्के उस ताहीं हटाके आपणे मन मिस्र की ओड़ पलटे, 40 अर हारून तै कह्या, ‘म्हारै खातर इसे देवते बणा, जो म्हारै आगै-आगै चाह्लै, क्युँके यो मूसा जो हमनै मिस्र देश तै लिकाड़ ल्याया, हमनै नीं बेरा के उसके के होया?’ 41 उन दिनां म्ह उत्रै एक बछड़ा बणा के उस ताहीं मूर्ति के आगै बलि चढाई, अर आपणे हाथां के काम्मां म्ह मग्न होण लागे। 42 आखर पणमेशर नै मुँह मोड़के उन ताहीं छोड़ दिया, के अकास गण ताहीं पुजै, जिसा नब्बियां की किताब म्ह लिख्या सै, ‘हे इस्राएल के घराने, के थम जंगळ म्ह चालीस साल ताहीं पशुबलि अर अन्नबलि मेरै ताहीं ए चढान्दे रहे?’ 43 थम मोलेक के तम्बू अर रिफान देवता, के तारे ताहीं लेके हांडो थे, यानिके उन मूर्तां ताहीं जिन ताहीं थमनै मुद्दा पड़के प्रणाम करण के खातर

बणाया था। आखर म्ह मैं थारै ताहीं बेबीलोन तै परली ओड़ ले जाके बसाऊँगा।’

44 “साक्षी का तम्बू जंगळ म्ह म्हारै बाप-दादा के बिचाळै था, जिसा उसनै ठहरया जिसनै मूसा तै कह्या, ‘जो रूप तन्नै देख्या सै, उसके मुताबिक इसनै बणा।’ 45 उससे तम्बू नै म्हारे बाप-दादे पाचछले टेम तै पाके यहाँशू के गेल्या उरै लीयाये; जिस टेम के उत्रै उन गैर-जात्तां पै हक्क पाया, जिन ताहीं पणमेशर नै म्हारै बाप-दादा के श्यामी तै लिकाड़ दिया, अर ओ तम्बू दाऊद के टेम ताहीं रहया। 46 उसपै पणमेशर नै अनुग्रह करया, आखर म्ह उसनै बिनती करी के ओ याकूब के पणमेशर के खातर रहण की जंगहा बणावै। 47 पर सुलेमान नै उसके खातर घर बणाया। 48 पर परम प्रधान हाथ के बणाए होये घरा म्ह कोनी रहन्दा, जिसा के नब्बियां नै कह्या, 49 ‘प्रभु कहवै सै, सुर्ग मेरा सिंहासन अर धरती मेरी पायां तळै की पट्टी सै, मेरै खातर थम किस ढाळ का घर बणाओगे? अर मेरै आराम का कौण-सी जंगहा होवैगी? 50 के ये सारी चीज मेरै हाथां की बणाई होड़ नीं सै?’

51 “हे जिद्दी, अर मन अर कान के खतनारहित आदमियो, थम सारी हाण पवित्र आत्मा का बिरोध करो सो। जिसा थारे बाप-दादे करै थे, उससे तरियां ए थम भी करो सो। 52 नब्बियां म्ह तै किस ताहीं थारे बाप-दादा नै नीं सताया? उत्रै उस धर्मी के आण का पाचछले टेम का संदेशां देण आळ्यां ताहीं मार दिया; अर इब थम भी उसके पकड़वाण आळे अर मारण आळे होये। 53 थमनै सुर्गदुत्तां के जरिये ठहराई होये व्यवस्था तो पाए, पर उसका पालन कोनी करया।”

### स्तिफनुस पै पथराव

54 ये बात सुणके वे जळगे अर उस पै दाँत पिस्सण लागे। 55 पर उसनै पवित्र आत्मा तै पूरी तरियां भरके सुर्ग की ओड़ देख्या अर पणमेशर की महिमा ताहीं अर यीशु नै पणमेशर के सोळी ओड़ खडया देखके 56 कह्या, “देखो, मैं सुर्ग नै खुल्या होया, अर माणस के बेट्टे ताहीं पणमेशर के सोळी ओड़ खडया देखू सूँ।” 57 फेर उत्रै ठाडू आवाज म्ह किलकी मारके कान मूंद लिए, अर एक सेत्ती उस पै झपटे; 58 अर उस ताहीं नगर के बाहरण लिकाड़के उसपै पत्थर बरसाण लागे। गवाहां नै आपणे लत्ते शाऊल नामक एक गाबरू के पायां के धोरै उतार के धर दिए। 59 वे स्तिफनुस पै पत्थर बरसान्दे रहे, अर ओ न्यू कहके प्रार्थना करदा रह्या, “हे प्रभु यीशु, मेरी आत्मा ताहीं अपना ले।” 60 फेर गोड्डे टेकके ठाडू आवाज म्ह रुक्का मारया, “हे प्रभु, यो पाप उनपै मतना ला।” अर न्यू कहके ओ सोग्या।

### कलीसिया पै अत्याचार

8 शाऊल उसके मारण म्ह सहमत था। उससे दिन यरूशलेम की कलीसिया म्ह घणा रोळा सरू होग्या अर प्रेरितां नै छोड़ के सारे के सारे यहूदिया अर सामरिया देशां म्ह खिंड-मिंड होग्ये। 2 कुछ भगतां नै स्तिफनुस ताहीं कब्र म्ह धरया अर उसके खातर घणा बिलाप करया। 3 शाऊल कलीसिया नै उजाड़ण लागरया था; अर घर-घर म्ह बड़के माणसां अर लुगाईयां ताहीं घिसटा-घिसटाके जेळ म्ह गेरै था।

### सामरिया म्ह फिलिप्पुस का प्रचार

4 जो खिंड-मिन्ड होए थे, वे सुसमाचार सुनान्दे होये हान्डे; 5 अर फिलिप्पुस सामरिया नगर म्ह जाके माणसां म्ह मसीह का प्रचार करण लाग्या। 6 जो बात फिलिप्पुस नै कहीं उन ताहीं आदमियां नै सुणके अर जो निशान ओ दिखावै था उन ताहीं देख देखके, एक चित्त होके मन ल्याया। 7 क्युँके घण-खरयां म्ह तै भुंड़ी आत्मां ठाडू आवाज म्ह किलकी मारदी होई लिकडग्यी, अर घण-खरै लकवे के बीमार अर लंगड़े भी ठीक करे गये; 8 अर उस नगर म्ह घणी खुशी मनाई गई।

### जादूगर शमौन

9 इसतै पहल्या उस नगर म्ह शमौन नामका का एक माणस था, जो जादू-टोना करके सामरिया के आदमियां नै हैरान करदा अर खुद ताहीं एक बड्डा

माणस बतावै था।<sup>10</sup> छोट्या तै लेकै बड्ड्या ताहीं सारे उसका आदर करकै कहवै थे, “यो माणस पणमेशर वा ताकत सै, जो महान कुहवावै सै।”<sup>11</sup> उसनै घणे दिनां तै उन ताहीं आपणे जादू के काम्मां तै हैरान कर राख्या था, ज्यांतै वे उसकी घणी मात्रै थे।<sup>12</sup> पर जिब्व उन्नै फिलिप्पुस का बिश्वास करया जो पणमेशर के राज्य अर यीशु के नाम का सुसमाचार सुणावै था तो आदमी, के माणस, के लुगाई, बपतिस्मा लेण लाग्गे।<sup>13</sup> फेर शमौन नै खुद भी बिश्वास करया अर बपतिस्मा लेकै फिलिप्पुस कै गेल्या रहण लाग्या। ओ निशान अर बड्डे-बड्डे सामर्थ के काम होंदे देखकै हैरान होवै था।

### सामरिया म्ह पतरस अर युहन्ना

<sup>14</sup> जिब्व प्रेरितां नै जो यरुशलेम म्ह थे, सुणया के सामरियो नै पणमेशर का बचन मान लिया सै तो पतरस अर युहन्ना ताहीं उनकै धोरै खन्दाया।<sup>15</sup> उन्नै जाकै उनकै खातर प्रार्थना करी के पवित्र आत्मा पावै।<sup>16</sup> क्यूँके ओ इब ताहीं इनम्ह तै किसे पै भी कोनी उतरया था; उन्नै तो सिर्फ प्रभु यीशु के नाम तै बपतिस्मा लिया था।<sup>17</sup> फेर उन्नै उनपै हाथ धरे अर उन्नै पवित्र आत्मा पाया।<sup>18</sup> जिब्व शमौन नै देख्या के प्रेरितां कै हाथ धरण तै पवित्र आत्मा दिया जावै सै, तो उनकै धोरै रपिये ल्याकै कह्या, <sup>19</sup> “यो हक्क मन्त्रै भी द्यो, के जिस किसे पै हाथ धरूँ ओ पवित्र आत्मा पावै।”<sup>20</sup> पतरस नै उसतै कह्या, “तेरे रपिये तेरे गेल्या नास होज्या, क्यूँके तन्नै पणमेशर का दान रपिया तै मोल लेण का बिचार करया।”<sup>21</sup> इस बात म्ह ना तेरा बान्डा सै, ना भाग; क्यूँके तेरा मन पणमेशर कै आगै सीधा कोनी।<sup>22</sup> इसकरकै आपणी इस बुराई तै मन पलटाकै प्रभु तै प्रार्थना कर, हो सकै सै तेरे मन का बिचार माफ़ करया जावै।<sup>23</sup> क्यूँके मै देकवूँ सूँ के तू पित्त जिस्सी कडवाहट अर अधर्म कै बन्धन म्ह पड्या सै।”<sup>24</sup> शमौन नै जबाब दिया, “थम मेरै खातर प्रभु तै प्रार्थना करो के जो बात थमनै कहीं, उनम्ह तै कोए भी मेरै पै नी आवै।”<sup>25</sup> आखर म्ह वे गवाही देकै प्रभु का बचन सुणाकै यरुशलेम नै बोहड़गे, अर सामरिया के घण-खरे गाम्मां म्ह सुसमाचार सुणान्दे गये।

### फिलिप्पुस अर कूश देश का अधिकार

<sup>26</sup> फेर प्रभु कै एक सुगंदुत नै फिलिप्पुस तै कह्या, “उठ अर दक्षिण की ओड़ उस राह पै जा, जो यरुशलेम तै गाजा नै जावै सै।” यो रेगिस्तानी राह सै।<sup>27</sup> ओ उठकै चाल दिया, अर देख्खो, कूश देश का एक माणस आण लागरया था जो खोजा अर कूशियों की रानी कन्दाके का मंत्री अर खजांची था। ओ आराधना करण नै यरुशलेम म्ह आया था।<sup>28</sup> ओ आपणे रथ पै बैठ्या होया था, अर यशायाह नब्बी की किताब पढ़दा होया बोहड़ण लागरया था।<sup>29</sup> फेर आत्मा नै फिलिप्पुस ताहीं कह्या, “लोवै जाकै इस रथ कै गेल्या हो ले।”<sup>30</sup> फिलिप्पुस उसकी ओड़ भाज्या अर उस ताहीं यशायाह नब्बी की किताब पढ़दे होये सुणया, अर बुझ्या, “तू जो पढ़ै सै के उसनै समझै भी सै?”<sup>31</sup> ओ बोल्या, “जिब्व ताहीं कोए मेरै ताहीं नीं समझावै तो मै किस ढाळ समझूँ।” अर फिलिप्पुस तै बिनती करी के ओ चढ़कै उसके धोरै बैट्टै।<sup>32</sup> पवित्र ग्रन्थ का जो पाठ ओ पढ़ै था, ओ यो था : “ओ भेड़ की ढाळ मारण खातर पहोचाया गया, अर जिस तरियां मेमना आपणे ऊन काट्टण आळ्यां कै श्यामी बोल-बाल्ला रहवै सै, उस्से तरियां ए उसनै भी आपणा मुँह कोनी खोल्या।”<sup>33</sup> उसकी दीनता म्ह उसका न्याय कोनी होण पाया। उसके टेम के माणसां का ब्यौरा कौण देवैगा? क्यूँके धरती तै उसका प्राण ठा लिया जावै सै।”

<sup>34</sup> इस पै खोजे नै फिलिप्पुस तै बुझ्या, “मै तेरै तै बिनती करूँ सूँ, न्यू बता के नब्बी यो किसकै बारे म्ह कहवै सै, आपणे या किसे दुसरे कै बारे म्ह?”<sup>35</sup> फेर फिलिप्पुस नै आपणा मुँह खोल्या, अर इस्से ग्रन्थ तै सरू करकै उस ताहीं यीशु का सुसमाचार सुणया।<sup>36</sup> राह म्ह चाल्दे-चाल्दे वे किसे पाणी की जंगहा पहोचै। फेर खोजे नै कह्या, “लखा उरै पाणी सै, इब मन्त्रै बपतिस्मा लेण म्ह के रोक सै।”<sup>37</sup> फिलिप्पुस बोल्या, “जै तू साबते मन तै बिश्वास करै सै तो ले सकै सै।” उसनै जबाब दिया, “मै बिश्वास करूँ सूँ के यीशु मसीह पणमेशर का बेट्टा सै।”<sup>38</sup> फेर उसनै रथ खड्या करण का हुक्म दिया, अर फिलिप्पुस अर खोजा दोनु पाणी म्ह बड़गे, अर उसनै खोजा ताहीं

बपतिस्मा दिया।<sup>39</sup> जिब्व वे पाणी म्ह तै लिकड़कै ऊपरण आये, तो प्रभु का आत्मा फिलिप्पुस ताहीं ठा लेग्या, अर खोजे नै उस ताहीं दुबारा नीं देख्या, अर ओ राजी होकै आपणी राह हो लिया।<sup>40</sup> फिलिप्पुस अशदोद म्ह आ लिकड़या, अर जिब्व ताहीं कैसरिया म्ह नीं पहोच्या, जिद ताहीं नगर-नगर सुसमाचार सुणान्दा गया।

### शाऊल का हृदय-परिवर्तन

**9** शाऊल जो इब ताहीं प्रभु के चेल्यां ताहीं धमकाण अर मारण की धुन म्ह था, महायाजक कै धोरै गया<sup>2</sup> अर उसतै दमिश्क के आराधनालयां कै नाम पै इस बाबत म्ह चिड्डियां माँगी के, के माणस के लुगाई, जिन्नै ओ इस पंथ पै पावै उन ताहीं जुड़कै यरुशलेम लियावै।<sup>3</sup> पर चाल्दे-चाल्दे जिब्व ओ दमिश्क कै लोवै पहोच्या, तो चाणचक अकास तै उसके चोगरदे नै चाँदणा चमक्या,<sup>4</sup> अर ओ धरती पै पड्या अर यो शब्द सुणया, “हे शाऊल, हे शाऊल, तू मन्त्रै क्यांतै सतावै सै?”<sup>5</sup> उसनै बुझ्या, “हे प्रभु, तू कौण सै?” उसनै कह्या, “मै यीशु सूँ, जिस ताहीं तू सतावै सै।”<sup>6</sup> पर इब उठकै नगर म्ह जा, अर जो तन्नै करणा सै ओ तेरै तै कहया जावैगा।”<sup>7</sup> जो माणस उसकै गेल्या थे, वे हैरान रहग्ये; क्यूँके बोल तो सुणै थे पर किस्से ताहीं देखे कोनी थे।<sup>8</sup> फेर शाऊल धरती पै तै उठ्या, पर जिब्व आँख खोली तो उस ताहीं किम्मे कोनी दिख्या, अर वे उसका हाथ पकड़कै दमिश्क म्ह ले गये।<sup>9</sup> ओ तीन दिन ताहीं कोनी देख सक्या, अर ना खाया अर ना पीया।

<sup>10</sup> दमिश्क म्ह हनन्याह नामक एक चेल्ला था, उसतै प्रभु नै दर्शन म्ह कह्या, “हे हनन्याह!” वो बोल्या, “हाँ, प्रभु!”<sup>11</sup> फेर प्रभु नै उसतै कह्या, “उठकै उस गळी म्ह चलया जा जो ‘सीधी’ कुहवावै सै, अर यहुदा के घर म्ह शाऊल नामक एक तरसुसवासी नै बुझ; क्यूँके देख, ओ प्रार्थना करण लागरया सै, <sup>12</sup> अर उसनै सपने म्ह हनन्याह नामक एक माणस ताहीं भीत्तर आंदे अर आपणे ऊप्पर हाथ धरदे देख्या सै; ताके दुबारा दृष्टि पावै।”<sup>13</sup> हनन्याह नै जबाब दिया, “हे प्रभु, मन्त्रै इस माणस कै बारे म्ह घणाए तै सुणया सै के इसनै यरुशलेम म्ह तेरै आदमियां गेल्या बड्डी-बड्डी बुराई करी सै; <sup>14</sup> अर उरै भी इस ताहीं प्रधान याजकां की ओड़ तै हक्क मिल्या सै के जो माणस तेरा नाम लेवै सै, उन सारया नै जुड़ ले।”<sup>15</sup> पर प्रभु नै उसतै कह्या, “तू चलया जा; क्यूँके ओ तो गैर-जात्ता अर राजाओं अर इस्त्राएलियों कै श्यामी मेरा नाम प्रगट करण कै खातर छांटया होया पात्र सै।”<sup>16</sup> अर मै उसनै बताऊँगा के मेरै नाम कै खातर उसनै किस्सा-किस्सा दुःख ठाणा पडैगा।”<sup>17</sup> फेर हनन्याह उठकै उस घर म्ह गया, अर उसपै आपणा हाथ धरकै कह्या, “हे भाई शाऊल, प्रभु, यानिके यीशु, जो उस राह म्ह, जिसतै तू आया तेरै ताहीं दिख्या था, उस्से नै मेरै ताहीं खन्दाया सै के तू दुबारा दृष्टि पावै अर पवित्र आत्मा तै भरया-पूरा हो जावै।”<sup>18</sup> अर जिब्वे उसकी आँखां तै छिल्के-से पड़े अर ओ देखण लाग्या, अर उठकै बपतिस्मा लिया; <sup>19</sup> फेर खाणा खाकै हिम्मत पायी।

### दमिश्क म्ह शाऊल का प्रचार

ओ कई दिन उन चेल्यां कै गेल्या रहया जो दमिश्क म्ह थे।<sup>20</sup> अर ओ जिब्वे आराधनालयां म्ह यीशु का प्रचार करण लाग्या के ओ पणमेशर का बेट्टा सै।<sup>21</sup> सारे सुणण आळे हैरान होकै कहण लाग्गे, के यो ओए माणस नीं सै जो यरुशलेम म्ह उन ताहीं जो यीशु का नाम नै लेवै थे, उनका नास करया करै था; अर उरै भी इस्से खातर आया था के उन्नै जुड़कै प्रधान याजकां कै धोरै ले जावै।”<sup>22</sup> पर शाऊल और भी सामर्थी होंदा गया, अर इस बात का सबूत दे-देकै के मसीह यीशु-ए सै, दमिश्क के रहणीये यहुदिया का मुँह बन्द करदा रहया।

<sup>23</sup> जिब्वे घणे दिन बीतगे, तो यहुदिया नै मिलकै उस ताहीं मारण की साजस रची।<sup>24</sup> पर उनकी साजस का शाऊल नै बेरा पाटग्या। वे तो उसनै मारण खातर रात-दिन फाटकां पै दाव म्ह लाग्गे रहवै थे।<sup>25</sup> पर रात नै उसके चेल्यां नै उस ताहीं टोकरे म्ह बिठाया, अर शहरपनाह पै तै लटकाकै उतार दिया।

### यरुशलेम म्ह शाऊल

26 यरुशलेम म्ह पहाचकें उसनै चेल्यां के गेल्या मिल जाण की कोशिश करी; पर सारे उसतै डरै थे, क्यूँके उन्नै बिश्वास कोनी होवै था, के ओ भी चेल्ला सै। 27 पर बरनबास नै उस ताहीं आपणे गेल्या प्रेरितां के धोरै ले जाकें उन ताहीं बताया के इसनै किस ढाळ तै राह म्ह प्रभु ताहीं देख्या, अर यीशु नै इसतै बात करी; फेर दमिश्क म्ह इसनै किस तरियां डेट तै यीशु के नाम का प्रचार करया। 28 ओ उनकें गेल्या यरुशलेम म्ह आन्दा-जान्दा रहया 29 अर बेधडक होकें प्रभु का नाम तै प्रचार करै था; अर यूनानी भाषा बोलणआळे यहूदियां के गेल्या बोलचाल अर बहस करै था; पर वे उसनै मारण की कोशिश करण लागे। 30 न्यू जाणकें भाई उस ताहीं कैसरिया ली आये, अर तरसुस नै खन्दा दिया। 31 इस तरियां सारे यहूदिया, अर गलील, अर सामरिया म्ह कलीसिया नै चैन मिल्या, अर उसकी बढोत्तरी होन्दी गई; अर वा प्रभु के भय अर पवित्र आत्मा की शान्ति म्ह चाल्दी अर बढदी गई।

### लुद्धा अर याफा म्ह पतरस

32 फेर इसा होया के पतरस हरेक जंगहा हांडदा होया, उन पवित्र आदमियां के धोरै भी पहाच्या जो लुद्धा म्ह रहवै थे। 33 ओडै उसनै एनिय्यास नामक लकवे का रोगी एक माणस मिल्या, जो आठ साल तै खाट पै पड़या था। 34 पतरस नै उसतै कह्या, “हे एनिय्यास! यीशु मसीह तन्नै चंगा करै सै। उठ, आपणा बिछाणा ठा।” फेर ओ जिब्बे उठ खड़या होया। 35 फेर लुद्धा अर शारोन के सारे रहणीये उस ताहीं देख के प्रभु की ओड़ फिरे।

36 याफा म्ह तबीता यानिके दोरकास नामक एक बिश्वासण रहवै थी। वा घणे भले-भले काम अर दान करया करै थी। 37 उन्नै दिनां म्ह वा बीमार होकें मरग्यी; अर उन्नै उस ताहीं नुह्वाकें चुबारै पै धर लिया। 38 इसकरकें के लुद्धा याफा के लोवै था, चेल्यां नै न्यू सुणकें पतरस ओडै सै, दो माणस खन्दाके उसतै बिनती करी, “म्हारै धोरै आण म्ह वार ना लावै।” 39 फेर पतरस उठकें उसकें गेल्या हो लिया, अर जिब्ब ओ पहाच्या तो वे उसनै उस चोबरै म्ह ले गये। सारी बिधवां रोंदी होई उसकें धोरै आण खड़ी होई, अर जो कुरते अर लत्ते दोरकास नै उनकें गेल्या रहंदे होये बणाए थे, दिखान लागीं। 40 फेर पतरस नै सारया ताहीं बारहण कर दिया, अर गोड्डे टेक के प्रार्थना करी अर लाश की ओड़ लखाकें कह्या, “हे तबीता, उठ!” फेर उसनै आपणी आँख खोल दीं; अर पतरस ताहीं देखकें उठ बैट्टी। 41 उसनै हाथ देकें उस ताहीं ठाया, अर पवित्र आदमी अर बिधवायां ताहीं बुलाकें उस ताहीं जिन्दा दिखा दिया। 42 या बात साब्तत याफा म्ह फैलग्यी; अर घण-खरया नै प्रभु पै बिश्वास करया। 43 अर पतरस याफा म्ह शमौन नामक किसे चमडे का धन्धा करणीये के उरै घणे दिनां ताहीं रहया।

### कुरनेलियुस का पतरस ताहीं बुलवाणा

10 कैसरिया म्ह कुरनेलियुस नाम का एक माणस था, जो इतालियानी नामक फौज का सरदार था। 2 ओ भगत था, अर आपणे साबते कुन्बे सुदा पणमेशर तै डरै था, अर यहूदी आदमियां ताहीं घणा दान देवै था, अर बराबर पणमेशर की प्रार्थना करै था। 3 उसनै दिन के तीसरे पहर के लोवै दर्शन म्ह साफ तौर तै देख्या के पणमेशर का एक सुर्गदुत उसकें धोरै भीत्तर आकें कह्वै सै, “हे कुरनेलियुस!” 4 उसनै उस ताहीं गौर तै देख्या अर डरकें कह्या, “हे प्रभु, के सै?” उसनै उसतै कह्या, “तेरी प्रार्थनाएँ अर तेरे दान याद के खातर पणमेशर के श्यामी पहाचे सै; 5 अर याफा म्ह माणस खन्दाके शमौन नै, जो पतरस कुहवावै सै, बुलवा ले। 6 ओ शमौन, चमडे का धन्धा करण आळे के उरै मेहमान सै, जिसका घर समुन्दर के कंठारै सै।” 7 जिब्ब ओ सुर्गदुत जिसनै उसतै बात करी थीं चल्या गया, तो उसनै दो नौकर, अर जो उसकें लवै हाजिर रहया करै थे उनम्ह तै एक भगत सिपाही ताहीं बुलाया, 8 अर उन ताहीं सारी बात बताकें याफा की ओड़ खन्दाया।

### पतरस का दर्शन

9 दुसरै दिन जिब्ब वे चाल्दे-चाल्दे नगर के धोरै पहाचे, तो दोफारी के लवै पतरस छात पै प्रार्थना करण चढ्या। 10 उसनै भूख लागी अर कुछे खाणा चाहवै था, पर जिब्ब वे त्यारी करै थे तो ओ बेसुध होग्या; 11 अर उसनै देख्या, के अकास खुलग्या; अर एक पात्र बड्डी चादर की तरियां च्यारू कुणयां तै लटकदा होया, धरती की ओड़ उतरै सै। 12 जिस म्ह धरती के सारे ढाळ के चौपाए अर रेंगेनेआळे जिनोर अर अकास के पंछी थे। 13 उसनै एक इसा बोल सुणया, “हे पतरस उठ, मार अर खा।” 14 पर पतरस नै कह्या, “ना प्रभु, कती भी नीं; क्यूँके मन्नै कदे कोए अपवित्र चीज नीं खाई सै।” 15 फिर दूसरी बर उस ताहीं बोल सुणाई दिया, “जो किम्मे पणमेशर नै शुद्ध ठहराया सै, उस ताहीं अशुद्ध मतना कह्वै।” 16 तीन बर इस तरियां ए होया; फेर जिब्ब ओ पात्र अकास म्ह ठा लिया गया।

17 जिब्ब पतरस आपणे मन म्ह दुबिध्या म्ह था, के यो दर्शन जो मन्नै देख्या ओ के हो सकै सै, तो देख्यो, वे माणस जिन ताहीं कुरनेलियुस नै खन्दाया था, शमौन के घर का पता लगाकें दरवाजे पै आण खड़े होए, 18 अर रुक्का मारकें बुड्झण लागे, “के शमौन जो पतरस कुहवावै सै, याडै ए मेहमान सै?” 19 पतरस तो उस दर्शन पै सोचण ए लागरया था, के आत्मा नै उसतै कह्या, “देख, तीन माणस तेरी टोह म्ह सै। 20 आखर उठकें तळै जा, अर निसंकोच उनकें गेल्या हो ले; क्यूँके मन्नै ए उन ताहीं खन्दाया सै।” 21 फेर पतरस नै उतरकें उन माणसां ताहीं कह्या, “देख्यो, जिसकी टोह म्ह थम सो, ओ मै सूं। थारै आण का के कारण सै?” 22 वे बोले, “कुरनेलियुस सूबेदार जो धर्मी अर पणमेशर तै डरणआळा अर सारी यहूदी जात म्ह नाम्मी माणस सै, उसनै एक पवित्र सुर्गदुत तै यो निर्देश पाया सै के तेरै ताहीं आपणे घरा बुलाकें तेरै तै बचन सुणै।” 23 फेर उसनै उन ताहीं भीत्तर बुलाकें उनकी पहनाई करी।

### कुरनेलियुस के घर म्ह पतरस

दुसरे दिन ओ उनकें गेल्या गया, अर याफा के भाईयां म्ह तै कीमे उसकें गेल्या हो लिए। 24 दुसरे दिन वे कैसरिया पहाचे, अर कुरनेलियुस आपणे कुन्बे आळयां अर प्यारे ढब्बियां ताहीं कड्डा करकें उनकी बाट देखै था। 25 जिब्ब पतरस भीत्तर आवै था, तो कुरनेलियुस उसतै फेट्या, अर उसकें पायां म्ह पड़कें उस ताहीं प्रणाम करया; 26 पर पतरस नै उस ताहीं ठा के कह्या, “खड़या हो, मै भी तो माणस सूं।” 27 अर उसकें गेल्या बतळान्दा भीत्तर गया, अर घणे आदमियां ताहीं कड्डे देखकें 28 उनतै कह्या, “थमनै बेरा सै के गैर-जात तै संगति करणा या उसकें उरै जाणा यहूदी के खातर अधर्म सै, पर पणमेशर नै मेरै तै बताया सै के किसे माणस ताहीं अपवित्र या अशुद्ध ना कह्वै। 29 ज्यांतै मै जिब्ब बुलाया गया तो बिना कीमे कहे चल्या आया। इब मै बुड्झु सूं के मेरै ताहीं किस काम के खातर बुलाया गया?”

30 कुरनेलियुस बोल्या, “इस्से घड़ी, पुरे चार दिन होये, मै आपणे घर म्ह तीसरे पहर प्रार्थना करण लागरया था; तो एक माणस चमकीला बाणा पहरै होये, मेरै श्यामी आण खड़या होया 31 अर कहण लाग्या, ‘हे कुरनेलियुस, तेरी प्रार्थना सुण ली गई सै अर तेरे दान पणमेशर के श्यामी याद करे गये सै।’ 32 इसकरकें किसे नै याफा खन्दाके शमौन जो पतरस कुहवावै सै, बुला। ओ समुन्दर के कंठारै शमौन, चमडे का धन्धा करणीये के घरा मेहमान सै।’ 33 फेर मन्नै जिब्ब तेरै धोरै आदमी खन्दाए, अर तन्नै भला करया जो आग्या। इब हम सारे उरै पणमेशर के श्यामी सां, ताके जो कीमे पणमेशर नै तेरै तै कहया उस ताहीं सुणां।”

### पतरस का उपदेश

34 फेर पतरस बोल्या, “इब मेरै पक्का यकीन होग्या के पणमेशर किसे की मेर कोनी करदा, 35 बल्के हरेक जात म्ह जो उसतै डरै अर धर्म के काम करै सै, ओ उसनै भावै सै। 36 जो बचन उसनै इस्त्राएलिया के धोरै खन्दाया था, जिब्ब उसनै यीशु मसीह के द्वारा (जो सारया का प्रभु सै) शान्ति का सुसमाचार सुणाया, 37 ओ बचन थमनै बेरा सै, जो युहन्ना के बपतिस्मा के

प्रचार के पाछे गलील तै सरु होके साबते यहूदिया म्ह फैलग्या : 38 पणमेशर नै किस तरियां तै यीशु नासरी ताहीं पवित्र आत्मा अर सामर्थ तै अभिषेक करया; ओ भलाई करदा अर सारया ताहीं जो शैतान के सताए होइ थे, आच्छा करदा फिरया, क्यूँके पणमेशर उसके गेल्या था। 39 हम उन सारे काम्मा के गवाह सां; जो उसनै यहूदिया के देश अर यरुशलम म्ह भी करे, अर उन्नै उस ताहीं काठ पै लटकाके मार दिया। 40 उस ताहीं पणमेशर नै तीसरे दिन जिन्दा करया, अर प्रगत भी कर दिया सै; 41 सारे आदमियां पै नी बल्के उन गवाहा पै जिन ताहीं पणमेशर नै पहल्या तै छंट लिया था, यानिके म्हारै पै जिन्नै उसके मरे होया म्ह तै जिन्दा उठनै कै पाछे उसके गेल्या खाया-पिया; 42 अर उसनै म्हारै ताहीं हुक्म दिया के आदमियां म्ह प्रचार करो अर गवाही द्यो, के यो ओए सै जिस ताहीं पणमेशर नै जिन्दा अर मरया होया का न्यायी ठहरया सै। 43 उसकी सारे नब्बी गवाही देवें सै के जो कोए उसपै बिश्वास करैगा, उस ताहीं उसके नाम तै पापां की माफ़ी मिलैगी।”

### गैर-जात्तां पै पवित्र आत्मा उतरणा

44 पतरस ये बात कहण ए लागरया था के पवित्र आत्मा बचन के सारे सुणण आळया पै उतर आया। 45 अर जितने खतना करे होये बिश्वासी पतरस कै गेल्या आये थे, वे सारे हैरान होये के गैर-जात्तां पै भी पवित्र आत्मा का दान ढाळा गया सै। 46 क्यूँके उन्नै उन ताहीं कई ढाळ की भाषा बोल्दे अर पणमेशर की बड़ाई करदे सुणया। इस पै पतरस नै कह्या, 47 “के कोए पाणी नै डाट सकै सै के ये बपतिस्मा ना पावै, जिन्नै म्हारै की ढाळ पवित्र आत्मा पाया सै?” 48 अर उसनै हुक्म दिया के उन्नै यीशु मसीह कै नाम म्ह बपतिस्मा दिया जावै। फेर उन्नै उसतै बिनती करी के ओ कीमे दिन और उनकै गेल्या रहवै।

### पतरस कै जरिये अपने काम का खुलासा करणा

11 फेर प्रेरितां अर भाईया नै जो यहूदिया म्ह थे सुणया के गैर-जात्तां नै भी पणमेशर का बचन मान लिया सै। 2 आखर म्ह जिब्ब पतरस यरुशलम म्ह आया, तो खतना किये होये आदमी उसतै बहस करण लागे, 3 “तन्नै खतनारहित आदमियां कै उरै जाके उनकै गेल्या खाया।” 4 फेर पतरस नै उन ताहीं सरु तै नम्बरवार सारा कीमे कह सुणाया : 5 “मै याफा नगर म्ह प्रार्थना करण लागरया था, अर बेसुध होके एक दर्शन देख्या के एक पात्र, बड्डी चादर की ढाळ च्यारु कुणयां तै लटकाया होया, अकास तै उतरके मेरै धोरै आया। 6 जिब्ब मन्नै उसपै गौर करया, तो उसम्ह धरती के चौपाए अर बणपशु अर रेंगणआळे जिनोर अर अकास के पंछी देखे; 7 अर यो बोल भी सुणया, ‘हे पतरस उठ, मार अर खा।’ 8 मन्नै कह्या, ‘ना प्रभु, ना; क्यूँके कोई अशुद्ध चीज मेरै मुँह म्ह कदे नी गई।’ 9 इसकै जबाब म्ह अकास तै दूसरी बर शब्द होया, ‘जो कीमे पणमेशर नै शुद्ध ठहरया सै, उस ताहीं अशुद्ध मतना कहवै।’ 10 तीन बर इसा होया; फेर सारा कीमे दुबारा अकास पै खींच लिया गया। 11 अर देख्यो, जिब्बे तीन माणस जो कैसरिया तै मेरै धोरै खन्दाए गये थे, उस घर पै जिसम्ह हम थे, आ खड़े होये। 12 फेर आत्मा नै मेरै तै उनकै गेल्या बेखटके हो लेण नै कहया, अर छः भाई भी मेरै गेल्या हो लिये; अर हम उस माणस कै घरा गये। 13 उसनै म्हारै ताहीं बताया, के उसनै एक सुर्गदुत ताहीं आपणे घर म्ह खड़या देख्या, जिसनै उसतै कह्या, ‘याफा म्ह माणस खन्दाके शमौन ताहीं जो पतरस कुहवावै सै, बुलवा ले। 14 ओ थारै तै इसी बात कहवैगा, जिनके द्वारा तू अर तेरा सारा घराना उद्धार पावैगा।’ 15 जिब्ब म्ह बात करण लाग्या, तो पवित्र आत्मा उन पै उरसे तरियां तै उतरया जिस तरियां तै सरु म्ह म्हारै पै उतरया था। 16 फेर मन्नै प्रभु का यो बचन याद आया; जो उसनै कहया था, ‘युहन्ना नै तो पाणी तै बपतिस्मा दिया, पर थम पवित्र आत्मा तै बपतिस्मा पाओगे।’ 17 आखर म्ह जिब्ब पणमेशर नै उन ताहीं भी ओए दान दिया, जो म्हारै तै प्रभु यीशु मसीह पै बिश्वास करण तै मिल्या था; तो मै कौण था जो पणमेशर नै रोक सकदा?” 18 न्यू सुणके वे बोल-बाले रहे, अर पणमेशर की बड़ाई करके कहण लागे, “फेर तो पणमेशर नै गैर-जात्तां ताहीं भी जीवन कै खातर मन-फिराव का दान दिया सै।”

### अन्ताकिया की कलीसिया

19 जो आदमी उस क्लेश के मारे जो स्तिफनुस के कारण पड़या था, खिंड-मीड हो गये थे, वे हांडदे-हांडदे फीनीके अर साइप्रस अर अन्ताकिया म्ह पहोचे; पर यहूदियां नै छोड़ किसे और ताहीं बचन कोनी सुणावें थे। 20 पर उनम्ह तै कीमे साइप्रसवासी अर कुरेनी थे, जो अन्ताकिया म्ह आके यूनानियां ताहीं भी प्रभु यीशु का सुसमाचार सुनाण लागे। 21 प्रभु का हाथ उन पै था, अर घणे आदमी बिश्वास करके प्रभु की ओड़ फिरे। 22 जिब्ब उनका जिक्रा यरुशलम की कलीसिया कै सुणण म्ह आया, तो उन्नै बरनबास ताहीं अन्ताकिया खन्दाया। 23 ओ उडै पहोचके अर पणमेशर के अनुग्रह नै देखके राजी होया, अर सारया ताहीं उपदेश दिया के तन-मन लगाके प्रभु तै लिपटे रहो। 24 ओ एक भला माणस था, अर पवित्र आत्मा अर बिश्वास तै पूरा भरया था; अर दुसरे घण-खरे आदमी प्रभु म्ह आ मिले। 25 फेर ओ शाऊल नै टोहण कै खातर तरसुस नै चल्या गया। 26 जिब्ब ओ उसतै फेट्या तो उस ताहीं अन्ताकिया ल्याया; अर इसा होया के वे एक साल ताहीं कलीसिया कै गेल्या मिलदे अर घणे आदमियां ताहीं उपदेश देन्दे रहे; अर चेले सारया तै पहल्या अन्ताकिया ए म्ह मसीही कुहाए। 27 उन्नै दिनां म्ह कई नब्बी यरुशलम तै अन्ताकिया आए। 28 उनम्ह तै अगबुस नामक एक नै खड़े होके आत्मा की प्रेरणा तै न्यू बताया के सारी दुनिया म्ह बड्डी अकाल पड़ेगा--- ओ अकाल क्लौदियुस के टेम म्ह पड़या। 29 फेर चेल्यां नै फैसला लिया के हरेक आपणी-आपणी पूंजी कै मुताबिक यहूदिया म्ह रहणआळे भाईया की मदद कै खातर कीमे भेजे। 30 उन्नै इस तरियां ए करया; अर बरनबास अर शाऊल कै हाथ प्राचीनों कै धोरै कीमे भेज दिया।

### पतरस की जेळ तै मुक्ति

12 उस टेम हेरोदेश राजे नै कलीसिया के कई माणसां ताहीं सताण कै खातर उन पै हाथ गेरे। 2 उसनै युहन्ना के भाई याकूब ताहीं तलवार तै मरवा दिया। 3 जिब्ब उसनै देख्या के यहूदी माणस इसतै राजी होवें सै, तो उसनै पतरस ताहीं भी पकड़ लिया। वे दिन अखमीरी रोड्डी के थे। 4 उसनै उस ताहीं पकड़के जेळ म्ह गेरया, अर चार-चार सिपाहियां के चार पहरया म्ह राख्या; इस बिचार तै के फसह कै बाद उसनै आदमियां कै श्यामी ल्यावै। 5 जेळ म्ह पतरस बन्द था; पर कलीसिया उसके खातर लौ लाके पणमेशर तै प्रार्थना करण लागरी थी। 6 जिब्ब हेरोदेश उसनै आदमियां कै श्यामी ल्याण नै था, उरसे रात पतरस दो जंजीरा तै बंध्या होइ दो सिपाहियां कै बिचाळै सोण लागरया था; अर पहरदार दरवाजे पै जेळ की रुखाळी कररे थे। 7 तो देख्यो, प्रभु का एक सुर्गदुत आण खड़या होया अर उस कोठड़ी म्ह चाँदणा चमक्या, अर उसनै पतरस की पासळी पै हाथ मारके उस ताहीं जगाया अर बोल्या, “उठ, तोळ कर।” अर उसके हाथां तै जंजीर खुलके ढह पड़ी। 8 फेर सुर्गदुत नै उसतै कह्या, “कमर बाँध, अर आपणे जुत्ते पहर ले।” उसनै उरसे ढाळ करया। फेर उसनै उसतै कह्या, “आपणे लत्ते पहरके मेरे पाछे हो ले।” 9 ओ लिकड़के उसके पाछे हो लिया; पर उसनै न्यू नीं बेरा था के जो कीमे सुर्गदुत कर रह्या सै ओ साच्ची सै, बल्के न्यू समझै था के जणु मै दर्शन देखण लागरया सूं। 10 फेर वे पहल्ये अर दुसरे पहर तै लिकड़के उस लोहे के फाटक पै पहोचे, जो नगर की ओड़ सै। ओ उनके खातर आपणे-आपै खुलग्या, अर वे लिकड़के एक गळी म्ह गए, अर जिब्बे ए सुर्गदुत उसनै छोड़के चल्या गया। 11 फेर पतरस नै ढेठ करके कह्या, “इब मन्नै सच का बेरा पटया सै के प्रभु नै आपणा सुर्गदुत खन्दाके मेरै ताहीं हेरोदेश के हाथां तै छुटा लिया, अर यहूदियां की सारी मनसा पै पाणी फेर दिया सै।” 12 न्यू जाणके ओ उस युहन्ना की माँ मरियम कै घरा आया, जो मरकुस कुहवावै सै। ओडै घणे आदमी कड़े होके प्रार्थना करण लागरे थे। 13 जिब्ब उन्नै फाटक की खिड़की खटखटाई, तो रुदे नामक एक नौकरानी देखण नै आई। 14 पतरस का बोल पिच्छाणके उसनै खुशी के मारे फाटक नीं खोल्या, पर भाजके भीत्तर गई अर बताया के पतरस दरवाजे पै खड़या सै। 15 उन्नै उसतै कह्या, “तू बावळी सै।” पर वा पके तौर तै बोली के इसाए

सैं। फेर उन्नै कह्या, “उसका सुर्गदुत होगा।” 16 पर पतरस खटखटान्दा ए रहया : आखर म्ह उन्नै खिड़की खोली, अर उस ताहीं देखकै हैरान होग्ये। 17 फेर उसनै उन ताहीं हाथ तै इशारा करया के बोल-बाह्ले रहवै; अर उन ताहीं बताया के प्रभु किस ढाळ उस ताहीं जेळ तै लिकाड लीआया सैं। फेर बोल्या, “याकूब अर दुसरे भाईयां नै या बात बता दियो।” फेर लिकड़कै दूसरी जंगहा चल्या गया।

18 तड़कए नै सिपाहिया म्ह घणी उघड़-धुघड़ माच गी के पतरस का के होया। 19 जिब्व हेरोदेश नै उसकी टोहया-टाही करी अर नी मिल्या, तो पहरेदारा की जाँच करकै हुक्म दिया के वे मार दिये जावैं; अर ओ यहूदिया नै छोड़कै कैसरिया म्ह जाकै रहण लाग्या।

### हेरोदेस की मौत

20 हेरोदेश सूर-सैदा के आदमियां तै घणा नाराज था। ज्यांतै के वे एक चित्त होकै उसके धोरै आये, अर बलास्तुस नै जो राजा का एक कर्मचारी था, मनाकै मेल करणा चाहया; क्यूँके राजै के देश म्ह उनकै देश का पाळन-पोषण होवै था। 21 खास दिन पै हेरोदेश राजसी-बाणा पहरकै सिंहासन पै बैठ्या, अर उन ताहीं खुलासा करण लाग्या। 22 फेर आदमियां नै रुक्का मारया, “यो तो माणस का नी ईश्वर का बोल सैं।” 23 उससे घड़ी प्रभु कै एक सुर्गदुत नै जिब्वे आकै उस ताहीं मारया, क्यूँके उसनै पणमेशर ताहीं महिमा कोनी दी; अर ओ कीड़े पड़कै मरया। 24 पर पणमेशर का बचन बढ़ा अर फैलदा गया।

25 जिब्व बरनबास अर शाऊल नै आपणी सेवा पूरी कर ली तो युहन्ना जो मरकुस कुहवावै था, गेल्या लेकै यरुशलेम तै बोहड़ै।

### बरनबास अर शाऊल का भेजा जाणा

13 अन्ताकिया की कलीसिया म्ह कई नब्बी अर उपदेशक थे; अर्थात् : बरनबास अर शमौन जो नीगर कुहवावै सैं; अर लूकियुस कुरेनी, अर चौथाई देश के राजा हेरोदेश का दूधभाई मनाहेम, अर शाऊल। 2 जिब्व वे ब्रत सुदा प्रभु की उपासना करण लागरे थे, तो पवित्र आत्मा नै कह्या, “मेरै खातर बरनबास अर शाऊल नै उस काम कै खातर न्यारा करो जिसकै खातर मन्त्रै उन ताहीं बुलाया सैं।” 3 फेर उन्नै ब्रत अर प्रार्थना करकै अर उन पै हाथ धरकै उन ताहीं बिदा करया।

### पौलुस की पहलड़ी प्रचार-यात्रा

4 आखर म्ह वे पवित्र आत्मा के खन्दाए होये सिलूकिया नै गये, अर ओड़ै तै जहाज पै चढ़कै साइप्रस कान चाल्ले; 5 अर सलमीस म्ह पहोचकै, पणमेशर का बचन यहूदियां के आरधनालयों म्ह सुणाया। युहन्ना उनका सेवक था। 6 वे उस सारै टापू म्ह होंदे होये पाफुस ताहीं पहोचै। ओड़ै उन्नै बार-यीशु नामक एक यहूदी टोन्हा अर झूठा नब्बी फेट्या। 7 ओ हाकिम सिरिगियुस पौलुस कै गेल्या था, जो श्याणा माणस था। उसनै बरनबास अर शाऊल ताहीं आपणे धोरै बुलाकै पणमेशर का बचन सुनणा चाहया। 8 पर इलीमास टोन्हे नै, क्यूँके योए उसकै नाम का मतलब सैं, उनका बिरोध करकै हाकिम ताहीं बिश्वास करण तै रोकणा चाहया। 9 फेर शाऊल नै जिसका नाम पौलुस भी सैं, पवित्र आत्मा तै पूरी तरियां भरकै उसकी ओड़ टकटकी लाकै देख्या अर बोल्या, 10 “हे साबतै कपट अर साबती श्याणपत तै भरे होड़ शैतान की ऊलाद, सारे धर्मा के बैरी, के तू प्रभु के सीधे राही नै टेढ़ी करणा नी छोड़ैगा? 11 इब लखा, प्रभु का हाथ तेरै पै लागरया सैं; अर तू कीमे बख्त ताहीं आंधा रहवैगा अर सूरज नै कोनी देखैगा।” फेर जिब्वे धुंधलापण अर अन्धेरा उस पै छा गया, ओ उराण-पराण टटोळण लाग्या ताके कोए उसका हाथ पकड़कै ले चाल्ले। 12 फेर हाकिम नै जो होया था उस ताहीं देखकै अर प्रभु के उपदेश तै हैरान होकै बिश्वास करया।

### पिसिदिया के अन्ताकिया म्ह

13 पौलुस अर उसके ढब्बी पाफुस तै जहाज खोलकै पंफूलीया के पिरगा म्ह आये; अर युहन्ना उन्नै छोड़कै यरुशलेम बोहड़ गया। 14 पिरगा तै आगे

बढ़कै वे पिसिदिया के अन्ताकिया म्ह पहोचै; अर सब्त के दिन आराधनालय म्ह जाकै बैठग्ये। 15 व्यवस्था अर नब्बियाँ की किताब नै पढ़ण के पाच्छै आराधनालय के सरदारानै उनकै धोरै कुहवा भेज्या, “हे भाईयो, जै आदमियां के उपदेश कै खातर थारै मन म्ह कोए बात हो तो कहो।” 16 फेर पौलुस नै खड़े होकै अर हाथ तै इशारा करकै कह्या, “हे इस्राएलियो, अर पणमेशर तै डरणआळो, सुणो : 17 इन इस्राएली आदमियां के पणमेशर नै म्हारै बाप-दाद्या ताहीं छांट लिया, अर जिब्व वे आदमी मिस्र देश म्ह परदेशी होकै रहवै थे, तो उनकी बढ़ोत्तरी करी; अर ठाड्डे हाथां तै लिकाड ल्याया। 18 ओ कोए चालीस साल ताहीं जंगळ म्ह उनकी सहण करदा रहया, 19 अर कनान देश की सात जात्तां का नास करकै उनका देश कोए साढ़े चार सौ साल म्ह इनकी बसियत म्ह कर दिया। 20 इसकै पाच्छै उसनै शमूल नब्बी ताहीं उनम्ह जज ठहराए। 21 उसकै पाच्छै उन्नै एक राजा माँग्या: फेर पणमेशर नै चालीस साल कै खातर बिन्यामीन के गोत्र म्ह तै एक माणस, यानिके किश के बेटे शाऊल ताहीं उनपै राजा ठहराया। 22 फेर उस ताहीं न्यारा करकै दाऊद ताहीं उनका राजा बणाया; जिसकै बारै म्ह उसनै गवाही दी, ‘मन्त्रै एक माणस यिशै बेट्टा दाऊद, मेरै मन कै मुताबिक मिलग्या सैं; ओए मेरी सारी मर्जी पूरी करैगा।’ 23 इससे पीढ़ी म्ह तै पणमेशर नै आपणे प्रण कै मुताबिक इस्राएल कै धोरै एक उद्धारकर्ता, यानिके यीशु खन्दाया। 24 जिसकै आण तै पहल्या युहन्ना नै सारे इस्राएलिया म्ह मन-फिराव के बपतिस्मा का प्रचार करया। 25 जिब्व युहन्ना आपणी सेवा पूरी करण पै था, तो उसनै कह्या, ‘थम मन्त्रै के समझो सो? मै ओ कोनी! बल्के देखो, मेरै पाच्छै एक आणआळा सैं, जिसकै पायां की जुत्ती भी मै खोल्लण जोग्गा कोनी।’

26 “हे भाईयो, थम जो अब्राहम की ऊलाद सो; अर थम जो पणमेशर तै डरो सो, थारै धोरै इस उद्धार का बचन खन्दाया गया सैं। 27 क्यूँके यरुशलेम के रहणआळो अर उनकै सरदारानै, ना उस ताहीं पिच्छाणा अर ना नब्बियाँ बात समझीं, जो हरेक सब्त के दिन पढ़ी जावैं सैं, ज्यांतै उस ताहीं कसूरवार ठहराकै उन बात्तां नै पूरा करया। 28 उन्नै मारण के जोग्गा कोए कसूर उसम्ह कोनी पाया, फेरभी पिलातुस तै बिनती करी, के ओ मार दिया जावै। 29 जिब्व उन्नै उसकै बारै म्ह लिक्खी होई सारी बात पूरी करी, तो उस ताहीं कूस पै तै उतारकै कब्र म्ह धरया। 30 पर पणमेशर उसताहीं मरे होया म्ह तै जिन्दा करया, 31 अर ओ उन ताहीं जो उसकै गेल्या गलील तै यरुशलेम आये थे, घणे दिनां ताहीं दिख्दा रहया; आदमियां कै श्यामी इब वैए उसके गवाह सैं। 32 हम थमनै उस प्रण कै बारै म्ह जो बाप-दाद्या तै करया गया था, यो सुसमाचार सुणावां सां, 33 के पणमेशर नै यीशु ताहीं जिन्दा करके, ओए प्रण म्हारी ऊलाद कै खातर पूरा करया; जिसा दुसरे भजन म्ह ही लिख्या सैं, ‘तू मेरा बेट्टा सैं; आज मन्त्रै ए तेरै ताहीं पैदा करया सैं।’ 34 अर उसकै इस तरियां तै मरे होया म्ह तै जिन्दा होण कै बारै म्ह भी के ओ कदे नीं सड़ै, उसनै यों कहया सैं, ‘मै दाऊद पै की पवित्र अर अटल दया तेरै पै करूँगा।’

35 ज्यांतै उसनै एक और भजन म्ह भी कहया सैं, ‘तू आपणे पवित्र माणस नै सड़न नीं देवैगा।’ 36 क्यूँके दाऊद तो पणमेशर की मर्जी कै मुताबिक आपणे टेम म्ह सेवा करके सो गया, अर आपणे बाप-दाद्या म्ह जा मिल्या, अर सड़ भी गया। 37 पर जिस ताहीं पणमेशर जिन्दा करया, ओ सड़न कोनी पाया। 38 ज्यांतै, हे भाईयो, थम जाण ल्यो के इससे के जरिये पापां की माफ़ी का सुसमाचार थारै ताहीं दिया जावै सैं; 39 अर जिन बात्तां म्ह थम मूसा के व्यवस्था के जरिये बेकसूर कोनी ठहर सको थे, उन्ने सारया म्ह हरेक बिश्वास करणीया उसकै जरिये बेकसूर ठहरै सैं। 40 ज्यांतै चौकन्ने रहो, इसा ना हो के जो नब्बियाँ की किताब म्ह आया सैं, थारै पै भी आण पड़ै : 41 ‘हे बुराई करणआळो, देखो, अर हैरान होवो, अर मिट जाओ; क्यूँके मै थारै दिनां म्ह एक काम करूँ सुं, इसा काम के जै कोए थारै तै उसका जिक्का करै, तो थम भी बिश्वास कोनी करोगे।’

42 उनकै बाहरण लिकड़दे टेम आदमी उनतै बिनती करण लागे के आगलै सब्त के दिन म्हारै ताहीं ये बात फेर सुणाई जावै। 43 जिब्व पंचायत उठ ली फेर यहूदियां अर यहूदी मत म्ह आये होये भगतां म्ह तै घण-खरे पौलुस अर



बरनबास के पाच्छे हो लिये; अर उन्ने उनतै बात करके समझाया के पणमेशर के अनुग्रह म्ह बणे रहो।

### पौलुस के जरिये गैर-जात्तां म्ह प्रचार की सरुआत

44 आगलै सब्त के दिन नगर के तकरीबन सारे आदमी पणमेशर का बचन सुणन नै कहे हो गये। 45 पर यहूदी भीड़ नै देखके डह तै भरगे, अर बुराई करदे होये पौलुस की बात्तां के बिरोध म्ह बोझण लागे। 46 फेर पौलुस अर बरनबास हिम्मत करके कहण लागे, “जरूरी था के पणमेशर का बचन पहल्या थारै तै सुणाया जान्दा; पर जिब्व थम उसनै दूर हटाओ सो, अर आपणे ताहीं अनन्त जीवन जोग्गा बनाओ, तो देखखो, हम गैर-जात्तां के कात्री फिरां सां। 47 क्यूँके प्रभु नै म्हारै ताहीं यो हुक्म दिया सै, ‘मन्ने तेरै ताहीं गैर-जात्तां के खातर चाँदणा ठहराया, ताके तू धरती के छोर ताहीं उद्धार का दरवाजा हो’।”

48 न्यू सुणके गैर-जात्तां आळे राजी होये, अर पणमेशर के बचन की बड़ाई करण लागे; अर जितने अनन्त जीवन के खातर ठहराए गये थे, उन्ने बिश्वास करया। 49 फेर प्रभु का बचन उस सारे देश म्ह फैलाण लाग्या। 50 पर यहूदियां नै भगत अर आच्छे खानदान की लुगाईयां ताहीं अर नगर के खास आदमियां ताहीं उकसाया, अर पौलुस अर बरनबास के खिलाफ रोळा कराके उन ताहीं आपणी सीम तै लिकाड़ दिया। 51 फेर वे उनके श्यामी पायां की धुळ झाड़के इकुनियुम नै चले गये। 52 अर चेले आनन्द अर पवित्र आत्मा तै भरदे चले गये।

### इकुनियुम म्ह पौलुस अर बरनबास

14 इकुनियुम म्ह इसा होया के वे यहूदियां के आराधनालय म्ह गेल-गेल गये, अर इस ढाळ बात करी के यहूदियां अर युनानियां म्ह घण-खरया नै बिश्वास करया। 2 पर बिश्वास ना करणआळे यहूदियां नै गैर-जात्तां के मन भाईयां के बिरोध म्ह उकसाये अर कडुवापण पैदा करया। 3 वे घणे दिन ताहीं उड़ै रहे, अर प्रभु के भरोसे पै हिम्मत तै बात करै थे; अर ओ उनके हाथां तै निशान अर अनोक्खे काम करवाके आपणे अनुग्रह के बचन पै गवाही देवै था। 4 पर नगर के आदमियां म्ह फूट पड़गी थी, इसतै घणए तो यहूदियां कात्री अर घणए प्रेरितां कात्री होग्ये। 5 पर जिब्व गैर-जात्तां आळे अर यहूदी उनकी बेइज्जती करण नै अर उनके पत्थर मारण के खातर आपणे सरदारां सुदा उन कात्री भाजे; 6 फेर वे इस बात नै जाण गे अर लुकाउनिया अर लुस्त्रा अर दिरबे नगरां म्ह, अर लोवै-धोरै के प्रदेशां म्ह भाजगे 7 अर ओड़ै सुसमाचार सुनाण लागे।

### लुस्त्रा अर दिरबे म्ह

8 लुस्त्रा म्ह एक माणस बैठ्या था, जो पायां तै लाचार था। ओ जन्म तै ए लंगड़ा अर कदे नी चाल्या था। 9 ओ पौलुस नै बात करदे सुणै था। पौलुस नै उसकी ओड़ टकटकी लाके देख्या के उसनै चंगा होण का बिश्वास सै, 10 अर ठाडु आवाज म्ह बोल्या, “आपणे पायां के बळ सीधा खड़या हो।” फेर ओ उच्छळके चालण-फिरण लाग्या। 11 आदमियां नै पौलुस का यो काम देखके लुकाउनिया की भाषा म्ह ठाडु आवाज म्ह कह्या, “देवता माणस के रूप म्ह होके म्हारै धोरै उतर आये सै।” 12 उन्ने बरनबास ताहीं ज्यूस, अर पौलुस ताहीं हिरमेस कह्या क्यूँके ओ बात करण म्ह खास था। 13 ज्यूस के उस मन्दर का पुजारी जो उनके नगर के श्यामी था, बैळद अर फुल्ला के हार फाटकां पै ल्याके आदमियां के गेल्या बलिदान करणा चाहवै था। 14 पर बरनबास अर पौलुस प्रेरितां नै जिब्व यो सुणया, तो आपणे लत्ते पाड़े अर भीड़ म्ह लपके, अर रुक्का मारके कहण लागे, 15 “हे माणसो, थम के करो सो? हम भी तो थारे तरियां दुःख-सुख भोगण आळे माणस सां। अर थमनै सुसमाचार सुणावां सां के थम इन बेकार चिज्जां तै न्यारे होके जिन्दे पणमेशर के कात्री फिरो, जिसनै सुर्ग अर धरती अर समुन्दर अर जो कीमे उनम्ह सै बणाया सै। 16 उसनै गुजरे बख्तां म्ह सारी जात्तां ताहीं आपणे-आपणे रास्तया पै चालण दिया। 17 तो भी उसनै आपणे आप ताहीं बेगवाह कोनी छोड्या; बल्के ओ भलाई करदा रहया, अर अकास तै मिह अर फळआळी

समो देके थारै मन नै खाणा अर खुशी तै भरदा रहया।” 18 न्यू कहके भी उन्ने आदमियां ताहीं बड़ी मुश्किलां तै रोक्या के उनके खातर बलिदान ना करै।

19 पर कुछ यहूदिया नै अन्ताकिया अर इकुनियुम तै आके आदमियां ताहीं आपणी ओड़ कर लिया, अर पौलुस पै पत्थर बरसाए, अर मरया होड़ सोचके उस ताहीं नगर के बाहरण घसीट लेगे। 20 पर चेले जिब्व उसके चौगरदेके आण खड़े होये, तो ओ उठके नगर म्ह गया अर दुसरे दिन बरनबास के गेल्या दिरबे कात्री चल्या गया।

### सीरिया के अन्ताकिया नै बोहड़ना

21 वे उस नगर के आदमियां ताहीं सुसमाचार सुणाके अर घणे चेले बणाके, लुस्त्रा अर इकुनियुम अर अन्ताकिया नै बोहड़ आये, 22 अर चेल्यां के मनां नै स्थिर ररे अर यो उपदेश देवै थे के बिश्वास म्ह बणे रहो; अर न्यू कहवै थे, “हमनै घणे दुःख ठाके पणमेशर के राज्य म्ह बड़ना होगा।” 23 अर उन्ने हरेक कलीसिया म्ह उनके खातर प्राचीन ठहराए, अर ब्रत सुदा प्रार्थना करके उन ताहीं प्रभु के हाथां म्ह सौप्या जिस पै उन्ने बिश्वास करया था।

24 फेर पिसिदिया तै होंदे होए वे पंफुलिया पहोचे; 25 फेर पिरगा म्ह बचन सुणाके अत्तलिया म्ह आये, 26 अर ओड़ै तै वे जहाज पै अन्ताकिया गये, जित वे उस काम के खातर जो उन्ने पूरा करया था पणमेशर के अनुग्रह म्ह सौपे गये थे। 27 ओड़ै पहोचके उन्ने कलीसिया कड़ी करी अर बताया के पणमेशर नै उनके गेल्या होके किसे बड़े-बड़े काम करे, अर गैर-जात्तां के खातर बिश्वास का बारणा खोल दिया। 28 अर वे चेल्यां के गेल्या घणे दिन ताहीं ररे।

### यरुशलम की सभा

15 फेर कुछ आदमी यहूदिया तै आके भाईयां नै सिखाण लागे : “जे मूसा की रीत पै थारा खतना नी हो तो थम उद्धार कोनी पा सकदे।” 2 जिब्व पौलुस अर बरनबास का उनतै घणा रोळा अर बहस होई तो यो ठहराया गया के पौलुस अर बरनबास अर उनम्ह तै कीमे माणस इस बात के बारै म्ह प्रेरितां अर प्राचीनां के धोरै यरुशलम नै जावै। 3 आखर म्ह कलीसिया नै उन ताहीं कुछ दूर ताहीं पहोचाया; अर वे फीनीके अर सामरिया तै होंदे होये गैर-जात्तां के मन फिराण का सुसमाचार सुणान्दे गये, अर सारे भाई घणे राजी होये। 4 जिब्व वे यरुशलम पहोचे, तो कलीसिया अर प्रेरित अर प्राचीन उनतै खुशी के गेल फेटटे, अर उन्ने बताया के पणमेशर नै उनके गेल्या होके किसे-किसे काम करे थे। 5 पर फरिसियां के पंथ म्ह तै जिन्नै बिश्वास करया था, उनम्ह तै कितनयां नै उठके कह्या, “उन ताहीं खतना कारण अर मूसा के व्यवस्था नै मानण का हुक्म देणा चाहिए।”

6 फेर प्रेरित अर प्राचीन इस बात के बारै म्ह बिचार करण के खातर कड़े होए। 7 फेर पतरस नै घणी बहस हो जाण के पाच्छे खड़े होके उनतै कह्या, “हे भाईयो, थमनै बेरा सै के घणे दिन होए पणमेशर नै थारै म्ह तै मेरै ताहीं छंट लिया के मेरै मुँह तै गैर-जात्तां आळे सुसमाचार का बचन सुणके बिश्वास करै। 8 मन के जाँचणआळे पणमेशर नै उन ताहीं भी म्हारै की तरियां पवित्र आत्मा देके उनकी गवाही दी; 9 अर बिश्वास के जरिये उनके मन शुद्ध करके म्हारै म्ह अर उन म्ह कीमे फर्क कोनी राख्या। 10 तो इब थम क्यातै पणमेशर का हिम्तान ल्यो सो के चेल्यां की नाड़ पै इसा जुआ धरो, जिसनै ना म्हारै बाप-दादे ठा सकै थे अर ना हम ठा सकां सां? 11 हम्बै, म्हारा यो यकीन सै के जिस तरियां तै वे प्रभु यीशु के अनुग्रह तै उद्धार पावैंगे; उस्से तरियां तै हम भी पावांगे।”

12 फेर सारी पंचायत बोल-बाली बरनबास अर पौलुस की सुणन लागी, के पणमेशर नै उनके जरिये गैर-जात्तां म्ह किसे बड़े-बड़े निशान, अर अनोक्खे काम दिखाए। 13 जिब्व वे चुप होये तो याकूब कहण लाग्या, “हे भाईयो, मेरी सुणो। 14 शमौन नै बताया के पणमेशर नै पहल्ये-पहल गैर-जात्तां पै कीसी दया की निगाँह करी के उनम्ह तै आपणे नाम के खातर एक प्रजा बणा ले। 15 इसतै नब्बियां की बात भी मिलै सै, जिसा के लिख्या सै,

16 ‘इसके पाच्छे मै फेर आके दाऊद का पड़या होड़ डेरा उठाऊँगा, अर उसके खण्डरां नै दुबारा बणाऊँगा, अर उस ताहीं खड़या करूँगा, 17 ज्यातै

के बचे होड़ माणस, यानिके सारी गैर-जात जो मेरे नाम की कुहवावै सैं, प्रभु नै टोहवैं, 18 न्यू ओए प्रभु कहवै सैं जो दुनिया की सरुआत तै इन बात्तां की खबर देँदा आया सैं।

19 ज्यांतै मेरा बिचार यो सैं के गैर-जात्तां म्ह तै जो आदमी पणमेशर के कात्री फिरैं सैं, हम उन ताहीं दुःख ना देवां; 20 पर उन ताहीं लिख भेजै के वे मूर्तियाँ की अशुद्धताओं अर जारी अर गला घाँटे होया के मांस तै अर लहू तै दूर रहे। 21 क्यूँके गुजरे बख्तां तै नगर-नगर मूसा के व्यवस्था का प्रचार करण आळे होदे चले आये सैं, अर वा हरेक सब्त के दिन आराधनालय म्ह पढ़ी जावै सैं।”

### गैर-जात बिश्वासियाँ ताहीं चिड़ी

22 फेर सारी कलीसिया सुदा प्रेरितां अर प्राचीनां नै आच्छा लाग्या के आपणे म्ह तै कीमे माणसां नै छाँटे, यानिके यहूदा जो बरसब्बा कुहवावै सैं, अर सिलास ताहीं जो भाईयां म्ह मुखिया थे; अर उन ताहीं पौलुस अर बरनबास के गेल्या अन्ताकिया खन्दावै। 23 उन्नै उनके हाथ यो लिख खन्दाया : “अन्ताकिया अर सीरिया अर किलिकिया के रहणीये भाईयां नै जो गैर-जात्तां म्ह तै सैं, प्रेरितां अर प्राचीन भाईयां का नमस्कार। 24 हमनै सुणयां सैं के म्हारै म्ह तै कुछां नै ओड़ै जाकै, थारै ताहीं आपणी बात्तां तै डरा दिया; अर थारै मन उलट दिये सैं पर हमनै उन ताहीं हुक्म कोनी दिया था। 25 इसकरकै हमनै एक चित होकै ठीक समझया के छोटे होड़ माणसां ताहीं आपणे प्यारे बरनबास अर पौलुस के गेल्या थारै धोरै खन्दावां। 26 ये इसे माणस सैं जिन्नै आपणी ज्यांन म्हारै प्रभु यीशु मसीह के नाम के खातर जोख्खम म्ह गेरी सैं। 27 ज्यांतै हमनै यहूदा अर सिलास ताहीं खन्दाया सैं, जो आपणे मुँह तै भी ये बात कह देवैगैं। 28 पवित्र आत्मा नै अर हमनै ठीक जाण पाट्टी के इन जरूरी बात्तां नै छोड़, थारै पै और बोझ ना गेरै; 29 के थम मूर्तियाँ पै बलि करे होया तै अर लहू तै, अर गळा घाँटे होया के मांस तै, अर जारी तै दूर रहो। इनतै दूर रहो तो थारा भला होगा। आगै शुभ।”

30 फेर वे बिदा होकै अन्ताकिया पहाँचे, अर पंचायत नै कड़ी करकै वा चिड़ी उन ताहीं दे दी। 31 वे चिड़ी पढ़कै उस उपदेश की बात तै घणे राज्जी होये। 32 यहूदा अर सीलास नै जो आप भी नब्बी थे, घणी बात्तां तै भाईयां ताहीं उपदेश देकै पक्का करया। 33 वे कुछे दिन रहकै, भाईयां नै शान्ति के गेल्या बिदा होए के आपणे खन्दाणआळा के धोरै जावै। 34 (पर सीलास नै ओड़ै रहणा आच्छा लाग्या।) 35 पर पौलुस अर बरनबास अन्ताकिया म्ह रह गये : अर और घण-खरे आदमियां के गेल्या प्रभु के बचन का उपदेश करदे अर सुसमाचार सुणान्दे रहे।

### पौलुस की दूसरी प्रचार-यात्रा; पौलुस अर बरनबास म्ह मतभेद

36 कुछे दिनां पाच्छै पौलुस नै बरनबास तै कह्या, “जिन-जिन नगरां म्ह हमनै प्रभु का बचन सुणया था, आओ, फेर उनम्ह चालकै आपणे भाईयां ताहीं देखे के वे किस तरियां सैं।” 37 फेर बरनबास नै यहूदा ताहीं जो मरकुस कुहवावै सैं, गेल्या लेण का बिचार करया। 38 पर पौलुस नै उस ताहीं जो पफूलिया म्ह उनतै न्यारा होग्या था, अर काम पै उनके गेल्या कोनी गया, गेल्या ले जाणा सई कोनी समझया। 39 आखर म्ह इसा रोळा होया के वे एक-दुसरे तै न्यारे पाटगे; अर बरनबास, मरकुस नै लेकै जहाज पै साइप्रस चल्या गया। 40 पर पौलुस नै सीलास ताहीं छांट लिया, अर भाईयां तै पणमेशर के अनुग्रह म्ह सौंपया जाकै ओड़ै तै चल्या गया; 41 अर ओ कलिसियाँ ताहीं स्थिर करदा होया सीरिया अर किलिकिया तै होंदे होए लिकड़या।

### पौलुस का तीमुथियुस ताहीं गेल लेणा

16 फेर वो दीरबे अर लुस्त्रा म्ह भी गया। ओड़ै तिमथियुस नाम का एक चेला था, जो किसे बिश्वासी यहूदिनी का बेटा था, पर उसका बाप यूनानी था। 2 वो लुस्त्रा अर इकुनियुम के भाईयां म्ह बढ़िया नाम्मी था। 3 पौलुस की मर्जी या थी के वो उसके गेल्या जावै; अर जो यहूदी माणस उन जंगहा म्ह थे उनके कारण उन्नै उनका खतना करया, क्यूँके वे सारे जाणै थे,

के उनका बाप यूनानी था। 4 अर नगर-नगर जांदे होड़ वे उन तौर-तरीकियां नै जो यरुशलैम के प्रेरितां अर प्राचीनां नै ठहराई थी, माणस के खातर खन्दाया करै थे। 5 इस तरियां कलीसिया बिश्वास म्ह पक्की होंदी गई अर गिणती दिन-ब-दिन बढ़ती गई।

### त्रोआस म्ह : पौलुस का दर्शन

6 वे फ्रुगिया अर गलातिया प्रदेशां म्ह तै होकै गये, क्यूँके पवित्र आत्मा नै उन्नै एशिया म्ह बचन सुनाण तै मना करया। 7 उन्नै मूसिया के लोवै पहोचकै, बितूनिया म्ह जाणा चाहया; पर यीशु की आत्मा नै उन ताहीं जाण कोनी दिया। 8 आखर म्ह वे मूसिया तै होकै त्रोआस म्ह आये। 9 ओड़ै पौलुस नै रात नै दर्शन देख्या के एक मकिदुनी माणस खड़या होया उनतै बिनती करकै कहण लागरया सैं, “पार उतर के मकिदुनिया म्ह आ, अर म्हारी मदद कर।” 10 उसकै यो दर्शन देखदए हम नै जिब्बे मकिदुनिया जाणा चाहया, न्यू सोच के के पणमेशर नै म्हारै ताहीं उन तै सुसमाचार सुनाण के खातर बुलाया सैं।

### फिलिप्पी म्ह : लुदिया का हृदय-परिवर्तन

11 इसकरकै त्रोआस तै जहाज खोलकै हम सीधे सुमात्राके अर दुसरे दिन नियापुलिस म्ह आये। 12 ओड़ै तै हम फिलिप्पी पहाँचे, जो मकिदुनिया प्रान्त का खास नगर अर रोमिया का मोहला सैं; अर हम उस नगर कुछे दिन रहे। 13 सब्त के दिन हम नगर के फाटक के बाहरण नदी के कंठारै न्यू सोच के गये के ओड़ै प्रार्थना करण की जंगहा होगी, अर बैठ के उन लुगाईयां तै जो कड़ी होई थी, बतळाण लागे। 14 लुदिया नाम की थुआथिरा नगर की बैजनी लत्ते बेचण आळी एक भगतणी सुनण लागरी थी। प्रभु नै उसका मन खोलया के वा पौलुस की बात्तां पै चित्त लगावै। 15 जिब्बे उसनै आपणे कुन्बै सुदा बपतिस्मा लिया, तो उसनै म्हारै तै बिनती करी, “जै थम मन्नै प्रभु की बिश्वासिणी समझो सो, तो चालकै मेरे घर म्ह रहो,” अर वा हमनै मनाके ले गई।

### पौलुस अर सीलास जेळ म्ह

16 जिब्बे हम प्रार्थना करण की जंगहा पै जाण लागरे थे, तो हमनै एक दासी फेडी जिसम्ह भावी कहण आळी आत्मा थी; अर भावी कहण तै आपणे मालिका के खातर कीमे आच्छा ए कमा लेवै थी। 17 वा पौलुस के अर म्हारै पाच्छै आकै नै किलकी मारण लागी, “ये माणस परमप्रधान पणमेशर के दास सैं, जो म्हार ताहीं उद्धार के राह की कहानी सुणावै सैं।” 18 वा घणे दिनां ताहीं न्यू ए करदी रही; पर पौलुस काल होग्या, अर बोहड़कै उस आत्मा तै बोल्या, “मै तन्नै यीशु मसीह के नाम तै हुक्म छुँ सूँ के उस म्ह तै बाहरण लिकड़ जा।” अर वा उस्से टेम लिकड़ गी।

19 जिब्बे उसके मालिकां नै देख्या के म्हारी कमाई की आस खत्म होगी, तो पौलुस अर सीलास नै पकड़ के चौक म्ह प्रधानां के धोरै खींच ल्याए; 20 . अर उन ताहीं फौजदारी के हाकिमां के धोरै ली याए अर बोले, “ये माणस जो यहूदी सैं, म्हारे नगर म्ह रोळा मचाण लागरे सैं; 21 . अर इसे रीत-रिवाज बतावै सैं, जिन ताहीं हम रोमियां के खातर अपणाना सई कोनी।” 22 फेर भीड़ के माणस उनके बिरोध म्ह कट्टे होकै उन पै चढ़ याए, अर हाकिमां नै उनके लत्ते पाड़ के उतार दिये, अर उनके बैत मारण का हुक्म दिया। 23 घणी बैत मारे पाच्छै उन्नै उन ताहीं जेळ म्ह गेर दिया अर थानेदार ताहीं हुक्म दिया के उन्नै चौक्कस राखिये। 24 उसनै इसा हुक्म पाकै उन ताहीं भीत्तरली कोठड़ी म्ह राख्या अर उनके पाँ काठ म्ह ठोक दिये।

### पौलुस अर सीलास की जेळ तै मुक्ति

25 . आधी रात के टेम पौलुस अर सीलास प्रार्थना करदे होये भजन गाण लागरे थे, अर कैदी उनकी सुणन लागरे थे। 26 इतनै म्ह चाणचक बड्डा हाल्लण आग्या, उरै ताहीं के जेळ की नींव भी हालगी, अर जिब्बे सारे दरवाजे खुलगे; अर सारया के बन्धन खुलकै पड़गे। 27 थानेदार जाग्या, अर जेळ के दरवाजे खुले देख के समझ गया के कैदी भाजगे सैं, इस करके उसनै तलवार खींच के खुद ताहीं मारणा चाहया। 28 पर पौलुस नै ठाडू आवाज म्ह रुक्का

मारया, “आपणे आप नै कीमे नुकसान ना पहोचाइये, क्यूँके हम सारे उरै ए सां।” 29 फेर ओ दिवां मंगाकै भीतराण लपक्या, अर काम्बदा होया पौलुस अर सीलास कै आगै पड़या; 30 अर उन ताहीं बाहरण ल्याकै बोल्या, “हे भले माणसो, उद्धार पाण कै खातर मै के करूँ?” 31 उन्नै कह्या, “प्रभु यीशु मसीह पै विश्वास कर, तो तू अर तेरा कुणबा उद्धार पावैगा।” 32 अर उन्नै उस ताहीं अर उसके सारे घर के माणसां ताहीं प्रभु का बचन सुणाया। 33 रात नै उस्से टेम उसनै उन ताहीं ले जाकै उनके घाव धोये, अर उसनै आपणे सारे माणसां सुदा जिब्बे बपतिस्मा लिया। 34 फेर उसनै उन ताहीं आपणे घरा ले जाकै उनके आगै खाणा धरया, अर साबते कुणबे सुदा पणमेशर पै विश्वास करकै आनन्द करया।

35 जिब्ब दिन लिकड़या फेर हाकिमां नै सिपाहियां के हाथां कुहवा भेज्या के उन माणसां नै छोड़ द्यो। 36 थानेदार नै ये बात पौलुस तै कहीं, “हाकिमां नै आप ताहीं छोड़ देण का हुक्म दिया सै। ज्यांतै इब राजी-खुशी तै जाओ।” 37 पर पौलुस नै उनतै कह्या, “उन्नै म्हारै ताहीं जो रोमी माणस सैं, कसूरवार ठहराए बिना माणसां कै श्यामी मारया अर जेळ म्ह गेरया। इब के हमनै बोल-बाल्ले लिकाड़ण लागरे सै? इसा कोनी; पर वे खुद आकै हमनै बाहरण लिकाड़ै।” 38 सिपाहियां नै ये बात हाकिमां तै कहीं, अर वे न्यू सुणकै के रोमी सैं, डरगे, 39 अर आकै उन ताहीं मनाया, अर बाहरण ले जाकै बिनती करी के नगर चले जाओ। 40 वे जेळ तै लिकड़कै लुदिया कै उरै गये, अर भाईयां तै भेंट करकै उन ताहीं शान्ति देई, अर चले गये।

### थिस्सलुनीके नगर म्ह

17 फेर वे अम्फिपुलिस अर अपुल्लोनिया होकै थिस्सलुनीके म्ह आये, जित यहूदिया का एक आराधनालय था। 2 पौलुस आपणी रीत कै मुताबिक उनकै धोरै गया, अर तीन सब्त कै दिन पवित्रशास्त्र म्ह तै उनकै गेल्या बहस करी; 3 अर ओ उनका मतलब खोल-खोलकै समझावै था के मसीह नै दुःख ठाणा, अर मरे होया म्ह तै जिन्दा उठणा, जरूरी था; अर “यो यीशु जिसकी मै थमनै कहानी सुणाऊँ सूँ, मसीह सै।” 4 उनम्ह तै कितन्यां नै, अर भगत युनानियां म्ह तै घण-खरया नै, अर घणी आच्छे खानदान की लुगाईयां नै मान लिया, अर पौलुस अर सीलास कै गेल्या मिलगे। 5 पर यहूदियां नै डाह तै भरकै बाजारू माणसां म्ह तै कुछ दुष्ट माणसां ताहीं आपणे गेल्या लिया, अर भीड़ कड़ी करकै नगर म्ह रोळा मचाण लागे, अर यासोन कै घर पै चढाई करकै उन ताहीं आदमियां कै श्यामी ल्याणा चाहया। 6 उन्नै जिब वे ओड़ै नीं मिल्ले तो वे किल्की मारदे होए यासोन अर कुछ भाईयां ताहीं नगर के हाकिमां कै श्यामी खींच ल्याए, “ये माणस जिन्नै दुनिया ताहीं उल्टा-पुल्टा कर दिया सै, उरै भी आ लिए सै। 7 यासोन नै उन ताहीं आपणे उरै तारया सै। ये सारे के सारे न्यू कहवै सै के यीशु राजा सै, अर कैसर के हुकमां का बिरोध करै सै।” 8 उन्नै आदमियां ताहीं अर नगर के हाकिमां ताहीं न्यू सुणाकै डरा दिया। 9 ज्यांतै उन्नै यासोन अर बाकी माणसां तै मुचलका या फिरोत्ती लेकै उन ताहीं छोड़ दिया।

### बिरिया नगर म्ह

10 भाईयां नै जिब्बे रात-ए-रात पौलुस अर सीलास ताहीं बिरिया खन्दा दिया; अर वे ओड़ै पहोचकै यहूदियां के आराधनालय म्ह गये। 11 ये माणस तो थिस्सलुनीके के यहूदियां तै आच्छे थे, अर उन्नै घणे चा तै बचन अपणाया, अर हर-रोज पवित्र शास्त्रा म्ह टोहन्दे रहे के ये बात न्यू सै के नीं। 12 ज्यांतै उनम्ह तै घण-खरया नै, अर युनानी आच्छे खानदान की लुगाईयां म्ह तै अर माणसां म्ह तै भी घण-खरया नै विश्वास करया। 13 पर जिब्ब थिस्सलुनीके के यहूदी जाणगे के पौलुस बिरिया म्ह भी पणमेशर का बचन सुणावै सै, तो ओड़ै भी माणसां ताहीं उकसाण अर गड़बड़ मचाण लागे। 14 फेर भाईयां नै जिब्बे पौलुस ताहीं बिदा करया के समुन्दर कै कंठारै चल्या जावै; पर सीलास अर तीमुथियुस ओड़ए रहगे। 15 पौलुस ताहीं पहोचाण आळे उस ताहीं एथेंस ताहीं लेगे; अर सीलास अर तीमुथियुस कै खातर या आज्ञा पाकै बिदा होए के उसकै धोरै घणी तगाजै तै आये।

### एथेंस नगर म्ह

16 जिब्ब पौलुस एथेंस म्ह उसकी बाट देखे था, तो नगर नै मूर्तियाँ तै भरया होड़ देखकै उसका जी जळग्या। 17 आखर म्ह ओ आराधनालय म्ह यहूदियां तै अर भगतां तै, अर चौक म्ह जो माणस उसतै फेटै थे उनतै हरेक दिन बहस करया करै था। 18 फेर इपिकुरी अर स्तोईकी पण्डितां म्ह तै कुछे उसतै तर्क करण लागे, अर कुछां नै कहया, “यो बकवादी के कहणा चाहवै सै?” पर दूसरयां नै कहया, “ओ गैर-देवतायां का प्रचारक दीक्खै सै।”--- क्यूँके ओ यीशु का अर पुनरुत्थान का सुसमाचार सुणावै था। 19 फेर वे उसनै आपणे गेल्या अरियुपगुस पै लेगे अर बुझया, “के हम जाण सकां सां के यो नया मत जो तू सुणावै सै, के सै? 20 क्यूँके तू अनोक्खी बात म्हारै ताहीं सुणावै सै, ज्यांतै हम जाणना चाहवां सां के इनका के मतलब सै।” 21 (ज्यांतै के सारे एथेंसवासी अर परदेशी जो ओड़ै रहवै थे, नयी-नयी बात कहण अर सुणन कै सीवाय और किसे काम म्ह टेम कोनी बितावै थे।)

### अरियुपगुस की सभा म्ह पौलुस का भाषण

22 फेर पौलुस नै अरियुपगुस कै बिचाळे खडे होकै कह्या, “हे एथेंस के माणसो, मै देखूँ सूँ के थम हर बात म्ह देवतायां के घणे मानण आळे सो। 23 क्यूँके मै हांडवे होये जिब्ब थारी पुज्जण की चिज्जां नै देखण लागरया था, तो एक इसी वेदी भी मिली, जिस पै लिख्या था, ‘अनजाण ईश्वर कै खातर।’ इसकरकै जिसनै थम बिना बेरे पूजो सो, मै थमनै उसका सुसमाचार सुणाऊँ सूँ। 24 जिस पणमेशर नै धरती अर उसकी सारी चिज्जां ताहीं बनाया, ओ सुर्ग अर धरती का मालिक होके, हाथ के बनाए होड़ मन्दरियां म्ह कोनी रहन्दा; 25 ना किसे चीज की जरूत कै बाबत माणसां के हाथां की सेवा लेवै सै, क्यूँके ओ तो खुदे सारया ताहीं जिन्दगी अर सांस अर सारा कीमे देवै सै। 26 उसनै एक ए मूल तै माणसां की सारी जात सारी धरती पै रहण कै खातर बनाई सै; अर उनके ठहराए होड़ टेम अर रहण या निवास की हदां ताहीं ज्यांतै बाँधया सै, 27 के वे पणमेशर नै टोहवै, कदाचित उस ताहीं टटोळकै पावै, फेरभी ओ म्हारै म्ह तै किसे तै दूर कोनी। 28 क्यूँके हम उस्से म्ह जिन्दे रहकै, अर चाल-फिरकै, अर स्थिर रहवां सां; जिस ढाळ थारे कितने कवियाँ नै भी कहया सै, ‘हम तो उस्से के वंशज सां।’ 29 आखर म्ह पणमेशर का बंश होकै म्हारा यो समझणा सई कोनी के ईश्वरत्व सोन्ने या रपिये या पत्थर के जिसा सै, जो माणसां की कारीगरी अर कल्पना तै गढ़े गये हों। 30 ज्यांतै पणमेशर नै अज्ञानता के टेम्मां पै ख्यास कोनी करी, पर इब हरेक जंगहा सारे माणसां ताहीं मन फिराण का हुक्म देवै सै। 31 क्यूँके उसनै एक दिन ठहराया सै, जिसम्ह ओ उस माणस के जरिये धर्म तै दुनिया का न्याय करैगा, जिस ताहीं उसनै ठहराया सै, अर उस ताहीं मरे होया म्ह तै जिन्दा करकै या बात सारया पै साबित कर दी सै।”

32 मरे होया के पुनरुत्थान की बात सुणकै कीमे तो मखौल करण लागे, अर कुछां नै कह्या, “या बात हम तरे तै फेर कदे सुणांगे।” 33 इसपै पौलुस उनकै बिचाळे तै लिकड़ग्या। 34 पर कीमे माणस उसकै गेल्या मिलगे, अर बिश्वास करया; जिनम्ह दियुनुसियुस जो अरियुपगुस का मेम्बर था, अर दमरिस नामकी एक लुगाई थी, अर उनकै गेल्या और भी माणस थे।

### कुरिन्थुस नगर म्ह

18 इसके पाच्छे पौलुस एथेंस नै छोड़कै कुरिन्थुस म्ह आया। 2 ओड़ै उसनै अक्विला नामक एक यहूदी फेट्या, जिसका जन्म पुन्तुस म्ह होया था। ओ आपणी बीरबान्नी प्रिसकिल्ला कै गेल्या इटली तै इब्बे ए आया था, क्यूँके क्लौदियुस नै सारे यहूदियां ताहीं रोम तै लिकड़ जाण का हुक्म दिया था। ज्यांतै ओ उनकै उरै गया। 3 उसका अर उनका एक ए काम-धन्धा था, इसकरकै ओ उनकै गेल्या रहया अर वे काम करण लागे; अर उनका काम-धन्धा तम्बू बनाण का था। 4 ओ हरेक सब्त कै दिन आराधनालय म्ह बहस करकै यहूदियां अर युनानियां ताहीं भी समझावै था। 5 जिब्ब सीलास अर तीमुथियुस मकिदुनिया तै आये, तो पौलुस बचन सुणाण की धुन म्ह यहूदियां ताहीं गवाही देण लाया के यीशु ए मसीह सै।

6 पर जिब्व वे बिरोध अर बुराई करण लाग्गे, तो उसनै आपणे लत्ते झाड़कै उनतै कह्या, “थारा लहू थारी ए नाड पै रहवै! मै बेकसूर सूँ। इब तै मै गैर-जात्तां कै धोरै जाऊँगा।” 7 ओड़ै तै चालकै ओ तितुस यूस्तुस नामक पणमेशर के एक भगत कै घरा आया; जिसका घर आराधनालय तै लाग्या होड था। 8 फेर आराधनालय के सरदार क्रिसपुस नै आपणे सारे कुन्बे सुदा प्रभु पै बिश्वास करया; अर घण-खरे कुरिन्थवासी सुणकै बिश्वास लाये, अर बपतिस्मा लिया। 9 प्रभु नै एक रात दर्शन कै जरिये पौलुस तै कह्या, “मतना डरै, बल्के कहे जा अर बोल-बाल्ला मतना रहवै; 10 क्यूँके मै तेरै गेल सूँ, अर कोए तेरै पै चढ़ाई करकै तेरा नुकसान कोनी करैगा; क्यूँके इस नगर म्ह मेरे घणे माणस सँ।” 11 ज्यांतै ओ उनम्ह पणमेशर का बचन सिखान्दे होये डेढ़ साल ताहीं रहया।

12 जिब्व गल्लियो अखाया देश का हाकिम था, तो यहूदी माणस एका करकै पौलुस पै चढ़ आये, अर उस ताहीं न्याय गद्दी कै श्यामी ल्याकै कहण लाग्गे, 13 “यो माणसां नै समझावै सँ के पणमेशर की उपासना इस ढंग तै करो, जो व्यवस्था कै विपरीत सँ।” 14 जिब्व पौलुस बोल्लण पै ए था, तो गल्लियो नै यहूदियां ताहीं कह्या, “हे यहूदियों, जै या कीमे अन्याय या दुष्टता की बात होन्दी, तो सई था के मै थारी सुणदा। 15 पर जै या बहस शब्दां, अर नामां, अर थारे उरै के व्यवस्था कै बारे सँ, तो थम ए जाणों; क्यूँके मै इन बात्तां का जज कोनी बणना चाहन्दा।” 16 अर उसनै उन ताहीं न्याय गद्दी कै श्यामी तै लिकाड दिया। 17 जद सारे माणसां नै आराधनालय के सरदार सोस्थिनेस ताहीं पकड़कै न्याय गद्दी कै श्यामी मारया। पर गल्लियो नै इन बात्तां की भी कीमे चिन्ता कोनी करी।

### अन्ताकिया नै बोहड़ना

18 पौलुस घणे दिन ताहीं उरै रहया। फेर भाईयां तै बिदा होकै किंखिया म्ह ज्यांतै सिर मुण्डाया, क्यूँके उसनै मन्नत मानी थी, अर जहाज पै सीरिया नै चल्या गया अर उसके गेल्या प्रिसकिल्ला अर अक्विला थे। 19 उसनै इफिसुस पहोचकै उन ताहीं ओड़ै छोड्या, अर खुद आराधनालय म्ह जाकै यहूदियां तै बहस करण लाग्या। 20 जिब्व उन्नै उसतै बिनती करी, “म्हारै गेल्या कीमे और दिन रह।” तो उसनै कोनी मानी; 21 पर न्यू कहकै उसतै बिदा होया, “जै पणमेशर नै चाहया तो मै थारै धोरै फेर आऊँगा।” फेर ओ इफिसुस तै जहाज खोलकै चाल दिया; 22 अर कैसरिया म्ह उतरकै (यरुशलैम नै) गया अर कलीसिया ताहीं नमस्कार करकै अन्ताकिया म्ह आया।

### पौलुस की तीसरी प्रचार-यात्रा

23 फेर कीमे दिन रहकै ओ ओड़ै तै लिकड़या, अर एक ओर तै गलतिया अर फ्रुगिया प्रदेशां म्ह सारे चेल्यां ताहीं स्थिर करदा हांडया।

### इफिसुस नगर म्ह अपौलुस

24 अपुल्लोस नामक एक यहूदी, जिसका जन्म सिकन्दरिया म्ह होया था, जो ज्ञानी माणस था अर पवित्रग्रन्थ ताहीं आच्छी तरियां तै जाणै था, इफिसुस म्ह आया। 25 उसनै प्रभु कै राह की शिक्षा पाई थी, अर मन लाकै यीशु कै बारै म्ह सई-सई सुणावै अर सिखावै था, पर ओ सिर्फ युहन्ना कै बपतिस्मा की बात जाणै था। 26 ओ आराधनालय म्ह बिना डरे बोल्लण लाग्या, पर प्रिसकिल्ला अर अक्विला उसकी बात सुणकै उस ताहीं आपणे उरै ले गे अर पणमेशर की राह उस ताहीं और भी सई-सई बताई। 27 जिब्व उसनै निश्चय करया के पार उतरकै अखाया नै जावै तो भाईयां नै उस ताहीं धीरज बन्धाकै चेल्यां ताहीं लिख्या के वे उसतै आच्छी ढाल फेटै; अर उसनै ओड़ै पहोचकै उन माणसां की घणी मदद करी जिन्नै अनुग्रह कै कारण बिश्वास करया था। 28 क्यूँके ओ पवित्रग्रन्थ तै सबूत दे-देकै के यीशु ए मसीह सँ, घणे तावळे पण तै यहूदियां ताहीं सारया कै श्यामी निरुतर (बोलती बन्द) करदा रहया।

### इफिसुस नगर म्ह पौलुस

19 जिब्व अपुल्लोस कुरिन्थस म्ह था, तो पौलुस ऊप्पर के सारे प्रदेश तै होकै इफिसुस म्ह आया। ओड़ै कई चेल्यां ताहीं देखकै 2 उनतै बोल्या, “के थमनै बिश्वास करदे टेम पवित्र आत्मा पाया?” उन्नै उसतै कह्या, “हमनै तो पवित्र आत्मा का जिक्रा भी कोनी सुणया।” 3 उसनै उनतै कह्या, “तो फेर थमनै किसका बपतिस्मा लिया?” वे बोले, “युहन्ना का बपतिस्मा।” 4 पौलुस बोल्या, “युहन्ना नै न्यू कहकै मन फिराण का बपतिस्मा दिया के जो मेरै पाचकै आण आळा सँ, उस पै यानिके यीशु पै बिश्वास करयो।” 5 न्यू सुणकै उन्नै प्रभु यीशु कै नाम म्ह बपतिस्मा लिया। 6 जिब्व पौलुस नै उन पै हाथ धरे, तो पवित्र आत्मा उन पै उतरया, अर वे न्यारी-न्यारी भाषा बोल्लण अर भविष्यवाणी करण लाग्गे। 7 ये सारे करीबन बारहा माणस थे।

8 ओ आराधनालय म्ह जाकै तीन महिन्ने ताहीं बिना डरे होकै बोल्दा रहया, अर पणमेशर के राज्य कै बारै म्ह बहस करदा अर समझान्दा रहया। 9 पर जिब्व कीमे माणसां नै करडे होकै उसकी नीं मानी बल्के माणसां कै श्यामी इस राह नै भुंडा कहण लाग्गे, तो उसनै उन ताहीं छोड दिया अर चेल्यां ताहीं न्यारा कर लिया, अर रोज तुरन्तुस की पाठशाला म्ह बहस करया करै था। 10 दो साल ताहीं न्यू ए होन्दा रहया, उरै ताहीं के आसिया के रहणीये के यहूदी के यूनानी सारया नै प्रभु का बचन सुण लिया।

11 पणमेशर पौलुस के हाथां तै सामर्थ के अनोकरे काम दिखावै था। 12 उरै ताहीं के रुमाल अर अन्नोछे उसके गात तै छुआकै बिमारां पै मेरै थे, अर उनकी बीमारी जान्दी रहवै थीं; अर भूंडी औपरी आत्मां उनम्ह तै लिकड़ जाया करै थीं। 13 पर कीमे यहूदी जो झाड़ा-फूँकी करदे हान्दे थे, न्यू करण लाग्गे के जिनम्ह भूंडी औपरी आत्मा हो उन पै प्रभु यीशु का नाम न्यू कहकै फूँके, “जिस यीशु का प्रचार पौलुस करै सँ, मै थारै ताहीं उरसे की सूह छुँ सूँ।” 14 अर स्क्रिवा नाम का एक यहूदी प्रधान याजक के सात बेटे थे, जो उरसे तरियां ए करै थे। 15 पर भूंडी औपरी आत्मा नै उन ताहीं जबाब दिया, “यीशु ताहीं मै जाणु सूँ, अर पौलुस ताहीं भी पिच्छाणु सूँ, पर थम कौण सो?” 16 अर उस माणस नै जिसम्ह भूंडी औपरी आत्मा थी उन पै लपककै अर उन ताहीं बस म्ह ल्याकै, उन पै इसा खण्डत मचाया के वे उघाड़े अर घायल होकै उस घर तै लिकड़ भाजे। 17 या बात इफिसुस के रहणआळे सारे यहूदी अर यूनानी भी जाण गे, अर वे सारे डर गे; अर प्रभु यीशु कै नाम की बड़ाई होई। 18 जिन्नै बिश्वास करया था, उनम्ह तै घण-खरया नै आकै आपणे-आपणे काम्मां ताहीं मान लिया अर दिखा दिया। 19 जादू करण आळ्यां म्ह तै घणा ए नै आपणी-आपणी पोथियाँ कड्डी करकै सारया कै श्यामी जळा दीं, अर जिब्व उसका दाम जोड्या गया, तो पचास हजार चाँदी के सिक्के कै बराबर लिकड़या। 20 इस तरियां प्रभु का बचन हान्ने कै बळ फैलदा अर हावी होदा गया।

21 जिब्व ये बात हो ली तो पौलुस नै आत्मा म्ह ठाणा के मकिदुनिया अर अखाया तै होकै यरुशलैम नै जाऊँ, अर बोल्या, “ओड़ै जाण कै बाद मन्नै रोम ताहीं भी देखणा जरूरी सँ।” 22 इसकरकै आपणी सेवा करणीयां म्ह तै तीमुथियुस अर इरास्तुस ताहीं मकिदुनिया खन्दाकै खुद कीमे दिन आसिया म्ह रहया।

### इफिसुस म्ह उपद्रव

23 उस टेम उस पन्थ कै बारै म्ह घणा रोळा माच्या। 24 क्यूँके देमेत्रियुस नाम का एक सुनार अरतिमिस के चाँदी के मन्दर बणवाकै कारिगरां ताहीं घणा काम दुवाया करै था। 25 उसनै उन ताहीं अर उरसे तरियां की चिजां के कारिगरां ताहीं कड्हा करकै कह्या, “हे माणसो, थमनै बेरा सँ के इस काम तै हमनै कितना धन मिलै सँ। 26 थम देरखो अर सुणो सो के सिर्फ इफिसुस म्ह ए कोनी, बल्के कई बर सारे आसिया म्ह न्यू कह-कहकै इस पौलुस नै घणे माणसां ताहीं समझाया अर भकाया भी सँ, के जो हाथ की कारीगरी सँ, वे ईश्वर कोनी। 27 इसतै इब सिर्फ उरसे बात का ए भय नीं सँ के म्हारै इस धन्धे की इज्जत-मान जान्दी रहवैगी, बल्के न्यू भी के महान देबी अरतिमिस

का मन्दर तुच्छ समझा जावेगा, अर जिस ताहीं सारा आसिया अर दुनिया पूजै सै उसका महत्व भी जान्दा रहवेगा।”

28 वे न्यू सुणकै खुन्दक तै भर गे अर किल्की मार-मारकै कहण लागे, “इफिसिया की अरतिमिस, महान सै!” 29 अर सारे नगर म्ह घणा रोळा माचग्या, अर माणसां नै मकिदुनियावासी गयुस अर अरिस्तरुस ताहीं जो पौलुस के संगी मुसाफर थे, पकड़ लिया, अर एक सेत्ती रंगशाला म्ह भाज गे। 30 जिब्ब पौलुस नै माणसां कै धोरै भीत्तर जाणा चाहया तो चेल्यां नै उस ताहीं जाण नीं दिया। 31 आसिया के हाकिमां म्ह तै भी उसके कई ढब्बियां नै उसकै धोरै कुहवा भेज्या अर बिनती करी के रंगशाला म्ह जाकै जोखखम नीं ठाणा। 32 ओड़ै कोए कीमे चिल्लावै था अर कोए कीमे, क्यूँके पंचायत म्ह घणी गडबडी होरी थी, अर घणखरे माणस न्यू जाणै भी कोनी थे की हम क्यां खातर कट्टे होए सां। 33 फेर उत्रै सिकन्दर ताहीं, जिस ताहीं यहूदियां नै खड़या करया था, भीड़ म्ह आगै बढ़ाया। सिकन्दर हाथ तै इशारा करकै माणसां कै श्यामी जबाब देणा चाहवै था। 34 पर जिब्ब उत्रै बेरा लागग्या के ओ यहूदी सै, तो सारे के सारे एक बोल म्ह कोए दो घंटे ताहीं चिल्लान्दे रहे, “इफिसिया की अरतिमिस, महान सै।” 35 फेर नगर के मन्त्री नै माणसां ताहीं शान्त करकै कहा, “हे इफिसुस के माणसो, किसनै नीं बेरा के इफिसिया का नगर महान देबी अरतिमिस के मन्दर, अर ज्यूस की ओड़ तै गिरी होड़ मूर्ति का टहलुआ सै। 36 आखर म्ह जिब्ब के इन बात्तां का खण्डन ए कोनी हो सकदा, तो सई सै के थम शान्त रहो अर बिना सोचे-समझे कीमे ना करो। 37 क्यूँके थम इन माणसां नै ल्याए सो जो ना मन्दर के लुट्टण आळे सै अर ना म्हारी देबी के बुराई करणीये सै। 38 जै देमेत्रियुस अर उसके ढब्बी-कारिगरां ताहीं किसे तै झगड़ा हो तो कचहड़ी खुली सै अर हाकिम भी सै; वे एक-दुसरे पै दोष लावै। 39 पर जै थम किसे और बात कै बारै म्ह कीमे बुझणा चाहो सो, तो टेम पै पंचायत म्ह फैसला करया जावेगा। 40 क्यूँके आज के रोळे कै कारण म्हारै पै तोहमन्द लाये जाण का भय सै, इसकरकै इसका कोए कारण कोनी, अर हम इस भीड़ के कट्टा होण का कोए जबाब कोनी दे सकांगे।” 41 न्यू कहकै उसनै पंचायत ताहीं बिदा करया।

### मकिदुनिया, यूनान अर त्रोआस म्ह पौलुस

20 जिब्ब रोळा थमग्या तो पौलुस नै चेल्यां ताहीं बुलाकै समझाया, अर उनतै बिदा होकै मकिदुनिया की ओड़ चाल दिया। 2 उस सारे प्रदेश म्ह तै होके अर चेल्यां ताहीं घणा समझाकै ओ यूनान म्ह आया। 3 जिब्ब तीन महीने रहकै ओ ओड़ै तै जहाज पै सीरिया की ओड़ जाण पै था, तो यहूदी उसकी टाह म्ह लागे, ज्यांतै उसनै निश्चय करया के मकिदुनिया होकै बोहड़ जावै। 4 बिरिया के पुरुस का बेडा सोपत्रुस अर थिस्सलुनिकिया म्ह तै अरिस्तरुस अर सिकुन्दुस, अर दिरबे का गयुस, अर तीमुथियुस, अर आसिया का तुखिकुस अर त्रुफिमस आसिया ताहीं उसकै गेल हो लिये। 5 वे आगै जाकै त्रोआस म्ह म्हारी बाट देख्दे रहे। 6 अर हम अखमीरी रोड़ी के दिनां कै पाच्छै फिलिप्पी तै जहाज पै चढ़कै पाँच दिन म्ह त्रोआस म्ह उसकै धोरै पहोचे, अर सात दिन ताहीं ररे।

### त्रोआस म्ह युतुखुस का जिन्दा करणा

7 हफते के पहल्डे दिन जिब्ब हम रोड़ी तोड़ण कै खातर कट्टे होये, तो पौलुस जो दुसरै दिन चले जाण पै था, उनतै बात करी; आधी रात ताहीं बात करदा रहया। 8 जिस चौबारे पै हम कट्टे थे, उसम्ह घणे दिवे जलण लागरे थे। 9 अर युतुखुस नाम का एक गाबरू खिड़की पै बैठया होया गहरी नींद तै टुहल्लन लागरया था। जिब्ब पौलुस वारी ताहीं बात करदा रहया तो ओ नींद कै झोके तै तीसरी अटारी पै तै पड़ग्या, अर मरया होया ठाया ग्या। 10 पर पौलुस उतरकै उसतै लिपटग्या, अर गलै लाकै कहा, “घबराईयो ना; क्यूँके ओ जीवै सै।” 11 अर ऊप्पर जाकै रोड़ी तोड़ी अर खाकै इतनी वार ताहीं उनतै बात करदा रहया के सबेरा होग्या। फेर ओ चल्या गया। 12 अर वे उस गाबरू ताहीं जिन्दा लीयाए अर घणी शान्ति मिली।

### त्रोआस तै मिलेतुस की यात्रा

13 हम पहल्या ए जहाज पै चढ़कै अस्सुस नै इस सोच तै आगै गये के ओड़ै तै हम पौलुस ताहीं चढ़ा लेवां, क्यूँके उसनै यो इसकरकै ठहराया था के खुद ए पैदल जाण आळा था। 14 जिब्ब ओ अस्सुस म्ह म्हारै ताहीं फेट्या तो हम उसनै चढ़ाकै मिलेलेने म्ह आये। 15 ओड़ै तै जहाज खोलकै हम दुसरे दिन खियुस कै श्यामी पहोचे, अर आगलै दिन सामुस म्ह जाण लागे; फेर दुसरे दिन मिलेतुस म्ह आये। 16 क्यूँके पौलुस नै इफिसुस कै धोरै होकै जाण की पक्की सोच राक्खी थी के कदे इसा ना हो के उस ताहीं आसिया म्ह वार लाग ज्या; क्यूँके ओ तगाजै म्ह था के जै हो सकै तो ओ पिन्तेकुस्त कै दिन यरुशलेम म्ह रहवै।

### इफिसुस के प्राचीनां का उपदेश

17 उसनै मिलेतुस तै इफिसुस म्ह कुहवा भेज्या, अर कलीसिया के प्राचीनां ताहीं बुलवाया। 18 जिब्ब वे उसकै लवै आये, तो उनतै कहया : “थमनै बेरा सै के पहल्डे ए दिन तै जिब्ब मै आसिया म्ह पहोच्या, मै हर-बख्त थारे गेल्या किस ढाल रहया---- 19 यानिके घणी दीनता तै, अर आँसू बहा-बहाकै, अर उन हिम्तानां म्ह जो यहूदियां की साजिस कै कारण मेरै पै आण पड़ी, मै प्रभु की सेवा करदा ए रहया। 20 अर जो-जो बात थारे नफे की थीं, उन ताहीं बताण अर माणसां कै श्यामी अर घर-घर सिखाण तै कदे नीं झिझक्या, 21 बल्के यहूदियां अर युनानियां कै श्यामी गवाही देंदा रहया के पणमेशर की ओड़ मन फिराणा अर म्हारै प्रभु यीशु पै बिश्वास करणा चाहिये। 22 इब देख्खो, मै आत्मा म्ह बन्धया होया यरुशलेम नै जाऊँ सूँ, अर मन्त्रै नीं बेरा के ओड़ै मेरै पै के-के बीतै गी; 23 सिर्फ यो के पवित्र आत्मा हरेक नगर म्ह गवाही दे-देकै मेरै तै कहवै सै के बन्धन अर क्लेश तैरे खातर त्यार सै। 24 पर मै आपणी ज्यान नै किमे नीं समझदा के उस तै प्रेम राक्खूँ, बल्के यो के मै आपणी दौड़ ताहीं अर उस सेवा नै पूरी करूँ, जो मन्त्रै पणमेशर कै अनुग्रह के सुसमाचार पै गवाही देण कै खातर प्रभु यीशु तै पाई सै। 25 इब देख्खो, मन्त्रै बेरा सै के थम सारे जिनम्ह मै पणमेशर के राज्य का प्रचार करदा हांडया, मेरा मुँह दुबारा कोनी देख्खोगे। 26 ज्यांतै मै आज कै दिन थारै तै गवाही देकै कहुँ सूँ, के मै सारया के लहू तै बेकसूर सूँ। 27 क्यूँके मै पणमेशर की सारी मन्सा नै थारै ताहीं पूरी तरियां तै बताण तै कोनी झिझक्या। 28 इसकरकै आपणी अर पुरै टोळ की चौकसी करो जिसम्ह पवित्र आत्मा नै थारै ताहीं अध्यक्ष या बिशप ठहराया सै, के थम पणमेशर की कलीसिया की रूखाळी करो, जिस ताहीं उसनै आपणे लहू तै मोल लिया सै। 29 मन्त्रै बेरा सै के मेरै जाण कै बाद पाड़ण आळे भेड़िए थारे म्ह आँवगे जो टोळ नै कोनी छोड़ुंगे। 30 थारै ए बिचाळै तै भी इसे-इसे माणस उठैंगे, जो चेल्यां ताहीं आपणे पाच्छै खिंच लेण ताहीं टेढ़ी-मेढ़ी बात कहवैंगे। 31 इसकरकै जागदे रहो, अर याद राक्खो के मन्त्रै तीन सालां ताहीं रात-दिन आँसू बहा-बहाकै हरेक ताहीं चेतावनी देणा नीं छोड़्या। 32 अर इब मै थमनै पणमेशर नै, अर उसके अनुग्रह के बचन नै सौंप द्युँ सूँ: जो थारी बढोत्तरी कर सकै सै अर सारे पवित्र करे होड़ माणसां म्ह सांझी करके मीरास दे सकै सै। 33 मन्त्रै किसे के चाँदी, सोने या लत्ते का लोभ कोनी करया। 34 थमनै खुदे बेरा सै के इन्ने हाथां नै मेरी अर मेरे ढब्बियां की जरूत पूरी करी सै। 35 मन्त्रै थारै ताहीं सारया कीमे करकै दिखाया के इस तरियां तै मेहनत करदे होए कमजोरां ताहीं सम्भालणा अर प्रभु यीशु के बचन याद राखणा जरूरी सै, जो उसनै खुदे कहया सै : ‘लेण तै देणा धन्य सै।’ 36 न्यू कहकै उसनै गोड़ु देके अर उन सारया कै गेल्या प्रार्थना करी। 37 फेर वे सारे घणे रोये अर पौलुस कै गलै लिपटकै उस ताहीं चुम्पण लागे।

38 वे खासकर इस बात तै दुखी थे जो उसनै कही थी के थम मेरा मुँह दुबारा कोनी देख्खोगे। फेर उसनै उस ताहीं जहाज ताहीं पहोचाया।

### पौलुस का यरुशलेम नै जाणा

21 जिब्ब हमनै उनतै न्यारे होकै जहाज खोल्या, तो सीधी राही तै कोस म्ह आये, अर दुसरे दिन रुदुस म्ह अर ओड़ै तै पतरा म्ह।

2 ओड़ै एक जहाज फिनीके नै जान्दा होया फेट्या, अर हमनै उस पै चढकै उस ताहीं खोल दिया। 3 जिब्ब साइप्रस दिखया, तो हमनै उस ताहीं ओळै हाथ छोड्या, अर सीरिया नै चालकै सूर म्ह उतरे; क्यूँके ओड़ै जहाज का माळ उतरणा था। 4 चेल्यां नै पाकै हम ओड़ै सात दिन ताहीं रहे। उन्नै आत्मा के सिखाए पौलुस तै कहया के ओड़ै (यरुशलेम म्ह) पाँ ना धरिये। 5 जिब्ब वे दिन पुरे हो गे, तो हम ओड़ै तै चाल पडे; अर सारया नै लुगाईयाँ अर बाळकां सुदा म्हारै ताहीं नगर कै बाहरण पहाचाया; अर हम नै कठारै पै गोड्डे टेककै प्रार्थना करी, 6 फेर एक दुसरे तै बिदा होकै, हम तै जहाज पै चढगे अर वे आपणे-आपणे घरा बोहङगे।

7 जिब्ब हम सूर तै पाणी पै सफर करकै पतुलिमयिस म्ह पहाचे, अर भाईयां नै नमस्कार करकै उनकै गेल्या एक दिन रहे। 8 दुसरे दिन हम ओड़ै तै चालकै कैसरिया म्ह आये, अर फिलिप्पुस सुसमाचार प्रचारक कै घर म्ह जो सात्तां म्ह तै एक था; जाके उसके उरै रहे। 9 उसकी चार कुंवारी बेटी थीं, जो भविष्यवाणी करया करै थीं। 10 जिब्ब हम ओड़ै घणे दिन ताहीं रह लिये, तो अगबुस नामका एक नब्बी यहूदिया म्ह आया। 11 उसनै म्हारै धोरै आकै पौलुस का कमरबन्ध लिया, अर आपणे हाथ-पाँ बाँधकै कहा, “पवित्र आत्मा न्यू कहवै सै के जिस माणस का यो कमरबन्ध सै, उस ताहीं यरुशलेम म्ह यहूदी इस्से तरियां तै बाँधेंगे, अर गैर-जात्तां कै हाथां म्ह सौंपेंगे।” 12 जिब्ब हमनै ये बात सुणी, तो हमनै अर ओड़ै के माणसां नै उसतै बिनती करी के यरुशलेम नै ना जाइए। 13 पर पौलुस नै जबाब दिया, “थम के करो सो के रो-रोकै मेरा दिल तोड़ो सो? मैं तो प्रभु यीशु कै नाम कै खातर यरुशलेम म्ह ना सिर्फ बाँधे जाण ए कै खातर बल्के मरण कै खातर भी त्यार सूँ।” 14 जिब्ब उसनै नीं मानी तो हम न्यू कहकै बोल-बाल्ले रहगे, “प्रभु की मर्जी पूरी हो।” 15 इन दिनां कै पाचछै हमनै त्यारी करी अर यरुशलेम नै चाल दिए। 16 कैसरिया तै भी कीमे चेल्ले म्हारै गेल्या हो लिए, अर म्हारै ताहीं मनासोन नामक साइप्रस कै एक पुराणे चेल्ले कै उरै ली याए, के हम उसके उरै टिकां।

### पौलुस की याकूब तै भेंट

17 जिब्ब हम यरुशलेम म्ह पहाचे, तो भाई घणी खुशी कै गेल्या हम तै फेट्टे। 18 दुसरे दिन पौलुस म्हारै ताहीं लेकै याकूब कै धोरै गया, जित्त सारे प्राचीन कइठे थे। 19 जद उसनै उन ताहीं नमस्कार करकै, जो-जो काम पणमेशर नै उसकी सेवा के जरिये गैर-जात्तां म्ह करे थे, एक-एक करकै सारे बताए। 20 उन्नै न्यू सुणकै पणमेशर की महिमा करी, फेर उसतै बोल्या, “हे भाई, तू देखै सै के यहूदियां म्ह तै कई हजारां नै बिश्वास करया सै; अर सारे व्यवस्था कै खातर धुन लावें सैं। 21 उन ताहीं तेरै बारै म्ह सिखाया गया सै के तू गैर-जात्तां म्ह रहणीया यहूदियां नै मूसा तै फिर जाण नै सिखावै सै, अर कहवै सै, के ना आपणे बाळकां का खतना कराओ अर ना रित-रिवाजां पै चाल्लो। 22 तो फेर के करया जावै? माणस जरूर सुणैगे के तू आया सै। 23 इसकरकै जो हम तेरै तै कहवां सां, ओ कर। म्हारै उरै चार माणस सै जिन्नै मन्नत मानी सैं। 24 उन्नै लेकै उनकै गेल्या आपणे आप ताहीं शुद्ध कर; अर उसके खातर खर्चा दे के वे सिर मुन्दाएँ। फेर सारया नै बेरा लाग ज्यागा के जो बात उन ताहीं तेरै बारै म्ह बताई गई, उनम्ह कीमे सच्चाई कोनी सै पर तू खुद भी व्यवस्था नै मान कै उसके मुताबिक चालै सै। 25 पर उन गैर-जात्तां कै बारै म्ह जिन्नै बिश्वास करया सै, हमनै यो फैसला करकै लिख भेज्या सै के वे मूर्तियाँ कै श्यामी बलि करे होड मांस तै, अर लहू तै अर घेड़ी घोड़े होयां के मांसां तै अर जारी तै बचे रहवें।” 26 फेर पौलुस उन माणसां नै लेकै, अर दुसरे दिन उनकै गेल्या शुद्ध होकै मन्दर म्ह गया, अर ओड़ै बता दिया के शुद्ध होण कै दिन, यानिके उनम्ह तै हरेक कै खातर चढावा चढाए जाण तक के दिन कद पुरे होवें।

### मंदर म्ह पौलुस का पकड़या जाण

27 जिब्ब वे सात दिन पुरे होण पै थे, तो आसिया के यहूदियां नै पौलुस ताहीं मन्दर म्ह देखकै सारे माणसां ताहीं उकसाया, अर न्यू रुक्का मारके उस ताहीं पकड़ लिया, 28 “हे इस्राएलियो, मदद करो; यो ओए माणस सै, जो

माणसां के, अर व्यवस्था के, अर इस जंगहा कै बिरोध म्ह हरेक जंगहा सारे माणसां नै सिखावै सैं, उरै ताहीं के यूनानियां ताहीं भी मन्दर म्ह ल्याकै उसनै इस पवित्र जंगहा ताहीं अपवित्र करया सै।” 29 उन्नै इसतै पहल्या इफिसुसवासी त्रुफिमस ताहीं उसके गेल्या नगर म्ह देख्या था, अर सोचै थे के पौलुस उसनै मन्दर म्ह लीयाआ सै। 30 फेर सारे नगर म्ह रोळा माचग्या, अर माणस भाजके कइठे होए, अर पौलुस नै पकड़के बाहरण घसीट ल्याए, अर जिब्ब किवाड बन्द करे गये। 31 जिब्ब वे उसनै मार देणा चाहवै थे, तो फ्रौज के सरदार नै सन्देशा पहाच्या के सारे यरुशलेम म्ह रोळा माचरया सै। 32 फेर ओ जिब्ब सिपाहियां अर सूबेदारां नै लेकै उनकै धोरै तळै भाज आया; अर उन्नै फ्रौज के सरदार अर सिपाहियां ताहीं देखकै पौलुस ताहीं मारणा-छेताणा छोड़ दिया। 33 फेर फ्रौज के सरदार नै धोरै आकै उस ताहीं पकड़ लिया, अर दो साँकळा तै बाँधण का हुक्म देकै बुइझण लाग्या, “यो कौण सै अर इसनै के करया सै?” 34 पर भीड़ म्ह तै कोए कीमे अर कोए कीमे चिल्लान्दा रहया। जिब्ब रोळै कै मारै ओ सई सच्चाई नीं जाण सक्या, तो उस ताहीं गढ़ म्ह ले जाण का हुक्म दिया। 35 जिब्ब ओ सीढ़ी पै पहाच्या, तो इसा होया के भीड़ की दाब कै मारे सिपाहियां नै उस ताहीं ठाँके ले जाणा पड़या। 36 क्यूँके माणसां की भीड़ न्यू चिल्लान्दी होई उसके पाचछै पडरी थी, “उसनै खत्म कर द्यो।”

37 जिब्ब वे पौलुस नै गढ़ म्ह ले जाण पै थे, तो उसनै फ्रौज के सरदार तै कहा, “के मन्नै हुक्म द्यो सो के मै थारे तै कीमे कहुँ?” ओ बोल्या, “के तू यूनानी जाणै सै? 38 के तू ओ मिस्री कोनी, जो इन दिनां तै पहल्या बिद्रोही बणकै, चार हजार छुरे-सुदा माणसां ताहीं जंगळ म्ह लेग्या?” 39 मै तो तरसुस का यहूदी माणस सूँ किलिकिया कै मसूर नगर का बासिन्दा सूँ। मै तेरै तै बिनती करूँ सूँ के मन्नै माणसां तै बात करण दे।” 40 जिब्ब उसनै हुक्म दिया, तो पौलुस नै सीढ़ी पै खड़े होके माणसां ताहीं हाथ तै इशारा करया। जिब्ब वे चुप होए तो ओ इब्रानी भाषा म्ह बोल्ण लाग्या :

### भीड़ कै श्यामी पौलुस का भाषण

22 “हे भाईयो अर पितरो, मेरा बदले म्ह जबाब सुणो, जो मै इब थारै श्यामी ल्याऊँ सूँ।” 2 वे न्यू सुणकै के ओ हम तै इब्रानी भाषा म्ह बोळै सैं, और भी बोल-बाल्ले होगे। फेर उसनै कहया : 3 “मै तो यहूदी माणस सूँ, जो किलिकिया के तरसुस म्ह जन्म; पर इस नगर म्ह गमलीएल के पाँया कै धोरै बैठके पढाया गया, अर बाप-दाद्या अर पणमेशर कै खातर इसी धुन लाए रह था, जिस तरियां थम सारे आज लाए रहो सो। 4 मन्नै माणस अर लुगाई दोनुआ ताहीं जुड़-जुड़के अर जेळ म्ह गेर-गेरके, इस पंथ नै उरै ताहीं सताया के उन ताहीं मरवा भी दिया। 5 इस बात कै खातर महायाजक अर सारे पुरनिये गवाह सैं, के उनतै मै भाईयां कै नाम पै चिट्ठियाँ लेकै दमिश्क नै चल्या जावै था, के जो ओड़ै हों उन ताहीं भी सजा दुवाण कै खातर बाँधकै यरुशलेम लाऊँ।

### अपणे हृदय-परिवर्तन का जिकरा

6 “जिब्ब मै चाल्दे-चाल्दे दमिश्क कै लोवे पहाच्या, तो इसा होया के दो पहर कै करीबन चाणचक एक घणा चाँदणा अकास तै मेरै चौगरदे नै चमक्या। 7 अर मै धरती पै ढह पड़या अर यो शब्द सुणया, ‘हे शाऊल, हे शाऊल, तू मेरै ताहीं क्यातै सतावै सै?’ 8 मन्नै जबाब दिया, ‘हे प्रभु, तू कौण सै?’ उसनै मेरै तै कहा, ‘मै यीशु नासरी सूँ, जिस ताहीं तू सतावै सै।’ 9 मेरे ढब्बियाँ नै चाँदणा तो देख्या, पर मेरै तै जो बोळै था उसका शब्द कोनी सुणया। 10 फेर मन्नै कहा, ‘हे प्रभु, मै के करूँ?’ प्रभु नै मेरै तै कहा, ‘उठके दमिश्क म्ह जा, अर जो कीमे तेरै तै करण कै खातर ठहराया गया सै ओड़ै तेरै तै सब बता दिया जावैगा।’ 11 जिब्ब उस चाँदणे के तेज के मारे मन्नै कीमे कोनी दिख्या, तो मै आपणे ढब्बियाँ का हाथ पकड़े होए दमिश्क म्ह आया।

12 “फेर हनन्याह नामक व्यवस्था कै मुताबिक एक भगत माणस, जो ओड़ै के रहणीये सारे यहूदियां म्ह सुनाम्मी था, मेरै धोरै आया, 13 अर खड़े होके मेरै तै कहा, ‘हे भाई शाऊल, फेर देखण लाग।’ उससे टेम मेरी आँख खुल गी अर मन्नै उस ताहीं देख्या। 14 फेर उसनै कहा, ‘म्हारै बाप-दाद्या के

पणमेशर नै तेरै ताहीं ज्यांतै ठहराया के तू उसकी मर्जी नै जाणै, अर उस धर्मी नै देखै अर उसके मुँह की बात सुणै।<sup>15</sup> क्यूँके तू उसकी ओड़ तै सारे माणसां के श्यामी उन बात्तां का गवाह होगा जो तन्नै देखी अर सुणी सै।<sup>16</sup> इब क्यांतै वार करै सै? उठ, बपतिस्मा ले, अर उसका नाम लेके आपणे पापां नै धो ले।'

### गैर-जात्तां म्ह प्रचार का आह्वान

17 "जिब्व मै दुबारा यरुशलेम म्ह आके मन्दर म्ह प्रार्थना करण लागरया था, तो बेसुध होग्या,<sup>18</sup> अर उस ताहीं देख्या के ओ मेरै तै कहवै सै, 'तोळ करके यरुशलेम तै झट दे-सी लिकड़्या; क्यूँके वे मेरै बारै म्ह तेरी गवाही कोनी मात्रैंगे।' 19 मन्नै कह्या, 'हे प्रभु, उन्नै तो खुदे बेरा सै के मै तेरै पै बिश्वास करण आळा नै जेळ म्ह गेरु अर जगहा-जगहा आराधनालय म्ह छित्वाऊं था। 20 जिब्व तेरे गवाह स्तिफनुस का लहू बहाया जाण लागरया था जद मै भी ओड़ै ए खड़या था अर इस बात म्ह सहमत था, अर उसके मारणीयां के लत्या की रूखाली करूँ था।' 21 अर उसनै मेरै तै कह्या, 'चल्या जा : क्यूँके मै तेरै ताहीं गैर-जात्तां के धोरै दूर-दूर खन्दाऊंगा।'

22 वे इस बात तक उसकी सुणदे रहे, फेर ठाडू बोल तै चिल्लाए, "इसै माणस का नास करो, उसका जिन्दा रहणा सई कोनी!" 23 जिब्व वे चिल्लान्दे अर लत्ते बगान्दे अर अकास म्ह धूळ उड़ावै थे; 24 तो फ़ौज के सरदार नै कह्या, "इस ताहीं गढ़ म्ह ले जाओ, अर कोरडे मारके जाँचो, के मन्नै बेरा लागै के माणस किस कारण उसके बिरोध म्ह इस ढाळ चिल्लावै सै।" 25 जिब्व उन्नै उस ताहीं फित्यां तै बाँधया तो पौलुस नै उस सूबेदार तै जो धोरै खड़या था, कहया, "के यो सई सै के थम एक रोमी माणस ताहीं, अर ओ भी बिना कसूरवार ठहराए होए, कोरडे मारो?" 26 सूबेदार नै न्यू सुणके फ़ौज के सरदार के धोरै जाके कह्या, "तू यो के करै सै? यो तो रोमी माणस सै।" 27 फेर फ़ौज के सरदार नै उसके धोरै आके कह्या, "मन्नै बता, के तू रोमी सै?" उसनै कह्या, "हम्बै।" 28 न्यू सुणके फ़ौज के सरदार नै कह्या, "मन्नै रोमी होण का ओद्दा घणे रपिये देके मिल्या सै।" पौलुस नै कह्या, "मै तो जन्म तै रोमी सू?" 29 फेर जो माणस उस ताहीं जांचण पै थे, वे जिब्व उसके धोरै तै हटगे; अर फ़ौज का सरदार भी न्यू जाणके के यो रोमी सै अर मन्नै उस ताहीं बाँधया सै, उरय्या।

### महासभा के श्यामी पौलुस

30 दुसरे दिन उसनै सई-सई ज्यानण की मर्जी तै के यहूदी उस पै क्यांतै तोहमन्द लगावै सै, उसके बन्धन खोल दीए; अर प्रधान याजकां अर सारी बड्डी पंचायत ताहीं कड्डा होण का हुकम दिया, अर पौलस नै तळै ले जाके उनके श्यामी खड़या कर दिया।

23 पौलुस नै बड्डी पंचायत की ओड़ गौर तै देख्या अर कह्या, "हे भाईयो, मन्नै आज ताहीं पणमेशर के खातर जमा-कती साबे मन तै जीवन बिताया सै।" 2 इस पै हनन्याह महायाजक नै उन ताहीं जो उसके धोरै खड़े थे, उसके मुँह पै रेंट मारण का हुकम दिया। 3 फेर पौलुस नै उसतै कह्या, "हे चुन्ना फिरी होड़ भीत, पणमेशर तेरै ताहीं मारैगा। तू व्यवस्था के मुताबिक मेरा न्याय करण नै बैठ्या सै, अर फेर के व्यवस्था के खिलाफ मेरै ताहीं मारण का हुकम देवै सै?" 4 जो धोरै खड़े थे उन्नै कह्या, "के तू पणमेशर के महायाजक नै आच्छा-भुंडा बोले सै?" 5 पौलुस नै कह्या, "हे भाईयो, मन्नै नीं बेरा था के यो महायाजक सै; क्यूँके लिख्या सै : 'आपणे माणसां के प्रधान नै भुंडा ना बोलि।'"

6 फेर पौलुस नै न्यू जाणके के एक टोळ सदुकिया अर दूसरा फरिसियाँ का सै, पंचायत म्ह रुक्का मारके कह्या, "हे भाईयो, मै फरीसी अर फरिसियाँ के बंश का सू, मेरे होया की आस अर पुनरुत्थान के बारै म्ह मेरा मुकदमा होरया सै।" 7 जिब्व उसनै या बात कही तो फरिसियाँ अर सदुकियाँ म्ह रोळा होण लाग्या; अर पंचायत म्ह फूट पड़गी। 8 क्यूँके सदुकी तो न्यू कहवै सै, के ना पुनरुत्थान सै, ना सुर्गदुत अर ना आत्मा सै; पर फरीसी इन सारया नै मात्रै सै। 9 फेर घणा रोळा माच्या अर कुछ शास्त्री जो फरिसियाँ के टोळ के थे, उठ लिए अर न्यू कहके रोळा करण लागे, "हम इस माणस म्ह कोए बुराई

कोनी पांदे, अर जै कोए आत्मा या सुर्गदुत उसतै बोल्या सै तो फेर के होग्या?" 10 जिब्व घणा रोळा होया, तो फ़ौज के सरदार नै इस भय तै के वे पौलुस के टुकड़े-टुकड़े ना कर देवै, फ़ौज ताहीं हुकम दिया के उतरके उस ताहीं उनके बिचाळै तै हाँगे तै लिकाड़ै, अर गढ़ म्ह ले जावै। 11 उससे रात प्रभु नै उसके धोरै खड़े होके कह्या, "हे पौलुस, धीरज राख; क्यूँके जिसी तन्नै यरुशलेम म्ह मेरी गवाही देई, उसीए तन्नै रोम म्ह भी गवाही देणी होगी।"

### पौलुस की हत्या की साजिस

12 जिब्व दिन लिकड़या तो यहूदियां नै साजिस रची अर सूंह खाई के जिब्व ताहीं हम पौलुस नै मार नीं देवा, जद ताहीं खावां या पिवां म्हारै पै धिक्कार। 13 जिन्नै आप्पस म्ह या सूंह खाई थी, वे चाळीस जण्यां तै घणे थे। 14 उन्नै प्रधान याजकां अर पुरनियां के धोरै जाके कह्या, "हमनै न्यू ठाण लिया सै के जिब्व ताहीं हम पौलुस नै मार नीं देदे, जद ताहीं जै कीमे चाकखां तो म्हारै पै धिक्कार सै। 15 इसकरके इब बड्डी पंचायत सुदा फ़ौज के सरदार नै समझाओ के उसनै धारै धोरै लियावै, मान ल्यो के थम उसके बारै म्ह और भी सई तै जाँच करणा चाहवो सो; अर हम उसके पहोचण तै पहल्या ए उस ताहीं मार देण के खातर त्यार रहवांगे।"

16 पौलुस के भाणजै नै सुणया के वे उसकी टाह म्ह सै, तो गढ़ म्ह जाके पौलुस ताहीं संदेशा दिया। 17 पौलुस नै सूबेदारा म्ह तै एक ताहीं आपणे धोरै बुलाके कह्या, "इस गाबरु नै फ़ौज के सरदार के धोरै ले जाओ, यो उसतै कीमे कहणा चाहवै सै।" 18 इसकरके उसनै उस ताहीं फ़ौज के सरदार के धोरै ले जाके कह्या, "केदी पौलुस नै मेरै ताहीं बुलाके बिनती करी के यो गाबरु फ़ौज के सरदार तै कीमे कहणा चाहवै सै; उस ताहीं उसके धोरै ले जा।" 19 फ़ौज के सरदार नै उसका हाथ पकड़के अर न्यारा जाके बुझया, "तू मेरै तै के कहणा चाहवै सै?" 20 ओ बोल्या, "यहूदियां नै साजिस रची सै के तेरै तै बिनती करै के काल पौलुस नै बड्डी पंचायत म्ह लाये, मात्रो वे और सई ढाळ तै उसकी जाँच करणा चाहवै सै। 21 पर उनकी मानियो मतना, क्यूँके उनम्ह तै चाळीस के ऊप्पर माणस उसकी मारण की टाह म्ह सै, जिन्नै न्यू ठाण लिया सै के जिब्व ताहीं वे पौलुस नै मार नीं देवै, जद ताहीं ना खावैंगे अर ना पीवैंगे। अर इब वे त्यार सै अर तेरै बचन की बाट देखण लागरे सै।" 22 फेर फ़ौज के सरदार नै गाबरु ताहीं यो हुकम देके बीदा करया, "किसे तै ना कहिये के तन्नै मेरै तै ये बात बताई सै।"

### पौलुस ताहीं फेलिक्स के धोरै भेज्या जाणा

23 फेर उसनै दो सूबेदारां ताहीं बुलाके कह्या, "दो सौ सिपाही, सत्तर सवार, अर दो सौ भालैत, पहर रात बीते कैसरिया नै जाण के खातर त्यार कर राखो। 24 अर पौलुस की सवारी के खातर घोड़े त्यार राखो, के उस ताहीं फेलिक्स हाकिम के धोरै राजी-खुशी तै पहोचा दे।" 25 उसनै इस तरियां की चिड्डी भी लिक्खी : 26 "महामहिम फेलिक्स हाकिम ताहीं क्लौकियुस लुसियास का नमस्कार। 27 इस माणस ताहीं यहूदियां नै पकड़के मार देणा चाहया, पर जिब्व मन्नै जाण्या के रोमी सै, तो फ़ौज लेके छुटा ल्याया। 28 मै जाणना चाहूँ था के वे उस पै किस कारण तोहमन्द लावै सै, ज्यांतै उस ताहीं उनकी बड्डी पंचायत म्ह ले गया। 29 फेर मन्नै जाण लिया के वे आपणी व्यवस्था के रोळे के बारै म्ह उस पै तोहमन्द लगावै सै, पर मार देण जोग्या या बाँधे जाण के जोग्या उसम्ह कोए कसूर कोनी। 30 जिब्व मेरै ताहीं बताया गया के वे इस माणस की टाह म्ह लागरे सै तो मन्नै जिब्वे उस ताहीं तेरै धोरै खन्दा दिया; अर मुद्दियां ताहीं भी हुकम दिया के तेरै श्यामी उस पै नालिश करै।"

31 आखर म्ह जिसा सिपाहियां नै हुकम मिल्या था, उससे तरियां ए वे पौलुस नै लेके रातो-रात अन्तिपत्रिस म्ह आये। 32 दुसरे दिन वे सवारा नै उसके गेल्या जाण के खातर छोड़के खुद गढ़ नै बोहड़े। 33 उन्नै कैसरिया पहोचके हाकिम ताहीं चिड्डी दी; अर पौलुस ताहीं भी उसके श्यामी खड़या करया। 34 उसनै चिड्डी पढ़के बुझया, "यो किस प्रान्त का सै?" 35 अर जिब्व जाण लिया के किलिकिया का सै तो उसतै कह्या, "जिब्व तेरै मुद्दई भी

आवेंगे, तो मैं तेरा मुकद्दमा करूँगा।" अर उसनै उस ताहीं हेरोदेस के किलै म्ह पहरे म्ह राखण का हुक्म दिया।

### हाकिम फेलिक्स के श्यामी पौलुस

24 पाँच दिन के पाच्छे हनन्याह महायाजक कई पुरनियां अर तिरतुल्लुस नामक किसे वकील नै गेल्या लेकै आया। उन्नै हाकिम के श्यामी पौलुस पै बुराई करी। 2 जिब्ब ओ बुलाया गया तो तिरतुल्लुस उस पै तोहमन्द लाके कहण लाग्या : "हे महामहिम फेलिक्स, तेरै जरिये म्हारै म्ह राज्जी-खुशी तै सै; अर तेरै इन्तजाम तै इस जात के खातर घणीए बुराइयाँ सुधरदी जावै सै। 3 इस ताहीं हम हरेक जंगहा अर हरेक तरियां तै धन्यवाद के गेल मानां सां। 4 पर इसकरके के तन्नै और दुःख कोनी देणा चाहन्दा, मै तेरै तै बिनती करूँ सूँ के दया करके दो-एक बात सुण ले। 5 क्यूँके हमनै इस माणस ताहीं ऊत अर दुनिया के सारे यहूदिया म्ह रोळा करण आळा, अर नासरिया के भुन्डे-पन्थ का मुखिया पाया सै। 6 उसनै मन्दर ताहीं अशुद्ध करणा चाहया, पर हमनै उस ताहीं पकड़ लिया। [हमनै उस ताहीं आपणे व्यवस्था के मुताबिक सजा दे दी होन्दी; 7 पर फौज की सरदार लूसियास नै उस ताहीं हाँगे तै म्हारै हाथ तै खोस लिया, 8 अर मुद्दईया ताहीं तेरै श्यामी आण का हुक्म दिया।] इन सारी बाततां नै जिनके बारे म्ह हम उसपै तोहमन्द लावां सां, तू खुदे ए उसनै जाँच करके जाण लेवेगा।" 9 यहूदियां नै भी उसका साथ देके कहया, ये बात इस्से ढाळ तै करी सै।

### पौलुस का बदलै म्ह जबाब

10 जिब्ब हाकिम नै पौलुस ताहीं बोलण का इशारा करया, तो उसनै जबाब दिया : "मै न्यू जाण के के तू घणे साल्ला तै इस जात का न्याय करण लागरया सै, खुशी तै आपणा बदले का जबाब देऊँ सूँ। 11 तू आपै ए जाण सकै सै जिब्ब तै मै यरुशलेम तै आराधना करण नै आया, मन्नै बारहा दिनां तै बाद कोनी होये, 12 उन्नै मेरै ताहीं ना मन्दर म्ह, ना आराधनालयों म्ह, ना किसे नगर म्ह किसे तै बहस करदे या भीड़ लगादे पाया; 13 अर ना तो वे उन बात्तां ताहीं, जिनका वे इब मेरै पै दोष लावै सै, तेरै श्यामी साच्चि साबित कर सकै सै। 14 पर मै तेरै श्यामी यो मान ल्यु सूँ के जिस पन्थ नै वे भुंडा-पन्थ कहवै सै, उस्से की रीत पै मै आपणे बाप-दादा की सेवा करूँ सूँ; अर जो बात व्यवस्था अर नब्बियाँ की किताबां म्ह लिक्खी सै, उन सारया पै बिश्वास करूँ सूँ। 15 अर पणमेशर तै आस राखूँ सूँ जो वे खुद भी राखै सै, के धर्मी अर अधर्मी दोनुआ का जिन्दा उठणा होवेगा। 16 इस तै म्ह खुद भी कोशिश करूँ सूँ के पणमेशर की, अर माणसां की ओड़ तै मेरा मन सारी-हाण बेकसूर रहवै। 17 घणे साल्ला पाच्छे मै आपणे माणसां नै दान पहाचाण, अर भेंट चढाण आया था। 18 उन्नै मेरै ताहीं मन्दर म्ह, शुद्ध हालत म्ह, बिना भीड़ के गेल्या, अर बिना रोळा करदे भेंट चढान्दे पाया---- हम्बै, आसिया के कई यहूदी थे---- उन ताहीं सई था 19 के जै मेरै बिरोध म्ह उनके धोरै कोए बात हो तो उरै तेरै श्यामी आके मेरै पै तोहमन्द लादे। 20 या ये खुद ए बतावै के जिब्ब मै बड्डी पंचायत के श्यामी खड़या था, तो उन्नै मेरै म्ह कौण-सा कसूर पाया? 21 इस एक बात नै छोड़ जो मन्नै उनके बिच्चाळै खड़या होके कही थी : 'मरे होया के जिन्दा उठण के बारै म्ह आज मेरा थारै श्यामी मुकद्दमा होण लागरया सै।' 22 फेलिक्स नै, जो इस पन्थ की बात सई-सई जाणै था, उन ताहीं न्यू कहके टाळ दिया, "जिब्ब फौज का सरदार लूसियास आवैगा, तो थारी बात का फैसला करूँगा।" 23 अर सूबेदार ताहीं हुक्म दिया के पौलुस ताहीं कीमे रयात म्ह राखके रूखाळी करणा, अर उसके ढब्बियाँ म्ह तै किसे नै भी उसकी सेवा करण तै नीं रोकणा।

### फेलिक्स अर दुसिल्ला के श्यामी पौलुस

24 कीमे दिनां पाच्छे फेलिक्स आपणी बीरबान्नी दुसिल्ला ताहीं, जो यहूदिनी थी, गेल्या लेकै आया अर पौलुस ताहीं बुलवाके उस बिश्वास के बारै म्ह जो मसीह यीशु पै सै, उसतै सुणया। 25 जिब्ब ओ धर्म, अर संयम, अर आण आळे न्याय का जिक्र करण लागरया था, तो फेलिक्स नै भयभीत होके जबाब दिया, "इब्बे तो जा; मौक्का मिल दए मै तन्नै दुबारा बुलवाऊँगा।"

26 उस ताहीं पौलुस तै कीमे रपिये मिलण की भी आस थी, ज्यांतै और भी बुला-बुलाके उसतै बात करया करै था। 27 पर जिब्ब दो साल बीतगे तो पुरकियुस फेस्तुस, फेलिक्स की जंगहा पै आया; अर फेलिक्स यहूदियां ताहीं राज्जी करण की मर्जी तै पौलुस ताहीं कैदी ए छोड़ गया।

### पौलुस का सम्राट की दोहाई देणा

25 फेस्तुस उस प्रान्त म्ह पहाचण के तीन दिन पाच्छे कैसरिया तै यरुशलेम नै गया। 2 फेर प्रधान याजकां अर यहूदियां के खास माणसां नै उसके श्यामी पौलुस की बुराई करी; 3 अर उसतै बिनती करके उसके बिरोध म्ह यो वर चाहया के ओ उस ताहीं यरुशलेम म्ह बुलवावै, क्यूँके वे उस ताहीं राह ए म्ह मारण की टाह म्ह लागरे थे। 4 फेस्तुस नै जबाब दिया, "पौलुस कैसरिया म्ह पहरे म्ह सै, अर मै आपै ए तावळ तै ओड़ै जाऊँगा।" 5 फेर बोल्या, "थारै म्ह जो हक्क राखै सै वे गेल चालै, अर जै इस माणस नै कीमे गलत काम करया सै तो उस पै तोहमन्द लावै।" 6 उनके बिच्चाळै कोए आठ-दस दिन रहके ओ कैसरिया चल्या गया; अर दुसरे दिन न्याय-गद्दी पै बैठके पौलुस ताहीं ल्याण का हुक्म दिया। 7 जिब्ब ओ आया तो जो यहूदी यरुशलेम तै आये थे, उन्नै ओरै-धोरै खड़े होके उसपै घणी भारया तोहमन्द लाई, जिनका सबूत वे कोनी दे सकै थे। 8 पर पौलुस नै जबाब दिया, "मन्नै ना तो यहूदियां के व्यवस्था के अर ना मन्दर के, अर ना ए कैसर के बिरुद्ध कोए अपराध करया सै।" 9 फेर फेस्तुस नै यहूदियां ताहीं राज्जी करण की मर्जी तै पौलुस तै कहा, "के तू चाहवै सै के यरुशलेम नै जावै; अर ओड़ै मेरै श्यामी तेरा यो मुकद्दमा तय करया जावै?" 10 पौलुस नै कहा, "मै कैसर के न्याय-गद्दी के श्यामी खड़या सूँ; मेरै मुकद्दमे फैसला उरै ए होणा चाहिये। जिसा तन्नै आच्छी ढाळ बेरा सै, यहूदियां का मन्नै कीमे अपराध कोनी करया। 11 जै मै अपराधी सूँ अर मारण के जोग्गा कोए काम करया सै, तो मरण तै कोनी नाटदा; पर जिन बात्तां की ये मेरै पै तोहमन्द लावै सै, जै उनम्ह तै कोए भी बात साच्चि नीं लिक्की, तो कोए मेरै ताहीं उनके हाथां नीं सौंप सकदा। मै कैसर की दुहाई द्यु सूँ।" 12 फेर फेस्तुस नै मन्त्रियाँ की पंचायत के गेल्या बात करके जबाब दिया, "तन्नै कैसर की दुहाई दी सै, तू कैसर के ए धोरै जावैगा।"

### राजा अग्रिप्पा के श्यामी पौलुस

13 कुछे दिन बीतण के पाच्छे अग्रिप्पा राजा अर बिरनीके नै कैसरिया म्ह आके फेस्तुस तै भेंट करी। 14 उनके घणे दिन ओड़ै रहण के पाच्छे फेस्तुस नै पौलुस के बारै म्ह राजा ताहीं बताया : "एक माणस सै, जिस ताहीं फेलिक्स कैदी छोड़ गया सै। 15 जिब्ब मै यरुशलेम म्ह था, तो प्रधान याजक अर यहूदीया के पुरनियां नै उसकी बुराई करी अर चाहया के उस पै दण्ड का हुक्म होवै। 16 पर मन्नै उन ताहीं जबाब दिया के रोमियाँ की या रीत कोनी के किसे माणस ताहीं सजा के खातर सौंप देवै, जिब्ब ताहीं मुजरिम ताहीं आपणे मुद्दईयां के श्यामी खड़े होके दोष का जबाब देण का मौक्का ना मिलै। 17 आखर जिब्ब वे कहे होये, तो मन्नै कीमे वार कोनी करी, पर दुसरै ए दिन न्याय-गद्दी पै बैठके उस माणस ताहीं ल्याण का हुक्म दिया। 18 जिब्ब उसके मुद्दई खड़े होये, तो उन्नै इसी गलत बात्तां की तोहमन्द कोनी लाई, जिसा मै समझूँ था। 19 पर वे आपणे मत के अर यीशु नाम किसे माणस के बारै म्ह, जो मरग्या था अर पौलुस उस ताहीं जिन्दा बतावै था, बहस करै थे। 20 मै उलझन म्ह था के इन बात्तां का बेरा किस ढाळ लाऊँ? ज्यांतै मन्नै उसतै बुझया, 'के तू यरुशलेम जावैगा के ओड़ै इन बात्तां का फैसला होवै?' 21 पर जिब्ब पौलुस नै दुहाई देई के उसके मुकद्दमे का फैसला महाराजाधिराज के उरै हो, तो मन्नै हुक्म दिया के जिब्ब तक उस ताहीं कैसर के धोरै नीं खन्दाऊँ, उस ताहीं हिरासत म्ह राख्या जावै।" 22 फेर अग्रिप्पा नै फेस्तुस तै कहा, "मै भी उस माणस की सुणना चाहूँ सूँ।" उसनै कहा, "तू काल सुण लेवैगा।"

23 आखर म्ह दुसरे दिन जिब्ब अग्रिप्पा अर बिरनीके बड्डी धूम-धडाके तै आये अर फौज के सरदारां अर नगर के खास आदमियां के गेल्या दरबार म्ह पहाचे। फेर फेस्तुस नै हुक्म दिया के वे पौलुस ताहीं ली यावै। 24 फेस्तुस नै



कह्या, "हे राजा अग्रिप्पा, अर हे सारे माणसो जो उरै महारै गेल्या सो, थम इस माणस नै देक्खो सो, जिसके बारै म्ह सारे यहूदियां नै यरुशलेम म्ह अर उरै भी रुक्के मार-मारके मेरै तै बिनती करी के इसका जिन्दा रहणा सई कोनी। 25 पर मन्त्रै बेरा पाट लिया के उसनै इसा कीमे कोनी करया के मार दिया जा; अर जिब्ब के उसनै आपै ए महाराजाधिराज की दुहाई दी, तो मन्त्रै उस ताहीं खन्दाण का फ़ैसला करया। 26 मन्त्रै उसके बारै म्ह कोए पक्की बात कोनी पाई के आपणे मालिक के धोरै लिखूँ। ज्यांतै मैं उस ताहीं थारै श्यामी ल्याया सूँ के जाँचे पाच्छे मन्त्रै कीमे लिखण का मौक्का मिल्लै। 27 क्यूँके कैदी ताहीं खन्दाण अर जो तोहमन्द उस पै लाई सै, उन ताहीं नीं बताणा, मन्त्रै खामखां लाग्या सै।"

### अग्रिप्पा के श्यामी पौलुस का स्पष्टीकरण

26 अग्रिप्पा नै पौलुस तै कह्या, "तेरै ताहीं आपणे बाबत बोल्लण की आज्ञा सै।" फेर पौलुस हाथ बढ़ाके जबाब देण लाग्या, 2 "हे राजा अग्रिप्पा, जितनी बात्तां की यहूदी मेरै पै तोहमन्द लावै सैं, आज तेरै श्यामी उनका जबाब देण म्ह आपणे ताहीं धन्य समझूँ सूँ, 3 खास करके ज्यांतै के तू यहूदियां के सारे बिबारां अर झगड़े ताहीं जाणै सै। आखर म्ह मैं बिनती करूँ सै, धीरज तै मेरी सुण। 4 "मेरा चाल-चलण सरुआत तै आपणी जात के बिचाळे अर यरुशलेम म्ह जिसा था, उसका सारे यहूदियां नै बेरा सैं। 5 जै वे गवाही देणा चाहवै, तो सरुआत तै मेरै ताहीं पिच्छाणै सैं के मैं फरीसी होके आपणे धर्म के सारया तै खरे पन्थ के मुताबिक चाल्या। 6 अर इब उस प्रण म्ह आस के कारण जो पणमेशर नै म्हारै बाप-दाद्या तै करी थी, मेरै पै मुकद्दमा चाल रहया सै। 7 उस्से वादें के पुरे होण की आस लाए होये, म्हारै बारहां गोत्र आपणे साब्लै मन तै दिन-रात पणमेशर की सेवा करदे आये सैं। हे राजा, इस्से आस के बारै यहूदी मेरै पै तोहमन्द लावै सैं। 8 जिब्ब के पणमेशर मरे होया नै जिन्दा करै सैं, तो थारै उरै या बात क्यातै बिश्वास के जोगी कोनी समझी जान्दी?

9 "मन्त्रै भी समझया था के यीशु नासरी के नाम के बिरोध म्ह मेरै ताहीं घणा ए कीमे करणा चाहिये। 10 अर मन्त्रै यरुशलेम म्ह न्यू ए करया; अर प्रधान याजकां तै हक्क पाके घण-खरे पवित्र माणसां ताहीं जेळ म्ह गेरा, अर जिब्ब वे मार दिये जावै थे तो मैं भी उनके बिरोध म्ह आपणी राय द्यु था। 11 हरेक आराधनालय म्ह मैं उन ताहीं कांल कर-करके यीशु की बुराई करवाऊँ था, उरै ताहीं के छो के मारे इसा बावळा होग्या के बाहरण के नगरां म्ह भी जाके उन ताहीं कांल करूँ था।

### अपणे हृदय-परिवर्तन का जिकरा

(प्रेरितां का काम 9:1-19; 22:6-16)

12 "इस्से धुन म्ह जिब्ब मैं प्रधान याजकां तै अधिकार अर हुक्म-चिट्ठी लेके दमिश्क नै जाण लागरया था; 13 तो हे राजा, राह म्ह दोफारी के टेम मन्त्रै अकास तै सूरज के तेज तै भी बढ़के एक चाँदणा, आपणे अर आपणे गेल्या चालणआळ्यां के चौरदे नै चमकदा होड़ देख्या। 14 जिब्ब हम सारे धरती पै पड़गे, तो मन्त्रै इब्रानी भाषा म्ह, मेरै तै न्यू कहन्दे होये एक बोल सुणया, 'हे शाऊल, हे शाऊल, तू मन्त्रै क्यातै सतावै सै? पैने पै लात मारणा तेरै खातर ओख्खा सै।' 15 मैं बोल्या, 'हे प्रभु, तू कौण सै?' प्रभु नै कह्या, 'मैं यीशु सूँ, जिस ताहीं तू सतावै सै।' 16 पर तू उठ, आपणे पायां पै खड़या हो; क्यूँके मन्त्रै तेरै ताहीं ज्यातै दर्शन दिया सै के तन्नै उन बात्तां का भी सेवक अर गवाह ठहराऊँ, जो तन्नै देखीं सैं, अर उनका भी जिनके खातर मैं तन्नै दर्शन दूँगा। 17 अर मैं तन्नै तेरै माणसां तै अर गैर-जात्तां तै बचान्दा रहूँगा, जिनके धोरै मैं इब तन्नै इसकरके खन्दाऊँ सूँ 18 के तू उनकी आँख खोल्ले के वे अन्धेरै तै चाँदणै के कात्री, अर शैतान के अधिकार तै पणमेशर के कात्री पलटै; के पापां की माफी अर उन माणसां के गेल्या जो मेरै पै बिश्वास करण तै पवित्र करे गये सैं, बसियत पावै।'

### अपणे काम्मां का जिकरा

19 "आखर म्ह हे राजा अग्रिप्पा, मन्त्रै उस सुर्गीय दर्शन की बात कोनी टाळी, 20 पर पहल्या दमिश्क के, फेर यरुशलेम के, अर फेर यहूदिया के सारे देश के बासिन्दा ताहीं, अर गैर-जात्तां ताहीं समझान्दा रहया, के मन फिराओ अर पणमेशर के कात्री पलट के मन फिराव के जोग्या काम करो। 21 इन बात्तां के कारण यहूदी मन्त्रै मन्दर म्ह पकड़ के मार देण की कोशिश करै थे। 22 पर पणमेशर की मदद तै मैं आज ताहीं बणया सूँ छोट्या-बड़या सारया के श्यामी गवाही दूँ सूँ, अर उन बात्तां नै छोड़ कीमे कोनी कहन्दा जो नब्बियाँ अर मूसा नै भी कहया के होणआळी सैं, 23 के मसीह का दुःख ठाणा होगा, म्हारै माणसां म्ह गैर-जात्तां म्ह चाँदणै का प्रचार करेगा।"

24 जिब्ब ओ इस तरियां तै जबाब देण लागरया था, तो फेस्तुस नै ठाड्डु बोलके कह्या, "हे पौलुस, तू बावळा सै। घणै ज्ञान नै तेरै ताहीं बावळा कर दिया सै।" 25 पर पौलुस नै कह्या, "हे महामहिम फेस्तुस, मैं बावळा कोनी, पर सचाई अर बुद्धि की बात कहूँ सूँ। 26 राजा भी जिसके श्यामी मैं बिना उरे बोल्लण लागरया सूँ, इन बात्तां का बेरा सै; अर मन्त्रै बिश्वास सै के इन बात्तां म्ह तै कोए उसतै लुहकी कोनी, क्यूँके यो वाक्या किसे कुणै म्ह कोनी होया। 27 हे राजा अग्रिप्पा, के तू नब्बियाँ का बिश्वास करै सै? हम्बै, मन्त्रै बेरा सै के तू बिश्वास करै सै।" 28 फेर अग्रिप्पा नै पौलुस तै कह्या, "तू माडे-से समझाण तै मन्त्रै मसीही बनाणा चाहवै सै?" 29 पौलुस बोल्या, "पणमेशर तै मेरी प्रार्थना सै के, के माडे म्ह के घणे म्ह, सिर्फ तू ए नीं पर जितने माणस आज मेरी सुणै सैं, इन बन्धनां नै छोड़ वे मेरै जिसे हो जावै।"

30 फेर राजा अर अधिकारी अर बिरनीके अर उनके गेल्या बैठणीये उठ खड़े होये; 31 अर न्यारे जाके आपस म्ह कहण लागे, "यो माणस इसा तो कीमे कोनी करदा, जो मौत की सजा या जेळ, म्ह गेरण जोग्या हो।"

32 अग्रिपा नै फेस्तुस तै कह्या, "जै यो माणस कैसर की दुहाई नीं देदा, तो छूट सकै था।"

### पौलुस की रोम-यात्रा : क्रेते तक

27 जिब्ब यो पक्का होग्या के हम जहाज के जरिये इटली जावौं, तो उन्नै पौलुस अर कीमे दुसरे कैदीयां ताहीं भी यूलियुस नामक औगुस्तुस की फ़ौज के एक सूबेदार के हाथां सौंप दिया। 2 अद्रमुत्तियुम के एक जहाज पै जो आसिया के कठारै की जंगहा पै जाण पै था, चढ़के हम नै उस ताहीं खोल दिया, अर अरिस्तर्खुर नामक थिस्सलुनीके का एक मकिदूनी म्हारै गेल था। 3 दुसरे दिन हम नै सैदा म्ह लंगर गेरया, अर यूलियुस नै पौलुस पै दया करके उस ताहीं ढब्बियाँ के उरै जाण दिया के उसका आदर-मान करया जावै। 4 ओड़ै तै जहाज खोलके बाळ के पलट होण के कारण हम साइप्रस की आड़ म्ह होके चाल्ले; 5 अर किलिकिया अर पंफूलिया के लोवै के समुन्दर म्ह होके लूसिया के मूरा म्ह उतरे। 6 ओड़ै सूबेदार नै सिकन्दरिया का एक जहाज इटली जान्दा होड़ फेट्या, अर उसनै म्हारै ताहीं उस पै चढ़ा दिया। 7 जिब्ब हम घणे दिनां ताहीं होळ-होळे चालके मुश्किल तै कनिदुस के श्यामी पहोचे, तो इसकरके के बाळ म्हारै ताहीं आगे बढ़ण कोनी देवै थी, हम सलमोने के श्यामी तै होके क्रेते की आड़ म्ह चाल्ले; 8 अर उसके कठारै-कठारै मुश्किल तै चालके 'शुभलंगरबारी' नामक एक जंगहा पहोचे, जित तै लसया नगर लोवै था।

9 जिब्ब घणे दिन बीतये अर पाणी के सफर म्ह जोखम ज्यांतै होवै थी ब्रत के दिन इब बीत लिये थे। आखर म्ह पौलुस नै उन ताहीं न्यू कहके समझाया, 10 "हे सज्जनों, मन्त्रै इसा लागै सै के इस सफर म्ह मुश्किल अर घणा नुकसान, ना सिर्फ माल अर जहाज की बत्के म्हारी ज्यान का भी, होणआळा सै।" 11 पर सूबेदार नै पौलुस की बात्तां तै कसान अर जहाज के मालिक की बात्तां तै बाध मान्या। 12 वा बंदरगाह जाड्डा काटण के खातर सई कोनी था, ज्यांतै घणा ए का बिचार होया के ओड़ै तै जहाज खोलके जै किसे तरियां तै हो सकै तो फीनिक्स पहोचके जाड्डा काटै। यो तो क्रेते का एक बंदरगाह सै जो दक्षिण-पश्चिम अर उत्तर-पश्चिम के कात्री नै खुल्लै सै।

### समुन्द्र म्ह तूफान

13 जिब्व कुछ-कुछ दक्षिणी बाळ चालण लागी, तो न्यू समझके के म्हारा मतलब पूरा होग्या, लंगर उठाया अर कंठारा धरे होये क्रेते कै धोरै जाण लागे। 14 पर माडी वार म्ह धरती कै कात्री तै बड्डी ए आँधी उठी, जो 'यूरकुलिन' कुहवावै सै। 15 जिब्व आँधी जहाज पै लागी तो ओ उसकै श्यामी ठहर कोनी सक्या, आखर म्ह हम नै उस ताहीं बहण दिया अर इस्से तरियां बहन्दे होये चाले गये। 16 फेर कौदा नामक एक छोटे-से टापू की आड़ म्ह बहन्दे-बहन्दे हम मुश्किल तै डोंगी नै बस कर सके। 17 फेर मल्लाहां नै उस ताहीं ठाकै आबळ उपाय करके जहाज ताहीं तळै तै बाँध्या, अर सुरतिस के चोरबालू पै टिक जाण कै डर तै पाल अर सामान उतार कै बहन्दे होये चाले गये। 18 जिब्व हम नै आँधी तै घणे हिचकोले अर धके खाए, तो दुसरे दिन वे जहाज का माळ बगाण लागे; 19 अर तीसरे दिन उन्नै आपणे हाथां तै जहाज का साज-सामान भी बगा दिया। 20 जिब्व घणे दिन ताहीं ना सूरज, ना तारे दिक्खे अर बड्डी आँधी चाल्दी रही, तो आखर म्ह म्हारै बचण की सारी उम्मीद जान्दी रही।

21 जिब्व वे घणे दिन ताहीं भूखे रह लिये, तो पौलुस नै उनकै बिचाळै खडे होकै कह्या, "हे माणसो, चहिये था के थम मेरी बात मानके क्रेते तै ना जहाज खोल्दे अर ना या मुसीबत आन्दी अर ना यो नुकसान टान्दे। 22 पर इब मै थमनै समझाऊँ सूँ के धीरज राखो, क्यूँके थम म्ह तै किसे की ज्यान का नुकसान कोनी होवैगा, पर सिर्फ जहाज की। 23 क्यूँके पणमेशर जिसका मै सूँ अर जिसकी सेवा करूँ सूँ, उसके सुगंदुत नै आज रात मेरै धोरै आकै कह्या, 24 'हे पौलुस, डरै मतना ! तन्नै कैसर कै श्यामी खड्या होणा जरूर सै। देख, पणमेशर नै सारया ताहीं जो तेरै गेल्या सफर करै सै, तेरै ताहीं दिया सै।' 25 ज्यांतै, हे भले माणसो, सब्र करो; क्यूँके मै पणमेशर का बिश्वास करूँ सूँ, के जिसा मेरै तै कह्या गया सै, उसा ए होगा। 26 पर म्हारै ताहीं किसे टापू पै जा टिकणा होगा।"

### जहाज का टूटणा

27 जिब्व चौदहवीं रात आई, अर हम अद्रिया समुन्द्र म्ह भटकदे होये हाँडरे थे, तो आधी रात कै लवै मल्लाहां नै अंदाजे तै जाणया के हम किसे देश कै लोवै पहोच रहे सां। 28 थाह लेण पै उन्नै बीस पुरसा डून्घा पाया, अर थोडा आगे बढके दुबारा थाह लेई तो पन्द्रह पुरसा पाया। 29 फेर पथरीली जंगहा तै टकरण कै डर तै उन्नै जहाज की पिछली सैड चार लंगर गेरे, अर सबेरे होण की चाह करदे रहे। 30 पर जिब्व मल्लाह जहाज पै तै भाजणा चाहवै थे, अर गलही तै लंगर गेरण कै बहाणे डोंगी समुन्द्र म्ह उतार दी; 31 तो पौलुस नै सूबेदार अर सिपाहियां तै कह्या, "जै ये जहाज पै नीं रहें, तो थम भी कोनी बच सकदे।" 32 फेर सिपाहियां नै जोड़े काटके डोंगी गेर दी।

33 जिब्व सबेरे होण पै था, फेर पौलुस नै न्यू कहके, सारया ताहीं खाणा खाण कै खातर समझाया, "आज चौदहां दिन होये के थम आस देखदे-देखदे भूखे रहे, अर कीमे खाणा कोनी खाया। 34 ज्यांतै थारै तै समझाऊँ सूँ के कीमे खा ल्यो, जिसतै थारा बचाव होवै; क्यूँके थारै म्ह तै किसे का सिर का एक बाल भी कोनी गिरैगा।" 35 न्यू कहके उसनै रोडी लेके सारया कै श्यामी पणमेशर का धन्यवाद करया अर तोड़के खाण लाग्या। 36 फेर वे सारया नै धीरज बंधा कै खाणा खुवाण लागे। 37 हम सारे मिलके जहाज पै दो सौ छिहत्तर जणे थे। 38 जिब्व वे खाणा खा कै छिक लिये, तो गेहूँ ताहीं समुन्द्र म्ह बगा कै जहाज हल्का करण लागे।

39 जिब्व दिन लिकड्या तो उन्नै उस देश ताहीं कोनी पिच्छाणा, पर एक खाडी देक्खी जिसका कंठारा चौरस था, अर बिचार करया के जै हो सकै तो इस्से पै जहाज नै टिकावै। 40 फेर उन्नै लंगरा ताहीं खोलके समुन्द्र म्ह छोड़ दिया अर उस्से टेम पतवारां के बन्धन खोल दिये, अर बाळ कै श्यामी आगला पाल चढाके कंठारै कै कात्री चाले। 41 पर दो समुन्द्र के संगम की जंगहा [पड़के उन्नै जहाज ताहीं टिकाया, अर गलही तो धक्का खाके पड़ गी अर टळ नीं सकी; पर पिछली सैड लहरा तै टूटण लागी। 42 फेर सिपाहियां का यो बिचार होया के कैदीयां ताहीं मार देवै, इसा ना हो के कोए तैर कै

लिकड भाजै। 43 पर सूबेदार नै पौलुस ताहीं बचाण की मर्जी तै उन ताहीं इस बिचार तै रोक्या अर न्यू कह्या, के जो तैर सकै सै, पहल्या छलाँग मारके कंठारै लिकड जावै; 44 अर बाकी कोए पटडा पै, अर कोए जहाज की दूसरी चीज कै सहारै लिकड जावै। इस तरियां तै सारे धरती पै बच लिकडे।

### माल्टा द्वीप म्ह पौलुस

28 जिब्व हम बच लिकडे, तो बेरा लाग्या के यो द्वीप माल्टा कुहवावै सै। 2 ओड़ै के बासिन्द्यां नै म्हारै पै अनोकखी दया करी; क्यूँके मीह बरसण कै कारण ठण्ड थी, ज्यांतै आग सुलगाके हम सारया ताहीं ठहराया। 3 जिब्व पौलुस नै लाकडीयाँ का बरोटा कड्डा करके आग पै धरया, तो एक साँप आँच पाके लिकड्या अर उसकै हाथ तै लिपट गया। 4 जिब्व उन बासिन्द्यां नै साँप ताहीं उसकै हाथ तै लिपटे होड़ देख्या, तो आपस म्ह कह्या, "साच्च ए यो माणस खूनी सै के यधपि समुन्द्र तै बचग्या, तौभी न्याय नै जिन्दा कोनी रहण दिया।" 5 फेर उसनै साँप ताहीं आग म्ह झटक दिया, अर उस ताहीं कीमे नुकसान कोनी पहोच्या। 6 पर वे बाट देखे थे के ओ सूज जावैगा या चाणचक पड़के मर जावैगा, पर जिब्व वे घणी वार ताहीं देखदे रहे अर देख्या के उसका कीमे भी कोनी बिगड्या, तो आपना बिचार बदलके कह्या, "यो तो कोए देवता सै।"

7 उस जंगहा कै ओरै-धोरै उस टापू कै प्रधान पुबलियुस की धरती थी। उसनै म्हारै ताहीं आपणे घरा ले जाके तीन दिन ढब्बी की ढाळ सेवा-बाडी करी। 8 पुबलियुस का बाप ताप-बुखार अर बवासीर तै बीमार पड्या था। आखर म्ह पौलुस नै उसकै धोरै घर म्ह जाके प्रार्थना करी अर उस पै हाथ धरके उस ताहीं चंगा करया। 9 जिब्व इसा होया तो उस द्वीप के बाकी बीमार आये अर चंगे करे गये। 10 उन्नै म्हारा घणा आदर-मान करया, अर जिब्व हम चालण लागे तो जो कीमे म्हारै खातर जरूरी था, जहाज पै धर दिया।

### माल्टा द्वीप तै रोम कै कात्री

11 तीन महीने कै पाच्छै हम सिकन्दरिया के एक जहाज पै चल लिकडे, जो उस द्वीप म्ह पुरै जाड्डे रह्या था, अर जिसका निशान दियुसकुरी था। 12 सुरकूसा म्ह लंगर गेरके हम तीन दिन टिके रहे। 13 ओड़ै तै हम घूमके रेगियुम म्ह आये; अर एक दिन कै पाच्छै दक्षिणी बाळ चाली, फेर हम दुसरे दिन पुतियुली म्ह आये। 14 ओड़ै हमनै भाई फेट्टे, उनकै कहणे तै हम उनकै उरै सात दिन ताहीं रहे; अर इस तरियां तै हम रोम नै चाले। 15 ओड़ै तै भाई म्हारी खबर सुणके अप्पियुस कै चौक अर तीन-सराए ताहीं म्हारै तै फेटण नै लिकड आये, जिन्नै देखके पौलुस नै पणमेशर का धन्यवाद करया अर धीरज बांध्या। 16 जिब्व हम रोम म्ह पहोचे, तो पौलुस ताहीं एक सिपाही कै गेल्या जो उसकी रुखाळी करै था, एकल्ले रहण का हुक्म मिलग्या।

### रोम म्ह पौलुस

17 तीन दिन कै पाच्छै उसनै यहूदियां कै खास माणसां ताहीं बुलाया, अर जिब्व वे कट्टे होये तो उनतै कह्या, "हे भाईयो, मन्नै आपणे माणसां कै या बाप-दादा कै बीवारां कै बिरोध म्ह कीमे भी कोनी करया, तौभी कैदी बणाके यरूशलेम तै रोमियां कै हाथां सौंपया गया। 18 उन्नै मेरै ताहीं जाँच कै छोड़ देणा चाहया, क्यूँके मेरै म्ह मौत कै जोग्या कोए कसूर कोनी था। 19 पर जिब्व यहूदी इसकै बिरोध म्ह बोलण लागे, तो मन्नै कैसर की दुहाई देणी पडी : यो नीं के मन्नै आपणे माणसां पै कोई तोहमन्द लाणी थी। 20 ज्यांतै मन्नै थारै ताहीं बुलाया सै के थारै तै फेट्टे अर बतळाऊँ; क्यूँके इझ्राएल की आस कै खातर मै इस बेल तै जुड्या होड़ सूँ।" 21 उन्नै उसतै कह्या, "ना हम नै तेरै बारै म्ह यहूदियां तै चिड्डी पाई, अर ना भाईयां म्ह तै किसे नै आके तेरै बारै म्ह कीमे बताया अर ना भूंडा कहया। 22 पर तेरा बिचार के सै? ओए हम तेरै तै सुणना चाहवां सां, क्यूँके हमनै बेरा सै के हरेक जंगहा इस मत कै बिरोध म्ह माणस बात करै सै।"

23 फेर उन्नै उसकै खातर एक दिन ठहराया, अर घणे माणस उसकै उरै कट्टे होये, अर ओ पणमेशर कै राज्य की गवाही देदा होया, अर मूसा के व्यवस्था अर नब्बीयाँ की किताबां तै यीशु कै बारै म्ह समझा-समझाके सबेरे

तै साँझ ताहीं वर्णन करदा रहया | 24 फेर कुछां नै उन बात्तां ताहीं मान लिया, अर कुछां नै बिश्वास कोनी करया | 25 जिब्ब वे आपस म्ह एक मत कोनी होये, तो पौलुस की इस बात कै कहण पै चाल्ले गये : “पवित्र आत्मा नै यशायाह नब्बी कै जरिये थारै बाप-दाद्या तै सई ए कहया, 26 ‘जाकै इन माणसां तै कह, के सुणदे तो रहोगे, पर ना समझोगे, देखदे तो रहोगे, पर ना बूझोगे; 27 क्यूँके इन माणसां का मन मोट्टा अर उनके कान भारया हो गये सै, अर उनै आपणी आँख मूंद ली सै, इसा ना हो के वे कदे आँखां तै देखै

अर कान्ना तै सुणै अर मन तै समझै अर पलटै, अर मै उन ताहीं चंगा करूँ।’ 28 आखर म्ह थम जाणो सो के पणमेशर कै इस उद्धार की कहानी गैर-जात्तां कै धोरै खन्दाई गयी सै, अर वे सुणैगें।” 29 जिब्ब उसनै न्यू कहया तो यहूदी आपस म्ह घणे बहस करण लागे अर ओड़ै तै चले गये | 30 ओ पुरे दो साल आपणे भाड़ै कै घर म्ह रहया, 31 अर जो उसकै धोरै आवै थे, उन सारया तै फेटदा रहया अर बे रोक-टोक घणा निडर होकै पणमेशर कै राज्य का प्रचार करदा अर प्रभु यीशु मसीह की बात सिखान्दा रहया |

# रोमियों

## अभिवादन

1 पौलुस की ओड़ तै जो यीशु मसीह का दास सै, अर प्रेरित होण के खातर बुलाया गया, अर पणमेशर के उस सुसमाचार के खातर न्यारा करया गया सै 2 जिसकी उसनै पहल्या ए तै आपणे नब्बियाँ के जरिये पवित्र ग्रन्थ म्ह, 3 आपणे बेट्टे म्हारै प्रभु यीशु मसीह के बारै म्ह प्रण करया था; ओ देही के भाव तै तो दाऊद की पीढी तै पैदा होया 4 अर पवित्र आत्मा के भाव तै मरे होया म्ह तै जिन्दा उठण के कारण सामर्थ के गेल्या पणमेशर का बेट्टा ठहराया सै। 5 उसके जरिये हमनै अनुग्रह अर प्रेरिताई मिली के उसके नाम के कारण सारी जात्तां के माणस बिश्वास करके उसकी मात्रै, 6 जिनम्ह थम भी यीशु मसीह के होण के खातर बुलाए गये सो।

7 उन सारया के नाम जो रोम म्ह पणमेशर के प्यारे सै अर पवित्र होण के खातर बुलाए गये सै : म्हारै पिता पणमेशर अर प्रभु यीशु मसीह की ओड़ तै थारै ताहीं अनुग्रह अर शान्ति मिलदी रहवै।

## धन्यवाद की प्रार्थना

8 पहल्या मै थम सारया के खातर यीशु मसीह के जरिये आपणे पणमेशर का धन्यवाद करूँ सूँ, क्यूँके थारै बिश्वास का जिक्रा साबती दुनिया म्ह होरया सै। 9 पणमेशर जिसकी सेवा मै आपणी आत्मा तै उसके बेट्टे के सुसमाचार के बारै म्ह करूँ सूँ, ओए मेरा गवाह सै के मै थमनै किस तरियां सारी हाण याद दुवान्दा रहूँ सूँ, 10 अर सारी हाण आपणी प्रार्थनायाँ म्ह बिनती करूँ सूँ के किस तरियां तै इब भी थारै धोरै आण की मेरा सफर पणमेशर की मर्जी तै सफल होवै। 11 क्यूँके मै थारै तै फेटण का चाव करूँ सूँ के मै थमनै कोए आत्मिक वरदान हुँ जिसतै थम पक्के हो जाओ; 12 अर्थात् यो के जिब्व मै थारै बिचाळै होऊँ, तो हम उस बिश्वास के जरिये जो मेरै म्ह अर थारै म्ह सै, एक-दुसरे तै उत्साह मिलै। 13 हे भाईयो, मै नीं चाहन्दा के थम इसतै अनजाण रहो के मन्त्रै बार-बार थारै धोरै आणा चाहया, के जिसा मन्त्रै दूसरी गैर-जात्तां म्ह फळ मिल्या, उरसे तरियां ए थारै म्ह भी मिलै, पर इब ताहीं रोक्या गया। 14 अर गैर-भाषायाँ का, मै युनानियाँ अर समझदारां अर बेअक्कां का कर्जदार सूँ। 15 आखर म्ह मै थमनै भी जो रोम म्ह रहो सो, सुसमाचार सुनाण नै जमां त्यार सूँ।

## सुसमाचार की सामर्थ

16 क्यूँके मै सुसमाचार तै कोनी सरमान्दा, ज्यांतै के ओ हरेक बिश्वास करण आळ्या के खातर, पहल्या तै यहूदी फेर यूनानी के खातर, उद्धार के खातर पणमेशर की सामर्थ सै। 17 क्यूँके उसम्ह पणमेशर की धार्मिकता बिश्वास तै अर बिश्वास के खातर प्रगट होवै सै; जिस तरियां लिख्या सै, "बिश्वास तै धर्मी माणस जिन्दा रहवैगा।"

## माणस जात का पाप

18 पणमेशर का छोह तो उन माणसां की सारी अभगती अर अधर्म पै सुर्ग तै प्रगट होवै सै, जो साच नै अधर्म तै दाबे राखै सै। 19 ज्यांतै के पणमेशर के बाबत का ज्ञान उनके मनां म्ह प्रगट सै क्यूँके पणमेशर नै उन पै प्रगट करया सै। 20 उसके अनदेखे गुण, यानिके उसकी घणी पुराणी सामर्थ अर पणमेशरत्व, दुनिया के बनाण के टेम तै उसके काम्मां के जरिये देखण म्ह आवै सै, उरै ताहीं के उन पै जबाब कोनी दिया गया। 21 इस कारण के

पणमेशर ताहीं जाणे पाचछै भी उन्नै पणमेशर के लायक बड़ाई अर धन्यवाद कोनी करया, पर खाम-खां बिचार करण लागे, उरै ताहीं के उनका बोळा मन अन्धेरा होग्या। 22 वे आपणे-आप ताहीं श्याणे मानके बेअक्के बणगे, 23 अर अविनाशी पणमेशर की महिमा नै नाशवान माणस, अर पन्छियाँ, अर चौपायाँ, अर रेंगण आळे जानवरां की मूर्ति की समानता म्ह बदल दिया।

24 इस करके पणमेशर नै उन ताहीं उनके इन ताहीं अभिलाषायां के मुताबिक अशुद्धता के खातर छोड़ दिया के वे आपस म्ह आपणी देही का अनादर करै। 25 क्यूँके उन्नै पणमेशर की सच्चाई ताहीं बदलके झूठ बणा दिया, अर सृष्टि की उपासना अर सेवा करी, ना के उस सृजनहार की जो सारी हाण धन्य सै! आमीन। 26 ज्यांतै पणमेशर नै उन ताहीं नीच कामनायां के बस म्ह छोड़ दिया, उरै ताहीं के उनकी लुगाईयाँ नै भी सीधा-सा बीवार ताहीं उसतै जो स्वभाव के खिलाफ सै, बदल दिया। 27 उरसे तरियां ए माणस भी लुगाईयाँ के गेल्या सीधा-सा बीवार छोड़के आपस म्ह कामातुर होके जळण लागे, अर माणसां नै माणसां के गेल्या बेशर्मी के काम करके आपणे बहम का सई फळ पाया।

28 जिब्व उन्नै पणमेशर ताहीं पिछाणना कोनी चाहया, तो पणमेशर नै भी उन ताहीं उनके निकम्मे मन पै छोड़ दिया के वे भुन्डे काम करै। 29 ज्यांतै वे सारै ढाळ के अधर्म, अर दुष्टता, अर लालच, अर बैर-भाव तै भरगे; अर डाह, अर हत्या, अर रोळे, अर छळ, अर ईर्ष्या तै जमां भरगे, अर चुगलखोर, 30 बदनाम करण आळे, घमण्डी, पणमेशर तै नफरत करण आळे, दुसरयां की बेईज्ती करण आळे, घमण्डी, डींगमार, भुंडी-भुंडी बात्तां के बनाण आळे, माँ-बाप का हुक्म ना मानण आळे, 31 बावळे, बिश्वासघाती, मायारहित अर निर्दयी होये। 32 वे तो पणमेशर की या विधि जाणै सै के इसे-इसे काम करण आळे मौत के दण्ड के जोमे सै, फेरभी ना सिर्फ आप ए इसे काम करै सै बल्के करण आळ्यां तै राजी भी होवै सै।

## पणमेशर न्याय

2 आखर म्ह हे तोहमन्द लाणआळे, तू कोए क्यूँ ना हो; तू जबाब कोनी दे सकदा; क्यूँके जिस बात म्ह तू दुसरयां पै तोहमन्द लावै सै उरसे बात म्ह आपणे आप नै भी कसूरवार ठहरावै सै आप ए वे काम करै सै। 2 हमनै बेरा सै के इसे-इसे काम करण आळ्यां पै पणमेशर की ओड़ तै सई-सई सजा का हुक्म होवै सै। 3 हे माणस, तू जो इसे-इसे काम करणीयाँ पै तोहमन्द लावै सै अर खुद वैए काम करै सै; के न्यू समझै सै के तू पणमेशर की सजा के हुक्म तै बच जावैगा? 4 के तू उसकी दया, अर सहनशीलता, अर धीरजरूपी धन ताहीं तुच्छ जाणै सै? के न्यू नीं समझदा के पणमेशर की दया तेरै म्ह मन-फिराव नै सिखावै सै? 5 पर तू आपणी करडेपण अर जिद्दी मन के कारण उसके छोह के दिन के खातर, जिसम्ह पणमेशर का साच्चा न्याय प्रगट होवैगा, आपणे खातर छोह कमाण लागरया सै। 6 ओ हरेक नै उसके काम के मुताबिक बदला देवैगा : 7 जो आच्छे काम म्ह पक्का बणके महिमा, अर आदर, अर अमरता की टोह म्ह सै, उन ताहीं ओ अनन्त जीवन देवैगा; 8 पर जो ऊत सै अर साच नै कोनी मान्दे, बल्के अधर्म नै मात्रै सै, उन पै छोह अर कोप पड़ेगा। 9 अर क्लेश अर संकट हरेक माणस के प्राण पै जो भुंडा करै सै आवैगा, पहल्या यहूदी पै फेर यूनानी पै; 10 पर महिमा अर आदर अर कल्याण हरेक नै मिलेगा, जो भला करै सै, पहल्या यहूदी ताहीं फेर यूनानी ताहीं। 11 क्यूँके पणमेशर किसे की मेर कोनी लेन्दा।

12 ज्यांतै जिन्नै बिना व्यवस्था पाए पाप करया, वे बिना व्यवस्था के नाश भी होवैंगे; अर जिन्नै व्यवस्था पाके पाप करया, उनकी सजा व्यवस्था के

मुताबिक होवेंगी; 13 (क्यूँके पणमेशर के उरै व्यवस्था के सुनण आळे धर्मी कोनी, पर व्यवस्था पै चालण आळे धर्मी ठहराए जावेंगे। 14 फेर जिब्व गैर-जात माणस जिनके धोरै व्यवस्था कोनी, स्वभाव ए तै व्यवस्था की बात्तां पै चाल्ले सैं, तो व्यवस्था उनके धोरै ना होण पै भी वे आपणे खातर आप ए व्यवस्था सैं। 15 वे व्यवस्था की बात आपणे-आपणे दिलां म्ह लिक्खी होई दिखावें सैं अर उनके विवेक भी गवाही देवें सैं, अर उनके बिचार आपस म्ह तोहमन्द लांदे या उन ताहीं बेकसूर ठहरावें सैं;) 16 जिस दिन पणमेशर मेरै सुसमाचार के मुताबिक यीशु मसीह के जरिये माणसां की लुक्की होई बात्तां का न्याय करैगा।

### यहूदी अर व्यवस्था

17 जै तू यहूदी कुहवावै सैं, अर व्यवस्था पै भरोसा राखै सैं, अर पणमेशर के बारे म्ह घमण्ड करै सैं, 18 अर उसकी मर्जी जाणै अर व्यवस्था की शिक्षा पाके घणी बढ़िया-बढ़िया बात्तां नै प्रिय जाणै सैं; 19 अर आपणे पै भरोसा राखै सैं के आंध्या का अगुवा, अर अँधरे म्ह पड़े होया का चाँदणा, 20 अर बेअक्कां का सिखाणआळा; अर बाळका उपदेशक सूं; अर ज्ञान, अर सच का नमूना, जो व्यवस्था म्ह सैं, मन्त्रै मिल्या सैं। 21 आखर म्ह के तू जो दूसरयां नै सिखावै सैं, आपणे आप नै कोनी सिखान्दा? के तू चोरी ना करण का उपदेश देवै सैं, आप ए चोरी करै सैं? 22 तू जो कहवै सैं, "जारी ना करियो," के आप ए जारी करै सैं? तू जो मूर्तियाँ तै नफरत करै सैं, के आप ए मन्दरां नै लूटै सैं? 23 तू जो व्यवस्था के बाबत घमण्ड करै सैं, के व्यवस्था नै नीं मानके पणमेशर का अनादर करै सैं? 24 "क्यूँके थारै कारण गैर-जात्तां म्ह पणमेशर नाम की बुराई करी जावै सैं," जिसा लिख्या भी सैं।

25 जै तू व्यवस्था पै चाल्ले तो खतने तै फैयदा तो सैं, पर जै तू व्यवस्था नै नीं मानै तो तेरा खतना बिन खतना की हालत बरगा सैं। 26 ज्यांतै जै खतनारहित माणस व्यवस्था की विधियाँ नै मान्या करै, तो के उसकी बिन खतना की दशा खतने के बराबर कोनी गिणी जावेंगी? 27 अर जो माणस देही तौर पै बिना खतना के रहया, जै ओ व्यवस्था नै पुगावै, तो के तन्नै जो लेख पाण अर खतना करे जाण पै भी व्यवस्था नै कोण्या मांदा, कसूरवार कोनी ठहरावैगा? 28 क्यूँके यहूदी ओ कोनी जो प्रगट म्ह यहूदी सैं; अर ना ओ खतना सैं जो प्रगट म्ह सैं अर देही म्ह सैं। 29 पर यहूदी ओए सैं जो मन म्ह सैं; अर खतना ओए सैं जो हृदय का अर आत्मा म्ह सैं, ना के लेख का : इस्यां की बड़ाई माणसां की ओड़ तै कोनी, पर पणमेशर के कात्री तै होवै सैं।

3 आखर यहूदी की के बड़ाई या खतने का के फैयदा? 2 हर तरियां तै घणा कुछे। पहल्या तो न्यू के पणमेशर के बचन उन ताहीं साँपे गये। 3 जै कीमे बिश्वासघाती लिक्के भी तो के होया? के उनके बिश्वासघाती होण तै पणमेशर की सच्चाई बेकार ठहरैगी? 4 कद्वे भी नीं! बल्के पणमेशर साच्चा अर हरेक माणस झूठा ठहरै, जिसा लिख्या सैं, "जिसतै तू आपणी बात्तां म्ह धर्मी ठहरै अर न्याय करदे टेम तू जीत पावै।" 5 इसकरके जै म्हारा अधर्म पणमेशर की धार्मिकता ठहरा देवै सैं, तो हम के कहवां? के न्यू कहवा के पणमेशर जो छोह करै सैं जुल्मी सैं? (न्यू तो मै माणस की रीत पै कहुँ सूं)। 6 कद्वे भी नीं! नीं तो पणमेशर किस तरियां दुनिया का न्याय करैगा? 7 जै मेरै झूठ के कारण पणमेशर की सच्चाई उसकी महिमा के खातर, घणी करके प्रगट होई तो फेर क्यांतै पापी की ढाळ मै सजा के जोग्गा मान्या जाऊँ सूं? 8 "हम क्यांतै बुराई नीं करां के भलाई लिक्के?" जिब के म्हारै पै याए तोहमन्द लाई भी जा सैं, अर कीमे कहवै सैं के इनका योए कहणा सैं। पर इस्यां का कसूरवार ठहराणा सई सैं।

### कोए धर्मी कोनी

9 तो फेर के होया? के हम उनतै आच्छे सां? कद्वे भी नीं; क्यूँके हम यहूदियाँ अर युनानियाँ दोनवां पै या तोहमन्द ला चुके सां के वे सारे के सारे पाप के बस म्ह सैं। 10 जिसा लिख्या सैं : "कोए धर्मी कोनी, एक भी कोनी। 11 कोए श्याणा कोनी; कोए पणमेशर का टोहणआळा कोनी। 12 सारे भटक गे सैं, सारे के सारे निकम्मे बण गे सैं; कोए भलाई करण आळा कोनी, एक भी नीं। 13 उनका गळ खुली होई कब्र सैं, उन्नै आपणी जीभ ताहीं छल किया सैं,

उनके होटां म्ह साँपां का जहर सैं। 14 उनका मुँह श्राप अर कड़वैपण तै भरया सैं। 15 उनके पाँ लहू बहाण ताहीं फुर्तीले सैं, 16 उनकी राहयां म्ह नास अर क्लेश सैं, 17 उन्नै खुशी आनन्द का रास्ता कोनी जाणया। 18 उनकी आँखां के श्यामी पणमेशर का डर कोनी।" 19 हमनै बेरा सैं के व्यवस्था जो कीमे कहवै सैं उन्नै तै कहवै सैं, जो व्यवस्था के अधीन सैं; ज्यांतै के हरेक मुँह बन्द करया जावै अर सारी दुनिया पणमेशर की सजा के जोग्गी ठहरै; 20 क्यूँके व्यवस्था के काम्मां तै कोए जीव उसके श्यामी धर्मी कोनी ठहरैगा, ज्यांतै के व्यवस्था के जरिये पाप की पीच्छाण होवै सैं।

### बिश्वास के जरिये धार्मिकता

21 पर इब व्यवस्था तै न्यारा पणमेशर की वा धार्मिकता दिक्खी सैं, जिसकी गवाही व्यवस्था अर नब्बी देवें सैं, 22 यानिके पणमेशर की वा धार्मिकता जो यीशु मसीह पै बिश्वास करण तै सारे बिश्वास करण आळा के खातर सैं। क्यूँके कीमे भेद कोनी; 23 ज्यांतै के सारया नै पाप करया सैं अर पणमेशर की महिमा तै दूर सैं, 24 पर उसके अनुग्रह तै उस छुटकारे के जरिये जो मसीह यीशु म्ह सैं, फ्री म्ह धर्मी ठहराए जावै सैं। 25 उस ताहीं पणमेशर नै उसके लहू के कारण एक इसा पछतावा ठहराया, जो बिश्वास करण तै कामचलाऊ होवै सैं, के जो पाप पहल्या करे गये अर जिन पै पणमेशर नै आपणे सब्र के कारण ख्यास कोनी करी। उनके बाबत ओ आपणी धार्मिकता दिखावै। 26 बल्के इस्से टेम उसकी धार्मिकता दिखै के जिसतै ओ आप ए धर्मी ठहरै, अर जो यीशु पै बिश्वास करै उसका भी धर्मी ठहराणआळा हो। 27 तो घमण्ड करणा कित रहया? उसकी तो जंगहा ए कोनी। कौण-से व्यवस्था के कारण तै? के कर्मा के व्यवस्था तै? ना, बल्के बिश्वास के व्यवस्था के कारण। 28 इसकरके हम इस नतीजै पै पहीचे सा के माणस व्यवस्था के काम्मां तै न्यारा ए, बिश्वास के जरिये धर्मी ठहरै सैं। 29 के पणमेशर सिर्फ यहूदियाँ ए का सैं? के गैर-जात्तां का कोनी? हम्बै, गैर-जात्तां का भी सैं। 30 क्यूँके एक ए पणमेशर सैं, जो खतनाआळ्यां नै बिश्वास तै अर बिन-खतनाआळ्यां ताहीं भी बिश्वास के जरिये धर्मी ठहरावैगा। 31 तो के हम व्यवस्था ताहीं बिश्वास के जरिये खाम-खां ठहरावै सैं? कद्वे भी नीं! बल्के व्यवस्था ताहीं पक्का करै सैं।

### अब्राहम का उदाहरण

4 इसकरके हम के कहवां म्हारै देही के बाप अब्राहम नै के मिल्या? 2 क्यूँके जै अब्राहम काम्मां तै धर्मी ठहराया जान्दा, तो उसनै घमण्ड करण की जंगहा होन्दी, पर पणमेशर के लोवै नीं। 3 पवित्रग्रन्थ के कहवै सैं? न्यू के "अब्राहम नै पणमेशर पै बिश्वास करया, अर यो उसके खातर धार्मिकता गिणया गया।" 4 काम करण आळे की मजदूरी देणा दान कोनी, पर हक्क समझया जावै सैं। 5 पर जो काम नीं करदा बल्के भगतिहीन के धर्मी ठहराण आळे पै बिश्वास करै सैं, उसका बिश्वास उसके खातर धार्मिकता गिणया जावै सैं। 6 जिसनै पणमेशर बिना कर्मा के धर्मी ठहरावै सैं, उस ताहीं दाउद भी धन्य कहवै सैं : 7 "धन्य सैं, वे जिनके अधर्म माफ होए, अर पाप ढक्के गये। 8 धन्य सैं ओ माणस जिस ताहीं पणमेशर पापी नीं ठहरावै।" 9 तो यो धन्य कहणा, के खतना आळ्यां ए के खातर सैं या बिना खतना आळ्यां के खातर भी? हम न्यू कहवां सां, "अब्राहम के खातर उसका बिश्वास धार्मिकता गिणया गया।" 10 तो ओ किस तरियां गिणया गया? खतने की हालत म्ह या बिना खतने की हालत म्ह? खतने की हालत म्ह कोनी पर बिना खतने की हालत म्ह। 11 उसनै खतने का निशान पाया के उस बिश्वास की धार्मिकता पै छाप छोडै जो उसनै बिना खतने की हालत म्ह राख्या था, जिसतै ओ उन सारया का बाप ठहरै जो बिना खतने की हालत म्ह बिश्वास राखै सैं ताके वे भी धर्मी ठहरै; 12 अर उन खतना करे होया का बाप हो, जो ना सिर्फ खतना करे होये सैं, पर म्हारै बाप अब्राहम के उस बिश्वास की लीक पै भी चाल्ले सैं जो उसनै बिन खतने की हालत म्ह करया था।

### बिश्वास कै द्वारा प्रतिज्ञा का मिलणा

13 क्यूँके यो प्रण के ओ दुनिया का वारिस होगा, ना अब्राहम ताहीं ना उसकै वंश ताहीं व्यवस्था कै जरिये दी गई थी, पर बिश्वास नै धार्मिकता के जरिये मिली। 14 क्यूँके जै व्यवस्था आळे वारिस सैं, तो बिश्वास खाम-खां अर प्रण बेफळ लिंकडया। 15 व्यवस्था तो छोह पैदा करै सैं, अर जित व्यवस्था कोनी ओड़ै उसका लॉघणा भी कोनी।

16 इस्से कारण प्रण बिश्वास पै टिकया होया सैं के अनुग्रह की रीत पै हो, के ओ उसके वंशजा कै खातर पक्के हो, ना के सिर्फ उसके खातर जो व्यवस्था आळा सैं बल्के उनके खातर भी जो अब्राहम कै जिसा बिश्वास आळे सैं; ओए तो हम सारया का बाप सैं,---- 17 जिसा लिख्या सैं, "मन्नै तेरै ताहीं घणी-ए जात्ता का पिता ठहराया सैं"---- उस पणमेशर कै श्यामी जिस पै उसनै बिश्वास करया, अर जो मरे होया नै जिन्दा करै सैं, अर जो बात सैं ए नीं उनका नाम इसा लेवै सैं के मान्ने वे सैं। 18 उसनै निराशा म्ह भी आस राखकै बिश्वास करया, ज्यांतै के उस बचन कै मुताबिक के "तेरी पीढ़ी इसी होगी," ओ घणी ए जात्ता का बाप होवै। 19 ओ जो एक सौ साल का था, आपणे मरी होई सी देही अर सारा के कोख गर्भ की मरी होई सी हालत जाणकै भी बिश्वास म्ह कमजोर कोनी होया, 20 अर ना अबिश्वासी होकै पणमेशर कै प्रण पै शक करया, पर बिश्वास म्ह पक्का होकै पणमेशर की महिमा करी; 21 अर पक्के तौर पै जाणयां के जिस बात का उसनै प्रण करया सैं, ओ उसनै पूरा करण म्ह भी समर्थ सैं। 22 इस कारण यो उसके खातर धार्मिकता गिणया गया। 23 अर यो बचन, "बिश्वास उसके खातर धार्मिकता गिणया गया," ना सिर्फ उसके खातर लिख्या गया, 24 बल्के म्हारै खातर भी जिनकै खातर बिश्वास धार्मिकता गिणया जावैगा, यानिके म्हारै खातर, जो उस पै बिश्वास करै सैं जिननै म्हारै प्रभु यीशु ताहीं मरे होया म्ह तै जिन्दा करया। 25 ओ म्हारै अपराधा कै खातर पकड़वाया गया, अर म्हारै धर्मी ठहरण कै खातर जिन्दा करया गया।

### पणमेशर तै मेल

5 आखर म्ह जिब्व हम बिश्वास तै धर्मी ठहरे, तो आपणे प्रभु यीशु मसीह कै जरिये पणमेशर कै गेल्या मेल राक्खां, 2 जिसकै जरिये बिश्वास कै कारण उस अनुग्रह तक जिसम्ह हम बणे सां, म्हारी पहोच भी होई, अर पणमेशर की महिमा की आस पै घमण्ड करां। 3 सिर्फ योए नीं, बल्के हम क्लेशां म्ह भी घमण्ड करां, न्यू जाणकै के क्लेश तै धीरज, 4 धीरज तै खरया लिंकडणा, अर खरे लिंकडण तै आस पैदा होवै सैं; 5 अर आस तै सरम कोनी आन्दी, क्यूँके पवित्र आत्मा जो म्हारै ताहीं दिया गया सैं उसके जरिये पणमेशर का प्रेम म्हारै मन म्ह गेरया गया सैं। 6 क्यूँके जिब्व हम कमजोर ए थे, तो मसीह सई टेम पै भगतिहिनां कै खातर मरया। 7 किसे धर्मी माणस कै खातर कोए मरै, यो तो ओक्खा सैं; पर हो सके सैं किसे भले माणस कै खातर कोए मरण की भी हिम्मत करै। 8 पर पणमेशर हम पै आपणे प्रेम की भलाई इस तरियां तै प्रगट करै सैं के जिब्व हम पापी ए थे जिब्वे मसीह म्हारै खातर मरया। 9 आखर जिब्व के हम इब उसके लहू के कारण धर्मी ठहरे, तो उसके जरिये पणमेशर कै छोह तै क्यातै नीं बचांगे? 10 क्यूँके बैरी होण की हालत म्ह उसके बेटे की मौत कै जरिये म्हारा मेळ पणमेशर कै गेल्या होया, तो फेर मेळ हो जाण पै उसके जीवन कै कारण हम उद्धार क्यातै नीं पावांगे? 11 सिर्फ योए नीं, पर हम आपणे प्रभु यीशु मसीह कै जरिये, जिसकै जरिये म्हारा मेळ होया सैं, पणमेशर म्ह आनंदित होवां सां।

### आदम द्वारा मौत - मसीह द्वारा

12 ज्यांतै जिसा एक माणस कै जरिये पाप दुनिया म्ह आया, अर पाप कै जरिये मौत आई, अर इस तरियां तै मौत सारे माणसां म्ह फैल्यी, क्यूँके सारया नै पाप करया। 13 व्यवस्था कै दिए जाण ताहीं पाप दुनिया म्ह तो था, पर जित व्यवस्था कोनी ओड़ै पाप गिणया कोनी जान्दा। 14 फेरभी आदम तै लेकै मूसा ताहीं मौत नै उन माणसां पै भी राज्य करया, जिन्नै उस आदम, जो उस आणआळे का निशान सैं, के अपराध कै तरियां पाप नीं करया। 15 पर

जिसी अपराध की हालत सैं, उस्से तरियां अनुग्रह अर उसका जो दान एक माणस कै, यानिके यीशु मसीह कै, अनुग्रह तै होया घण-खरे माणसां पै जरूर ए घणा होया। 16 जिसा एक माणस कै पाप करण का फळ होया, उस्से तरियां ए दान की दशा कोनी, क्यूँके एक ए कारण सजा कै हुक्म फैसला होया, पर घण-खरे अपराधां कै कारण इसा वरदान पैदा होया के माणस धर्मी ठहरे। 17 क्यूँके जिब्व एक माणस कै अपराध कै कारण मौत नै उस एक ए कै जरिये राज्य करया, तो जो माणस अनुग्रह अर धर्मरूपी वरदान घणा ए घणा पावै सैं वे एक माणस कै, यानिके यीशु मसीह कै जरिये जरूर ए अनन्त जीवन म्ह राज्य करैंगे।

18 ज्यांतै जिसा एक अपराध सारे माणसां कै खातर सजा का कारण होया, उस्से तरियां ए एक धर्म का काम भी सारे माणसां कै खातर जीवन कै निमित्त धर्मी ठहराए जाण का कारण होया। 19 क्यूँके जिसा एक माणस कै हुक्म ना मानण तै घणे माणस पापी ठहरे, उस्से तरियां ए एक माणस कै हुक्म मानण तै घणे माणस धर्मी ठहरैंगे। 20 व्यवस्था बिच्चाळै म्ह आ गी के अपराध घणे होवै, पर जित पाप घणा होया ओड़ै अनुग्रह उसतै भी घणा होया, 21 के जिसा पाप नै मौत फैलान्दे होए राज्य करया, उस्से तरियां ए म्हारै प्रभु यीशु मसीह कै जरिये अनुग्रह भी अनन्त जीवन कै खातर धर्मी ठहरान्दे होए राज्य करै।

### पाप कै खातर मरे होए : मसीह म्ह जिन्दे

6 तो हम के कहवां? के हम पाप करदे रहवां के अनुग्रह घणा होवै? 2 कहे भी नीं! हम जिब्व पाप कै खातर मरये तो फेर आगै नै उसम्ह किस तरियां जीवन बितावां? 3 के थमनै कोनी बेरा के हम सारे जिन्नै मसीह यीशु का बपतिस्मा लिया, उसकी मौत का बपतिस्मा लिया। 4 आखर म्ह उस मौत का बपतिस्मा पाण तै हम उसके गेल्या गाड्डे गये, ताके जिस तरियां मसीह पिता की महिमा कै जरिये मरे होया म्ह तै जिन्दा करया गया, उस्से तरियां ए हम भी नये जीवन की सी चाल चालां।

5 क्यूँके जै हम उसकी मौत की बराबरी म्ह उसके गेल्या जुट गये सैं, तो पक्के तौर पै उसके जिन्दा उठण की बराबरी म्ह भी जुट जावांगे। 6 हमनै बेरा सैं के म्हारा पुराणा माणस-पण उसके गेल्या क्रूस पै चढाया गया ताके पाप की देही बेकार हो जावै, अर हम आगै नै पाप की गुलामी म्ह नीं रहवां। 7 क्यूँके जो मर लिया, ओ पाप तै छुटके धर्मी ठहरया। 8 इसकरकै जै हम मसीह कै गेल्या मर गे, तो म्हारा बिश्वास यो सैं के उसके गेल्या जीवांगे भी। 9 क्यूँके न्यू बेरा सैं के मसीह मरे होया म्ह तै जिन्दा उठके दुबारा मरण का कोनी; उस पै फेर मौत का राज कोनी होवै। 10 क्यूँके ओ जो मर गया तो पाप कै खातर एक ए बर मर गया; पर जो जिन्दा सैं तो पणमेशर कै खातर जिन्दा सैं। 11 इस्से तरियां थम भी आपणे आप ताहीं पाप कै खातर तो मरया होड, पर पणमेशर कै खातर मसीह यीशु म्ह जिन्दा समझो। 12 इसकरकै पाप थारी नाश होण आळी देही म्ह राज नीं करै, के थम उसकी लालसायां कै कब्जे म्ह रहो; 13 अर ना आपणे अंगां ताहीं अधर्म कै हथियार होण कै खातर पाप नै सौंपो, पर आपणे आप ताहीं मरे होया म्ह तै जिन्दा उठ्या होया जाणकै पणमेशर नै सौंपो, अर आपणे अंगां नै धर्म के हथियार होण कै खातर पणमेशर ताहीं सौंपो। 14 फेर थारै पै पाप का राज कोनी होवैगा, क्यूँके थम व्यवस्था कै कब्जे म्ह कोनी बल्के अनुग्रह कै कब्जे म्ह सो।

### धार्मिकता के दास

15 तो के होया? के हम ज्यांतै पाप करां के हम व्यवस्था का कब्जे म्ह कोनी बल्के अनुग्रह कै कब्जे म्ह सां? कहे भी नीं! 16 के थमनै नीं बेरा के जिस का हुक्म मानण कै खातर थम आपणे आप ताहीं गुलामां कै तरियां सौंप देवो सो उस्से के गुलाम सो : चाहे पाप के, जिसका अन्त मौत सैं, चाहे हुकमां के, जिसका अन्त धार्मिकता सैं? 17 पर पणमेशर का धन्यवाद हो के थम जो पाप के गुलाम थे इब मन तै उस उपदेश के मानण आळे होगे, जिसकै साँचे म्ह ढाळे गये थे, 18 अर पाप तै छुटाये जाके धर्म के गुलाम होये। 19 मै थारी देही की कमजोरी के कारण माणसां की रीत पै कहूँ सूं। जिस तरियां तै थमनै आपणे अंगां ताहीं भुन्डे काम कै खातर अशुद्धता अर

भुन्डे काम के गुलाम करके सौंपया था, उससे तरियां तै इब आपणे अंगां नै पवित्रता के खातर धर्म के गुलाम करके सौंप द्यो।

20 जिब्व थम पाप के गुलाम थे, तो धर्म की ओड़ तै आजाद थे। 21 आखर म्ह जिन बात्तां तै इब थम सरमाओ सो, उनतै उस टेम थम के फळ पाओ थे? क्यूँके उनका अन्त तो मौत सै। 22 पर इब पाप तै आजाद होके अर पणमेशर के गुलाम बणके थमनै फळ मिल्या जिसतै पवित्रता मिलै सै, अर उसका अन्त अनन्त जीवन सै। 23 क्यूँके पाप की मजदूरी तो मौत सै, पर पणमेशर का वरदान म्हारै प्रभु मसीह यीशु म्ह अनन्त जीवन सै।

### शादीशुदा जीवन का उदाहरण

7 हे भाईयो, के थमनै नीं बेरा----मै व्यवस्था के जानण आळ्यां तै कहुँ सूँ----के जिब्व ताहीं माणस जिन्दा रहवै सै, जद ताहीं उस पै व्यवस्था का राज रहवै सै? 2 क्यूँके ब्याता लुगाई व्यवस्था के मुताबिक आपणे धणी के जिन्दे जी उस तै बन्धी सै, पर जै धणी मर ज्या, तो वा धणी के व्यवस्था तै छुट गी। 3 ज्यांतै जै धणी के जिन्दे जी वा किसे दुसरे माणस की हो जावै, तो जार कुहवावैगी, पर जै धणी मर ज्या, तो वा उस व्यवस्था तै छुट गी, उरै ताहीं के जै किसे दुसरे माणस की हो जावै तौभी जार कोनी ठहरैगी। 4 उससे तरियां ए हे मेरे भाईयो, थम भी मसीह की देही के जरिये व्यवस्था के खातर मरे होए बण गे, के उस दुसरे के हो जाओ, जो मरे होया म्ह तै जिन्दा उठ्या : ताके हम पणमेशर के खातर फळ ल्यावां। 5 क्यूँके जिब्व हम देही म्ह थे, तो पापां की मर्जी जो व्यवस्था के जरिये थीं, मौत का फळ पैदा करण के खातर म्हारै अंगां म्ह काम करै थीं। 6 पर जिस के बन्धन म्ह हम थे उसके खातर मरके, इब व्यवस्था तै इसे छुट गे, के लेख की पुराणी रीत पै नीं, बल्के आत्मा की नयी रीत पै सेवा करां सां।

### व्यवस्था अर पाप

7 तो हम के कहां? के व्यवस्था पाप सै? कद्वे भी नीं! बल्के बिना व्यवस्था के मै पाप नै कोनी पिच्छाणदा : व्यवस्था जै नीं कहन्दे, के लालच मतना करै तो मै लालच नै कोनी जाणदा। 8 पर पाप नै मौक्का पाके हुकम के जरिये मेरै म्ह सारी तरियां का लालच पैदा करया, क्यूँके बिना व्यवस्था पाप मुर्दा सै। 9 मै तो व्यवस्था बिना पहल्या जिन्दा था, पर जिब्व हुकम आया, तो पाप जिन्दा होग्या, अर मै मरग्या। 10 अर योए हुकम जो जीवन के खातर था, मेरै खातर मौत का कारण ठहरया। 11 क्यूँके पाप नै मौक्का पाके हुकम के जरिये मेरै ताहीं भकाया, अर उससे के जरिये मेरै ताहीं मार भी दिया। 12 ज्यांतै व्यवस्था पवित्र सै, अर हुकम भी सई अर आच्छे सै। 13 तो के ओ जो आच्छा था, मेरै खातर मौत ठहरया? कद्वे भी नीं! पर पाप उस आच्छी चीज के जरिये मेरै खातर मौत पैदा करण आळा होया के उसका पाप होणा प्रगट होवै, अर हुकम के जरिये पाप घणा ए पापमय ठहरे।

### माणस का अन्तर्धन्ध

14 हमनै बेरा सै के व्यवस्था तो आत्मिक सै, पर मै देही अर पाप के हाथ बिक्या होया सूँ। 15 जो मै करूँ सूँ उस ताहीं कोनी जाणदा; क्यूँके जो मै चाहूँ सूँ ओ नीं करया करदा, पर जिस तै मन्त्रै नफरत आवै सै ओए करै सूँ। 16 जै जो मै नीं चाहन्दा ओए करूँ सूँ, तो मै मान ल्युँ सूँ के व्यवस्था भले सै। 17 तो इसी हालत म्ह उसका करणआळा मै कोनी, बल्के पाप सै जो मेरै म्ह बस्या होया सै। 18 क्यूँके मन्त्रै बेरा सै के मेरै म्ह यानिके मेरी देही म्ह कोए आच्छी चीज वास कोनी करदी। मेरा जी तो करै सै, पर भले काम मेरै म्ह बणदे कोनी। 19 क्यूँके जिस आच्छे काम करण नै मेरा जी करै सै, ओ तो कोनी करदा, पर जो बुराई करणा नीं चाहन्दा, ओए करया करूँ सूँ। 20 आखर म्ह जै मै ओए करूँ सूँ जो नीं चाहन्दा, तो उसका करणआळा मै कोनी रहया, पर पाप जो मेरै म्ह बस्या होया सै।

21 इस तरियां तै मै ये व्यवस्था पाऊँ सूँ के जिब्व भलाई करणा चाहूँ सूँ, तो बुराई मेरै धोरै आवै सै। 22 क्यूँके मै भीतरी माणस-पण तै तो पणमेशर के व्यवस्था तै घणा राजी रहूँ सूँ। 23 पर मन्त्रै आपणे अंगां म्ह दुसरे ढाळ के व्यवस्था दिखै सै, जो मेरी समझ के व्यवस्था तै लड़ै सै अर मन्त्रै पाप के

व्यवस्था के बन्धन म्ह गरै सै जो मेरे अंगां म्ह सै। 24 मै किसा नरभाग माणस सूँ मन्त्रै इस मौत की देही तै कौण छुटावैगा? 25 म्हारै प्रभु यीशु मसीह के जरिये पणमेशर का धन्यवाद होवै। ज्यांतै मै आप समझ तै तो पणमेशर के व्यवस्था का, पर देही तै पाप के व्यवस्था नै खाऊँ सूँ।

### पवित्र आत्मा के द्वारा जीवन

8 आखर म्ह इब जो मसीह यीशु म्ह सै, उन पै सजा का हुकम कोनी। [क्यूँके वे देही के मुताबिक नीं बल्के आत्मा के मुताबिक चाल्लें सै।] 2 क्यूँके जीवन की आत्मा के व्यवस्था नै मसीह यीशु म्ह मेरै ताहीं पाप के अर मौत के व्यवस्था तै आजाद कर दिया। 3 क्यूँके जो काम व्यवस्था देही के कारण कमजोर होके नीं कर सके, उस ताहीं पणमेशर नै करया, यानिके आपणै ए बेड़े ताहीं पापमय देही की बराबरी म्ह अर पापबलि होण के खातर खन्दाके, देही म्ह पाप पै सजा का हुकम दिया। 4 ज्यांतै के व्यवस्था की बिधि म्हारै म्ह जो देही के मुताबिक नीं बल्के आत्मा के मुताबिक चाल्लें सै, पूरी करी जावै। 5 क्यूँके देही आळे माणस देही की बात्तां पै मन लावै सै; पर आध्यात्मिक आत्मा की बात्तां पै मन लगावै सै। 6 देही पै मन लाणा तो मौत सै, पर आत्मा पै मन लाणा जीवन अर शान्ति सै; 7 क्यूँके देही पै मन लाणा तो पणमेशर तै बैर राखणा सै, क्यूँके ना तो पणमेशर के व्यवस्था के अधीन सै अर ना हो सके सै; 8 अर जो देही हालत म्ह सै, वे पणमेशर नै राजी कोनी कर सकदे।

9 पर जिब्व के पणमेशर का आत्मा थारै म्ह बसै सै, तो थम देही तौर पै कोनी पर आत्मिक तौर पै सो। जै किसे म्ह मसीह का आत्मा कोनी तो ओ पणमेशर का माणस कोनी। 10 जै मसीह थारै म्ह सै, तो देही पाप के कारण मरी होई सै; पर आत्मा धर्म के कारण जिन्दी सै। 11 जै उससे का आत्मा जिसनै यीशु ताहीं मरे होया म्ह तै जिन्दा करया, थारै म्ह बस्या होया सै; तो जिसनै मसीह ताहीं मरे होया म्ह तै जिन्दा करया, ओ थारी नाश होण आळी देहियाँ नै भी आपणे आत्मा के जरिये जो थारै म्ह बस्या होया सै; जिन्दा करैगा।

12 इसकरके हे भाईयो, हम देही के कर्जदार कोनी के देही के मुताबिक दिन कांड़ों, 13 क्यूँके जै थम देही के मुताबिक दिन काड्यो तो मरोगे जै आत्मा तै देही के काम्मां नै मारोगे तो जिन्दे रहोगे। 14 ज्यांतै के जितने माणस पणमेशर के आत्मा के चलाए चाल्लें सै, वै ए पणमेशर के बेड़े सै। 15 क्यूँके थमनै गुलामी की आत्मा कोनी मिली के फेर डरण लाग्या, पर गोद लेण आळे की आत्मा मिली सै, जिसतै हम हे अब्बा, हे पिता कहके बोलां सां। 16 आत्मा आप ए म्हारी आत्मा के गेल्या गवाही देवै सै, के हम पणमेशर की उलाद सां; 17 अर जै उलाद सां तो वारिस भी, बल्के पणमेशर के वारिस अर मसीह के संगी वारिस सां, के जिब्व हम उसके गेल्या दुःख ठावां तो उसके गेल्या महिमा भी पावें।

### आण आळे बख्त म्ह दिखण आळी महिमा

18 क्यूँके मै समझूँ सूँ के इस बख्त के दुःख अर क्लेश उस महिमा के श्यामी, जो म्हारै पै प्रगट होण आळी सै, कीमे भी कोनी सै। 19 क्यूँके सृष्टि घणी उम्मीद भरी निगांह तै पणमेशर के बेट्यां के प्रगट होण की बाट देखण लागरी सै। 20 क्यूँके सृष्टि आपणी मर्जी तै नीं पर अधीन करण आळे की ओड़ तै, खाम-खा के अधीन इस उम्मीद तै करी गई 21 के सृष्टि भी आप ए विनाश की गुलामी तै छुटकारा पाके, पणमेशर की उलादां की महिमा की आजादी पावैगी। 22 क्यूँके हमनै बेरा सै के सारी सृष्टि इब ताहीं मिलके रिगदी अर दर्दा म्ह पड़ी होई तड़फै सै; 23 अर सिर्फ ओए नीं पर हम भी जिनके धोरै आत्मा का पहला फळ सै, आप ए आपणे म्ह रिगां सां; अर गोद लिए होण की, यानिके आपणी देही के छुटकारे की बाट देखें सै। 24 इस उम्मीद के जरिये म्हारा उद्धार होया सै; पर जिस चीज की उम्मीद करी जावै सै, जिब्व ओ देखण म्ह आवै तो फेर उम्मीद कित रही? क्यूँके जिस चीज नै कोए देख रहया सै उसकी उम्मीद के करैगा? 25 पर जिस चीज नै हम नीं देखदे, जै उसकी उम्मीद राख्वां सां, तो धीरज तै उसकी बाट भी देख्वां सां।

26 इस्से तरियां तै आत्मा भी म्हारी कमजोरी म्ह मदद करै सै : क्यूँके हमनै नीं बेरा के प्रार्थना किस तरियां तै करणी चाहिये, पर आत्मा आप ए इसी आहें भर-भरकै, जो ब्यान तै बाहरण सै, म्हारै खातर बिनती करै सै; 27 अर मनां के जाँचणआळे नै बेरा सै के आत्मा की मनसा के सै? क्यूँके ओ पवित्र माणसां के खातर पणमेशर की मर्जी के मुताबिक बिनती करै सै।

28 हमनै बेरा सै के जो माणस पणमेशर तै प्रेम राखै सै, उनकै खातर सारी बात मिलकै भलाई ए नै पैदा करै सै; यानिके उन्नै के खातर जो उसकी मर्जी के मुताबिक बुलाए होइ सै। 29 क्यूँके जिन ताहीं उसनै पहल्या तै जाण लिया सै उन ताहीं पहल्या तै ठहराया भी सै के उसकै बेटे के हुबहू शक म्ह हों, ताके ओ घणे भाईयां म्ह पहल्ला यानि जेठा ठहरै। 30 फेर जिन ताहीं उसनै पहल्या तै ठहराया, उन ताहीं बुलाया भी; अर जिन ताहीं बुलाया, उन ताहीं धर्मी भी ठहराया सै; अर जिन ताहीं धर्मी ठहराया, उन ताहीं महिमा भी देई सै।

### पणमेशर का प्रेम

31 आखर म्ह हम इन बात्तां के बारै म्ह के कहवां? जै पणमेशर म्हारी कान्नी सै, म्हारा बिरोधी कौण हो सकै सै? 32 जिसनै आपणे खुद के बेटे ताहीं भी कोनी छोड्या, पर उस ताहीं म्हारे सारया के खातर दे दिया, ओ उसकै गेल्या हमनै और सारा कीमे क्यांतै नीं देवैगा? 33 पणमेशर के छाटे होया पे तोहमन्द कौण लावैगा? पणमेशर ए सै जो उन ताहीं धर्मी ठहराण आळा सै। 34 फेर कौण सै जो सजा का हुकम देवैगा? मसीह ए सै जो मरया बल्के मुर्दा म्ह तै जिन्दा भी उठ्या, अर पणमेशर के सोळी ओइ सै, अर म्हारै खातर बिनती भी करै सै। 35 कौण हमनै मसीह के प्रेम तै न्यारा करैगा? के क्लेश, या संकट, या रोळा, या अकाल, या नंगाई, या जोखम, या तलवार? 36 जिसा लिख्या सै, "तेरै खातर हम दिन भर घात करे जावां सां; हम मारण जोगी भेडडां की तरियां गिणे गये सां।" 37 पर इन सारी बात्तां म्ह हम उसकै जरिये जिसनै म्हारै तै प्रेम करया सै, जयन्त तै भी बाध सै। 38 क्यूँके मन्ने पक्के तौर पे बेरा सै के ना मौत, ना जिन्दगी, ना सुर्गदुत, ना प्रधानतारै, ना इब आळा बख्त, ना आण आळा बख्त, ना सामर्थ, ना ऊँचाई, 39 ना डून्घाई, अर ना कोए और सृष्टि हमनै पणमेशर के प्रेम तै जो म्हारै प्रभु मसीह यीशु म्ह सै, न्यारा कर सकैगी।

### पणमेशर अर उसके छॉटे होए माणस

9 मै मसीह म्ह साची कहुँ सूं, मै झूठ कोनी बोल्दा अर मेरा विवेक भी पवित्र आत्मा म्ह गवाही देवै सै 2 के मन्ने घणा दुःख सै, अर मेरा मन सारी हाण दुख्दा रहवै सै, 3 क्यूँके मै उरै ताहीं चाहूँ था के आपणे भाईयां के खातर जो देही के भाव तै मेरै कुन्बे आळे सै, खुद ए मसीह तै श्रापित हो जान्दा। 4 वे इस्त्राएली सै, अर गोद लिये होइ का हक्क अर महिमा अर वाचाएँ अर व्यवस्था अर उपासना अर प्रतिज्ञाएँ उन्ने की सै। 5 बड्डे-बूढे भी उन्ने के सै, अर मसीह भी देही के भाव तै उन्ने म्ह तै होया। सारया के ऊपर परम पणमेशर युगानयुग धन्य हो। आमीन।

6 पर न्यू कोनी के पणमेशर का बचन टळ गया, ज्यांतै के जो इस्त्राएल के वंशज सै, वे सारे इस्त्राएली कोनी; 7 अर ना अब्राहम की पीढी होण के कारण सारे उसकी ऊलाद ठहरे, पर (लिख्या सै) "इसहाक ए तै तेरी पीढी कुहवावैगी।" 8 यानिके देही की ऊलाद पणमेशर की ऊलाद कोनी, पर प्रण की ऊलाद बंश गिणे जावै सै। 9 क्यूँके प्रण का बचन यो सै : "मै इस टेम के मुताबिक आऊँगा, अर सारा के बेटा होवैगा।" 10 अर सिर्फ योए नीं, पर जिबब रिबका भी एक तै यानिके म्हारै बाप इसहाक तै पेट तै थी, 11 अर इब ताहीं ना तो बाळक पैदा होए थे, अर ना उन्नै कीमे आच्छा या भुंडा करया था; इसकरके के पणमेशर की मनसा जो उसकै छॉट लेण के मुताबिक सै, कर्मा के कारण नीं पर बुलाण आळे के कारण सै, बणी रहवै : 12 उसनै कह्या, "जेठा छोटळै का गुलाम होवैगा।" 13 जिसा लिख्या सै, "मन्ने याकूब तै प्रेम करया, पर एसाव ताहीं दुपारा जाणया।"

14 ज्यांतै हम के कहवा? के पणमेशर के उरै जुल्म सै? कहे भी नीं। 15 क्यूँके ओ मूसा तै कहवै सै, "मै जिस किसे पै दया करणा भला उस पै दया

करूँगा, अर जिस किसे पै तरस खाणा चाहूँ उससे पै तरस खाऊँगा।"

16 आखर या ना तो चाहण आळे की, ना भाजण आळे की, पर दया करण आळे पणमेशर की बात सै। 17 क्यूँके पवित्रग्रन्थ म्ह फिरौन तै कहया गया, "मन्ने तेरै ताहीं ज्यां ए तै खड्या करया सै के तेरै म्ह आपणी सामर्थ दिखाऊँ, अर मेरै नाम का प्रचार सारी धरती पै होवै।" 18 इसकरके ओ जिस पै चाहवै सै उस पै दया करै सै, अर जिस ताहीं चाहवै सै उस ताहीं करडा कर देवै सै।

### पणमेशर का छो अर उसकी दया

19 आखर म्ह तू मेरै तै कहवैगा, "ओ फेर क्यांतै तोहमन्द लावै सै? कौण उसकी मर्जी का सामणा करै सै?" 20 हे माणस, भला तू कौण सै जो पणमेशर का सामणा करै सै? के गद्दी होई चीज गढण आळे तै कह सकै सै, "तन्ने मेरै ताहीं इसा क्यांतै बनाया सै?" 21 के कुम्हार ताहीं माट्टी पै हक्क कोनी के एक ए लोदे म्ह तै एक बासण आदर के खातर, अर दुसरे ताहीं अनादर के खातर बनावै? 22 तो इसमह कौण सी हैरानी की बात सै के पणमेशर नै आपणा छोह दिखाण अर आपणी सामर्थ प्रगट करण की मर्जी तै छोह के बासणा की, जो विनाश के खातर तयार करे गये थे, घणे धीरज तै सही; 23 अर दया के बासणा पै, जिन ताहीं उसनै महिमा के खातर पहल्या-ए तै तयार करया, अपणे महिमा के धन ताहीं प्रगट करण की मर्जी करी? 24 यानिके म्हारै पै जिन ताहीं उसनै ना सिर्फ यहुदियां म्ह तै, बल्के गैर-जात्तां म्ह तै भी बुलाया। 25 जिसा ओ होशे की किताब म्ह भी कहवै सै, "जो मेरी प्रजा कोनी थी, उन ताहीं मै आपणी प्रजा कहुँगा; अर जो प्यारी नीं थी, उस ताहीं प्यारी कहुँगा। 26 अर इसा होगा के जिस जंगहा म्ह उनतै न्यू कहया गया था के थम मेरी प्रजा कोनी सो, उससे जंगहा वे जिन्दे पणमेशर की ऊलाद कुहवावैगी।" 27 अर यशायाह इस्त्राएल के बारै म्ह रुक्का मारकै कहवै सै, "चाहे इस्त्राएल की ऊलादां की गिणती समुन्दर के बालू के बराबर हो, तौभी उनमह तै थोडे ए बचेंगे। 28 क्यूँके प्रभु आपणा बचन धरती पै पूरा करकै, धार्मिकता तै तावळा-ए उस ताहीं सिद्ध करैगा।" 29 जिसा यशायाह नै पहल्या भी कहया था, "जै सेनाओं का प्रभु म्हारै खातर कीमे वंश नीं छोड्दा, तो हम सदोम के जिसे हो जान्दे, अर अमोरा के जिसे ठहरदे।"

### इस्त्राएल का अबिश्वास

30 आखर म्ह हम के कहवां? यो के गैर-जात्तां नै जो धार्मिकता की टोह कोनी करै थे, धार्मिकता पाई यानिके उस धार्मिकता ताहीं जो बिश्वास तै सै; 31 पर इस्त्राएली, जो धर्म के व्यवस्था की टोह करै थे उस व्यवस्था ताहीं कोनी पहाचे। 32 किस खातर? इसकरके के वे बिश्वास तै नीं, पर मान्ने कर्मा तै उसकी टोह करै थे। उन्नै उस ठोकर के पत्थर पै ठोकर खाई, 33 जिसा लिख्या सै, "देखखो, मै सिव्योन म्ह एक ठेस लागण का पत्थर, अर ठोकर खाण की चट्टान राखूँ सूं, अर जो उस पै बिश्वास करैगा ओ सर्मिन्दा कोनी होवैगा।"

10 हे भाईयो, मेरै मन की इच्छा अर उनकै खातर पणमेशर तै मेरी प्रार्थना सै के वे उद्धार पावै। 2 क्यूँके मै उनकी गवाही हूँ सूं के उन ताहीं पणमेशर के खातर धुन रहवै सै, पर समझदारी के गेल्या नीं। 3 क्यूँके वे पणमेशर की धार्मिकता तै अनजाण होके, अर आपणी धार्मिकता पक्की करण की कोशिश करके, पणमेशर की धार्मिकता के अधीन ना होए। 4 क्यूँके हरेक बिश्वास करण आळे के खातर धार्मिकता के कारण मसीह व्यवस्था का अन्त सै।

### उद्धार सारया के खातर

5 क्यूँके मूसा नै न्यू लिख्या सै के जो माणस उस धार्मिकता पै जो व्यवस्था तै सै, चालै सै, ओ उससे तै जिन्दा रहवैगा। 6 पर जो धार्मिकता बिश्वास तै सै, वा न्यू कहवै सै, "तू आपणे मन म्ह न्यू ना कहणा के सुर्ग पै कौण चढैगा?" (यानिके मसीह ताहीं उतार लाण के खातर!) 7 या "पाताळ म्ह कौण उतरैगा?" (यानिके मसीह ताहीं मरे होया म्ह तै जिन्दा ऊपर लाण के खातर!) 8 पर वा के कहवै सै? न्यू के "बचन तेरै लोवै सै, तेरै मुँह म्ह अर तेरै मन म्ह सै," यो ओए बिश्वास का बचन सै, जो हम प्रचार करां सां, 9 के जै तू



आपणे मुँह तै यीशु नै प्रभु जाणकै अंगीकार करै, अर आपणे मन तै बिश्वास करै के पणमेशर नै उस ताहीं मरे होया म्ह तै जिन्दा करया, तो तू पक्का उद्धार पावैगा।<sup>10</sup> क्यूँके धार्मिकता के खातर मन तै बिश्वास करया जावै सै, अर उद्धार के खातर मुँह तै अंगीकार करया जावै सै।<sup>11</sup> क्यूँके पवित्रग्रन्थ न्यू कहवै सै, “जो कोए उस पै बिश्वास करैगा ओ शर्मिन्दा कोनी होवैगा।”

<sup>12</sup> यहुदियाँ अर युनानियाँ म्ह कीमे फर्क कोनी, ज्यातै के ओ सारया का प्रभु सै अर आपणे सारे नाम लेण आळयाँ के खातर उदार सै।<sup>13</sup> क्यूँके, “जो कोए प्रभु का नाम लेवैगा, ओ उद्धार पावैगा।”

<sup>14</sup> फेर जिस पै उन्नै बिश्वास कोनी करया, वे उसका नाम किस तरियाँ लेवें? अर जिसकै बाबत सुणया नीं उस किस तरियाँ बिश्वास करै? अर प्रचारक बिना किस तरियाँ सुणें? <sup>15</sup> अर जै खन्दाए ना जावें, तो किस तरियाँ प्रचार करै? जिसा लिख्या सै, “उनके पाँव कितने सुहाने सैं, जो आच्छी बात्तां का सुसमाचार सुणावें सैं।” <sup>16</sup> पर सारया नै उस सुसमाचार पै कान कोनी लाया : यशायाह कहवै सै, “हे प्रभु, किसनै म्हारै समाचार पै बिश्वास करया सै?”

<sup>17</sup> आखर म्ह बिश्वास सुणण तै अर सुणणा मसीह के बचन तै होवै सैं। <sup>18</sup> पर मै कहूँ सूँ, के उन्नै कोनी सुणया? सुणया तै जरूर सै; क्यूँके लिख्या सै, उनके बोल साबती धरती पै, अर उनके बचन दुनिया के कुणे ताहीं पहोच गे सैं।”

<sup>19</sup> मै फेर कहूँ सूँ, के इस्राएली कोनी जाणें थे? पहल्या तो मुसा कहवै सैं, “मै उनके जरिये जो जान्दी कोनी, थारै मन म्ह जळण पैदा करूँगा; मै एक मूढ़ जात के जरिये रीस दुवाऊँगा।” <sup>20</sup> फेर यशायाह घणी हिम्मत के गेल्या कहवै सैं, “जो मन्नै नीं टोहवै थे, उन्नै मेरै ताहीं पा लिया; अर जो मन्नै बुझइ भी कोनी थे, उन पै मै प्रगत होग्या।” <sup>21</sup> पर इस्राएल के बारै म्ह ओ न्यू कहवै सैं, “मै सारा दिन आपणे हाथ एक हुक्म ना मानण आळी अर रोळा करण आळी प्रजा के कात्री पसारे रहया।”

### इस्राएल पै पणमेशर की दया

**11** ज्यातै मै कहूँ सूँ, के पणमेशर नै आपणी प्रजा ताहीं छोड़ दिया? कद्वे भी नीं! मै भी तो इस्राएली सूँ; मै अब्राहम की पीढी अर बिन्यामीन के गोत्र म्ह तै सूँ। <sup>2</sup> पणमेशर नै आपणी उस प्रजा ताहीं कोनी छोड्या, जिस ताहीं उसनै पहल्या ए तै जाणया। के थमनै नीं बेरा के पवित्रग्रन्थ एलियाह के बारै म्ह के कहवै सैं, के ओ इस्राएल के बिरोध म्ह पणमेशर तै बिनती करै सै? <sup>3</sup> “हे प्रभु, उन्नै तेरे नब्बियाँ ताहीं मार दिया, अर तेरी वेदियाँ ताहीं गेर दिया सैं; अर मै ए एक्का बच्यो सूँ, अर वे मेरी ज्यान के भी खोजी सैं।” <sup>4</sup> पर पणमेशर तै उसनै के जबाब मिल्या? “मन्नै आपणे खातर सात हजार माणसां ताहीं राख राख्या सैं, जिन्नै बाअल देवता के आगै गोड्डे कोनी टेक्के सैं।” <sup>5</sup> ठीक इस्से तरियाँ तै इस टेम भी, अनुग्रह तै छोट्टे होये कीमे माणस बचरे सैं। <sup>6</sup> जै यो अनुग्रह तै होया सै, तो फेर कर्मा तै नीं; नीं तो अनुग्रह फेर अनुग्रह कोनी रहया।

<sup>7</sup> ज्यातै निचोड़ के लिकडुया? न्यू के इस्राएली जिसकी टोह म्ह थे, ओ उन ताहीं नीं मिल्या; पर छोट्टे होया नै मिल्या, अर बचे होड़ माणस करडे करे गये। <sup>8</sup> जिसा लिख्या सै, “पणमेशर नै उन ताहीं आज के दिन ताहीं भारया नींद म्ह गेर राख्या सैं, अर इसी आँख दिन जो नीं देखै अर इसे कान जो ना सुणै।” <sup>9</sup> अर दाऊद कहवै सैं, “उनका खाणा उनकै खातर जाळ अर फन्दा, अर ठोकर अर सजा का कारण हो जावै।” <sup>10</sup> उनकी आँखाँ पै अन्धेरा छा जावै ताके ना देखै, अर तू सारी हाण उनकी पीठ ताहीं झुकाए राख।”

<sup>11</sup> आखर म्ह कहूँ सूँ के उन्नै ज्यातै टोकर खाई के पड़ज्या? कद्वे भी नीं! पर उनकै पड़ण के कारण गैर-जात्तां ताहीं उद्धार मिल्या, के उन ताहीं जळण होवै। <sup>12</sup> ज्यातै जै उनका पड़णा दुनिया के खातर धन अर उनकी घटी गैर-जात्तां के खातर सम्पत्ति का कारण होया, तो उनकी भरपूरी तै के कीमे कोनी होवैगा।

### गैर-जात्तां का उद्धार : कलम लाण का उदाहरण

<sup>13</sup> मै थम गैर-जात्तां तै ये बात कहूँ सूँ। जिब्ब के मै गैर-जातां के खातर प्रेरित सूँ, तो मै आपणी सेवा की बड़ाई करूँ सूँ। <sup>14</sup> ताके किसे तरियाँ तै मै आपणे कुन्बे आळयाँ म्ह जळण पैदा करवाके उन म्ह तै एक-आधै का उद्धार

कराऊँ।<sup>15</sup> क्यूँके जिब्ब उनका छोड़ दिया जाणा दुनिया के मिलाप का कारण होया, तो के उनका अपणाया जाणा मरे होया म्ह तै जिन्दा उठण के बराबर कोनी होवैगा? <sup>16</sup> जिब्ब भेंट का पहलड़ा पेड़ा पवित्र ठहरया, तो पूरा गुन्दा होया चून भी पवित्र सै; अर जिब्ब जड़ पवित्र ठहरी, तो डाली भी इसी ए सैं।

<sup>17</sup> पर जै कीमे डाली तोड़ दी गई, अर तू जंगली जैतून होके उनम्ह साटया गया, अर जैतून की जड़ की चिकणाई का हिस्सेदार होया सै, <sup>18</sup> तो डाली पै घमण्ड ना करियो; अर जै तू घमण्ड करै तो जाण राख के तू जड़ नै कोनी पर जड़ तन्नै सम्भाळै सै। <sup>19</sup> फेर तू कहवैगा, “डाली ज्यातै तोड़ी गई के मै साटया जाऊँ।” <sup>20</sup> सई सै वे तो अबिश्वास के कारण तोड़ी गई, पर तू बिश्वास तै बणया रहवै सै ज्यातै घमण्डी ना होवै, पर भय मान, <sup>21</sup> क्यूँके जिब्ब पणमेशर नै सीधे तौर पै डालीयां ताहीं कोनी छोड्या तो तन्नै भी कोनी छोड्डेगा। <sup>22</sup> ज्यातै पणमेशर की कृपा अर करडेपण नै देख! जो पड़ लिए उन पै करडेपण, पर तेरे पै कृपा, जै तू उसम्ह बणया रहवै, नीं तो तू भी काट दिया जावैगा। <sup>23</sup> वे भी जै अबिश्वास म्ह नीं रहें, तो साट्टे जावेंगे; क्यूँके पणमेशर उन ताहीं फेर साट सके सैं। <sup>24</sup> क्यूँके जै तू उस जैतून तै, जो सुभाह तै जंगली सै, काट्या गया अर सुभाह के खिलाफ आच्छे जैतून म्ह साट्या गया, तो ये जो सीधे तौर की डालीयां सैं, आपणे ए जैतून म्ह क्यातै नीं साट्टे जावेंगे।

### साबते इस्राएल का उद्धार

<sup>25</sup> हे भाईयो, कद्वे इसा ना हो के थम आपणे आप ताहीं श्याणे समझ ल्यो; ज्यातै मै नीं चाहन्दा के थम इस फर्क तै अनजाण रहे के जिब्ब ताहीं गैर-जात्तां पूरी तरियाँ तै बड़ नीं कर लेवें, जिद ताहीं इस्राएल इस एक हिस्सा इसा ए करड़ा रहवैगा। <sup>26</sup> अर इस तरियाँ तै सारा इस्राएल उद्धार पावैगा। जिसा लिख्या सै, “छुटाण आळा सिप्योन तै आवैगा, अर अभगती नै याकूब तै दूर करैगा; <sup>27</sup> अर उनके गेल्या मेरी याए वाचा होगी, जिब्ब के मै उनके पापा ताहीं दूर कर दूँगा।” <sup>28</sup> सुसमाचार के मतलब तै तो थारै खातर वे पणमेशर के बेरी सैं, पर छोट्टे लिये पाच्छे के मतलब तै वे बाप-दाद्या के कारण प्यारे सैं। <sup>29</sup> क्यूँके पणमेशर अपणे वरदानां तै, अर बुलाहट तै कद्वे भी पाच्छे कोनी हटदा। <sup>30</sup> क्यूँके जिसा थम नै पहल्या पणमेशर का हुक्म कोनी माणया, पर इब भी उनके हुक्म न मानण तै थारै पै दया होई; <sup>31</sup> उस्से तरियाँ ए उन्नै भी इब हुक्म कोनी माणया, के थारै पै दया होवै सै इस्तै उन पै भी दया होवै। <sup>32</sup> क्यूँके पणमेशर नै सारया के हुक्म ना मानण का कैदी बणा के राख्या, ताके ओ सारया पै दया करै।

### पणमेशर की स्तुति

<sup>33</sup> आहा! पणमेशर का धन अर समझ अर ज्ञान के गम्भीर सै! उसके बिचार किस ढाळ के अथाह, अर उसकी राह किस ढाळ की अगम सै! <sup>34</sup> “प्रभु की बुद्धि ताहीं किसनै जाणया? या उसका मंत्री कौण होया? <sup>35</sup> या किसनै पहल्या उस ताहीं कीमे दिया सै जिसका बदला उस ताहीं दिया जावै?” <sup>36</sup> क्यूँके उस्से के कात्री तै, अर उस्से के जरिये, अर उस्से के खातर सारा कीमे सै। उसकी महिमा युगानुगु होन्दी रहवै : आमीन।

### पणमेशर की सेवा का जीवन

**12** ज्यातै हे भाईयो, मै थारै तै पणमेशर की दया याद दुवाके बिनती करूँ सूँ के आपणे देहियाँ ताहीं जिन्दा, अर पवित्र, अर पणमेशर ताहीं भान्दा होया बलिदान करके चढ़ाओ। याए थारी आत्मिक सेवा सै। <sup>2</sup> इस दुनिया के बरगे ना बणो; पर थारे दीमाग के नये हो जाण तै थारा चाल-चलण भी बदलदा जावै, जिसतै थम पणमेशर की भली, अर भान्दी, अर सिद्ध मर्जी अनुभव तै बेरा पाड़ सको।

<sup>3</sup> क्यूँके मै उस अनुग्रह के कारण जो मेरै ताहीं मिल्या सै, थारै म्ह तै हरेक तै कहूँ सूँ के जिसा समझणा चाहिये उसतै बढ़के कोए भी आपणे आप नै ना समझै; पर जिसा पणमेशर नै हरेक नै बिश्वास परिमाण के मुताबिक बांड दिया सै, उस्से तरियाँ ए आच्छी बुद्धि के गेल्या आपणे ताहीं समझै। <sup>4</sup> क्यूँके

जिसा म्हारी एक देही म्ह घण-ए अंग सै, अर सारे अंगां का एके सा काम कोनी; 5 उस्से तरियां ए हम जो घणे सां, मसीह म्ह एक देही होके आपस म्ह एक दुसरे के अंग सां। 6 जिब्ब के उस अनुग्रह के मुताबिक जो म्हारै ताहीं दिया गया सै, हमनै न्यारे-न्यारे वरदान मिले सै, तो जिस ताहीं भविष्यवाणी का दान मिल्या हो, ओ बिश्वास के परिमाण के मुताबिक भविष्यवाणी करै; 7 जै सेवा करण का दान मिल्या हो, तो सेवा म्ह लाग्या रहवै; जै कोए सिखाणआळा हो, तो सिखाण म्ह लाग्या रहवै; 8 जो उपदेशक हो, ओ उपदेश देण म्ह लाग्या रहवै; दान देणआळा उदारता तै देवै; जो अगुवाई करै, ओ जोश तै करै; जो दया करै, ओ खुशी तै करै।

9 प्रेम म्ह कपट नीं होणा चाहिये; बुराई तै नफरत करो; भलाई म्ह लागे रहो। 10 भाईचारे के प्रेम तै एक दुसरे तै प्यार राक्खो; आपस म्ह आदर करण म्ह एक दुसरे तै आगै चालो। 11 कोशिश करण म्ह आळसी ना होवो; आत्मिक खुशी तै भरे रहो; प्रभु की सेवा करदे रहो। 12 आशा म्ह खुश रहो; क्लेश म्ह डटे रहो; प्रार्थना म्ह सारी हाण लागे रहो। 13 पवित्र माणसां ताहीं जो कीमे जरूरी हो, उसम्ह उनकी मदद करो; सेवा-बाड़ी करण म्ह लागे रहो।

14 आपणे सताण आळ्यां ताहीं आशीष द्यो; आशीष दो श्राप ना द्यो। 15 आनन्द करण आळ्यां के गेल्या आनन्द करो, अर रोगआळ्यां के गेल्या रोओ। 16 आपस म्ह एक सा मन राक्खो; घमण्डी ना होवो, पर कमजोरां के गेल्या संगति राक्खो; आपणी नजर म्ह अकलमंद ना होवो। 17 बुराई के बदलै किसे तै बुराई ना करो; जो बात सारे माणसां के लोवै आच्छी सै, उनकी फिक्र करया करो। 18 जित ताहीं हो सकै, थम लगन तै सारे माणसां के गेल्या मेल-मिलाप राक्खो। 19 हे प्रियो, बदला ना लेणा, पर पणमेशर के छोह नै मौक्का द्यो, क्यूँके लिख्या सै, “बदला लेणा मेरा काम सै, प्रभु कहवै सै मै ए बदला द्युँगा।” 20 पर “जै तेरा बैरी भूख्खा हो तो उस ताहीं खाणा खुवा, जै तिसाया हो तो उस ताहीं पाणी पिला; क्यूँके इसा करण तै तू उसकै सिर पै आग के अंगांरयां का ढेर लगावैगा।” 21 बुराई तै ना हारो, पर भलाई तै बुराई नै जीत ल्यो।

### राज्य के प्रति कर्तव्य

13 हरेक माणस शासन करण आळे अधिकारियां के अधीन रहवै, क्यूँके कोए अधिकार इसा नीं जो पणमेशर को ओड तै ना हो; अर जो अधिकार सै, वे पणमेशर के ठहराए होए सै। 2 ज्यांतै जो कोए अधिकार का बिरोध करै सै, ओ पणमेशर की विधि का सामणा करै सै, अर सामणा करण आळे सजा पावैंगे। 3 क्यूँके हाकिम आच्छे काम के नीं, पर भुन्डे काम के खातर डर का कारण सै; आखर जै तू हाकिम तै बिना डरे रहणा चाहवै सै, आच्छा काम कर, अर उसकी ओड तै तेरी बड़ाई होगी; 4 क्यूँके ओ तेरी भलाई के खातर पणमेशर का सेवक सै। परन्तु जै तू बुराई करै, तो डर, क्यूँके ओ तलवार खाम-खां कोनी लेरया; अर पणमेशर का सेवक सै के उसकै छोह के मुताबिक भुन्डे काम करण आळे ताहीं सजा देवै। 5 ज्यांतै अधीन रहणा ना सिर्फ उस छोह के डर तै जरूरी सै, बल्के विवेक भी गवाही देवै सै। 6 ज्यांतै टैक्स भी द्यो क्यूँके शासन करण आळे पणमेशर के सेवक सै अर सारी हाण इस्से काम म्ह लागे रहवै सै। 7 ज्यांतै हरेक का हक्क चुकाया करो; जिस ताहीं टैक्स चाहिये, उस ताहीं टैक्स देओ; जिस ताहीं महसूल चाहिये, उस ताहीं महसूल देओ; जिस तै डरणा चाहिये, उस तै डरो; जिसका आदर-मान करणा चाहिये, उसका आदर-मान करो।

### एक-दुसरे के प्रति कर्तव्य

8 आपस म्ह प्रेम नै छोड़ और किसे बात म्ह किसे के कर्जवान ना होओ; क्यूँके जो दुसरे तै प्रेम राखै सै, उस्से नै व्यवस्था पूरा करया सै। 9 क्यूँके यो के, “जारी नीं करणा, खून नीं करणा, चोरी नीं करणा, लालच नीं करणा,” अर इन्नै छोड़ और कोए भी हुकम हो तो सारया का निचोड़ इस बात म्ह पाया जावै सै, “अपणे पड़ोसी तै अपणे जिसा प्रेम राख।” 10 प्रेम पड़ोसी की कीमे बुराई कोनी करदा, ज्यांतै प्रेम राखणा व्यवस्था ताहीं पूरा करणा सै।

11 बख्त नै पिच्छाण के इसा ए करो, ज्यांतै के इब थारै खातर नींद तै जाग उठण की घड़ी आण पहीची सै; क्यूँके जिस बख्त हम नै बिश्वास करया था, उस बख्त के बिचार तै इब म्हारा उद्धार लोवै सै। 12 रात घणी बीतग्यी सै, अर दिन लिकड़ण आळा सै; ज्यांतै हम अन्धकार के काम्मां नै त्याग के चाँदण के हथियार बाँध लेवां। 13 जिसा दिन नै शोभा देवै सै, उस ए हम सीधी चाल चाला, ना के भूँडा चाल-चलण, अर दारुबाजी म्ह, ना जारी अर लुचपण म्ह, अर ना रोळे अर डाह म्ह। 14 बल्के प्रभु यीशु मसीह ताहीं पहर ल्यो, अर देही की अभिलाषायां नै पूरा करण का उपाय ना करो।

### अपणे भाई पै दोष मतना लाओ

14 जो बिश्वास म्ह कमजोर सै, उस ताहीं आपणी संगति म्ह ले ल्यो, पर उसकी शंकायां पै बहस करण के खातर नीं। 2 एक नै बिश्वास सै के सारा कीमे खाणा सई सै, पर जो बिश्वास म्ह कमजोर सै ओ साग पात ए खावै सै। 3 खाणआळा ना खाणआळे ताहीं तुच्छ ना जाणै, अर ना खाणआळा खाणआळे पै दोष लावै; क्यूँके पणमेशर नै उस ताहीं अपणयाया सै। 4 तू कौण सै जो दुसरे के सेवक पै दोष लावै सै? उसका स्थिर रहणा या पड़ जाणा उसकै मालिक ए तै सम्बन्ध राखै सै; बल्के ओ स्थिर ए कर दिया जावैगा, क्यूँके प्रभु उस ताहीं स्थिर राख सकै सै।

5 कोए तो एक दिन नै दुसरे तै बाध मात्रै सै, अर कोए सारे दिनां नै एक जिसा जाणै सै; हरेक अपणे ए मन म्ह पक्का कर लेवै। 6 जो किसे दिन नै मात्रै सै, ओ प्रभु के खातर मात्रै सै। जो खावै सै, ओ प्रभु के खातर खावै सै, क्यूँके ओ पणमेशर का धन्यवाद करै सै, अर जो नीं खान्दा, ओ प्रभु के खातर नीं खान्दा अर पणमेशर का धन्यवाद करै सै। 7 क्यूँके म्हारै म्ह तै ना तो कोए अपणे खातर जिन्दा सै अर ना कोए अपणे खातर मरै सै। 8 जै हम जिवां सां, तो प्रभु के खातर जिवां सां; अर जै मरां सां, तो प्रभु के खातर ए मरां सां; आखर म्ह जिवां या मरां, हम प्रभु ए के सां। 9 क्यूँके मसीह इसे खातर मरया अर जिन्दा भी उठ्या के ओ मरे होया अर जिन्दया का, दोनुआं का प्रभु होवै।

10 तू अपणे भाई पै क्यांतै दोष लावै सै? या फेर क्यांतै अपणे भाई नै तुच्छ जाणै सै? हम सारे के सारे पणमेशर के न्याय सिंहासन के श्यामी खड़े होवांगे। 11 क्यूँके लिख्या सै, “प्रभु कहवै सै, मेरे जीवन की सोह के हरेक गोडडा मेरे श्यामी टिकैगा, अर हरेक जीभ पणमेशर का अंगीकार करेगी।” 12 ज्यांतै म्हारै म्ह तै हरेक पणमेशर नै आपणा-आपणा लेक्खा देवैंगे।

### अपणे भाई के पतन का कारण मतना बणो

13 आखर म्ह आगै तै हम एक-दुसरे पै दोष नीं लावांगे, पर थम या ठाण ल्यो के कोए अपणे भाई के श्यामी ठेस या ठोकर का कारण ना राक्खै। 14 मन्त्रै बेरा सै अर प्रभु यीशु म्ह मन्त्रै पक्का यकीन होया सै के कोए चीज अपणे आप तै अशुद्ध कोनी, पर जो उस ताहीं अशुद्ध समझै सै उसकै खातर अशुद्ध सै। 15 जै तेरा भाई तेरे खाणै के कारण उदास होवै सै, तो फेर तू प्रेम की रीत तै नीं चाल्दा; जिसके खातर मसीह मरया, उस ताहीं तू अपणे खाणै के जरिये नास ना करै। 16 आखर म्ह थारै खातर जो भला सै उसकी बुराई ना होण पावै। 17 क्यूँके पणमेशर का राज्य खाणा-पिणा कोनी, पर धर्म अर मेळ-मिलाप अर ओ आनन्द सै जो पवित्र आत्मा तै होवै सै। 18 जो कोए इस तरियां तै मसीह की सेवा करै सै, ओ पणमेशर नै भावै सै अर माणसां म्ह अपनाण जोगा ठहरै सै। 19 ज्यांतै हम उन बात्तां म्ह लागे रह्यां जिन तै मेळ-मिलाप अर एक-दुसरे का सुधार होवै। 20 खाणै के खातर पणमेशर का काम ना बिगाड़ै। सारा कीमे शुद्ध तो सै, पर उस माणस के खातर भूँडा सै जिस ताहीं उसकै खाणै तै ठेस लागै सै। 21 भला तो यो सै के तू ना मांस खावै अर ना दारु पिवै, ना और कीमे इसा करै जिस तै तेरा भाई नै ठेस लागै। 22 तेरा जो विश्वास हो, उस ताहीं पणमेशर के श्यामी अपणे ए मन म्ह राख। धन्य सै ओ जो उस बात म्ह, जिस ताहीं ओ सई समझै सै, अपणे आप नै कसूरवार कोनी ठहरान्दा। 23 पर जो शक करके खावै सै ओ सजा के जोगा ठहर चुक्या, क्यूँके ओ बिश्वास तै नीं खान्दा; अर जो कीमे बिश्वास तै नीं, ओ पाप सै।

### दुसरयां की बढ़ोत्तरी करो

**15** आखर म्ह हम ठाड्यां नै चाहिये के कमजोरां की कमजोरी नै सहावां, ना के अपने आप नै राज्जी करां। 2 म्हारै म्ह हरेक अपने पड़ोसी ताहीं उसकी भलाई के खातर राज्जी करै ताके उसकी बढ़ोत्तरी होवै। 3 क्यूँके मसीह नै अपने आप ताहीं राज्जी कोनी करया, पर जिसा लिख्या सै : “तेरे बुराई करण आळ्यां की बुराई मेरै पै आण पड़ी।” 4 जितनी बात पहल्या तै लिक्खी गई, वे म्हारी ए शिक्षा के खातर लिक्खी गई सैं के हम धीरज अर पवित्रग्रन्थ के हौसले के जरिये आस राक्खां। 5 धीरज अर शान्ति का दात्ता पणमेशर थमनै यो वरदान देवै के मसीह यीशु के मुताबिक आपस म्ह एक मन रहो। 6 ताके थम एक मन अर एक सुर म्ह म्हारै प्रभु यीशु मसीह के बाप पणमेशर की स्तुति करो।

### सारया के खातर सुसमाचार

7 इसकरके, जिसा मसीह नै पणमेशर की महिमा के खातर थारै ताहीं अपनाया सै, उस्से तरियां ए थम भी एक-दुसरे नै अपनाओ। 8 ज्यांतै मै कहुँ सूँ के जो प्रतिज्ञाएँ बाप-दादां तै दिए गये थे उन्नै पक्का करण के खातर मसीह, पणमेशर की सच्चाई का सबूत देण के खातर, खतना करे होड माणसां का सेवक बणया; 9 अर गैर-जात्तां आळे भी दया के कारण पणमेशर की स्तुति करै; जिसा लिख्या सै, “ज्यांतै मै जात-जात म्ह तेरा धन्यवाद करूँगा, अर तेरै नाम के भजन गाऊँगा।” 10 फेर कहया सै, “हे जात-जात के सारे माणसो, उसकी प्रजा के गेल आनन्द करो।” 11 अर फेर, “हे जात-जात के सारे माणसो, प्रभु की जय-जयकार करो; अर हे राज्य-राज्य के सारे माणसो; उसकी बड़ाई करो।” 12 अर यशायाह कहवै सै, “यिशै की एक जड़ दिखैगी, अर गैर-जात्तां का हाकिम होण के खातर एक उठैगा, उस पै गैर-जात आस राखैगी।” 13 पणमेशर जो आस का दात्ता सै थारै ताहीं बिश्वास करण म्ह सारी तरियां के आनन्द अर शान्ति तै भरपूर करै, के पवित्र आत्मा की सामर्थ तै थारी आस बधदी जावै।

### साहस तै लिखण का कारण

14 हे मेरे भाईयो, मै अपने-आप थारै बारै म्ह पक्का जाणु सूँ के थम भी आप ए भलाई तै भरे अर ईश्वरीय ज्ञान तै भरपूर सो, अर एक दुसरे नै सोझी दे सको सो। 15 तौभी मन्त्रै किते-किते याद दुवाण के खातर थारै ताहीं जो हिम्मत करके लिख्या। यो उस अनुग्रह के कारण होया जो पणमेशर नै मेरै ताहीं दिया सै, 16 के मै गैर-जात्तां के खातर मसीह यीशु का सेवक होके पणमेशर के सुसमाचार की सेवा याजक के ढाळ करूँ, जिसतै गैर-जात्तां का मानो चढ़ाया जाणा, पवित्र आत्मा तै पवित्र बणके अपनाया जावै। 17 ज्यांतै उन बात्तां के बारै म्ह जो पणमेशर तै सम्बन्ध राखें सैं, मै मसीह यीशु म्ह बड़ाई कर सकूँ सूँ। 18 क्यूँके उन बात्तां नै छोड मन्त्रै और किसे बात के बारै म्ह कहण की हिम्मत कोनी, जो मसीह नै गैर-जात्तां की अधीनता के खातर बचन, अर कर्म, 19 निशानां, अर अनोक्खे काम्मां की सामर्थ तै, अर पवित्र आत्मा की सामर्थ तै मेरै ए जरिये करे; उरै ताहीं के मन्त्रै यरुशलेम तै लेके चौगरदेके इल्लुरिकुम ताहीं मसीह के सुसमाचार का पूरा-पूरा प्रचार करया। 20 पर मेरै मन की उमंग या सै के जित-जित मसीह का नाम नीं लिया गया, ओड़ ए सुसमाचार सुणाऊँ इसा ना हो के दुसरे की नींव पै घर बणाऊँ। 21 पर जिसा लिख्या सै उस्से तरियां ए होवै, “जिन के धोरै उसका सुसमाचार नीं पहाच्या, वैए देखेंगे, अर जिन्ने नीं सुणा वैए समझेंगे।”

### रोम यात्रा की पौलुस की योजना

22 ज्यांतै मै थारै धोरै आण तै बार-बार रुक्या रहया। 23 पर इब इन देशां म्ह मेरै काम के खातर और जंगहा कोनी रही, अर घणे साल्लां तै मन्त्रै थारै धोरै आण की लालसा सै। 24 ज्यांतै जिब्व मै स्पेन नै जाऊँगा तो थारै धोरै होंदा होया जाऊँगा, क्यूँके मन्त्रै उम्मीद सै के उस सफर म्ह थारै तै भेंट होवैगी, अर जिब्व थारी संगति तै मेरा जी कीमे भर जावै तो थम मन्त्रै कीमे दूर आगे पहाचा दीओ। 25 पर इब्वे तो मै पवित्र माणसां की सेवा करण के खातर

यरुशलेम नै जाऊँ सूँ। 26 क्यूँके मकिदुनिया अर अखया के माणसां नै यो आच्छा लाग्या के यरुशलेम के पवित्र माणसां म्ह गरीबां के खातर कीमे चन्दा करुं। 27 उन्नै आच्छा तो लाग्या, पर वे उनके कर्जवान भी सैं, क्यूँके जै गैर-जात आळे उनकी आत्मिक बात्तां म्ह हिस्सेदार होए, तो उन्नै भी सई सै के देही तौर की बात्तां म्ह उनकी सेवा करुं। 28 ज्यांतै मै यो काम पूरा करके अर उन ताहीं यो चन्दा थमाके थारै धोरै होंदा होया स्पेन नै जाऊँगा। 29 अर मन्त्रै बेरा सै के जिब्व मै थारै धोरै आऊँगा, तो मसीह की पूरी आशीष के गेल आऊँगा।

30 हे भाईयो, म्हारै प्रभु यीशु मसीह के अर पवित्र आत्मा के प्रेम नै याद दुवाके मै थारै तै बिनती करूँ सूँ, के मेरै खातर पणमेशर तै प्रार्थना करण म्ह मेरै गेल मिलके मन्डे रहो 31 के मै यहुदियाँ के अबिश्वासीयां तै बच्या रहूँ, अर मेरी वा सेवा जो यरुशलेम के खातर सै, पवित्र माणसां नै भावै; 32 अर मै पणमेशर की मर्जी तै थारै धोरै आनन्द के गेल आके थारै गेल्या आराम पाऊँ। 33 शान्ति का पणमेशर थारै सारया के गेल्या रहवै। आमीन।

### व्यक्तिगत अभिवादन

**16** मै थारै तै फिबे के खातर जो म्हारी बेब्बे अर किन्त्रिखिया की कलीसिया की सेविका सै, बिनती करूँ सूँ 2 के थम, जिसा के पवित्र माणसां नै चाहिये, उस ताहीं प्रभु म्ह अपनाओ; अर जिस किसे बात म्ह उस ताहीं थारी जरूत होवै, उसकी मदद करो, क्यूँके वा भी घण-खरया की बल्के मेरी भी उपकार करण आळी रही सै।

3 प्रीस्का अर अक्विला नै जो मसीह यीशु म्ह मेरै गेल-काम करणीयें सैं, नमस्कार। 4 उन्नै मेरै प्राण के खातर आपणा ए जीवन जोखम म्ह गेर दिया था; अर सिर्फ मै ए नीं, बल्के गैर-जात्तां की सारी कलीसिया भी उनका धन्यवाद करै सैं। 5 अर उस कलीसिया नै भी नमस्कार जो उनके घरा सैं। मेरे प्यारे इपैनिटुस नै, जो मसीह के खातर आसिया का पहला फळ सै, नमस्कार। 6 मरियम ताहीं, जिसनै थारै खातर घणी मेहनत करी, नमस्कार। 7 अन्डुनीकुस अर यूनियास नै जो मेरा कुन्बे का सै, अर जो मेरै गेल्या कैद होए थे अर प्रेरितां म्ह नाम्मी सैं, अर मेरै तै पहल्या मसीह होए थे, नमस्कार। 8 अम्पलियातुस नै, जो प्रभु मसीह मेरा प्यारा सै, नमस्कार। 9 उरबानुस नै, जो मसीह मै म्हारा गेल काम करणीया सै, अर मेरे प्यारे इस्तखुस नै नमस्कार। 10 अपिल्लेस नै जो मसीह म्ह खरया लिकडया, नमस्कार। अरिस्तुबुलुस के कुन्बे नै नमस्कार। 11 मेरै कुन्बे के हेरोदियोन नै नमस्कार। नरकीस्सुस का कुन्बे के जो माणस प्रभु म्ह सैं, उन ताहीं नमस्कार। 12 त्रुफेना अर त्रूफोसा नै जो प्रभु म्ह मेहनत करै सैं, नमस्कार। प्यारे पिरसिस नै, जिसनै प्रभु म्ह घणी मेहनत करी, नमस्कार। 13 रूफुस नै जो प्रभु म्ह छांटया होया सै अर उसकी माँ नै, जो मेरी भी माँ सै, दोनुआ नै, नमस्कार। 14 अन्सुक्रीतुस अर फिलगोन अर हिर्मेस अर पनुबास अर हिर्मास अर उनके गेल्या के भाईया नै, नमस्कार। 15 फिलुलुगुस अर यूलिया अर नेर्युस अर उसकी बेब्बे, अर उलुम्पास अर उनके गेल्या के सारे पवित्र माणसां नै नमस्कार। 16 आपस म्ह पवित्र चुम्मे तै नमस्कार करो। थारै ताहीं मसीह की सारी कलीसियाओं की ओड़ तै नमस्कार।

### आखरी निर्देश

17 इब हे भाईयो, मै थारै तै बिनती करूँ सूँ के जो माणस उस शिक्षा के उल्टी ओड़, जो थमनै मिली सै, फूट गेरण अर ठेस खुवाण का कारण होवै सैं, उन्नै ताड लिया करो अर उन तै दूर रहो। 18 क्यूँके इसे माणस म्हारै प्रभु मसीह की नीं, पर अपने पेट की सेवा करै सैं; अर चिकणी चुपड़ी बात्तां तै सीधे-सादे मन के माणसां नै भका देवै सैं। 19 थारै हुक्म मानण का जिक्रा सारे माणसां म्ह फैल गया सै, ज्यांतै म्ह थारै बारै म्ह आनन्द करूँ सूँ, पर मै न्यु चाहूँ सूँ के थम भलाई के खातर श्याणे, पर बुराई के खातर भोळे बणे रहो। 20 शान्ति का पणमेशर शैतान नै थारै पायां तै तावळा कुचलवा देवैगा। म्हारै प्रभु मसीह का अनुग्रह थारै पै होंदा रहवै। 21 मेरे गेल काम करणीया तीमुथियुस का, अर मेरे कुन्बे आळे लूकियुस अर यासोन अर सोसिपत्रुस का थारै ताहीं नमस्कार। 22 मेरी चिडी के लिखण आळे तिरतियुस का, प्रभु म्ह

थारै तार्हीं नमस्कार। <sup>23</sup> गयुस जो मेरी अर कलीसिया की पहुनाई करण आळा सै, उसका थारै तार्हीं नमस्कार। इरास्तुस जो नगर का भण्डारी सै, अर भाई क्वारतुस का थारै तार्हीं नमस्कार। <sup>24</sup> शान्ति का पणमेशर शैतान नै थारै पाँयां तै तावळा कुचलवा देवैगा। म्हारै प्रभु मसीह का अनुग्रह थारै पै होंदा रहवै।

### पणमेशर की स्तुति

<sup>25</sup> इब जो थारै तार्हीं मेरै सुसमाचार यानिके यीशु मसीह कै संदेश कै प्रचार कै मुताबिक स्थिर कर सकै सै, उस भेद कै चाँदणै कै मुताबिक जो पुराणे बख्त तै लुहकया रहया, <sup>26</sup> पर इब प्रगट होकै सनातन पणमेशर कै हुक्म तै नब्बियों की किताबों कै जरिये सारी जात्तां नै बताया गया सै के वे बिश्वास तै हुक्म मानणआळे हो जावें, <sup>27</sup> उस्से ऐकले श्याणे पणमेशर की यीशु मसीह कै जरिये युगानुयुग महिमा होन्दी रहवै। आमीन।

# 1 कुरिन्थियों

## अभिवादन

1 पौलुस के कात्री तै जो पणमेशर की मर्जी तै प्रभु यीशु मसीह का प्रेरित होण के खातर बुलाया गया अर भाई सोस्थिनेस की ओड़ तै | 2 पणमेशर की उस कलीसिया के नाम जो कुरिन्थिस म्ह सै यानिके उनके नाम जो मसीह यीशु म्ह पवित्र करे गये अर पवित्र होण के खातर बुलाये गये सैं अर उन सारया के नाम भी जो हरेक जंगहा म्हारे अर अपने प्रभु यीशु मसीह के नाम की प्रार्थना करैं सैं | 3 म्हारै पिता पणमेशर अर प्रभु यीशु मसीह की ओड़ तै थमनै अनुग्रह अर शान्ति मिल्दी रहवै |

## मसीह की आशीषें

4 मै थारै बारै म्ह आपणे पणमेशर का सारी हाण धन्यवाद करूं सूं, ज्यांतै के पणमेशर का यो अनुग्रह थारै पै मसीह यीशु म्ह होया सैं | 5 के उसम्ह होकै थम हरेक बात म्ह यानिके सारे बचन अर सारै ज्ञान म्ह साहूकार करे गये | 6 के मसीह की गवाही थारै पै पक्की लिंकड़ै | 7 उरै ताहीं के किसे बरदान म्ह थमनै कमी ना होवै, अर थम म्हारै प्रभु यीशु मसीह के प्रगट होण की बाट देख्दे रहो सो | 8 ओ थमनै आखिर ताहीं मजबूत करैगा, के थम म्हारै प्रभु यीशु मसीह के दिन बेकसूर ठहरो | 9 पणमेशर साच्चा सैं जिसनै थारै ताहीं अपने बेट्टे म्हारै प्रभु यीशु मसीह की संगति म्ह बुलाया सैं |

## कलीसिया म्ह फूट

10 हे भाईयो, मै थारै तै यीशु मसीह जो म्हारा प्रभु सैं उसकै नाम के जरिये बिनती करूं सूं, के थम सारे एक ए बात कहो, अर थारै म्ह पाटम ना होवै, पर एक ए मन अर एक ए रै म्ह होकै मिले रहो | 11 क्यूँके मेरे भाईयो, खलोए के कुन्बे के माणसां नै मेरै ताहीं थारै बारै म्ह बताया सैं, के थारै म्ह रोळे होवैं सैं | 12 मेरा कहणा यो सै के, थारै म्ह तै कोए अपने आप नै पौलुस का, कोए अपुल्लोस का, कोए कैफा का, कोए मसीह का कहवैं सैं | 13 के मसीह बंडग्या? के पौलुस थारै खातर क्रूस पै चढ़ाया गया? के थमनै पौलुस के नाम तै बपतिस्मा मिल्या? 14 मै पणमेशर का धन्यवाद करूं सूं, क्रिस्पुस अर ग्युस नै छोड़, मन्त्रै थारै तै किस्से ताहीं भी बपतिस्मा कोनी दिया | 15 कदे इसा ना हो के कोए कहवैं थमनै मेरै नाम पै बपतिस्मा मिल्या सैं | 16 अर हम्बै, मन्त्रै स्तिफनास के कुन्बे ताहीं भी बपतिस्मा दिया; इन्त्रै छोड़ मै नीं जाणदा के मन्त्रै और किसे ताहीं भी बपतिस्मा दिया | 17 क्यूँके मसीह नै मेरै ताहीं बपतिस्मा देण ताहीं नीं, बल्के सुसमाचार सुनाण ताहीं खन्दाया सैं, अर न्यू भी शब्दां के ज्ञान के मुताबिक कोनी, इसा ना हो के मसीह का क्रूस बेकार ठहरै |

## मसीह पणमेशर का ज्ञान अर सामर्थ सैं

18 क्यूँके क्रूस की कहानी नास होण आळ्यां के खातर बेअक्की सैं, पर हम उद्धार पाण आळ्यां के खातर पणमेशर का सामर्थ सैं | 19 क्यूँके लिख्या सैं, "मै ज्ञानियाँ के ज्ञान ताहीं नास करूंगा, अर समझदारां की समझ नै तुच्छ कर दूंगा |" 20 कित रहया ज्ञानी? कित रहया शास्त्री? कित रहया इस दुनिया का बकवाद करण आळा? के पणमेशर नै दुनिया के ज्ञान ताहीं बावळापण नीं ठहराया? 21 क्यूँके जिब्व पणमेशर के ज्ञान के मुताबिक दुनिया नै ज्ञान तै पणमेशर ताहीं कोन्या जाणया, तो पणमेशर नै यो आच्छा लाग्या के इस प्रचार के बावळापण के जरिये बिश्वास करण आळ्यां नै उद्धार देवै | 22 यहूदी तो निशान चाहवैं सैं, अर यूनानी ज्ञान की टोह म्ह रहवैं सैं, 23 पर हम तो उस

क्रूस पै चढ़ाए होड़ मसीह का प्रचार करां सां, जो यहूदियाँ के खातर ठोकर का कारण अर गैर-जात्तां के खातर बेअक्की सैं; 24 पर जो बुलाए गये सैं, के यहूदी के यूनानी, उनके लोवै मसीह पणमेशर की सामर्थ अर पणमेशर का ज्ञान सैं | 25 क्यूँके पणमेशर का बेअक्की माणसां के ज्ञान तै ज्ञानवान सैं, अर पणमेशर की कमजोरी माणसां के हान्ने तै घणी ठाड्डी सैं |

26 हे भाईयो, अपने बुलाए जाण नै तो सोचो के ना देही के मुताबिक घणे ज्ञानवान, अर ना घणे सामर्थी, अर ना घणे आच्छे खानदान आळे बुलाए गये | 27 पर पणमेशर नै दुनिया के बेअक्कां ताहीं छोट लिया सैं के ज्ञानवानां ताहीं सर्भिन्दा करै, अर पणमेशर नै दुनिया के कमजोरां ताहीं छोट लिया सैं के ठाड्यां नै सर्भिन्दा करै; 28 अर पणमेशर नै दुनिया के नीचां अर तुच्छां ताहीं, बल्के जो सैं भी कोनी उन ताहीं भी छोट लिया के उन ताहीं भी जो सैं, बेकार ठहरावै | 29 ताके के कोई जीव पणमेशर के श्यामी घमण्ड नीं करण पावै | 30 पर उस्से के कात्री तै थम मसीह यीशु म्ह सो, जो पणमेशर की ओड़ तै म्हारै खातर ज्ञान ठहरया, यानिके धर्म, अर पवित्रता, अर छुटकारा | 31 ताके जिसा लिख्या सैं, उस्से तरियां ए होवै, "जो घमण्ड करै ओ प्रभु म्ह घमण्ड करै |"

## कूसित मसीह के बारै म्ह संदेश

2 हे भाईयो, जिब्व मै पणमेशर का भेद सुणान्दा होया थारै धोरै आया, तो शब्दां या ज्ञान की उत्तमता के गेल्या कोनी आया | 2 क्यूँके मन्त्रै यो ठाण लिया था के थारै बिचाळै यीशु मसीह बल्के क्रूस पै चढ़ाए होड़ मसीह नै छोड़ और किसे बात ताहीं कोनी जाणूं | 3 मै कमजोरी अर भय के गेल्या, अर घणा काम्बन्दा होया थारै गेल्या रहया; 4 अर मेरै बचन, अर प्रचार म्ह ज्ञान की लुभाणआळी बात कोनी, पर आत्मा अर समर्थ का सबूत था, 5 ज्यांतै के थारा बिश्वास माणसां के ज्ञान पै नीं, पर पणमेशर की सामर्थ के आसरे पै हो |

## पणमेशर का ज्ञान

6 फेर भी सिद्ध माणसां म्ह हम ज्ञान सुणावां सां, पर इस दुनिया का अर इस दुनिया के नास होण आळे हाकिमां का ज्ञान कोनी; 7 पर हम पणमेशर का ओ लुहक्या होड़ ज्ञान, भेद की तरियां तै बतावां सां, जिस ताहीं पणमेशर नै पुराणै बख्त तै म्हारी महिमा के खातर ठहराया | 8 जिस ताहीं इस दुनिया के हाकिमां म्ह तै किसे नै कोनी जाणया, क्यूँके जै वे जाणदे तो तेजोमय प्रभु ताहीं क्रूस पै कोनी चढान्दे | 9 जिसा लिख्या सैं, "जो बात आँख नै नीं देखी अर कान नै कोन्या सुणी, अर जो बात माणसां के चित म्ह कोनी चढ़ी, वै ए सैं जो पणमेशर नै आपणे प्रेम राखण आळ्यां के खातर तयार करी सैं |"

10 पर पणमेशर नै उन ताहीं आपणे आत्मा के जरिये म्हारै पै प्रगट करया, क्यूँके आत्मा सारी बात, बल्के पणमेशर की डून्धी बात्तां नै भी जांचें सैं | 11 माणसां म्ह तै कौण किसे माणस की बात्तां नै जाणें सैं, सिर्फ माणस की आत्मा जो उसम्ह सैं? उस्से तरियां ए पणमेशर की बात्तां नै भी कोए नीं जाणदा, सिर्फ पणमेशर की आत्मा | 12 पर हमनै दुनिया की आत्मा नीं, पर वा आत्मा पायी सैं जो पणमेशर की ओड़ तै सैं के हम उन बात्तां नै जाणां जो पणमेशर नै म्हारै ताहीं दी सैं | 13 जिन ताहीं हम माणसां के ज्ञान की सिखाई होड़ बात्तां म्ह नीं, पर आत्मा की सिखाई होड़ म्ह, आत्मिक बात्तां नै आत्मिक बात्तां तै मिलाकै सुणावां सां | 14 पर देही तौर पै माणस पणमेशर के आत्मा की बात अपणान्दा कोनी, क्यूँके वे उसकी निगाह म्ह बावळापण

की बात सैं, अर ना ओ उन ताहीं जाण सकै सैं क्यूँके उनकी जाँच आत्मिक तरियां तै होवै सैं। 15 आत्मिक माणस सारा कीमे जाँचै सैं, पर ओ आप किसे तै जाँचया कोनी जान्दा। 16 क्यूँके प्रभु का मन किस नै जाणया सैं के उस ताहीं सिखावै?" पर म्हारै म्ह मसीह का मन सैं।

### कलीसिया म्ह गुटबंदी की भर्त्सना

3 हे भाईयो, मै थारै तै इस तरियां तै बात कोनी कर सक्या जिस तरियां तै आत्मिक माणसां तै करणी चाहिये, पर जिस तरियां तै देही तौर के माणसां की तरियां बात करी, अर उन तै जो मसीह म्ह बाळक सैं। 2 मन्त्रै थारै ताहीं दूध पिलाया, रोटी कोनी खुवाई; क्यूँके थम उस ताहीं कोनी खा सको थे; बल्के इब ताहीं भी कोनी खा सको सो, 3 क्यूँके इब ताहीं देही तौर पै सो। ज्यांतै के जिब्व थारै म्ह डाह अर रोळा सैं, तो के थम देही तौर पै कोनी? अर के माणस की रिक्तां पै कोनी चाल्दे? 4 क्यूँके जिब्व एक कहवै सैं, "मै पौलुस का सूँ" अर दुसरा कहवै सैं, "मै अपुल्लोस का सूँ" तो के थम माणस कोनी?

5 अपुल्लोस के सैं? अर पौलुस के सैं? सिर्फ सेवक, जिनके जरिये थमनै बिश्वास करया, जिसा हरेक ताहीं प्रभु नै दिया। 6 मन्त्रै लाया, अपुल्लोस नै सींज्या, पर पणमेशर नै बढ़ाया। 7 ज्यांतै ना तो लाणआळा कीमे सैं अर ना सींजण आळा, पर पणमेशर ए सारा कीमे सैं जो बढ़ाण आळा सैं।

8 लाणआळा अर सींजणआळा दोन्नु एक सैं; पर हरेक माणस आपणी ए मेहनत के मुताबिक आपणी ए मजदूरी पावैगा। 9 क्यूँके हम पणमेशर के गेल-काम करणीए सां; थम पणमेशर की खेत्ती अर रचना सो।

10 पणमेशर के उस अनुग्रह के मुताबिक जो मेरै ताहीं दिया गया, मन्त्रै श्याणै चिनाई आळे मिस्त्री की तरियां नीव बना दी, अर दूसरा उस पै रद्दा धरै सैं। पर हरेक माणस चौकस रहवै के ओ उस पै किसा रद्दा धरै सैं। 11 क्यूँके उस नीव नै छोड़ जो पड़ी सैं, अर वा यीशु मसीह सैं, कोए दूसरी नीव कोनी बना सकदा। 12 जै कोए इस नीव पै सोत्रा या चाँदी या घणा कीमती पत्थर या काट या घास या फूस का रद्दा धरै, 13 तो हरेक माणस का काम दिख जावैगा; क्यूँके ओ दिन उस ताहीं बतावैगा, ज्यांतै के ओ दिन आग के गेल्या प्रगट होवैगा अर वा आग हरेक का काम परखैगी के किसा सैं। 14 जिसका काम उस पै बणया होया उटया रहवैगा, तो मजदूरी पावैगा। 15 किसे का काम जळ जावैगा, तो ओ टोड्डा खावैगा; पर ओ आप बच जावैगा पर जळदे-जळदे। 16 के थमनै नीं बेरा के थम पणमेशर के मन्दर सो, अर पणमेशर की आत्मा थारै म्ह बास करै सैं? 17 जै कोए पणमेशर के मन्दर नै नास करैगा तो पणमेशर उसका नास करैगा; क्यूँके पणमेशर का मन्दर पवित्र सैं, अर ओ थम सो।

18 कोए आपणे आप नै धोखा ना देवै। जै थारै म्ह तै कोए इस दुनिया म्ह आपणे आप ताहीं ज्ञानी समझै, तो बावळा बणै के ज्ञानी हो जावै। 19 क्यूँके इस दुनिया का ज्ञान पणमेशर के लवै बावळापण सैं, जिसा लिख्या सैं, "ओ ज्ञानियाँ ताहीं उनकी श्याणपत म्ह फँसा देवै सैं," 20 अर फेर, "प्रभु ज्ञानियाँ के बिचारां नै जाणै सैं के बेकार सैं।" 21 ज्यांतै माणसां पै कोए घमण्ड ना करै, क्यूँके सारा कीमे थारा सैं: 22 पौलुस, के अपुल्लोस, के कैफा, के दुनिया, के जीवन, के मरण, के वर्तमान, के भविष्य, सारा कीमे थारा सैं, 23 अर थम मसीह के सो, अर मसीह पणमेशर का सैं।

### मसीह के प्रेरित

4 माणस हमनै मसीह के सेवक अर पणमेशर के भेदां के भण्डारी समझै। 2 फेर उरै भण्डारी म्ह या बात देखी जावै सैं के ओ बिश्वास के जोगा हो। 3 पर मेरी निगाह म्ह या घणी छोटी बात सैं के थम या माणसां का कोए जज मन्त्रै परखै, बल्के मै खुद आपणे-आप ताहीं कोनी परखदा। 4 क्यूँके मेरा मन मेरै ताहीं किसे बात म्ह कसूरवार कोनी ठहरान्दा, पर इस म्ह मै बेकसूर कोनी ठहरदा, क्यूँके मेरा परखण आळा प्रभु सैं। 5 ज्यांतै जिब्व ताहीं प्रभु ना आवै, बख्त तै पहल्या किसे बात का न्याय ना करो: ओए अन्धकार की लुक्ही होड़ बात चाँदणै म्ह दिखावैगा, अर मनां के मतलबां नै प्रगट करैगा, फेर पणमेशर के कात्री तै हरेक की बड़ाई होवैगी।

6 हे भाईयो, मन्त्रै इन बाक्तां म्ह थारै खातर आपणा अर अपुल्लोस का जिक्रा उदाहरण की तरियां तै करया सैं; ज्यांतै के थम म्हारै जरिये न्यू सीक्खो के लिखे होए तै आगे ना बढ़णा, अर एक की मेर म्ह दुसरे के बिरोध म्ह घमण्ड ना करणा। 7 क्यूँके थारै म्ह अर दूसरयां म्ह कौण फर्क करै सैं? अर तेरै धोरै के सैं जो तन्नै (दुसरे तै) नीं पाया? अर जिबके तन्नै (दुसरे तै) पाया सैं, तो इसा घमण्ड क्यातै करै सैं के मान्नो कोन्या पाया?

8 थम तो छिक लिए सो, थम साहूकार बण लिए सो, थमनै म्हारै बिना राज्य करया; पर भला होंदा के थम राज्य करदे अर हम भी थारै गेल्या राज्य करदे। 9 मेरी समझ म्ह पणमेशर नै हम प्रेरितां ताहीं सारया के पाच्छे उन माणसां के जिसे ठहराया सैं, जिनकी मौत का हुकम हो लिया सैं; क्यूँके हम दुनिया अर सुर्गदुक्तां अर माणसां के खातर एक तमाशा ठहरे सां। 10 हम मसीह के खातर बावळे सां, पर थम मसीह म्ह श्याणै सो, हम कमजोर सां, पर थम हान्ने आळे सो। थम आदर पावो सो, पर म्हारा अपमान होवै सैं। 11 हम इस घड़ी ताहीं भूक्खे तिसाए अर उघाड़े सां, अर घुस्से खावां सां, अर मारे-मारे हान्डां सां; 12 अर अपणै-ए हाथां तै काम करके मेहनत करां सां। माणस म्हारै ताहीं भुंडा कहवै सैं, हम आशीष देवां सां; वे सतावै सैं, हम सहन करां सां। 13 वे बदनाम करै सैं, हम बिनती करां सां। हम आज ताहीं दुनिया का अडन्ना अर सारी चिज्जां की खुरचण बरगे ठहरे सां।

### चेतावनी

14 मै थमनै सर्भिन्दा करण के खातर ये बात कोनी लिखदा, पर अपणे प्यारे बाळक जाणके थमनै होश म्ह आण की कहूँ सूँ। 15 क्यूँके मसीह म्ह थारै सिखाणआळे दस हजार भी होंदे, तौभी थारै पिता घणे कोनी; ज्यांतै के यीशु मसीह म्ह सुसमाचार के जरिये मै थारा पिता होया। 16 ज्यांतै मै थारै तै बिनती करूँ सूँ के मेरी-सी चाल चाल्लो। 17 ज्यांतै मन्त्रै तीमुथियुस ताहीं जो प्रभु म्ह मेरा प्यारा अर बिश्वास के जोगा बेड्डा सैं, थारै धोरै खन्दाया सैं। ओ थमनै मसीह म्ह मेरा चाल-चलण याद करवावैगा, जिस तरियां के हरेक जंगहा हरेक कलीसिया म्ह उपदेश करूँ सूँ। 18 कीमे तो इसे फूल गे सैं, मान्नो मै थारै धोरै आण का ए नीं। 19 पर प्रभु नै चाहया तो मै थारै धोरै तावळा ए आऊँगा, अर उन फूले होया की बाक्तां ताहीं नीं, पर उनकी सामर्थ ताहीं जाण ल्युँगा। 20 क्यूँके पणमेशर का राज्य बाक्तां म्ह नीं पर सामर्थ म्ह सैं। 21 थम के चाहो सो? के मै उन्डा लेकै थारै धोरै आऊँ, या प्रेम अर नम्रता की आत्मा के गेल्या?

### कलीसिया म्ह अनैतिकता

5 उरै ताहीं सुनण म्ह आवै सैं के थारै म्ह जारी होवै सैं, बल्के इसी जारी जो गैर-जाक्तां म्ह भी कोनी होन्दी के एक माणस आपणे बाप की बिरबान्नी नै राखै सैं। 2 अर थम दुःख तो कोनी करदे, जिस तै इसा काम करण आळा थारै बिच्चाळै तै काड्या जान्दा, पर घमण्ड करो सो। 3 मै तो देही के तौर तै दूर था, पर आत्मा के तौर तै थारै गेल्या होके मान्नो मौजूद हालत म्ह इसे काम करणीयां के बारै म्ह यो हुकम दे चुक्या सूँ 4 के जिब्व थम अर मेरी आत्मा, म्हारे प्रभु यीशु मसीह के सामर्थ के गेल कड़े हो, तो इसा माणस म्हारै प्रभु यीशु मसीह के नाम तै 5 देही के विनाश के खातर शैतान ताहीं सौंप्या जावै, ताके उसकी आत्मा प्रभु यीशु के दिन म्ह उद्धार पावै।

6 थारा घमण्ड करणा आच्छा नीं; के थमनै नीं बेरा के माडा-सा खमीर पुरे गुन्दे होए चुन ताहीं खमीर कर देवै सैं। 7 पुराणा खमीर काड के अपणे-आप ताहीं शुद्ध करो के नया गुन्दया होड़ चुन बण जाओ; ताके थम अखमीरी होवो। क्यूँके म्हारा भी फसह, जो मसीह सैं, बलिदान होया सैं। 8 ज्यांतै आओ, हम त्योहार म्ह राज्जी होवां, ना तो पुराणे खमीर तै अर ना बुराई अर दुष्टता के खमीर तै, पर सीधाई अर सच्चाई की अखमीरी रोटी तै।

9 मन्त्रै आपणी चिड्डी म्ह लिख्या सैं के जारी करणीयां की संगति ना करणा। 10 या नीं के थम जमा-ए इस दुनिया के जारी करणीयां, या लालचियां, या अन्धेर करणीयां, या मूर्ति पूजा करणीयां की संगति ना करो; क्यूँके इस हालत म्ह तो थमनै दुनिया म्ह तै लिकड़ना ए पड़दा। 11 पर मेरा कहणा यो सैं के जै कोए भाई कुहवाके, जार, या लालची, या मूर्ति पूजा

करणीयें, या गाळी देण आळा, या दारुबाज, या अन्धेर करणीया हो, तो उसकी संगति मतना करणा; बल्के इसे माणस कें गेल्या खाणा भी नीं खाणा।<sup>12</sup> क्यूँके मन्त्रे बाहर आळ्यां का न्याय करण तै के काम? के थम भीत्तर आळ्यां का न्याय नीं करदे? <sup>13</sup> पर बाहरआळ्यां का न्याय पणमेशर करै सै। ज्यांतै उस भुन्डे काम करणीये ताहीं अपणे बिचाळै तै लिकाड घो।

### मसिहियाँ म्ह मुक्केबाजी

**6** के थारै म्ह तै किसे म्ह या हिम्मत सै, के जिब्व दुसरे कें गेल्या रोळा हो, तो फैसले कें खातर अधर्मियाँ कें धोरै जावै; अर पवित्र माणसां के धोरै नीं जावै? <sup>2</sup> के थमनै नीं बेरा के पवित्र माणस दुनिया का न्याय करैंगे? ज्यांतै जिब्व थमनै दुनिया का न्याय करणा सै, तो के थम छोट्या तै छोटे रोळ्यां का भी फैसला करण जोगे कोनी? <sup>3</sup> के थमनै नीं बेरा के हम सुर्गदुता का न्याय करंगे? तो के दुनिया की बात्तां का फैसला नीं करा? <sup>4</sup> जै थमनै दुनियावी की बात्तां का फैसला करणा हो, तो के उन्नै ए बिठाओगे जो कलीसिया म्ह कीमे कोनी समझे जावै सै? <sup>5</sup> मँ थमनै सर्मिन्दा करण कें खातर न्यू कहुँ सूँ। के साच्च-ए थारै म्ह एक भी श्याणा नीं मिल्दा, जो अपणे भाईयां का फैसला कर सकै? <sup>6</sup> थारै म्ह भाई-भाई म्ह मुकदमा होवै सै, अर ओ भी अबिश्वासियाँ कें श्यामी।

<sup>7</sup> पर साच्च-ए थारै म्ह भी बड्डा कसूर तो यो सै के आपस म्ह मुकदमा करो सो। जुल्म क्यांतै नीं सहन्दे? आपणा नुकसान क्यांतै नीं सहन्दे? <sup>8</sup> पर थम तो खुदे जुल्म करो अर नुकसान पहोचाओ सो, अर ओ भी भाईयां ताहीं। <sup>9</sup> के थमनै नीं बेरा के जुल्मी माणस पणमेशर के राज्य के वारिस ना होवैंगे? धोक्खा ना खावो; ना बेश्या कें जाणीए, ना मूर्ति पूजणीए, ना बिगान्नी लुगाई कें जाणीए, ना लुच्चे, ना माणसां कें गेल्या कुकर्म करणीए, <sup>10</sup> ना चोर, ना लालची, ना दारुबाज, ना गाळी देणीयें, ना अन्धेर करणीयें पणमेशर कें राज्य के वारिस होवैंगे। <sup>11</sup> अर थारै म्ह तै कितने इसे ए थे, पर थम प्रभु यीशु मसीह कें नाम तै अर म्हारै पणमेशर के आत्मा तै धोए गये अर पवित्र होए अर धर्मी ठहरे।

### देही पणमेशर की महिमा कें खातर

<sup>12</sup> सारी चीज मेरै खातर सई तो सै, पर सारी चीज फैयदे की कोनी; सारी चीज मेरै खातर सई सै, पर मै किसे बात कें बिसर कोनी होऊंगा। <sup>13</sup> खाणा पेट कें खातर, अर पेट खाणै कें खातर सै, पर पणमेशर पेट अर खाणै नै दोनुआ ताहीं नाश करैगा। पर देही जारी कें खातर कोनी, बल्के प्रभु कें खातर सै, अर प्रभु देही कें खातर सै। <sup>14</sup> पणमेशर नै आपणी सामर्थ तै प्रभु यीशु ताहीं जिन्दा करया, अर म्हारै ताहीं भी जिन्दा करैगा। <sup>15</sup> के थमनै नीं बेरा के थारी देही मसीह का अंग सै? तो के मै मसीह के अंग लेकै उन ताहीं बेश्या के अंग बणाऊँ? कद्वे भी नीं। <sup>16</sup> के थमनै नीं बेरा के जो कोए बेश्या तै संगत करै सै, ओ उसकै गेल्या एक तन हो जावै सै, क्यूँके लिख्या सै: “वे दोनु एक तन होवैंगे।” <sup>17</sup> अर जो प्रभु की संगति म्ह रहवै सै, ओ उसकै गेल्या एक आत्मा हो जावै सै। <sup>18</sup> जारी तै बचे रहो। जितने दुसरे पाप माणस करै सै वे देही तै बाहर सै, पर जारी करणीयां आपणी ए देही कें खिलाफ पाप करै सै। <sup>19</sup> के थमनै नीं बेरा के थारी देही पवित्र आत्मा का मन्दर सै, जो थारै म्ह बस्या होया सै, अर थारै ताहीं पणमेशर कें कात्री तै मिल्या सै; अर आपणे कोनी सो? <sup>20</sup> क्यूँके दाम देकै मोल लिये गये सो, ज्यांतै आपणी देही कें जरिये पणमेशर की महिमा करो।

### ब्याह तै सम्बन्धित सवाल

**7** उन बात्तां कें बारै म्ह जो थमनै लिक्खी, यो सई सै के माणस लुगाई नै ना छुवै। <sup>2</sup> पर जारी कें डर तै हरेक माणस की बीरबान्नी, अर हरेक लुगाई का धणी हो। <sup>3</sup> धणी आपणी बिरबान्नी का हक्क पूरा करै; अर उस्से तरियां ए बिरबान्नी भी आपणे धणी का। <sup>4</sup> बिरबान्नी नै आपणी देही पै हक्क कोन्या पर उसकै धणी का हक्क सै; उस्से तरियां ए धणी नै भी आपणी देही पै हक्क कोनी, पर बिरबान्नी का सै। <sup>5</sup> थम एक-दुसरे तै न्यारे ना रहो; पर सिर्फ कीमे बख्त ताहीं आपस म्ह सलाह तै के प्रार्थना कें खातर छुट्टी मिलै, अर

फेर एक सेक्ती रहो; इसा ना हो के थारे तगाजे कें कारण शैतान थमनै परखै। <sup>6</sup> पर मै जो यो कहुँ सूँ वा अनुमति सै ना के आज्ञा। <sup>7</sup> मै यो चाहुँ सूँ के जिसा मै सूँ, उस्से तरियां ए सारे माणस होवै; पर हरेक ताहीं पणमेशर की ओड तै खास-खास बरदान मिले सै; किसे ताहीं किसे ढाळ का, अर किसे ताहीं किसे और ढाळ का।

<sup>8</sup> पर मै कुँवारां अर बिधवायां कें बारै म्ह कहुँ सूँ के उनकै खातर इसा ए रहणा सई सै, जिसा मै सूँ। <sup>9</sup> पर जै वे संयम ना कर सकै, तो ब्याह करै, क्यूँके ब्याह करणा कामातुर रहण तै भला सै।

<sup>10</sup> जिनका ब्याह होग्या सै, उन ताहीं मै नीं, बल्के प्रभु हुक्म देवै सै के बिरबान्नी आपणे धणी तै न्यारी ना होवै <sup>11</sup> जै न्यारी हो भी जावै, तो बिना दुसरा ब्याह करे रहवै; या आपणे धणी तै दुबारा मेल कर लेवै--- अर ना धणी आपणी बिरबान्नी नै छोडै।

<sup>12</sup> दुसरयां तै प्रभु नीं पर मै ए कहुँ सूँ, जै किसे भाई की बिरबान्नी बिश्वास ना राख्दी हो अर उसकै गेल्या रहण म्ह राज्जी हो, तो ओ उस ताहीं ना छोडै। <sup>13</sup> जिस लुगाई का धणी बिश्वास ना राख्दा हो, अर उसकै गेल्या रहण म्ह राज्जी हो; वा धणी नै नीं छोडै। <sup>14</sup> क्यूँके इसा धणी जो बिश्वास ना राख्दा हो, ओ बिरबान्नी कें कारण पवित्र ठहरै सै; अर इसी बिरबान्नी जो बिश्वास कोनी राख्दी, धणी कें कारण पवित्र ठहरै सै; नीं तो थारे बाळ-बच्चे अशुद्ध होंदे, पर इब तो पवित्र सै। <sup>15</sup> पर जो माणस बिश्वास कोनी राख्दा, जै ओ न्यारा होवै तो न्यारा होण घो, इसी हालत म्ह कोए भाई या बाण बन्धन म्ह कोनी। पणमेशर नै म्हारै ताहीं मेळ-मिलाप कें खातर बुलाया सै। <sup>16</sup> क्यूँके हे बीरबान्नी, तू के जाणै सै के तू आपणे धणी का उद्धार करा लेवैगी? अर हे माणस, तू के जाणै सै के तू आपणी बिरबान्नी का उद्धार करा लेवैगा?

### पणमेशर की बुलाहट कें मुताबिक चालो

<sup>17</sup> जिसा प्रभु नै हरेक ताहीं बांडया सै, अर जिसा पणमेशर नै हरेक ताहीं बुलाया सै, उस्से तरियां ए ओ चालै। मै सारी कलीसियां म्ह इसा ए ठहराऊँ सूँ। <sup>18</sup> जो खतना करया होया बुलाया गया हो, ओ बिना खतना ना बणै, जो बिना खतना बुलाया गया हो, ओ खतना ना करवावै। <sup>19</sup> ना खतना कीमे सै अर ना बिना खतना, पर पणमेशर के हुक्मां ताहीं मानणा ए सारा कीमे सै। <sup>20</sup> हरेक माणस जिस हालत म्ह बुलाया गया हो, उस्से हालत म्ह रहवै। <sup>21</sup> जै तू नौकर की हालत म्ह बुलाया गया सै, तो फिक्र ना करै; पर जै तू आजाद हो सकै, तो इसा ए काम कर। <sup>22</sup> क्यूँके जो दास की हालत म्ह प्रभु म्ह बुलाया गया, ओ प्रभु का आजाद करया होया सै। उस्से तरियां ए जो आजादी की हालत म्ह बुलाया गया सै, ओ मसीह का दास सै। <sup>23</sup> थम दाम देकै मोल लिए गये सो; माणसां के नौकर ना बणो। <sup>24</sup> हे भाईयो, जो कोए जिस हालत म्ह बुलाया गया हो, ओ उस्से म्ह पणमेशर केए गेल्या रहवै।

### कुवारें अर बिधवां

<sup>25</sup> कुवारियाँ कें बारै म्ह प्रभु का कोए हुक्म मन्त्रे कोनी मिल्या, पर बिश्वास जोगे होण कें खातर जीसी दया प्रभु नै मेरै पै करी सै, उस्से कें मुताबिक सलाह ह्युँ सूँ। <sup>26</sup> मेरी समझ म्ह यो सई सै के आजकाल क्लेश कें कारण, माणस जिसा सै उसा ए रहवै। <sup>27</sup> जै तेरी बिरबान्नी सै, तो उसतै न्यारा होण की कोशिश ना करै; अर जै तेरी बिरबान्नी कोन्या, तो बिरबान्नी नै टोहवै ना। <sup>28</sup> पर जै तू ब्याह भी करै, तो पाप कोनी; अर जै कुवारी ब्याही जावै तो कोए पाप कोनी। पर इस्यां नै देही तौर पै दुःख होवैगा, अर मै बचाणा चाहुँ सूँ। <sup>29</sup> हे भाईयो, मै न्यू कहुँ सूँ के बख्त घाट करया गया सै, ज्यांतै चहिये के जिन कें बिरबान्नी हों, वे इसे हों मानो उन कें बिरबान्नी कोन्या; <sup>30</sup> अर रोण आळे इसे हों, मानो रोंदे कोनी; अर आनन्द करण आळे इसे हों, मानो आनन्द कोनी करदे; अर मोल लेण आळे इसे हों, मानो उनकै धोरै कीमे सै ए कोनी। <sup>31</sup> अर इस दुनिया कें गेल्या बीवार करण आळे इसे हों, के दुनिया ए के ना हो लेवै; क्यूँके इस दुनिया की रीत अर बीवार बदलदे जावै सै। <sup>32</sup> आखर म्ह मै न्यू चाहुँ सूँ के थम फिक्र ना करो। कुवारे माणस प्रभु की बात्तां की फिक्र म्ह रहवै सै के प्रभु ताहीं किस तरियां राज्जी राखै। <sup>33</sup> पर ब्याह होड माणस दुनिया की बात्तां की फिक्र म्ह रहवै सै के आपणी

बिरबानी तार्हीं किस तरियां तै राज्जी राखै | 34 क्वारी अर ब्याही होइ म्ह भी फर्क सै : क्वारी प्रभु की फ़िक्र म्ह रहवै सै के वा देही अर आत्मा दोनुआ म्ह पवित्र हो, पर ब्याही होइ दुनिया की फ़िक्र म्ह रहवै सै के आपणे धणी नै राज्जी राखै | 35 मै या बात थारै ए फैयदे कै खातर कहुँ सूँ, ना के थमनै फसाण के मारे, बल्के ज्यातै के जिसा सोभा देवै सै उसा ए करया जावै, के थम एक चित्त होके प्रभु की सेवा म्ह लागे रहो |

36 जै कोए यो समझै के मै आपणी उस क्वारी का हक्क मारण लागरया सूँ, जिसकी जवानी ढळ रही सै, अर जरूत भी हो, तो जिसा चाहवै उसा ए करै, इसम्ह पाप कोनी, ओ उसका ब्याह होण देवै | 37 पर जो मन म्ह पक्का रहवै सै, अर उस तार्हीं जरूत ना हो, बल्के आपणी मर्जी पै अधिकार राख्दा हो, अर आपणे मन म्ह या बात ठाण ली हो के ओ आपणी कुवारी छोरी नै कुवारी ए राखैगा, ओ सई करै सै | 38 ज्यातै जो आपणी कुवारी का ब्याह कर देवै सै, ओ सई करै सै, अर जो ब्याह नै कर देवै, ओ और भी सई करै सै |

39 जिब्व तार्हीं किसे लुगाई का धणी जिन्दा रहवै सै जद तार्हीं वा उसतै जुडी होई सै; पर जै उसका धणी मर जावै तो जिस तै चाहवै ब्याह कर सकै सै, पर सिर्फ प्रभु म्ह | 40 पर जीसी सै उसी ए रहवै, तो मेरै बिचार म्ह और भी धन्य सै; अर मै समझूँ सूँ के पणमेशर का आत्मा मेरै म्ह भी सै |

### मूर्तियाँ तार्हीं चढाया गया भोजन

8 इब मूर्तियाँ के श्यामी बलि करी होई चिजाँ के बारे म्ह---- हमने बेरा सँ के हम सारया नै ज्ञान सँ | ज्ञान घमण्ड पैदा करै सै, पर प्रेम तै बढोत्तरी होवै सै | 2 जै कोए समझै के मै कीमे जाणु सूँ, तो जिसा जानणा चाहिये उसा इब तार्हीं कोनी जानदा | 3 पर जै कोए पणमेशर तै प्रेम राखै सै, तो पणमेशर उस तार्हीं पिच्छाणै सै |

4 आखर म्ह मूर्तियाँ के श्यामी बलि करी होई चिजाँ के खाण के बारे म्ह---- हमने बेरा सै के मूर्ति दुनिया म्ह कोए चीज कोनी, अर एक तार्हीं छोड़ और कोए पणमेशर कोनी | 5 जिब्वके अकास म्ह अर धरती पै घणे ईश्वर कुहवावै सँ----जिसा के घणे ईश्वर अर घणे प्रभु सँ---- 6 तौभी म्हारै खातर तो एक ए पणमेशर सै : यानिके पिता जिसकी ओड़ तै सारी चीज सै, अर हम उस्से के खातर सां | अर एक ए प्रभु सै, यानिके यीशु मसीह जिसकै जरिये सारी चीज होई, अर हम भी उस्से के जरिये सां |

7 पर सारया नै यो ज्ञान कोन्या, पर कीमे तो इब तार्हीं मूर्ति तार्हीं कीमे समझण के कारण मूर्तियाँ के श्यामी बलि करी होइ चीज तार्हीं कीमे समझके खावै सँ, अर उनका विवेक कमजोर होण के कारण अशुद्ध हो जावै सै |

8 खाणा हमने पणमेशर के लवै कोनी पहीचान्दा | जै हम नै खावाँ तो म्हारा कीमे नुकसान कोन्या, अर जै खावाँ तो कीमे फैयदा कोनी | 9 पर साबधान! इसा ना होवै के थारी या आजादी कदे कमजोरों के खातर ठोकर का कारण हो जावै | 10 क्यूँके जै कोए तन्नै ज्ञानी नै मूर्ति के मन्दर म्ह खाणा खांदे देखै अर ओ कमजोर माणस हो, तो के उसकै विवेक तार्हीं मूर्ति के श्यामी बलि करी होई चीज खाण की हिम्मत नै हो जावैगी | 11 इस तरियां तै तेरे ज्ञान के कारण ओ कमजोर भाई जिसकै खातर मसीह मरया, नास हो जावैगा |

12 इस तरियां तै भाईयाँ के खिलाफ अपराध करण तै अर उनकै कमजोर विवेक तार्हीं चोट पहीचान तै, थम मसीह के खिलाफ अपराध करो सो |

13 इस कारण जै खाणा मेरै भाई तार्हीं ठोकर खुवावै, तो मै कहे भी किसे तरियां तै मांस नै खाऊँगा, ना हो के मै आपणे भाई के खातर ठोकर का कारण बणु |

### प्रेरित के अधिकार अर कर्तव्य

9 के मै आजाद कोनी? के मै प्रेरित कोनी? के मन्ने यीशु तार्हीं जो म्हारा प्रभु सै, नै देख्या? के थम प्रभु म्ह मेरे बणाए होए कोनी? 2 जै मै दुसरयाँ के खातर प्रेरित कोनी, तौभी थारै खातर तो सूँ: क्यूँके थम प्रभु म्ह मेरी प्रेरिताई पै छाप सो |

3 जो मन्ने परखै सँ, उनकै खातर योए मेरा जबाब सै | 4 के हमनै खाण-पाण का हक्क कोनी? 5 के हमनै यो हक्क कोनी, के किसे मसीह बाण के गेल्या ब्याह करके उस तार्हीं लिये हाँडा, जिसा दुसरे प्रेरित अर प्रभु के भाई अर

कैफा करै सै? 6 या सिर्फ मन्ने अर बरनबास तार्हीं ए हक्क कोनी के कमाई करणा छोड्डां | 7 कौण आपणी गिरह तै खाकै सिपाही का काम करै सै? कौण दाख की बारी लाकै उसका फळ नै खान्दा? कौण भेडडाँ की रूखाळी करके उनका दूध कोनी पिन्दा?

8 के मै ये बात माणसां ए की रीत पै बोझू सूँ? 9 के व्यवस्था भी योए नै कहन्दे? क्यूँके मुसा के व्यवस्था म्ह लिख्या सै, "दाँवते बख्त चाल्दे होये बैल्द का मुँह नै जुड़णा |" के पणमेशर बैल्दा ए की फ़िक्र करै सै? 10 या खास करके म्हारै खातर कहवै सै | हम्बै, म्हारै खातर ए लिख्या गया, क्यूँके सई सै के जोत्तण आळा आस तै जोतै अर दाँवणआळा हिस्सेदार होण की आस तै दाँवणी करै | 11 आखर म्ह जिब्व के हमनै थारै खातर आत्मिक चीज बोई, तो के कोए बड्डी बात सै के थारी देही तौर की चिजाँ की फसल काटै | 12 जिब्व दुसरयाँ का थारै पै यो हक्क सै, तो के म्हारा इसतै घणा कोनी होवैगा? पर हम यो हक्क काम नै लाये, पर सारा कीमे सहवां सां के म्हारे जरिये मसीह के सुसमाचार म्ह कीमे अडचन ना होवै | 13 के थमनै नै बेरा के जो मन्दर म्ह सेवा करै सै, वे मन्दर म्ह तै खावै सँ; अर जो वेदी की सेवा करै सै, वे वेदी के गेल्या हिस्सेदार होवै सँ? 14 इस्से तरियां तै प्रभु नै भी ठहराया के जो माणस सुसमाचार सुणावै सँ, उनकी कमाई सुसमाचार तै होवै |

15 पर मै इन म्ह तै कोए भी बात काम म्ह नै लाया, अर मन्ने ये बात ज्यातै लिक्खी के मेरै खातर इसा करया जावै, क्यूँके इसतै तो मेरा मरणा भला सै के कोए मेरै घमण्ड नै बेकार ठहरावै | 16 जै मै सुसमाचार सुणाऊँ, तो मेरै खातर कीमे घमण्ड की बात कोनी, क्यूँके यो तो मेरै खातर जरूरी सै | जै मै सुसमाचार नै सुणाऊँ, तो मेरै पै हाय ! 17 क्यूँके जै आपणी मर्जी तै न्यू करूँ सूँ तो मजदूरी मन्ने मिलै सै, अर जै आपणी मर्जी तै नै करदा तौभी भण्डारीपण मेरै तार्हीं सौँप्या गया सै | 18 तो मेरी कौण सी मजदूरी सै? यो के सुसमाचार सुनाण म्ह मै मसीह का सुसमाचार फ्री-फण्ड म्ह द्यु, उरै तार्हीं के सुसमाचार म्ह जो मेरा हक्क सै उस तार्हीं भी मै पूरी तरियां तै काम म्ह नै ल्याऊँ |

19 क्यूँके सारया तै आजाद होण पै भी मन्ने आपणे आप तार्हीं सारया का नौकर बणा दिया सै के घणे माणसां नै खिंच ल्याऊँ | 20 मै यहुदियाँ के खातर यहूदी बणया के यहुदियाँ तार्हीं खिंच ल्याऊँ | जो माणस व्यवस्था के आसरे सै उनकै खातर मै व्यवस्था के आसरे ना होण पै भी व्यवस्था के आसरे बणया के उन तार्हीं जो व्यवस्था के आसरे सै, खिंच ल्याऊँ | 21 बिना व्यवस्था आळ्यां के खातर मै ---- जो पणमेशर के व्यवस्था तै अधीन नै पर मसीह के व्यवस्था के अधीन सूँ---- बिना व्यवस्था सा बणया, के बिना व्यवस्था आळ्यां तार्हीं खिंच ल्याऊँ | 22 मै कमजोरों के खातर कमजोर बणया के कमजोरों नै खिंच ल्याऊँ | मै सारे माणसां के खातर सारा कीमे बणया के किसे न किसे तरियां तै घण-खरया का उद्धार कराऊँ | 23 मै यो सारा कीमे सुसमाचार के खातर करूँ सूँ के औराँ के गेल्या उसका हिस्सेदार हो जाऊँ |

### मसीही दौड़

24 के थमनै नै बेरा के दौड़ म्ह तो भाजै सारे ए सँ, पर इनाम एक ए ले जावै सै? थम इसे ए भाजो के जित्तो | 25 हरेक पहलवान सारी ढाल का संयम करै सै; वे तो एक मुरझाण आळै मुकुट नै पाण के खातर यो सारा कीमे करै सँ, पर हम तो उस मुकुट के खातर करां सां जो मुरझाण का कोनी | 26 ज्यातै मै तो इस्से तरियां तै भाजू सूँ, पर बिना मकसद नै; मै भी इस्से तरियां मुक्क्यां तै लडूँ सूँ, पर उसकै बरगा नै जो बाळ छेतदा होया लडै सै | 27 पर मै आपणी देही नै मारदा-छेतदा अर बस म्ह लाऊँ सूँ, इसा ना करो के औरां तार्हीं प्रचार करके मै आप ए किसे तरियां तै निकम्मा ठहरूँ |

### इस्त्राएल के इतिहास तै चेतावनी

10 हे भाईयो, मै नै चाहन्दा के थम इस बात तै अनजाण रहो के म्हारे सारे बाप-दादे बादळ के तळै थे, अर सारे के सारे समुन्दर के बिचाळै तै पार हो गये; 2 अर सारया नै बादळ म्ह अर समुन्दर म्ह, मूसा का बपतिस्मा लिया; 3 अर सारया नै एक ए आत्मिक खाणा खाया; 4 अर सारया



नै एक ए आत्मिक पाणी पीया, क्यूँके वे उस आत्मिक चट्टान तै पीवें थे जो उनकै गेल-गेल चालै थी, अर वा चट्टान मसीह था। 5 पर पणमेशर उन म्ह तै घण-खरया तै राज्जी कोन्या होया, ज्यांतै वे जंगळ म्ह ढेर होयें।

6 ये बात म्हारै खातर उदाहरण ठहरिं, के जिस तरियां उन्रै लालच करया, उस्से तरियां हम भूंडी चिज्जां का लालच कोनी करां; 7 अर ना थम मूर्ति पूजणीये बणो, जिस तरियां के उन म्ह तै कितने बणगे थे, जिसा लिख्या सै, "माणस खाण-पीण नै बैठे, अर खेल्ण-कुट्टण उट्टे।" 8 अर ना हम जारी करां, जिसा उन म्ह तै कितन्यां नै करया; अर एक दिन म्ह तेईस हजार मरये। 9 अर ना हम प्रभु नै परखां, जिसा उन म्ह कितन्यां नै करया, अर सांपां कै जरिये नास करे गये। 10 अर ना थम बीरडाओ, जिस तरियां तै उन म्ह कितने बीरडाए अर नास करण आळै के जरिये नास करे गये। 11 पर ये सारी बात, जो उन पै आण पड़ी, उदाहरण की तरियां थीं; वे म्हारी चेतावनी कै खातर जो दुनिया के आखरी बख्त म्ह रहवें सै, लिक्खी गई सै। 12 ज्यांतै जो समझे सै, "मै एक जंगहा स्थिर सूँ" ओ चौक्कस रहवै के कदे पड़ ना जावै। 13 थम किसे इसे हिम्तान म्ह ना पड़ो, जो माणस कै सहण तै बाहरण सै। पणमेशर साचा सै अर ओ थमनै सामर्थ तै बाहर परीक्षा म्ह कोनी गैरै, बल्के परीक्षा कै गेल काड्डण की भी करैगा के थम सह सको।

### मूर्तिपूजा कै बिरुद्ध चेतावनी

14 इस कारण, हे मेरे प्यारो, मूर्तिपूजा तै बचे रहो। 15 मै श्याणे जाणकै थारै तै कहूँ सूँ: जो मै कहूँ सूँ, उस नै थम परखो। 16 ओ धन्यवाद का कटोरा, जिस पै हम धन्यवाद करां सां; के मसीह कै लहू का साझीपणा कोनी? ओ रोटी जिस ताहीं तोडा सां, के ओ मसीह की देही का साझीपणा कोनी? 17 ज्यांतै के एक ए रोटी सै तो हम भी जो घणे सां, एक देही सां: क्यूँके हम सारे उस्से एक रोटी म्ह साझी होवां सां। 18 जो देही कै भाव तै इस्त्राएली सै, उन ताहीं देक्खो: के बलिदानां के खाणआळे वेदी के गेल-साझी कोनी? 19 फेर मै के कहूँ सूँ? के यो के मूर्ति पै चढाया गया बलिदान कुछे सै? या मूर्ति कुछे सै? 20 ना, बल्के यो के गैर-जात जो बलिदान करै सै; वे पणमेशर कै खातर नीं पर भूंडी आत्मायां कै खातर बलिदान करै सै अर मै नीं चाहन्दा के थम भूंडी आत्मायां के गेल-साझी होवो। 21 थम प्रभु के कटोरे अर भूंडी आत्मायां के कटोरे दोनुआ म्ह तै नीं पी सकदे। थम प्रभु की मेज अर भूंडी आत्मायां की मेज दोनुआ के साझी नीं हो सकदे। 22 के हम प्रभु ताहीं खुन्दक दुवावां सां? के हम उस तै टाड्डे सां?

### सारा कीमे पणमेशर की महिमा कै खातर

23 सारी चीज मेरै खातर सई तो सै, पर सारी फैयदे की कोनी; सारी चीज मेरै खातर सई तो सै, पर सारी चिज्जां तै बढोत्तरी कोनी। 24 कोए आपणी ए भलाई नै नीं, बल्के औरां की भलाई नै टोहवै। 25 जो कीमे कस्साइयां के उरै बिकै सै, ओ खाओ अर विवेक कै कारण कीमे ना बुझ्झो? 26 "क्यूँके धरती अर उसकी भरपूरी प्रभु की सै।" 27 जै अबिश्वासियां म्ह तै कोए थमनै न्योँदा देवै, अर थम जाणा चाहो, तो जो कीमे थारै श्यामी धरया जावै ओए खाओ; अर विवेक कै कारण कीमे ना बुझ्झो। 28 पर जै कोए थारै तै कहवै, "यो तो मूर्ति ताहीं बलि करी होई चीज सै, "तो उस्से बताणआळै कै कारण अर विवेक कै कारण ना खाओ। 29 मेरा मतलब तेरा विवेक कोनी, पर उस दुसरे का। भला, मेरी आजादी दुसरे कै बिचार तै क्यांतै परखी जावै? 30 जै मै धन्यवाद करके साझी होऊँ सूँ, तो जिस पै मै धन्यवाद करूँ सूँ उसकै कारण मेरी बदनामी क्यांतै होवै सै?

31 ज्यांतै थम चाहे खाओ, चाहे पीओ, चाहे जो कीमे करो, सारा कीमे पणमेशर की महिमा कै खातर करो। 32 थम ना यहुदियाँ, ना युनानियाँ, अर ना पणमेशर कलीसिया कै खातर टोकर का कारण बणो। 33 जिसा मै भी सारी बात्तां म्ह सारया नै राज्जी राखूँ सूँ, अर आपणा नीं पर घण-खरया का फैयदा टोहूँ सूँ के वे उद्धार पावै।

11 थम मेरी सी चाल चालो जिसा मै मसीह की सी चाल चालूँ सूँ।

### आराधना म्ह सिर ढकणा

2 हे भाईयो, मै थारै ताहीं सराऊँ सूँ के सारी बात्तां म्ह थम मन्ने याद करो सो; अर जो रीत-रिवाज मन्ने थारै ताहीं साँपी सै, उनका पालन करो सो। 3 पर मै चाहूँ सूँ के थम न्यू जाण ल्यो के हरेक माणस का सिर मसीह सै, अर लुगाई का सिर माणस सै, अर मसीह का सिर पणमेशर सै। 4 जो माणस सिर ढके होए प्रार्थना या भविष्यवाणी करै सै, ओ अपने सिर का अपमान करै सै। 5 पर जो लुगाई उघाड़े सिर प्रार्थना या भविष्यवाणी करै सै, वा अपने सिर का अपमान करै सै, क्यूँके वा गन्जी होण कै बरगी सै। 6 जै लुगाई ओढणी ना ओढै तो बाळ भी कटवा लेवै, जै लुगाई कै खातर बाळ कटवाणा या गन्जी होणा सर्म की बात सै, तो ओढणी ओढै। 7 हम्बै, माणस नै आपणा सिर ढकणा सई कोनी, क्यूँके ओ पणमेशर का हुबहू शिक्क अर महिमा सै; पर लुगाई माणस की महिमा सै। 8 क्यूँके माणस लुगाई तै नीं होया, पर लुगाई माणस तै होई सै; 9 अर माणस लुगाई कै खातर नीं बणाया गया, पर लुगाई माणस कै खातर बणाई सै। 10 इस्से खातर सुर्गदुत्तां के कारण लुगाई ताहीं उचित सै के हक्क अपने सिर पै धरै। 11 तौभी प्रभु म्ह ना तो लुगाई बिना माणस, अर ना माणस बिना लुगाई के सै। 12 क्यूँके जिस तरियां लुगाई माणस तै सै, उस्से तरियां ए माणस लुगाई कै जरिये सै; पर सारी चीज पणमेशर तै सै। 13 थम आप ए बिचार करो, के लुगाई नै उघाड़े सिर पणमेशर तै करणा शोभा देवै सै? 14 के स्वभाव कै तौर पै भी थमनै नीं बेरा के जै माणस लाम्बे बाळ राखै, तो उसकै खातर अपमान सै। 15 पर जै लुगाई लाम्बे बाळ राखै तो उसकै खातर शोभा सै, क्यूँके बाळ उसकी ओढणी कै खातर दिए गये सै। 16 पर जै कोए बहस करणा चाहवै, तो न्यू जाण लेवै के ना म्हारी अर ना पणमेशर की कलीसियाओं की इसी रीत सै।

### प्रभु-भोज कै बारै म्ह

17 पर यो हुक्म देंदे होए मै थारी बड़ाई कोनी करदा, ज्यांतै के थारे कट्टे होण तै भलाई नीं, पर नुकसान होवै सै। 18 क्यूँके पहल्या तो मै न्यू सुणूँ सूँ के जिब्व थम कलीसिया म्ह कट्टे होवो सो तो थारै म्ह फूट होवै सै, अर मै इस पै कीमे-कीमे बिश्वास भी करूँ सूँ। 19 क्यूँके टोळबाजी भी थारै म्ह जरूर होगी, ज्यांतै के जो माणस थारै म्ह खरे सै वे दिख जावें। 20 आखर म्ह थम जो एक जंगहा म्ह कट्टे होवो सो तो यो प्रभु-भोज खाण कै खातर नीं, 21 क्यूँके खाण कै बख्त एक दुसरे तै पहल्या आपणा खाणा खा लेवै सै, इस ढाळ कोए तो भूख्खा रहवै सै अर कोए चिम्बळ जावै सै। 22 के खाण-पीण कै खातर थारै घर कोनी? या पणमेशर की कलीसिया नै तुच्छ जाणो सो, अर जिसकै धारै नीं सै उन्रै समिन्दा करो सो? मै थारै तै के कहूँ? के इस बात म्ह थारी बड़ाई करूँ? ना, मै बड़ाई कोनी करदा।

23 क्यूँके या बात मेरै धारै प्रभु धारै तै आई, अर मन्ने थारै ताहीं भी पहोचा देई के प्रभु यीशु जिस रात पकड़ाया गया, रोटी लेई, 24 अर धन्यवाद करके उसनै तोडी अर कहया, "या मेरी देही सै, जो थारै खातर सै: मेरी यादगारी खातर न्यू ए करया करो।" 25 इस्से तरियां उसनै बियारी कै पाच्छे कटोरा भी लिया अर कहया, "यो कटोरा मेरे लहू म्ह नयी वाचा सै: जिब्व कट्टे पीओ, तो मेरी यादगारी कै खातर न्यू ए करया करो।" 26 क्यूँके जिब्व कट्टे थम या रोटी खाओ अर इस कटोरे म्ह तै पीओ सो, तो प्रभु की मौत नै जिब्व ताहीं ओ नीं आवै, प्रचार करदे रहो।

27 ज्यांतै जो कोए गलत तरियां तै प्रभु की रोटी खावै या उसकै कटोरे म्ह तै पीवै, ओ प्रभु की देही अर लहू का अपराधी ठहरैगा। 28 ज्यांतै माणस अपने आप ताहीं जाँच लेवै अर इस्से तरियां तै इस रोटी म्ह तै खावै, अर इस कटोरे म्ह तै पीवै। 29 क्यूँके जो खांदे-पिंदे बख्त प्रभु की देही नै नीं पिच्छाणै, ओ इस खाणै अर पीणै तै अपने ऊप्पर दण्ड ल्यावै सै। 30 इस्से कारण थारै म्ह तै घण-खरे माड़ें अर बीमार सै. अर घण-खरे मर भी गये। 31 जै हम अपने आप नै जाँचदे तो दण्ड नीं पांदे। 32 पर प्रभु म्हारै ताहीं दण्ड देकै म्हारी ताडना करै सै, ज्यांतै के हम दुनिया कै गेल कसूरवार नीं ठहरां।

33 इसकरकै, हे भाईयो, जिब्व थम खाण कै खातर कट्टे होओ सो तो एक दुसरे कै खातर ठहरया करो। 34 जै कोए भूखा हो तो अपने घर म्ह खा लेवै,

जिस तै थारा कइया होणा दण्ड का कारण ना होवै। बाकी बात्तां नै मै आकै ठीक करूंगा।

### आत्मिक बरदान

12 हे भाईयो, मैं नीं चाहन्दा के थम आत्मिक वरदानां के बारे म्ह अनजाण रहो। 2 थम चाहो सो, के जिब्व थम गैर-जात आळे थे, तो गूंगी मूर्तियां के पाच्छे जिसे चलाए जाओ थे, उस्से तरियां चाल्लो थे। 3 ज्यांतै मैं थमने चेतावनी देऊँ सूँ के जो कोए पणमेशर की आत्मा की अगुवाई तै बोझै सै, ओ नीं कहन्दा के यीशु श्रापित सै; अर ना कोए पवित्र आत्मा के बिना कह सकै सै के यीशु प्रभु सै।

4 वरदान तो कई ढाळ के सै, पर आत्मा एक ए सै। 5 अर सेवा भी कई ढाळ की सै, पर प्रभु एक ए सै। 6 अर असरदार काम कई ढाळ के सै, पर पणमेशर एक ए सै, जो सारया म्ह हरेक ढाळ का असर पैदा करै सै। 7 पर सारया के फैयदा पहोचाण के खातर हरेक ताहीं आत्मा का चाँदणा दिया जावै सै। 8 क्यूँके एक ताहीं आत्मा के जरिये बुद्धि की बात देई जावै सै; अर दुसरे ताहीं उस्से आत्मा के मुताबिक ज्ञान की बात। 9 अर किसे ताहीं उस्से तै बिश्वास; अर किसे ताहीं उस्से एक आत्मा तै चंगा करण का वरदान दिया जावै सै। 10 फेर किसे ताहीं सामर्थ्य के काम करण की ताकत; अर किसे ताहीं भविष्यवाणी की; अर किसे ताहि आत्मायाँ की परख, अर किसे ताहीं घणी ढाळ की भाषा; अर किसे ताहीं भाषायाँ का मतलब बताणा। 11 पर ये सारे असरदार काम वाए आत्मा करवावै सै, अर जिसने जो चाहवै सै ओ बाँड देवै सै।

### देही एक : अंग घणे

12 क्यूँके जिस ढाळ देही तो एक सै अर अंग घणे सै, अर उस एक देही के सारे अंग, घणे होण पै भी सारे मिलके एक-ए देही सै, उस्से ढाळ मसीह भी सै। 13 क्यूँके हम सारया नै के यहूदी हो, के युनानी, के गुलाम, के आजाद, एक-ए आत्मा के जरिये एक देही होण के खातर बपतिस्मा लिया, अर हम सारया ताहीं एक-ए आत्मा पिलाया गया।

14 ज्यांतै के देही म्ह एक-ए अंग नीं, पर भोत-से सै। 15 जै पाँव कहवै के मै हाथ कोनी, इसकरके देही का कोनी, तो के ओ इस कारण देही का कोनी? 16 अर जै कान कहवै; के मै आँख कोनी, इसकरके देही का कोनी, तो के ओ इस कारण देही का कोनी? 17 जै साबती देही आँख की होन्दी तो सुणना कित तै होंदा? जै साबती देही कान ए होंदी तो सूँघणा कित तै होंदा? 18 पर साच्च-ए पणमेशर नै अंगां ताहीं आपणी मर्जी के मुताबिक म्ह एक-एक करके देही म्ह धरया सै। 19 जै वे सारे एक-ए अंग होंदे, तो देही कित तै होंदी? 20 पर इब अंग तो भतेरे सै, पर देही एक-ए सै। 21 आँख हाथ तै नीं कह सकदी, "मन्ने तेरी जरूत नीं," अर ना सिर पाँयां तै कह सकै सै, "मन्ने तेरी जरूत नीं।" 22 पर देही के वे अंग जो दुसरयां तै माडे लागै सै, भोत-ए जरूरी सै; 23 अर देही के जिन अंगां नै हम आदर के जोमगे नीं समझदे उन्ने ताहीं हम घणा आदर देवां सां; अर म्हारै सोभाहीन अंग और भी भोत सोभामान हो जावै सै, 24 फेर भी म्हारै सोभामान अंगां नै इसकी जरूत नीं। पर पणमेशर नै देही ताहीं इसा बणा दिया सै के जिस अंग नै आदर की कमी थी उस्से ताहीं और भी घणा आदर मिलै। 25 ताके देही म्ह फूट नीं पडै, पर अंग एक दुसरे की बराबर फिक्र करै। 26 ज्यांतै जै एक अंग दुःख पावै सै, तो सारे अंग उसकै गेल्या दुःख पावै सै; अर जै एक अंग की बड़ाई होवै सै, तो उसकै गेल्या सारे अंग आनन्द मनावै सै।

27 इस्से ढाळ थम सारे मिलके मसीह की देही सो, अर न्यारे-न्यारे उसके अंग सो, 28 अर पणमेशर नै कलीसिया म्ह न्यारे-न्यारे माणस लाए सै: पहल्या प्रेरित, दुसरे नब्बी, तीसरे मास्टर, फेर सामर्थ के काम करण आळे, फेर चंगा करण आळे, अर भला करण आळे, अर इन्तजाम करण आळे, अर कई ढाळ की भाषा बोलणआळे। 29 के सारे प्रेरित सै? के सारे नब्बी सै? के सारे उपदेशक सै? के सारे सामर्थ के काम करण आळे सै? 30 के सारया नै चंगा करण का वरदान मिल्या सै? 31 के सारे अन्य भाषा ताहीं खोल के

बताणीये सै? थम बड्डे तै बड्डे वरदानां की धुन म्ह रहो। पर मै थमने और भी सारया तै बढ़िया राह बताऊँ सूँ।

### प्रेम - सारया तै उत्तम रास्ता

13 जै मै माणसां अर सुर्गदुत्तां की बोझीं बोझूँ अर प्रेम नीं राक्खूँ, तो मै उनठनादा होया पीतळ, अर इनझनादी होई झाँझ सूँ। 2 अर जै मै भविष्यवाणी कर सकूँ, अर सारे भेदां अर सारी ढाळ के ज्ञान ताहीं समझूँ, अर मन्ने उरै ताहीं पूरा बिश्वास हो के मै पहाड़ां ताहीं हटा दूँ, पर प्रेम ना राक्खूँ, तो मै कीमे भी कोनी। 3 जै आपणा सारा धन कंगालां नै खुवा दूँ, या आपणी देही जळाण के खातर दे दूँ, अर प्रेम नीं राक्खूँ, तो मन्ने कीमे भी फैयदा कोनी।

4 प्रेम म्ह धीरज सै, अर कृपाल सै; प्रेम डाह नीं करदा; प्रेम आपणी बड़ाई नीं मारदा, फुल्दा नीं, 5 ओ भूँडी रीत पै नीं चाल्दा, ओ आपणी भलाई नीं चाहन्दा, बिरडान्दा नीं, बुरा नीं मान्दा। 6 भुन्डे काम्मां तै राजी नीं होंदा, पर साच तै राजी होवै सै। 7 ओ सारी बात्तां नै सह लेवै सै, सारी बात्तां का बिश्वास करै सै, सारी बात्तां की उम्मीद राखै सै, सारी बात्तां म्ह धीरज धरै सै।

8 प्रेम कद्वे भी टळदा नीं; भविष्यवाणीयां हों, तो खत्म हो जावैगी; भाषां हों, तो जान्दी रहवैनीं; ज्ञान हो, तो मिट जावैगा। 9 क्यूँके म्हारा ज्ञान अधूरा सै, अर म्हारी भविष्यवाणी अधूरी; 10 पर जिब्व ओ सारया म्ह सिद्ध आवैगा, तो अधूरा मिट जावैगा। 11 जिब्व मै बाळक था, तो मै बाळकां की ढाळ बोझू था, बाळकां जिसा मन था, बाळकां जीसी समझ थी; पर जिब्व श्याणा हो गया तो बाळकां की बात छोड़ दीं। 12 इब्बे हमनै शीशे म्ह धुंधळा सा दिखै सै, पर उस बख्त आम्मी-श्यामी देक्खांगे; इस बख्त मेरा ज्ञान अधूरा सै, पर उस बख्त इसी पुरी तरियां तै पिच्छाणुगा, जिस तरियां मै पिच्छाणा गया सूँ। 13 पर इब्बे बिश्वास, आशा, प्रेम ये तीन पक्के सै, पर इन म्ह सारया तै बड्डा प्रेम सै।

### भविष्यवाणी अर अन्य-अन्य भाषां

14 प्रेम का अनुकरण करो, अर आत्मिक वरदानां की भी धुन म्ह रहो, खास करके यो के भविष्यवाणी करो। 2 क्यूँके जो गैर भाषा म्ह बात करै सै ओ माणसां तै नीं पर पणमेशर तै बात करै सै; ज्यांतै के उसकी बात कोए नीं समझदा, क्यूँके ओ भेद की बात आत्मा म्ह होके बोझै सै। 3 पर जो भविष्यवाणी करै सै, ओ माणसां की बढोत्तरी अर उपदेश अर शान्ति की बात कहवै सै। 4 जो गैर भाषा म्ह बात करै सै, ओ आपणी ए बढोत्तरी करै सै; पर जो भविष्यवाणी करै सै, ओ कलीसिया की बढोत्तरी करै सै। 5 मै चाहूँ सूँ के थम सारे अन्य भाषायां म्ह बात करो पर इसतै घणा न्यू चाहूँ सूँ के भविष्यवाणी करो : क्यूँके जै अन्य भाषां बोलणआळा कलीसिया की बढोत्तरी के खातर खोलके मतलब नीं बतावै तो भविष्यवाणी करणआळा उसतै बाध सै।

6 ज्यांतै, हे भाइयो, जै मै थारै धोरै आकै अन्य भाषायां म्ह बात करूँ, अर चाँदणा या ज्ञान या भविष्यवाणी या उपदेश की बात थारै तै ना कहूँ, तो मेरै तै थमने के फैयदा होवैगा? 7 इस्से ढाळ जै मरी होड़ चीज भी जिनतै आवाज निकडै सै, जिस तरियां बाँसुरी, या बीन, जै उनके सुरां म्ह फर्क ना हो तो जो फूँका या बजाया जावै सै, ओ किस ढाळ पिच्छाणा जावैगा? 8 अर जै तुरही का शब्द साफ ना हो, तो कौण लड़ाई के खातर तयारी करैगा? 9 इस्से तरियां ए थम भी जै जीभ तै साफ-साफ बात नीं कहो, तो जो कीमे कहया जावै सै ओ किस ढाळ समझया जावैगा? थम तो हवा तै बात करणआळे ठहरोगे। 10 दुनिया म्ह कितनी ए ढाळ की भाषां क्यांतै नीं हों, पर उन म्ह तै कोए भी बिना मतलब की नीं होगी। 11 ज्यांतै जै मै किसे भाषा का मतलब ना समझूँ, तो बोलण आळे की निगां म्ह परदेशी ठहरूंगा अर बोलण आळा मेरी भी निगां म्ह परदेशी ठहरैगा। 12 ज्यांतै थम भी जिब्व आत्मिक वरदानां की धुन म्ह हो, तो इसी कोशिश करो के थारै वरदानां की बढोत्तरी तै कलीसिया की बढोत्तरी होवै।

13 इस कारण जो अन्य भाषा बोलें, ओ प्रार्थना करै के उसका खोल के मतलब भी बता सकै। 14 ज्यांतै जै मैं अन्य भाषा म्ह प्रार्थना करूँ, तो मेरी आत्मा प्रार्थना करै सै पर मेरी बुद्धि काम नीं देदी। 15 आखर म्ह के करणा चाहिये? मैं आत्मा तै भी प्रार्थना करूँगा, अर बुद्धि तै भी प्रार्थना करूँगा; मैं आत्मा तै भी गाऊँगा, अर बुद्धि तै भी गाऊँगा। 16 नीं तो जै तू आत्मा ए तै धन्यवाद करैगा, तो फेर अज्ञानी तैरे धन्यवाद पै आमीन किस ढाळ कहवैगा? क्यूँके ओ नीं जाणदा के तू के कहवै सै? 17 तू तो सई ढाळ तै धन्यवाद करै सै, पर दुसरे की बढोत्तरी नीं होन्दी। 18 मैं अपने पणमेशर का धन्यवाद करूँ सूँ, के मैं थम सारया तै घणा अन्य भाषायां म्ह बोलूँ सूँ। 19 पर कलीसिया म्ह अन्य भाषा म्ह दस हजार बात कहण तै यो मन्त्रे और भी सई लागै सै, के दुसरया नै सिखाण के खातर बुद्धि तै पाँच ए बात कहूँ।

20 हे भाइयो, थम समझ म्ह बाळक ना बणो: बुराई म्ह तो बाळक रहो, पर समझ म्ह श्याणे बणो। 21 व्यवस्था म्ह लिख्या सै के प्रभु कहवै सै, के मैं अन्य भाषा बोलण आळ्यां के जरिये, अर बिगाने मुँह के जरिये इन माणसां तै बात करूँगा, तौभी वे मेरी नीं सुणैगें।" 22 ज्यांतै अन्य-अन्य भाषां बिश्वासीयां के खातर नीं, पर अबिश्वासीयां के खातर निशान सै; पर भविष्यवाणी अबिश्वासीयां के खातर नीं, पर बिश्वासीयां के खातर निशान सै। 23 आखर म्ह जै कलीसिया एक ठोड़ कट्टी हो, सारे के सारे अन्य-अन्य भाषां बोलै, अर बाहरणआळे या अबिश्वासी माणस भीत्तर आ जावै तो के वे थमनै बावळे नीं कहवैगें? 24 पर जै सारे भविष्यवाणी करण लागे, अर कोए अबिश्वासी या बाहरणआळा माणस भीत्तर आ जावै, तो सारे उस ताहीं कसूरवार ठहरा देवैगें अर परख लेवैगें; 25 अर उसकै मन के भेद दिख जावैगें, अर फेर ओ मुद्दा पड़के पणमेशर ताहीं प्रणाम करैगा, अर मान लेवैगा के साच्च ए पणमेशर थारै बिचाळै सै।

### उपासना म्ह अनुशासन

26 ज्यांतै हे भाइयो, के करणा चाहिये? जिब्ब थम कट्टे होवो सो, तो हरेक के दिल म्ह भजन या उपदेश या अन्य-भाषा या चाँदणा या अन्य-भाषा का मतलब बताणा रहवै सै। सारया कीमे आत्मिक बढोत्तरी के खातर होणा चाहिये। 27 जै अन्य-भाषा म्ह बात करणी हों तो दो या घणे हो तो तीन माणस बारी-बारी तै बोलै, अर एक माणस खोल के मतलब बतावै। 28 पर जै खोल के मतलब बताणीया ना हो, तो अन्य-भाषा बोलणआळा कलीसिया म्ह शान्त रहवै, अर अपने मन तै अर पणमेशर तै बात करै। 29 नब्बियाँ म्ह तै दो या तीन बोलै, अर बाकी माणस उनके बचन नै परखै। 30 पर जै दुसरे पै जो बैठ्या सै, कीमे ईश्वरीय चाँदणा होवै तो पहल्या बोल-बाल्ला हो जावै, 31 क्यूँके थम सारे एक-एक करके भविष्यवाणी कर सको सो, ताके सारे सीखै अर सारे शान्ति पावै। 32 अर नब्बियाँ की आत्मा नब्बियाँ के बस म्ह सै। 33 क्यूँके पणमेशर गड़बडी का नीं, पर शान्ति का पणमेशर सै।

जिसा पवित्र माणसां की सारी कलीसियाओं म्ह सै। 34 लुगाई कलीसिया की सभा म्ह बोल-बाल्ली रहवै, क्यूँके उन ताहीं बात करण का हुक्म कोनी, पर अधीन रहण का हुक्म सै, जिसा व्यवस्था म्ह लिख्या भी सै। 35 जै वे कीमे सिखणा चाहवै, तो घर म्ह अपने-अपने धणी तै बुझै, क्यूँके लुगाई का कलीसिया म्ह बात करणा शर्म की बात सै। 36 के पणमेशर का बचन थारै म्ह तै लिखइया सै? या सिर्फ थारै ए ताहीं पहोच्या सै?

37 जै कोए माणस अपने आप नै नब्बी या आत्मिक माणस समझै, तो न्यू जाण ले के जो बात मैं थमनै लिखूँ सूँ, वे प्रभु के हुक्म सै। 38 पर जै कोए न्यू मानै, तो उसनै भी ना मानो।

39 आखर म्ह हे भाइयो, भविष्यवाणी करण की धुन म्ह रहो अर अन्य-भाषा बोलण तै मना ना करो; 40 पर सारी बात सूर तै अर ढन्ना तै करी जावै।

### मसीह का पुनरुत्थान

15 हे भाइयो, इब मैं थमनै ओए सुसमाचार बताऊँ सूँ जो पहल्या सुणया जा चुक्या सूँ, जिस ताहीं थमनै अंगीकार भी करया था अर जिस पै थम डटे भी रहो सो। 2 उससे कै जरिये थारा उद्धार भी होवै सै, जै

उस सुसमाचार नै जो मन्त्रे थारै ताहीं सुणया था याद राखवो सो; नीं तो थारा बिश्वास करणा बेकार होया।

3 इससे कारण मन्त्रे सारया तै पहल्या थारै ताहीं वाए बात पहोचा दी, जो मेरे ताहीं पहोची थी के पवित्र ग्रन्थ के बचन के मुताबिक यीशु मसीह म्हारै पापां के खातर मारया गया, 4 अर गाड्या गया, अर पवित्र ग्रन्थ के मुताबिक तीसरे दिन जी भी उठ्या, 5 अर उस कैफा ताहीं फेर बारहां नै दिख्या। 6 फेर ओ पाँच सौयां तै आब्ल भाईयां ताहीं एक सेत्ती दिख्या, जिन म्ह तै घण-खरे तो इब ताहीं जिन्दे सै पर कीमे सो गे। 7 फेर ओ याकूब नै दिख्या फेर सारे प्रेरितां नै दिख्या। 8 सारया कै पाचै मन्त्रे भी दिख्या, जो मान्नो अधूरे दिनां का जान्या होया सूँ। 9 क्यूँके मैं प्रेरीतां म्ह सारया तै छोटळा सूँ, बल्के प्रेरित कुहवाण के जोगा भी नीं, क्यूँके मन्त्रे पणमेशर की कलीसिया ताहीं सताया था। 10 पर मैं जो कीमे भी सूँ, पणमेशर की मैहरबान्नी तै सूँ। उसकी मैहरबान्नी जो मेरे पै होई, वा बेकार नीं होई; पर मन्त्रे उन सारया तै बाध मेहनत भी करी; तौभी या मेरी ओड़ तै नीं होई पर पणमेशर की मैहरबान्नी तै जो मेरे पै थी। 11 ज्यांतै चाहे मैं सूँ, चाहे वे हों, हम योए प्रचार करां सां, अर इससे पै थमनै बिश्वास भी करया।

### म्हारा पुनरुत्थान

12 इसकरके जिब्ब के मसीह का यो प्रचार करया जावै सै के ओ मरे होया म्ह तै जी उठ्या, तो थारै म्ह तै कितने किस तरियां कहवै सै के मरे होया का पुनरुत्थान सै ए कोनी? 13 जै मरे होया का पुनरुत्थान सै ए नीं, तो मसीह भी कोनी जी उठ्या; 14 अर जै मसीह कोनी जी उठ्या, तो म्हारा प्रचार करणा बेकार सै अर थारा बिश्वास करणा भी बेकार सै। 15 बल्के हम पणमेशर के झूठे गवाह बणे; क्यूँके हमनै पणमेशर के बारे म्ह या गवाही देई के उसनै मसीह ताहीं जिन्दा करया, हलाकि नीं जिन्दा करया जै मरे होए नीं जी उठदे। 16 अर जै मुर्दे नीं जी उठदे, तो मसीह भी कोनी जी उठ्या; 17 अर जै मसीह नीं जी उठ्या, तो थारा बिश्वास बेकार सै, अर थम इब ताहीं अपने पापां म्ह फँसे सो। 18 बल्के जो मसीह म्ह सो गे सै, वे भी नास होए। 19 जै हम सिर्फ इससे जीवन म्ह मसीह तै आस राख्वां सां तो हम सारे माणसां तै घणे अभागे सां।

20 पर साच्च-ए मसीह मुर्दा म्ह तै जी उठ्या सै, अर जो सो गे सै उन म्ह ओ पहलडा फळ होया। 21 क्यूँके जिब्ब माणस के जरिये मौत आई, तो माणस ए के जरिये मरे होया का पुनरुत्थान भी आया। 22 अर जिस तरियां आदम म्ह सारे मरे सै, उससे तरियां ए मसीह म्ह सारे जिन्दे करे जावैगें, 23 पर हरेक आपणी-आपणी बारी तै: पहल्या फळ मसीह, फेर मसीह के आण पै उसके माणस। 24 इसकै बाद अन्त होगा। उस बख्त ओ सारी प्रधानता, अर सारा हक, अर सामर्थ का अन्त करके राज्य नै पणमेशर पिता के हाथ म्ह सौंप देवैगा। 25 क्यूँके जिब्ब ताहीं ओ अपने बैरियां नै अपने पायां तळै ना ले आवै, जिद ताहीं उसका राज्य करणा जरूरी सै। 26 सारया तै आखरी बैरी जो नास करया जावैगा, ओ मौत सै। 27 क्यूँके "पणमेशर नै सारा कीमे उसके पायां तळै कर दिया सै," पर जिब्ब ओ कहवै सै के सारया कीमे उसके अधीन कर दिया गया सै तो उए दिक्खै सै के जिसनै सारा कीमे उसके अधीन कर दिया, ओ आप न्यारा रहया। 28 अर जिब्ब सारा कीमे उसके अधीन हो जावैगा, तो बेडा आप भी उसके अधीन हो जावैगा, जिसनै सारा कीमे उसके अधीन कर दिया, ताके सारया म्ह पणमेशर ए सारा कीमे हो।

29 नीं तो जो माणस मरे होया के खातर बपतिस्मा लेवै सै वे के करैगें? जै मुर्दे जी उठदे ए नीं तो फेर क्यांतै उनकै खातर बपतिस्मा लेवै सै? 30 अर हम भी क्यांतै हरेक बख्त जोखम म्ह पड़े रहवां सां? 31 हे भाइयो, मन्त्रे उस घमण्ड की सोह जो म्हारै मसीह यीशु म्ह मैं थारै बारे म्ह करूँ सूँ के मैं रोज मरूँ सूँ। 32 जै मैं माणस की रीत पै इफिसुस म्ह बण-पशुओं तै लड्या तो मन्त्रे के फैयदा होया? जै मुर्दे जिन्दे नीं करे जावैगें, " तो आओ, खावो-पिवां, क्यूँके काल तो मर ए जावांगे।" 33 धोक्खा ना खाओ, "भूँडी संगति कामल चाल-चलण नै बिगाड़ देवै सै।" 34 धर्म के खातर जाग उठो अर पाप ना करो; क्यूँके कीमे इसे सै जो पणमेशर नै नीं जाणदे। मैं थमनै सर्मिन्दा करण के खातर न्यू कहूँ सूँ।

### पुनरुत्थान की देही

35 इब कोए न्यू कहवैगा, "मुर्दे किस तरियां तै जी उठै सै, अर कीसी देही कै गेल आवै सै?" 36 हे निरे बे-अकू! जो कीमे तू बोवै सै, जिब्व ताहीं ओ नीं मरै जिन्दा नीं करया जान्दा। 37 अर जो तू बोवै सै, या वा देही नीं जो पैदा होण आळी सै, पर निरा दाणा सै, चाहे गिहू का चाहे किसे और नाज का। 38 पर पणमेशर आपणी मर्जी कै मुताबिक उस नै देही देवै सै, अर हरेक बीज नै उसकी खास देही। 39 सारी देही एक जीसी कोनी; माणसां की देही न्यारी सै, डांगरां की न्यारी सै; पंछियां की देही न्यारी सै; मच्छीयां की देही न्यारी सै। 40 सुर्गीय देही सै अर धरती आळी देही भी सै। पर सुर्गीय देहीयां का तेज न्यारा सै, अर धरती आळीयां का न्यारा। 41 सूरज का तेज न्यारा सै, चाँद का तेज न्यारा सै, अर तारा के टोळां का तेज न्यारा सै, (क्यूँके एक तारै तै दुसरै तारै कै तेज म्ह फर्क सै)।

42 मुर्दा का जी उठणा भी इसा ए सैं। देही नास होण जोगी हालत म्ह बोई जावै सै अर अमर होके जी उठै सै। 43 ओ अनादर कै गेल्या बोया जावै सै, अर रोशनी कै गेल्या जी उठै सै; कमजोरी कै गेल्या बोया जावै सै, अर सामर्थ कै गेल जी उठै सै। 44 स्वभाविक देही बोई जावै सै, अर आत्मिक देही जी उठै सै: जिब्व के स्वभाविक देही सै, तो आत्मिक देही भी सै। 45 इसा ए लिख्या भी सै, के "पहलड़ा माणस, यानिके आदम जिन्दा प्राणी बणया" अर आखरी आदम, जीवन देणआळा आत्मा बणया। 46 पर पहल्या आत्मिक कोनी था पर स्वाभाविक था, इसके पाच्छे आत्मिक होया। 47 पहलड़ा माणस धरती तै यानिके माट्टी का था; दूसरा माणस सुर्गीय सै। 48 जिसा हो माट्टी का था, उस्से तरियां ए वे भी सै जो माट्टी के सै; अर जिसा ओ सुर्गीय सै, उस्से तरियां ए वे भी सै जो सुर्गीय सै। 49 अर जिसा हमनै उसका रूप धारण करया जो माट्टी का था उस्से तरियां ए उस सुर्गीय का रूप भी धारण करांगें।

50 हे भाइयो, मै न्यू कहुँ सूँ के मांस अर लहू पणमेशर के राज्य के अधिकारी नीं हो सकदे, अर ना नास होण आळा अमर के अधिकारी हो सकै सै। 51 देकखो, मै थारै तै भेद की बात कहुँ सूँ: हम सारे नीं सोवांगें, पर सारे बदल जावांगें। 52 अर यो पलभर म्ह, पलक झपकदे ए तुरही फूँकदे ए होगा। क्यूँके तुरही फूँकी जावैगी अर मुर्दे अमर हालत म्ह उटाए जावैगी, अर हम बदल जावांगें। 53 क्यूँके जरूरी सै के या नास होण आळी देही अमर नै पहर ले, अर मरण आळी देही अमरता नै पहर ले। 54 अर जिब्व या ना होण आळी अमर नै पहर लेवैगी, अर या मरण आळी अमरता नै पहर लेवैगी, फेर ओ बचन जो लिख्या सै पूरा हो जावैगा: "जीत नै मौत ताहीं नींगळ लिया। 55 हे मौत, तेरी जीत कित रही? हे मौत, तेरा डंक कित रहया?" 56 मौत का डंक पाप सै, अर पाप की ताकत व्यवस्था सै। 57 पर पणमेशर का धन्यवाद हो, जो म्हारै प्रभु यीशु मसीह कै जरिये हमनै जयवंत करै सै। 58 ज्यांतै हे मेरे प्यारे भाइयो, मजबूत अर पक्के रहो, अर प्रभु कै काम म्ह सारी हाण बधदे जाओ, क्यूँके न्यू जाणो सो के थारी मेहनत प्रभु म्ह बेकार नीं सै।

### बिश्वासियाँ कै खातर दान

16 इब उस चन्दे कै बारै म्ह जो पवित्र माणसां कै बारै म्ह करया जावै सै, जिसा हुक्म मन्ने गलतिया की कलीसियाओं ताहीं दिया, उसा ए थम भी करो। 2 हफते कै पहलड़े दिन थारै म्ह तै हरेक आपणी आमंदणी कै मुताबिक कीमे अपणै धोरै धरया के मेरै आण पै चन्दा नीं करणा नीं पड़ै। 3 अर जिब्व मै आऊँगा, तो जिन्नै थम चाहोगे उन्नै मै चिड्डीयाँ देके खन्दा हुँगा के थारा दान यरुशलैम पहाचा दे। 4 जै मेरा भी जाणा ठीक होया, तो वे मेरै गेल्या जावैगें।

### पौलुस की यात्रा का कार्यक्रम

5 मै मकिदुनिया होके थारै धोरै आऊँगा, क्यूँके मन्ने मकिदुनिया होके जाणा ए सै। 6 पर हो सकै सै के थारै उरै ए ठहर जाऊँ अर जाड्डे थारै उरै काड्डे, फेर जिस कान्नी मेरा जाणा हो उस कान्नी थम मन्ने पहाचा दियो। 7 क्यूँके मै राह म्ह थारै तै फेटणा नीं चाहन्दा; पर मन्ने आस सै के जै प्रभु चाहवै तो कीमे बखत तक थारै गेल्या रहूँगा। 8 पर मै पिन्तेकुस्त तक इफिसुस म्ह रहूँगा, 9 क्यूँके मेरै खातर ओडै एक बड्डा अर फेयदे मन्द दरवाजा खुल्या सै, अर बिरोधी घणे सै।

10 जै तीमुथियुस आ जावै, तो देखिओ के ओ थारै उरै बेखटक रहवै; क्यूँके ओ मेरै ढाळ प्रभु का काम करै सै। 11 ज्यांतै कोए उसनै तुच्छ नीं जाणै, पर उसनै राज्जी खुशी इस ओड पहाचा दिओ के मेरै धोरै आ जावै; क्यूँके मै उसकी बाट देखूँ सूँ के ओ भाईयां कै गेल आवै। 12 भाई अपुलोस तै मन्ने घणी बिनती करी सै के थारै धोरै भाईयां कै गेल्या जावै; पर उसनै इस बखत जाण की कीमे मर्जी नीं करी, पर जिब्व मौक्का देखैगा फेर आ जावैगा।

### आखरी आदेश अर अभिवादन

13 जागदे रहो, बिश्वास म्ह डटे रहो, मेहनत करो, ताकतवर बणो। 14 जो कीमे करो सो प्रेम तै करो। 15 हे भाइयो, थम स्तिफनास कै कुन्बे नै जाणो सो के वे अखया के पहलड़े फळ सैं, अर पवित्र माणसां की सेवा कै खातर तयार रहवै सैं। 16 ज्यांतै मै थारै तै बिनती करूँ सूँ के इस्यां कै अधीन रहो, बल्के हरेक के जो इस काम म्ह मेहनती अर गेल काम करणीया सैं। 17 मै स्तिफनास अर फूरतूनातुस अर अखइकुस के आण तै राज्जी सूँ, क्यूँके उन्नै थारी कमी ताहीं पूरा करया सैं। 18 उन्नै मेरी अर थारी आत्मा ताहीं चैन दिया सैं, इसकरके इस्यां नै मानो

19 आसिया की कलीसियाओं की ओड तै थारै ताहीं नमस्कार; अक्विला अर प्रिसका का अर उनकै घर की कलीसिया का भी थारै ताहीं प्रभु म्ह घणा आब्ल नमस्कार। 20 सारे भाईयां का थारै ताहीं नमस्कार। पवित्र चुम्मे तै आपस म्ह नमस्कार करो। 21 मुझ पौलुस का अपणे हाथ का लिख्या होया नमस्कार। 22 जै कोए प्रभु तै प्रेम नीं राखे तो ओ श्रापित होवै। म्हारा प्रभु आण आळा सै। 23 प्रभु यीशु की मैहरबान्नी थारै पै होन्दी रहवै। 24 मेरा प्यार मसीह यीशु म्ह थारै सारया कै गेल्या रहवै। आमीन।

## 2 कुरिन्थियों

### अभिवादन

1 पौलुस के कात्री तै जो पणमेशर की मर्जी तै मसीह यीशु का प्रेरित सै, अर भाई तीमुथियुस के कात्री तै पणमेशर की उस कलीसिया के नाम जो कुरिन्थुस म्ह सै; अर साबते अखया के सारे पवित्र माणसां के नाम।  
2 म्हारै पिता पणमेशर अर प्रभु यीशु मसीह के कात्री तै थारै ताहीं अनुग्रह अर शान्ति मिल्दी रहवै।

### पणमेशर का धन्यवाद करणा

3 म्हारै प्रभु यीशु मसीह के पणमेशर, अर पिता का धन्यवाद होवै, जो दया का पिता, अर सारी तरियां की शान्ति का पणमेशर सै। 4 ओ म्हारै सारे कलेशां म्ह शान्ति देवै सै; ताके हम उस शान्ति के कारण जो पणमेशर म्हारै ताहीं देवै सै, उन ताहीं भी शान्ति दे सकै, जो किसे तरियां के कलेशां म्ह हो। 5 क्यूँके जिस तरियां मसीह के दुःख हमनै घणे होवै सै, उरसे तरियां ए म्हारी शान्ति भी मसीह के जरिये घणी होवै सै। 6 जै हम क्लेश पावां सां, तो या थारी शान्ति अर उद्धार के खातर सै अर जै शान्ति पावां सां, तो या थारी शान्ति के खातर सै; जिस के असर तै थम धीरज के गेल्या उन कलेशां ताहीं सह लेवो सो, जिन्नै हम भी सहवां सां। 7 अर म्हारी आस थारै बारै म्ह पक्की सै; क्यूँके हमनै बेरा सै, के थम जिस तरियां तै दुखां के उरसे तरियां तै ए शान्ति के भी साइझी सो।

8 हे भाईयो, हम नीं चाहन्दे के थम म्हारै उस क्लेश तै अनजाण रहो, जो आसिया म्ह म्हारै पै पड़या, के इसे भारया बोझ तै दब गे थे, जो म्हारी सामर्थ्य तै बाहरण था, उरै ताहीं के हम जीवन तै भी हाथ धो बैट्टे थे। 9 बल्के हमनै आपणे मन म्ह समझ लिया था, के म्हारै पै मौत की आज्ञा हो ली सै के हम आपणा बिश्वास ना राकखां, बल्के पणमेशर का जो मरे होया नै जिन्दा करै सै। 10 उरसे नै म्हारै ताहीं इसी बड्डी मौत तै बचाया, अर बचावैगा; अर उस तै म्हारी आस सै, के ओ आगै ताहीं भी बचान्दा रहवैगा। 11 अर थम भी मिलके प्रार्थना के जरिये म्हारी मदद करोगे, के जो बरदान घण-खरया के जरिये हमनै मिल्या, उसके कारण घणे माणस म्हारी ओड़ तै धन्यवाद करै।

### पौलुस की यात्रा-योजना म्ह बदलाव

12 क्यूँके हम अपने विवेक की इस गवाही पै घमण्ड करां सां, के दुनिया म्ह अर खास करके थारै बिच्चाळै, म्हारा चाल-चलण पणमेशर के जोगा इसी पवित्रता अर सच्चाई सुदा था, जो देही तौर के ज्ञान तै नीं पर पणमेशर के अनुग्रह के गेल्या था। 13 हम थमनै और कीमे नीं लिखदे, सिर्फ ओ जो थम पढ्ढो, अर मात्रो भी सो, अर मन्त्रै उम्मीद सै के आखर ताहीं भी मान्दे रहोगे। 14 जिसा थारै म्ह तै कितन्यां नै मान लिया सै के हम थारै घमण्ड का कारण सां, उरसे तरियां ए थम भी प्रभु यीशु के दिन म्हारै खातर घमण्ड का कारण ठहरोगे।

15 इस्से भरोसे तै मै चाहूँ था के पहल्या थारै धोरै आऊँ के थमनै एक और दान मिलै; 16 अर थारै धोरै तै होके मकिदुनिया नै जाऊँ, अर दुबारा मकिदुनिया तै थारै धोरै आऊँ; अर थम मन्त्रै यहुदियां की ओड़ कीमे दूर ताहीं पहाचाओ। 17 तै मन्त्रै जो या मर्जी करी थीं तो के मन्त्रै उतपणा दिखाया? या जो करणा चाहूँ सूँ के देही के मुताबिक करणा चाहूँ सूँ के बात म्ह 'हाँ, हाँ करूँ अर 'ना, ना' भी करूँ? 18 पणमेशर साचा गवाह सै के म्हारै

उस बचन म्ह जो थारै तै कहया 'हाँ अर 'ना' दोन्नु नीं पाए जान्दे। 19 क्यूँके पणमेशर का बेट्टा यिशु मसीह जिसका म्हारै जरिये यानिके मरे अर सिलवानुस अर तीमुथियुस के जरिये थारै बिच्चाळै प्रचार होया, उस म्ह 'हाँ' ए 'हाँ' होई। 20 क्यूँके पणमेशर की जितने वायदे सै, वे सारे उरसे म्ह 'हाँ' के गेल्या सै। ज्यांतै उसके जरिये आमीन भी होई के म्हारै जरिये पणमेशर की महिमा होवै। 21 अर जो हमनै थारै गेल्या मसीह म्ह मजबूत करै सै, अर जिसनै म्हारा अभिषेक करया ओए पणमेशर सै, 22 जिसनै म्हारै पै छाप भी ला दी सै अर ब्याने म्ह आत्मा ताहीं म्हारै मनां म्ह दिया।

23 मै पणमेशर नै गवाह करके कहूँ सूँ के मै इब ताहीं कुरिन्थुस म्ह ज्यांतै कोनी आया, के मन्त्रै थारै पै तरस आवै था। 24 न्यू नीं के हम बिश्वास के बारे म्ह थारै पै अधिकार जताणा चाहवां सां; पर थारै आनन्द म्ह साइझी सां क्यूँके थम बिश्वास ए तै डटे रहो सो।

2 मन्त्रै अपने मन म्ह न्यू ठाण लिया था के दुबारा थारै धोरै माड्डे मन तै नै नीं आऊँ। 2 क्यूँके जै थमनै उदास करूँ, तो मन्त्रै आनन्द देणआळो कौण होवैगा, सिर्फ ओए जिस ताहीं मन्त्रै उदास करया? 3 अर मन्त्रै याए बात थारै तै ज्यांतै लिक्खी के कदे इसा ना हो के मेरै आण पै, जिन तै मन्त्रै आनन्द मिलणा चाहिये मै उन तै उदास होऊँ; क्यूँके मन्त्रै थम सारया पै इस बात का भरोसा सै के जो मेरा आनन्द सै, ओए थम सारया का भी सै। 4 बड्डे क्लेश अर मन के दर्द तै मन्त्रै घण-ए आँसू बहा-बहाके थारै ताहीं लिख्या, ज्यांतै नीं के थम उदास होवो पर ज्यांतै के थम उस बड्डे प्रेम नै जाण ल्यो, जो मन्त्रै थारै तै सै।

### अपराधी ताहीं माफ़ी

5 जै किसे नै उदास करया सै, तो मन्त्रै ए नीं बल्के (के उसके गेल्या घणी करडाई ना करूँ) थोड़ा-थोड़ा थम सारया ताहीं भी उदास करया सै। 6 इसे माणस के खातर या सजा जो भाईयां म्ह तै घणा ए नै देई, घणी सै। 7 ज्यांतै इसतै भला न्यू सै के उसका अपराध माफ़ करो अर शान्ति द्यो, ना हो के इसा माणस घणी उदासी म्ह डूब जावै। 8 इस कारण मै थारै तै बिनती करूँ सूँ के उस ताहीं अपने प्रेम का सबूत द्यो। 9 क्यूँके ज्यांतै भी लिख्या था के थमनै परख ल्युँ के थम मेरी सारी बात्तां नै मानण नै त्यार सो के नीं। 10 जिसका थम कीमे माफ़ करो सो उस ताहीं मै भी माफ़ करूँ सूँ, क्यूँके मन्त्रै भी जो कीमे माफ़ करया सै, जै करया हो, तो थारै कारण मसीह की दुनिया म्ह होके माफ़ करया सै 11 के शैतान का म्हारै पै दाँव ना चालै, क्यूँके हम उसके इराद्यां तै अनजाण कोनी।

### त्रोआस म्ह पौलुस की बेचेनी

12 जिब्व मै मसीह का सुसमाचार सुनाण नै त्रिआस आया, अर प्रभु नै मेरै खातर एक कुवाड़ खोल दिया, 13 तो मेरै मन म्ह चैन नीं मिल्या, ज्यांतै के मन्त्रै अपने भाई तीतुस ताहीं कोनी पाया; ज्यांतै उन तै बिदा होके मै मकिदुनिया नै चल्या गया।

### मसीह म्ह विजय-उत्सव

14 पर पणमेशर का धन्यवाद हो जो मसीह म्ह सारी हाण हमनै जीत के त्योंहार म्ह लिये हाँडे सै, अर अपने ज्ञान की खस्बू म्हारै जरिये हरेक जंगहा फैलावै सै। 15 क्यूँके हम पणमेशर के लवै उद्धार पाणआळ्यां अर नाश होणआळ्यां दोनुआ के खातर मसीह की खस्बू सां। 16 कितन्यां के खातर

तो मरण के कारण मौत की गन्ध, अर कितन्यां के खातर जिन्दगी के कारण जिन्दगी की खस्बू। भला इन बात्तां के जोगे कौण सै? 17 हम उन घणा ए के बरगे कोनी जो पणमेशर के बचन म्ह मिलावट करै सैं; पर मन की सच्चाई तै अर पणमेशर की ओड़ तै पणमेशर ताहीं हाजर जाणके मसीह म्ह बोलै सैं।

### नई वाचा के सेवक

3 के हम दुबारा आपणी बड़ाई करण लागे? या हमनै और माणसां की ढाळ सिफारिश की चिडीयां थारै धोरै ल्याणी या थारै तै लेणी सै? 2 म्हारी चिडी थम ए सो, जो म्हारै दिलां पै लिक्खी होई सैं अर उस ताहीं सारे माणस पिच्छाणै अर पढ़ै सैं। 3 न्यू दिखै सैं के थम मसीह की चिडी सो, जिस ताहीं हमनै सेवकां की ढाळ लिख्या, अर जो स्याही तै नीं, पर जिन्दे पणमेशर की आत्मा तै, पत्थर की पटियां पै नीं, पर दिल की मास रूपी पटियां पै लिक्खी सैं। 4 हम मसीह के जरिये पणमेशर पै इसा ए भरोस्सा राख्वां सां। 5 न्यू नीं के हम अपने आप तै इस जोगे सां के आपणी ओड़ तै किसे बात का बिचार कर सकां, पर म्हारी काबलियत पणमेशर की ओड़ तै सैं, 6 जिसनै म्हारै ताहीं नयी वाचा के सेवक होण के जोगे भी करया, शब्द के सेवक नीं बल्के आत्मा के; क्यूँके शब्द मारै सैं, पर आत्मा जिन्दा करै सैं। 7 जै मौत की वा वाचा जिसके अक्षर पत्थरां पै खोद्वे गये थे, उरै ताहीं तेजोमय होई के मूसा के मुँह पै के तेज के कारण जो घटदा भी जावै था, इस्राएली उसके मुँह पै निगाह नीं कर सकै थे, 8 तो आत्मा की वाचा और भी तेजोमय क्यांतै होवैगी? 9 क्यूँके जिब्ब कसूरवार ठहराणआळी वाचा तेजोमय थी, तो धर्मी ठहराणआळी वाचा और भी तेजोमय क्यांतै नीं होवैगी? 10 अर जो तेजोमय था, ओ भी उस तेज के कारण जो उस तै बाध तेजोमय था, कीमे तेजोमय कोनी ठहरया। 11 क्यूँके जिब्ब ओ जो घटदा जावै था तेजोमय था, तो ओ जो स्थिर रहवैगा और भी तेजोमय क्यांतै नीं होवैगा? 12 ज्यांतै इसी आस राखके हम हिम्मत के गेल्या बोल्लां सां, 13 अर मूसा की ढाळ नीं, जिसनै अपने मुँह पै पड़दा गेरया था ताके इस्राएली उस घटणआळे तेज के अन्त नै देखै। 14 पर उनकी अक्क खराब होगी, क्यूँके आज ताहीं पुराणा नियम पढ़े बख्त उनके दिलां पै ओए पड़दा पड़या रहवै सैं, पर ओ मसीह म्ह उठ जावै सैं। 15 आज ताहीं जिब्ब कदे भी मूसा की किताब पढ़ी जावै सैं, तो उनके दिलां पै पड़दा पड़या रहवै सैं। 16 पर जिब्ब कदे भी उनका दिल प्रभु के कात्री फिरैगा, फेर ओ पड़दा उठ जावैगा। 17 प्रभु तो आत्मा सै: अर जित किते प्रभु की आत्मा सै ओड़ै आजादी सैं। 18 पर जिब्ब हम सारया के उछाड़े चेहरे तै प्रभु का प्रताप इस ढाळ प्रगट होवै सैं, जिस ढाळ शीशे म्ह, तो प्रभु के जरिये जो आत्मा सै, हम उरसे तेजस्वी रूप म्ह माड़े-माड़े से करके बदलदे जावां सां।

### माट्टी के बासणां म्ह धन

4 ज्यांतै जिब्ब म्हारै पै इसी दया होई के हमनै या सेवा मिली, तो हम हिम्मत कोनी छोड़दे। 2 पर हमनै शर्म के लुकहे होए काम्मां ताहीं छोड़ दिया, अर ना श्याणपत म्ह चाल्दे, अर ना पणमेशर के बचन म्ह मिलावट करां सां; पर सच नै प्रगट करके, पणमेशर के श्यामी हरेक माणस के विवेक म्ह आपणी भलाई बिठावां सां। 3 पर जै म्हारै सुसमाचार पै पड़दा पड़ै सैं, तो यो नाश होणआळ्यां ए के खातर पड़या सैं। 4 अर उन अबिश्वासियां के खातर, जिनकी बुद्धि इस दुनिया के ईश्वर नै आँधी कर दी सैं, ताके मसीह जो पणमेशर का हुबहू रूप सैं, उसके तेजोमय सुसमाचार का चाँदणा उन पै नीं चमकै। 5 क्यूँके हम अपने नै नीं, पर मसीह यीशु नै प्रचार करां सां के ओ प्रभु सैं; अर अपने बारै म्ह न्यू कहवै सैं के हम यीशु के कारण थारै सेवक सां। 6 ज्यांतै के पणमेशर ए सैं, जिसनै कहया, “अन्धकार म्ह तै चाँदणा चमकै,” अर ओए म्हारै दिलां म्ह चमक्या के पणमेशर की महिमा की पिच्छाण का चाँदणा यीशु मसीह के चेहरे तै चमकै सैं।

7 पर म्हारै धोरै ओ धन माट्टी के बासणा म्ह धरया सैं के या घणी सामर्थ म्हारी ओड़ तै नीं, बल्के पणमेशर ए की ओड़ तै ठहरै। 8 हम चौगरदे तै क्लेश तो भोगां सां, पर संकट म्ह नीं पड़दे; म्हारै धोरै उपाय तो कोनी, पर निराश नीं होदे; 9 सताए तो जावां सां, पर छोड़ै नीं जान्दे; गिराए तो जावां

सां, पर नाश नीं होदे। 10 हम यीशु की मौत नै आपणी देही म्ह हर बख्त लिये हान्दां सां के यीशु का जीवन भी म्हारी देही म्ह प्रगट होवै। 11 क्यूँके हम जिन्दे जी सारी हाण यीशु के कारण मौत के हाथ म्ह सौंपे जावां सां के यीशु का जीवन म्हारी मरण आळी देही म्ह प्रगट होवै। 12 इस ढाळ मौत तो म्हारै पै असर गेरै सैं अर जीवन थारै पै। 13 ज्यांतै के म्हारै म्ह वाए बिश्वास की आत्मा सैं, जिसके बारै म्ह लिख्या सैं, “मन्त्रै बिश्वास करया, ज्यांतै मैं बोल्या।” आखिर म्ह हम भी बिश्वास करां सां, ज्यांतै बोल्लां सां। 14 इसकरके हमनै बेरा सैं के जिसनै प्रभु यीशु ताहीं जिन्दा करया, ओए हमनै भी यीशु म्ह साइझी जाणके जिन्दा करैगा, अर थारै गेल्या अपने श्यामी हाजर करावैगा। 15 क्यूँके सारी चीज थारै खातर सैं, ताके अनुग्रह घणा ए के जरिये आब्ल होके पणमेशर की महिमा के खातर धन्यवाद भी बढ़ावै।

16 ज्यांतै हम हिम्मत नीं छोड़दे; हालाके म्हारा बाहरला माणसपण नाश होदा जावै सैं, तौभी म्हारा भीतरला माणसपण हर रोज नया होदा जावै सैं। 17 क्यूँके म्हारा माडी-सी हाण का हल्का-सा क्लेश म्हारै खातर घणा ए जरूरी अर अनन्त महिमा पैदा करदा जावै सैं; 18 अर हम तो देखी होई चिज्जां ताहीं नीं पर अनदेखी चिज्जां नै देखे रहवां सां; क्यूँके देखी होई चीज माड़े-से दिन की सैं, पर अनदेखी चीज सारी हाण बणी रहवै सैं।

### म्हारा स्वर्गीय घर

5 क्यूँके हमनै बेरा सैं के जिब्ब म्हारी धरती पै का डेरा-सरीखा घर गेरया जावैगा, तो हमनै पणमेशर के कात्री तै सुर्ग पै एक इसा महल मिलैगा जो हाथां तै बणया होया घर नीं, पर सारी हाण खातर टिकाऊ सैं। 2 इस म्ह तो हम कराहवा अर बड्डी चाहन्ना राख्वां सां के अपने सुर्गीय घर नै पहर ल्या 3 के इसके पहरण तै हम उछाड़े ना पाए जावां। 4 अर हम इस डेरे म्ह रहन्दे होए बोझ तै दबे रीगदे रहवां सां, क्यूँके हम उतारणा नीं बल्के और पहरणा चाहवां सां, ताके ओ जो मरणहार सैं जीवन म्ह डूब जावै। 5 जिसनै म्हारै ताहीं इस्से बात के खातर तयार करया सैं ओ पणमेशर सैं, जिसनै म्हारै ताहीं ब्याने म्ह आत्मा भी दिया सैं।

6 आखर म्ह हम सारी हाण धीरज धरे रहवां सां अर या जाणां सां के जिब्ब ताहीं हम देही म्ह रहवां सां, जिद ताहीं प्रभु तै न्यारे सां---- 7 क्यूँके हम रूप नै देखके नीं, पर बिश्वास तै चाल्लां सां---- 8 ज्यांतै हम ढेठ राखके राख्वां सां, अर देही तै न्यारे होके प्रभु के गेल्या रहणा और भी घणा बढ़िया समझां सां। 9 इस कारण म्हारै मन की उमंग या सैं के चाहे गेल रहवां चाहे न्यारे रहवां, पर हम उसनै भान्दे रहवां। 10 क्यूँके जरूरी सैं के हम सारया का हाल मसीह के न्याय आसण के श्यामी खुल जावै, के हरेक माणस अपने-अपने आच्छे-भुन्डे काम्मां का बदला जो उसनै देही के जरिये करे हो पावै।

### पणमेशर तै मेल-मिलाप

11 ज्यांतै प्रभु का भय मानके हम माणसां ताहीं समझावां सां; पर पणमेशर पै म्हारा हाल प्रगट सैं, अर मेरी आस या सैं के थारै विवेक पै भी प्रगट होया होगा। 12 हम फेर भी आपणी बड़ाई थारै श्यामी कोनी करदे, बल्के हम अपने बारै म्ह थारै ताहीं घमण्ड करण का मौक्का देवां सां के थम उन्नै जबाब दे सको, जो मन पै नीं बल्के दिखावटी बात्तां पै घमण्ड करै सैं। 13 जै हम बेसुध सां तो पणमेशर के खातर, अर जै होश म्ह सा तो थारै खातर सां। 14 क्यूँके मसीह का प्रेम हमनै मजबूर कर देवै सैं; ज्यांतै के हम न्यू समझां सां के जिब्ब एक सारया के खातर मरया तो सारे मरगे। 15 अर ओ इस कारण सारया के खातर मरया के जो जिन्दे सैं, वे आगै नै अपने खातर कोनी जीवै पर उसके खातर जो उनके खातर मरया अर दुबारा जिन्दा उठ्या।

### मसीह म्ह नई सृष्टि

16 आखर म्ह इब पाच्छै हम किसे ताहीं देही के मुताबिक नीं समझां। हालाके हमनै मसीह ताहीं भी देही के मुताबिक जाणया था, तौभी इब पाच्छै उस ताहीं भी इस तरियां नीं जाणां। 17 ज्यांतै जै कोए मसीह म्ह सैं तो ओ नयी सृष्टि सैं: पुराणी बात बीतग्यी सैं; लखाओ, सारी बात नयी होगी सैं। 18 ये सारी बात पणमेशर की ओड़ तै सैं, जिसनै मसीह के जरिये अपने

गेल्या म्हारा मेल-मिलाप कर लिया, अर मेल-मिलाप की सेवा म्हारै ताहीं सोंप दी सै। 19 यानिके पणमेशर नै मसीह म्ह होकै अपणे गेल्या दुनिया का मेल-मिलाप कर लिया, अर उनके अपराधां का दोष उन पै नी लाया, अर उसनै मेल-मिलाप का बचन म्हारै ताहीं सोंप दिया सै।

20 ज्यांतै, हम मसीह के राजदूत सां; मान्त्रो पणमेशर म्हारै जरिये बिनती कर रहया सै। हम मसीह की ओड़ तै निवेदन करां सां के पणमेशर कै गेल्या मेल-मिलाप कर ल्यो। 21 जो पाप तै अनजाण था, उस्से ताहीं उसनै म्हारै खातर पाप ठहराया के हम उस म्ह होकै पणमेशर की धार्मिकता बण जावां।

6 हम जो पणमेशर कै गेल काम करणीयें सां या भी समझावां सां के उसकी अनुग्रह जो थारै पै होया, उसनै बेकार ना जाण द्यो। 2 क्यूँके ओ तो कहवै सै, “आपणी खुशी के बखत मन्त्रे तेरी सुण ली, अर उद्धार कै दिन मन्त्रे तेरी मदद करी।” देखो, इब्बे ओ खुशी का बखत सै; देखो, इब्बे ओ उद्धार का दिन सै। 3 हम किसे बात म्ह ठोकर खाण का कोए भी मौक्का कोनी देन्दे ताके म्हारी सेवा पै कोए दोष ना आवै। 4 पर हरेक बात म्ह पणमेशर के सेवकां कै ढाळ अपणे आच्छे लखणा नै दिखाओ, घणै धर्य तै, क्लेशां तै, संकटां तै, 5 कोरडे खाण तै, कैद होण तै, रोळे-रब्दयां तै, मेहनत तै, जागदे रहण तै, ब्रत करण तै, 6 पवित्रता तै, ज्ञान तै, धीरज तै, कृपालुपण तै, पवित्र आत्मा तै, 7 साच्चे प्रेम तै, सच कै बचन तै, पणमेशर की सामर्थ तै, धार्मिकता के हथियारां तै जो सोळे-ओळे हाथां म्ह सै, 8 आदर-मान अर बेईज्जती तै, बदनाम अर सुनाम तै। हालाकि भकाणआळे जिसे लागै सै तौभी साच्चे सां; 9 अनजाणा कै बरगे सां, तौभी मसूर सां; मरे होए बरगे सां अर देखो जिन्दे सां; मार खाणआळ्यां कै बरगे सां पर जी तै कोनी मारे जान्दे; 10 दुःख करण आळ्यां कै बरगे सां, पर सारी हाण आनन्द करां सां; कंगालां कै बरगे सां, पर घण-खरया नै साहूकार बणा देवां सां; इसे सा जिस ढाळ म्हारै धोरै कीमे कोनी तौभी सारा कीमे राख्वां सां।

11 हे कुरिन्थियों, हमनै खुलकै थारै तै बात करी सै, म्हारा दिल थारी कात्रो खुल्या होया सै। 12 थारै खातर म्हारै मन म्ह कोए झिझक कोनी, पर थारै ए मनां म्ह झिझक सै। 13 पर अपणे बाळक जाणकै थारै तै कहुँ सूँ के थम भी उसकै बदले म्ह आपणा दिल खोल द्यो।

### असमान जुए म्ह मतना जुतो

14 अबिश्वासीयां कै गेल्ली बिना जोट के जुए म्ह ना जुतो, क्यूँके धार्मिकता अर अधर्म का के मेलजोल? या चाँदणै अर अन्धकार की के संगति? 15 अर मसीह का बलियाल कै गेल के लाड? या बिश्वासी कै गेल्या अबिश्वासी का के नाता? 16 अर मूर्तियां कै गेल्या पणमेशर कै मन्दर का के सम्बन्ध? क्यूँके हम तो जिन्दे पणमेशर के मन्दर सां; जिसा पणमेशर नै कहया, “मै उनम्ह बसूँगा अर उन म्ह हान्डया-फिरया करूँगा; अर मै उनका पणमेशर होऊँगा, अर वे मेरे माणस होवेंगे।” 17 ज्यांतै प्रभु कहवै सै, “उनकै बिचाळै तै लिक्डो अर न्यारे रहो; अर शुद्ध चिजां नै मतना छुओ, तो मै थमनै अपणाऊँगा; 18 अर मै थारा बाप होऊँगा, अर थम मेरे बेटे अर बेटियां होओगे। यो सारया तै ठाड्डा प्रभु का बचन सै।

7 आखर म्ह हे प्यारो, जिब्व के ये वादे हमनै मिले सै, तो आओ, हम अपणे आप ताहीं देही अर आत्मा के सारे मैल तै शुद्ध करां, अर पणमेशर का भय राखदे होए पवित्रता नै सिद्ध करां।

### पौलुस का आनन्द

2 हमनै अपणे दिल म्ह जंगहा द्यो। हमनै ना किसे गेल्या जुल्म करया, ना किसे ताहीं बिगाडयां, अर ना किसे ताहीं ठग्या। 3 मै थमनै कसूरवार ठहराण कै खातर न्यू नी कहन्दा। क्यूँके मै पहल्या ए तै कह चुक्या सूँ के थम म्हारै दिल म्ह इसे बसगे सो के हम थारै गेल्या मरण जिण कै खातर त्यार सां। 4 मै थारै तै घणी हिम्मत कै गेल्या बोल्लण लागरया सूँ, मन्त्रे थारै पै घणा घमण्ड सै; मै शान्ति तै भरया सूँ। अपणे सारे क्लेश म्ह मै आनन्द तै घणा भरपूर रहुँ सूँ।

5 क्यूँके जिब्व हम मकिदुनिया म्ह आये, फेर भी म्हारी देही नै चैन कोनी मिल्या, पर हम चौगरदे तै क्लेश पावां थे; बाहरण रोळे थे, भीत्तर डरावणी

बात थी। 6 तौभी दोनुआ ताहीं शान्ति देणआळे पणमेशर नै तीतुस के आण तै पर उसकी उस शान्ति तै भी, जो उस ताहीं थारी ओड़ तै मिली थी।

7 उसनै थारी लालसा, थारे दुःख, अर मेरै खातर थारी धुन की खबर म्हारै ताहीं सुणायी, जिसतै मन्त्रे और भी आनन्द होया। 8 क्यूँके हालाकि मन्त्रे आपणी चिड्डी तै थारै ताहीं दुखी करया, पर उसतै पछतान्दा कोनी जिसा के पहल्या पछताऊँ था, क्यूँके मै देखूँ सूँ के उस चिड्डी तै थारै ताहीं दुःख तो होया पर ओ माडी वार खातर था। 9 इब मै राजी सूँ पर ज्यांतै नी के थारै ताहीं दुःख पहाच्या, बल्के ज्यांतै के थमनै उस दुःख के कारण मन फिराया, क्यूँके थारा दुःख पणमेशर की मर्जी के मुताबिक था के म्हारी ओड़ तै थमनै किसे बात का नुकसान ना पहाचै। 10 क्यूँके पणमेशर-भगति का दुःख इसा पछतावा पैदा करै सै जिसका नतीजा उद्धार सै अर फेर उसतै पछताणा नी पडदा। पर संसारी दुःख मौत पैदा करै सै। 11 आखर म्ह देखो, इस्से बात तै के थमनै पणमेशर-भगति का दुःख होया थारै म्ह कितना हौसला अर जबाबदारी अर रिस, अर भय, अर लालसा, अर धुन अर सजा देण का बिचार पैदा होया? थमनै सारी तरियां तै न्यू सिद्ध कर दिखाया के थम इस बात म्ह बेकसूर सो। 12 फेर मन्त्रे जो थारै धोरै लिख्या था, ओ ना तो उसकै कारण लिख्या जिसनै जुल्म करया अर ना उसकै कारण जिस पै जुल्म करया गया, पर ज्यांतै के थारा हौसला जो म्हारै खातर सै, ओ पणमेशर कै श्यामी थारै पै दिख जावै। 13 ज्यांतै हमनै शान्ति मिली।

म्हारी इस शान्ति कै गेल्या तीतुस कै आनन्द कै कारण और भी आनन्द होया क्यूँके उसका जी थम सारया कै कारण हरया-भरया हो गया सै। 14 क्यूँके जै मन्त्रे उसकै श्यामी थारै बारै म्ह कीमे घमण्ड दिखाया, तो सर्मीन्दा कोनी होया, पर जिसा हमनै थारै तै सारी बात साच्ची-साच कह दी थी, उस्से तरियां ए म्हारा घमण्ड दिखाणा तीतुस कै श्यामी भी साच्चा लिक्डया। 15 जिब्व उस ताहीं थम सारया के आज्ञाकारी होण की याद आवै सै के किस ढाळ थमनै डरदे अर काम्बदे होए उसतै भेंट करी; तो उसका प्यार थारी ओड़ और भी बधदा जावै सै 16 मै आनन्द करूँ सूँ क्यूँके मन्त्रे हरेक बात म्ह थारै पै पूरा भरोस्सा सै।

### उदारतापूर्वक दान देणा

8 इब्ब हे भाईयो, हम थमनै पणमेशर के उस अनुग्रह की खबर देवां सां जो मकिदुनिया की कलीसियायां पै होया सै। 2 के क्लेश की बड्डी परीक्षा म्ह उनके बड्डे आनन्द अर घणी कंगाली म्ह उनकी उदारता घणी बधगी। 3 उनके बारै म्ह मेरी या गवाही सै, के उन्त्रे आपणी सामर्थ भर बल्के सामर्थ तै भी बाहरण, मन तै दिया। 4 अर इस दान म्ह अर पवित्र माणसां की सेवा म्ह साइझी होण कै अनुग्रह कै बारै म्ह, म्हारै तै बार-बार घणी बिनती करी, 5 अर जिसी हमनै आस करी थी, उसी ए नी बल्के उन्त्रे प्रभु ताहीं, फेर पणमेशर की मर्जी तै म्हारै ताहीं भी अपणे आप ताहीं दे दिया। 6 ज्यांतै हमनै तीतुस ताहीं समझाया के जिसा उसनै पहल्या सरुआत करया था, उसा ए थारै बिचाळै इस दान कै काम ताहीं पूरा भी कर लेवै। 7 ज्यांतै जिसा थम हरेक बात म्ह यानिके बिश्वास, बचन, ज्ञान अर सारी ढाळ की कोशिश म्ह, अर उस प्रेम म्ह जो म्हारै तै राख्खो सो, बढदे जाओ सो, उस्से तरियां ए इस दान कै काम म्ह भी बढदे जाओ।

8 मै आज्ञा की रीत पै तो नी, पर दुसरयां कै हौसले तै थारै प्रेम की सचाई नै परखण कै खातर कहुँ सूँ। 9 थम म्हारै प्रभु यीशु मसीह कै अनुग्रह नै जाणो सो के ओ साहूकार होकै भी थारै खातर कंगाल बण गया, ताके उसकै कंगाल हो जाण तै थम साहूकार हो जाओ। 10 इस बात म्ह मेरी सलाह याए सै : यो थारै खातर आच्छा सै, जो एक साल तै ना तो सिर्फ इस काम नै करण ए म्ह, पर इस बात कै चाहण म्ह भी पहल्दे होए थे, 11 ज्यांतै इब यो काम पूरा करो के जिसा मर्जी करण म्ह थम त्यार थे, उसा ए आपणी-आपणी पूंजी कै मुताबिक पूरा भी करो। 12 क्यूँके जै मन की त्यारी हो तो दान उसकै मुताबिक अपणाया भी जावै सै जो उसकै धोरै सै, ना के उसकै मुताबिक जो उसकै धोरै कोनी। 13 न्यू नी के दुसरयां नै चैन अर थारै ताहीं क्लेश मिलै, 14 पर बराबरी के बिचार तै इस बखत थारी बढदी उनकी घटी म्ह काम आवै, ताके उनकी बढदी भी थारी घटी म्ह काम आवै के बराबरी हो जावै।

15 जिसा लिख्या सै, "जिसनै घणा कट्टा करया उसका कीमे घणा नीं लिकड़या। अर जिसनै घाट कट्टा करया उसका कीमे कम कोनी लिकड़या।"

### तीतुस अर उसके गेल-काम करणीयें

16 पणमेशर का धन्यवाद होवै, जिसनै थारै खातर ओए हौसला तीतुस कै दिल म्ह गेर दिया सै 17 के उसनै म्हारा समझाणा मान लिया बल्के घणा हौसला करके ओ आपणी मर्जी तै थारै धोरै गया सै। 18 हमनै उसके गेल्या उस भाई ताहीं भी खन्दाया सै जिसका नाम सुसमाचार कै बारै म्ह सारी कलीसिया म्ह फैलया होया सै; 19 अर इतना ए नीं, पर ओ कलीसिया कै जरिये ठहराया भी गया के इस दान कै काम कै खातर म्हारै गेल्या जावै। हम या सेवा ज्यांतै करां सां के प्रभु की महिमा अर म्हारै मन की तयारी दिख जावै। 20 हम इस बात म्ह चौकस रहवां सां के इस उदारता कै काम कै बारै म्ह जिसकी सेवा हम करां सां, कोए म्हारै पै तोहमन्द ना लाण पावै। 21 क्यूँके जो बात सिर्फ प्रभु ए के लोवै नीं, पर माणसां के लोवै भी भली सै हम उनकी फिक्र करां सां। 22 हमनै उसके गेल्या अपने भाई ताहीं भी खन्दा दिया सै, जिस ताहीं हमनै बार-बार परख कै घणी बात्तां म्ह हौसलै आळा पाया सै; पर इब थारै पै उसनै घणा भरोस्सा सै, इस कारण ओ और भी घणा हौसलै आळा सै। 23 जै कोए तीतुस के बारै म्ह बुझे, तो ओ मेरा ढब्बी अर थारै खातर मेरा गेल-काम करणीया सै; अर जै म्हारै भाईयां के बारै म्ह बुझे, तो वे कलीसियायां के खन्दाए होइ अर मसीह की महिमा सै। 24 आखर म्ह आपणा प्रेम अर म्हारा ओ घमण्ड जो थारै बारै म्ह सै कलीसियायां कै श्यामी सिद्ध करके उन्नै दिखाओ।

### साथी-मसिहियाँ के खातर मदद

9 इब उस सेवा के बारै म्ह जो पवित्र माणसां के खातर करी जावै सै, मन्त्रै थारै ताहीं लिखणा जरूरी नीं। 2 क्यूँके मै थारै मन की तयारी नै जाणुं सूँ, जिसके कारण मै थारै बारै म्ह मकिदुनियावासियां के श्यामी घमण्ड दिखाऊँ सूँ, के अख्या के माणस एक साल तै तयार होए सै, अर थारै हौसले नै अर घण-खरया ताहीं भी उभारया सै। 3 पर मन्त्रै भाईयां ताहीं ज्यांतै खन्दाया सै के हमनै जो घमण्ड थारै बारै म्ह दिखाया, ओ इस बात म्ह बेकार ना ठहरै; पर जिसा मन्त्रै कहया उसा ए थम तयार रहो, 4 इसा ना हो के जै कोए मकिदुनियावासी मेरै गेल्या आवै अर थमनै तयार नीं पावै, तो हो सकै सै के इस भरोस्से के कारण हम (न्यू नीं कहन्दे के थम) सर्मीन्दा होवो। 5 ज्यांतै मन्त्रै भाईयां तै या बिनती करणा जरूरी समझया के वे पहलया तै थारै धोरै जावै, अर थारी उदारता का फळ जिसके बारै म्ह पहलया तै बचन दिया गया था, तयार कर राखवै, के यो दाब तै नीं पर उदारता कै फळ कै बरगा तयार होवै।

### दान किस तरियां देवां

6 पर बात या सै : जो माड़ा-सा बोवै सै, ओ माड़ा-सा काट्टेगा भी; अर जो आब्ल बोवै सै, ओ आब्ल काट्टेगा। 7 हरेक माणस जिसा मन म्ह ठाणै उसा ए दान करै; ना कुढ़-कुढ़ के अर मन म्ह दाब तै, क्यूँके पणमेशर राजी होके देण आळे तै प्रेम राखवै सै। 8 पणमेशर सारी ढाळ का अनुग्रह थमनै भोत-ए घणा दे सकै सै जिस तै हरेक बात म्ह अर हरेक बख्त, सारा कीमे, ओ थमनै जरूरी हो, थारै धोरै रहवै; अर हरेक भले काम के खातर थारै धोरै घणा कुछ होवै। 9 जिसा लिख्या सै, "उसनै खिंडाया, उसनै कंगालां ताहीं दान दिया, उसका धर्म सारी हाण बणया रहवैगा।" 10 आखर म्ह जो बोणआळे नै बीज अर खाण के खातर रोटी देवै सै, ओ थमनै बीज देवैगा, अर उस ताहीं फळ तै भरैगा; अर थारै धर्म के फळां नै बढ़ावैगा। 11 थम हरेक बात म्ह सारी ढाळ की उदारता कै खातर जो म्हारै जरिये पणमेशर का धन्यवाद करवावै सै, साहूकार करे जाओ। 12 क्यूँके इस सेवा के पूरा करण तै ना सिर्फ पवित्र माणसां की जरूत पूरी होवै सै, पर माणसां की ओइ तै पणमेशर का भी घणा धन्यवाद होवै सै। 13 क्यूँके इस सेवा नै सबूत मानके वे पणमेशर की महिमा दिखावै सै के थम मसीह के सुसमाचार नै मानके उसके आसरै रहो सो, अर

उनकी अर सारया की मदद करण म्ह उदारता दिखाओ सो। 14 अर वे थारै खातर प्रार्थना करै सै; अर ज्यांतै के थारै पै पणमेशर का घणा-ए अनुग्रह सै, थारी चाहन्ना करदे रहवां सां। 15 पणमेशर का, उसके उस दान कै खातर जो ब्यान तै बाहरण सै, धन्यवाद होवै।

### पौलुस का अधिकार

10 मै ओए पौलुस जो थारै श्यामी दीन सूँ पर पीठ पाच्छै थारी ओइ हिम्मत करूँ सूँ, थमनै मसीह की नरमी अर कोमलपणै के कारण समझाऊँ सूँ। 2 मै या बिनती करूँ सूँ के थारै श्यामी मन्त्रै बिना डरे हिम्मत करणा ना पड़े, जिसा मै कीमे माणसां पै जो म्हारै ताहीं देही कै मुताबिक चालणआळे समझै सै, हिम्मत दिखाण का बिचार करूँ सूँ। 3 क्यूँके ऊँतो हम देही तौर तै हॉन्डा-फिरां सां, तौभी देही कै मुताबिक कोनी लडदे। 4 क्यूँके म्हारे रोळे के हथियार देही तौर के कोन्या, पर गदां ताहीं ढा देण कै खातर पणमेशर कै जरिये सामर्थी सै। 5 ज्यांतै हम ख्याली-पक्वाना का अर हरेक ऊँची बात्तां का, जो पणमेशर की पिच्छाण कै बिरोध म्ह उठै सै, मानण तै नाट्टां सां; अर हरेक भावना ताहीं कैद करके मसीह का आज्ञाकारी बणा देवां सां, 6 अर तयार रहवां सां के जिब्व थारा आज्ञापालन पूरा हो जावै, तो हरेक ढाळ के हुकम ना मानण नै सजा देवां।

7 थम उन्ने बात्तां ताहीं देखो सो, जो आँखां कै श्यामी सै। जै किसे ताहीं अपने पै यो भरोस्सा हो के मै मसीह का सूँ, तो ओ न्यु भी जाण लेवै के जिसा ओ मसीह का सै उसा ए हम भी सां। 8 क्यूँके जै मै उस हक्क के बारै म्ह और भी घमण्ड दिखाऊँ, जो प्रभु नै थारै बिगाड़ण कै खातर नीं पै बनाण के खातर म्हारै ताहीं दिया सै, तो सर्मीन्दा नीं होऊँगा। 9 या मै ज्यांतै कहूँ सूँ के चिट्ठियाँ कै जरिये थमनै डराणआळा ना ठहरूँ 10 क्यूँके वे कहवै सै, "उसकी चिट्ठी तो गम्भीर अर असरदार सै; पर जिब्व ओ श्यामी होवै सै, तो ओ देही का कमजोर अर बोल्लण म्ह माड़ा जाण पड़े सै।" 11 जो इसा कहवै सै, ओ न्यु समझ लेवै के जिसा पीठ पाच्छै चिट्ठियाँ म्ह म्हारे बचन सै, उस्से तरियां ए थारै श्यामी म्हारे काम भी होवैंगे। 12 क्यूँके म्हारै म्ह या हिम्मत कोनी के हम अपने आप ताहीं उन म्ह तै इसे कितन्यां ए कै गेल्या गिणया या उनतै अपने आप नै मिलावां, जो आपणी बड़ाई खुद करै सै, अर अपने आप ताहीं आपस म्ह नाप-तौलके एक-दुसरे तै मिलाण करके बावळे ठहरावै सै।

13 हम तो हद तै बाहरण घमण्ड कट्टे भी नीं करांगे, पर उस्से हद ताहीं जो पणमेशर नै म्हारै खातर ठहरा दी सै, अर उस म्ह थम भी आग्ये सो, अर उस्से कै मुताबिक घमण्ड भी करांगे। 14 क्यूँके हम आपणी हद तै बाहरण अपने आप ताहीं बढ़ाणा नीं चाहंदे, जिसा के थारै ताहीं ना पहोचाण की हालत म्ह होवै, बल्के मसीह का सुसमाचार सुणान्दे होए थारै ताहीं पहोच लिए सां। 15 अर हम हद तै बाहरण दुसरयां की मेहनत पै घमण्ड नीं करदे; पर हमनै आस सै के ज्यों-ज्यों थारा बिश्वास बधदा जावैगा त्यों-त्यों हम आपणी हद कै मुताबिक थारै कारण और भी बधदे जावांगे, 16 ताके हम थारी सीमा तै आगे सरकके सुसमाचार सुणावां, अर न्यु नीं के हम दुसरयां की हद कै भीत्तर बणे बणाए काम्मां पै घमण्ड करां। 17 पर जो घमण्ड करै, ओ प्रभु पै घमण्ड करै। 18 क्यूँके जो आपणी बड़ाई करै सै ओ नीं, पर जिसकी बड़ाई प्रभु करै सै, ओए अपनाया जावै सै।

### पौलुस अर झुडे प्रेरित

11 जै थम मेरी माडी-सी बेअकूी नै सह लेंदे तो के भला ए होंदा; हम्बै, मेरी सह भी ल्यो सो। 2 क्यूँके मै थारै बारै म्ह ईश्वरीय धुन लाए रहूँ सूँ, ज्यांतै मन्त्रै एक ए माणस तै थारी बात लाई सै के थमनै पवित्र कुवारी की तरियां मसीह ताहीं सौंप दूँ। 3 पर मै डरूँ सूँ के जिस तरियां तै साप नै आपणी श्याणपत तै हव्वा ताहीं भकाया, उस्से तरियां ए थारै मन उस सिधाई अर पवित्रता तै जो मसीह कै गेल्या होणी चाहिये, कट्टे बिगाड़े नीं जावै। 4 जै कोए थारै धोरै आके किसे दुसरे यीशु का प्रचार करै, जिसका प्रचार हमनै नीं करया; या कोए और आत्मा थमनै मिलै, जो पहलया ना फेट्या था; या और कोए सुसमाचार सुणावै जिस ताहीं थमनै पहलया नीं मान्या था, तो थारा सहणा सई होंदा। 5 मै तो समझूँ सूँ के मै किसे बात म्ह



बड्डे तै बड्डे प्रेरितां तै घाट नीं सूं। 6 जै मै बोल्लण मै अनाडी सूं, तौभी ज्ञान म्ह कोनी। हमनै इस ताहीं हरेक बात म्ह सारी तरियां तै थारै खातर प्रगट करया सै।

7 के इस म्ह मन्ने कीमे पाप करया के मन्ने थारै ताहीं पणमेशर का सुसमाचार फ्री-फण्ड म्ह सुणाया; अर अपने आप ताहीं नै निचा करया के थम ऊँचे हो जाओ? 8 मन्ने दूसरी कलीसियायां ताहीं लूट्या, यानिके मन्ने उन तै मजदूरी लेई ताके थारी सेवा करूँ। 9 अर जिब्व मै थारै गेल्या था अर मेरै घाट्टा होया, तो मन्ने किसे पै बोझ नीं गेरया, क्यूँके भाईयां नै मकिदुनिया तै आकै मेरै घाट्टे नै पूरा करया; अर मन्ने हरेक बात म्ह अपने आप थारै पै बोझ बनण तै रोक्या, अर रोक्के राखूँगा। 10 जै मसीह की सच्चाई मेरै म्ह सै तो अखया देश म्ह कोए मन्ने इस घमण्ड तै नीं रोक्केगा। 11 ज्यांतै? ज्यांतै के पणमेशर नै न्यू बेरा सै के मै प्रेम राखूँ सूं।

12 पर जो मै करूँ सूं, ओए करदा रहूँगा के जो माणस दाँव टोहवै सै उन्ने मै दाँव पाण नीं हूँ, ताके जिस बात म्ह वे घमण्ड करै सै, उस म्ह वे म्हारै ए बर्रो ठहरें। 13 क्यूँके इसे माणस झूठे प्रेरित, अर छळ तै काम करणआळे, अर मसीह के प्रेरितां का रूप धरणआळे सैं। 14 या कीमे अचम्भे की बात कोनी क्यूँके शैतान आप भी चाँदणैआळे सुर्गदुत का रूप धरण करै सै। 15 इसकरकै जै उसकै सेवक भी धर्म के सेवकां का सा रूप धरै, तो कोए बड्डी बात कोनी, पर उनका अन्त उनकै काम्मां के मुताबिक होवैगा।

### प्रेरित कै रूप म्ह पौलुस का दुःखभोग

16 मै फेर कहुँ सूं के, कोए मन्ने बेअक्का ना समझै, नीं तो बेअक्का ए सोच कै मेरी सहल्यो, ताके माडा-सा मै भी घमण्ड कर सकूँ। 17 इस बेधड़क घमण्ड म्ह जो कीमे मै कहुँ सूं, ओ प्रभु की आज्ञा के मुताबिक, जै नीं मान्ना, तो न्यू मान ल्यो के बेअक्की म्ह ए कहुँ सूं। 18 जिब्व के घण-खरे माणस देही के मुताबिक घमण्ड करै सैं, तो मै भी घमण्ड करूँगा। 19 थम तो श्याणे होकै खुशी तै बेअक्का की सह लेवो सो। 20 क्यूँके जिब्व थमनै कोए गुलाम बना लेवै सै, या खा जावै सै, या फँसा लेवै सै, या अपने आप नै बड्डा बणावै सै, या थारै मुँह पै रैट मारै सै, तो थम सह लेवो सो। 21 मेरा कहणा अनादर ए की रीत पै सैं, मान्ना हम इसकै बारै कमजोर से थे।

पर जिस किसे बात म्ह कोए हिम्मत करै सैं---मै बेअक्की तै कहुँ सूं---तो मै भी हिम्मत करूँ सूं। 22 के वैए इब्रानी सैं? मै भी सूं। के वैए इस्पाएली सैं? मै भी सूं। के वैए अब्राहम की ऊलाद सैं? मै भी सूं। 23 के वैए मसीह के सेवक सैं---मै बेअक्का के तरियां कहुँ सूं---मै उनतै बाध सूँ घणी मेहनत करण म्ह; बार-बार कैद होण म्ह; कोरडे खाण म्ह; बार-बार मौत का जोखम ठाण म्ह। 24 पाँच बर मन्ने यहुदियाँ के हाथ तै उन्तालीस-उन्तालीस कोरडे खाए। 25 तीन बर मन्ने बैत खाई; एक बर मेरै पै पत्थर बरसाए गये; तीन बर जहाज, जिसन पै चढ़या था, टूट गए; एक दिन-रात मन्ने समुन्दर म्ह काट्या। 26 मै बार-बार सफरां म्ह; नदियाँ के जोख्मां म्ह; डाकुआ के जोख्मां म्ह; अपने जातआळ्यां तै जोख्मां म्ह; गैर-जात्तां तै जोख्मां म्ह; नगरां के जोख्मां म्ह; जंगळा के जोख्मां म्ह; समुन्दरां के जोख्मां म्ह; झूठे भाईयां के बिचाळै जोख्मां म्ह रहया। 27 मेहनत अर संकट म्ह; बार-बार जागदे रहण म्ह; भूख्वा-तिसाया; बार-बार ब्रत करण म्ह; जाड्डे म्ह; उघाडे रहण म्ह; 28 और दूसरी बात्तां नै छोड़कै जिनका ब्यान मै नीं कर सकदा, सारी कलीसियायां की फिक्र रोज मन्ने दाबै सैं। 29 किसकी कमजोरी तै मै कमजोर नीं होंदा? किसकै ठोकर खाण तै मेरा जी नीं दुःखदा?

30 जै घमण्ड करणा जरूरी सै, तो मै आपणी कमजोरी की बात्तां पै घमण्ड करूँगा। 31 प्रभु यीशु का पणमेशर अर बाप जो सारी हाण धन्य सैं, जाणै सै के मै झूठ नीं बोल्टा। 32 दमिश्क म्ह अरितास राजा की ओड़ तै जो अधिकारी था, पहरा बिठा राख्या था, 33 अर मै टोकरै म्ह झँकी तै होकै भीत पै तै तारया गया, अर उसकै हाथ तै बच लिकड़या।

### पौलुस का दिव्य दर्शन अर दुर्बलता

12 ऊँतै घमण्ड करणा मेरै खातर सई कोनी तौभी करणा पडै सै; ज्यांतै मै प्रभु के दिए होए दर्शनां अर प्रकाशनां का जिक्र करूँगा।

2 मै मसीह म्ह एक माणस नै जाणु सूं; चौदहा साल हो लिए के ना बेरा देही सुदा, ना बेरा बिना देही, पणमेशर नै बेरा सै; इसा माणस तीसरे सुर्ग म्ह ठा लिया गया। 3 मै इसै माणस नै जाणु सूं ना बेरा देही सुदा, ना बेरा बिना देही, पणमेशर ए नै बेरा सै 4 के सुर्ग लोक पै ठा लिया गया, अर इसी बात सुणी जो कहण की कोनी; अर जिनका मुँह पै लाणा माणस ताहीं सई कोनी। 5 इसै माणस पै तो मै घमण्ड करूँगा, पर अपने पै आपणी कमजोरियां नै छोड़, अपने बारै म्ह घमण्ड नीं करूँगा। 6 क्यूँके जै मै घमण्ड करणा चाहूँ भी तो बेअक्का नीं बणुगाँ, क्यूँके साच्ची बोल्लूँगा; तौभी रुक जाऊँ सूं, इसा ना होवै के जिसा कोए मन्ने देखे सै या मन्ने सुणे सै, मन्ने उसतै बाध समझै। 7 ज्यांतै के प्रकाशनां के आब्लपणे तै च्योड़ म्ह नीं आ जाऊँ, मेरी देही म्ह काण्डा चुभाया, यानिके शैतान का दूत के मन्ने घुस्से मारे ताके मै च्योड़ म्ह नीं आ जाऊँ। 8 इसकै बारै म्ह मन्ने प्रभु तै तीन बर बिनती करी के मेरै तै यो दूर हो जावै। 9 पर उसनै मेरै तै कहया, "मेरा अनुग्रह तेरै खातर घणा सै; क्यूँके मेरी सामर्थ कमजोरी म्ह सिद्ध होवै सै।" ज्यांतै मै घणा राजी होकै आपणी कमजोरी पै घमण्ड करूँगा के मसीह की सामर्थ मेरै पै छाया करदी रहवै। 10 इस कारण मै मसीह कै खातर कमजोरियां म्ह, अर बुराइयां म्ह, गरीबी म्ह, अर रोळ्यां म्ह, अर संकटां म्ह राजी सूं; क्यूँके जिब्व मै कमजोर होऊँ सूं, जिब्वे ठाड्डा होऊँ सूं।

### कुरिन्थियों के खातर पौलुस की फिक्र

11 मै बेअक्का तो बणया, पर थमनै ए मन्ने न्यू करण के खातर मजबूर करया। थमनै तो मेरी बडाई करणी चाहिये थी, क्यूँके ऊँतै मै कीमे भी कोनी, तौभी उन बड्या तै बड्डे प्रेरितां तै किसे बात म्ह घाट कोनी सूं। 12 प्रेरित के लख्खण भी थारै बिचाळै सारे ढाळ के धीरज सुदा निशात्रां, अर अनोक्खे काम्मां, अर सामर्थ के काम्मां तै दिखाए गये। 13 थम कौण-सी बात म्ह दूसरी कलीसियायां तै घाट थे, सिर्फ इस म्ह के मन्ने थारै पै आपणा बोझ कोनी गेरया। मेरा यो अपराध माफ करो। 14 देखो, मै तीसरी बर थारै धोरै आण नै त्यार सूं, अर मै थारै पै कोए बोझ कोनी धरूँगा, क्यूँके मै थारी सम्पति नीं बल्के थमनै ए चाहूँ सूं। क्यूँके बाळकां नै माँ-बाप कै खातर धन कड्डा नीं करणा चाहिये, पर माँ-बाप नै बाळकां कै खातर। 15 मै थारी आत्मायां कै खातर घणा राजी होकै खर्च करूँगा, बल्के आप भी खर्च हो जाऊँगा। के जितना बाध मै थारै तै प्रेम राखूँ सूं, उतना ए घटके थम भी मेरै तै प्रेम राखोगे। 16 इसा हो सके सै के मन्ने थारै पै बोझ कोनी गेरया, पर श्याणपत तै थारै ताहीं धोक्खा देकै फँसा लिया। 17 भला, जिन ताहीं मन्ने थारै धोरै खन्दाया, के उन म्ह तै किसे कै जरिये मन्ने छळ करके थारै तै कीमे ले लिया? 18 मन्ने तीतुस ताहीं समझाकै उसकै गेल्या उस भाई ताहीं खन्दाया, तो के तीतुस नै छळ करके थारै तै कीमे लिया? के हम एक ए आत्मा के चलाए नीं चाल्ले? के एक ए लीक पै नीं चाल्ले?

19 थम इब्वे ताहीं समझ रहे होंगे के हम थारै श्यामी बदले म्ह जबाब देण लागरे सां। हम तो पणमेशर नै हाजर जाणकै मसीह म्ह बोल्लां सां, अर हे प्यारो, सारी बात्तां थारी बढोत्तरी ए कै खातर कहवां सां। 20 क्यूँके मन्ने भय सै, कदे इसा ना हो के मै आकै जिसा चाहूँ सूं, उसा ए थमनै पाऊँ; अर मन्ने भी जिसा नीं चाहो सो उसा ए पाओ; अर थम रोळा, डाह, छोह, बिरोध, जळण, चुगली, घमण्ड अर बखेड़े हों; 21 अर कदे इसा ना हो के मेरा पणमेशर मेरै दुबारा तै थारै उरै आण पै मेरै पै दाब गेरै अर मन्ने घण-खरया खातर फेर दुःख करणा पडै, जिन्नै पहल्या पाप करया था अर भुन्डे काम अर जारी अर लुचपण तै, जो उन्नै करया, मन नीं फिराया।

### आखरी चेतावनी

13 इब्व तीसरी बर थारै धोरै आऊँ सूं; दो या तीन गवाहां के मुँह तै हरेक बात ठहराई जावैगी। 2 जिस तरियां मै जिब्व दूसरी बर थारै गेल्या था, उसा ए इब दूर रहंदे होये उन माणसां तै जिन्नै पहल्या पाप करया, अर दुसरे सारे माणसां तै इब पहल्या ए कहे देऊँ सूं के जै मै दुबारे आऊँगा तो नीं छोडूँगा, 3 क्यूँके थम तो इसका सबूत जाणो सो के मसीह मेरै म्ह बोझै सै, जो थारै खातर कमजोर नीं पर थारै म्ह सामर्थी सै। 4 ओ कमजोरी कै

कारण क्रूस पै चढाया तो गया, तौभी पणमेशर की सामर्थ तै जिन्दा सै। हम भी उस म्ह कमजोर सां, पर पणमेशर की सामर्थ तै जो थारै खातर सै, उसकै गेल्या जीवांगें।

<sup>5</sup> अपने आप तारी परखो के बिश्वास म्ह सो के नीं। अपने आप नै जाँचो। के थम अपने बारै म्ह न्यू नीं बेरा के यीशु मसीह थारै म्ह सै? नीं तो थम जाँच म्ह निकम्मे लिकड़े सो। <sup>6</sup> पर मेरी आस सै के थम जाण ल्योगे के हम निकम्मे नीं। <sup>7</sup> हम अपने पणमेशर तै या प्रार्थना करां सां के थम कोए बुराई ना करो, ज्यांतै नीं के हम खरे दिख पड़ा, पर ज्यांतै के थम भलाई करो, चाहे हम निकम्मे ए ठहरें। <sup>8</sup> क्यूँके हम सच कै बिरोध म्ह कीमे नीं कर सकदे, पर सच कै खातर ए कीमे कर सकां सां। <sup>9</sup> जिब्व हम कमजोर सै अर थम ठाड़े

सो, तो हम राज्जी होवां सां, अर या प्रार्थना भी करां सां के थम सिद्ध हो जाओ। <sup>10</sup> इस कारण मै थारै पीठ पाच्छै ये बात लिखूँ सूं, के हाजर होकै मन्त्रै उस अधिकार कै मुताबिक जिस तारी प्रभु नै बिगाडण कै खातर नीं पर बनाण कै खातर मेरै तारी दिया सै, करडाई तै कीमे करणा ना पड़ै। <sup>11</sup> आखर म्ह हे भाईयां, राज्जी होवो; सिद्ध बणदे जाओ; ढाढस राखो; एक ए मन राखो; मेळ तै रहो। अर प्रेम अर शान्ति का देणआळा पणमेशर थारै गेल्या होवैगा। <sup>12</sup> एक-दुसरे तारी पवित्र चुम्मे तै नमस्कार करो। <sup>13</sup> सारे पवित्र माणस थारै तारी नमस्कार कहवै सै। <sup>14</sup> प्रभु यीशु मसीह का अनुग्रह अर पणमेशर का प्रेम अर पवित्र आत्मा का सांझापण थारै सारया कै गेल होंदा रहवै।

# गलातियों

## अभिवादन

1 पौलुस की- जो ना माणसां की ओड़ तै अर ना माणसां के जरिये, बल्के यीशु मसीह अर पणमेशर पिता के जरिये, जिसणै उस ताही मरे होऐ म्ह तै जिवाया, प्रेरित सै- 2 अर सारे भाईयां की ओड़ तै जो मेरै गेल्या सै, गलातिया की कलिसियां के नाम: 3 पणमेशर पिता अर म्हारे प्रभु यीशु मसीह की ओड़ तै थमनै अनुग्रह अर शान्ति मिल्दी रहवै 4 उस्से नै खुद ऐ ताही म्हारे पापां के खात्तर दे दिया, ताके जो कोऐ म्हारे पणमेशर अर पिता की मर्जी के मुताबिक हमनै इस आण आळी भुन्डी दुनिया तै छुडावै 5 उसका गुणगान अर बड़ाई युगायुग होंदी रहवै आमीन।

## कोए दूसरा सुसमाचार न्ही

6 मन्त्रे अचम्भा होवै सै के जिसणै थारै ताही मसीह के मैहरबान्नी म्ह बुलाया उसतै थम इतनी ताळ्ळे फिर कै और ए तरियां के सुसमाचार कान्नी झुकण लाग्ये 7 पर वो दूसरा सुसमाचार सै ऐ कोन्या: पर बात या सै के कितने इसे सै जो थमनै डरा देवै सै, अर मसीह के सुसमाचार नै बिगाडना चाहवै सै 8 पर जै हम, या सुर्ग तै कोऐ दूत भी उस सुसमाचार नै छोड़ जो हमनै थारै ताही सुणाया सै, कोऐ और सुसमाचार थारै ताही सुणावै, तो श्रापित सां 9 जिसा हमनै पहल्या कहा सै, उसा ऐ में इब फेर कहूँ सू के उस सुसमाचार नै छोड़ जिस ताही थमनै मान्या सै, जै कोऐ और सुसमाचार सुणावै सै, तो श्रापित हो 10 इब में के माणसां नै माँण सू या पणमेशर नै? के मै माणसां नै राज्जी करणा चाहूँ सू? जै में इब लग माणसां नै राज्जी करदा रहन्दा तो मसीह का दास न्ही होंदा।

## पौलुस किस तरियां प्रेरित बण्या

11 हे भाईयो, में थमनै बता द्यु सू के जो सुसमाचार मन्त्रे सुणाया सै, वो माणस का कोन्या 12 क्युँके वो मन्त्रे माणस की ओड़ तै न्ही पहोच्या, अर ना मन्त्रे सिखाया गया, पर यीशु मसीह के प्रकाशन तै मिल्या 13 यहूदी राय म्ह जो मेरा चाल-चलण था उसकै बारे म्ह थमनै सुण्या सै के में पणमेशर की कलीसिया नै घणा काल अर नाश करूँ था 14 आपणे घणखरे जातआळां तै जो मेरै हाण के थे, यहूदी मत म्ह घणा बधाऐ जाऊँ था अर आपणे बाप-दादा की रीत-रिवाजा के खात्तर घणा ऐ उतावळा था 15 पर पणमेशर की, जिसनै मेरी माँ की कोख म्ह ऐ तै मेरै ताही बणाया अर आपणे अनुग्रह तै बुला लिया, 16 जिब्व मर्जी होई के मेरै में आपणे बेटे नै देखे के में गैर-जातां म्ह उसका सुसमाचार सुणाऊँ, तो ना मन्त्रे मांस अर लहू तै सलाह ली, 17 अर ना यरुशलेम म्ह उनकै धोरै गया जो मेरै तै पहल्या प्रेरित थे, पर जिब्वे अरब म्ह चल्यो गया अर फेर ओड़ तै दमिश्क म्ह बोहड़ गया 18 फेर तीन साल के पाछे में कैफा तै मिलण खात्तर यरुशलेम गया, अर उसकै धोरै पन्द्रह दिन तैई रह्या 19 पर प्रभु के भाई याकूब नै छोड़ अर प्रेरितां म्ह तै किस्से तै न्ही मिल्या 20 जो बात में थमनै लिखूँ सू, सुणो! पणमेशर नै हाजिर जाण के कहूँ सू के वे झूठी कोणी 21 इसकै पाछे में सीरिया अर किलिकिया के प्रान्तां म्ह आया 22 पर यहूदिया की कलीसियां नै जो मसीह म्ह थी, मेरा मुँह कदे न्ही देख्या था; 23 पर न्यू ऐ सुण्या करै थी के जो हमनै पहल्या सतावै था, वो इब उस्से बिश्वास का सुसमाचार सुणावै सै जिसणै पहल्या नाश करै था 24 अर वे मेरै बारै म्ह पणमेशर की बड़ाई करै थी।

## और प्रेरितां के जरिये पौलुस नै मान्यता

2 चौदाह साल के पाछे में बरनबास के गेल्या फेर यरुशलेम म्ह गया, अर तीतुस नै भी गेल्या ले गया 2 मेरा जाणा ईश्वरीय प्रकाशन के मुताबिक होया; अर जो सुसमाचार में गैरजातां म्ह प्रचार करूँ सू, वो मन्त्रे उन ताही बता दिया, पर एकांत म्ह उन्नै जो बड्डे समझे जावै थे, ताके इसा ना हो के मेरी इस टेम की या पाच्छली भागा दौड़ी खराब ज्या 3 पर तीतुस नै भी जो मेरै गेल्या था अर जो यूनानी सै, खतना कारण खात्तर मजबूर न्ही करया गया 4 वो उन झूठे भईयां के कारण होया जो चोरी तै घुस आये थे, के उस आजादी का जो मसीह यीशु म्ह हमनै मिली सै, भेद ले कै हमनै दास बनावै 5 एक घड़ी भी उसकै अधीन होणा हमनै न्ही मान्या, इस खात्तर के सुसमाचार की सच्चाई थारै म्ह बनी रहवै 6 फेर जो माणस किम्मे समझे जावै थे (वे चाहे जिसे भी थे मन्त्रे इस तै किम्मे काम कोनी; पणमेशर किस्से गेल्या कोऐ दुभात न्हीकरदा) उनतै जो किम्मे समझे जावै थे, मन्त्रे किम्मे भी न्ही मिल्या 7 पर इसके उल्ट जिब्व उन्नै देख्या के जिसा खतना करै होऐ माणसां के खात्तर सुसमाचार का काम पतरस ताही सौप्या गया, उस्सा ऐ खतनारहित के खात्तर मेरै ताहि सुसमाचार सुणाना सौप्या गया 8 (क्युँके जिसणै पतरस तै खतना करै होया म्ह प्रेरिताई का काम बड्डे असरदार ढंग तै करवाया, उस्से नै मेरै तै भी गैरजातां म्ह असरदार काम करवाया), 9 अर जिब्व उन्नै उस अनुग्रह ताही जो मन्त्रे मिला था जाण लिया, तो याकूब, अर कैफा, अर यहून्ना, नै जो कलीसिया के खम्बे समझे जावै थे, मेरै ताही अर बरनबास तै संगति का सोळा हाथ बणाया के हम गैरजातां के धोरै जावै अर वे खतना करै होया के धोरै; 10 सिर्फ यो कहा गया के हम कंगालां की सुधि ल्यां, अर इस्से काम नै करण की में खुद भी कोशिश करूँ था।

## पौलुस कै जरिये पतरस का बिरोध

11 पर जिब्व कैफा अन्ताकिया म्ह आया, तो मन्त्रे उसकै मुँह पै उसकी गलती लिकाड़ी, क्युँके वो कसूरवार था 12 इस खात्तर के याकूब की ओड़ तै कई माणसां के आण तै पहल्या वो गैरजातां म्ह खाया करै था, पर जिब्व वे आये तो खतना करै होऐ माणसां के डर कै मारै वो पाछे नै हट गया अर कन्नी काटण लाग्या 13 इसके गेल्या बाकी बचे यहूदियां नै भी कपट करैया, उरै ताही कै बरनबास भी उन कै कपट म्ह पड़ गया 14 पर जिब्व मन्त्रे देख्या के सुसमाचार की सच्चाई पे सीधी चाल न्ही चालदे, तो मन्त्रे सारया कै स्याम्ही कैफा तै कहा, "जिब्व तू यहूदी होके गैरजातां की तरियां चालै सै अर यहूदियां की तरियां न्ही तो तू गैरजातां नै यहूदियां की तरियां चालण नै क्योँ कहै सै।"

## बिश्वास कै जरिये धर्मी बनना

15 हम तो जन्म तै यहूदी सां, अर पापी गैरजातां म्ह तै कोन्या 16 तो भी न्यू जाण कै के आदमी नियम के कामां म्ह कोणी, पर यीशु मसीह पे बिश्वास करण के जरिये धर्मी बणै सै, हमनै खुद भी प्रभु यीशु मसीह पे बिश्वास करैया के हम नियम के कामां तै न्ही, पर मसीह पै बिश्वास करण तै धर्मी बणा; इस करके के नियम के कामां तै कोऐ प्राणी धर्मी न्ही बणैगा 17 हम जो मसीह म्ह धर्मी बनणा चाँहा सां, जै खुद ऐ पापी लिकडै तो के मसीह पाप का दास सै? कद्वे भी न्ही 18 क्युँके जो किम्मे मन्त्रे ढाह दिया जै उस्से नै फेर बणाऊँ सू तो, खुद नै कसूरवार बणाऊँ सू 19 में तो नियम के जरिये नियम कै खात्तर मर

ग्या के पणमेशर कै खात्तर जीऊँ। 20 में मसीह कै गेल्या क्रूस पै चढ़ाया ग्या सूँ, इब मैं जिन्दा न्ही रह्या, पर मसीह मेरें में जिन्दा सै; अर मैं देह म्ह इब जो जिन्दा सूँ तो सिर्फ उस बिश्वास तै जिन्दा सूँ जो पणमेशर कै बेटें पै सै, जिसनै मेरें तै प्यार करया अर मेरें खात्तर आपणे आप ताही दे दिया। 21 में पणमेशर कै अनुग्रह नै बेकार न्ही बतान्दा; क्यूँके जै नियम कै जरिये धार्मिकता होंदी, तो मसीह का मरण बेकार होदा।

### नियम या बिश्वास

3 हे बिना अक्क के गलातियो, किसनै थारै ताही मोह लिया सै? थारी तो मान्ना आखाँ के स्याम्ही यीशु मसीह क्रूस पै दिखाया ग्या! 2 मैं सिर्फ थारै तै न्यू जाणना चाँऊसूँ के थमनै आत्मा ताही, के नियम के कामां तै या बिश्वास की खबर तै पाया? 3 के थम इसे बेअक्क के सों के आत्मा की रीत पै शुरू करके इब तन की रीत पे अंत करोगें? 4 के थमनै इतना दुःख बेकार म्ह ऐ उठाया? पर कतीए बेकार न्ही। 5 जो थमनै आत्मा दान करै अर थारै म्ह सामर्थ के काम करै सै, वो के नियम के कामां तै या सुसमाचार पे बिश्वास तै इसा करै सै? 6 "अब्राहम नै तो पणमेशर पे बिश्वास करया अर या उसकै खात्तर धार्मिकता गिणी गई।" 7 आखर यो जाण ल्यो के जो बिश्वास करण आळे सै, वे ऐ अब्राहम की ऊलाद सै। 8 अर पवित्रग्रन्थ नै पहल्या तै ऐ न्यू जाणके के पणमेशर गैरजातां नै बिश्वास तै धर्मी बणावैगा, पहल्या तै ऐ अब्राहम नै या सुसमाचार सुणा दी के "तेरें में तै सारी जात आशिर्वाद पावैगी।" 9 इस करके जो बिश्वास करण आळे सै, वे बिश्वासी अब्राहम के गेल्या आशिर्वाद पावै सै। 10 इस करके जितने माणस नियम के कामां पै भरोसा राखै सै, वे सारे शाप के गुलाम सै, क्यूँके लिख्या सै, "जो कोरे नियम की किताब म्ह लिखी होई सारी बातां के करण म्ह डट्या न्ही रहंदा, वो श्रापित सै।" 11 पर या बात दिखै सै के नियम कै जरिये पणमेशर के याडै कोरे धर्मी न्ही बणदा, क्यूँके धर्मी माणस बिश्वास तै जिन्दा रहैगा। 12 पर नियम का बिश्वास तै कोरे नात्ता कोणी; क्यूँके "जो उन्नै मान्यैगा, वो उणके कारण जिन्दा रहैगा।" 13 मसीह नै जो म्हारै खात्तर श्रापित बणया, म्हारै ताही मोल लेके नियम के शाप तै छुड़ाया, क्यूँके लिख्या सै, "जो कोरे काठ पे लटकाया जावै सै वो श्रापित सै।" 14 यो इस खात्तर होया के अब्राहम का आशिर्वाद मसीह यीशु म्ह गैरजातां तक पुहँचै, अर हम बिश्वास कै जरिये उस आत्मा नै पा ल्या जिसका प्रण होया सै।

### नियम अर करार

15 हे भाइयो, मैं आदमी की रीत पे कहूँ सूँ; आदमी का करार भी जो पक्का हो जा सै, तो ना कोरे उसनै टाळै सै अर ना उसमें किम्मे बढ़ावै सै। 16 आखर प्रण अब्राहम नै अर उसके वंश ताही दिया गया। वो न्यू कोणी कहै, "वंश नै," जिसा घणारे कै बारे म्ह कहा; पर जिसा एक कै बारे म्ह के "तेरें वंश नै" अर वो मसीह सै। 17 पर मैं न्यू कहूँ सूँ: जो करार पणमेशर नै पहल्या तै पक्का करया था, उसणै नियम चार सौ तीस साल के पाच्छे आके न्ही टाळ सकदा के प्रण बेकार हो। 18 क्यूँके जै पुशतैनी नियम तै मिली सै तो फेर प्रण तै न्ही, पर पणमेशर नै अब्राहम ताही प्रण कै जरिये दे दी सै। 19 जिब्व फेर नियम क्यूँ दिया गया? वो तो अपराधां के कारण पाच्छे दिया गया के उसकी पीढी कै आण तक रहवै, जिसका प्रण दिया गया था; अर वो सुर्गदूतां कै जरिये एक बिचौलिये कै हाथ बणाया गया। 20 बिचौलिया तो एक न्ही होंदा, पर पणमेशर एकै सै।

### नियम का मकसद

21 तो के नियम पणमेशर की प्रण के बिरोध म्ह सै? कदे न्ही! क्यूँके जै इसा नियम दिया जावै जो जीवन दे सकदा, तो साचलिये धार्मिकता नियम तै होंदी। 22 पर पवित्रग्रन्थ नै सारा ताही पाप के अधीन कर दिया, ताके वो प्रण जिसका आधार यीशु मसीह पे बिश्वास करणा सै, बिश्वास करण आळा खात्तर पूरा हो जावै। 23 पर बिश्वास कै आण तै पहल्या नियम की गुलामी म्ह म्हारी रुखाली होवै थी, अर उस बिश्वास के आण तक जो प्रकट होण आळा था, हम उस्से कै बन्धन म्ह रहे। 24 इस तरियां नियम मसीह तक पहुँचान कै

खात्तर म्हारे सिखान आळे होऐ सै के हम बिश्वास म्ह धर्मी बणा। 25 पर जिब्व बिश्वास आ लिया, तो हम सारे सिखान आळे के अधीन ना रह्या। 26 क्यूँके उस बिश्वास के जरिये जो मसीह यीशु पै सै, पणमेशर की ऊलाद हो। 27 अर थारे म्ह तै जितना नै मसीह म्ह बपतिस्मा लिया सै उन्नै मसीह ताही पैहर लिया सै। 28 इब ना कोरे यहूदी रह्या ना यूनानी, ना कोरे नौकर ना आजाद, ना कोरे लोग ना कोरे लुगाई, क्यूँके थम सारे मसीह यीशु म्ह एक सों। 29 अर जै थम मसीह के सों तो अब्राहम के वंश अर प्रण के मुताबिक वारिस भी सों।

4 मैं न्यू कहूँ सूँ के वारिस जिब्व ताहि बाळक सै, फेर भी सारी चीजा का मालिक सै, तो भी उस म्ह अर नौकर म्ह कोरे भेद कोणी। 2 पर पिता के बताए होऐ बखत तैई बचाणिया अर इन्तजाम करण आळे कै वंश म्ह रहवै सै। 3 उस्से तरियां हम भी, जिब्व बाळक थे, तो दुनिया की पुरानी शिक्षा के वंश म्ह होके नौकर बणे होऐ थे। 4 पर जिब्व बखत पूरा होया, तो पणमेशर नै अपना बेटा खिन्द्या जो बीरबानी तै जणया, अर नियम के अधीन पैदा होया। 5 ताके नियम के गुलामां नै मोल लेके छुड़ा ले, अर हमनै गोद लिये होऐ होण का ओहदा मिलौ। 6 अर थम जो बेटे सों, इस करके पणमेशर नै आपणे बेटे की आत्मा नै, जो 'हे अब्बा, हे पिता कहके नै बुलावै सै,' म्हारे दिलां म्ह खिन्दाया सै। 7 इस करके तू इब नौकर कोणी, पर बेटा सै; अर जिब्व बेटा होया, तो पणमेशर कै जरिये वारिस भी होया।

### गलातियां कै बारें म्ह पौलुस की चिंता

8 पहल्या तो थम पणमेशर नै ना जाण कै उसके दास थे जो स्वभाव म्ह पणमेशर कोणी। 9 पर इब जो थमनै पणमेशर ताहि पिच्छाण लिया बल्के पणमेशर नै थार ताही पिच्छाणा, तो उन कमजोर अर निक्की पुरानी शिक्षा की ओड़ क्यूँ फिरो सों, जिनके थम दुबारा नौकर होणा चाहौ सों? 10 थम दिनां अर महिन्ना अर नियत बखत अर साला नै मान्ना सों। 11 मैं थारै बारें म्ह डरू सों, कदे इसा ना हो के जो मेहनत मन्नै थारै खात्तर करी सै वा बेकार जावै। 12 हे भाइयो, मैं थारै तै बिनती करू सूँ, थम मेरें बराबर हो जावो; क्यूँके मैं भी थारै बराबर होग्या सूँ; थमनै मेरा किम्मे बिगाड़ा न्ही। 13 पर थम जाणो सों के पह्लम पहल मन्नै तन की कमजोरी कै कारण थारै ताहि सुसमाचार सुणाया। 14 अर थमनै मेरी शरीर की हालत नै जो थारी परीक्षा के कारण थी, तुच्छ न्ही जाणया; ना उसनै नफरत करी; अर पणमेशर के दूत बल्के खुद मसीह के समान मेरें ताही अपनाया। 15 तो वो थारा खुशी मणाना कित्त ग्या? मैं थारा गवहा सूँ के जै हो सकै तो थम आपणी आँख भी लिकाड़ के मन्नै दे देन्दे। 16 तो के थारे तै सच बोलण के कारण मैं थारा बेरी बण ग्या सूँ? 17 वे थमनै साथी बणाना तो चाहवै सै, पर भले मकसद तै न्ही; बल्के थमनै न्यारा पाड़ना चाहवै सै के थम उन्नै ऐ साथी बणा ल्यो। 18 पर यो भी आच्छा सै के भली बात म्ह हर दम मित्तर बणान का जत्न करया जावै, ना सिर्फ उस्से बखत के जिब्व मैं थारै गेल्या रहूँ सूँ। 19 हे मेरे बाळको, जिब्व ताहि थारै म्ह मसीह का रूप न्हीबण जावै, जिब्व ताही मैं थारै खात्तर फेर जच्चा की जु दर्द सहन्दा रहूँगा। 20 जी तो न्यू करै सै के इब थारै धोरै आके और ऐ तरियां तै बोलूँ, क्यूँके थारै बारें म्ह मैं उलझन म्ह सूँ।

### सारा अर हाजिरा का उदाहरण

21 थम जो नियम के अधीन होणा चाहवै सों, मन्नै बतावो, के थम नियम की न्ही सुणदे? 22 यो लिख्या सै के अब्राहम कै दो छोरै होऐ; एक नौकराणी तै अर एक आजाद बीरबानी तै। 23 पर जो नौकराणी तै होया, वो शारीरिक रीति तै जन्मा; अर जो आजाद बीरबानी तै होया, वो प्रण कै मुताबिक जन्मा। 24 इन बातां म्ह दुष्टांत /सीख सै: ये बीरबानी मान्ना दो करार सै, एक तो सीनै पहाड़ की जिस तै नौकर ऐ पैदा होवै सै; अर वा हाजिरा सै। 25 अर हाजिरा मान्ना अरब का पहाड़ सै, अर नया यरुशलम उसके बराबरी का सै। क्यूँके वो बाळका समेत गुलामी म्ह सै। 26 अर ऊप्पर की यरुशलम आजाद सै, अर वा म्हारी माँ सै। 27 क्यूँके लिख्या सै, "हे बाँझ, तू जो न्ही जाम्दी मोज कर; तू जिसकै दर्द न्ही उठता, गळ खोल कै जय जयकारकर; क्यूँके छोड़ी होई की ऊलाद सुहागण की ऊलाद तै भी घणी सै।" 28 हे भाइयो, हम इसहाक की तरियां प्रण की ऊलाद सों। 29 अर जिसा उस बखत तन कै मुताबिक

जणम्या होया आत्मा कै मुताबिक जणम्ये होऐ नै सतावै था, उसा ऐ इब भी होवै सै।<sup>30</sup> अर जिसा उस बखत तन कै मुताबिक जणम्या होया आत्मा कै मुताबिक जणम्ये होऐ नै सतावै था, उसा ऐ इब भी होवै सै।<sup>31</sup> इस करके हे भाइयो, हम नौकरानी के न्हीपर आजाद बीरबानी की ऊलाद सां।

### आजादी नै सम्भाल कै राख्खों

**5** मसीह नै आजादी खात्तर म्हारै तैई आजाद करया सै; आखर इस्से म्हे जमे रह्यो, अर गुलामी के जूरे म्हे फेर तै ना जुड़ो।<sup>2</sup> सुणो! मैं, पौलुस, थारै तै कहुँ सू के जै खतना करावोगे, तो मसीह तै थारै किम्मे फायदा न्ही होगा।<sup>3</sup> फेर भी मैं एक खतना कारण आळे नै बता द्यु सू के उसनै सारे नियम मानने पड़ैगें।<sup>4</sup> थम जो नियम कै जरिये धर्मी बणना चाह्यो सों, मसीह तै न्यारे और अनुग्रह तै गिर ग्ये सों।<sup>5</sup> क्यूँके आत्मा कै कारण हम बिश्वास तै, आश करी होई धार्मिकता की बाट देखां सां।<sup>6</sup> मसीह यीशु म्हे ना खतना अर ना बिना खतना किम्मे काम का सै, सिर्फ बिश्वास, जो प्यार के जरिये असर गरै सै।<sup>7</sup> थम तो आच्छी ढाळ भाजरे थे। इब किसनै थारै ताहि रोक दिया के थम सच नै ना मान्यो।<sup>8</sup> इसी सीख थारै बुलाण आळे की ओड़ तै कोणी।<sup>9</sup> थोडा सा खमीर सारै गूँधे होऐ चून नै खमीर बणा दे सै।<sup>10</sup> मैं प्रभु पै थारै बारे म्हे भरोसा राखूँ सू के थारा कोऐ दूसरा बिचार न्ही होगा; पर जो थमनै डरा देवै सै, वो कोऐ क्यूँ ना हो डण्ड पावैगा।<sup>11</sup> पर हे भाइयो, जै मैं इब तैई खतना का प्रचार करू सू तो क्यूँ इब तैई सताया जाऊँ सू? फेर तो क्रूस की ठोकर जांदी रही।<sup>12</sup> भला होंदा के जो थमनै डामाडोल करै सै, वे अपना ए अंग काट देवै सै।<sup>13</sup> हे भाइयो, थम आजाद होण कै खात्तर बुलाए गये सों; पर इसा ना होवै के या आजादी शारीरिक कामां के खात्तर मोक्का बणै, बल्के प्यार तै एक दूसरै के नौकर बणै।<sup>14</sup> क्यूँके सारे नियम इस एक बात म्हे पूरे हो ज्या सै, "तू आपणे पड़ोसी तै आपणे जिसा प्यार करा।"<sup>15</sup> पर जै थम एक दूसरे कै बुटके भर के पाड़ खावो सों, तो चौकस रहो के एक दूसरे का सत्यानाश ना कर द्यो।

### पवित्र आत्मा कै जरिये अगवाई

<sup>16</sup> पर मैं कहुँ सू आत्मा के मुताबिक चलो तो थम तन की लालसा किस्से रीति तै पूरी न्ही करोगे।<sup>17</sup> क्यूँके तन आत्मा के बिरोध म्हे अर आत्मा तन के बिरोध म्हे लालसा करै सै, अर ये एक दूसरे के बिरोधी सै इस करके के जो थम करना चाह्यो सों वो ना कर पावो।<sup>18</sup> अर जै थम आत्मा के चलाए चालो सों तो नियम के अधीन ना रह्यो।<sup>19</sup> देही के काम तो दिखै सै, यानी के जारि, भुन्डे काम, लुचपन,<sup>20</sup> मूर्ति पूजा, टोना, बैर, गुस्सा, बिरोध, फूट विधर्म,<sup>21</sup> दाह, मतवालापन, रासलीला अर इनके जिसे और काम सै, इनके बारै म्हे मैं थारै तै पहल्या कह द्यु सू जिसा पहल्ये कह्या था, के इसे-इसे काम करण्ये

पणमेशर के राज्य के वारिस न्ही होंगे।<sup>22</sup> पर आत्मा का फळ प्यार, आनन्द, शांति, धीरज, कृपया, भलाई, बिश्वास,<sup>23</sup> नम्रता, अर सयम सै; इसे-इसे कामां के विरोध म्हे कोऐ भी नियम कोणी।<sup>24</sup> अर जो मसीह यीशु के सै उन्नै तन नै उसकी लालसाओं अर अभिलाषाओं समेत क्रूस पे चढ़ा दिया सै।<sup>25</sup> जै हम आत्मा के जरिये जिन्दे सां, तो आत्मा कै मुताबिक चाला भी।<sup>26</sup> हम घमण्डी होकै ना एक दूसरै ने छेड़ा, अर एक दूसरै तै डाह करां।

### एक दूसरें की मदद करो

**6** हे भाइयो, जै कोऐ माणस किसे कसूर म्हे पकड़ा भी जावै तो थम जो आत्मिक सों, नम्रता के गेल्या इसै नै सम्भालो, अर आपणी भी चौकसी राखो के थम भी हिम्तान म्हे ना पड़ो।<sup>2</sup> थम एक दूसरे का बोझ ठावो, अर इस तरियां मसीह की नियम ने पूरा करो।<sup>3</sup> क्यूँके जै कोऐ किम्मे ना होण पे भी खुद नै किम्मे समझै सै, तो अपने आपनै धोखा देवै सै।<sup>4</sup> पर हरेक खुद के काम नै परख ले, अर फेर दुसरे के बारे म्हे न्हीपर आपणे ऐ बारे म्हे उसनै घमण्ड करण का मौक्का होगा।<sup>5</sup> क्यूँके हरेक आदमी अपना ए बोझ ठावैगा।<sup>6</sup> जो वचन की शिक्षा पावै सै, वो सारी आच्छी चीजां म्हे सीखाण आळे नै सांझी करै।<sup>7</sup> धोखा ना खावो; पणमेशर का मजाक न्ही उड़या जान्दा, क्यूँके माणस जो किम्मे बोवै सै वो काटैगा।<sup>8</sup> क्यूँके जो आपणे शरीर के खात्तर बोवै सै, वो शरीर कै जरिये नाश की कटनी काटैगा, अर जो आत्मा कै खात्तर बोवै सै, वो आत्मा कै जरिये लाम्बे जीवन की कटनी काटैगा।<sup>9</sup> हम भले काम करण का होसला ना छोड़ड़ा, क्यूँके जै हम ढीले ना होवै तो ठीक टेम पै कटनी काटैगें।<sup>10</sup> इस करके जडै ताहि मौक्का मिलै हम सारा के गेल्या भलाई करां, खास करके बिश्वासी भाइयां के गैल।

### आखरी चेतावनी अर अभिवादन

<sup>11</sup> देखों, मन्ने किसे बड़े-बड़े अक्षरा म्हे थारै तैई अपने हाथ तै लिख्या सै।<sup>12</sup> जो माणस शारीरिक दिखावा चाहवै सै वे थारा खतना करवाण के खात्तर दाब गरै सै, सिर्फ इस खात्तर के वे मसीह के क्रूस के कारण सताए ना जावै।<sup>13</sup> क्यूँके खतना कारण आळे खुद तो नियम पे न्ही चाल्दे, पर थारा खतना इस खात्तर करणा चावै सै के थारी शारीरिक दशा पे घमण्ड करै।<sup>14</sup> पर इसा ना होके मैं किसे और बात का घमण्ड करूँ, सिर्फ म्हारै प्रभु यीशु मसीह के क्रूस का, जिसके जरिये दुनिया मेरी निगांहे म्हे अर मैं दुनिया की निगांहे म्हे क्रूस पे चढ़ाया गया सू।<sup>15</sup> क्यूँके ना खतना अर ना खतनारहित किम्मे सै, पर नई सुष्टी।<sup>16</sup> जितने इस नियम पै चालैगें उन पै, अर पणमेशर के इस्त्राएल पै शान्ति अर दया होंदी रहवै।<sup>17</sup> आगे तै मन्ने कोऐ दुःख ना दे, क्यूँके मैं यीशु के जख्मां नै अपने गात म्हे लिये फिरू सू।<sup>18</sup> हे भाइयो, म्हारै प्रभु यीशु का अनुग्रह थारी आत्मा के गेल्या रहवै। आमीन।

# इफिसियों

1 पौलुस की ओड़ तै जो पणमेशर की इच्छा तै यीशु मसीह का प्रेरित सै, उन पवित्र अर मसीह यीशु म्ह बिश्वासी माणसां के नाम जो इफिसुस म्ह सै। 2 म्हारे पिता पणमेशर अर प्रभु यीशु मसीह की ओड़ तै थारै ताही अनुग्रह अर शान्ति मिल्दी रहवै।

## मसीही म्ह आत्मिक आशीषें

3 म्हारे प्रभु यीशु मसीह के पणमेशर अर पिता का धन्यवाद हो के उसनै म्हारै ताही मसीह म्ह सुर्गीय जंगहां म्ह सारी ढाळ की आत्मिक आशीष दी सै। 4 जिंसा उसनै म्हारै ताही दुनिया की सरूवात तै पहल्यै उस म्ह तै छोट लिया के हम उसकै धोरै प्रेम म्ह पवित्र अर बेकसूर होंवा। 5 अर अपनी मर्जी के भले मतलब के मुताबिक हमनै अपने खात्तर पहल्यै तै बणा के यीशु मसीह के जरिये हम उसके गोद लिये बेटे होवा, 6 के उसकी उस मैहरबान्नी की महिमा की बड़ाई होवै, जिस ताही उसनै म्हारै तै प्रेम म्ह मुफ्त दिया। 7 हमनै उस म्ह उसकै लहू के जरिये छुटकारा, यानी के कसूर की माफी, उसकै उस अनुग्रह के धन के मुताबिक मिल्या सै। 8 जिस ताही उसनै सारे ज्ञान अर समझ सुदा म्हारै पै भोत ऐ घणा करया। 9 क्यूँके उसनै अपनी इच्छा का भेद उस भले मतलब के मुताबिक म्हारै ताही बताया, जिस ताही उसनै अपने आप म्ह ठाण लिया था। 10 के बखत कै पूरा होण का इसा इन्तजाम हो के जो कीमे सुर्ग म्ह सै अर जो कीमे धरती पै सै, सारा कीमे वो मसीह म्ह कट्टा करा। 11 उस्से म्ह जिस म्ह हम भी उस्से की मनसा तै जो अपनी मर्जी के मत कै मुताबिक सारा कीमे करै सै, पहल्यै तै बणाया जाके पुश्तैनी बणै। 12 के हम, जिन्नै पहल्यै तै मसीह पे आस राक्खी थी, उसकी महिमा की बड़ाई के कारण होवै। 13 अर उस्से म्ह थम भी, जिब्व थमनै सच का वचन सुण्या जो थारे उद्धार का सुसमाचार सै अर जिस पै थमनै बिश्वास करया, प्रण करे होए पवित्र आत्मा की छाप लागी। 14 वो उसकै मोल लिये होया कै छुटकारे कै खात्तर म्हारी पुश्तैनी का ब्याना सै, के उसकी महिमा की बड़ाई होवै।

## पौलुस की प्रार्थना

15 इस कारण, मैं भी उस बिश्वास की खबर सुणकै जो प्रभु यीशु पै सै अर सारे पवित्र माणसां पै दिखै सै, 16 थारै खात्तर धन्यवाद करणा न्ही छोड़दा, अर अपनी प्रार्थनायां म्ह थमनै याद करू सूं। 17 के म्हारे प्रभु यीशु मसीह का पणमेशर जो महिमा का पिता सै, थमनै अपनी पिच्छाण म्ह ज्ञान अर चान्दणे की आत्मा देवै, 18 अर म्हारे मन की आँख रोशन हो के थम जाण ल्यो के उसकै बुलावै की आस के सै, अर पवित्र माणसां म्ह उसकी पुश्तैनी की महिमा का धन किंसा सै, 19 अर उसकी सामर्थ म्हारै म्ह जो बिश्वास करां सां, कितणी महान् सै, उसकी ताकत कै असर के उस काम के मुताबिक 20 जो उसनै मसीह म्ह करया के उसनै मरे होया म्ह जिवा कै सुर्गीय जंगहां म्ह अपनी सोळी ओड़ 21 सारी ढाळ की प्रधानता, हक्क, सामर्थ, प्रभुता के, अर हरेक नाम के ऊपर, जो ना सिर्फ इस लोक म्ह पर आण आळे लोक म्ह भी लिया जावैगा, बिठाया; 22 अर सारा कीमे उसकै पांया तळै कर दिया; अर उस ताही सारी चीज्रां पै सारा तै ऊँचा(शिरोमणि) बणा कै कलीसिया ताही दे दिया, 23 या उसकी देह सै, अर उस्से की भरपूरी सै जो सारया म्ह सारा कीमे पूरा करै सै।

## मृत्यु तै जीवन की ओड़

2 उसनै थारै ताही भी जिन्दा करया, जो अपने कसूर अर पाप के कारण मरे होये थे 2 जिन म्ह थम पहल्यै इस दुनिया की रीत पै, अर अकास के हक्क के हाकिम यानी के उस आत्मा कै मुताबिक चाल्लों थे, जो इब भी हुक्म ना मानण आळ्यां म्ह काम करै सै। 3 इन म्ह हम भी सारे के सारे पहल्यै अपनी देही की लालसाओं म्ह दिन बितावा थे, अर देही अर मन की मर्जियां नै पूरी करां थे, अर और माणसां की ढाळ सुभाव तै ऐ छोह की ऊलाद थे। 4 पर पणमेशर नै जो दया का धनी सै, अपने उस घणै प्रेम के कारण जिस तै उसनै म्हारै तै प्रेम करया, 5 जिब्व हम कसूर के कारण मरे होए थे तो म्हारै ताही मसीह के गैल्या जिवाया (मैहरबान्नी ऐ तै थारा उद्धार होया सै) 6 अर मसीह यीशु म्ह उसकै गैल्या ठाया, अर सुर्गीय जंगहां म्ह उसकै गैल्या बिठाया 7 के ओ अपनी दया तै जो मसीह यीशु म्ह म्हारै पै सै, आण आळे बखत म्ह अपनी मैहरबान्नी का घणा ए धन दिखावै। 8 क्यूँके बिश्वास के जरिये मैहरबान्नी ऐ तै थारा उद्धार होया सै; अर या थारी ओड़ तै न्ही, बल्के पणमेशर का दान सै, 9 अर ना कर्मा के कारण, इसा ना हो के कोए घमण्ड करै। 10 क्यूँके हम उसके बणाए होए सां, अर मसीह यीशु म्ह उन भले कामां के खात्तर रचे गये जिन्नै पणमेशर नै पहल्यै तै म्हारे करण कै खात्तर तैयार करया।

## मसीही म्ह एक

11 इस कारण याद करो के थम जो शरीरिक तौर तै गैर-जात साँ (अर जो माणस देही म्ह हाथ के करे होए खतने तै खतना आळे कुहवावै सै, वे थमनै खतनारहित कहवै सै), 12 थम माणस उस बखत मसीह तै न्यारे, अर इस्राइल की प्रजा के ओहदे तै न्यारे करे होए, अर प्रण के करार के साज्जी कोनी थे, अर बिना आस अर दुनिया म्ह बिना ईश्वर के थे। 13 पर इब मसीह यीशु म्ह थम जो पहल्यै दूर थे, मसीह के लहू के जरिये लोवै होगे साँ। 14 क्यूँके वो ऐ म्हारा मेळ सै जिसनै दोनुओ ताही एक कर लिया अर न्यारा करण आळी भीत नै जो बिचाल्यै थी गेर दिया, 15 अर अपने देही म्ह बैर यानी के वो नियम जिसका हुक्म विधियों की रीत पै था, मिटा दिया के दोनुआ तै अपने म्ह एक नया माणस पैदा करके मेळ करा दे, 16 अर क्रूस पै बैर का नाश करके इसकै जरिये दोनुआ नै एक देही बणाके पणमेशर तै मिलावै। 17 उसनै आकै थारै ताही जो दूर थे अर उन्नै जो लोवै थे, दोनुआ ताही मेल मिलाप का सुसमाचार सुणाया। 18 क्यूँके उस्से कै जरिये म्हारी दोनुआ की एक आत्मा म्ह पिता के धोरै पहाच होवै सै। 19 इस करके थम इब विदेशी अर मुसाफिर कोनी रहे, पर पवित्र माणसां के साथी देशी अर पणमेशर के कुणबे के होगे साँ। 20 अर प्रेरितां अर नब्बियां की नीम पे जिसकै कूणै का पत्थर मसीह यीशु खुद ऐ सै, बणाया गया हो। 21 जिस म्ह सारी बणावट एक साथ मिलके प्रभु म्ह एक पवित्र मन्दिर बणदी जावै सै, 22 जिस म्ह थम भी आत्मा कै जरिये पणमेशर के रहण की जंगहां होण कै खात्तर एक गेल्या बणाये जाओ साँ।

## गेरजात्तां म्ह पौलुस की सेवा

3 इस कारण मैं पौलुस जो थम गैर-जातां के खात्तर मसीह यीशु का कैदी सूं - 2 जै थमनै पणमेशर के उस मैहरबान्नी के इन्तजाम की खबर सुणी हो, जो थारै खात्तर मेरे ताही दिया गया, 3 यानी के वो भेद मेरे पे

प्रकाशन के जरिये प्रकट होया, जिसा मैं पहल्या ए छोटे रूप म्ह लिख चुक्या सूँ, 4 जिसनै थम पढ़ के जाण सको सों के मैं मसीह का वो भेद कइँ ताही समझू सूँ 5 जो और बखत म्ह माणसां की ऊलाद ताही इसा न्ही बताया गया था, जिसा के आत्मा के जरिये इब उसके पवित्र प्रेरितां अर नब्बियां पै दिखाया गया सै। 6 यानी के मसीह यीशु म्ह सुसमाचार के जरिये और गैरजातां के माणस पुशतैनी म्ह साज्जी, अर एकैए देह के अर प्रण के साज्जी सै। 7 मैं पणमेशर की मैहरबान्नी के उस दान के मुताबिक, जो उसकी सामर्थ के असर के मुताबिक मेरै ताही दिया गया, उस सुसमाचार का सेवक बणा। 8 मेरै पे जो सारे पवित्र माणसां म्ह तै छोटे तै भी छोटा सू, या मैहरबान्नी होई के मैं दूसरी जातां नै मसीह के आण आळे धन का सुसमाचार सुणाऊँ, 9 अर सारा पे या बात जाहेर करूँ के उस भेद का इन्तजाम के सै, जो सारा नै रचनिया पणमेशर म्ह शुरु तै लुहक्या होया था। 10 ताके इब कलीसिया के द्वारा, पणमेशर का न्यारा ढाळ का ज्ञान उन प्रधानां अर अधिकारियां पै जो सुर्गीय जंगहां म्ह सै, दिखाया जावै। 11 उस (सनातन)घणी पुराणी मनसा के मुताबिक जो उसनै म्हारे प्रभु यीशु मसीह म्ह करी थी। 12 जिस म्ह हमनै उस पे बिश्वास करण तै हिम्मत अर भरोसे के गैल्या पणमेशर के लोवै आण का हक सै। 13 इस करके मैं बिनती करूँ सू के जो क्लेश थारै खात्तर मन्नै होवै सै, उनके कारण हिम्मत ना छोड़ो, क्यूँके उन म्ह थारी बड़ाई सै।

### मसीही का प्यार

14 मैं इस्से कारण उस पिता के आगै गोड्डे टेकू सू, 15 जिस तै सुर्ग अर धरती पे, हरेक कुन्बे का नाम राख्या जावै सै, 16 के वो अपणी बड़ाई के धन के मुताबिक थमनै यो दान दे के थम उसकी आत्मा तै अपणे भीतरी माणसपन म्ह सामर्थ पाके ताकतवर होंदे जाओ; 17 अर बिश्वास के जरिये मसीह म्हारे मन म्ह बसै के थम प्रेम म्ह जड़ पकड़ के अर निम धर के, 18 सारे पवित्र माणसां के गैल्या आच्छी ढाळ समझन की ताकत पाओ के उसकी चौड़ाई, अर लम्बाई, अर ऊँचाई, अर गहराई कितनी सै, 19 अर मसीह के उस प्रेम नै जाण सको जो ज्ञान तै परै सै के थम पणमेशर की सारी भरपूरी तैई जमा भर जाओ। 20 इब जो इसा ताकतवर सै के म्हारी बिनती अर समझ तै भी घणा काम कर सकै उस सामर्थ के मुताबिक जो म्हारे म्ह काम करै सै, 21 कलीसिया म्ह अर मसीह यीशु म्ह उसकी बड़ाई पीढ़ी तै पीढ़ी तैई युगायुग होंदी रहै। आमीन।

### मसीह की देह म्ह एक्का

4 इस करके मैं जो प्रभु मैं कैदी सू थारै तै बिनती करूँ सू के जिस बुलावै तै थम बुलाए ग्ये थे, उसके लायक चाल चालो, 2 यानी सारी दीनता अर नम्रता गैल, अर धीरज धरके प्रेम तै एक दूसरै नै सह ल्यो; 3 अर मेळ के बन्धन म्ह आत्मा का एक्का राखण का जल्न करो। 4 एकै ए देह सै, अर एकै ए आत्मा; जिसा थमनै जो बुलाए ग्ये थे अपणे बुलाये जाण की एकै ए आस सै। 5 एकै ए प्रभु सै, एकै ए बिश्वास, एकै ए बपतिस्मा, 6 अर सारा का एकै पणमेशर अर पिता सै, जो सारा के ऊपर अर सारा के बीच म्ह अर सारा म्ह ए सै। 7 पर म्हारे म्ह तै हरेक नै मसीह के दान के नतीजे के मुताबित मैहरबान्नी मिलै सै। 8 इस करके वो कहै सै: "वो ऊँचै पे चढ़ा अर कैदियां नै बाँध ले ग्या, अर माणसां ताही दान दिए।" 9 उसके चढ़न तै, अर के पाया जा सै सिर्फ यो के धरती की निचली जगहां म्ह उतरा भी था। 10 अर जो उतर ग्या यो वो ए सै जो सारै अकास तै ऊपर चढ़ भी ग्या के सारा कीमे कती पूरा करै। 11 उसनै कईया तै प्रेरित नियुक्त करके, अर कईया तै नब्बी नियुक्त करके, अर कईया तै सुसमाचार सुणान आळे नियुक्त करके, अर कईया तै रुखाळ अर प्रचार नियुक्त करके दे दिया। 12 जिस तै पवित्र माणस सिध्द हो जावै अर सेवा का काम किया जावै अर मसीह की देह तरक्की पावै, 13 जिब्व तैई के हम सारै के सारै बिश्वास अर पणमेशर के बेटे की पिच्छाण म्ह एक न्ही हो जावै, अर एक सिध्द माणस न्ही बण जावै अर मसीह के पुरे डील-डौल तैई ना बढ जावै। 14 ताके हम आगै बाळक न्ही रह्या जो माणस नै टग विधा अर स्याणपत तै, उनके भ्रम की तरकिबां के अर प्रचार के हरेक झोंके तै उछाळै अर इन्ने-उन्ने घुमाए जाओ सों। 15 बल्के प्रेम मैं सच्चाई तै चाल्दे होए

सारी बातां म्ह उस म्ह जो सिर सै, यानी मसीह म्ह बढते जावा। 16 जिस तै सारी देह, हरेक जोड़ की मदद तै गैल मिल के अर गैल गठ के, उस असर के मुताबिक जो हरेक अंग के ठीक ठाक काम करण के जरिये उस म्ह होवै सै, अपणे आप नै बढ़ावै सै के वो प्रेम मैं तर्की करती जावै।

### मसीही म्ह नया जीवन

17 इस करके मैं न्यू कहुँ सू अर प्रभु म्ह बिनती करूँ सू के जिसा गैरजात के माणस अपणे मन की बेकार रीत पे चालै सै, थम इब तै फेर इसा ना चालो। 18 क्यूँके उनकी अक्ल आँधी होगी सै, अर उस अज्ञानता के कारण जो उस म्ह सै अर उनकी मन की कठोरता के कारण वे पणमेशर के जीवन तै न्यारे करे होए सै; 19 अर वे सुन्न होके लुचपन म्ह लागे सै के सारी ढाळ के भुन्डे काम लालसा तै करां करै। 20 पर थमनै मसीह की इसी शिक्षा न्ही पाई। 21 बल्के थमनै सचमुच उस्से की सुणी अर, जिसा यीशु म्ह सच सै, उस्से म्ह सिखाये भी गए 22 के थम पाच्छलै चाल चलन के पुराणे माणसपन नै भरमाणे आळी अभिलाषा के मुताबिक भ्रष्ट होंदा जावै सै, उसनै उतार द्यो 23 अर अपणे मन के आत्मिक स्वभाव म्ह नये बणदे जाओ, 24 अर नये माणसपन नै पैहर ल्यो जो पणमेशर के जिसा सच की धार्मिकता अर पवित्रता म्ह सजाया गया सै। 25 इस कारण झूठ बोलना छोड़ के हरेक अपणे पड़ोसी तै सच बोलै, क्यूँके हम आपस म्ह एक दुसरे के अंग सां। 26 गुस्सा तो करो, पर पाप ना करो, सूरज ढळण तै पैहल्या थारा छोह भी न्ही रहणा चाहिए, 27 अर ना शैतान नै मौक्का द्यो। 28 चोरी करण आळा फेर चोरी ना करै, बल्के भले कामां म्ह अपणे हाथां तै मेहनत करै, इस करके के जरूरत हो उस ताही देवैण नै उसके धोरै कीमे हो। 29 कोए भूँडी बात थारै मुँह तै ना लिकड़ै, पर जरूरत के मुताबिक वोए लिकड़ै जो बढोतरी के खात्तर बढ़िया हो, ताके उस तै सुणन आळ्या पे अनुग्रह होवै। 30 पणमेशर की पवित्र आत्मा नै दुखी ना करो, जिस तै थारै पै छुटकारे के दिन के खात्तर छाप दी ग्यी सै। 31 सारी ढाळ की कड़वाहट, अर प्रकोप अर छोह, अर कलह, अर बदनामी, सारा बैरभाव समेत थारै तै दूर करे जावै। 32 एक दूसरे पे दयालु अर करुणामय हो, अर जिसा पणमेशर नै मसीह म्ह थारै कसूर माफ करे, उस्से तरियां थम भी एक दूसरे के कसूर माफ करो।

### चान्दने की ऊलाद बणों

5 इस करके प्यारे बाळका की ढाळ पणमेशर के गैल्या चालो, 2 अर प्रेम म्ह चालो जिसा मसीह नै भी थारे तै प्रेम करया, अर म्हारे खात्तर अपणे आप नै सुखदायक खशबू के खात्तर पणमेशर के आगै भेट करके कुर्बान कर दिया। 3 जिसा पवित्र माणसां के लायक सै, उसा ए थारै म्ह जारि अर किसे ढाळ के अशुद्ध काम या लोभ का जिक्र तैई ना हो; 4 अर ना बेशर्मी, ना मुखता की बातचीत करी, ना मजाक की, क्यूँके ये बात शोभा न्ही देंदी, बल्के धन्यवाद ए सुण्या जावै। 5 क्यूँके थम या जाणो सों के किसे जार, या अशुद्ध माणस, या लोभी माणस की, जो मूर्ति पूजा के बराबर सै, मसीह अर पणमेशर के राज म्ह पुशतैनी नीं। 6 कोए थमनै फजूल की बातां तै धोरखा ना दे, क्यूँके इन ए के कामां के कारण पणमेशर का छोह हुक्म ना मा णन आळे पे भड़के सै। 7 इस करके थम उनके साझीदार ना होवों। 8 क्यूँके थम तो पैहल्या ए अन्धेरा थे पर इब प्रभु म्ह चान्दणा सों, अतः चान्दने की ऊलाद की ढाळ चालो 9 (क्यूँके चान्दणे का फळ सारी ढाळ की भलाई, अर धार्मिकता, अर सच सै), 10 अर यो परखो के प्रभु नै के भावै सै। 11 अन्धकार के कामां म्ह भागीदार ना होवो, बल्के उन पे उल्हाणा द्यो। 12 क्यूँके उनके गुप्त कामां का जिक्र भी शर्म की बात सै। 13 पर जितणे कामां पे उल्हाणा दिया जावै सै वे सारे चान्दणे तै दिखै सै, क्यूँके जो सारा कीमे दिखावै सै वो चान्दणा सै। 14 इस कारण वो कहै सै, "हे सोण आळे, जाग अर मुर्दा म्ह तै जी उठ; तो मसीह का चान्दणा तेरै पै चमकैगा।" 15 इस करके ध्यान तै देख्यो, के किसी चाल चालों सों: बेअक्को की तरियां न्ही पर अक्कंद की तरियां चालों। 16 मौक्के नै घणा कीमती समझों, क्यूँके दिन बुरे सै। 17 इस कारण बेअक्क ना होवों, पर ध्यान तै समझो के प्रभु की मर्जी के सै। 18 दाखरस तै मतवाले ना बणो, क्यूँके इस तै लुचपन होवै सै, पर आत्मा तै

भरते जाओ, 19 अर आपस म्ह भजन अर जयजयकार अर आत्मिक गीत गाया करो, अर अपने-अपने मन म्ह प्रभु के आगै गाते अर कीर्तन करदे रहो। 20 अर सदा सारी बातों के खात्तर म्हारे प्रभु यीशु मसीह के नाम तै पणमेशर पिता का धन्यवाद करते रहो। 21 मसीह के डर तै एक दूसरे के अधीन रहो।

### धणी अर बीर

22 हे पत्नियों, अपने-अपने धणी के इस ढाळ अधीन रहो जिस ढाळ प्रभु के। 23 क्यूँके धणी बीर का सिर सै अर खुद ऐ देही का उध्दार करणीया सै। 24 पर जिसी कलीसिया मसीह के अधीन सै, उस्से तरियां पत्नियां भी हर बात म्ह अपने-अपने धणी के अधीन रहै। 25 हे धणियो, अपनी-अपनी बिरां तै प्रेम राखो जिसा मसीह नै भी कलीसिया तै प्रेम करके अपने आप नै उसके खात्तर दे दिया 26 के उसके वचन के जरिये पाणी के नाहन तै शुध्द करके पवित्र बनावै, 27 अर उसनै एक तेजस्वी कलीसिया बनाके अपने धोरै खड़ी करै, जिस म्ह ना कलंक, ना झुरी, ना कोए और इसी चीज हो बल्के पवित्र अर निर्दोष हो। 28 इस तरियां सही सै के धणी अपनी-अपनी बीर तै अपनी देह के समान प्रेम राखै जो अपनी बीर तै प्रेम राखै सै। वो अपने आप तै प्रेम राखै सै। 29 क्यूँके किसे नै कदे अपने देही तै बैर न्ही राख्या बल्के उसका पालन पोषण करै सै, जिसा मसीह भी कलीसिया के गैल करै सै। 30 इस करके के हम उसकी देह का अंग सै। 31 "इस कारण माणस अपने माँ बाप नै छोड़के अपनी बीर तै मिल्या रहैगा, अर वे दोनु एक देही होंगे।" 32 यो भेद तो बड्डा सै, पर मैं याडै मसीह अर कलीसिया के बारे म्ह कहूँ सू। 33 पर थारै म्ह तै हरेक अपनी बीर तै अपने समान प्रेम राखै, अर बीर भी अपने धणी का डर मानै।

### माँ बाप अर बाळक

6 हे बाळकों, प्रभु म्ह अपने माँ बाप के आज्ञाकारी बणो, क्यूँके यो सही सै। 2 "अपने माँ बाप का आदर कर ( यो पैह्ला हुक्म सै जिसके गैल प्रण भी सै ) 3 के तेरा भला हो, अर तू धरती पै भोत दिन जिन्दा रहवै।" 4 हे बाळकां आळो, अपने बाळकां नै रिस ना दुवाओ, पर शिक्षा अर चेतावनी देंदे होए उनका पालन पोषण करो।

### मालिक अर नौकर

5 हे दासो, जो माणस इस जगत म्ह थारे स्वामी सै, अपने मन की सीधार्थ तै डरदे अर कापते होए, जिसा मसीह का उसा ऐ उनका भी हुक्म मानो।

6 माणसां नै राजी करण आळा के समान दिखाण खात्तर सेवा ना करो, पर मसीह के दासां के समान मन तै पणमेशर की इच्छा पै चालों, 7 अर उस सेवा नै माणसां की न्ही पर प्रभु की जाण के सच्चे मन तै करो। 8 क्यूँके थम जाणो सों के जो कोए जिसा आच्छा काम करैगा, चाहे दास हो चाहे आजाद, प्रभु तै इसा ऐ पावैगा। 9 हे स्वामियों, थम भी धमकी देणा छोड़के उनके गैल उसा ऐ व्यवहार करो; क्यूँके थम जाणो सों के उनका अर थारा दोनुआ का स्वामी सुर्ग म्ह सै, अर वो किसे की मेर न्ही करता।

### आत्मिक युध्द के हथियार

10 इस करके प्रभु म्ह अर उसकी शक्ति के असर म्ह ताकतवर बणो। 11 पणमेशर के सारे हथियार बाँध ल्यो के थम शैतान की चालों के स्याम्ही खड़े रह सको। 12 क्यूँके म्हारी या कुस्ती लहूँ अर मांस तै न्ही पर प्रधानां तै, अधिकारियां तै, अर इस जगत के अन्धकार के हकीमां तै अर दुष्टता की आत्मिक सेनायां तै सै जो अकास म्ह सै। 13 इस करके पणमेशर के सारे हथियार बाँध ल्यो के थम बुरे दिनां म्ह सामना कर सको, अर सारा कीमे पूरा करके डटे रह सको। 14 इस करके सच तै अपनी कमर कस के, अर धार्मिकता की झिलम पैहर के, 15 अर पैरां म्ह मेळ का सुसमाचार की तैयारी के जूते पैहर के; 16 अर इन सारा के गैल बिश्वास की ढाळ लेके डटे रहों जिस तै थम उस दुष्ट के सारे जळते होए तीरां नै बुझा सको। 17 अर उध्दार का टोप, अर आत्मा की तलवार, जो पणमेशर का शब्द सै, ले ल्यो। 18 हरेक बखत अर हरेक ढाळ तै आत्मा म्ह प्रार्थना, अर बिनती करते रहों, अर इसे खात्तर जागते रहों के सारे पवित्र माणसां खात्तर लगातार बिनती करते रहों, 19 अर मेरै खात्तर भी के मैं बोल्लण के बखत इसा हावी वचन दिया जावै के मैं हिम्मत के गैल सुसमाचार का भेद बता सकूँ, 20 जिसके खात्तर मैं बेल्लां तै जकड़ा होया राजदूत सू; अर यो भी के मैं जिसके बारे म्ह जिसा मन्त्रै चाहिए हिम्मत तै बोलूँ।

### आखरी अभिवादन

21 तुखिकुस, जो प्यारा भाई अर प्रभु म्ह बिश्वास लायक सेवक सै, थारे ताही सारी बात बतावैगा के थम भी मेरी दशा जाणो के मैं कुक्कर रहू सू। 22 उस ताही मन्त्रै थारै धोरै इस्से खात्तर भेज्या सै के थम म्हारी दशा नै जाणो, अर वो थारे मनां नै शान्ति दे। 23 पणमेशर पिता अर प्रभु यीशु मसीह की ओड़ तै भाइयां नै शान्ति अर बिश्वास गैल प्रेम मिलै। 24 जो म्हारै प्रभु यीशु मसीह तै सच्चा प्रेम राखै सै, उन सारा पे अनुग्रह होंदा रहवै।



# फिलिप्पियों

1 यीशु मसीह के दास पौलुस अर तीमुथियुस की ओड़ तै, सारे पवित्र माणसा के नाम जो प्रभु यीशु मसीह म्ह होके फिलिप्पी म्ह रहवै सै, अध्यक्षा अर सेवकां समेत। 2 म्हारै पिता पणमेशर अर प्रभु यीशु मसीह की ओड़ तै थारै ताही अनुग्रह अर शान्ति मिल्दी रहवै।

## पौलुस की प्रार्थना अर धन्यवाद

3 मै जब-जब थमनै याद करूं सूँ, तब-तब आपणे पणमेशर का धन्यवाद करूं सूँ; 4 अर जिब्व कदे थारै सारया खात्तर बिनती करूं सूँ। 5 इस करके के थम पहलै दिन तै लेके आज तक सुसमाचार फैलान म्ह साझीदार रह्ये सों। 6 मन्त्रै इस बात का भरोसा सै के जिसनै थारै म्ह आच्छा काम शुरु करया सै, ओ ए उसनै यीशु मसीह के दिन तक पूरा करैगां। 7 सही सै के मै थारै सारया खात्तर इसा ए विचार करूं, क्यूँके थम मेरै मन म्ह आण बसे सों, अर मेरी कैद म्ह अर सुसमाचार के खात्तर उत्तर अर सबूत देण म्ह थम सब मेरै गैल अनुग्रह म्ह साझीदार सों। 8 इस म्ह पणमेशर मेरा गवाह सै के मै मसीह यीशु के तरियां लगावै करके थारै सारा की लालसा करूं सूँ। 9 मै या प्रार्थना करूं सूँ के थारा प्रेम ज्ञान अर सारी ढाळ के विवेक समेत और भी बड़ता जावै, 10 उरै ताही के थम आच्छी तै आच्छी बात नै प्रिय जाणो, अर मसीह के दिन तक सच्चे बणे रहों, अर टोकर ना खाओ: 11 अर उस धार्मिकता के फळ तै जो यीशु मसीह के जरिये होवै सै, भरपूर होंदे जाओ जिस तै पणमेशर की महिमा अर बड़ाई होंदी रहवै।

## पौलुस की कैद तै सुसमाचार की तरक्की

12 हे भाइयो, मै चाहूं सूँ के थम यो जाण ल्यो के जो मेरे पै बिल्या सै, उस्से सुसमाचार की बढ़ती होई सै। 13 उरै ताही के कैसर के राजभवन की सारी पलटन अर बाकी सारे माणसा म्ह यो प्रकट हो गया सै के मै मसीह के खात्तर कैद सूँ: 14 अर प्रभु म्ह जो भाई सै, उन्ह म्ह तै घणखरे मेरै कैद होण के कारण, हिम्मत बांधके पणमेशर का वचन बेधडक सुणाण का और भी साहस करै सै। 15 कई तो डाह अर झगड़े के कारण मसीह का प्रचार करै सै अर कुछ भली इच्छा तै। 16 कई तो या जाणके के मै सुसमाचार के खात्तर जवाब देवैण नै ठहराया गया सूँ, प्रेम तै प्रचार करै सै। 17 अर कई तो एक सीधाई तै न्ही पर बिरोध तै मसीह की कथा सुणावै सै, या सोचके के मेरी कैद म्ह मेरै खात्तर क्लेश पैदा करै। 18 तो के होया? सिर्फ यो के हर ढाळ तै, चाहे भानै तै चाहे सच्चाई तै, मसीह की कथा सुणाई जावै सै, अर मै इसतै आनन्दित सूँ अर आनन्दित रहूंगां भी।

## जिन्दा रहणा मसीही सै

19 क्यूँके मै जाणू सूँ के थारी बिनती के जरिये, अर यीशु मसीह की आत्मा के दान के जरिये, इसका प्रतिफल मेरा उद्धार होगा। 20 मै तो या ए मन तै लालसा अर आशा रखूं सूँ के मै किसे बात म्ह शर्मसार ना होऊँ, पर जिसे मेरै प्रबल साहस के कारण मसीह की बड़ाई मेरी देह के जरिये सदा होंदी रहवै सै, उसी ए इब भी हो, चाहे मै जिन्दा रहूं या मर जाऊँ। 21 क्यूँके मेरै खात्तर जिन्दा रहणा मसीह सै, अर मर जाणा फायदेमन्द सै। 22 पर जै देही म्ह जिन्दा रहणा ए मेरै काम के खात्तर फायदेमन्द सै तो मै न्ही जाणदा के किसनै चुनूं। 23 क्यूँके मै दोनुआ के बीच अधर म्ह लटका सूँ: जी तो करै सै के कूच करके मसीह के धोरै जाया रहूं, क्यूँके यो घणा ए आच्छा सै, 24 पर देह म्ह रहणा थारै कारण और भी जरूरी सै। 25 इस करके के मन्त्रै इसका

भरोसा सै आखर मै जाणू सूँ के मै जिन्दा रहूंगा, बलके सारा के गेल्या रहूंगा जिसतै थम बिश्वास म्ह मजबूत होंदे जाओ अर उस म्ह आनन्दित रहों; 26 अर जो घमण्ड थम मेरै बारै म्ह करो सों, वो मेरै फेर थारै धोरै आण तै मसीह यीशु म्ह घणा बड़ जावै। 27 सिर्फ इतना करो के थारा चाल चलण मसीह के सुसमाचार के लायक हो के चाहे मै आके थमनै देखूं, चाहे ना भी आऊँ, थारै बारै म्ह यो ए सुणु के थम एकै ए आत्मा म्ह टिके सों, अर एक मन होके सुसमाचार के बिश्वास के खात्तर मेहनत करदे रहों सों, 28 अर किसे बात म्ह बिरोधियां तै भय न्ही खांदे। यो उन्ह के खात्तर विनाश का स्पष्ट चिन्ह सै, पर थारै खातर उद्धार का अर यो पणमेशर की ओड़ तै सै। 29 क्यूँके मसीह के कारण थारै पै या अनुग्रह होया के ना केवल उस पै बिश्वास करो पर उसके खातर दुःख भी उठाओ; 30 अर थमनै उसी ए मेहनत करणी सै, जिसी थमनै मेरै तै करते देख्या सै, अर इब भी सुणो सों के मै उसा ए करूं सूँ।

## मसीही की दीनता अर महानता

2 आखर मसीह म्ह कुछ शान्ति, अर प्रेम तै ढाढस, आत्मा की साझीदारी, अर कुछ करुणा अर दया सै, 2 तो मेरा यो आनन्द पूरा करो के एक मन रहों, अर एकै ए प्रेम, एकै ए चित्त, अर एकै ए मनसा राखों। 3 बिरोध अर झूठी बड़ाई के खात्तर किम्मे ना करो, पर दीनता तै एक दूसरै नै अपणे तै आच्छा समझों। 4 हरेक आपणे ए हित की न्ही, बलके दुसरा के हित की चिंता करै। 5 जिसा मसीह यीशु का सुभाव था उसा ए तेरा भी सुभाव हो; 6 जिसनै पणमेशर के रूप म्ह भी होके भी पणमेशर के बराबर होण नै आपणे वश म्ह राखण की चीज ना समझा। 7 बलके आपणे आप नै इसा शून्य कर दिया, अर दास का रूप धारण करया, अर माणस की समानता म्ह हो गया। 8 अर माणस के रूप म्ह प्रकट होके आपणे आप नै दीन करया, अर याडै तक के मौत, हाँ क्रूस की मौत भी सह ली। 9 इस कारण पणमेशर नै उस ताही घणा महान् भी करया, अर उसनै वो नाम दिया जो सारे नामां म्ह ऊँचा सै, 10 के जो सुर्ग म्ह अर धरती पै धरती के नीचे सै, वे सारी यीशु के नाम पै गोड़े टेके; 11 अर पणमेशर पिता की महिमा के खात्तर हरेक जीभ मान ले के यीशु मसीह ए प्रभु सै।

## दुनिया म्ह चान्दणे की ढाल चमको

12 इस करके हे मेरै प्रियो, जिस ढाळ थम सदा तै हुक्म मानते आये सों, उसा ए इब भी ना सिर्फ मेरै गैल रहंदे होए पर खास करके इब मेरै दूर रहण पै भी डरते अर कापते होए आपणे-आपणे उद्धार का काम पूरा करते जाओ; 13 क्यूँके पणमेशर ए सै जिसनै आपणी इच्छा अर काम, दोनु बातां का करण का असर गेरा सै। 14 सारे काम बिना कुडकड़ाए अर बिना विवाद के करया करो, 15 ताके थम निर्दोष अर भोळे होके टेढ़े अर हठीले माणसा के बीच पणमेशर के निष्कंक उलाद बणे रहों, जिन्ह के बीच म्ह थम जीवन का वचन लिये होए दुनिया म्ह जलते दिवै के बरोब्बर दिखाई देओ सों। 16 के मसीह के दिन मन्त्रै घमण्ड करण का कारण हो के ना मेरी भाज दोड़ ना मेरी मेहनत करणा बेकार होवै। 17 जै मन्त्रै थारै बिश्वास रूपी बलिदान अर सेवा के गेल आपणा लहू भी बहाना पड़े, तोभी मै आनन्दित सूँ अर थारै सारा के गेल आनन्द करूं सूँ। 18 उस्से तरियां थम भी आनन्दित होओ अर मेरै गेल आनन्द करो।

### तीमुथियुस अर इपफ्रुदितुस

19 मन्त्रे प्रभु यीशु मसीह म्ह आशा सै के मै तीमुथियुस नै थारै धोरै ताळी सी भेजुगौं, ताके थारै हालातां नै जाण के मन्त्रे शान्ति मिलौ। 20 क्यूँके मेरै धोरै इसा सुभाव का कोए कोणी जो शुध्द मन तै थारी चिंता करै। 21 क्यूँके सारे आपणे स्वार्थ की खोज म्ह रहवै सै, ना के यीशु मसीह की। 22 पर उस ताही तो थमनै परखा सै अर जाण भी लिया के जिसा बेड़ा पिता के गेल्या रहवै सै, उसा ए उसनै सुसमाचार के फैलान म्ह मेरै गैल मेहनत करी। 23 इस करके मन्त्रे आशा सै के ज्यो ही मन्त्रे बेरा लागैगौं के मेरी के दशा होगी, त्यो ही मै उसनै ताळी सी भेज द्युगौं। 24 अर मन्त्रे प्रभु म्ह भरोसा सै के मै आप भी ताळ्या आऊँगा। 25 पर मन्त्रे इपफ्रुदितुस नै जो मेरा भाई अर सहकर्मी साथी योध्दा अर थारा दूत, अर जरूरी बातां म्ह मेरी सेवा करण आळा सै, थारै धोरै भेजणा जरूरी समझा। 26 क्यूँके उसका मन थारै सारया म्ह लाग्या रखा था, इस करके ओ बेचैन रहवै था क्यूँके थमनै उसकी बीमारी का हाल सुणया था। 27 पक्का वो बीमार तो होग्या था उरै ताही ओ मरण पै था पर पणमेशर नै उस पै दया करी, अर सिर्फ उरसे पै नही पर मेरै पै भी करी मन्त्रे शोक पै शोक नहीहो। 28 इस करके मन्त्रे उस ताही भेजण का और भी जल्न करया के तू उसतै फेर मिल के आनन्दित हो जा अर मेरा भी शोक घट जावै। 29 इस करके तू प्रभु म्ह उसतै घणा आनन्द के गैल मिलये, अर इसा का आद्वर करया करिये। 30 क्यूँके ओ मसीह के काम खात्तर आपणी जान जोखिम म्ह गेरके मौत के धोरै आ ग्या था ताके जो कमी थारी ओड़ तै मेरी सेवा म्ह होई उसनै पूरा करै।

### सच्ची धार्मिकता

3 इस करके हे मेरै भाइयो, प्रभु म्ह आनन्दित रहौ। वो ए बात थारै ताही बारबार लिखण म्ह मन्त्रे तो कोए कष्ट नीं होदा, अर इस्से म्ह थारी भलाई सै, 2 कुत्यां तै चौकस रहौ, उन्ह बुरे काम करण आळा तै चौकस रहौ, उन्ह काट कूट करण आळा तै चौकस रहौ। 3 क्यूँके खतना आळे तो हम्मे सां जो पणमेशर की अगवाई तै उपासना करां सां, अर मसीह यीशु पै घमण्ड करां सां, अर देही पै भरोसा नीं रखते। 4 पर मै तो देही पै भरोसा राख सकूँ सूं। जै किसे और नै देही पै भरोसा राखण का बिचार हो, तो मै उस तै भी बढ़के राख सकूँ सूं। 5 आठवें दिन मेरा खतना होया, इस्राएल की पीढी अर बिन्यामीन के गोत्र का सूं; इब्रानियां का इब्रानी सूं; नियम के बारें म्ह जै कहो तो फरीसी सूं। 6 उत्साह के बारें म्ह जै कहो तो कलीसिया का सतावण आळा; अर नियम की धार्मिकता के बारें म्ह जै कहो तो निर्दोष था। 7 पर जो बात मेरै लाभ की थी, उन्हें ताही मै मसीह के कारण नुकसान समझ बेठ्या। 8 बल्के आपणे प्रभु मसीह यीशु की पिच्छाण की उत्तमता के कारण सारी बातां नै नुकसान समझ सूं। जिसके कारण मन्त्रे सारी चीजां का नुकसान ठाया, अर उन्ह नै कूड़ा समझ सूं। जिसतै मै मसीह नै पाऊँ 9 अर उरसे म्ह पाया जाऊँ; ना के आपणी उस धार्मिकता के गैल, जो नियम तै सै बल्के उस धार्मिकता के गैल जो मसीह पै बिश्वास करण के कारण सै अर पणमेशर की ओड़ तै बिश्वास करण पै मिलै सै; 10 ताके मै उसनै अर उसके मृत्युंजय की सामर्थ्य नै, अर उसके गैल दुखां म्ह साझीदार होण के मर्म(मर्ज) नै जाणु, अर उसकी मौत की बरोबरी नै पाऊँ 11 के किसे भी रीति तै मरे होया म्ह तै जी उठण के ओध्ये तैई पुहँचु।

### निसाणै की ओड़ भाजणा

12 यो मतलब नहीके मन्त्रे मिल लिया सै, या सिद्ध हो लिया सूं: उस पदार्थ नै पकड़ण खात्तर भाज्या जा सूं, जिसके खात्तर मसीह यीशु नै मेरै ताही पकड़या था। 13 हे भाइयो, मेरी भावना या नहीके मन्त्रे पकड़ लिया सै; पर सिर्फ यो एक काम करूँ सूं के जो बात पाच्छे रह ग्यी उत्रै भूल के, आगै की बातां की ओड़ बढ़ता होया, 14 निसाणै की ओड़ भाज्या चला ज्या सूं, ताके वो ईनाम पाऊँ जिसके खात्तर पणमेशर नै मेरै ताही मसीह यीशु म्ह ऊप्पर बुलाया सै। 15 म्हारै म्ह तै जितनै सिद्ध सै, यो ए बिचार राखवै, अर जै किसे बात म्ह थारा ए बिचार हो तो पणमेशर उस ताही भी थारै पै प्रकट कर देगा।

16 इस करके जड़ै तैई हम पुहँचे सां, उरसे के मुताबिक चालां। 17 हे भाइयो, थम सारे मिलके मेरी ढाळ चालों, अर उनकी पिच्छण राखवो जो इस रीति पै चालै सै जिसका उदाहरण थम म्हारै म्ह पाओ सों; 18 क्यूँके घणे ए इसी चाल चालै सै, जिनका जिक्र मन्त्रे थारै ताही बारबार करया सै, अर इब भी रो-रो के कहुँ सूं के वे आपणी चाल चलण तै मसीह के क्रूस के बैरी। 19 उनका अंत विनाश सै, उनका परमात्मा पेट सै, वे आपणी शर्म की बातां पै घमण्ड करै सै अर धरती पै की चिजां पै मन लगाई रह सै। 20 पर म्हारा देश सुर्ग पै सै; अर हम एक उद्धारकर्ता प्रभु यीशु मसीह के ओड़ै तै आण की बाट देखण लाग रह सों 21 वो आपणी शक्ति के असर के मुताबिक जिसके जरिये ओ सारी चिजां नै आपणे वस म्ह कर सकै सै, म्हारी दीन-हिनदेही का रूप बदल के, आपणी देही के अनुकूल बना देगा।

### व्यावहारिक निर्देश

4 इस करके हे भाइयो, जिन्ह म्ह मेरा जी लगा रहवै सै, जो मेरै आनन्द अर मुकट हो, हे प्रिय भाइयो, प्रभु म्ह इसी ढाळ टिकये रहौ। 2 मै यूओदिया नै भी समझाऊँ सूं अर सुन्तुखे नै भी, के वे प्रभु म्ह एक मन रहौ। 3 हे सच्चे सहकर्मी, मै तेरै तै भी बिनती करूँ सूं के तू उन बिरबानिया की मदद कर, क्यूँके उन्हनै मेरै गैल सुसमाचार फैलाण म्ह, क्रैमंस अर मेरै और सहकर्मियां समेत मेहनत करी, जिनका नाम जीवन की किताब म्ह लिखे होए सै। 4 प्रभु म्ह सदा आनन्दित रहौ; मै फेर कहुँ सूं, आनन्दित रहौ। 5 थारी कोमलता सारे माणसा पै प्रकट हो। प्रभु धोरै सै; 6 किसे भी बात की चिंता ना करो; पर हरेक बात म्ह थारै निवेदन, प्रार्थना अर बिनती के जरिये धन्यवाद के गैल पणमेशर के आगै हाजिर करै जावै। 7 फेर पणमेशर की शान्ति, जो सारी समझ तै परै सै, थारै मन अर बिचारां नै मसीह यीशु म्ह सुरक्षित राखवैगी। 8 इस करके हे भाइयो, जो बात सच सै, जो बात आदरणीय, जो उचित, पवित्र सुहावनी अर जो-जो बात मनभावनी सै, यानी जो भी सद्गुण अर प्रशंसा की बात सै उत्रै पै ध्यान लगाया करो। 9 जो बात थमनै मेरै तै सीखी, अर पायी सै, उत्रै नै मान्या करो, फेर जो पणमेशर शान्ति का सोता सै थारै गैल रहैगा।

### दान के खात्तर धन्यवाद

10 मै प्रभु मै घणा आनन्दित सूं के जिब्व इतने दिनां के पाच्छे थारी चिंता मेरै बारें म्ह फेर जागी सै; पक्का थारै शुरुआत म्ह भी इसका बिचार था, पर थमनै अवसर नही मिला। 11 यो नही के मै आपणी कमी के कारण यो कहुँ सूं; क्यूँके मन्त्रे यो सिख्या सै के जिस दशा म्ह मै सूं; उरसे म्ह सब्र करूँ। 12 मै दीन होणा भी जाणु सूं अर बढ़ना भी जाणु सूं; हरेक बात अर सारे हालात्तां म्ह मन्त्रे तृप्त होणा, भूखा रहणा, अर बढ़ना घटना सिख्या सै। 13 जो मन्त्रे सामर्थ्य देवै सै उस म्ह मै सारा किम्मे कर सकूँ सूं। 14 तो भी थमनै भला करया के मेरै क्लेश म्ह मेरे साझीदार होए। 15 हे फिलिप्पियो, थम आप भी जाणो सों के सुसमाचार के शुरुआत म्ह, जिब्व मै मकिदुनिया तै विदा होया, जब मन्त्रे छोड़ किस्से मण्डली नै लेण देण के बारें म्ह मेरी मदद नहीकरी। 16 इसे ढाळ जिब्व मै थिस्सलुनीके म्ह था, फेर भी थमनै मेरी कमी दूर करण खात्तर एक बार नही बल्के दो बार किमे भेज्या था। 17 यो नही के मै दान चाहूँ सूं पर मै इसा फळ चाहूँ सूं जो थारै फायदै खात्तर बढ़ता जावै। 18 मेरै धोरै सारा किम्मे सै, बल्के भोत घणा ए सै; जो चीज थमनै इपफ्रुदितुस के हाथ तै भेजी थी उत्रै पाके मै तृप्त हो ग्या सूं, ओ तो सुख देणआळी महक, पाण लायक कुर्बानी सै, जो पणमेशर नै भावै सै। 19 मेरा पणमेशर जो भी उस धन के मुताबिक जो बड़ाई समेत मसीह यीशु म्ह सै, थारी हरेक घटी नै पूरी करेगा। 20 म्हारै पणमेशर अर पिता की बड़ाई युगायुग होंदै रहवै। आमीना।

### आखरी नमस्कार

21 हरेक पवित्र माणस नै, जो यीशु मसीह म्ह सै नमस्कार कहौ। जो भाई मेरै गैल सै थारै ताही नमस्कार कहूँ सै। 22 सारे पवित्र माणस, खास करके जो कैसर के घराणै तै सै, थारै ताही नमस्कार कहूँ सै। 23 म्हारै यीशु मसीह का अनुग्रह थारी आत्मा के गैल रहवै।

# कुलुस्सियों

## अभिवादन

1 पौलुस की ओड़ तै, जो पणमेशर की मर्जी तै मसीह यीशु का प्रेरित सै, अर भाई तीमुथियुस की ओड़ तै सै, 2 मसीह म्ह उन पवित्र अर बिश्वासी भाईयां के नाम जो कुलुस्से म्ह रहवै सै: म्हारे पिता पणमेशर की ओड़ तै थारे ताही अनुग्रह अर शान्ति मिलती रहवै।

## धन्यवाद की प्रार्थना

3 हम थारै खात्तर रोज बिनती करके अपणे प्रभु यीशु के पिता यानी पणमेशर का धन्यवाद करां सां, 4 क्यूँके हमनै सुण्या सै के यीशु मसीह पै थारा बिश्वास सै, अर सारे पवित्र माणसां तै थम प्रेम राखों सों; 5 उस आस करी होई चीज के कारण जो थारे खात्तर सुर्ग म्ह धर राख्खी सै, जिसका वर्णन थमनै उस सुसमाचार के सचे वचन म्ह सुण राख्या सै, 6 जो थारै धोरै पुहच्या सै, अर जिसा दुनिया म्ह भी फळ लावै सै, अर बढ़ता जावै सै, उसे तरियां जिस दिन तै थमनै उस ताही सुण्या अर सच्चाई तै पणमेशर का अनुग्रह पिच्छाणा सै, थारै म्ह भी इसा ए करै सै। 7 उस्से की शिक्षा थमनै म्हारे गैल काम करणीये प्यारे इपफ्रास तै पाई, जो म्हारे खात्तर मसीह का बिश्वास लायक दास सै। 8 उस्से नै थारे प्रेम ताही जो आत्मा म्ह सै म्हारै म्ह दिखाया। 9 इस करके जिस दिन तै यो सुण्या सै, हम भी थारे खात्तर या प्रार्थना अर विनती करना न्ही छोड़ते के थम सारे आत्मिक ज्ञान अर समझ गैल पणमेशर की मर्जी म्ह पुरे भर जाओ। 10 ताके थारा चाल चलन प्रभु के लायक हो, अर वो सारी ढाळ तै राज्जी हो, अर थारे म्ह हरेक ढाळ के भले कामां का फळ लागै, अर थम पणमेशर की पिच्छाण म्ह बढ़ते जाओ, 11 उसकी महिमा की शक्ति के मुताबिक सारी ढाळ की सामर्थ्य तै ताकतवर होंदे जाओ, उरै ताही के खुशी के गैल हरेक ढाळ तै थावस अर सहन की शक्ति दिखा सकी, 12 अर पिता का धन्यवाद करते रहो, जिसणै म्हारै ताही इस लायक बनाया के (आत्मिक) ज्योति म्ह पवित्र माणसां के गैल वसीहत म्ह साझीदार हो। 13 उस्से नै म्हारै ताही अन्धकार के वश तै छुड़ा के अपणे प्यारे बेट्टे के राज म्ह दाखिल कराया, 14 जिस म्ह हमनै छुटकारा यानी पापां की माफी मिलै सै।

## मसीही की श्रेष्ठता अर उसके काम

15 वो तो ना दिखण आळे पणमेशर का रूप अर सारी सृष्टी म्ह जेठा सै। 16 क्यूँके उस्से म्ह सारी चीजां की सृष्टी होई, सुर्ग की हो या धरती की, देखी या अनदेखी, के राजगद्दी/सिंहासन, के प्रभुताएँ, के प्रधानताएँ, के अधिकार, सारी चीज उस्से के जरिये अर उस्से खात्तर सजाई गई सै। 17 वो ए सारी चीजां म्ह पैहला सै, अर सारी चीज उस्से म्ह डटी रहवै सै। 18 वो देह, यानी कलीसिया का सिर सै; वो ए शुरुआत सै, अर मरे होया म्ह तै जी उठण आळा म्ह जेठा, के सारी बातां म्ह वो ए प्रधान बणै। 19 क्यूँके पिता की खुशी उस्से म्ह सै के उस म्ह सारी भरपूरी वास करै, 20 अर उसके क्रूस पै बहे होए लहू के जरिये मेल मिलाप करके, सारी चीजां का उस्से के जरिये अपणे गैल मेल कर ले, चाहे वो धरती की हों चाहे सुर्ग की। 21 थम जो पैहल्ये लिंकडे होए थे अर बुरे कामां के कारण मन तै बैरी थे; 22 उसनै इब उसकी शारीरिक देह म्ह मृत्यु के जरिये थारा भी मेल कर लिया ताके थमनै अपणे आगै पवित्र अर बिना कलंक अर बेकसूर बणा के खड्या करै। 23 जै थम बिश्वास की नीम पै मजबूत बनै रहों अर उस सुसमाचार की आस नै जिस ताही थमनै सुण्या

सै ना छोड़ो, जिसका प्रचार अकास के तळै की सारी सृष्टी म्ह करया गया सै, उसका मै, पौलुस, दास बण्या।

## कलीसिया का सेवक -पौलुस

24 इब मै उन दुखां के कारण मौज करुं सू, जो थारै खात्तर उठाऊँ सू अर मसीह के क्लेश की कमी उसकी देह के खात्तर, यानी कलीसिया के खात्तर, अपणे गात म्ह पूरी करुं सू; 25 जिसका मै पणमेशर के उस प्रबन्ध के मुताबिक दास बणा जो थारै खात्तर मेरे ताही सौप्या गया, ताके मै पणमेशर के वचन नै पूरा-पूरा प्रचार करुं। 26 यानी उस राज नै जो बखत अर पीढ़ियां तै गुप्त रह्या, पर इब उसके उन पवित्र माणसां पै दिख्या सै। 27 जिन पै पणमेशर नै दिखाणा चाह्या के उन्नै बेरा हो के गैरजातां म्ह उस राज की महिमा का मोल के सै, अर वो यो सै के मसीह जो महिमा की आस सै थारे म्ह रहवै सै। 28 जिसका प्रचार करके हम हरेक आदमी नै चेतावनी देवा सां अर सारे ज्ञान तै हरेक आदमी नै सिखावा सां, के हम हरेक आदमी नै मसीह म्ह सिध्द करके खड्या करां। 29 उस्से के खात्तर मै उसकी उस शक्ति के मुताबिक जो मेरे म्ह सामर्थ्य के गैल असर गरै सै, तन मन लगा के मेहनत भी करुं सू।

2 मै चाहूँ सू के थम जाण ल्यो के थारे अर उनके खात्तर जो लौदीकिया म्ह सै अर उन सारया खात्तर जिन्नै मेरा शारीरिक मुँह नै दिख्या, मै किसी मेहनत करुं सू, 2 ताके उनके मनां म्ह शान्ति हो अर प्रेम तै वे आप्पस म्ह जुड़े रहवै, अर वे पूरी समझ का सारा धन लेले, अर पणमेशर पिता के सारे भेद नै यानी मसीह नै पिच्छाण लो। 3 जिस म्ह बुद्धि अर ज्ञान के सारे भण्डार छिपे होए सै। 4 यो मै इस करके कहूँ सू के कोए आदमी थमनै लोभ देण आळी बातां तै धोखा ना दे। 5 फेर भी मै गात म्ह थारै तै दूर सू, तौभी आत्मा म्ह थारै धोरै सू, अर थारे व्यवस्थित जीवन नै अर थारे बिश्वास की, जो मसीह म्ह सै, मजबूती देखके राज्जी होऊँ सू।

## मसीही म्ह जीवन की भरपूरी

6 आखर जिस तरियां थमनै मसीह यीशु ताही प्रभु करके मान लिया सै, उस्से तरियां उस्से म्ह चाल्दे रहो, 7 अर उस्से म्ह जड़ पकड़ते अर बढ़ते जाओ; अर जिसे थम सिखाए गये उस तरियां बिश्वास म्ह मजबूत होंदे जाओ, अर ज्यादा तै ज्यादा धन्यवाद करते रहो। 8 चौकस रहो के कोए थमनै उस तत्व ज्ञान अर बेकार के धोखे के जरिये अपना निवाळा ना बणा ले, जो माणसां की रिवाज अर दुनिया की आदि शिक्षा के मुताबिक तो सै, पर मसीह के मुताबिक कोनी। 9 क्यूँके उस म्ह परमात्मा होण की सारी भरपूरी सदा वास करै सै, 10 अर थम उस्से म्ह भरपूर होगे सों जो सारी प्रधानता अर हक्क का शिरोमणि सै। 11 उस्से म्ह थारा इसा खतना होया सै जो हाथ तै न्ही होंदा, यानी मसीह का खतना, जिस तै शरीरिक देह उतार दी जावै सै, 12 अर उस्से के गैल बपतिस्म म्ह गाड़ै ग्ये अर उस्से म्ह पणमेशर की सामर्थ्य पै बिश्वास करके, जिसनै उस ताही मरे होया म्ह तै जिवाया, उसके गैल जी उठे। 13 उसणै थारे ताही भी, जो अपणे कसूरा अर अपणी देही की खतनारहित दशा म्ह मुर्दा थे, उसके गैल जिवाया, अर म्हारे सारे कसूर माफ करे, 14 अर विधियां का वो लेख जो म्हारे नाम पै अर म्हारे बिरोध म्ह था मिटा दिया, अर उस ताही क्रूस पै कीला तै जकड़ के आगै तै हटा दिया। 15 अर उसणै प्रधानता अर अधिकारां ताही ऊपर तै उतार के उनका खुल्लमखुल्ला तमाशा बणाया अर क्रूस के जरिये उन पै जयजयकार की अवाज

सुणाई 16 इस करके खाण पीण या त्यौहार, नये चाँद अर सब्त के बारें म्ह थारा कोए फैसला ना करौ 17 क्यूँके ये सारी आण आळी बातां की छाया सै, पर मूल चीज मसीह की सै 18 कोए आदमी आत्म हीनता अर सुर्ग दूतां की पूजा करा के थारै ताही दौड के ईनाम तै (वंचित) राख ना दे। इसा आदमी देखी होड बातां म्ह लाग्या रहवै सै अर आपणी शरीरिक समझ पै बेकार फुल्लै सै, 19 अर उस शिरोमणि नै पकड़े न्ही रहन्दा जिस तै सारी देही जोडा अर पट्टा के जरिये पालन पोषण पा के अर एक सुधा गठ के, पणमेशर की ओड़ तै बढती जावै सै।

### मसीही के गेल मरना अर जीना

20 जिब्व के थम मसीह के गैल दुनिया की पुराणी शिक्षा की ओड़ तै मर ग्ये सों, तो फेर क्यूँ उनकी तरियां जो दुनिया के सै जीवन बिताओ सों? थम इसी विधियां की के बस म्ह क्यूँ रहौ सों 21 के 'इसके ना भीड़ये,' 'उस ताही ना खाके देखिये,' अर उसके हाथ ना लगाइये? 22 (ये सारी चीज काम म्ह लांदे-लांदे नाश हो जावैगी) क्यूँके ये माणस के हुक्म अर शिक्षा के मुताबिक सै। 23 इन विधियां म्ह अपनी मर्जी के मुताबिक गद्दी होई भक्ति की रीत, अर आत्मा हीनता, अर शारीरिक योगाभ्यास के भाव तै ज्ञान का नाम तो सै, पर शारीरिक लालसां नै रोकण म्ह इन तै किम्मे भी फायदा न्ही होंदा।

3 आखर जिब्व थम मसीह के गैल जिवाए गये, तो सुर्गीय चीजां की खोज म्ह रहौ, जडै मसीह विधमान सै अर पणमेशर की सोळी ओड़ बैठ्या सै। 2 धरती पै की न्ही पर सुर्गीय चीजां पै ध्यान लगाओ, 3 क्यूँके थम तो मर लिये अर थारा जीवन मसीह के गैल पणमेशर म्ह छिपा होया सै। 4 जिब्व मसीह जो म्हारा जीवन सै, दिख्यैगा, फेर थम भी उसके गैल महिमा सहित दिखोगे।

### पुराणा जीवन अर नया जीवन

5 इस करके अपने उन अंगा नै मार गेरों जो धरती पै सै, यानी जारी, अशुद्धता, दुष्कामना, बुरी लालसा अर लोभ नै जो मूर्ति पूजा के बराबर सै। 6 इन्हे के कारण पणमेशर का प्रकोप हुक्म ना मानणआळा पै पडै सै। 7 अर थम भी, जिब्व इन बुराईयां म्ह जीवन बिताओ थें तो इन्हे के मुताबिक चाल्लों थो 8 पर इब थम भी इन सारया नै, यानी छोह रोष, बैर भाव, चुगली अर मुँह तै गाली बकना ये सारी बात छोड द्यो। 9 एक दूसरे तै झूठ ना बोलो, क्यूँके थमनै पुराने माणसपण नै उसके कामां समेत उतार दिया सै 10 अर नये माणसपण नै पैहर लिया सै, जो अपने रचण आळे के रूप के मुताबिक ज्ञान पाण के खात्तर नया बणन्दा जावै सै। 11 उन्हे म्ह ना तो यूनानी रह्या ना यहूदी, ना खतना ना खातनारहित, ना जंगली, ना स्कुती, ना दास अर ना आजाद: सिर्फ मसीह सब कीमे अर सब म्ह सै। 12 इस करके पणमेशर के छाट्टे होडा के समान जो पवित्र अर प्यारे सै, बड़ी करुणा, अर भलाई, अर दीनता, अर नम्रता, अर सहनशीलता धारण करो, 13 अर जै किसे नै किसे पै दोष देण का कोए कारण हो, तो एक दुसरै की सह ल्यो अर एक दुसरै के कसूर माफ करो; जिसे प्रभु नै थारे कसूर माफ करे, उस्से तरियां थम भी करो। 14 इन सारा के ऊपर प्रेम का जो सिद्धता का कटिबन्ध सै बाँध ल्यो। 15 मसीह की शान्ति जिसके खात्तर थम एक देह हो के बुलाये भी ग्ये सों, थारै मन म्ह वास करै; अर थम धन्यवादी बणे रहो। 16 मसीह के वचन नै अपने मन म्ह (अधिकाई) आच्छी दाह तै बसण द्यो, अर सिद्ध ज्ञानसुधा एक दुसरै नै सिखाओ अर समझाओ, अर अपने-अपणे मन म्ह अनुग्रह के गैल पणमेशर के खात्तर भजन अर स्तुतिगान अर आत्मिक गीत गाओ। 17 वचन म्ह या काम म्ह जो किम्मे भी करो, सारा प्रभु यीशु मसीह के नाम तै करो, अर उसके जरिये पणमेशर पिता का धन्यवाद करो। 18 हे पत्नियों, जिसा प्रभु म्ह सही सै, उसा ए अपने-अपणे धणी के अधीन रहो।

### नये जीवन के पारिवारिक नियम

19 हे धणीयो, अपनी-अपणी पत्नी तै प्रेम राखो, अर उन तै कठोरता ना करो। 20 हे बाळकों, सारी बातां म्ह अपने-अपणे माँ बाप के हुक्म नै मानो, क्यूँके प्रभु इसतै खुश हो सै। 21 हे बाळकां आळो, अपने बाळकां नै तंग ना करो, ना होके उन्हेकी हिम्मत टूट जावै। 22 हे सेवको, जो देही के मुताबिक थारे मालिक सै, सारी बातां म्ह उन्हेके हुक्म का पालन करो, माणसां नै राजी करण आळा के समान दिखाण के खात्तर न्ही, पर मन की सीधाई अर पणमेशर के डर तै। 23 जो किम्मे थम करो सों, तन मन तै करो, या समझ के के माणसां के खात्तर न्ही पर प्रभु के खात्तर करो सों; 24 क्यूँके थम जाणो सों के थमनै इसके बदलै प्रभु तै वसीहत मिलैगी; थम प्रभु मसीह की सेवा करो सों। 25 क्यूँके जो बुरा करे सै ओ अपनी बुराई का फळ पावैगा, ओडै किस्से का पक्षपात कोन्या।

4 हे मालिकों, अपने-अपणे नौकरां के गैल न्याय अर ठीक ठाक बरताव करो, या समझ के के सुर्ग म्ह थारा भी एक मालिक सै।

### कई व्यावहारिक सलाह

2 प्रार्थना म्ह लागे रहो, अर धन्यवाद के गैल उस म्ह जागते रहो; 3 अर उसके गैल ए गैल म्हारे खात्तर भी प्रार्थना करते रहो के पणमेशर म्हारे खात्तर वचन सुणान का इसा द्वार खोल दे, के हम मसीह के उस भेद का वर्णन कर सकै जिसके कारण म्ह कैद म्ह सू, 4 अर उसनै इसा दिखाऊँ, जिसा मन्त्रे करना सही सै। 5 मौकै नै कीमती समझ के बाहर आळा के गैल अक्लमंदी तै बरताव करो। 6 थारा वचन सदा अनुग्रह समेत सलोना हो थमनै हरेक माणस ताही बढ़िया ढाळ तै जवाब देणा आ जावै।

### आखरी अभिवादन

7 प्यारे भाई अर बिश्वास लायक दास तुखिकुस, जो प्रभु म्ह मेरै गैल काम करणीया सै, मेरी सारी बात तन्नै बता देगा। 8 उस ताही मन्त्रे इस खात्तर थारै धोरै भेज्जा के थमनै म्हारे हाल का बेरा पाट जावै अर थारै मन नै शान्ति दे। 9 उसके गैल मन्त्रे उनेसिमुस ताही भी भेज्जा सै जो बिश्वास लायक अर प्रिय भाई अर थारै म्ह तै सै; ये थमनै याडै की सारी बात बता दंगे। 10 अरिस्तर्कुस, जो मेरै गैल कैदी सै, अर मरकुस जो बरनबास का भाई लागे सै (जिसके बारें म्ह थमनै हुक्म मिल्या सै के जै वो थारै धोरै आवै, तो उसतै आच्छी ढाळ बरताव करिये), 11 अर यीशु जो यूस्तुस कुहावै सै, थारै ताही नमस्कार कहै सै। खतना करे होया माणसां म्ह तै सिर्फ यो ए पणमेशर के राज्य के खात्तर मेरै गैल काम करणीया अर मेरी शान्ति का कारण रह्या सै। 12 इपफ्रास, जो थारै म्ह तै सै अर मसीह यीशु का दास सै, थारै तै नमस्कार कहै सै अर सदा थारै खात्तर बिनतीयां म्ह कोशिश करै सै, ताके थम सिद्ध हो के पुरे बिश्वास के गैल पणमेशर की मर्जी पै टिक्ये रहो। 13 मै उसका गवाह सू के वो थारै खात्तर अर लौदीकिया, हियरपुलिस आळा के खात्तर बड़ी मेहनत करता रहै सै। 14 प्रिय वैद लूका अर देमास का थारै ताही नमस्कार। 15 लौदीकिया के भाईयाँ नै, अर नुमफास अर उन्हेके घर की कलीसिया नै नमस्कार कहियो। 16 जिब्व या चिट्ठी थम पढ ल्यो तो इसा करयो के लौदीकिया की कलीसिया म्ह भी या पढी जावै, अर वा चिट्ठी जो लौदीकिया तै आवै उसनै थम भी पढईयो। 17 अर अर्खिप्पुस तै कहिये के जो सेवा प्रभु म्ह तेरै ताही सौप्यी ग्यी सै, उस ताही ध्यान लगाके पूरी करयो। 18 मै (पोलुस) का आपणे हाथ तै लिख्योडा नमस्कार। मेरी बेडिया नै याद राखियो। थारे पै अनुग्रह होंदा रहवै। आमीन।

# 1 थिस्सलुनीकियों

## अभिवादन

1 पौलुस अर सिलवानुस अर तीमुथियुस की ओड़ तै थिस्सलुनीकियों की कलीसिया के नाम जो पणमेशर पिता अर प्रभु यीशु मसीह म्ह सैं | अनुग्रह अर शान्ति थारै ताहीं मिल्दी रहवै |

## थिस्सलुनीकियों का बिश्वास

2 हम आपणी प्रार्थनायां म्ह थारै ताहीं याद करदे अर सारी हाण थम सारया के बारै म्ह पणमेशर का धन्यवाद करां सां | 3 अर अपणे पणमेशर अर पिता के श्यामी थारै बिश्वास के काम, अर प्रेम की मेहनत, अर म्हारै प्रभु यीशु मसीह म्ह आस की धीरता ताहीं सारी हाण याद करां सां | 4 अर हे भाईयो, पणमेशर के प्यारे माणसो हमनै बेरा सैं, के थम छांटे होड़ सो | 5 क्यूँके म्हारा सुसमाचार थारै धोरै ना सिर्फ बचन मात्र ए म्ह बल्के सामर्थ्य अर पवित्र आत्मा, अर बड्डे पक्के बिश्वास के गेल पहोच्या सैं; जिसा थमनै बेरा सैं, के हम थारै खातर थारै म्ह किस ढाळ बण गे थे | 6 अर थम बड्डे क्लेश म्ह पवित्र आत्मा के आनन्द के गेल्या बचन ताहीं मानके म्हारी ओड़ प्रभु जीसी चाल चालण लागे | 7 उरै ताहीं के मकिदुनिया अर अखया के सारे बिश्वासीयां के खातर थम बढिया मिसाल बणै | 8 क्यूँके थारै उरै तै ना सिर्फ मकिदुनिया अर अखया म्ह प्रभु का बचन सुणाया गया, पर थारै बिश्वास की जो पणमेशर पै सैं, हरेक जगहा इसा जिक्का फेल गया सैं, के हमनै कहण की जरूरत ए कोनी | 9 क्यूँके वे आप ए म्हारै बारै म्ह बतावै सैं के थारै धोरै म्हारा आणा किस ढाळ होया; अर थम किस ढाळ मूर्तियां तै पणमेशर के कात्री पलटे ताके जिन्दे अर साचे पणमेशर की सेवा करो | 10 अर उसके बेटे के सुर्ग पै तै आण की बाट देख्दे रहो जिस ताहीं उसनै मरे होयां म्ह तै जिन्दा करया, अर्थात् यीशु की, जो म्हारै ताहीं आण आळे प्रकोप तै बचावै सैं |

2 हे भाईयो, थमनै आप ए बेरा सैं के म्हारा थारै धोरै आणा बेकार कोनी होया, 2 बल्के थमनै आप ए बेरा सैं के पहल्या फिलिप्पी म्ह दुःख ठाण अर रोळे सहण पै भी म्हारै पणमेशर नै म्हारै तै इसी हिम्मत देई, के हम पणमेशर का सुसमाचार भारया बीरोधां के होंदे होए भी थमनै सुणावां | 3 क्यूँके म्हारा उपदेश ना भ्रम तै सैं अर ना अशुद्धता तै, अर ना छळ के गेल सैं; 4 पर जिसा पणमेशर नै म्हारै ताहीं लायक ठहराके सुसमाचार सौंप्या, हम उसा ए बयान करां सां, अर इस म्ह माणसां नै नीं, पर पणमेशर ताहीं जो म्हारै मनां नै जाँचै सैं, राजी करां सां | 5 क्यूँके थमनै बेरा सैं के हम ना तो कदे चापलूसी की बात करां थे, अर ना लोभ के खातर बहाना करां थे, पणमेशर गवाह सैं; 6 अर हालांकि हम मसीह के प्रेरित होण के कारण थारै पै बोझ गेर सकां थे, तोभी हम माणसां तै आदर कोनी चाहवां थे, अर ना थारै तै, ना और किसे तै | 7 पर जिस तरियां माँ अपणे बाळकां का पालण-पोषण करै सैं, उसे तरियां ए हमनै भी थारै बिचाळै रहके कोमलता दिखाई सैं; 8 अर उसे तरियां ए हम थारी चाहनां करदे होए, ना सिर्फ पणमेशर का सुसमाचार, पर आपणा-आपणा प्राण भी थारै ताहीं देण नै त्यार थे, ज्यांतै के थम म्हारे प्यारे हो गये थे |

9 क्यूँके, हे भाईयो, थम म्हारी मेहनत अर दर्द नै याद राखो सो; हमनै ज्यांतै दिन-रात काम धन्धा करदे होए थारै म्ह पणमेशर का सुसमाचार प्रचार करया के थारै म्ह तै किसे पै बोझ ना होवै | 10 थम आप ए गवाह सो, अर पणमेशर भी गवाह सैं के थम बिश्वासीयां के बिचाळै म्हारा बीवार किसा पवित्र अर धार्मिक अर बेकसूर रे | 11 थमनै बेरा सैं के जिसा पिता अपणे

बाळकां के गेल्या बीवार करै सैं, उसा तरियां ए हम भी थारै म्ह तै हरेक ताहीं उपदेश करदे, अर शान्ति देन्दे, अर समझावां थे 12 के थारा चाल-चलण पणमेशर के जोगा हो, जो थमनै अपणे राज्य अर महिमा म्ह बुलावै सैं |

13 ज्यांतै हम भी पणमेशर का धन्यवाद सारी हाण करां सां के जिब्ब म्हारै जरिये पणमेशर के सुसमाचार का बचन थारै धोरै पहोच्या, तो थम नै उस ताहीं माणसां का नीं पर पणमेशर का बचन समझके (अर साच ए इसा सैं) अपणाया; अर ओ थम बिश्वासीयां म्ह जो बिश्वास राखो सो, असरदार सैं | 14 ज्यांतै थम, हे भाईयो, पणमेशर नै उन कलसियायां के जीसी चाल चालण लागे जो यहूदिया म्ह मसीह यीशु म्ह सैं, क्यूँके थमनै भी अपणे माणसां तै उसा ए दुःख पाया जिसा उन्नै यहूदियां तै पाया था, 15 जिन्नै प्रभु यीशु ताहीं अर नब्बियाँ ताहीं मार दिया अर म्हारै ताहीं भी सताया, अर पणमेशर उन तै राजी कोनी, अर वे सारे माणसां का बिरोध करै सैं, 16 अर वे गैर-जात्तां म्ह उनके उद्धार के खातर बात करण तै हमनै रोके सैं के वे सारी हाण अपणे पापां का नपुआ भरदे रहैं; पर उन पै पणमेशर का भयानक प्रकोप आण पहोच्या सैं |

## कलीसिया तै फेट्ण की अभिलाषा

17 हे भाईयो, जिब्ब हम माड़ी वार के खातर, मन म्ह नीं बल्के सई म्ह, थारै तै न्यारे हो गे थे, तो हमनै घणी चाहना के गेल्या थारा मुँह देखण के खातर और भी घणी कोशिश करी | 18 ज्यांतै हमनै (यानिके मुझ पौलुस नै) एक बर नीं बल्के दो बर थारै धोरै आणा चाहया, पर शैतान हमनै रोक्के रहया | 19 भला म्हारी उम्मीद या आनन्द या बड़ाई का मुकुट के सैं? के म्हारै प्रभु यीशु के श्यामी उसके आण का बख्त थम ए नीं होगे? 20 म्हारी बड़ाई अर आनन्द थमे सो |

## तीमुथियुस का खन्दाया जाणा

3 ज्यांतै जिब्ब म्हारै तै और ना रहया गया, तो हमनै यो ठहराया के एथेन्स म्ह ऐकले रह जावां | 2 अर हमनै तीमुथियुस ताहीं जो मसीह के सुसमाचार म्ह म्हारा भाई, अर पणमेशर का सेवक सैं, इसकरके खन्दाया, के ओ थमनै स्थिर करै; अर थारै बिश्वास के बारै म्ह थमनै समझावै | 3 के कोए इन क्लेशां के कारण डगमगा नीं जावै; क्यूँके थम आप जाणो सो, के हम इन ए के खातर ठहराए गये सां | 4 क्यूँके पहल्या भी, जिब्ब हम थारै उरै थे, तो थारै तै कहया करां थे, के हमनै क्लेश उठाणे पड़ैगें, अर इसा ए होया सैं, अर थम जाणो भी सो | 5 इस कारण जिब्ब मेरै तै और ना रहया गया, तो थारै बिश्वास का हाल जानण के खातर खन्दाया, के कद्वे इसा ना होवै, के परीक्षा करण आळे नै थारी परीक्षा करी हो, अर म्हारी मेहनत बेकार हो गयी हो |

## तीमुथियुस द्वारा समाचार मिलणा

6 पर इब्बे तीमुथियुस नै जो थारै धोरै तै म्हारै उरै आके थारै बिश्वास अर प्रेम का सुसमाचार सुणाया अर इस बात ताहीं भी सुणाया, के थम सारी हाण प्रेम के गेल्या म्हारै ताहीं याद करो सो, अर म्हारै देखण की चाहना राखो सो, जिसा हम भी थमनै देखण की | 7 ज्यांतै हे भाईयो, हमनै आपणी सारे दुःख अर क्लेश म्ह थारै बिश्वास तै थारै बारै म्ह शान्ति पाई | 8 क्यूँके इब जे थम प्रभु म्ह पक्के रहो तो हम जिन्दे सां | 9 अर जिसा आनन्द हमनै थारै कारण अपणे पणमेशर के श्यामी सैं, उसके बदलै थारै बारै म्ह हम किस

तरियां तै पणमेशर का धन्यवाद करां? 10 हम दिन-रात घणी ए प्रार्थना करदे रहवां सां, के थारा मुँह देक्खां, अर थारै बिश्वास की कमी पूरी करां।

11 इब म्हाारा पणमेशर अर पिता आप ए अर म्हाारा प्रभु यीशु, थारै उरै आण कै खातर म्हाारी अगुवाई करै। 12 अर प्रभु इसा करै, के जिसा हम थारै तै प्रेम राक्खां सां; उस्से तरियां ए थारा प्रेम भी आपस म्ह, अर सारे माणसां कै गेल्या बधै, अर बढोत्तरी करदा जावै। 13 ताके ओ थारे मनां नै इसा स्थिर करै के जिब म्हाारा प्रभु यीशु अपणे सारे पवित्र लोगां कै गेल आवै, तो वे म्हाारे पणमेशर अर पिता कै श्यामी पवित्रता म्ह बेकसूर ठहरै।

### जीवन जो पणमेशर ताहीं राज्जी करो

4 ज्यांतै हे भाइयो, हम थारै तै बिनती करां सां अर थारै तै प्रभु यीशु म्ह समझावां सां के जिसा थम नै म्हारै तै लायक चाल चालणा अर पणमेशर ताहीं राज्जी करणा सिख्या सै, अर जिसा थम चालो भी सो, उस्से तरियां ए और भी बधदे जाओ। 2 क्यूँके थमनै बेरा सै के हमनै प्रभु यीशु की ओड तै थारै ताहीं कौण-कौण सी आज्ञा पहोचाई। 3 क्यूँके पणमेशर की मर्जी या सै के थम पवित्र बणो: यानिके जारी तै बचे रहो, 4 अर थारै म्ह तै हरेक पवित्रता अर आदर कै गेल्या आपणी बीरबात्री नै पाणा जाणै, 5 अर यो काम अभिलाषा तै नीं, अर ना उन जात्तां कै तरियां, जो पणमेशर नै कोनी जाणदी, 6 के इस बात म्ह कोए आपणे भाई नै ना ठगै, अर ना उस पै दाँव चलावै, क्यूँके प्रभु इन सारी बात्तां का पलटा लेणआळा सै; जिसा के हमनै पहल्या ए थारै तै कहया अर चिताया भी था। 7 क्यूँके पणमेशर नै म्हारै ताहीं अशुद्ध होण कै खातर नीं, पर पवित्र होण कै खातर बुलाया सै। 8 इस कारण जो इस नै तुच्छ जाणै सै, ओ माणस नै नीं पर पणमेशर नै तुच्छ जाणै सै, जो आपणा पवित्र आत्मा थारै ताहीं देवै सै।

9 पर भाई-चारे के प्रेम कै बारै म्ह यो जरूरी नीं के मै थारै धोरै कीमे लिक्खूँ, क्यूँके आपस म्ह प्रेम राखणा थमनै आप ए पणमेशर तै सिख्या सै; 10 अर सारे मकिदुनिया के सारे भाइयां कै गेल्या इसा करो भी सो। पर हे भाइयो, हम थमनै समझावां सां के और भी बधदे जाओ, 11 अर जीसी हमनै थारै ताहीं आज्ञा देई सै, उस्से तरियां ए बोल-बाल्ले रहण अर आपणा-आपणा काम-काज करण अर आपणे-आपणे हाथां तै कमाण की कोशिश करो; 12 ताके बाहरणआळ्यां तै आदर पाओ, अर किसे चीज की कमी ना होवै।

### यीशु का पुनरागमन

13 हे भाइयो, हम नीं चाहन्दे के थम उनकै बारै म्ह जो सोवै सैं, अनजाण रहो; इसा ना हो के थम दुसरयां कै बरगे दुःख करो जिन्नै आस नीं। 14 क्यूँके जै हम बिश्वास करां सां के यीशु मरया अर जिन्दा भी उठ्या, तो उस्से तरियां ए पणमेशर उन्नै भी जो यीशु म्ह सो गये सैं, उस्से कै गेल्या ले आवैगा। 15 क्यूँके हम प्रभु के बचन के मुताबिक थारै तै न्यू कहवां सां के हम जो जिन्दे सां अर प्रभु कै आण ताहीं बचे रहवांगे, सोए होया तै कद्वे आगै नीं बढांगे। 16 क्यूँके प्रभु आप ए सुर्ग तै उतरैगा; उस बख्त ललकार, अर प्रधान दूत का बोल सुणाई देवैगा, अर पणमेशर की तुरही फूँकी जावैगी; अर जो मसीह म्ह मरे सै, वे पहल्या जिन्दे उठैगें। 17 फेर हम जो जिन्दे अर बचे रहवांगे उनकै गेल्या बादळां पै ठा लिए जावांगे के हवा म्ह प्रभु तै मिला; अर इस तरियां तै हम हमेशा कै खातर प्रभु कै गेल्या रहवांगे। 18 इस तरियां इन बात्तां तै एक-दुसरे ताहीं शान्ति दिया करो।

### पुनरागमन कै खातर त्यार रहणा

5 पर हे भाइयो, इसकी आट कोनी, के बख्तां अर कालां कै बारै म्ह थारै धोरै कीमे लिख्या जावै। 2 क्यूँके थम आप सई जाणो सो के जिसा रात नै चोर आवै सै, उस्से तरियां ए प्रभु का दिन आणआळा सै। 3 जिब माणस कहँदे होंगे, "राज्जी-खुशी सां, अर कीमे डर कोनी," तो उन पै चाणचक विनाश आण पडैगा, जिस ढाळ गर्भवती पै दर्द; अर वे किस्से तरियां तै नीं बचैंगे। 4 पर हे भाइयो, थम तो अन्धकार म्ह नीं सो के ओ दिन थारै पै चोर की ढाळ आण पडै। 5 क्यूँके थम सारे चाँदणै की ऊलाद अर दिन की ऊलाद सो; हम ना रात के सां, ना अन्धकार के सां। 6 ज्यांतै हम दुसरयां की तरियां सोन्दे ना रहवां, पर जागदे अर चौकन्ने रहवां। 7 क्यूँके जो सोवै सैं, वे रात ए नै सोवै सैं, अर जो मतवाले होवै सैं वे रात ए नै मतवाले होवै सैं। 8 पर हम जो दिन के सां, बिश्वास अर प्रेम की झिलम पहरकै अर उद्धार की आस का टोप पहरकै होशियार रहवां। 9 क्यूँके पणमेशर नै म्हारै ताहीं छोह कै खातर नीं, पर ज्यांतै ठहराया सै के हम अपणे प्रभु यीशु मसीह कै जरिये उद्धार पावां। 10 ओ म्हारै खातर इस कारण मरया के हम चाहे जागदे हों चाहे सोन्दे हों, सारे मिलकै उस्से कै गेल्या जिवां। 11 इस कारण एक दुसरे ताहीं तसल्ली द्यो अर एक दुसरे की बढोत्तरी का कारण बणो, जिसा के थम करो भी सो।

### कलीसिया ताहीं उपदेश

12 हे भाइयो, हम थारै तै बिनती करां सां के जो थारै म्ह मेहनत करै सैं, अर प्रभु म्ह थारे अगुवे सैं, अर थमनै शिक्षा देवै सैं, उनका आदर करो। 13 अर उनकै काम के कारण प्रेम कै गेल्या उन ताहीं घणा ए आदर कै जोगे समझो। आपस म्ह मेल-मिलाप तै रहो। 14 हे भाइयो, हम थमनै समझावां सां के जो सई चाल नीं चाल्दे उन ताहीं समझाओ, डरपोकां ताहीं हिम्मत द्यो, कमजोरां ताहीं सम्भाळो, सारया की ओड सहनशीलता दिखाओ। 15 सावधान! कोए किसे तै बुराई कै बदलै बुराई ना करै; पर सारी हाण भलाई करण पै त्यार रहवै, आपस म्ह अर सारया तै भी भलाई ए की कोशिश करो। 16 सारी हाण राज्जी रहो। 17 लगातार प्रार्थना म्ह लागे रहो। 18 हरेक बात म्ह धन्यवाद करो; क्यूँके थारै खातर मसीह यीशु म्ह पणमेशर की याए मर्जी सै। 19 आत्मा ताहीं ना बुझाओ। 20 भविष्यवाणीयां नै तुच्छ ना जाणो। 21 सारी बात्तां ताहीं परखो; जो आच्छी सै उसनै थाम्बे राक्खो। 22 सारी ढाळ की बुराई तै बचे रहो।

### आशरिवाद

23 शान्ति का पणमेशर आप ए थमनै पूरी तरियां तै पवित्र करै; अर थारी आत्मा अर प्राण अर देही म्हारै प्रभु यीशु कै आण ताहीं पुरे-पुरे अर बेकसूर सुरक्षित रहवै। 24 थारा बुलाणआळा साच्चा सै, अर ओ इसा ए करैगा। 25 हे भाइयो, म्हारै खातर प्रार्थना करो। 26 सारे भाइयां नै पवित्र चुम्मे तै नमस्कार करो। 27 मै थारै ताहीं प्रभु की सोह देऊँ सूँ के या चिड्डी सारे भाइयां नै पढ़कै सुणाई जावै। 28 म्हाारे प्रभु यीशु मसीह का अनुग्रह थारै पै होंदा रहवै।

## 2 थिस्सलुनीकियों

### अभिवादन

1 पौलुस अर सिलवानुस अर तीमुथियुस की ओड़ तै थिस्सलुनीकियों की कलीसिया के नाम, जो म्हारै पिता पणमेशर अर प्रभु यीशु मसीह म्ह सै | 2 म्हारै पिता पणमेशर अर प्रभु यीशु मसीह तै थमनै अनुग्रह अर शान्ति मिलदी रहवै |

### न्याय का दिन

3 हे भाइयो, थारै बारै म्ह हमनै हरेक बख्त पणमेशर का धन्यवाद करणा चाहिये, अर यो सई भी सै ज्यातै के थारा बिश्वास घणा बधदा जावै सै, अर थम सारया का प्रेम आपस म्ह घणा ए होंदा जावै सै | 4 उरै ताहीं के हम आप पणमेशर की कलीसिया म्ह थारै बारै म्ह घमण्ड करां सां, के जितने रोळे अर क्लेश थम सहो सो, उन सारया म्ह थारा धीरज अर बिश्वास दीक्खै सै |

5 यो पणमेशर के साच्चे न्याय का साफ सबूत सै; के थम पणमेशर के राज्य के जोगे ठहरो, जिस के खातर थम दुःख भी ठाओ सो | 6 क्यूँके पणमेशर के लवै यो न्याय सै, के जो थमनै क्लेश देवै सै, उन्नै बदलै म्ह क्लेश दे | 7 अर थमनै जो क्लेश पाओ सो, म्हारै गेल चैन दे; उस बख्त जिब्व के प्रभु यीशु अपणे सामर्थी दुत्तां के गेल, धधकती होई आग म्ह सुर्ग तै दिखैगा, 8 अर जो पणमेशर नै नीं पिच्छणदे, अर म्हारै प्रभु यीशु के सुसमाचार ताहीं नीं मांदे उन तै पलटा लेवैगा | 9 वे प्रभु के श्यामी तै, अर उसकी शक्ति के तेज तै दूर होके अनन्त विनाश का दण्ड पावैगें | 10 न्यू उस दिन होवैगा, जिब्व ओ अपणे पवित्र माणसां म्ह महिमा पाण, अर सारे बिश्वास करण आळ्यां म्ह हैरानी का कारण होण नै आवैगा; क्यूँके थमनै म्हारी गवाही का बिश्वास करया | 11 ज्यातै हम सारी हाण थारै बारै म्ह प्रार्थना भी करां सां, के म्हारा पणमेशर थारै ताहीं इस बुलाहट के जोगा समझै, अर भलाई की हरेक मर्जी, अर बिश्वास के हरेक काम ताहीं सामर्थ्य सुदा पूरा करै | 12 ताके म्हारे पणमेशर अर प्रभु यीशु मसीह के अनुग्रह के मुताबिक म्हारे प्रभु यीशु मसीह का नाम थारै म्ह महिमा पावै, अर थम उसम्ह |

### पाप का पुरुष यानिके विनाश का बेड़ा

2 हे भाइयो, इब हम अपणे प्रभु यीशु मसीह के आण, अर उसके धोरै अपणे कट्टे होण के बारै म्ह थारै तै बिनती करां सां | 2 के किसे आत्मा, या बचन, या चिह्नी के जरिये, जो के मानो म्हारी ओड़ तै हो, न्यू समझके के प्रभु का दिन आण पहोच्या सै, थारा मन चाणचक अस्थिर ना हो जावै अर ना घबराओ | 3 किसे तरियां तै किसे के धोक्खे म्ह ना आणा, क्यूँके ओ दिन नीं आवैगा जिब्व ताहीं धर्म का त्याग ना हो लेवै, अर ओ पाप का माणस यानिके विनाश का बेड़ा दिख नीं जावै | 4 जो बिरोध करै सै, अर हरेक तै जो ईश्वर या पूज्य कुहवावै सै, अपणे आप ताहीं बड्डा ठहरावै सै, उरै ताहीं के ओ पणमेशर के मन्टर म्ह बैठके अपणे आप ताहीं ईश्वर ठहरावै सै | 5 के थारै ताहीं याद कोनी के जिब्व म्ह थारै उरै था, तो थारै तै ये बात कहया करूँ था? 6 थमनै उस चीज का बेरा सै, जो उस ताहीं इबे रोक रहा सै के ओ अपणे ए बख्त म्ह दिख जावै | 7 क्यूँके अधर्म का भेद इब भी काम करदा जावै सै, पर इब्वे एक रोकणआळा सै, अर जिब्व ताहीं ओ दूर ना हो जावै ओ रोकै रहवैगा | 8 फेर ओ अधर्म दिख जावैगा, जिस ताहीं प्रभु यीशु अपणे मुँह की फूँक तै मार देवैगा, अर अपणे आण के तेज तै भस्म करैगा | 9 उस अधर्म का आणा शैतान के काम के मुताबिक सारी ढाळ की झूठी सामर्थ,

अर निशान, अर अनोक्खे काम के गेल्या, 10 अर नाश होणआळ्यां के खातर अधर्म के सारे ढाळ के धोक्खे के गेल्या होगा; क्यूँके उन्नै सच तै प्यार कोनी करया जिस तै उनका उद्धार होंदा | 11 इस्से कारण पणमेशर उन म्ह एक भटका देणआळी सामर्थ नै खन्दावैगा के वे झूठ का बिश्वास करै, 12 ताके जितने माणस सच का बिश्वास नीं करदे, बल्के अधर्म तै राजी रहवै सै, वे सारे दण्ड पावैगें |

### दूढ़ बणे रहो

13 हे भाइयो, अर प्रभु के प्यारे माणसो, चाहिये के हम थारै बारै म्ह सारी हाण पणमेशर का धन्यवाद करदे रहवां, क्यूँके पणमेशर नै सरुआत तै थारै ताहीं छोट लिया के आत्मा के जरिये पवित्र बणके, अर सच का बिश्वास करके उद्धार पाओ, 14 जिस के खातर उसनै थारै ताहीं म्हारै सुसमाचार के जरिये बुलाया, के थम म्हारै प्रभु यीशु मसीह की महिमा नै पाओ | 15 ज्यातै हे भाइयो, स्थिर रहो; अर जो-जो बात थम नै चाहे बचन या चिह्नी के जरिये म्हारै तै सीक्खी सै, उन्नै थाम्बे राक्खो |

16 म्हारा प्रभु यीशु मसीह आप ए, अर म्हारा पिता पणमेशर, जिस नै म्हारै तै प्रेम राख्या अर अनुग्रह तै अनन्त शान्ति अर घणी बढ़िया उम्मीद देई सै, 17 थारै मनां म्ह शान्ति दे अर थमनै हरेक आच्छे काम अर बचन म्ह मजबूत करै |

### प्रार्थना करण का अनुरोध

3 आखर म्ह, हे भाइयो, म्हारै खातर प्रार्थना करया करो के प्रभु का बचन इसा तावळा फैलै अर महिमा पावै, जिसा थारै म्ह होया, 2 अर हम आड्डे अर भुन्डे माणसां तै बचे रहवां क्यूँके हरेक म्ह बिश्वास नीं | 3 पर प्रभु साच्चा सै; ओ थारै ताहीं मजबूती तै स्थिर करैगा अर उस दुष्ट तै बचाए राक्खैगा | 4 हमनै प्रभु म्ह थारै ऊप्पर भरोस्सा सै के जो-जो हुक्म हम थारै तै देवां सां, उन्नै थम मानो सो, अर मांदे भी रहोगे | 5 पणमेशर के प्रेम अर मसीह के धीरज की ओड़ प्रभु थारै मन की अगुवाई करै |

### काम करण का उत्तरदायित्व

6 हे भाइयो, हम थारै ताहीं अपणे प्रभु यीशु मसीह के नाम तै आज्ञा देवां सां के थम हरेक इसे भाई तै न्यारे रहो जो गलत चाल चाल्ले अर जो शिक्षा उसनै म्हारै तै पाई उसके मुताबिक नीं करदा | 7 क्यूँके थमनै आप बेरा सै के किस तरियां तै म्हारै जीसी चाल चालणी चाहिये, क्यूँके हम थारै बिचाळै गलत चाल नीं चाल्ले, 8 अर किसे की रोटी मुफ्त म्ह कोनी खाई; मेहनत अर कष्ट तै दिन-रात काम-धन्धा करां थे के थारै म्ह तै किसे पै बोझ ना बणा | 9 न्यू नीं के हमनै हक्क कोनी, पर ज्यातै के अपणे आप ताहीं थारै खातर आच्छा नमूना ठहरावां के थम म्हारै जीसी चाल चाल्लो | 10 क्यूँके जिब्व हम थारै उरै थे, जिद भी यो हुक्म थारै ताहीं देवां थे के जै कोए काम करणा ना चाहवै तो खाण भी ना पावै | 11 हम सुणां सां के कीमे माणस थारै बिचाळै गलत चाल चाल्ले सै, अर कीमे काम नीं करदे पर दुसरयां के काम म्ह हाथ गेरै सै | 12 इसा ताहीं हम प्रभु यीशु मसीह म्ह हुक्म देवां अर समझावां सां के बोल-बाल्ले काम करके आपणी ए रोटी खाया करै | 13 थम, हे भाइयो, भलाई करण म्ह हिम्मत ना छोड़ियो | 14 जै कोए म्हारी इस चिह्नी की बात नै कोनी मानै तो उस पै निगाह राक्खो, अर उसकी संगति ना करो, जिस तै ओ

सर्मिन्दा होवै। <sup>15</sup> तौभी उस ताहीं बैरी मतना समझो, पर भाई जाणकै सोद्वी दुवाओ।

### आखरी नमस्कार

<sup>16</sup> इब प्रभु जो शान्ति का सोत्ता से आप ए थारे ताहीं सारी हाण अर हरेक ढाळ तै शान्ति देवै। प्रभु थम सारया कै गेल्या रहवै। <sup>17</sup> मै, पौलुस, अपणे

हाथ तै नमस्कार लिखूँ सूँ। हरेक चिड्डी म्ह मेरा योए निशान सै; मै इस्से ढाळ तै लिखूँ सूँ। <sup>18</sup> म्हारे प्रभु यीशु मसीह का अनुग्रह थम सारया पै होंदा रहवै।



# 1 तीमुथियुस

## अभिवादन

1 पौलुस की ओड़ तै जो म्हारै उद्धारकर्ता पणमेशर अर म्हारी उम्मीद का आधार मसीह यीशु की आज्ञा तै मसीह यीशु का प्रेरित सै, 2 तीमुथियुस कै नाम जो बिश्वास म्ह मेरा साचा बाळक सै: पिता पणमेशर, अर म्हारै प्रभु मसीह यीशु की ओड़ तै तन्नै अनुग्रह अर दया अर शान्ति मिलदी रहवै।

## झुड़े मास्टरां के बिरुद्ध चेतावनी

3 जिस तरियां मन्त्रै मकिदुनिया नै जान्दे बख्त तेरै ताहीं समझाया था, के इफिसुस म्ह रहकै कीमे माणसां ताहीं हुकम दे के दुसरे ढाळ की शिक्षा ना दें, 4 अर उन कहानियां अर अनन्त वंशावलियां पै मन ना लावै, जिन तै रोळे पैदा होवै सै, अर पणमेशर के उस इन्तजाम कै मुताबिक नीं, जो बिश्वास कै आसरै पै सै। उस्से तरियां ए दुबारा भी कहूँ सूँ। 5 आज्ञा का निचोड़ यो सै के शुद्ध मन अर आच्छे विवेक, अर बिना कपट बिश्वास तै प्रेम पैदा हो। 6 इन ताहीं छोड़के कितने माणस बकवाद की ओड़ भटकगे सै, 7 अर व्यवस्थापक तो होणा चाहवै सै, पर जो बात कहवै अर जिन ताहीं मजबूती तै बोळें सै, उन ताहीं समझदे भी कोनी। 8 पर हमनै बेरा सै के जै कोए व्यवस्था नै सई ढाळ काम म्ह ल्यावै तो वे भले सै। 9 न्यू जाणकै के व्यवस्था धर्मी माणस कै खातर नीं पर अधर्मियां, निरकुशां, भगतिहिनां, पापीयां, अपवित्र अर अशुद्ध माणसां, माँ-बाप के मारणीयां, खूनीयां, 10 जारी करणीये, माणसां गेल भुन्डे काम करणीये, माणस के बेचण आळे, झूठ बोळण आळे, अर झूठी सोह खाण आळे, अर इनकै अलावा खरे उपदेश के सारे बिरोधियां कै खातर ठहराई गई सै। 11 याए परमधन्य पणमेशर की महिमा कै उस सुसमाचार कै मुताबिक सै, जो मेरै ताहीं सौंप्या गया सै।

## अनुग्रह कै खातर धन्यवाद

12 मै अपने प्रभु मसीह यीशु का जिसनै मेरै ताहीं सामर्थ देई सै, धन्यवाद करूँ सूँ के उसनै मेरै ताहीं बिश्वास जोगा समझकै आपणी सेवा कै खातर ठहराया। 13 मै तो पहल्या बुराई करण आळा, अर सताण आळा, अर अन्धेर करण आळा था; तौभी मेरै पै दया होई, क्यूँके मन्त्रै अबिश्वास की हालत म्ह बिन समझे बुझ्जे ये काम करे थे। 14 अर म्हारै प्रभु का अनुग्रह उस बिश्वास अर प्रेम कै गेल्या जो मसीह यीशु म्ह सै, भोत-ए घणा होवै। 15 या बात साची अर हरेक तरियां तै मानण जोगी सै के मसीह यीशु पापियां का उद्धार करण कै खातर दुनिया म्ह आया, जिनम्ह सारया तै बड्डा मै सूँ। 16 पर मेरै पै ज्यांतै दया होई के मुझ सारया तै बड्डे पापी म्ह यीशु मसीह आपणी पूरी सहनशीलता दिखावै, के जो माणस उस पै अनन्त जीवन कै खातर बिश्वास करैंगे उनकै खातर मै एक बढिया नमूना बणु। 17 इब पुराणा राजा यानिके अविनाशी, अनदेकरे, ऐकले पणमेशर का आदर अर महिमा युगानुयुग होंदी रहवै। आमीन। 18 हे बेट्टे तीमुथियुस, उन भविष्यवाणीयां कै मुताबिक जो पहल्या तेरै बारे म्ह करी गई थीं, मै या आज्ञा सौंपूँ सूँ के तू उनकै मुताबिक आच्छी लड़ाई नै लड़दे रह, 19 अर बिश्वास अर उस आच्छे विवेक नै थाम्बे राख, जिस ताहीं दूर करण कै कारण कितन्यां का बिश्वास रूपी जहाज डूब गया। 20 उन्ने म्ह हुमिनयुस अर सिकंदर सै, जिन ताहीं मन्त्रै शैतान ताहीं सौंप दिया सै के वे पणमेशर की बुराई करणा ना सिकखै।

## आराधना सम्बन्धी निर्देश

2 इब मै सारया तै पहल्या यो आग्रह करूँ सूँ के बिनती, प्रार्थना, निवेदन, अर धन्यवाद सारे माणसां कै खातर करे जावै। 2 राजायां अर सारे ऊँचे ओद्रे आळ्यां कै खातर ज्यांतै के हम आराम अर चैन कै गेल्या सारी भगति अर गंभीरता तै जीवन बितावां। 3 यो म्हारै उद्धार करणीये पणमेशर नै आच्छा लागे अर भावै भी सै, 4 जो यो चाहवै सै के सारे माणसां का उद्धार होवै, अर वे सच ताहीं सई ढाळ तै पिच्छाण लेवै। 5 क्यूँके पणमेशर एक ए सै, अर पणमेशर अर माणसां कै बिचाळै भी एक ए बिचोला सै, यानिके मसीह यीशु जो माणस सै। 6 जिसनै अपने आप ताहीं सारया कै छुटकारै के दाम म्ह दे दिया, अर उसकी गवाही सई बख्त पै दी गई। 7 मै साची कहूँ सूँ, झूठ नीं बोल्दा, के मै इस्से मक्सद तै प्रचारक अर प्रेरित अर गैर-जात्ता कै खातर बिश्वास अर सच का उपदेशक ठहराया गया।

8 ज्यांतै मै चाहूँ सूँ के हरेक जंगहा माणस, बिना छोह अर बहस कै पवित्र हाथां नै ठाकै प्रार्थना करया करै। 9 उस्से तरियां ए लुगाई भी संकोच अर संयम कै गेल्या सुहावने लत्या तै अपने आप ताहीं संवारै; ना के बाळ गूँथण अर सोन्ने अर मोतियां अर घणे मंहगे लत्या तै, 10 पर भले काम्मां तै, क्यूँके पणमेशर की भगति करणआळी लुगाईयां कै खातर योए सई भी सै। 11 लुगाई नै बोल-बाली रहकै पूरी अधीनता तै सिखणा चाहिये। 12 मै कहूँ सूँ के लुगाई ना उपदेश करै अर ना माणस पै हुकम चलावै, पर बोल-बाली रहवै। 13 क्यूँके आदम पहल्या, उसके पाच्छे हच्चा बणाई गई; 14 आदम भकाया नीं गया, पर लुगाई भकाई म्ह आकै अपराधिनी होई। 15 तौभी लुगाई बाळक पैदा करण कै द्वारा उद्धार पावैगीं, जै वे संयम सुदा बिश्वास, प्रेम, अर पवित्रता म्ह स्थिर रहवै।

## कलीसिया म्ह अध्यक्ष (बिशप)

3 या बात सची सै के जो प्रधान होणा चाहवै सै, तो वो भले काम की चाह करै सै। 2 या जरूरी सै के प्रधान बेकसूर, अर एक ए बीरबान्नी का धणी, संयमी, सुशील, सभ्य, मेहमान का आदर-सत्कार करणीया, अर सिखणा म्ह सई हो। 3 दारुबाज या छेतण-पीटण आळा ना हो, बल्के नरम हो, अर ना रोळा करण आळा, अर ना धन का लोभ्मी हो। 4 अपने घर का आच्छा इन्तजाम करण आळा हो, अर अपने बाळ-बच्चां नै सारी गम्भीरता तै अधीन राख्दा हो। 5 जिबब कोए अपने घर ए का इन्तजाम करणा ना जाणदा हो, तो पणमेशर की कलीसिया की रुखाळी किस ढाळ करैगा? 6 फेर यो के नया चेला ना हो, इसा ना हो के घमण्ड करके शैतान कै बरगीं सजा भुगतै। 7 अर बाहरणआळ्यां म्ह भी उसका आच्छा नाम हो, इसा ना हो के बदनाम होकै शैतान कै फंदै म्ह फँस जावै।

## कलीसिया म्ह सेवक (डिकन)

8 उस्से तरियां ए सेवकां नै भी गम्भीर होणा चाहिये, दोगले, दारुबाज अर नीच कमाई के लोभ्मी ना हो; 9 पर बिश्वास के भेद नै शुद्ध विवेक तै सुरक्षित राखै। 10 अर ये भी पहल्या परखे जावै, फेर जै बेकसूर लिकडै तो सेवक का काम करै। 11 इस्से तरियां तै लुगाईयां नै भी गम्भीर होणा चाहिये; तोहमन्द लाण आळी ना हों, पर सचेत अर सारी बात्तां म्ह बिश्वास जोगी हों। 12 सेवक एक ए बीरबान्नी के धणी हों अर बाळ-बच्चां अर अपने घरां का आच्छा इन्तजाम करणा जाणदे हों। 13 क्यूँके जो सेवक का काम आच्छी

ढाळ तै कर सकै सै, वे अपने खातर आच्छा ओद्धा अर उस बिश्वास म्ह जो मसीह यीशु पै सै, घणी हिम्मत पावै सै।

### महान रहस्य

14 मै तेरै धोरे तावळा आण की आस राखण पै भी ये बात तेरै तै ज्यांतै लिक्खूं सूँ 15 के जै मेरै आण म्ह वार हो, तो तू जाण ले के पणमेशर के कुन्बे म्ह जो जिन्दे पणमेशर की कलीसिया सै अर जो सच का खम्भा अर नीव सै, उसम्ह किस ढाळ बीवार करणा चाहिये। 16 इसम्ह शक कोनी के भगति का भेद गम्भीर सै, अर्थात्, ओ जो देही म्ह प्रगट होया, आत्मा म्ह धर्मी ठहरया, सुर्गदुत्तां नै दिख्या, गैर-जात्तां म्ह उसका प्रचार होया, अर महिमा म्ह ऊपर टाया गया।

### झूठे मास्टर

4 पर आत्मा साफ तौर पै कहवै सै के आण-आळे बखतां म्ह कितने माणस भरमाणआळी आत्मायां, अर भूडी औपरी आत्मायां की शिक्षायां पै मन लाकै बिश्वास तै भटक जावैगै। 2 यो उन झूठे माणसां के कपट के कारण होवैगा, जिनका विवेक मान्नो बढदे होए लोहे तै दाग्या गया हो, 3 जो ब्याह करण तै रोक्कें, अर खाण की कीमे चीजां तै परै रहण का हुक्म देवैगै, जिन्नै पणमेशर नै ज्यांतै बनाया के बिश्वासी अर सच के पिच्छानण आळे उन ताहीं धन्यवाद कै गेल्या खावै। 4 क्यूँके पणमेशर की बनाई होइ हरेक चीज आच्छी सै, अर कोए चीज ना अपनाण कै जोगी कोनी; पर यो के धन्यवाद कै गेल्या खाई जावै। 5 क्यूँके पणमेशर के बचन अर प्रार्थना के जरिये शुद्ध हो जावै सै।

### मसीह यीशु का आच्छा सेवक

6 जै तू भाइयां नै इन बात्तां की सोद्दी दुवान्दा रहवैगा, तो मसीह यीशु का बढिया सेवक ठहरैगा; अर बिश्वास अर उस बढिया उपदेश की बात्तां तै, जो तू मान्दा आया सै, तेरा पालण-पोषण होन्दा रहवैगा। 7 पर अशुद्ध अर बूढीयां के जीसी कहानीयां तै न्यारा रह; अर भगति की साधना कर। 8 क्यूँके देही की साधना तै माडा सा फेयदा होवै सै, पर भगति सारी बात्तां के खातर फेयदेमन्द सै, क्यूँके इस बख्त अर आणआळे जीवन की भी प्रतिज्ञा इस्से कै खातर सै। 9 या बात साच्ची अर हरेक ढाळ तै मानण जोगी सै। 10 क्यूँके हम मेहनत अर कोशिश इस्से खातर करां सां के म्हारी आस उस जिन्दे पणमेशर पै सै, जो सारे माणसां का अर अपने खुद करके बिश्वासीयां का उद्धार करणीया सै।

11 इन बात्तां का हुक्म दे अर सिखान्दा रह। 12 कोए तेरी जवानी ताहीं तुच्छ ना समझण पावै; पर बचन, अर चाल-चलण, अर प्रेम, अर बिश्वास, अर पवित्रता म्ह बिश्वासीयां के खातर बढिया नमूना बण जा। 13 जिब्ब ताहीं मै नीं जाऊँ, जिद ताहीं पढण अर उपदेश देण अर सिखाण म्ह लौलीन रह। 14 उस वरदान के बारे म्ह, जो तेरै म्ह सै, अर भविष्यवाणी के जरिये प्राचीनां के हाथ धरदे बख्त तन्नै मिल्या था, निश्चिन्त मतना रह। 15 इन बात्तां नै सोच्दा रह अर इन्नै म्ह आपणा ध्यान लाये रह, ताके तेरी बढोत्तरी सारया पै दिख जावै। 16 आपणी अर आपणे उपदेश की चौकसी राख। इन बात्तां पै स्थिर रह, क्यूँके इसा करदा रहवैगा तो तू अपने अर आपणे सुनण आळ्यां के खातर भी उद्धार का कारण होगा।

### बिश्वासियाँ के प्रति जिम्मेदारी

5 किसे बूढ़े ताहीं ना धमका, पर उस ताहीं बाप जाणके समझा दे, अर गाबरूआं नै भाई जाणके; 2 बूढी लुगाईयां नै माँ जाणके, अर गाबरू लुगाईयां नै पूरी पवित्रता तै बाण जाणके समझा दे।

3 उन बिधवायां का, जो साच्च-ए बिधवा सै, आदर कर। 4 जै किसे बिधवा के बाळक या नाती-पोत्ते हों, तो वे पहल्या अपणै ए कुन्बे कै गेल्या भगति का सलूक करणा, अर आपणे माँ-बाप आदि नै उनका हक देणा सीक्खें, क्यूँके यो पणमेशर नै भावै सै। 5 जो साच्च-ए बिधवा सै, अर उसका कोए नीं, वा पणमेशर पै आस राक्खें सै, अर दिन-रात बिनती अर प्रार्थना म्ह लौलीन

रहवै सै; 6 पर जो भोगविलास म्ह पड़गी, वा जिन्दे जी मर गी सै। 7 इन बात्तां का भी हुक्म दिया कर ताके वे बेकसूर रहवै। 8 पर जै कोए आपणा की अर खुद करके अपने कुन्बे की फिक्र ना करै, तो ओ बिश्वास तै मुकर गया सै अर अबिश्वासी तै भी भूडा बण गया सै।

9 उस्से बिधवा का नाम लिख्या जावै तो साठ साल तै घाट की ना हो, अर एक ए धणी की बीरबान्नी रही हों, 10 अर भले काम म्ह आच्छी नाम्मी रही हो; जिस नै बाळकां का पालण-पोषण करया हो; मेहमानां की सेवा करी हो, पवित्र माणसां के पाँव धोये हों, दुखियां की मदद करी हो, अर हरेक भले काम म्ह मन लाया हो। 11 पर गाबरू बिधवायां के नाम ना लिखणा, क्यूँके जिब्ब वे मसीह का बिरोध करके सुख-विलास म्ह पड़ जावै सैं तो ब्याह करणा चाहवै सैं, 12 अर कसूरवार ठहरै सैं, क्यूँके उन्नै अपने पहलडे बिश्वास ताहीं छोड़ दिया सै। 13 इसके गेल्या ए गेल्या वे घर-घर हांड कै आलसी होणा सिक्खें सैं, अर सिर्फ आलसी नीं पर बकबक करदी रहै अर दुसरयां के काम म्ह हाथ भी गेरदी रह सैं अर गलत बात बोळें सैं। 14 ज्यांतै मै न्यू चाहूँ सूँ के जवान बिधवां ब्याह करै, अर बाळक जांमै अर घर-बार सम्भालें, अर किसे बिरोधी नै बदनाम करण का मौक्का ना देवै। 15 क्यूँके घण-खरी तो बहकके शैतान के पाच्छै हो ली सैं। 16 जै किसे बिश्वासिनी के उरै बिधवां हों, तो वै ए उनकी मदद करे के कलीसिया पै बोझ ना हो, ताके वा उनकी मदद कर सकै जो साच्च-ए बिधवां सैं।

17 जो प्राचीन आच्छा इन्तजाम करै सैं, खास करके वे जो बचन सुनाण सिखाण म्ह मेहनत करै सैं, दुगणे आदर के जोगे समझे जावै। 18 क्यूँके पवित्र ग्रन्थ कहवै सै, "दाँवणआळै बैल्द का मुँह नीं बाँधणा," क्यूँके "मजदूर आपणी मजदूरी का हक्कदार सै।" 19 कोए तोहमन्द किसे प्राचीन पै लाई जावै तो बिना दो या तीन गवाहां के उस ताहीं मतना सुण। 20 पाप करणआळ्यां नै सारया कै श्यामी समझा दे, ताके और माणस भी, डरें। 21 पणमेशर, अर मसीह यीशु अर छांटे होइ सुर्गदुत्तां नै हाजर जाणके मै तन्नै चेतावनी देऊँ सूँ के तू मन खोलके इन बात्तां ताहीं मान्या कर, अर कोए काम मेर तै ना करै। 22 किसे पै तावळी-सी हाथ ना धरणा, अर दुसरयां के पापां म्ह हिस्सेदार ना होणा; अपने आप ताहीं पवित्र बनाए राख।

23 आगलै बख्त म्ह सिर्फ पाणी ए का पीण आळा ना रह, पर अपने पेट के अर अपने बार-बार बीमार होण के कारण माडा-माडा दाखरस भी काम म्ह लाया कर। 24 कीमे माणसां के पाप दिख जावै सैं अर न्याय के खातर पहल्या तै पहोच जावै सैं, पर कुछां के पाच्छै तै आवै सैं। 25 उस्से तरियां-ए कीमे भले काम भी प्रगट होवै सैं; अर जो इसे नीं होंदे, वे भी लुहक नीं सकदे।

6 जितने दास के जुए के तळें सैं, वे अपने-अपणे मालिक ताहीं घणे आदर के जोगा जाणें, ताके पणमेशर के नाम अर उपदेश की बुराई ना होवै। 2 जिनके मालिक बिश्वासी सैं उन्नै वे भाई होण के कारण तुच्छ ना जाणें, बल्के उनकी और भी सेवा करै, क्यूँके इस तै फेयदा ठाणआळे बिश्वासी अर प्रेमी सैं। इन बात्तां का उपदेश करया कर समझान्दा रह।

### झुडी शिक्षा अर धन का लालच

3 जै कोए और ए ढाळ का उपदेश देवै सैं अर खरी बात्तां नै, यानिके म्हारै प्रभु यीशु मसीह की बात्तां नै अर उस उपदेश नै नीं मान्दा, जो भगति के मुताबिक सै, 4 तो ओ घमण्डी होग्या, अर कीमे नीं जाणदा; बल्के उस ताहीं बहस अर शब्दां पै तर्क करण की बीमारी सै, जिस तै डाह, अर रोळे, अर बुराई की बात, भुन्डे-भुन्डे शक, 5 अर उन माणसां म्ह बेकार रगडे-झगडे पैदा होवै सैं जिनकी बुद्धि बिगड़ गी सैं, अर वे सच तै दूर हो गये सैं, जो समझें सैं के भगति कमाई का दरवाजा सै। 6 पर संतोष सुदा भगति बड्डी कमाई सै। 7 क्यूँके ना हम दुनिया म्ह कीमे लाए सां अर ना कीमे ले जा सकां सां। 8 जै म्हारै धोरे खाण अर पहरण नै हो, तो इन्नै पै संतोष करणा चाहिये। 9 पर जो साहूकार होणा चाहवै सैं, वे इसी परीक्षा अर फंदे अर घण-खरी बेकार अर नुकसान करण आळी लालसाओं म्ह फंसै सैं, जो माणसां नै बिगाड़ देवै सैं अर विनाश के समुन्दर म्ह डुबा देवै सैं। 10 क्यूँके रपिया का लोभ सारे ढाळ की बुराई की जड़ सै, जिस नै पाण की कोशिश करदे होए

घण-खरया नै बिश्वास तै भटककै अपणे आप ताहीं कई ढाळ के दुखां तै छळणी कर लिया सैं।

### तीमुथियुस ताहीं व्यक्तिगत निर्देश

11 पर हे पणमेशर के माणस, तू इन बात्तां तै भाज, अर धर्म, बिश्वास, प्रेम, धीरज, अर नम्रता का पिच्छा कर। 12 बिश्वास की आच्छी कुश्ती लड़; अर उस अनन्त जीवन नै धर ले, जिसकै खातर तू बुलाया गया अर घणे गवाहां के श्यामी आच्छा अंगीकार करया था। 13 मै तेरे ताहीं पणमेशर नै, जो सारया नै जिन्दा राक्खै सैं, अर मसीह यीशु नै गवाह करकै जिसनै पुन्तियुस पिलातुस के श्यामी आच्छा अंगीकार करया, यो आज्ञा देऊँ सूं 14 के तू म्हारै प्रभु यीशु मसीह के प्रगट हो जाण तक इस आज्ञा नै निष्कलंक अर बेकसूर राख, 15 जिस ताहीं ओ सई बख्त पै दिखावैगा, जो परमधन्य अर ऐकला

अधिपति अर राजाओं का राजा अर प्रभुओं का प्रभु सैं, 16 अर अमरता सिर्फ उस्से की सैं, अर ओ अगम्य चाँदणै म्ह रहवै सैं, अर ना उस ताहीं किसे माणस नै देख्या अर ना कद्वे भी देख सकै सैं। उस की प्रतिष्ठा अर राज्य युगानुयुग रहवैगा। आमीन।

17 इस दुनिया के साहूकारां नै आज्ञा दे के वे घमण्डी ना हों अर चंचल धन पै आस ना धरें, पर पणमेशर पै जो म्हारै सुख के खातर सारा कीमे घणा आब्ल तै देवै सैं। 18 वे भलाई करें, अर भले काम्मां म्ह धनी बणें, अर उदार अर मदद देण म्ह तयार हों, 19 अर आगै के खातर एक आच्छी नींव गेरो के साच्चे जीवन नै बस म्ह कर लें। 20 हे तीमुथियुस, इस धरोहर की रूखाळी कर, अर जिस ज्ञान नै ज्ञान कहणा ए भूल सैं, उसकै अशुद्ध बकवाद अर बिरोध की बात्तां तै परै रह। 21 कितने इस ज्ञान का अंगीकार करकै बिश्वास तै भटक गे सैं। थारै पै अनुग्रह होंदा रहवै।

## 2 तीमुथियुस

### अभिवादन

1 पौलुस की ओड़ तै जो, उस जीवन की प्रतिज्ञा के मुताबिक जो मसीह यीशु म्ह सै, पणमेशर की मर्जी तै मसीह यीशु का प्रेरित सै, 2 प्यारे बेड़े तीमुथियुस के नाम: पणमेशर पिता अर म्हारै प्रभु मसीह यीशु की ओड़ तै तन्नै अनुग्रह अर दया अर शान्ति मिलदी रहवै।

### धन्यवाद अर बढ़ावा

3 जिस पणमेशर की सेवा में अपने बाप-दादा की रीत में शुद्ध विवेक तै करूँ सूँ, उसका धन्यवाद हो के मैं आपणी प्रार्थनायां म्ह तन्नै सारी हाण याद करूँ सूँ, 4 अर तेरे आँसूयां की सुधि कर-करके दिन-रात तेरे तै फेटण की लालसा राखूँ सूँ के आनन्द तै भर जाऊँ। 5 मन्नै तेरे उस बिना कपट बिश्वास की सुधि आवै सै, जो पहल्या तेरी नात्री लोइस अर तेरी माँ युनिके म्ह था, अर मन्नै पक्का लागै सै के तेरै म्ह भी सै। 6 इस्से कारण मैं तन्नै सोद्री दुवाऊँ सूँ के तू पणमेशर के उस वरदान नै जो मेरै हाथ धरण के जरिये तन्नै मिल्या सै प्रज्वलित कर दे। 7 क्यूँके पणमेशर नै म्हारै ताही भय की नीं पर सामर्थ अर प्रेम अर संयम की आत्मा दी सै।

8 इसकरके म्हारै प्रभु की गवाही तै, अर मेरै तै जो उसका कैदी सूँ, सर्मिन्दा ना हो, पर उस पणमेशर की सामर्थ के मुताबिक सुसमाचार के खातर मेरै गेल्या दुःख ठा 9 जिसनै म्हारा उद्धार करया अर पवित्र बुलाहट तै बुलाया, अर यो म्हारै काम्मां के मुताबिक नीं; पर उसके मकसद अर उस सनातन तै म्हारै पै होया सै, 10 पर इब म्हारै उद्धारकर्ता मसीह यीशु के दिख जाण के द्वारा चाँदणा होया, जिसनै मौत का नास करया अर जीवन अर अमरता ताही उस सुसमाचार के जरिये चाँदणै म्ह दिखा दिया। 11 जिसके खातर मैं प्रचारक, अर प्रेरित, अर उपदेशक भी ठहरया। 12 इस कारण मैं इन दुःखां नै भी ठाऊँ सूँ, पर सर्मान्दा कोनी, क्यूँके मैं उस ताही जिस पै मन्नै बिश्वास करया सै, जाणूँ सूँ; अर मन्नै पक्का लागै सै के ओ मेरी अमानत की उस दिन ताही रूखाळी कर सकै सै। 13 जो खरी बात तन्नै मेरै तै सुणी सै, उन ताही उस बिश्वास अर प्रेम के गेल, जो मसीह यीशु म्ह सै, आपणा बढ़िया नमूना बणाके राख। 14 अर पवित्र आत्मा के जरिये जो म्हारै म्ह बस्या होया सै, इस बढ़िया अमानत की रूखाळी कर। 15 तन्नै बेरा सै के आसियाआळे सारे मेरै तै पलट गये सैं जिन म्ह फूगिलुस अर हिरमुगिनेस सैं। 16 उनेसिफुरुस के कुन्बे पै प्रभु दया करै, क्यूँके उसनै घणी बर मेरै जी ताही शीळा करया अर मेरी जंजीरां तै सर्मिन्दा कोनी होया। 17 पर जिब्व ओ रोम म्ह आया, तो घणी कोशिश तै टोह के मेरै तै भेंट करी----

18 प्रभु करै के उस दिन उस पै प्रभु की दया हो---अर जो-जो सेवा उसनै इफिसुस म्ह की सैं उन ताही भी तू सुथरी-ढाळ जाणै सैं।

### मसीह यीशु का स्वामीभगत सैनिक

2 ज्यांतै हे मेरे बेड़े, तू उस अनुग्रह तै जो मसीह यीशु म्ह सै, ठाड्डा हो जा, 2 अर ये बात तन्नै घणे गवाहां के श्यामी मेरै तै सुणी सैं, उन्नै बिश्वासी माणसां नै सौंप दे; जो दुसरयां नै भी सिखाण के जोगे हो। 3 मसीह यीशु के आच्छे योद्धा के बरगे मेरै गेल दुःख ठा। 4 जिब्व कोए योद्धा लड़ाई पै जावै सै, तो ज्यांतै के अपने भर्ती करण आळै नै राजी करै, अपने आप नै दुनिया के काम्मां म्ह नीं फँसान्दा। 5 फेर अखाड़े म्ह लड़णआळा जै तैरीके के मुताबिक नीं लड़ै तो मुकुट नीं पान्दा। 6 जो किसान मेहनत करै सैं, फल

का अंश पहल्या उसनै मिलणा चाहिये। 7 जो मैं कहूँ सूँ उस पै गौर कर, अर प्रभु तन्नै सारी बात्तां की समझ देवैगा। 8 यीशु मसीह नै याद राख, जो दाऊद की पीढ़ी तै पैदा होया अर मरे होया म्ह तै जिन्दा उठ्या, अर यो मेरे सुसमाचार के मुताबिक सै। 9 जिसके खातर मैं भुन्डे काम करणीये की ढाळ दुःख ठाऊँ सूँ, उरै ताही के कैद भी सूँ; पर पणमेशर का बचन कैद कोनी। 10 इस कारण मैं छोट होए माणसां के खातर सारा कीमे सहूँ सूँ, के वे भी उस उद्धार नै जो मसीह यीशु म्ह सैं अनन्त महिमा के गेल पावै। 11 या बात साच्चै सै, के जे हम उसके गेल्या मर गे सां, तो उसके गेल्या जीवांगे भी; 12 जे हम धीरज तै सहन्दे रहवांगे, तो उसके गेल्या राज्य भी करांगे; जे हम उसनै मानण तै नाटांगे, तो ओ भी म्हारै बाबत नाटैगा; 13 जे हम अबिश्वासी भी हों, तौभी ओ बिश्वास जोगा बणा रहवै सैं, क्यूँके ओ आप आपणा इन्कार कोनी कर सकदा।

### उत्तम कारीगर

14 इन बात्तां की सोद्री उन्नै दुवा अर प्रभु के श्यामी चिता दे के शब्दां पै बहस-बाजी ना करया कर, जिन तै कीमे फेयदा कोनी होन्दा बल्के सूनणआळे बिगड़ जावैं सैं। 15 अपने आप नै पणमेशर का अपनाण जोगा अर इसा काम करणीया ठहराण की कोशिश कर, जो सर्मिन्दा होण नीं पावै, अर जो सच के बचन नै सई ढाळ तै काम म्ह लान्दा हो। 16 पर अशुद्ध बकवाद तै बच्या रह, क्यूँके इसे माणस और भी अभगति म्ह बधदे जावैंगे, 17 अर उनका बचन सड़े घांव की ढाळ फैलदा जावैगा। हुमिनयुस अर फिलेतुस उन्ने म्ह तै सैं, 18 जो न्यू कहके के पुनरुत्थान हो लिया सै सच तै भटक गे सैं, अर कितन्यां के बिश्वास नै उल्ट-पुल्ट कर देवैं सैं। 19 तौभी पणमेशर की पक्की नींव बणी रहवै सै, अर उस पै या छाप लागरी सै: "प्रभु अपणयां ताही पिच्छाणै सै," अर "जो कोए प्रभु का नाम लेवै सै, ओ अधर्म तै बच्या रहवै।"

20 बड़े घर म्ह ना सिर्फ सोन्ने-चाँदी ए के, पर काट अर माट्टी के बासण भी होवै सै; कोए-कोए आदर, अर कोए-कोए अनादर के खातर। 21 जे कोए अपने आप नै इनतै शुद्ध करैगा, तो ओ आदर का बासण अर पवित्र ठहरैगा; अर मालिक के काम आवैगा, अर हरेक भले काम के खातर तयार होगा। 22 गाबरुपण की अभिलाषाओं तै भाज, अर जो शुद्ध मन तै प्रभु का नाम लेवैं सैं उनके गेल धर्म, अर बिश्वास, अर प्रेम, अर मेल-मिलाप का पिच्छा कर। 23 पर बावळापण अर अशिक्षा के बहसां तै न्यारा रह, क्यूँके तन्नै बेरा सै के इनतै रोळे पैदा होवैं सैं। 24 प्रभु के दास नै रोळे करणीया नीं होणा चाहिये, पर ओ सारया के गेल्या कोमल अर शिक्षा म्ह निपुण अर सहनशील हो। 25 ओ बीरोधियां नै नम्रता तै समझावै, के जाणै पणमेशर उन्नै मन फिराव का मन दे के वे भी सच नै पिच्छाणै, 26 अर इसके द्वारा उसकी मर्जी पूरी करण के खातर सोद्री म्ह होके शैतान के फन्दे तै छुट जाएँ।

### आखरी दिनां म्ह अधर्म

3 पर न्यू याद राख के आखर के दिनां म्ह ओखखे टेम भी आवैंगे। 2 क्यूँके माणस स्वार्थी, लोभ्मी, डींगमार, अभिमानी, बुराई करण आळा, माँ-बाप का हुक्म टाळण आळे, कृतघ्न, अपवित्र, 3 मायारहित, निर्दयी, क्षमारहित, तोहमन्द लाग आळे, असंयमी, करड़े, भले के बैरी, 4 बिश्वासघाती, डीठ, घमण्डी, अर पणमेशर के नीं बल्के सुखविलास ए के चाहण आळे होंगे। 5 वे भगति का भेष तो धरेंगे, पर उसकी ताकत नै नीं

मानेंगे; इसा तै परै रहणा। 6 इन्ने म्ह तै वे माणस सै जो घरां म्ह दबे पाँ बड़ जावें सैं, अर उन छिछोरी लुगाइयाँ ताही बस म्ह कर लेवें सैं, जो पापां तै दबी अर हरेक ढाळ की अभिलाषायां कै बस म्ह सैं, 7 अर सारी हाण सिख्दी तो रहवें सैं पर सच की पिच्छण ताही कद्वे नीं पहाचदी। 8 जिस तरियां यत्रेस अर यम्ब्रेस नै मूसा का बिरोध करया था, उस्से तरियां ए ये भी सच का बिरोध करें सैं; ये इसे माणस सै, जिनकी बुद्धि भ्रष्ट हो गी सैं अर वे बिश्वास कै बारै म्ह निकम्मे सैं। 9 पर वे इसतै आगै नीं बढ सकदे, क्यूँके जिस तरियां उनकी अज्ञानता सारे माणसां पै दिखगी थी, उस्से तरियां ए इनकी भी हो जावेंगी।

### तीमुथियुस ताहीं खास निर्देश

10 पर तन्नै उपदेश, चाल-चलण, मनसा, बिश्वास, सहनशीलता, प्रेम, धीरज, अर सताए जाण, अर दुःख ठाण म्ह मेरा साथ दिया; 11 अर इसे दुःखां म्ह भी जो अन्ताकिया अर इकुनियुस अर लुस्त्रा म्ह मेरै पै आण पड़े थे, अर दुसरे दुःखां म्ह भी जो मन्नै ठाए सैं; पर प्रभु नै मेरै ताहीं उस सारया तै छुटा लिया। 12 पर जितने मसीह यीशु म्ह भगति कै गेल्या जीवन बिताणा चाहवें सैं वे सारे सताए जावेंगे; 13 पर दुष्ट अर भकाण आळे धोकरा देन्दे होए अर धोकरा खांदे होए, बिगड़दे चले जावेंगे। 14 पर तू उन बात्तां पै जो तन्नै सीक्खी सैं अर बिश्वास करया सैं, न्यू जाणके मजबूत बणा रह के तन्नै उन ताहीं किन माणसां तै सिख्या सैं, 15 अर बाळकपण तै पवित्रग्रन्थ तेरा जाणया होया सैं जो तन्नै मसीह पै बिश्वास करण तै उद्धार मिलण के कारण श्याणा बणा सकै सैं। 16 साब्ता पवित्रग्रन्थ पणमेशर की सीख तै रच्या गया अर उपदेश, अर समझाण, अर सुधारण, अर धार्मिकता की शिक्षा कै खातर फैयदेमन्द सैं, 17 ताके पणमेशर का जन सिद्ध बणै, अर हरेक भले काम करण कै खातर त्यार हो जाए।

4 पणमेशर अर मसीह यीशु नै गवाह करकै, जो जिन्दे अर मरे होया का न्याय करेगा, अर उसकै दीख जाण अर राज्य की सोद्वी दुवाकै मै तन्नै हुक्म देऊँ सूँ 2 के बचन का प्रचार कर, बख्त अर बेबख्त त्यार रह, सारी ढाळ की सहनशीलता शिक्षा कै गेल्या उलाहणा दे अर धमका अर समझा। 3 क्यूँके इसा बख्त आवैगा जिब्व माणस खरया उपदेश नीं सह सकैगें, पर काना की खाज कै कारण आपणी अभिलाषायां कै मुताबिक अपणे खातर घणे उपदेशक कड्डे कर लेवेंगें, 4 अर वे अपणे कान सच तै फेर कै कथा-कहानीयां पै लावेंगें। 5 पर तू सारी बात्तां म्ह चौकन्ना रह, दुःख ठा, सुसमाचार प्रचार का काम कर, अर आपणी सेवा नै पूरी कर।

6 क्यूँके इब मै अर्घ की ढाळ उंडेला जाऊँ सूँ, अर मेरे कूच का बख्त आण पहाच्या सैं। 7 मै आच्छी कुशती लड़ चुक्या सूँ, मन्नै आपणी दौड़ पूरी कर ली सैं, मन्नै बिश्वास की रूखाळी करी सैं। 8 आण आळे बख्त म्ह मेरै खातर धर्म का मुकुट धरया होया सैं, जिस प्रभु, जो धर्मी अर न्यायी सैं, मेरै ताही उस दिन देवैगा, अर मन्नै ए नीं बल्के उन सारया ताही भी जो उसकै दीख जाण नै प्यारा जाणें सैं।

### व्यक्तिगत संदेश

9 मेरै धोरै तावळा आंण की कोशिश कर। 10 क्यूँके देमास नै इस दुनिया ताही प्यारा जाणकै मेरै ताही छोड़ दिया सैं, अर थिस्सलुनीके नै चल्या गया सैं। क्रेसकेंस गलातिया की ओड़ तीतुस दलमतिया नै चल्या गया सैं। 11 सिर्फ लूका मेरै गेल्या सैं। मरकुस नै लेकै चल्या आ; क्यूँके सेवा कै खातर ओ मेरै घणा काम का सैं। 12 तुखिकुस नै मन्नै इफिसुस खन्दाया सैं। 13 जो बागा मै त्रोआस म्ह करपुस कै उरै छोड़ आया सूँ, जिब्व तू आवै तो उस ताहीं अर किताब खास करकै चर्मपत्रां नै लेंदे आणा। 14 सिकन्दर ठठेरे नै मेरै गेल्या घणी ए बुराइयाँ करी सैं; प्रभु उस ताहीं उसकै काम्मां कै मुताबिक बदला देवैगा। 15 तू भी उस तै चौकन्ना रह, क्यूँके उसनै म्हारी बात्तां का घणा ए बिरोध करया सैं। 16 मेरे पहल्ले प्रतिवाद कै बख्त किसे नै भी मेरा साथ नीं दिया, बल्के सारया नै मेरै ताहीं छोड़ दिया था। भला हो के इसका उन नै लेकरा देणा ना पडै। 17 पर प्रभु मेरा गेल-मददगार रहया अर मेरै ताहीं सामर्थ देई, ताके मेरै जरिये पूरा-पूरा प्रचार हो अर सारे गैर-जात्तां आळे सुण लें; अर मै तो शेर कै मुंह म्ह तै छुटाया गया। 18 अर प्रभु मन्नै हरेक भुन्डे काम तै छुटवावैगा, अर अपणे सुर्गीय राज्य म्ह उद्धार करकै सही-सलामत पहाचावैगा। उस्से की महिमा युगानुयुग होन्दी रहवै। आमीन।

### आखरी अभिवादन

19 प्रीस्का अर अक्विला नै अर उनेसिफुरुस कै कुन्बे नै नमस्कार। 20 इरास्तुस कुरिन्थुस म्ह रह गया, अर त्रुफिमस ताही मन्नै मीलेतुस म्ह बीमार छोड्या सैं। 21 जाड्डे तै पहल्या चले आण की कोशिश कर। यूबलुस, अर पूदेंस, अर लीनुस अर क्लौदीया, अर सारे भाईयां का तन्नै नमस्कार। 22 प्रभु तेरी आत्मा कै गेल रहवै। थारै पै अनुग्रह होदा रहवै।

# तीतुस

## अभिवादन

1 पौलुस की ओड़ तै जो पणमेशर का दास अर यीशु मसीह का प्रेरित सै, पणमेशर के छाट्टे होए माणसां के बिश्वास अर उस सच की पिच्छाण के मुताबिक जो भक्ति के मुताबिक सै, 2 उस अनन्त जीवन की आश पै जिसका प्रण पणमेशर नै, जो झूठ बोल नही सकदा सनातन तै करी सै, 3 पर ठीक बखत पै अपने वचन नै उस प्रचार के जरिये दिखाया, जो म्हारे उध्दारकर्ता पणमेशर के हुक्म के मुताबिक मेरै ताही सौप्या गया। 4 तीतुस के नाम जो बिश्वास की साज्जीदारी के बिचार तै मेरा सच्चा बेटा सै: पणमेशर पिता अर म्हारे उध्दारकर्ता मसीह यीशु की ओड़ तै तन्नै अनुग्रह अर शान्ति मिल्दी रहवै।

## क्रेते म्ह तीतुस का काम

5 में इस करके तन्नै क्रेते म्ह छोड़ आया था के तू बाकी बातों नै सुधारै, अर मेरै हुक्म के मुताबिक नगर-नगर प्रचीनां नै नियुक्त करै। 6 जो बेकसूर अर एकै बीर का धणी हो, जिनके बाळक बिश्वासी हो, अर उन म्ह लुचपन अर निरंकुशता का दोष ना हो। 7 क्यूँके अध्यक्ष नै पणमेशर का भण्डारी होण के कारण बेकसूर होणा चाहिए; ना जिद्दी, ना गुसेल, ना पियक्कड़, ना मारपीट करण आळा, ना नीच कमाई का लोभी हो, 8 पर मेहमान का आदर करण आळा, भलाई का चाहू आळा, अपने आपे म्ह रहण आळा, न्याकारी, पवित्र अर अपने मन नै काबू राखण आळा हो; 9 अर वो बिश्वास लायक वचन पै जो धर्म के उपदेश के मुताबिक सै, डट्या रहवै के खरी शिक्षा तै उपदेश दे सकै अर विरोधिया का मुँह भी बन्द कर सकै। 10 क्यूँके भोत से माणस निरंकुश, बकवादी अर धोखा देण आळे सै; खास करके खतना आळा म्ह तै। 11 इनका मुँह बन्द करना चाहिए। ये माणस नीच कमाई के खात्तर गलत बात सिखाके घर के घर खराब करदे सै। 12 उन्नै म्ह तै एक जण्यै नै, जो उन्नै का नब्बी सै, कहा सै, “क्रेती माणस सदा झूठे, उत डांगर, अर आलसी पेटू हो सै।” 13 या गवाही सच सै, इस करके उन्नै सकताई तै चेतावनी दिया कर के वे बिश्वास म्ह पक्के होज्या, 14 अर यहूदिया की कथा कहानिया अर माणसां के हुक्म पै मन ना लगवै, जो सच तै भटक जावै सै। 15 शुध्द माणसां के खात्तर सारी चीज शुध्द सै, पर अशुध्द अर अबिश्वासी के खात्तर किम्मे भी शुध्द कोन्या, बल्के उनकी बुध्दि अर विवेक दोनु अशुध्द सै। 16 वे कहै सै के हम पणमेशर नै जाना सां, पर आपणे कामां तै नाट्टे सै; क्यूँके वे ओच्छे अर हुक्म ना मानण आळे सै, अर किसे आच्छे काम के लायक कोन्या।

## आचरण के खात्तर खरी शिक्षा

2 पर तू इसी बात कहा कर जो खरै उपदेश के लायक सै। 2 यानी के बूढ़े माणस शान्त गम्भीर अर संयमी हो, अर उनका बिश्वास, प्रेम अर थावस पक्का हो। 3 इस ढाळ बूढ़ी बिरबनियां का चाल चालन पवित्र माणसां की तरियां हो; वे लाच्छण लगान आळी अर पियक्कड़ नही हो, पर आच्छी बात सिखान आळी हो। 4 ताके वे जवान बिरबनियां नै चेतावनी देंदी रहवै के अपने धणी अर बाळकां तै मोह राखै; 5 अर संयमी पतिव्रता घर का कामकाज कारण आळी, भली अर अपने धणी के अधीन रहण आळी हो, ताके वचन की निन्दा ना होण पावै। 6 इसे तरियां जवान माणसां नै समझाया कर के संयमी हो। 7 सारी बातों म्ह अपने आप नै भले कामां की मिसाल बणा। तेरै उपदेश म्ह सफाई घम्भीरता, 8 अर इसी खराई पाई जावै के कोए

उसणै बुरा ना कह सकै, जिसतै विरोधी म्हारै पै कोए दोष ना लगान का मौका पाके शर्मिन्दा हो जावै। 9 नौकरां नै समझा के अपने-अपने मालिक के कहये म्ह रहवै, अर सारी बातों म्ह उसणै राज्जी राख्खै, अर उल्ट के जवाब ना दे; 10 चोरी चलाकी ना करै, पर सारी ढाळ तै पुरे बिश्वासी लिक्डै के वे सारी बातों म्ह म्हारे उध्दारकर्ता पणमेशर के उपदेश की शान बढ़ावै। 11 क्यूँके पणमेशर का वो अनुग्रह दिखै सै, जो सारे माणसां का उध्दार का कारण सै, 12 अर हमनै चेतावनी देवै सै के अभक्ति अर संसार की मोह तै मन बदल के इस युग म्ह संयम, धर्म अर भक्ति तै जीवन बितावा; 13 अर उस धन्य आश की यानी अपने महान् पणमेशर अर उध्दारकर्ता यीशु मसीह की महिमा के प्रगत होण की बाट देखते रहवै। 14 जिसनै अपने आप ताहि म्हारे खात्तर दे दिया के हमनै हरेक ढाळ के अधर्म तै छुड़ा ले, अर शुध्द करके अपने खात्तर एक इसी जाति बणा ले जो भले-भले कामां म्ह सारया तै तेज हो। 15 पुरै हक के गैल या बात कहै, अर समझा अर सीखता रह। कोए तन्नै हीण नही जानण पावै।

## मसीही चाल-चलन

3 माणसां नै सुधि दुआ के हकीमां अर अधिकारियां के अधीन रहवै, अर उनका हुक्म मानै, अर हरेक भले काम खात्तर तैयार रहवै, 2 किसे नै बदनाम ना करै, झगड़ालू ना हो; पर कोमल सुभाव के हो, अर सारे माणसां के गैल बड़ी नरमाई के गैल रहवै। 3 क्यूँके हम भी पहल्या बेअकू, हुक्म ना मानण आळे, अर भ्रम म्ह पड़े होए अर न्यारी-न्यारी ढाळ की चाहना अर सुखभोगण की गुलामी म्ह थे, अर बैरभाव अर डाह करण म्ह जीवन गुजरा थे, अर घृणित थे, अर एक दूसरे तै बैर राख्खां थे। 4 पर जब म्हारे उध्दारकर्ता पणमेशर की कृपा अर माणसां पै उसका प्रेम दिख्या, 5 तो उसनै म्हारा उध्दार करया, अर यो धर्म के कामां के खात्तर नही, जो हमनै आप करे, पर अपनी दया के मुताबिक नये जन्म के नाहण अर पवित्र आत्मा के म्हारे नया बणान के जरिये होया। 6 जिस ताहि उसणै म्हारे उध्दारकर्ता यीशु मसीह के जरिये म्हारै पै भोत ए घणा उंडेल दिया। 7 जिस तै हम उसकी मेहरबानी तै धर्मी बणा, अनन्त जीवन की आश के मुताबिक वारिस बणा। 8 या बात सच सै, अर में चाहू सू के तू इन बातों के बारे म्ह मजबूती तै बोळै इस करके के जिन नै पणमेशर पै बिश्वास करया सै, वे भले-भले कामां म्ह लागे रहण का ध्यान राखै। ये बात भली अर माणसां के फायदे की सै। 9 पर बेवकूफी के विवादों, अर पीढियां, विरोध अर झगड़ा तै जो नियमां के बारे म्ह हो, बचा रहवै; क्यूँके वे बिना फळ के अर बेकार सै। 10 किसे पाखंडी नै एक दो बार समझा-बुझा के उसतै न्यारा रह, 11 या जानके के इसा माणस भटक गया सै, अर अपने आप नै कसूरवार बणा के पाप करै सै

## व्यक्तिगत निर्देश अर अभिवादन

12 जिब्व मैं तेरै धोरै अर तिमास या तुखिकुस नै भेजूं तो मेरै धोरै निकुपुलिस आण की कोशिश करिये, क्यूँके मन्नै ओड़ै ए जाड़ा लिकाड़ण का मन बणाया सै। 13 जेनास प्रबन्ध करणीयां अर अपुलोस नै जल्न करके आगै खिन्दा दे, अर देख उन्नै किस्से चीज की कमी ना होण दिए। 14 म्हारे माणस भी जरूरतां नै पूरा करण के खात्तर आच्छे कामां म्ह लागे रहणा सीखै ताके बिना फळ नही रहवै। 15 मेरै सारे साथियां का तेरै ताही नमस्कार। जो बिश्वास के कारण म्हारै तै प्रेम राख्खै सै, उन्नै नमस्कार। थारै सारा पै मेहरबानी होंदी रहवै।

# फिलेमोन

## अभिवादन

1 पौलुस की ओड़ तै जो मसीह यीशु का कैदी सै, अर भाई तीमुथियुस की ओड़ तै म्हारे गैल काम करणीया प्यारे फिलेमोन, 2 अर बहन अफफिया, अर म्हारे साथी योध्दा अरखिप्पुस अर फिलेमोन के घर की कलीसिया के नाम: 3 म्हारे पिता पणमेशर अर प्रभु यीशु मसीह की ओड़ तै अनुग्रह अर शान्ति थमनै मिलती रहवै।

4 फिलेमोन का प्रेम अर बिश्वास 4 में सारी हाण पणमेशर का धन्यवाद करूँ सूँ, अर अपणी प्रार्थनायां म्ह भी तन्नै याद करूँ सूँ, 5 क्यूँके मैं तेरै उस प्यार अर बिश्वास की चर्चा सुणु सूँ, जो सारे पवित्र माणसा के गैल अर प्रभु यीशु पै सै। 6 मैं प्रार्थना करूँ सूँ के बिश्वास म्ह तेरा साझेदार होणा, थारी सारी भलाई की पिच्छाण म्ह, मसीह के खात्तर असरदार हो। 7 क्यूँके हे भाई, मन्नै तेरै प्यार तै घणा सुख अर शान्ति मिली सै, इस खात्तर के तेरै जरिये पवित्र माणसा के मन हरे-भरे होंगे सै।

## उनेसिमस के खात्तर निवेदन

8 इस करके फेर भी मन्नै मसीह म्ह बड़ी हिम्मत सै के जो बात ठीक सै, उसका हुक्म तेरै तै द्यु। 9 तो भी मुझ बूढ़े पौलुस नै जो इब मसीह यीशु के खात्तर कैदी सै, यो और भी बेरा पाट्या के और भी प्यार तै बिनती करूँ। 10 मैं अपणे बाळक उनेसिमस के खात्तर जो मेरै तै मेरी कैद म्ह जन्मा सै, तेरै तै बिनती करूँ सूँ। 11 वो तो पैहला तेरै किम्मे काम का ना था, पर इब तेरै अर मेरै दोनुआ के बड़े काम का सै। 12 उस्से नै यानी जो मेरै दिल का टुकड़ा

सै, मन्नै तेरै धोरे भेज दिया। 13 उसनै मैं आपणे ऐ धोरै राखणा चाहूँ था के वो तेरी ओड़ तै इस कैद म्ह जो सुसमाचार के कारण सै, मेरी सेवा करै। 14 पर मन्नै तेरी इच्छा बगैर किम्मे भी नही करणा चाह्या, के तेरी या दया दाब तै नही पर मोज तै हो। 15 क्यूँके के जाण वो तेरै तै कई दिन खात्तर इस्से कारण न्यारा होया हो के सदा तेरै धोरै रहवै। 16 पर इब तै दास की तरियां नही बल्के दास तै भी बढ़िया, यानी भाई के बरोबर रहवै, जो मेरा तो खास प्यारा सै ऐ, पर इब देह म्ह अर प्रभु म्ह भी, तेरा भी खास प्यारा हो। 17 आखर जै तू मन्नै अपणा साझेदार समझै सै, तो उसनै इस ढाळ अपणा ले जिसा मन्नै। 18 जै उसनै तेरा किम्मे भी नुकसान करया सै, या उस म्ह तेरा किम्मे लिक्ड सै, तो मेरै नाम पै लिख लो। 19 मैं पौलुस अपणे हाथ तै लिखूँ सूँ के मैं आप भर द्युगां; अर उस ताहि कहण की किम्मे जुरत कोणी के मेरा कर्ज जो तेरै पै सै वो तू ऐ सै। 20 हे भाई, यो सुख मन्नै प्रभु म्ह तेरी ओड़ तै मिलै। मसीह म्ह मेरै जी नै हरा भरा कर दे। 21 मैं तेरै ताबेदार होण का भरोसा राख के तेरै तै लिखूँ सूँ, अर या जाणू सूँ के जो किम्मे मैं कहुँ सूँ, तू उसतै घणा बढ के करैगा। 22 अर या भी के मेरै खात्तर रुकण की जगहां तैयार राखै। मन्नै आश सै के थारी प्रार्थनायां के जरिये मैं थारै ताहि दे दिया जाऊँगा।

## आखरी अभिवादन

23 इपफ्रास, जो मसीह म्ह मेरै गैल कैदी सै, 24 अर मरकुस अर अरिस्तखुर्स अर देमास अर लूका जो मेरै गैल काम करणये सै, इनका तेरै तैई नमस्कार। 25 म्हारे प्रभु यीशु मसीह का अनुग्रह थारी आत्मा पै होंदा रहवै। आमीना।

# इब्रानियों

## अभिवादन

1 पहल्लड़े युग म्ह पणमेशर नै पिता-दादा तै माड़ा-माड़ा करकै अर कई-कई ढाळ तै नब्बियाँ के जरिये बात कर, 2 इन आखरी के दिनां म्ह म्हारै तै बेट्टे के जरिये बात करीं, जिस तारीं उसनै सारी चीज्रां का वारिस ठहराया अर उससे कै जरिये उसनै सारी सृष्टि तारीं बनाया। 3 ओ उसकी महिमा का चाँदणा अर उसके तत्व की छाप सै, अर सारी चीज्रां नै आपणी सामर्थ के बचन तै सम्भाळै सै। ओ पापां नै धोकै ऊँची जंगहा पै महामहीमन कै सोळी ओड़ जा बैठ्या; 4 अर सुर्गदुत्तां तै उतना ए बढ़िया ठहरया, जितना उसनै बड्डे ओद्रे का वारिस होकै बढ़िया नाम पाया।

## क्रेते म्ह तीतुस का काम

5 क्यूँके सुर्गदुत्तां म्ह तै उसनै कद किसे तै कहया, “तू मेरा बेट्टा सै, आज तू मेरै तै पैदा होया?” अर फेर यो के, “मै उसका पिता होऊँगा, अर ओ मेरा बेट्टा होवैगा?” 6 अर जिब्व पहल्लड़े जेहे तारीं दुनिया म्ह दुबारा लावै सै, तो कहै सै, “पणमेशर के सारे सुर्गदुत उस तारीं मुद्दे पड़कै प्रणाम करै।” 7 अर सुर्गदुत्तां कै बारै म्ह न्यू कहवै सै, “ओ अपने दुत्तां तारीं हवा, अर अपने सेवकां नै भडुकदी होई आग बणावै सै।” 8 अर बेट्टे कै बारै म्ह कहवै सै, “हे पणमेशर, तेरा सिंहासन युगायुग रहवैगा : तेरै राज्य का राजदण्ड न्याय का राजदण्ड सै। 9 तन्नै धर्म तै प्यार अर अधर्म तै बैर राख्या; इस कारण पणमेशर, तेरै पणमेशर नै, तेरै ढब्बियाँ तै बढ़कै खुशी आळ तेल तै तेरा अभिषेक करया।” 10 अर यो के, “हे प्रभु, सरूआत म्ह तन्नै धरती की नींव बणाई, अर सुर्ग तेरै हाथां की कारीगरी सै। 11 वे तो नाश हो जावैगें, पर तू बणया रहवैगा, अर वे सारे लत्ते की ढाळ पुराणे हो जावैगें, 12 अर तू उन तारीं चादर की तरियां लपेटैगा, अर वे लत्ते की ढाळ बदल जावैगें : पर तू ओए सै अर तेरे साल्लां का अन्त कोनी होवैगा।” 13 अर सुर्गदुत्तां म्ह तै उसनै किस तै कद कहया, “तू मेरै सोळी ओड़ बैठ, जिब्व तारीं के मै तेरे बैरियाँ नै तेरै पायां कै तळै की पीढी ना कर द्यूँ?” 14 के वे सारे सेवा-बाडी करणआळी आत्मां कोनी, जो उद्धार पाणआळ्यां कै खातर सेवा करण नै खन्दाई जावै सै?

## आचरण कै खातर खरी शिक्षा

2 इस कारण चाहिये के हम उन बात्तां पै जो हमनै सुणी सै, और भी मन लावां, इसा ना हो के बहककै उन तै दूर चले जावां। 2 क्यूँके जो बचन सुर्गदुत्तां कै जरिये कहया गया था। जिब्व ओ स्थिर रहया अर हरेक अपराध अर आज्ञा ना मानण का सई-सई बदला मिल्या, 3 तो हम माणस इसे बड्डे उद्धार तै बेपरवाह रहकै किस तरियां बच सकां सां? जिसकां जिक्का पहल्लम-पहल्ल्या प्रभु के जरिये होया, अर सुनणआळ्यां के जरिये हमनै इसकां पक्का यकीन होया। 4 अर गेल्या ए पणमेशर भी आपणी मर्जी कै मुताबिक निशात्रां, अर अनोकखे काम्मां, अर कई ढाळ के सामर्थ के काम्मां, अर पवित्र आत्मा के वरदानां के बांडण के जरिये इसकी गवाही देँदा रहया। 5 उसनै उस आणआळी दुनिया तारीं जिसकां जिक्का हम करण लागरे सां, सुर्गदुत्तां कै अधीन नीं करया। 6 बल्के किसे नै कदे या गवाही देई सै, “माणस के सै के तू उसकी सुध लेवै सै? या माणस का बेट्टा के सै के तू उसकी फिक्क करै सै? 7 तन्नै उस तारीं सुर्गदुत्तां तै कीमे घाट करया; तन्नै उस पै महिमा अर आदर का मुकुट धरया, अर उस तारीं अपने हाथां के काम्मां पै हक्क दिया। 8 तन्नै

सारा कीमे उसकै पायां कै तळै कर दिया।” इसकरकै जिब्व के सारा कीमे उसकै अधीन कर दिया, तो उसनै कीमे भी कोनी धर राख्या जो उसकै अधीन ना हो। पर हम इब तारीं सारा कीमे उसकै अधीन कोनी देख्दे।

9 पर हम यीशु तारीं जो सुर्गदुत्तां तै कीमे ए घाट करया गया था, मौत का दुःख ठाण के कारण महिमा अर आदर का मुकुट पहरे होये देख्खां सां, ताके पणमेशर के अनुग्रह तै ओ हरेक माणस कै खातर मौत का सुवाद चाखै। 10 क्यूँके जिसकै खातर सारा कीमे सै अर जिसकै जरिये सारा कीमे सै, उस तारीं योए आच्छा लाग्या के जिब्व ओ घण-ए बेट्टा की महिमा म्ह पहीचाया जावै, तो उनकै उद्धार के कर्ता तारीं दुःख ठाण के जरिये सिद्ध करै। 11 क्यूँके पवित्र करणआळा अर जो पवित्र करे जावै सै, सारे एक ए जड़ तै सै; इस्से कारण ओ उन तारीं भाई कहण तै कोनी समान्दा। 12 ओ कहवै सै, “मै तेरा नाम आपणे भाईयां तारीं सुणाऊँगा; पंचायत कै बिचाळै मै तेरा भजन गाऊँगा।” 13 अर फेर ओ के, “मै उस पै भरोस्सा राखूँगा।” अर फेर यो के, “लखा, मै उन छोेरया सेत्ती जिस तारीं पणमेशर नै मेरै तारीं दिए।” 14 ज्यातै जिब्व के छोरे मांस अर लहू के साइझी सै, तो आप भी उनकै बरगा उनका गेल-साइझी होग्या, ताके मौत के जरिये उस तारीं जिसनै मौत पै शक्ति मिली थी, यानिके शैतान तारीं निकम्मा कर दे; 15 अर जितने मौत कै डर के मारे जिन्दगी भर दासता म्ह फँसरे थे, उन तारीं छुटा ले। 16 क्यूँके ओ तो सुर्गदुत्तां तारीं नीं बल्के अब्राहम की पीढी नै सम्भाळै सै। 17 इस कारण उस तारीं चाहिये था, के सारी बात्तां म्ह अपने भाईयां के बरगे बणै; जिसतै ओ उन बात्तां म्ह जो पणमेशर तै रिश्ता राखै सै, एक दयालु अर बिश्वास जोग्गा महायाजक बणै ताके माणसां के पापां के खातर पछतावा करै। 18 क्यूँके जिब्व उसनै हिम्तान की हालत म्ह दुःख ठाया, तो ओ उनकी भी मदद कर सकै सै जिनका हिम्तान होवै सै।

## मसीही चाल-चलन

3 ज्यातै हे पवित्र भाईयो, थम जो सुर्गीय बुलाहट म्ह साइझी सो, उस प्रेरित अर महायाजक यीशु पै जिस तारीं हम अंगीकार करां सां, ख्याश करो। 2 ओ अपने तैनात करण आळ के खातर बिश्वास जोग्गा था, जिसा मूसा भी पणमेशर के सारे घर म्ह था। 3 क्यूँके यीशु मुसा तै इतना बढ़कै महिमा कै जोग्गा समझया गया सै, जितना के घर का बनावण आळा घर तै बढ़कै आदर-मान राखै सै। 4 क्यूँके हरेक घर का कोए ना कोए बनावण आळा होवै सै, पर जिसनै सारा कीमे बणाया ओ पणमेशर सै। 5 मुसा तो पणमेशर के सारे घर म्ह सेवक की तरियां बिश्वास जोग्गा रहया के जिन बात्तां का वर्णन होण आळा था, उनकी गवाही देवै। 6 पर मसीह बेट्टे की तरियां पणमेशर के घर का अधिकारी सै; अर उसका घर हम सां, जै हम हिम्मत पै अर आपणी आस के घमण्ड पै आखर तारीं पक्के तौर पै डटया रहवां। 7 आखर म्ह जिसा पवित्र आत्मा कहवै सै, “जै आज थम उसका शब्द सुणो, 8 तो अपने मन तारीं करड़ा ना करो, जिसा के खुन्दक दुवाण के बख्त अर हिम्तान के दिन जंगळ म्ह करया था। 9 जित थारे पिता-दादां नै मेरै तारीं जाँचकै परख्या अर चालीस साल तारीं मेरे काम देख्खे। 10 इस कारण मै उस बख्त के माणसां तै गुस्सा रहया, अर कहया, ‘इनके मन सारी हाण भटकदे रहवै सै, अर इन्नै मेरे रास्तयां तारीं कोनी पिच्छाणया।’ 11 फेर मन्नै छोह म्ह आकै सूह खाई, ‘वे मेरै बिसराम म्ह बड़ण नीं पावैगें।’ 12 हे भाईयो, चौकस रहो के थारै म्ह इसा भूँडा अर अबिश्वासी मन ना हो, जो थमनै जिन्दे पणमेशर तै दूर हटा ले जावै। 13 बल्के जिस दिन तारीं आज का दिन कहया जावै सै, हरेक दिन एक दुसरे तारीं समझान्दे रहो, इसा ना हो के थारै म्ह तै



कोए माणस पाप के छल म्ह आकै करडा बण जावै। 14 क्यूँके हम मसीह के साइझीदार होये सां, जै हम अपने पहल्ले भरोस्से पै आखर ताहीं पक्के तौर तै स्थिर रहवै। 15 जिसा कहाया गया जावै सै, “जै आज थम उसका शब्द सुणो, तो अपने मनां नै करडा ना करो, जिसा के छोह दुवाण के बख्त करया था।” 16 भला किन माणसां नै सुणकै भी छोह दुवाया? के न सारया नै नीं, जो मूसा के जरिये मिस्र तै लिकड़े थे? 17 अर ओ चालीस साल ताहीं किन माणसां पै गुस्सा रहया? के उन्ने तै नीं जिन्नै पाप करया, अर उनकी लाश जंगल म्ह पड़ी रहीं? 18 अर उसनै किन तै संह खाई के थम मेरै आराम म्ह बड़ नीं पाओगे? के सिर्फ उनतै नीं जिन्नै आज्ञा नीं मानी? 19 आखर म्ह हम देख्वां सां के वे अबिश्वास के कारण बड़ नीं सके।

### पणमेशर के लोमां का बिश्राम

4 इसकरकै जिब्व के उसके बिश्राम म्ह बड़ण की प्रतिज्ञा इब ताहीं सै, तो हमनै डरना चाहिये इसा ना हो के थारै म्ह तै कोए माणस उसतै वंचित रह जावै। 2 क्यूँके हमनै उन्ने की तरियां सुसमाचार सुणाया गया सै, पर सुणे होये बचन तै उन्ने कीमे फैयदा कोनी होया; क्यूँके सुणणआळ्यां के मन म्ह बिश्वास के गेल्या कोन्या बैठ्या। 3 पर हम जिन्नै बिश्वास करया सै उस बिश्राम म्ह बड़ां सां; जिसा कहाया, “मन्ने अपने छोह म्ह संह खाई के वे मेरे बिश्राम म्ह बड़ण नीं पावेंगे।” हालाकि दुनिया की सरुआत के बख्त तै उसके काम पुरे हो लिए थे। 4 क्यूँके सातमै दिन के बारै म्ह उसनै किते न्यू कहाया सै, “पणमेशर नै सातमै दिन अपने सारे काम्मां ताहीं निपटा के बिश्राम करया।” 5 अर इस जंगहा फेर न्यू कहाया सै, “वे मेरै बिश्राम म्ह बड़ण नीं पावेंगे।” 6 तो जिब्व या बात बाकी सै के कितने और सै जो उस बिश्राम म्ह बड़ै, अर जिन्नै उसका सुसमाचार पहल्या सुणाया गया वे हुकम ना मानण के कारण उसम्ह नीं बड़े, 7 ज्यांतै ओ किसे खास दिन ताहीं ठहराके इतनै दिनां के पाच्छे दाऊद की किताब म्ह उस ताहीं ‘आज का दिन’ कहवै सै। जिस तरियां के पहल्या कहाया गया, “जै आज थम उसका शब्द सुणो, तो अपने मनां नै करडा ना करो।”

8 क्यूँके जै यहेशू उन्ने बिश्राम म्ह बड़ा लेन्दा, तो दुसरे दिन का जिक्का कोनी होदा। 9 आखर जाण लो के पणमेशर के माणसां के खातर सब्त का बिश्राम बाकी सै; 10 क्यूँके जो उसके बिश्राम म्ह बड़या सै, उसनै भी पणमेशर की ढाळ अपने काम पुरे करके बिश्राम करया सै। 11 आखर म्ह हम उस बिश्राम म्ह बड़ण की कोशिश करां, इसा ना होवै के कोए माणस उन की तरियां आज्ञा ना मान के पड़ ज्या। 12 क्यूँके पणमेशर का बचन जिन्दा, अर हावीं, अर हर एक दोधारी तलवार तै भी घणा चोखा सै; अर प्राण अर आत्मा ताहीं, अर गाँठ-गाँठ अर गुद्रे-गुद्रे ताहीं न्यारा करके आरम-पार चिरै सै अर मन की भावनायां अर बिचारां ताहीं जाँचे सै। 13 सृष्टि की कोई चीज उसतै लुकही होई कोनी सै बल्के जिस तै हमनै काम सै, उसकी आँखां के श्यामी सारी चीज खुली अर प्रगट सै।

### बड्डा महायाजक

14 ज्यांतै जिब्व म्हारा इसा बड्डा महायाजक सै, जो स्वर्गां तै होके गया सै, यानिके पणमेशर का बेट्टा यीशू, तो आओ, हम अपने अंगीकार ताहीं पक्के तौर तै थाम्बे रहवां। 15 क्यूँके म्हारा इसा महायाजक नीं जो म्हारी कमजोरीयां म्ह म्हारै गेल्या दुखी ना हो सकै; बल्के ओ सारी बात्तां म्ह म्हारै तरियां परख्या तो गया, फेरभी निष्पाप लिकड़या। 16 इसकरकै आओ, हम अनुग्रह के सिंहासन के लवै हिम्मत बाँधके चालां के म्हारै पै दया होवै, अर ओ अनुग्रह पावां जो जरूरत के बख्त म्हारी मदद करै।

5 क्यूँके हरेक महायाजक माणसां म्ह तै लिया जावै सै अर माणसां ए के खातर, उन बात्तां के बारै म्ह जो पणमेशर तै सम्बन्ध राखे सै, ठहराया जावै सै के भेंट अर पाप बलि चढ़ाया करै। 2 ओ बेअक्के अर भूले भटक्यां के गेल्या नर्मी तै बीवार कर सकै सै, ज्यांतै ओ आप भी कमजोरी तै घिरया सै। 3 ज्यांतै उस ताहीं चाहिये के जिसा माणसां के खातर उससे तरियां ए अपने खातर भी पाप-बलि चढ़ाया करै। 4 ओ आदर का ओद्व कोए

अपणे आप तै कोनी लेन्दा, जिब्व ताहीं के हारून की ढाळ पणमेशर की ओड़ ठहराया ना जावै।

5 उससे तरियां ए मसीह नै भी महायाजक बनण की बड़ाई अपने आप तै नीं लेई, पर उस ताहीं उससे नै देई, जिसनै उसतै कहाया था, “तू मेरा बेट्टा सै, आज मन्ने ए तेरै ताहीं पैदा करया सै।” 6 इससे तरियां ए ओ दूसरी जंगहा म्ह भी कहवै सै, “तू मलिकिसिदक की रीत पै सारी हाण के खातर याजक सै।” 7 यीशू नै आपणी देही म्ह रहण के दिनां म्ह ठाडू शब्दां तै रुक्का मारके अर आँसू बहा-बहाके उसतै जो उस ताहीं मौत तै बचा सकै था, प्रार्थनाएँ अर बिनती करी, अर भगति के कारण उसकी सुणी गई। 8 बेट्टे होण पै भी उसनै दुःख ठा-ठाके आज्ञा मानणी सिख्या, 9 अर सिद्ध बणके, अपने सारे आज्ञा मानणीयां के खातर सारी हाण बख्त के उद्वार का कारण होग्या, 10 अर उस ताहीं पणमेशर की ओड़ तै मलिकिसिदक की रीत पै महायाजक का ओद्व मिला।

### बिश्वास तै भटक जाण का नतिज्ञा

11 इसके बारै म्ह हमनै घणी ए बात कहणी सै, जिनका समझाणा भी ओख्खा सै, ज्यांतै के थम ऊंचा सुणण लागे सो। 12 बख्त के बिचार तै तो थमनै गुरु हो जाणा चाहिये था, फेरभी यो जरूरी होग्या सै के कोए थमनै पणमेशर के बचनां की पुराणी शिक्षा दुबारा तै सिखावै। थम तो इसे होग्ये सो के थमनै अन्न के बदलै इब ताहीं दूध ए चाहिये। 13 क्यूँके दूध पीणआळे बाळक ताहीं तो धर्म के बचन की पीच्छाण कोनी होन्दी, क्यूँके ओ बाळक सै। 14 पर अन्न श्याणा के खातर सै, जिनकी ज्ञान की इंद्रियां अभ्यास करदे-करदे आच्छे-भुन्डे म्ह फर्क करण म्ह निपुण होग्यी सै।

6 इसकरकै आओ मसीह की शिक्षा की सरुआत की बात्तां नै छोड़के हम सिद्धता के कात्री आगै बढदे जावां, अर मेरे होये काम्मां तै मन फिराण, अर पणमेशर पै बिश्वास करण, 2 अर बपतिस्मा अर हाथ धरण, अर मेरे होया के जिन्दा उठण, अर आखरी न्याय की शिक्षा रूपी नीव दुबारा ना बणावां। 3 जै पणमेशर चाहवै तो हम न्यू ए करांगे। 4 क्यूँके जिन्नै एक बर चाँदणा पाया सै, अर जो सुर्गीय वरदान का सुवाद चाख चुके सै अर पवित्र आत्मा के साइझी हो गे सै, 5 अर पणमेशर के सारया तै बढ़िया बचन का अर आण आळे युग की सामर्थ का सुवाद चाख चुके सै, 6 जै वे भटक जावै तो उन्ने मन-फिराण के खातर दुबारा नया बनणा अनहोणा सै; क्यूँके वे पणमेशर के बेट्टे ताहीं अपने खातर दुबारा क्रूस पै चढ़ावै सै अर प्रगट म्ह उस पै कलंक लावै सै। 7 क्यूँके जो धरती मीह के पाणी ताहीं, जो उस पै बार-बार पड़ै सै, पी-पीके जिन माणसां के खातर वा जोती-बोई जावै सै उनके काम का साग-पात उगावै सै वा पणमेशर तै आशीष पावै सै, 8 पर जै वा झाड़ी अर ऊँटकटारे उगावै सै तो निकम्मी अर श्रापित होण पै सै, अर उसका अन्त जळया जाणा सै।

9 पर हे प्यारो, हालाके हम ये बात कहवां सां तौभी थारै बारै म्ह हम इसतै आच्छी और उद्वारआळी बात्तां का भरोस्सा करां सां। 10 क्यूँके पणमेशर अन्यायी कोनी के थारे काम, अर उस प्रेम नै भूल जावै, जो थमनै उसके नाम के खातर इस तरियां तै दिखाया, के पवित्र माणसां की सेवा करी अर कर भी रहे सो। 11 पर हम घणा चाहवां सां के थारै म्ह तै हरेक माणस आखर ताहीं पूरी आस के खातर इसी ए कोशिश करदा रहवै। 12 ताके थम आळसी ना हो जाओ, बल्के उनका अनुकरण करो जो बिश्वास अर धीरज के जरिये प्रतिज्ञाओं के वारिस होवै सै।

### पणमेशर की अटल प्रतिज्ञा

13 पणमेशर नै अब्राहम तै वादा करदे बख्त जिब्व संह खाण के खातर किसे ताहीं अपने तै बड्डा कोनी पाया, तो आपणी ए संह खाके कहाया, 14 “मै साच्च-ए तेरै ताहीं घणा आशीष दूँगा, अर तेरी ऊलाद ताहीं बढ़ान्दा जाऊँगा।” 15 अर इस तरियां तै उसनै धीरज धरके वादा करी होई बात प्राप्त करी। 16 माणस तो अपने तै किसे बड्डे की संह खाया करै सै, अर उनके हरेक रोळे का फैसला संह खाके पक्का होवै सै। 17 ज्यांतै जिब्व पणमेशर नै प्रतिज्ञा के वारिसां पै और भी साफ तरियां तै प्रगट करणा चाहया के उसका

मकसद बदल नीं सकदा, तो सूंह नै बिचाळै ल्याया। 18 ताके दो बे-बदल बात्तां के जरिये, जिनके बारै म्ह पणमेशर का झूठा ठहरणा अनहोणा सै, पके तौर तै म्हारा डेट बन्ध जावै, जो शरण लेण नै ज्यांतै भाजे सै के उस आस ताहीं जो श्यामी धरी होई सै प्राप्त करै। 19 वा आस महारै प्राण के खातर इसा लंगर सै जो स्थिर अर मजबूत सै, अर पडदै के भीत्तर ताहीं पहोचै सै, 20 जित यीशु नै मलिकिसिदक की रीत पै सारे हाण के बख्त का महायाजक बणकै, म्हारै खातर अगुआ के रूप म्ह बड़या सै।

### मलिकिसिदक याजक

7 यो मलिकिसिदक शालेम का राजा, अर परमप्रधान पणमेशर का याजक, सारी हाण का याजक बणया रहवै सै। जिबब अब्राहम राजायां ताहीं मारकै बोहड़ण लागरया था, तो इस्से नै उस तै फेटकै उस ताहीं आशीष दिया। 2 इस्से ताहीं अब्राहम नै सारी चीजां का दसमा हिस्सा भी दिया। यो पहल्या अपणे नाम के मतलब के मुताबिक, धर्म का राजा, अर फेर शालेम यानिके शान्ति का राजा सै। 3 जिसकां ना पिता, ना माँ, ना पीढी सै, जिसके दिनां का नीं सरुआत सै अर ना जिन्दगी का अन्त सै; पर पणमेशर के बेटे के हुबहु ठहर के ओ सारी हाण के खातर याजक बणया रहवै सै। 4 इब इस पै ख्याश करो के ओ किसा महान था जिसताहीं कुलपति अब्राहम नै लूट के बढ़िया तै बढ़िया माल का दसमा हिस्सा दिया। 5 लेवी की ऊलाद म्ह तै जो याजक का ओद्दा पावै सै, उन्नै आज्ञा मिली सै के माणसां, अर अपणे भाईयां तै, चाहे वे अब्राहम की देही तै ए क्यूँ नीं जन्मे हों, नियम-कायदे के मुताबिक दसमा हिस्सा लेवै। 6 पर इसनै, जो उसकी पीढी का भी कोनी था, अब्राहम तै दसमा हिस्सा लिया, अर जिस ताहीं प्रतिज्ञाएँ मिली थीं उस ताहीं आशीष देई। 7 इस म्ह शक ना सै के छोटा बड्या तै आशीष पावै सै। 8 अर उरै तो मरणीये माणस दसमा हिस्सा लेवै सै, पर ओडै ओए लेवै सै जिसकी गवाही देई जावै सै के ओ जिन्दा सै। 9 तो हम न्यू भी कह सकां सां के लेवी नै भी, जो दसमा हिस्सा लेवै सै, अब्राहम के जरिये दसमा हिस्सा दिया। 10 क्यूँके जिस बख्त मलिकिसिदक उसकै पिता तै फेट्या, उस बख्त ओ अपणे पिता की देही म्ह था।

### मलिकिसिदक के समान दूसरा याजक

11 जै लेवीय याजक ओद्दे के जरिये सिद्धि प्राप्त हो सकै (जिसके आसरे माणसां ताहीं नियम-कायदे मिले थे) तो फेर के जरूरत थी के दूसरा याजक मलिकिसिदक की रीत पै खड़या होवै, अर हारून की रीत का ना कुहवावै? 12 क्यूँके जिबब याजक का ओद्दा बदल्या जावै सै, तो व्यवस्था का भी बदलणा जरूरी सै। 13 क्यूँके जिसके बारै म्ह ये बात कही जावै सै के ओ दुसरे गोत्र का सै, जिस म्ह तै किसे नै वेदी की सेवा नीं करी, 14 तो दिखग्या के म्हारा प्रभु यहूदा के गोत्र म्ह तै पैदा होया सै, अर इस गोत्र के बारै म्ह मै मुसा नै याजक ओद्दे का कीमे जिक्का कोन्या करया। 15 म्हारा दावा और भी साफ़ तरियां तै दिख जावै सै, जिबब मलिकिसिदक के तरियां एक और याजक पैदा हो जावै सै, 16 जो देही तौर पै हुक्म के नियम-कायदे के मुताबिक नीं, पर अमर जीवन की सामर्थ के मुताबिक नियुक्त होया हो। 17 क्यूँके उसकै बारै म्ह या गवाही दी गई सै, “तू मलिकिसिदक की रीत पै युगानुयुग याजक सै।” 18 इस ढाळ, पहलडी आज्ञा कमजोर अर बेकार होण के कारण गुम होगी 19 (ज्यांतै के व्यवस्था नै किसे बात की सिद्धि कोन्या करी), अर उसकी जंगहा पै एक इसी सारया तै बढ़िया आस राक्खी गई सै जिसके जरिये हम पणमेशर के लवै जा सकां सां। 20 मसीह की नियुक्ति बिना सूंह कोनी होई, 21 क्यूँके वे तो बिना सूंह याजक ठहराए गये पै या सूंह के गेल्या उसकी ओड तै नियुक्त करया गया जिसनै उसकै बारै म्ह कहया, “प्रभु नै सूंह खाई, अर ओ उसतै फेर ना पछतावैगा के तू युगानुयुग याजक सै।” 22 इस ढाळ यीशु एक सारया तै बढ़िया वाचा का जमानती ठहरया।

23 वे तो घणी बड्डी गिणती म्ह याजक बन्दे आये, इसकां कारण यो था के मौत उन्नै रहण नीं देवै थी; 24 पर यो युगानुयुग होंदा रहवै सै, इस कारण उसका याजक पद पक्का सै। 25 इस्से खातर जो उसकै जरिये पणमेशर के धोरै आवै सै, ओ उनका पूरा-पूरा उद्धार कर सकै सै, क्यूँके ओ उनकै खातर

बिनती करण ताहीं सारी हाण जिन्दा सै। 26 आखर म्ह इसा ए महायाजक म्हारै जोगा था जो पवित्र, अर बिना कपट का, अर जमा साफ़, अर पापियां तै न्यारा, अर सुरा तै भी ऊँचा करया होया हो। 27 उन महायाजकां की तरियां उसनै जरूरत कोनी के हरेक दिन पहल्या अपणे पापां के खातर बलिदान चढ़ावै; क्यूँके उसनै अपणे आप ताहीं बलिदान चढ़ाके उसनै एक ए बर म्ह पूरा कर दिया। 28 क्यूँके व्यवस्था तो कमजोर माणसां ताहीं महायाजक नियुक्त करै सै, पर उस सूंह का बचन, जो व्यवस्था के पाछे खाई गई, उस बेटे नै नियुक्त करै सै जो युगानुयुग के खातर सिद्ध करया गया सै।

### यीशु म्हारा महायाजक

8 इब जो बात हम कहण लागरे सां उन म्ह तै सारया तै बड्डी बात या सै के म्हारा इसा महायाजक सै, जो सुरा पै महामहीमन के सिंहासन के सोळी ओड जा बैठ्या सै, 2 अर पवित्र जंगहा अर उस साचे तम्बू का सेवक होया जिस ताहीं किसे माणस नीं, बल्के प्रभु नै खड़या करया सै। 3 क्यूँके हरेक महायाजक भेंट अर बलिदान चढ़ाण के खातर ठहरया जावै सै, इस कारण जरूरी सै के इस याजक के धोरै भी कीमे चढ़ाण के खातर हो। 4 जै ओ धरती पै होंदा तो कद्दे भी याजक नीं होंदा, ज्यांतै के व्यवस्था के मुताबिक भेंट चढ़ाण आळे तो सै। 5 वे सुरा म्ह की चीजां के नकल अर छाया की सेवा करै सै; जिसा जिबब मूसा तम्बू बनाण पै था, तो उस ताहीं या चेतावनी मिली, “लखा, जो नमूना तेरे ताहीं पहाड़ पै दिखाया गया था, उसकै मुताबिक सारा कीमे बनाणा।” 6 पर उन याजकां तै बढ़के सेवा यीशु ताहीं मिली क्यूँके ओ और भी उत्तम वाचा की बिचोला ठहरया, जो और उत्तम वायदया के आसरे बाँधी गई सै।

7 क्यूँके जै वा पहलडी वाचा बेकसूर होन्दी, तो दूसरी के खातर मौक्का ना टोहया जान्दा। 8 पर प्रभु उन पै तोहमन्द लाके कहवै सै, “प्रभु कहवै सै, लखाओ, वे दिन आवै सै के मै इस्राएल के कुन्बे के गेल्या, अर यहूदा के कुन्बे के गेल्या नयी वाचा बाधुंगा।” 9 या उस वाचा की तरियां ना हावैगी, जो मन्नै उनकै पिता-दादां के गेल्या उस बख्त बाँधी थी, जिबब मै उनका हाथ पकड़के उन ताहीं मिस्र देश तै लिकाड ल्याया; क्यूँके वे मेरी वाचा पै टिक नीं सके, ज्यांतै मन्नै उनकी ख्याश कोन्या करी, प्रभु न्यू ए कहवै सै। 10 फेर प्रभु कहवै सै, के जो वाचा उन दिनां के पाछे इस्राएल के कुन्बे के गेल्या बाधुगा, वा या सै के मै आपणे व्यवस्था नै उनके मनां म्ह गेरुंगा, अर उस ताहीं उनके हूँदां पै लिखुंगा, अर मै उनका पणमेशर ठहरुंगा अर वे मेरे माणस ठहरुंगे। 11 अर हरेक अपणे देशआळे ताहीं अर अपणे भाई ताहीं या शिक्षा नीं देवैगा, के तू प्रभु ताहीं पिच्छाण, क्यूँके छोट्या तै लेके बड्या ताहीं सारे मन्नै जाण लेवैंगे। 12 क्यूँके मै उनकै अधर्म के बारै म्ह दया करुंगा, अर उनकै पापां ताहीं दुबारा याद कोनी करुंगा।” 13 नयी वाचा नै बनाण तै उसनै पहलडी वाचा ताहीं पूराणी ठहरा दिया; अर जो चीज पूराणी अर जीर्ण या बूढी हो जावै सै उसका मिट जाणा जरूरी सै।

### पार्थिव तम्बू म्ह सेवा

9 उस पहलडी वाचा म्ह भी सेवा के नियम थे, अर इसी पवित्र जंगहा थी जो इस दुनिया की थी। 2 क्यूँके एक तम्बू बणाया गया, पहल्या तम्बू म्ह दिवा धरण का दीवट, अर मेज, अर भेंट की रोटीयां थीं; अर वा पवित्र जंगहा कुहवावै सै। 3 दूसरा, पडदे के पाछे ओ तम्बू था, जो परमपवित्र जंगहा कुहवावै सै। 4 उस म्ह सोत्रे की धूपदानी, अर चौगरदेके सोत्रे तै मन्द्या होया वाचा का सन्दुक अर उस म्ह मन्ना तै भरया होया सोने का मर्तबान अर हारून की छड़ी जिस म्ह फूल फळ आ गये थे अर वाचा की पटियां थीं। 5 उसकै ऊपर दोनु तेजोमय करुब थे, जो पछतावे के ढक्कण पै छाया करे होड थे; इनका एक-एक करके जिक्का करण का इब्बे बख्त कोनी सै।

6 ये चीज इस तरियां तै तयार हो चुकीं। उस पहलडे तम्बू म्ह याजक हरेक बख्त बड़के सेवा का काम पूरा कर सकै सै। 7 पर दुसरे म्ह सिर्फ महायाजक साल भर म्ह एक ए बर जावै सै, अर बिना लहू लिये नीं जान्दा;

जिस ताहीं ओ अपने खातर अर माणसां की भूल-चूक कै खातर चढ़ावै सै | 8 इस तै पवित्र आत्मा योए दिखावै सै के जिब्व ताहीं पहलड़ा तम्बू खड़या सै, जिद ताहीं पवित्र जंगहा का रास्ता प्रगट कोनी होया | 9 यो तम्बू इब के बख्त कै खातर एक उदाहरण सै; जिसम्ह इसी भेंट अर बलिदान चढ़ाये जावै सै, जिनतै आराधना करणआळे के विवेक सिद्ध कोनी हो सकदे | 10 क्यूँके वे सिर्फ खाण-पाण की चीजां अर कई ढाळ की नहाण के तरीकयां कै आधार पै देही तौर पै नियम सै, जो सुधार कै बख्त ताहीं कै खातर नियुक्त करे गये सै |

### मसीह कै लहू की सामर्थ

11 पर जिब्व मसीह आणआळी बढ़िया-बढ़िया चीजां का महायाजक होकै आया, तो उसनै और भी बड़ु अर सिद्ध तम्बू तै होकै, जो हाथ का बणाया होया कोनी यानिके इस सृष्टि का कोनी, 12 अर बकरयां अर बछड़यां के लहू कै जरिये नीं पर अपने ए लहू कै जरिये, एक ए बर पवित्र जंगहा म्ह बड़या अर अनन्त छुटकारा प्राप्त करया | 13 क्यूँके जिब्व बकरयां अर बैल्दां का लहू अर कलोर की राख का अपवित्र माणसां पै छिड़कया जाणा देही की शुद्धता कै खातर उन ताहीं पवित्र करै सै, 14 तो मसीह का लहू जिसनै अपने आप ताहीं घणी पुराणी आत्मा कै जरिये पणमेशर कै श्यामी बेकसूर चढ़ाया, थारै विवेक ताहीं मरे होड़ काम्मां तै क्यांतै नीं शुद्ध करैगा ताके थम जिन्दे पणमेशर की सेवा करो |

15 इस्से कारण ओ नयी वाचा का बिचोला सै, ताके उसकी मौत के जरिये जो पहलड़ी वाचा कै बख्त के अपराध तै छुटकारा पाण कै खातर होई सै, बुलाए होड़ माणस वायदे कै मुताबिक अनन्त वसीयत ताहीं प्राप्त करै | 16 क्यूँके जित वाचा बाँधी गई सै उडै वाचा बाँधणआळ्या की मौत का समझ लेणा भी जरूरी सै | 17 क्यूँके इसी वाचा मरण पै पक्की होवै सै, अर जिब्व ताहीं वाचा बाँधण आळा जिन्दा रहवै सै जिद ताहीं वाचा काम की कोनी होन्दी | 18 इस्से खातर पहलड़ी वाचा भी बिना लहू कै कोनी बाँधी गई | 19 क्यूँके जिब्व मूसा सारे माणसां नै व्यवस्था का हरेक हुकम सुणा चुकया तो उसनै बकरयां अर बाछड़यां का लहू ले कै, पानी अर लाल ऊन अर जूफा(रूई) कै गेल्या, उस किताब पै अर सारे माणसां पै छिड़क दिया 20 अर कहया, "यो उस वाचा का लहू सै, जिसका हुकम पणमेशर नै थारै खातर दिया सै |" 21 अर इस्से तरियां तै उसनै तम्बू अर सेवा के सारे समान पै छिड़कया | 22 साच्ची तो या सै के नियम-कायदे कै मुताबिक आमतौर पै सारी चीज लहू कै जरिये शुद्ध करी जावै सै, अर लहू बहाए पापां की माफ़ी कोन्या |

### मसीह के बलिदान कै जरिये पाप की माफ़ी

23 ज्यांतै जरूरी सै के सुर्ग म्ह की चीजां के हबू इन बलिदानां कै जरिये शुद्ध करे जावै, पर सुर्ग म्ह की चीज खुद इनतै घणै बढ़िया बलिदानां कै जरिये शुद्ध करी जान्दी | 24 क्यूँके मसीह नै उस हाथ के बणाई होई पवित्र जंगहा म्ह, जो साच्ची पवित्र जंगहा का नमूना सै, कोनी बड़या, पर सुर्ग ए म्ह बड़या, ताके म्हारै खातर इब पणमेशर कै श्यामी दिखाई देवै | 25 यो नीं के ओ आपणे आप ताहीं बार-बार चढ़ावै, जिसा के महायाजक हरेक साल दुसरे का लहू लिए पवित्र जंगहा म्ह बड़या करै था, 26 नीं तो दुनिया की सरुआत तै लेकै उस ताहीं बार-बार दुःख ठाणा पड़दा; पर इब युग कै आखरी म्ह ओ एक ए बर प्रगट होया सै, ताके अपने ए बलिदान कै जरिये पाप ताहीं दूर कर देवै | 27 अर जिस तरियां माणसां कै खातर एक बर मरणा अर उसकै पाच्छे न्याय का होणा तय सै, 28 उस्से तरियां ए मसीह भी घणा ए कै पापां ताहीं उठा लेण कै खातर एक बर बलिदान होया; अर जो माणस उसकी बाट देखै सै उनकै उद्धार कै खातर दूसरी बर बिना पाप उठाए होए दिखैगा |

### सिद्ध बलिदान

10 क्यूँके नियम-कायदे, जिस म्ह आणआळी बढ़िया चीजां की छाया सै पर उनका असली खुद का रूप कोनी, ज्यांतै उन एक ए ढाळ के बलिदानां कै जरिये जो हरेक साल बिना चुके चढ़ाए जावै सै, धोरै आणआळ्यां ताहीं कद्रे भी सिद्ध नीं कर सकदी | 2 नीं तो उनका चढ़ाणा

बन्द क्यांतै नीं हो जान्दा? ज्यांतै जिब्व सेवा करणआळे एक ए बर शुद्ध हो जान्दे, तो उनका विवेक उन्नै पापी कोनी ठहरान्दा | 3 पर उनकै जरिये हरेक साल पापां की याद होया करै सै | 4 क्यूँके यो अनहोणा सै के बैल्दां अर बकरयां का लहू पापां नै दूर करै |

5 इस्से कारण ओ दुनिया म्ह आंदे बख्त कहै सै, "बलिदान अर भेंट तन्नै कोनी चाही, पर मेरै खातर एक देही त्यार करी | 6 होम-बलियां अर पाप बलियां तै तू राजी कोनी होया | 7 फेर मन्नै कहया, 'लखा, मै आग्या सूं, पवित्र ग्रन्थ म्ह मेरै बारै म्ह लिख्या होया सै, ताके हे पणमेशर, तेरी मर्जी पूरी करूँ |" 8 ऊप्पर तो ओ कहै सै, "ना तन्नै बलिदान अर भेंट अर होम-बलियां अर पाप-बलियां ताहीं चाहया, अर ना उन तै राजी होया," हालाकि ये बलिदान तो व्यवस्था कै मुताबिक चढ़ाए जावै सै | 9 फेर यो भी कहै सै, "लखा, मै आग्या सूं, ताके तेरी मर्जी पूरी करूँ," आखर ओ पहलड़े नै उठा लेवै सै, ताके दुसरे ताहीं नियुक्त करै | 10 उस्से मर्जी तै हम यीशु मसीह की देही कै एक ए बर बलिदान चढ़ाए जाण कै जरिये पवित्र करे गये सां |

11 हरेक याजक तो खड़े होकै रोज सेवा करै सै, अर एक ए ढाळ के बलिदान नै जो पापां नै कद्रे भी दूर नीं कर सकदे, बार-बार चढ़ावै सै | 12 पर यो माणस तो पापां कै बदलै एक ए बलिदान सारी हाण कै खातर चढ़ाकै पणमेशर कै सोळी ओड़ जा बैठ्या, 13 अर उस्से बख्त तै इसकी बाट देखण लागरया सै, के उसके बैरी उसके पापां कै तळै की पटडी बणै | 14 क्यूँके उसनै एक ए चढ़ावै कै जरिये उन ताहीं जो पवित्र करे जावै सै, सारी हाण कै खातर सिद्ध कर दिया सै | 15 अर पवित्र आत्मा भी हमनै याए गवाही देवै सै; क्यूँके उसनै पहलया ए कहया था,

16 "प्रभु कहै सै के जो वाचा मै उन दिनां कै पाच्छै उन तै बाँधूंगा वा या सै के मै अपने नियमां ताहीं उनके हृदयां पै लिखूंगा अर मै उनकै विवेक म्ह रेखूंगा |" 17 फेर ओ न्यू कहवै सै, "मै उनकै पापां नै अर उनकै अधर्म के काम्मां नै दुबारा याद कोनी करूंगा |" 18 अर जिब्व उनकी माफ़ी होगी तो पाप का बलिदान कोनी रहया | 19 ज्यांतै हे भाईयो, जिब्व हमनै यीशु कै लहू कै जरिये उस नये अर जिन्दे रास्ते तै पवित्र जंगहा म्ह बड़ण की हिम्मत होगी सै, 20 जो उसनै पड़दे यानिके आपणी देही म्ह तै होके, म्हारै खातर अभिषेक करया सै, 21 अर ज्यांतै के म्हारा इसा महान याजक सै, जो पणमेशर के घर का अधिकारी सै, 22 तो आओ, हम साचे मन अर पुरै बिश्वास कै गेल्या, अर विवेक की खामी दूर करण कै खातर हृदय पै छिड़काव लेकै, अर देही ताहीं सुचे पाणी तै धुवाकै पणमेशर कै लवै जांवा | 23 आओ हम आपणी आस कै अंगीकार ताहीं मजबूती तै थाम्बे रहवां, क्यूँके जिसनै वादा करया सै, ओ साच्चा सै; 24 अर प्रेम, अर भले काम्मां म्ह उक्साण कै खातर हम एक-दुसरे की फिक्र किया करां, 25 अर एक-दुसरे कै गेल्या कद्रे होणा ना छोड्डां, जिस तरियां के कितन्या की रीत सै, पर एक-दुसरे नै समझान्दे रहवां; अर ज्यां-ज्यां उस दिन नै लोवै आंदे देखो त्यों-त्यों और भी घणे ये करया करो | 26 क्यूँके सच्चाई की पिच्छण प्राप्त करण के बाद जै हम जाण-बुझकै पाप करदे रहवा, तो पापां कै खातर फेर कोए बलिदान बाकी कोनी | 27 हाँ, सजा का भयानक बाट देखणा अर आग का बळणा बाकी सै जो बिरोधियां नै भस्म कर देवैगा | 28 जिब्व मूसा के नियम-कायदे का ना मानण आळा, दो या तीन माणसां की गवाही पै, बिना दया कै मार दिया जावै सै, 29 तो सोच ल्यो के ओ कितने और भी भारया सजा कै जोगा ठहरैगा, जिसनै पणमेशर के बेड़े ताहीं पाँयां तै रौंदया अर वाचा कै लहू ताहीं, जिसकै जरिये ओ पवित्र ठहराया गया था, अपवित्र जाणया गया सै, अर अनुग्रह के आत्मा का अपमान करया | 30 क्यूँके हम उसनै जाणा सा, जिसनै कहया, "पलटा लेणा मेरा काम सै, मै ए बदला दूँगा |" अर फेर यो के "प्रभु अपने माणसां का न्याय करैगा |" 31 जिन्दे पणमेशर कै हाथां म्ह पड़ना भयानक(डरावनी) बात सै | 32 पर उन पाच्छले दिनां नै याद करो, जिन म्ह थम चाँदणा पाकै दुःखा की भारया लड़ाई म्ह डटे रहे | 33 कदे-कदे तो न्यू के थम बुराई अर क्लेश सहन्दे होए तमाशा बणे, अर कदे न्यू के थम उनके साइझी होए जिनकी भूँडी हालत करी जावै थी | 34 क्यूँके थम कैदीयां के दुःख म्ह भी दुखी होए, अर आपणी सम्पति भी खुशी तै लुटण दी; न्यू जाणकै के थारै गेल्या एक और भी सारया तै बढ़िया अर सारी हाण ठहरण आळी सम्पति सै | 35 ज्यांतै आपणी हिम्मत ना छोड्डो क्यूँके उसका इनाम बड़ु सै | 36 क्यूँके थारा धीरज धरणा

जरूरी सै, ताके पणमेशर की मर्जी नै पूरी करके थम वायदे का फळ पाओ।  
37 "क्यूँके इब घणा ए माड़ा बख्त रहग्या सै, जिब्व के आणआळा आवैगा अर  
वार नौ करैगा। 38 पर मेरा धर्मी माणस बिश्वास तै जिन्दा रहवैगा, जै ओ  
पाचछै हट जावै तो मेरा मन उस तै राजी कोनी होवैगा।" 39 पर हम हटण  
आळे कोनी के नाश हो जावै पर बिश्वास करणआळे सां के ज्यानां ताहीं  
बचाएँ।

### बिश्वास के उदाहरण

11 इब बिश्वास आस करी होई चीजां का निश्चय, अर बिना देखी  
चीजां का सबूत सै। 2 क्यूँके इस्से के बारे म्हा प्राचीनां की आच्छी  
गवाही दी गई। 3 बिश्वास ए तै हम जाण जावां सां के सारी सृष्टि की रचना  
पणमेशर के बचन के जरिये होई सै। पर यो नी के जो कीमे देखण म्हा आवै  
सै, ओ देखी होई चीजां तै बणया हो। 4 बिश्वास ए तै हाबिल ने कैन तै घणा  
बढ़िया बलिदान पणमेशर के खातर चढाया, अर उस्से के जरिये उनके धर्मी  
होण की गवाही भी देई गई, क्यूँके पणमेशर नै उसकी भेंटां के बारे म्हा गवाही  
देई; अर उस्से के जरिये ओ मरण पै भी इब ताहीं बात करै सै। 5 बिश्वास ए तै  
हनोक उठा लिया गया के मौत नै नीं देखे, अर उसका बेरा नीं लाग्या क्यूँके  
पणमेशर नै उस ताहीं उठा लिया था, अर उसके ऊपर टाए जाण तै पहल्या  
उसकी गवाही देई गयी थी के उसने पणमेशर ताहीं राजी करया सै। 6 अर  
बिश्वास बिना उस ताहीं राजी करणा अनहोणा सै; क्यूँके पणमेशर के धोरै  
आणआळे नै बिश्वास करणा चाहिये के ओ सै, अर अपने टोहणआळे नै इनाम  
देवै सै। 7 बिश्वास ए तै नूह नै उन बात्तां के बारे म्हा जो उस बख्त दीखै थीं,  
चेतावनी मिल दए भगति के गेल अपने कुन्बे के बचाण के खातर जहाज  
बणाया, अर उसके जरिये उसने दुनिया ताहीं कसूरवार ठहराया; अर उस  
धर्म का वारिस होया जो बिश्वास तै होवै सै। 8 बिश्वास ए तै अब्राहम जिब्व  
बुलाया गया तो हुक्म मानके इसी जंगहा लिकड गया जिस ताहीं बसियत म्हा  
लेण आळा था; अर न्यू नीं जाणै था के मै कितोड जाऊँ सूँ, तौभी लिकड  
ग्या। 9 विशवास ए तै उसने वादा करे होड देश म्हा, बिराणै देश म्हा परदेशी की  
तरियां, रहके इसहाक अर याकूब सुदा, जो उसके गेल्या उस्से वादे के  
वारिस थे, तम्बुआ म्हा बसेरा करया। 10 क्यूँके ओ उस स्थिर नींवआळे नगर  
की बाट देखै था, जिसकां रचणआळा अर बनाणआळा पणमेशर सै।  
11 बिश्वास तै सारा नै आप बूढी होण पै भी गर्भ धारण करण की सामर्थ पाई,  
क्यूँके उसने वादा करणआळे ताहीं साचा जाणया था। 12 इस कारण एक ए  
माणस तै, जो मरया होया सा था, अकास के तारयां अर समुन्दर के कठारै  
के बाळू की तरियां अणगिणत वंश पैदा होए। 13 ये सारे बिश्वास ए की हालत  
म्हा मरे; अर उन्ने वादा करी होई चीज कोनी पाई, पर उन्ने दूर तै देखके राजी  
होए अर मान लिया के हम धरती पै परदेशी अर बाहर के सा। 14 जो इसी-  
इसी बात कहवै सै, वे दिखावै सै के अपने देश की टोह म्हा सै। 15 अर जिस  
देश तै वे लिकड आये थे, जै उसकी सुधि करदे तो उन्ने बोहडण का मौका  
था। 16 पर वे एक घणा बढ़िया यानिके सुर्गीय देश के चाहणआळे सै; इस्से  
खातर पणमेशर उनका पणमेशर कुहवाण म्हा उनतै कोनी समान्दा, क्यूँके  
उसने उनके खातर एक नगर तयार करया सै।  
17 बिश्वास ए तै अब्राहम नै, परखे जाण के बख्त म्हा, इसहाक ताहीं  
बलिदान चढाया; अर जिसने वादां ताहीं साचा मान्या था 18 अर जिसतै न्यू  
कहया गया था, "इसहाक तै तेरा वंश कुहवावैगा," ओए अपने एकूँके बेट्टे ताहीं  
बलिदान चढाण लाग्या। 19 क्यूँके उसने मान लिया, के पणमेशर सामर्थी सै  
के उस ताहीं मरे होया म्हा तै जिन्दा करैगा; आखर म्हा उन्ने म्हा तै उदाहरण  
की रीत पै ओ उस ताहीं फेर मिल्या। 20 बिश्वास ए तै इसहाक नै याकूब अर  
एसाव ताहीं आणआळी बात्तां के बारे म्हा आशीष देई। 21 बिश्वास ए तै याकूब  
नै मरदे बख्त यूसुफ के दोनु बेट्ट्यां म्हा तै एक-एक ताहीं आशीष देई, अर  
आपणी लाठी के कुणै पै सहारा लेके मुद्दा पडके धोक मारी। 22 बिश्वास ए तै  
यूसुफ नै, जिब्व ओ मरण पै था, तो इस्राएल की ऊलाद के लिकड जाण का  
जिक्रा करया, अर आपणी हाडीयां के बारे म्हा हुक्म दिया। 23 बिश्वास ए तै  
मूसा के माँ-पिता नै उस ताहीं, पैदा होए पाचछै तीन महीने ताहीं ल्हकोए  
राख्या, क्यूँके उन्ने देख्या के बाळक सुथरा सै, अर वे राजा के हुक्म तै कोनी

डरे। 24 बिश्वास ए तै मूसा श्याणा होके फिरौन की बेट्टी का बेट्टा कुहवाण तै  
नाटग्या। 25 ज्यांतै के उस ताहीं पाप म्हा माडे-से दिन के सुख भोगण तै  
पणमेशर के माणसां के गेल्या दुःख भोगणा घणा बढ़िया लाग्या। 26 उसने  
मसीह के कारण बदनाम होण ताहीं मिस्र के भण्डार तै बड्डा धन समझया,  
क्यूँके उसकी आँख ईनाम मिलण की ओड लागी थीं। 27 बिश्वास ए तै राजा  
के छोह तै ना डरके उसने मिस्र ताहीं त्याग दिया, क्यूँके ओ बिना देखे  
मानो देखदा होया पक्का रहया। 28 बिश्वास ए तै उस नै फसह अर लहू  
छिड़कण का तरीका मान्या, के पहलडा का नाश करणआळा इस्राएलियां पै  
हाथ नीं गरै।

29 बिश्वास ए तै वे लाल समुन्दर के पार इसे उतर गे, जिस तरियां सूकरी  
धरती पर तै; अर जिब्व मिस्रीयां नै उस्से तरियां ए करणा चाहया तो सारे  
डूब मरे। 30 बिश्वास ए तै यरीहो की शहरपनाह, जिब्व उन्ने सात दिन ताहीं  
उसका गेड़ा ला लिया, तो वा पडगी। 31 बिश्वास ए तै राहाब बेश्या हुक्म ना  
मानण आळ्यां के गेल्या नाश नीं होई, ज्यांतै के उसने भेदीयां ताहीं राजी-  
खुशी राख्या था। 32 इब और के कहुँ? क्यूँके बख्त कोनी रहया के गिदोन  
का, अर बाराक अर शिमशोन का, अर यिफतह का, अर दाऊद अर शमूल  
का, अर नब्बियाँ का बखान करूँ। 33 इन्ने बिश्वास ए के जरिये राज्य जीते;  
धर्म के काम करे; वादा करी होई चीज पाई; शेरों के मुँह बन्द करे; 34 आग  
की ज्वाला ताहीं शीळा करया; तलवार की धार तै बच लिकडे; कमजोरी म्हा  
ठाड्डे होए; लडाई म्हा वीर लिकडे; विदेशियाँ की फौज ताहीं मार भजाया।  
35 लुगाईयां नै अपने मरे होया ताहीं दुबारा जिन्दा पाया; कितने तो मार  
खादे-खादे मरे गे अर छुटकारा नीं चाहया, ज्यांतै के घणे बढ़िया पुनरुत्थान  
के हिस्सेदार होवै। 36 घण-खरया मखौल म्हा उडाए जाण, अर कोरडे खाण  
बल्के जुडे जाण, अर कैद म्हा पडण के जरिये परखे गये। 37 कई पत्थर  
बरसाए गए; आरै तै चिरे गये; उसकी परीक्षा करी गई; तलवार तै मारे गये; वे  
कंगाली म्हा, अर क्लेश म्हा, अर दुःख भोगदे होए भेड्डा अर बकरीयां की खाल  
ओढ़े होए, उराण-पराण मारे-मारे हॉडे; 38 अर जंगळां, अर पहाड़ा, अर  
गुफायां म्हा, अर धरती की दरारां म्हा भटकदे हॉडे। दुनिया उनके जोगी  
कोनी थी। 39 बिश्वास ए के जरिये इन सारया के बारे म्हा आच्छी गवाही देई  
गई, तौभी उन्ने वादा करी होई चीज कोनी मिली। 40 क्यूँके पणमेशर नै म्हा  
खातर पहल्या तै एक घणी बढ़िया बात ठहराई, के वे म्हाँरै बैगर सिद्धता  
ताहीं नीं पहेचे।

### पणमेशर पिता द्वारा ताड़ना

12 इस कारण जिब्व के गवाहां का इसा बड्डा बादळ म्हाँरै ताहीं घेरे होए  
सै, तो आओ, हरेक रोकणआळी चीज अर उलझाणआळे पाप ताहीं  
दूर करके, वा दौड़ जिसमह भाजणा सै धीरज तै भाजां, 2 अर बिश्वास के  
कर्ता अर सिद्ध करणआळे यीशु की ओड लखान्दे रणें, जिसने उस आनन्द के  
खातर जो उसके आगे धरया था, सर्म की कीमे फिक्र नीं करके क्रूस का  
दुःख सहया, अर पणमेशर के सिंहासन के सोळी ओड जा बैठ्या। 3 ज्यांतै  
उस पै गौर करो, जिसने अपने बिरोध म्हा पापियाँ का इतना बिरोध सह  
लिया के थम निराश होके हिम्मत ना छोड द्यो। 4 थमने पाप तै लडदे होए  
उसतै इसी मुठभेड़ नीं करी के थारा लहू बहया हो; 5 अर थम उस उपदेश  
ताहीं, जो थारै ताहीं बेट्टा की तरियां दिया जावै सै, भूल गये सो : "हे मेरे बेट्टे,  
प्रभु की ताड़ना नै हल्की बात ना जाण, अर जिब्व ओ तन्ने घुड़के तो हिम्मत  
ना छोड्डे। 6 क्यूँके प्रभु जिसतै प्रेम करै सै, उसकी ताड़ना भी करै सै, अर  
जिस ताहीं बेट्टा बणा लेवै सै, उसके कोरडे भी मारै सै।"

7 थम दुःख नै ताड़ना समझके सह ल्यो; पणमेशर थारै ताहीं बेट्टा जाणके  
थारै गेल्या सलूक करै सै। ओ कौण-सा बेट्टा सै जिसकी ताड़ना पिता नीं  
करदा? 8 जै ओ ताड़ना जिसके हिस्सेदार सारे होवै सै, थारी नीं होई तो थम  
बेट्टे नीं, पर जार की ऊलाद ठहरे। 9 फेर जिब्व के म्हाँरै देही तौर के पिता भी  
म्हारी ताड़ना करयां करै थे अर हमने उनका आदर-मान करया, तो के  
आत्मायां के पिता के और भी बिसर नीं रहवां जिस तै हम जिदे रहवां। 10 वे  
तो आपणी-आपणी समझ के मुताबिक माडे-से दिनां के खातर ताड़ना करै  
थे, पर ओ तो म्हाँरै पैयदे के खातर करै सै, के हम भी उसकी पवित्रता के

हिस्सेदार हो जावां।<sup>11</sup> इस बख्त म्ह हरेक तरियां की ताड़ना आनन्द की नीं, पर दुःख ए बात दिखाई देवै सै; तौभी जो उस ताहीं सहन्दे-सहन्दे पक्रे हो गये सै, बाद म्ह उन्नै चैन कै गेल्या धर्म का ईनाम मिलै सै।

### उपदेश अर चेतावनी

12 ज्यांतै ढीले हाथां अर कमजोर गोडयां नै सीधे करो, 13 अर अपणे पायां कै खातर सीधी राही बणाओ के लंगड़ा भटक ना जावै पर भला चंगा हो जावै। 14 सारया तै मेल-मिलाप राखो, अर उस पवित्रता के खोजी सो जिसके बिना कोए प्रभु ताहीं कद्वे भी नीं देखैगा। 15 गौर तै देख्दे रहो, इसा ना हो के कोए पणमेशर के अनुग्रह तै दूर रह जावै या कोए कड़वी जड़ फूटके दर्द देवै, अर उसके जरिये घण-खरे माणस अशुद्ध हो जावै। 16 इसा ना हो के कोए माणस जार, या एसाव की तरियां अधर्मी होवै जिसनै एक बर के खाणै के बदलै म्ह अपणे जेद्दा होण का ओद्दा बेच दिया। 17 थम नै बेरा सै के बाद म्ह जिब्व उसनै आशीष पाणी चाही तो इस जोग्गा कोनी गिणया गया, अर आँसू बहा-बहाके टोहण पै भी मन फिराव का मौक्का उस ताहीं कोनी मिल्या। 18 थम तो उस पहाड़ कै धोरै, जो छुआ जा सकै था, अर आग तै बल्लके भभके होड़ था, अर काळी घटा, अर अन्धेरा, अर आँधी कै धोरै, 19 अर तुरही की आवाज, अर बोल्लण आळे के इसे शब्द कै धोरै नीं आए, जिसके सुनणआळे तै बिनती करी के इब म्हारै तै और बात ना करी जावै। 20 क्यूँके वे उस आज्ञा ताहीं ना सह सकै : “जै कोए डांगर भी पहाड़ ताहीं छुवै तो उस पै पत्थर बरसाये जावै।” 21 अर ओ दर्शन इसा डरावना था के मूसा नै कहया, “मै घणा डरदा अर काम्बू सूं।”

22 पर थम सिख्योन कै पहाड़ कै धोरै, अर जिन्दे पणमेशर कै नगर, सुर्गीय यरूशलेम, कै धोरै अर लाखों सुर्गदुत्तां 23 अर उन पहल्लडयां की सीधी सी पंचायत अर कलीसिया, जिन कै नाम सुर्ग म्ह लिक्खे होए सै, अर सारया के जज पणमेशर कै धोरै, अर सिद्ध करे होए धर्मीयां की आत्मायां, 24 अर नयी वाचा के बिचोले यीशु अर छिड़काव कै उस लहू के धोरै आये सो, जो हाबिल कै लहू तै घणी बढ़िया बात कहवै सै। 25 सावधान रहो, अर उस कहणआळे तै मुँह ना फेरो, क्यूँके वे माणस जिब्व धरती पै के चेतावनी देणआळे तै मुँह मोड़के नीं बच सके, तो हम सुर्ग पै तै चेतावनी देणआळे तै मुँह मोड़के किस ढाळ बच सकांगे? 26 उस बख्त तो उसके शब्द नै धरती ताहीं हला दिया, पर इब उसनै यो वाद्दा करां सै, “एक बर फेर मै ना सिर्फ धरती ताहीं बल्लके अकास ताहीं भी हला देऊंगा।” 27 अर यो बोल ‘एक बर फेर’ इस बात ताहीं दिखवै सै के जो चीज हलाई जावै सै, वे बणाई होई चीज होण के कारण टळ जावैगी; ताके जो चीज हलाई नीं जान्दी, वे पक्की तरियां बणी रहवै। 28 इस कारण हम इस राज्य ताहीं पाके जो हाल्लण का नीं, उस अनुग्रह ताहीं हाथ तै नीं जाण दे, जिसके जरिये हम भगति, अर भय सुदा पणमेशर की इसी आराधना कर सकां सां जिस तै ओ राजी होवै सै; 29 क्यूँके म्हारा पणमेशर राख करणआळी आग सै।

### मसीही जीवन जीण के निर्देश

13 भाई-चारै का प्रेम बणया रहवै। 2 मेहमान की आच्छी सेवा-बाड़ी करणा नीं भूलणा, क्यूँके जरिये कीमे माणसां नै अनजाणे म्ह

सुर्गदुत्तां का आदर-मान करया सै। 3 कैदीयां का इस ढाळ बेरा लेओ के मान्नां उनके गेल थम भी कैद सो, अर जिनके गेल्या भूंडा सलूक करया जावै सै, उनका भी न्यू समझ कै बेरा लिया करो के म्हारी भी देही सै। 4 ब्याह सारया म्ह आदर की बात समझी जावै, अर ब्याह-बिच्छाणा बेदाग रहवै, क्यूँके पणमेशर जारां, अर बिगानी लुगाई कै धोरै जाणीयां का न्याय करैगा। 5 थारा सुभाह लालची नीं हो, अर जो थारै धोरै सै उस्से पै सन्तोष करो; क्यूँके उसनै आपै ए कहया सै, “मै तन्नै कद्वे भी नीं छोडूंगा, अर ना कद्वे त्यागूंगा।” 6 ज्यांतै हम बिना डरे कहवां सां, “प्रभु मेरा सहायक सै, मै नीं डरूंगा; माणस मेरा के करै सकै सै।”

7 जो थारे अगुवे थे, अर जिन्नै थारै ताहीं पणमेशर का बचन सुणाया सै, उन्नै याद राखो; अर गौर-करके उनके चाल-चलण का अन्त देख कै उनके बिश्वास का अनुकरण करो। 8 यीशु मसीह काल अर आज अर युगानुयुग एक-सा सै। 9 कई ढाळ के अनोक्खे उपदेशां तै ना भकाए जाओ, क्यूँके मन का अनुग्रह तै पक्का मजबूत रहणा भला सै, ना के उन खाण की चीजां तै जिन तै काम राखण आळयां ताहीं कीमे फैंयदा कोनी होया। 10 म्हारी एक इसी वेदी सै जिस पै तै खाण का हक्क उन माणसां ताहीं कोनी, जो तम्बू की सेवा करै सै। 11 क्यूँके जिन डांगरां का लहू महायाजक पाप-बलि कै खातर पवित्र जंगहा म्ह ले जावै सै, उनकी देही छावणी कै बाहरण जळाई जावै सै। 12 उस्से कै कारण, यीशु नै भी माणसां ताहीं अपणै ए लहू के जरिये पवित्र करण कै खातर फाटक कै बाहरण दुःख ठाया। 13 इसकरके आओ, उस की बुराई अपणे ऊप्पर लिये होए छावणी कै बाहरण उसके धोरै लिक्कड चालां। 14 क्यूँके उरै म्हारा कोए पक्का नगर कोनी, बल्लके हम एक आणआळे नगर की टोह म्ह सां। 15 इसकरके हम उसके जरिये स्तुतिरूपी बलिदान, यानिके उन होंटा का फळ जो उसके नाम का अंगीकार करै सै, पणमेशर ताहीं सारी हाण चढाया करै। 16 भलाई करणा अर उदारता दिखाणा ना भूलो, क्यूँके पणमेशर इसे बलिदानां तै राजी होवै सै।

17 अपणे अगुवां का हुक्म मान्ना अर उनके अधीन रहो, क्यूँके वे उनके बरगे थारे प्राणां के खातर जागदे रहवै सै जिन्नै लेखा देणा पड़ेगा; वे यो काम राजी होके करै, ना के शीळी साँस ले-लेके, क्यूँके इस हालत म्ह थमनै कीमे फैंयदा कोनी। 18 म्हारै खातर प्रार्थना करदे रहो, क्यूँके हमनै भरोस्सा सै के म्हारा विवेक शुद्ध सै : अर हम सारी बात्तां म्ह बढ़िया चाल-चालणा चाहवां सां। 19 प्रार्थना करण कै खातर मै थमनै और भी समझाऊँ सूं के मै तावळा थारै धोरै दुबारा आ सकूँ। 20 इब शान्तिदाता पणमेशर, जो म्हारै प्रभु यीशु नै जो भेड्डां का महान रुखाळा सै पुराणी वाचा कै लहू के गुण तै मरे होया म्ह तै जिन्दा करके लीयाया, 21 थारै ताहीं हरेक भली बात म्ह सिद्ध करै, जिसतै थम उसकी मर्जी पूरी करो, अर जो कीमे उसनै भावै सै उस ताहीं यीशु मसीह कै जरिये म्हारै म्ह पैदा करै। उस्से की महिमा युगानुयुग होन्दी रहवै। आमीन। 22 हे भाईयो, मै थारै तै बिनती करूँ सूं के इस उपदेश की बात्तां ताहीं सह ल्यो, क्यूँके मन्नै थारै ताहीं माड़े-से शब्दां म्ह लिख्या सै। 23 थमनै यो बेरा लाग्या हो के तीमुथियुस, म्हारा भाई छुटग्या सै अर जै ओ तावळा आग्या तो मै उसके गेल्या थारै तै भेंट करूँगा। 24 अपणे सारे अगुवां अर सारे पवित्र माणसां ताहीं नमस्कार कहो। इटलीआळे थमनै नमस्कार कहवै सै। 25 थम सारया पै अनुग्रह होंदा रहवै। आमीन।

# याकूब

## अभिवादन

1 पणमेशर के अर प्रभु यीशु मसीह के दास याकूब की ओड़ तै उन बाराह गोत्रां नै जो तितर-बितर (इत्रै-उत्रै) होके रहवै सै उन्हे नमस्कार पुँहचै।

## बिश्वास अर बुद्धिमानी

2 हे मेरै भाइयो, जिब्व थम कई ढाळ के हिम्ताना म्ह पड़ो, तो इसनै पुरै आनन्द की बात समझो, 3 यो जाणके के थारै बिश्वास के परखे जाण तै धीरज पैदा होवै सै। 4 पर धीरज नै आपणा पूरा काम करण घो के थम पुरे अर सिद्ध हो जाओ, थारै म्ह किसे बात की कमी ना रहवै। 5 पर थारै म्ह तै जै किसे नै बुद्धि की कमी सै तो पणमेशर तै माँगो, जो बिना उल्हाणा दिए सारा नै बड़ी उधारता तै देवै सै, अर उस ताही दी जावैगी। 6 पर बिश्वास तै माँगो, अर किम्मे शक ना करै, क्युँके शक करण आळा समुन्द्र की उस लैहर के बरोबर सै जो हवा तै बहवै अर उच्छळै सै। 7 इसा माणस यो ना समझै के मत्रै प्रभु तै किम्मे मिलैगा, 8 वो माणस दोगला सै आपणी सारी बातां म्ह चंचल सै।

## गरीबी अर अमीरी

9 दीन भाई आपणे ऊँचे पद पै घमण्ड करै, 10 अर धनवान आपणी नीची दशा पै; क्युँके वो घास के फूल की ढाळ जान्दा रहवैगा। 11 क्युँके सूरज लिकड़तै ए घणा घाम्ड़ा पड़ै सै अर घास नै सुखा देवै सै, अर उसका फूल झड़ ज्यावै सै अर उसकी शोभा जान्दी रहै सै। इस ढाळ धनवान भी आपणे राह पै चालते-चालते धूल म्ह मिल ज्या जावैगा।

## परख अर प्रलोभन

12 धन्य सै वो माणस जो हिम्तान म्ह डट्या रहवै सै, क्युँके वो खरा लिकड़ के जीवन का वो मुकूट पावैगा जिसकी प्रतिज्ञा प्रभु नै आपणे प्रेम करण आळा तै करी सै। 13 जिब्व किसे का हिम्तान हो, तो वो या ना कहै के मेरा हिम्तान पणमेशर की ओड़ तै होवै सै; क्युँके ना तो बुरी बातां तै पणमेशर का हिम्तान हो सकै सै, अर ना वो किसे का हिम्तान आप करै सै। 14 पर हरेक माणस आपणी ए लालसा म्ह खींचके अर फसके हिम्तान म्ह पड़ै। 15 फेर इच्छा गर्भवती होके पाप नै जण्यै सै अर पाप जिब्व बढ़ जावै सै तो मौत नै जण्यै सै। 16 हे मेरे प्यारे भाइयो, धोक्खा ना खाओ। 17 क्युँके हरेक आच्छा वरदान अर हरेक उतम दान ऊपर तै सै, अर ज्योतिया के पिता की ओड़ तै मिलै सै, जिस म्ह ना तो कोए बदलावै हो सकै सै, अर ना अदल बदल के कारण उस पै छाया पड़ै सै। 18 उसनै आपणी ए इच्छा तै म्हारै ताही सच के वचन के जरिये जण्यो, ताके हम उसकी रचना करी होई चिजां म्ह एक ढाळ का पैहला फल हो।

## सुणना अर करणा

19 हे मेरे प्यारे भाइयो, या बात थम जाण ल्यो: हरेक माणस सुणन के खात्तर तैयार अर बोलण म्ह धीर अर छो म्ह ठंडा हो, 20 क्युँके माणस का छो पणमेशर के धर्म का गुजारा नीं कर सकता। 21 इस करके सारी गंदगी अर बैर भाव की बढ़ती नै दूर कर के, उस वचन नै नम्रता तै पा ल्यो जो मन म्ह बोया गया अर जो थारै प्राणा का उद्धार कर सकै सै। 22 पर वचन पै चालण

आळे बणो, अर सिर्फ सुणन आळे ए न्ही जो आपणे आप नै धोक्खा देवै सै। 23 क्युँके जो कोए वचन का सुणन आळा हो अर उस पै चालण आळा ना हो, तो वो उस माणस के समान सै जो आपणा साचला मुँह शीशै म्ह देख सै। 24 इस करके के वो आपणे आप नै देख के चला जावै अर जिब्वे भूल जावै सै के मै किसा था। 25 पर जो माणस आजादी की सिद्ध नियम पै ध्यान करता रहवै सै, वो आपणे काम म्ह इस खात्तर आशीर्वाद पावैगा के सुण के भूलता न्ही पर उसा ए काम करै सै। 26 जै कोए आपणे आप नै भक्त समझै अर आपणी जीभ पै लगाम ना दे पर आपणे मन नै धोक्खा दे, तो उसकी भक्ति बेकार सै। 27 म्हारे पणमेशर अर पिता के धोरै शुद्ध अर निर्मल भक्ति या सै के अनाथथां अर विधवाया के क्लेश म्ह उसकी सुधि ले, अर आपणे आप नै दुनिया तै निष्कलंक राकखै।

## पक्षपात के बिरोध चेतावनी

2 हे मेरे भाइयो, म्हारे महिमा तै भरे प्रभु यीशु पै थारा बिश्वास मेर के गैल ना हो। 2 क्युँके जै एक माणस सोणणे के छल्ले अर सुथरे लत्ते पहरे होए थारी मण्डली म्ह आवै, अर एक कंगाल भी मैलै कुचले लत्ते पहरे होए आवै, 3 अर थम उस सुथरे लत्ते आळे का मुँह देख के कहो, "तू ओड़ै आच्छी जंगाह बैठ," अर उस कंगाल तै कहो, "तू ओड़ै खड्या रहै," या मेरै पायां धोरै बैठ। 4 तो के थमनै दुभात न्ही करां अर भुन्डे बिचार तै न्याय करण आळै न्ही बणै? 5 हे मेरे प्यारे भाइयो, सुणो। के पणमेशर नै इस दुनिया के कंगला ताही न्ही छाट्या के बिश्वास म्ह धनी अर उस राज के अधिकारी हो, जिसकी प्रतिज्ञा उसनै उण तै करी सै जो उसतै प्रेम राकखै सै? 6 पर थमनै उस कंगाल की बेजती करी। के धनी माणस थारै पै जुलम न्ही करदे अर के वे थमनै कोट कचेडी म्ह न्ही घसीट- घसीट के ले जांदे? 7 के वे उस बढ़िया नाम की निन्दा न्ही करदे जिसके थम कहाओ सों। 8 तो भी जै थम पवित्रग्रन्थ के इस वचन के मुताबिक के "तू आपणे पड़ोसी तै आपणे समान प्रेम राकख" साच्चिये उस राज नियम नै पूरा करों सों, तो आच्छा ए करो सों। 9 पर जै थम दुभात करो सों तो पाप करो सों; अर नियम थमनै कसूरवार बतावै सै। 10 क्युँके जो कोए सारे नियम का पालन करै सै पर एके ए बात म्ह चूक जावै तो वो सारी बातां म्ह दोषी बण लिया सै। 11 इस करके के जिसनै यो कहा, "तू जारी ना करिये" उस्से नै यो भी कहा, "तो हत्या ना करना," इस करके जै तत्रै जारी तो न्ही करी पर हत्या करी तौभी तू नियम का तोड़ण आळा बण्यो। 12 थम उन्हे माणसा की तरियां वचन बोल्लों अर काम भी करो, जिन्हका न्याय आजादी के नियम के मुताबिक होगा। 13 क्युँके जिसनै दया न्ही करी, उसका न्याय बिना दया के होगा: दया न्याय पै जितै सै।

## बिश्वास अर करम

14 हे मेरे भाइयो, जै कोए कहै के मत्रै बिश्वास सै पर वो कर्म ना करता हो, तो इसतै के फायदा? के इसा बिश्वास उसका उद्धार कर सकै सै? 15 जै कोए भाई या बाहण नंगे-उघाड़े हो अर उत्रै रोज खाण की कमी हो, 16 अर थारै म्ह तै कोए उन तै कहै, "ठीक ठाक जाओ, थम गरम रहों अर छिके रहों," पर जो चीज देही खात्तर जरूरी सै वा उण तै न्हीदे तो के फायदा? 17 उस्से तरियां बिश्वास भी, जै कर्म सुधा न्हीहो तो आपणे सुभाव म्ह मरया होया सै। 18 बल्के कोए या कह सकै सै, "तत्रै बिश्वास सै अर मै कर्म करूँ सूँ" तू आपणा बिश्वास मत्रै कर्म बिना तो दिखां; अर मै आपणा बिश्वास तत्रै आपणे कर्म के जरिये तत्रै दिखाऊँगा। 19 तत्रै बिश्वास सै के एके पणमेशर सै; तू

आच्छा करै सै। ओपरी आत्मा भी बिश्वास राखै अर थरथरावै सै। 20 पर हे निकम्मे माणस, के तू यो भी न्ही जाण्डा के कर्म बिना बिश्वास बेकार सै? 21 जिब्ब म्हारे पिता अब्राहम नै आपणे बेट्टे इसहाक ताही (बलि खात्तर) मण्डही पै चढाया, तो के ओ कर्मा तै धार्मिक न्ही ठहरया था? 22 आखर तन्नै देख लिया के बिश्वास नै उसके कामां के गैल मिलकै असर गेरया सै, अर कर्मा तै बिश्वास सिद्ध होया, 23 अर पवित्रग्रन्थ का यो वचन पूरा होया: “अब्राहम नै पणमेशर का बिश्वास करया,” अर यो इसके खात्तर धर्म गिण्या गया, अर वो पणमेशर का साथी कहवाया। 24 इस ढाळ थमनै देख लिया के माणस सिर्फ बिश्वास तै ए न्ही पर कर्मा तै भी धर्मी बणै सै। 25 उस्से तरियां राहाब वेश्या भी, जिब्ब उसनै सुर्गदूतां ताही आपणे घर म्ह उतारा अर दूसरें राह तै विदा करया, तो के कर्मा तै धर्मी न्ही बणी? 26 आखर जिस तरियां देही आत्मा बिना मरी होई सै, उस्से तरियां बिश्वास भी कर्म बिना मरया होया सै।

### जीभ नै बस म्ह करणा

3 हे मेरे भाइयो, थारे म्ह तै घणे उपदेशक ना बणै, क्युँके जाणो सों के हम उपदेशक और भी कसूरवार बणागे। 2 इस करके के हम सारे घणी-ए बार चुक जावां सा जो कोए वचन म्ह न्ही चुकता वो ए तो सिद्ध माणस सै। 3 जिब्ब हम बस म्ह करण खात्तर घोड्या के मुँह म्ह लगाम लगावा सां, तो हम उसकी सारी देही नै भी घुमा सका सां। 4 देखो, जहाज भी, यधपि इतने बड़े होवै सै अर प्रचण्ड हवा तै चलाये जावै सै, तो भी एक छोटी सी पतवार के जरिये मॉझी की मर्जी के मुताबिक घुमाये जावै सै। 5 उस्से तरियां जीभ भी एक छोटा सा अंग सै अर वा बड़ी-बड़ी डिंग मरै सै। देखो, थोड़ी सी आग तै कितने बड़े बण म्ह आग लाग ज्या सै। 6 जीभ भी एक आग सै; जीभ म्हारे अंगा म्ह अधर्म का एक लोक सै, अर सारी देही पै कलंक लगावै सै, अर जीवन की चाल म्ह आग लगा देवै सै, अर नरक कुण्ड की आग म्ह जळदी रहवै सै। 7 क्युँके हरेक ढाळ के जंगली पशु, पक्षी, रेंगण आळे जन्तु, अर पाणी के जी तो माणस के वश म्ह हो सकै सै अर हो भी गये, 8 पर जीभ नै माणसा म्ह तै कोए वश म्ह न्ही कर सकता; वा एक इसी बला सै जो कदे रुकदी ए कोनी, वा प्राण नाशक जहर तै भरी होई सै। 9 उस्से तै हम प्रभु अर पिता की बड़ाई करां सां, अर उस्से तै माणस नै जो पणमेशर के रूप म्ह जण्यै सै श्राप देवां सां। 10 एकै ए मुँह तै धन्यवाद अर श्राप दोनु लिकडै सै। हे मेरे भाइयो, इसा न्ही होणा चाहिए। 11 के झरणे के एक मुँह तै मिठ्ठा अर खारा पाणी दोनु लिकडै सै? 12 हे मेरे भाइयो, के अंजीर के पेड़ म्ह जैतून, या दाख की लता म्ह अंजीर लाग सकै सै? उस्से तरियां खारे झरणे तै मिठ्ठा पाणी न्ही लिकड सकता।

### सुर्गीय ज्ञान

13 थारै म्ह ज्ञानवान अर समझदार कौन सै? जो इसा हो वो आपणे कामां नै आच्छे चाल चलण तै उस नरमाई सुधा प्रकट करै जो ज्ञान तै जण्यै सै। 14 पर जै थम आपणे-आपणे मन म्ह कड़वी डाह अर बिरोध राखो सों, तो सच के विरोध म्ह घमण्ड ना करिये; अर ना तो झूठ बोलीये। 15 यो ज्ञान वो न्ही जो ऊपर तै उतरै सै, बल्के संसारिक, शारीरिक अर शैतानी सै। 16 क्युँके जडै डाह अर विरोध होवै सै, ओडै बखेड़ा अर हरेक ढाळ का भुन्दे काम भी होवै सै। 17 पर जो ज्ञान ऊपर तै आवै सै वो पैहला तो पवित्र होवै सै फेर मिलनसार, नाजुक, मृदुभाव, दया अर आच्छे फळां तै लद्या होया अर दुभात अर बिना कपट के होवै सै। 18 मिलाप करण आळे धार्मिकता का फळ मेळ मिलाप के गैल बोवै सै।

### दुनिया तै दोस्ताना

4 थारे म्ह लड़ाई झगड़े कीत्त तै आ ग्ये? के उन असो आराम तै नीं जो थारै अंगा म्ह लडै-भीडै सै? 2 थम लालसा राखो सों, अर थमनै मिलता कोनी; इस करके थम हत्या करो सों। थम डाह करो सों, अर किम्मे पा न्ही सकदे; तो थम लडो अर झगडो सों। थमनै इस करके न्ही मिलदा के माँगते कोनी। 3 थम माँगो सों अर पान्दे कोनी, इस करके के भुंड़ी इच्छा तै

माँगो सों, ताके आपणे भोग विलास म्ह उड़ा द्यो। 4 हे व्यभिचारियों, के थम न्ही जाणते के संसार तै दोस्ती करनी पणमेशर तै बैर करना सै? आखर जो कोए संसार का साथी बणना चाहवै सै, वो आपणे आप नै पणमेशर का बैरी बणावै सै। 5 के थम यो समझो सों के पवित्र ग्रन्थ बेकार कहवै सै, “जिस आत्मा ताही उसनै म्हारै भित्तर बसाया सै, के वो इसी लालसा करै सै जिसका प्रतिफळ डाह हो?” 6 वो तो और भी मेहरबानी करै सै; इस कारण यो लिख्या सै, “पणमेशर अभिमानियां का विरोध करै सै, पर दीन पै मेहरबानी करै सै।” 7 इस करके पणमेशर के अधीन हो जाओ; अर शैतान का सामना करो, तो वो थारै धोरै तै भाग ज्यागा। 8 पणमेशर के धोरै आओ तो वो भी थारै धोरै आवैगा। हे पापियों, आपणे हाथ साफ करो; अर हे दुचित्ते माणसों आपणे मन नै पवित्र करो। 9 दुखी होओ, अर शोक करो, रोओ। थारी हाँसीशोक म्ह अर थारा आनन्द उदासी म्ह बदल जावै। 10 प्रभु के स्याम्ही दीन बणो तो थमनै वो सारा तै ऊँचा बणावैगा।

### भाईयां पै दोष लगाणा

11 हे भाइयो, एक दूसरें की बदनामी ना करो। जो आपणे भाई की बदनामी करै सै या भाई पै दोष लगावै सै, वो नियम की बदनामी करै सै अर नियम पै दोष लगावै सै; अर जै तू नियम पै दोष लगावै सै, तो तू नियम पै चालण आळा कोनी पर उस पै हाकिम बण्यो। 12 नियम देण आळा अर हाकिम तो एकै ए सै, जो बचाण अर नाश करण म्ह समर्थ सै। पर तू कौन सै, जो आपणे पड़ोसी पै दोष लगावै सै?

### घमण्ड के बिरुध्द चेतावनी

13 थम जो या कहो सों, “आज या तड़के हम किसे और नगर म्ह जा के ओडै एक साल बितावागे, अर व्यापार करके फायदा कमावागे।” 14 अर यो न्ही जाणते के कल के होगा। सुण तो ल्यो, थारा जीवन सै ए के? थम तो भाप कि तरियां सों, जो थोड़ी देर दिखवै सै फेर खू ज्या सै। 15 इसके उल्ट थमनै या कहणा चाहिए, “जै प्रभु चाहवै तो हम जिन्दा रह्यागे, अर यो या वो काम भी करागे।” 16 पर इब थम आपणे डिंग मारण पै घमण्ड करो सों; इसा सारा घमण्ड भुंदा होवै सै। 17 इस करके जो कोए भलाई करणा जाणै सै अर कोनी करता, उसके खात्तर यो पाप सै।

### साहूकारां नै चेतावनी

5 हे साहूकारों, सुण तो ल्यो, थम आपणे आण आळे केशां पै किलकी मारके रोओ। 2 थारा धन खराब हो गया अर थारे लत्ता नै कीड़े खागे सै। 3 थारे सोणा चाँदी म्ह काई लाग्यी; अर वा काई थारै पै गवाही देगी, अर आग की तरियां थारा मांस खा ज्यागी। थमनै अतः युग म्ह धन बटोरा सै। 4 देख्ये जिन्ह मजदूरान नै थारे खेत काटे, उनकी वा मजदूरी जो थमनै धोखा देके राखली सै चिल्लावै सै, अर लेण आळा की दुहाई सेनाओ के प्रभु के कानां तक पहुँच ग्यी सै। 5 थम धरती पै भोग विलास म्ह लागे रहै अर बड्डा ए सुख भोग्या; थमनै इस वध के दिन के खात्तर आपणे मन का पालण पोषण करके उस ताही मोट्टा ताजा करया। 6 थमनै धर्मी ताही कसूरवार बणा के मार दिया, वो थारा सामना न्ही करता।

### दुःख म्ह धीरज धरणा

7 इस करके हे भाइयो, प्रभु के आण तक धीरज धरो। जमीदार धरती की कीमती फसल की आश धरके पहली अर आखरी बारिस होण तक धीरज धरै सै। 8 थम भी धरिज धरो; अर आपणे मन नै मजबूत करो, क्युँके प्रभु का आणा धोरै सै। 9 हे भाइयो, एक दूसरें पै दोष ना लगाओ, ताके थम कसूरवार ना बणो; लखाओ, हाकिम दरवाजे पै खड्या सै। 10 हे भाइयो, जिन नब्बिया नै प्रभु का नाम तै बात करी उन्नै नै दुःख उठाण अर धीरज धरण का एक आदर्श समझो। 11 देखो, हम धीरज धरण आळे नै धन्य कहा सां। थमनै अरयूब के धीरज के बारें म्ह तो सुण्या ए सै, अर प्रभु की ओड़ तै जो उसका प्रतिफळ होया उस ताही भी जाण लिया सै, जिस तै प्रभु की घणी करुणा अर दया प्रकट होवै सै। 12 पर हे मेरे भाइयो, सारा तै बड्डी बात या सै के सूह

ना खाइये, ना सुर्ग की, ना धरती की, ना किसे और चीज की; पर थारी बातचीत हाँ की हाँ ना की ना हो, के थम सजा के लायक ना बणो।

### प्रार्थना की शक्ति

13 जै थारै म्ह तै कोए दुखी सै, तो वो प्रार्थना करै। जै आनन्दित सै, तो बड़ाई के भजन गावै। 14 जै थारै म्ह तै कोए रोगी सै, तो कलीसिया के प्रचीनां नै बुलावै, अर वे प्रभु के नाम तै उस पै तेल मसल के उसके खात्तर प्रार्थना करै, 15 अर बिश्वास की प्रार्थना के जरिये रोगी बच ज्यागा अर प्रभु उस ताही उठा के खड्या करैगा; अर उसनै जै पाप भी करे हो, तो उनकी भी माफी हो

ज्यागी 16 इस करके थम एक दूसरे के सामने आपणे-आपणे पाप मान ल्यो, अर एक दूसरे खात्तर प्रार्थना करे, जिस तै ठीक हो जाओ: धर्मीजन की प्रार्थना के असर तै भोत किमे हो सके सै। 17 एलिय्याह भी तो म्हारै समान दुःख-सुख भोगी माणस था; अर उसनै गिडगिडके प्रार्थना करी के मिह ना बरसै; अर साढ़े तीन साल तक धरती पै मिह कोनी बरसा। 18 फेर उसनै प्रार्थना करी, तो आसमान तै बरसा होई, अर धरती फलवन्त होई। 19 हे मेरे भाइयो, जै थारै म्ह तै कोए सच की राह तै भटक जावै अर उसनै फेर लावै, 20 तो वो यो सच जाण लेवै के जो कोए भटके होए पापी नै फेर ल्यावैगा, वो एक प्राण नै मृत्यु तै बचावैगा अर अनेक पाप पै पर्दा गरैगा।



# 1 पतरस

1 पतरस की ओड़ तै जो यीशु मसीह का प्रेरित सै, उन परदेशियां के नाम जो पुन्तुस, गलतिया, कप्पादुकिया, आसिया अर बिथुनिया म्ह तितर-बित्तर होके रहवै सै। 2 अर पणमेशर पिता के आण आळे बख्त के ज्ञान के मुताबिक, आत्मा के पवित्र करण के जरिये हुक्म मानण अर यीशु मसीह के लहू के छिड़के जाण के खातर छांटे गये सै। थारै ताही अनुग्रह अर शान्ति भोत-ए घणी मिल्दी रहवै। 3 म्हारै प्रभू यीशु मसीह के पणमेशर अर पिता का धन्यवाद हो, जिसनै यीशु मसीह के मरे होया म्ह तै जी उठण के जरिये, आपणी घणी दया तै म्हारै ताही जिन्दी आस के खातर नया जन्म दिया, 4 यानिके एक अमर, अर साफ-सुथरा, अर अजर वसीयत के खातर जो थारै खातर सुर्ग म्ह धरी सै; 5 जिनकी रूखाळी पणमेशर की सामर्थ तै बिश्वास के जरिये उस उद्धार के खातर, जो आण आळे बख्त म्ह दिक्खण आळी सै, करी जावै सै। 6 इस कारण थम मग्न होवो सो, हालाके जरूरी सै के इब्बे कीमे दिन के खातर कई ढाळ के हिम्तानां के कारण दुःख म्ह सो; 7 अर न्यु ज्यांतै सै के थारा परख्या होया बिश्वास, जो आग तै ताए होड़ नास होण आळे सोन्ने तै भी कदे घणा कीमती सै, यीशु मसीह के दिक्खण पै बड़ाई अर महिमा अर आदर का कारण बणे। 8 उसतै थम बिन देखे प्रेम राक्खो सो, अर इब तो उस पै बिन देखे भी बिश्वास करके इसे राजी अर मग्न होवो सो जो बखान तै बाहरण अर महिमा तै भरया होड़ सै; 9 अर अपने बिश्वास का ईनाम यानिके आत्मायां का उद्धार पाओ सो। 10 इस्से उद्धार के बारै म्ह उन नब्बियाँ नै घणी खोजबीन अर छान-बिन करी, जिन्नै उस अनुग्रह के बारै म्ह जो थारै पै होण नै था, भविष्यवाणी करी थी। 11 उनै इस बात की खोज करी के मसीह का आत्मा जो उन म्ह थी, अर पहल्या ए तै मसीह के दुःखां की अर उसके पाछे होणआळी महिमा की गवाही देवै थी, वा कौण से अर किसे बख्त की ओड़ इशारा करै थी। 12 उन पै यो दिखाया गया के वे आपणी नीं बल्के थारी सेवा के खातर ये बात कहया करै थे, जिनकी खबर इब थारै ताही उनके जरिये मिली जिन्नै पवित्र आत्मा के जरिये, जो सुर्ग म्ह खन्दाया गया, थारै ताही सुसमाचार सुणाया; अर इन बात्तां नै सुर्गदुत भी गौर तै दिक्खण की चाहना राक्खै सै। 13 इस कारण आपणी-आपणी अकू की कमर बाँधके, अर सोदी म्ह रहके, उस अनुग्रह की पूरी आस राक्खो जो यीशु मसीह के दिख जाण के बख्त थारै ताही मिलण आळ सै। 14 आज्ञाकारी बाळकां की तरिया आपणी बेअक्की के बख्त की पुराणी अभिलाषायां के बरगे ना बणे। 15 पर जिसा थारा बुलाणआळा पवित्र सै, उस्से तरिया ए थम भी अपने सारे चाल-चलण म्ह पवित्र बणे। 16 क्यूँके लिख्या सै, “पवित्र बणे, क्यूँके मै पवित्र सूँ।” 17 अर जिब्ब के थम ‘हे पिता’ कहके उसतै प्रार्थना करो सो, जो बिना मेर हरेक के काम के मुताबिक न्याय करै सै, तो अपने परदेशी होण के बख्त डर तै बिताओ। 18 क्यूँके थमनै बेरा सै के थारा निकम्मा चाल-चलण जो बाप-दाद्यां तै चल्या आवै सै, उसतै थारा छुटकारा चाँदी-सोन्ने यानिके नाश होण आळी चीजां के जरिये नीं होया; 19 पर बेकसूर अर बेदाग मेन्ने, यानिके मसीह के कीमती लहू के जरिये होया। 20 उसका ज्ञान तो दुनिया की सरूआत के पहल्या ए तै जाणया गया था, पर इब इस आखरी युग म्ह थारै खातर दिख गया। 21 उसके जरिये थम उस पणमेशर पै बिश्वास करो सो, जिसनै उस ताही मरे होया म्ह तै जिवाया अर महिमा दी के थारा बिश्वास अर आस पणमेशर पै हो। 22 आखर म्ह जिब्ब के थम नै भाई-चारे की बेदाग प्रीति के ढाळ साच के मानण तै अपने मनां ताही पवित्र करया सै, तो तन-मन लाके एक-दुसरे तै घणा प्रेम राक्खो। 23 क्यूँके थमनै नाश होण आळे नीं पर अमर बीज तै, पणमेशर की जिन्दे अर सारी हाण ठहरणआळे बचन के जरिये नया जन्म पाया सै। 24 क्यूँके “हरेक जीव घास के बरगा सै,

अर उसकी सारी सोभा घास के फूल जीसी सै। घास सूख जावै सै, अर फूल झड़ जावै सै, 25 पर प्रभु का बचन युगानुयुग स्थिर रहवैगा, यो ओए सुसमाचार का बचन सै जो थारै ताही सुणाया गया था।”

2 इसकरके सारी ढाळ का बैरभाव अर छळ अर कपट अर डाह अर बुराई नै दूर करके, 2 नये जन्मे होए बाळकां की ढाळ साफ-सुथरे आत्मिक दूध की चाहना करो, ताके उसके जरिये उद्धार पाण के खातर बढ़दे जाओ, 3 क्यूँके थमनै प्रभु की कृपा का सुवाद चख लिया सै। 4 उसके धारे आके, जिस ताही माणसां नै तो निकम्मा ठहराया पर पणमेशर के लोवे छाँटया होया अर कीमती जिन्दा पत्थर सै, 5 थम भी खुद जिन्दे पत्थरां के बरगे आत्मिक घर बणदे जाओ सो, जिस तै याजकां का पवित्र समाज बणके, इसे आत्मिक बलिदान चढाओ जो यीशु मसीह के जरिये पणमेशर नै अपनाण जोग्गा हो। 6 इस कारण पवित्र ग्रन्थ म्ह भी आया सै: “देखो, मै सिव्योन म्ह कोणे के सिरे का छाँटया होड़ अर कीमती पत्थर धरूँ सूँ: अर जो कोए उस पै बिश्वास करैगा, ओ किसे तरिया तै शर्मिन्दा कोनी होगा।” 7 आखर म्ह थारै खातर जो बिश्वास करो सो ओ तो कीमती सै, पर जो बिश्वास नीं करदे उनके खातर “जिस पत्थर ताही राजमिस्त्रियाँ नै निकम्मा ठहराया था, ओए कोणे का सिरा हो गया,” 8 अर “ठेस लागण का पत्थर अर ठोकर खाण की चट्टान होग्या सै,” क्यूँके वे तो बचन नै नीं मानके ठोकर खावै सै अर इस्से के खातर वे ठहराए भी गये थे। 9 पर थम एक छाँटया होया वंश, अर राज-ओद्रे आळे याजकां का समाज, अर पवित्र माणस, अर (पणमेशर की) खुद की प्रजा सो, ज्यांतै के जिसनै थारै ताही अन्धेरे म्ह तै आपणा अनोक्खा चाँदणे म्ह बुलाया सै, उसके गुण दिखाओ। 10 थम पहल्या तो कीमे भी नीं थे पर इब पणमेशर की प्रजा सो; थारै पै दया कोनी होई थी पर इब थारै पै दया होई सै। 11 हे प्यारो, मै थारै तै बिनती करूँ सूँ के थम अपने आप नै परदेशी अर मुसाफिर जाणके उन दुनियावी अभिलाषायां तै जो आत्मा तै युद्ध करै सै, बचे रहो। 12 गैर-जात्तां म्ह थारा चाल-चलण भला हो; ताके जिन-जिन बात्तां म्ह वे थारै ताही भुन्डे काम करणीये जाणके बदनाम करै सै, वे थारे भले काम्मां नै देखके उन्ने के कारण दया-दृष्टि के दिन पणमेशर की महिमा करै। 13 प्रभु के खातर माणसां के ठहराए होए हरेक इन्तजाम के अधीन रहो, राजा के ज्यांतै के ओ सारया का प्रधान सै, 14 अर हाकिमां के ज्यांतै क्यूँके वे भुन्डे काम करणीयां नै दण्ड देण अर आच्छे काम करणीयां की बड़ाई के खातर उसके खन्दाये होए सै। 15 क्यूँके पणमेशर की मर्जी या सै के थम भले काम करण के जरिये बेअक्के माणसां की बेअक्की की बात्तां नै बन्द कर दो। 16 अपने आप ताही आजाद जाणो, पर आपणी इस आजादी नै बुराई के खातर आड़ ना बणाओ; पर अपने आप ताही पणमेशर के दास समझके चालो। 17 सारया का आदर करो, भाईयां तै प्यार राक्खो, पणमेशर तै डरो, राजा का आदर करो 18 हे सेवको, हरेक ढाळ के भय के गेल अपने मालिकां के अधीन रहो, ना सिर्फ उनके जो भले अर नम्रां के, पर उनके भी जो कुटिलां के भी। 19 क्यूँके जै कोए पणमेशर का बिचार करके जुल्म तै दुःख ठान्दा होया क्लेश सहवै सै तो यो सुहाण जोग्गा सै। 20 क्यूँके जै थमनै अपराध करके घूँसे खाए अर धीरज राख्या, तो इस म्ह के बड़ाई की बात सै पर जै भला काम करके दुःख ठाया हो अर धीरज राख्या हो, तो यो पणमेशर नै भावै सै। 21 अर थम इस्से के खातर बुलाए भी गये सो, क्यूँके मसीह भी थारै खातर दुःख ठाके थारै ताही एक बढ़िया नमूना दे गा सै के थम भी उसके पांया के निशान्नां पै चालो। 22 ना तो उसनै पाप करया अर न उसके मुँह तै छळ की कोई बात लिक्डी। 23 ओ गाळी सुणके गाळी कोनी देवै था, अर दुःख ठाके किसे ताही भी धमकी कोनी देवै था, पर अपने आप ताही

साच्चे न्याय के हाथ म्हा सोंपे था | 24 ओ आप ए म्हारै पापां नै आपणी देही पै लिये होए क्रूस पै चढ़ गया, जिस तै हम पापां के खातर मरके धार्मिकता के खातर जीवन बितावां: उस्से के मार खाण तै थम चंगे होए | 25 क्यूँके थम पहल्या भटकी होइ भेड्डां के बरगे पर इब अपणे जी के रुखाळे अग्रधान के बोहड़ आए सो |

**3** हे बीरबान्त्रियों, थम भी अपणे धणी के अधीन रहो, ज्यांतै के जै इन म्हा तै कोए इस्से हों जो बचन नै ना मानदे हों, 2 तौभी थारै भय सुदा पवित्र चाल-चलण नै देखके बिना बचन के आपणी-आपणी बीरबानियां के चाल-चलण के जरिये खिंच जावै | 3 थारा सिंगार दिखावटी ना हो, यानिके बाळ गूथणा, अर सोत्रे के गहणे, या कई ढाळ के लत्ते पहरण, 4 बल्के थारा लुहक्या होया अर गुप्त माणसपण, नरमपण अर मन दीनता की अमर सजावट तै सजावै, क्यूँके पणमेशर की निगाह म्हा इसका मोल बड्डा सै | 5 पहलडे बख्त म्हा पवित्र लुगाई भी, जो पणमेशर पै आस राखे थीं, अपणे आप नै इस तरिया तै संवारदी अर अपणे-अपणे धणी के अधीन 6 जिस तरिया सारा अब्राहम के हुक्म म्हा रहन्दी अर उसनै स्वामी कहया करै थी | इस्से ढाळ थम भी जै भलाई करो अर किसे ढाळ के भय तै डरो ना, तो उसकी बेटियां ठहरोगी | 7 इस्से तरिया ए हे धणीयों, थम अकलमंदी तै बीरबानियां के गेल्या जिन्दगी बिताओ, अर लुगाई नै कमजोर पात्र जाणके उसका आदर करो, न्यू समझके के थम दोनु जीवन के वरदान के वारिस सा, जिस तै थारी प्रार्थनां रुक नीं जावै | 8 आखर म्हा सारे के सारे एक मन अर दया म्हा अर भाई-चारे की प्रीति राखणआळे, अर करुणामय, अर नरम बणो | 9 बुराई के बदलै बुराई ना करो अर ना गाळी के बदलै गाळी द्यो; पर इसके उट्ट आशीष ए द्यो, क्यूँके थम आशीष के वारिस होण के खातर बुलाए गये सो | 10 क्यूँके “जो कोए जीवन की चाह राखे सै, अर आच्छे दिन देखणा चाहवै सै, ओ आपणी जीभ नै बुराई तै, अर अपणे होंठा नै छळ की बात करण तै रोक्के राखखो | 11 ओ बुराई का गेला छोड्डै, अर भलाई ए करै: ओ मेल-मिलाप नै टोहवै, अर उसकी कोशिश म्हा रहवै | 12 क्यूँके प्रभु की आँख धर्मीयां पै लागी रहवै सै, अर उसके कान उनकी बिनती की ओड़ लागे रहवै सै, पर प्रभु बुराई करणआळे तै मुह मोड़े रहवै सै |” 13 जै थम भलाई करण के खातर उतेजित रहो तो थारी बुराई करणआळा फेर कौण सै? 14 जै थम धर्म के कारण दुःख भी टाओ, तो धन्य सो; पर माणसां के डराण तै ना डरो, अर ना घबराओ, 15 पर मसीह नै प्रभु जाणके अपणे-अपणे मन म्हा पवित्र समझो | जो कोए थारै तै थारी आस के बारै म्हा कीमे बुझ्झै, उस ताही जबाब देण के खातर सारी हाण त्यार रहो, पर नरमपणे अर भय के गेल; 16 अर विवेक भी शुद्ध राखखो, ज्यांतै के जिन बात्तां के बारै म्हा थारी बदनामी होवै सै उनके बारै म्हा वे, जो मसीह म्हा थारे आच्छे चाल-चलण का अपमान करै सै, शर्मिन्दा होवै | 17 क्यूँके जै पणमेशर की याए मर्जी हो के थम भलाई करण के कारण दुःख टाओ, तो या बुराई करण के कारण दुःख टाण तै घणा बढिया सै | 18 ज्यांतै के मसीह नै भी यानिके अधर्मियां के खातर धर्मी नै, पापां के कारण एक बै दुःख टाया, ताके हमनै पणमेशर के थारै पढोचावै; ओ देही के तौर तै तो मारया गया, पर आत्मा के तौर तै जिवाया गया | 19 उस्से म्हा उसनै जाके कैदी आत्मायां ताही भी प्रचार करया, 20 जिन्नै उस बीते बख्त म्हा हुक्म नीं मान्या, जिब्व पणमेशर नूह के दिनां म्हा धीरज धरके ठहरया रहया, अर ओ जहाज बण रहया था, जिस म्हा बैठके माडे-से माणस यानिके आठ प्राणी पाणी के जरिये बच गे | 21 उस्से पाणी का उदाहरण भी, यानिके बपतिस्मा, यीशु मसीह के जी उठण के जरिये, इब थमनै बचावै सै; इस्तै देही का मैल नै दूर करण का मतलब नीं सै, पर शुद्ध विवेक तै पणमेशर के बस म्हा हो जाण का मतलब सै | 22 ओ सुर्ग पै जाके पणमेशर के सोळी कान बैठ गया; अर सुर्गदुत अर अधिकारी अर सामर्थी उसके अधीन करे गये सै |

**4** इसकरके जिब्व के मसीह नै देही म्हा होके दुःख टाया तो थम भी उस्से मनसा नै हथियार की ढाळ धारण करो, क्यूँके जिसनै देही म्हा दुःख टाया ओ पाप तै छुट गया, 2 ताके आण आळे बख्त म्हा आपणी बाकी देही तौर की जिन्दगी माणसां की अभिलाषायां के मुताबिक नीं बल्के पणमेशर की मर्जी के मुताबिक बिताओ | 3 क्यूँके गैर-जात्तां की मर्जी के मुताबिक काम करण, अर लुचपण की भूडी अभिलाषायां, मतवाळापण,

लीलाक्रीडा, दारु-बाज्जी, अर घृणित मूर्तिपूजा म्हा जित तक हमनै पहल्या टेम गवाया, ओए घणा होआ | 4 इस्तै वे अचम्भा करै सै के थम इस्से भारया लुचपण म्हा उनका साथ नीं देंदे, अर ज्यांतै वे भूंडा-आच्छा कहवै सै; 5 पर वे उसनै जो जिन्द्यां अर मरे होयां का न्याय करण नै त्यार सै, लेख्खा देवैगें | 6 क्यूँके मरे होयां नै भी सुसमाचार इस्से खातर सुणाया गया के देही म्हा तो माणसां के 7 सारी बात्तां का अन्त तावळा होणआळा सै; ज्यांतै संयमी होके प्रार्थना के खातर सोद्वी म्हा रहो | 8 सारया म्हा बढिया बात या सै के एक-दुसरे तै घणा प्यार राखखो, क्यूँके प्रेम भोत पापां नै ढँक देवै सै | 9 बिना बीरडाए एक-दुसरे की मेहमान-नवाजी करो | 10 जिसनै जो वरदान मिल्या सै, ओ उसनै पणमेशर के कई ढाळ की मैहरबान्नी के भले भण्डारीयां की ढाळ एक-दुसरे की सेवा म्हा लावै | 11 जै कोए बोझै, तो इसा बोझै मात्रो पणमेशर का बचन सै; जै कोए सेवा करै, तो उस ताकत तै करै जो पणमेशर देवै सै; जिसतै सारी बात्तां म्हा यीशु मसीह के जरिये, पणमेशर की महिमा दिखै | महिमा अर साम्राज्य युगानुयुग उस्से का सै | आमीन | 12 हे प्यारो, जो दुःख की ढाळ आग थारै परखण के खातर थारै म्हा भडकी सै, इस तै न्यू समझके अचम्भा करो के कोई अनोक्खी बात थारै पै बित्तण लागरी सै | 13 जिस तरिया-जिस तरिया मसीह के दुःखां म्हा गेल-साइझी होवो सो, राज्जी होवो, जिसतै उसकी महिमा के दिखण के बख्त भी थम राज्जी अर मग्न होवो | 14 फेर जै मसीह के नाम के खातर थारी बुराई करी जावै सै तो थम धन्य सो, क्यूँके महिमा की आत्मा, जो पणमेशर की आत्मा सै, थारै पै छया करै सै | 15 थारै म्हा तै कोए माणस खूनी या चोर या भूंडा काम करणीया होण, या बिगाने काम म्हा हाथ गेरण के कारण दुःख नीं पावै | 16 पर जै मसीही होण के कारण दुःख पावै, तो शर्मिन्दा नो होईयो, पर इस बात के खातर पणमेशर की महिमा करो | 17 क्यूँके ओ बख्त आण पढोच्या सै के पहल्या पणमेशर के माणसां का न्याय करया जावैगा; अर जिब्व के न्याय की सरुआत म्हारै ए तै होगी तो उनका के अन्त होगा जो पणमेशर के सुसमाचार नै नीं मांदे? 18 अर “जै धर्मी माणस ए मुश्कल तै उद्धार पावैगा, तो भगतिहिनां अर पापी का के ठिकाणा?” 19 ज्यांतै जो पणमेशर की मर्जी के मुताबिक दुःख ठावै सै, वे भलाई करदे होए अपणे-अपणे प्राण नै बिश्वास जोगे सृजनहार के हाथ म्हा सोंप देवै |

**5** थारै म्हा जो प्राचीन सै, मै उनके ढाळ प्राचीन अर मसीह के दुःखां का गवाह अर दिखण आळी महिमा म्हा गेल-साइझी होके उन ताही न्यू समझाऊँ सू 2 के पणमेशर के उस टोळ की, जो थारै बिचाळै सै रुखाळी करो; अर न्यू दाब तै नीं पर पणमेशर की मर्जी के मुताबिक राज्जी होके, अर नीच-कमाई के खातर नीं पर मन लाके | 3 जो माणस थारै ताही सोंपे गये सै, उन पै हक्क ना जमाओ, बल्के टोळ के खातर बढिया नमूना बणो | 4 जिब्व प्रधान रुखाळा दिखैगा, तो थारै ताही महिमा का मुकुट दिया जावैगा जो मुरझाण का नीं | 5 इस्से ढाळ हे गाबरुओ, थम भी प्राचीनां के अधीन रहो, बल्के थम सारे के सारे एक-दुसरे की सेवा के खातर दीनता तै कमर बाँधे रहो, क्यूँके “पणमेशर घमण्डीयां का बिरोध करै सै, पर दीनां पै अनुग्रह करै सै |” 6 इसकरके पणमेशर के ताकतवर हाथ के तळै दीनता तै रहो, जिस तै ओ थारै ताही सई टेम पै बढावै | 7 आपणी सारी फिक्र उस्से पै गेर द्यो, क्यूँके उसनै थारा ध्यान सै | 8 सोद्वी म्हा रहो, अर जागदे रहो; क्यूँके थारा बिरोधी शैतान गर्जनआळे शेर की ढाळ इस टाह म्हा रहवै सै के किस नै पाड़ खावै | 9 बिश्वास म्हा मजबूत होके, अर न्यू जाणके उसका सामणा करो के थारे भाई जो दुनिया म्हा सै इस्से ए दुःख सहन लागरे सै | 10 इब पणमेशर जो सारे अनुग्रह का दात्ता सै, जिसनै थारै ताही मसीह म्हा आपणी अनन्त महिमा के खातर बुलाया, थारै माडी वार तक दुःख टाण के पाच्छै आप ए थमनै सिद्ध अर स्थिर अर ठाड्डा करैगा | 11 उस्से का साम्राज्य युगानुयुग रहवै | आमीन | 12 मन्त्रै सिलवानुस के हाथ, जिस ताही मै बिश्वास जोगा भाई समझूँ सू, माडे-से शब्दां म्हा लिखके थारै ताही समझाऊँ सू, अर या गवाही दी सै के पणमेशर की साच्चा अनुग्रह योए सै, इस्से म्हा मजबूत रहो | 13 जो बेबीलोन म्हा थारै ढाळ छॉटे होए माणस सै, वे अर मेरा बेट्टा मरकुस थारै ताही नमस्कार कहवै सै | 14 प्रेम के चुम्बन तै एक-दुसरे ताही नमस्कार | थम सारया ताही, जो मसीह म्हा हो, शान्ति मिलदी रहवै |

## 2 पतरस

1 शमोन पतरस की ओड़ तै, जो यीशु मसीह का दास अर प्रेरित सै, उन माणसां के नाम जिन्नै म्हारै पणमेशर अर उद्धार कर्ता यीशु मसीह की धार्मिकता के जरिये म्हारै ढाळ कीमती बिश्वास पाया सै। 2 पणमेशर की अर म्हारै प्रभु यीशु मसीह की पिच्छाण के जरिये अनुग्रह अर शान्ति थारै म्ह भोत-ए घणी बढदी जावै। 3 क्यूँके उसकी ईश्वरीय सामर्थ नै सारा कीमे जो जीवन अर भगति तै रिश्ता राखे सै, म्हारै ताही उस्से की पिच्छाण के जरिये दिया सै, जिसनै म्हारै ताही आपणी ए महिमा अर बढ़िया लखणा के मुताबिक बुलाया सै। 4 जिनके जरिये उसनै म्हारै ताही कीमती अर घणी ए बड्डी प्रतिज्ञां दी सै: ताके इनके जरिये थम उस सिडान्ध तै छुटके, जो दुनिया म्ह भूँडी अभिलाषायां तै होवै सै, ईश्वरीय सुभाव के गेल-साइझी हो जाओ। 5 इस्से कारण थम सारे ढाळ की कोशिश करके अपने बिश्वास पै बढ़िया लखण अर बढ़िया लखण पै समझ, 6 अर समझ पै संयम, अर संयम पै धीरज, अर धीरज पै भगति, 7 अर भगति पै भाई-चारे की प्रीति अर भाई-चारे की प्रीति पै प्रेम बढ़ान्दे जाओ। 8 क्यूँके जै ये बात थारै म्ह इब हाल रहवै अर बढदी जावै, तो थारै ताही म्हारै प्रभु यीशु मसीह की पिच्छाण म्ह निकम्मे अर बैगर फळ के नीं होण देवैगी। 9 क्यूँके जिस म्ह ये बात नीं, ओ आन्धा सै अर धुँधळा देखै सै, अर आपणे पाच्छले पापां तै धुके शुद्ध होण नै भूल बैठ्या सै। 10 इस कारण हे भाइयो, अपने बुलाए जाण, अर छोट लिए जाण नै सिद्ध करण की सई-ढाळ कोशिश करदे जाओ, क्यूँके जै इसा करोगे तो कद्वे भी ठोकर नीं खाओगे; 11 बल्के इस तरिया तै थम म्हारै प्रभु अर उद्धार कर्ता यीशु मसीह के अनन्त राज्य म्ह बड्डे आदर के गेल बडण पाओगे। 12 ज्यांतै हालाकि थम ये बात जाणो सो, अर जो साच्चा बचन थारै ताही मिल्या सै उस म्ह बणे रहो सो, तौभी मै थारै ताही इन बात्तां की सोद्री दिलाण नै सारी हाण त्यार रहूंगा। 13 मै यो अपने खातर सई समझूं सूं के जिब्व ताही मै इस डेरे म्ह सूं, जिद ताही थमनै सोद्री दुवा-दुवाके उभारदा रहूं। 14 क्यूँके न्यू जाणु सूं के मेरे डेरे के गिराए जाण का टेम तावळा आणआळा सै, जिस तरिया के म्हारै प्रभु यीशु मसीह नै मेरे ताही दिखाया सै। 15 ज्यांतै मै इसी कोशिश करूंगा के मेरे जा लिए पाच्छे थम इन सारी बात्तां नै सारी हाण याद कर सको। 16 क्यूँके जिब्व हमनै थारै ताही अपने प्रभु यीशु मसीह की सामर्थ का अर आण की खबर दी थी, तो वा श्याणपत तै गद्दी होई कहानीयां की नकल कोनी थीं बल्के हमनै आप ए उसके प्रताप ताही देख्या था। 17 क्यूँके जिब्व उसनै पणमेशर पिता तै आदर अर महिमा पाई अर उस प्रतापमय महिमा म्ह तै यो बोल आया, “यो मेरा प्यारा बेटा सै, जिसतै मै राज्जी सूं।” 18 फेर हम उसके गेल्या पवित्र पहाड़ पै थे अर सुरग तै योए बोल आंदे सुणया। 19 म्हारै धारै जो नब्बियां का बचन सै, ओ इस घटना तै मजबूत ठहरया। थम यो बढ़िया करो सो के यो समझ के उस पै गौर करो सो, के ओ एक दिवा सै, जो अँधेरी जंगहा म्ह उस टेम ताही चाँदणा देँदा रहवै सै जिब्व ताही के तडका नीं हो लेवै अर भोर का तारा थारै दिलां म्ह नीं चमक उठै। 20 पहल्या न्यू जाण ल्यो के पवित्र ग्रन्थ की कोए भी भविष्यवाणी किस्से हो के अपने ए बिचार-धारा के आधार पै पूरी नीं होन्दी, 21 क्यूँके कोए भी भविष्यवाणी माणस की मर्जी तै कदे नीं होई, पर भगतजन पवित्र आत्मा के द्वारा उभारे जाके पणमेशर की ओड़ तै बोले थे।

2 जिस ढाळ उन माणसां म्ह झूठे नब्बी थे, उस्से ढाळ थारे म्ह भी झूठे उपदेशक होंगे, जो नाश करणआळे पाखण्ड का उदघाटन लुहक-लुहक के करैंगे, अर उस मालिक का जिसनै मोल लिया सै नाटैंगे, अर अपने आप नै तावळा विनाश म्ह गेरैंगे। 2 घण-खरे उनके ढाळ लुचपण करैंगे, जिनके कारण सच के राह की बुराई करी जावैगी। 3 वे लोभ के खातर बात

गढके थारै ताही अपने फेयदे का कारण बनावैंगे, अर जो दण्ड का हुकम उन पै पहल्या तै हो लिया सै उसके आण म्ह कीमे भी वार नीं, अर उनका विनाश ऊँघदा कोनी। 4 क्यूँके जिब्व पणमेशर नै उन सुरगदुत्तां ताही जिन्नै पाप करया, नीं छोड्या, पर नरक म्ह खन्दाके अँधेरे कुण्डा म्ह गेर दिया ताके न्याय के दिन ताही कैदी रहवै; 5 अर पुराणे युग की दुनिया ताही भी नीं छोड्या बल्के भगति-हीन दुनिया पै जल-प्रलय खन्दाया, पर धर्म के प्रचारक नूह सुदा आठ माणसां ताही बचा लिया; 6 अर सदोम अर अमोरा के नगरां ताही विनाश का इसा दण्ड दिया के उन्नै भस्म करके राख म्ह मिल्या दिया ताके वे आणआळे भगतिहीन माणसां की शिक्षा के खातर एक उदाहरण बणे, 7 अर धर्मी लूत ताही जो अधर्मियां के अशुद्ध चाल-चलण तै घणा दुखी था छुटकारा दिया। 8 (क्यूँके ओ धर्मी उनके बिचाळे रहंदे होए अर उनके अधर्म के काम्मां नै देख-देखके अर सुण-सुणके, हरेक दिन अपने साचे मन नै दुखी करै था।) 9 तो प्रभु भगतां ताही हिम्तान तै काड लेणा अर अधर्मियां ताही न्याय के दिन तक दण्ड की हालत म्ह राखणा भी जाणै सै, 10 खास करके उन्नै जो अशुद्ध अभिलाषायां के पाच्छे देही के मुताबिक चाल्दे अर प्रभुता नै तुच्छ जाणै सै। वे डीठ, अर जिद्दी सै, अर ऊँचे ओद्रे आळ्यां ताही भूँडा-आच्छा कहण तै नीं डरदे, 11 तौभी सुरगदुत जो ताकत अर सामर्थ म्ह उन तै बड्डे सै, प्रभु के श्यामी उन्नै भूँडा-आच्छा कहके तोहमन्द नीं लांदे। 12 पर ये माणस बेअकले डांगरां ए के बरगे सै, जो पकडे जाण अर नाश होण के खातर पैदा होवै सै; अर जिन बात्तां नै जाणदे ए नीं उनके बारे म्ह दूसरयां नै भूँडा-आच्छा कहवै सै, वे आपणी सिडान्ध म्ह आप ए सिड जावैंगे। 13 दूसरयां का भूँडा करण के बदले उन्नै का भूँडा होवैगा। उन्नै दिन-दोफारी भोग-विलास करणा आच्छा लागै सै। ये कलंक अर तोहमन्द सै; जिब्व वे थारै गेल्या खावे-पिवै सै, तो आपणी ओड़ तै प्रेम भोज करके भोग-विलास करै सै। 14 उनकी आँख म्ह जारी बसी होई सै, अर वे पाप करे बिना रुक नीं सकदे। वे चंचल मनआळ्यां नै भका लेवै सै। उनके मन नै लोभ करण की आदत हो गी सै; वे सन्ताप की ऊलाद सै। 15 वे सीधी राह नै छोडके भटक गे सै, अर बओर के बेटे बिलाम की राही पै हो लिए सै, जिसनै अधर्म की मजदूरी ताही प्यारा जाणया; 16 पर उसके अपराध के बारे म्ह उलाहना दिया गया, उरै ताही के अबोल गदही नै माणस की बोली तै उस नब्बी ताही उसके बावळपण तै रोक्या। 17 ये माणस सूखे कूएँ, अर आँधी के उड़ाए होए बादळ सै; उनके खातर अनन्त अन्धकार ठहराया गया सै। 18 वे खाम-खां घमण्ड की बात कर-करके लुचपण के काम्मां के जरिये, उन माणसां ताही देही आळी अभिलाषायां म्ह फँसा लेवै सै जो भटके होया म्ह तै इब भी लिकड़ ए रहे सै। 19 वे उन्नै आजाद करण की प्रतिज्ञा तो करै सै, पर आप ए सिडान्ध के गुलाम सै; क्यूँके जो माणस जिसतै हार गया सै, ओ उसका दास बण जावै सै। 20 जिब्व वे प्रभु अर उद्धारकर्ता यीशु मसीह की पिच्छाण के जरिये दुनिया की कई ढाळ की अशुद्धता तै बच लिकड़े, अर फेर उन म्ह फँसके हार गये, तो उनकी पाच्छली हालत पहलडी तै भी भूँडी हो गई सै। 21 क्यूँके धर्म की राही का ना जाणना ए उनके खातर इसतै भला होन्दा के उस ताही जाणके, उस पवित्र हुकम तै पलट जान्दे जो उन ताही साँपी गई थी। 22 उन पै या कहावत सई बँड्डे सै, के कुत्ता आपणी छोट की ओड़ अर नुहाई होई सुअरनी कीचड़ म्ह लोहण के खातर फेर चली जावै सै।

3 हे प्यारो, इब मै थारै ताही दूसरी चीन्ही लिखूँ सूँ, अर दोनुआ म्ह सोद्री दुवाके थारै शुद्ध मन नै उभारू सूँ, 2 के थम उन बात्तां नै जो पवित्र नब्बियां नै पहल्या तै कही सै, अर प्रभु अर उद्धारकर्ता की उस आज्ञा नै याद करो जो थारै प्रेरीतां के जरीये दी गई थी। 3 पहल्या न्यू जाण ल्यो के

आखरी के दिनां म्ह मखौल करण आळे आवैगें जो आपणी ए अभिलाषायां कै मुताबिक चाल्लैगें 4 अर कहवैगें, “उसकै आण की प्रतिज्ञा कित गई? क्युँके जिब तै बाप-दादे सो गे सै, सारा कीमे उस्से तरिया ए सै जिस तरिया सृष्टि की सरूआत तै था?” 5 वे तो जाण-बुझकै न्यू भूल गे के पणमेशर के बचन कै जरिये अकास पुराणे बख्त तै विद्यमान सै अर धरती भी पाणी म्ह तै बणी अर पाणी म्ह डटरी सै, 6 इस्से कै कारण उस युग की दुनिया पाणी म्ह डूब कै नाश हो गी। 7 पर इब के बख्त का अकास अर धरती उस्से बचन कै जरिये ज्यांतै धरे गये सै के जलाए जावै; अर ये भगतिहीन माणसां के न्याय अर नाश होण कै दिन ताही इसे ए धरे रहवैगें। 8 हे प्यारो, या बात थारै तै लुटकी ना रहवै के प्रभु कै उरै एक दिन हजार साल कै बराबर सै, अर हजार साल एक दिन कै बराबर सै। 9 प्रभु अपणे प्रण कै बारै म्ह वार नीं करदा, जीसी वार कीमे माणस समझै सै; पर थारै बारै म्ह धीरज धरै सै, अर नीं चाहन्दा के कोए नाश हो, बल्के यो के सारया ताही मन पलटन का मौक्का मिलै। 10 पर प्रभु का दिन चोर की ढाळ आ जावैगा, उस दिन अकास म्ह बड्डी हड़हड़ाहट कै बोल तै जान्दा रहवैगा अर तत्व घणा-ए तात्ता होकै पिंघळ जावैगें अर धरती अर उस पै के काम जळ जावैगें। 11 जिब के ये सारी चीज इस तरिया तै पिंघळणआळी सै, तो थारै ताही पवित्र चाल-चलण अर भगति म्ह किस

ढाळ माणस होणा चाहिये, 12 अर पणमेशर के उस दिन की बाट किस तरिया तै देखणी चाहिये अर उसकै तावळी आण कै खातर किसी कोशिश करणी चाहिये, जिसकै कारण अकास तै पिंघल जावैगें अर अकास के गण घणै-ए तात्ते होकै गळ जावैगें। 13 पर उसके प्रण कै मुताबिक हम एक नये अकास अर नयी धरती की आस देख्वां सां जिन म्ह धार्मिकता वास करैगी। 14 ज्यांतै, हे प्यारो, जिब के थम इन बात्तां की आस देखो सो, तो कोशीश करो के थम शान्ति तै उसकै श्यामी बेदाग अर बेकसूर ठहरो, 15 अर म्हारै प्रभु के धीरज नै उद्धार समझो, जिसा म्हारै प्यारै भाई पौलुस नै भी उस ज्ञान कै मुताबिक जो उसनै मिल्या, थारै ताही लिख्या सै। 16 उस्से तरिया ए उसनै आपणी सारी चिड्डीं म्ह भी इन बात्तां का जिक्का करया सै, जिन म्ह कीमे बात इसी सै जिनका समझणा ओख्वा सै, अर अणपढ़ अर चंचल माणस उन के मतलबां नै भी पवित्रग्रन्थ की दूसरी बात्तां की तरिया खींच तानकै अपणे ए नाश का कारण बणै सै। 17 ज्यांतै हे प्यारो, थम माणस पहल्या ए तै इन बात्तां नै जाणकै चौकस रहो, ताके अधर्मियां के भ्रम म्ह फँसकै आपणी स्थिरता नै कट्टे हाथ तै खो नीं देवै। 18 पर म्हारै प्रभु अर उद्धारकर्ता यीशु मसीह के अनुग्रह अर पहचान म्ह बढ़दे जाओ। उस्से की महिमा इब भी हो, अर युगानुयुग होन्दी रहवै। आमीन।

# 1 यूहन्ना

## जीवन का वचन

1 उस जीवन के वचन के बारे में जो शुरू तै था, जिस ताही हमने सुण्या, अर जिस ताही हमने आपणी आँखां तै देख्या, बल्के जिस ताही हमने ध्यान तै देख्या अर हाथां तै छुआ- 2 यो जीवन प्रकट होया अर हमने इस ताही देख्या, अर उसकी गवाही देवा सां, अर थमने उस अनन्त जीवन की खबर देवे सै जो पिता के गैल था अर म्हारै पै प्रकट होया- 3 जो कीमे हमने देख्या अर सुण्या सै उसकी खबर थमने भी देवा सां, इस करके के थम भी म्हारै गैल हिस्सेदार हो; अर म्हारी या हिस्सेदारी पिता के गैल उसके बेटे यीशु मसीह के गैल सै। 4 अर ये बात हम इस करके लिखा सां के म्हारा आनन्द पूरा हो जावै।

## चान्दणे म्ह चालणा

5 जो खबर हमने उसतै सुणी अर थमने सुणावा सां, वो या सै के पणमेशर चान्दना सै अर उस म्ह कीमे भी अन्धेरा नी। 6 जै हम कहवा के उसके गैल म्हारी सहभागिता सै अर फेर अन्धकार म्ह चालां, तो हम झूठे सां अर सच पै नी चालदे; 7 पर जिसा ओ चान्दना म्ह सै, उसे ए हम भी चान्दना म्ह चालां, तो एक दूसरे तै सहभागिता राखा सां, अर उसके बेटे का लहू हमने सारे पाप तै शुद्ध करे सै। 8 जै हम कहवा के म्हारै म्ह कोई भी पाप न्ही, तो आपणे आप नै धोखा देवा सां, अर म्हारै म्ह सच न्ही। 9 जै हम आपणे पाप नै मान ल्या, तो वो म्हारे पाप नै माफ करण अर हमने सारे अधर्म तै शुद्ध करण म्ह भरोसेमन्द अर धर्मी सै। 10 जै हम कहवा के हमने पाप न्ही करया, तो उसने झूठ बणावा सां, अर उसका वचन म्हारै न्ही सै।

## मसीही म्हारा सहायक सै

2 हे मेरे बाळकों मैं ये बात थारै ताही इस करके लिखूँ सूँ के थम पाप ना करो; अर जै कोई पाप करै, तो पिता के धोरै म्हारा एक सहायक सै, यानी धर्मी यीशु मसीह; 2 अर ओ ए म्हारै पापां का प्रायश्चित्त सै, अर सिर्फ म्हारे ए न्ही बल्के सारी दुनिया के पापां का भी। 3 जै हम उसके हुक्म नै माणां, तो इस तै हम जाण ल्यां के हम उसने जाणगे। 4 जो कोई या कहै सै, "मैं उसने जाण ग्या सूँ, अर उसके हुक्म नै न्ही मानता, वो झुठ्ठा सै उस म्ह सच कोन्या; 5 पर जो कोई उसके वचन पै चालै, उस म्ह सचमुच पणमेशर का प्रेम सिद्ध होया सै: इस्से तै हम जाणा सा के हम उस म्ह सां। 6 जो कोई या कहै सै के मैं उस म्ह बण्या रहूँ सूँ, उस नै चाहिए के आप भी उसा ए चालै जिसा ओ चालै था।

## नई आज्ञा

7 हे प्यारों मैं थमने कोए नया हुक्म न्ही लिखता, पर ओ ए पुराणा हुक्म जो शुरू तै थमने मिल्या सै; यो पुराणा हुक्म यो वचन सै जिस ताही थमने सुण्या सै। 8 फेर भी मैं थमने नया हुक्म लिखूँ सूँ, अर यो उस म्ह अर थारै म्ह सच्चा ठहरै सै; क्यूँके अन्धेरा मिटता जावै सै अर सच का चान्दना इब चमकण लाग्या सै। 9 जो कोए या कहै सै के मैं चान्दना म्ह सूँ अर आपणे भाई तै बैर राखै सै, वो इब ताही अन्धकार म्ह ए सै। 10 जो कोए आपणे भाई तै प्रेम राखै सै वो चान्दना म्ह रहवै सै, अर ठोकर न्ही खा सकता। 11 पर जो कोए आपणे भाई तै बैर राखै सै वो अन्धेरे म्ह सै अर अन्धेरे म्ह चालै सै, अर न्ही जाणदा के कीत्त जावै सै, क्यूँके अन्धेरे नै उसकी आँख आँधी कर दी सै। 12 हे

बाळकों, मैं थमने इस करके लिखूँ सूँ के उसके नाम तै थारै पाप माफ होए सै। 13 हे पितरो/(पिताओ), मैं थमने इस करके लिखूँ सूँ के जो शुरू तै सै थम उसने जाणो सों। हे गबरुओ, मैं थमने इस करके लिखूँ सूँ के थमने उस दुष्ट पै जीत पाई सै। हे लड़को, मन्त्रे थारै ताही इस करके लिख्या सै के थम पिता नै जाणगे सों। 14 हे पितरो/(पिताओ), मन्त्रे थारै ताही इस करके लिख्या सै के जो शुरू तै सै थम उसने जाणगे सों। हे गबरुओ, मन्त्रे थारै ताही इस करके लिख्या सै के थम ताकतवर बणो, अर पणमेशर का वचन थारै म्ह बणा रहवै सै, अर थमने उस दुष्ट पै जीत पाई सै।

## जगत तै प्यार ना करो

15 थम ना तो संसार तै अर ना संसार म्ह की चिजां तै प्रेम राखो। जै कोए संसार तै प्रेम राखै सै, तो उस म्ह पिता का प्रेम कोन्या। 16 क्यूँके जो कीमे संसार म्ह सै, यानी शरीर की अभिलाषा, आँखां की अभिलाषा अर रोजी रोटी का घमण्ड, वो पिता कि ओड़ तै कोनी पर संसार की ए ओड़ तै सै। 17 संसार अर उसकी अभिलाषा दोनु मिटते ज्या सै, पर जो पणमेशर की मर्जी पै चालै सै ओ सदा बण्या रहवैगा।

## मसीही -बिरोधी

18 हे लड़को, यो आखरी बख्त सै; अर जिसा थमने सुण्या सै के मसीह का विरोधी आण आळा सै, उसके मुताबिक इब भी घणे ए मसीह विरोधी उठ खड़े होए सै; इस तै हम जाणगे सां के यो आखरी बख्त सै। 19 वे लिकड़े तै म्हारै म्ह ए तै सै, पर म्हारै म्ह के थे न्ही; जै वे म्हारै म्ह के होंदे, तो म्हारै गैल रहंदे; पर लिकड़ इस खात्तर गये के ये प्रकट हो के वे म्हारै म्ह के न्ही सै। 20 पर थारा तो उस पवित्रता तै अभिषेक होया सै, अर थम सारा कीमे जाणो सों। 21 मन्त्रे थारै ताही इस करके न्ही लिख्या के थम सच नै न्ही जाणदे, पर इस करके के थम जाणो सों, अर इस करके कोए झूठ, सच की ओड़ तै न्ही। 22 झुठ्ठा कौन सै? सिर्फ ओ जो यीशु नै मसीह होण तै नाटे सै; अर मसीह का बिरोधी ओ ए सै, जो पिता का अर बेटे का इन्कार करे सै। 23 जो कोए बेटे नै (मानण)तै नाटे सै उसके धोरै पिता भी कोनी: जो बेटे नै मान ले सै, उसके धोरै पिता भी सै। 24 जो कीमे थमने शुरू तै सुण्या सै, जै वो थारै म्ह बण्या रहै तो थम भी बेटे म्ह अर पिता म्ह बणे रहोंगे। 25 अर जिसकी उसने म्हारै तै प्रतिज्ञा करी वो अनन्त जीवन सै। 26 मन्त्रे ये बात थारै ताही उनके बारे में म्ह लिखी सै, जो थमने भरमावै सै; 27 पर थारा वो अभिषेक जो उसकी ओड़ तै करया गया, थारै म्ह बणा रहवै सै; अर थमने इसका प्रयोजन न्ही के थमने कोए सिखावै, बल्के जिसा वो अभिषेक जो उसकी ओड़ तै करया गया थारै ताही सारी बात सिखावै सै, अर सच्चा सै अर झूठा कोनी; अर जिसा उसने थारै ताही सिखाया सै उसे ए थम उस म्ह बणे रहो।

## पणमेशर की उल्लाद

28 आखर हे बाळकों, उस म्ह बणे रहो के जिब्व ओ प्रकट हो तो म्हारी हिम्मत बणै, अर हम उसके आण पै शर्मिन्दा ना होआ। 29 जै थम जाणो सों, के मसीह का विरोधी आण आळा सै, तो यो भी जाणो सों जो कोए धर्म का काम करे सै वो उस तै जन्मा सै।

3 देखो पिता नै म्हारै तै किसा प्रेम करया के हम पणमेशर की औलाद कहवाए; अर हम सां भी। इस कारण दुनिया हम नै न्ही जाणदी, क्यूँके उसणै उस ताहि भी न्ही जाणा। 2 हे प्रियो, इब हम पणमेशर की औलाद सां

अर इब ताही यो प्रकट न्ही होया के हम के कीमे होवांगे! इतना जाणा सां के जिब्व वो प्रकट होगा तो हम उसके बरोबर होवांगे क्यूँके उसने उसा ए दिक्खानें जिसा वो सै।<sup>3</sup> अर जो कोए उसपै या आश राक्खै सै, वो आपणे आप नै उसा ए पवित्र करै सै जिसा ओ पवित्र सै।<sup>4</sup> उसपै या आश राक्खै सै, वो आपणे आप नै उसा ए पवित्र करै सै जिसा ओ पवित्र सै।<sup>4</sup> जो कोए पाप करै सै, वो नियम का विरोध करै सै। अर पाप तो नियम का विरोध सै।<sup>5</sup> थम जाणो सां के ओ इस खात्तर प्रकट होया के पाप नै हर ले जावै; अर उसके सुभाव म्ह पाप कोनी।<sup>6</sup> जो कोए उस म्ह बणया रहै सै, वो पाप न्ही करता: जो कोए पाप करै सै, उसने ना तो उस ताही देख्या सै अर ना उस ताही जाणया सै।<sup>7</sup> हे बाळकों, किसे के बहकावै म्ह ना आइयो। जो धर्म के काम करै सै, वो ए उसके समान धर्मा सै।<sup>8</sup> जो कोए पाप करै सै वो शैतान की ओड़ तै सै, क्यूँके शैतान शुरु तै ए पाप करता आया सै। पणमेशर का बेड़ा इस खात्तर प्रकट होया के शैतान के कामां का नाश करै।<sup>9</sup> जो कोए पणमेशर तै जन्मा सै वो पाप न्ही करता; क्यूँके उसका बीज उस म्ह बणया रहवै सै, अर वो पाप कर ए न्ही सकता क्यूँके वो पणमेशर तै जन्मा सै।<sup>10</sup> इस्से तै पणमेशर की औलाद अर शैतान की औलाद जाणे ज्या सै; जो कोए धर्म के काम न्ही करता वो पणमेशर तै कोनी, अर ना वो जो आपणे भाई तै प्रेम न्ही राखता।

### एक दुसरे तै प्यार रक्खो

<sup>11</sup> क्यूँके जो खबर थमने शुरु तै सुणी, वो या सै के हम एक दूसरे तै प्रेम राक्खा; <sup>12</sup> अर कैन की ढाल ना बणै जो उस दुष्ट तै था, अर जिसने आपणे भाई ताही मार दिया। अर उस ताही किस कारण मारा? इस कारण के उसके काम बुरे थे, अर उसके भाई के काम धर्म के थे।<sup>13</sup> हे भाइयो, जै संसार थारै तै बैर करै सै तो अचम्भा ना करो।<sup>14</sup> हम जाणा सां के हम मृत्यु तै पार होके जीवन म्ह पुँच्चे सां; क्यूँके हम भाईयां तै प्रेम राक्खा सां। जो प्रेम न्ही रखता वो मृत्यु की हालत म्ह रहवै सै।<sup>15</sup> जो कोए आपणे भाई तै बैर राक्खै सै, वो हत्यारा सै; अर थम जाणो सां के हत्यारे म्ह अनन्त जीवन न्ही रहन्दा।<sup>16</sup> हमने प्रेम इस्से तै जाण लिया के उसने म्हारै खात्तर आपणी जान दे दि; अर हमने भी भाईयां के खात्तर जान देणी चाहिए।<sup>17</sup> पर जिस किसे के धारै दुनिया की दौलत हो अर वो आपणे भाई नै कंगाल देखके उसपै तरस ना खावै, तो उस म्ह पणमेशर का प्रेम किस तरियां बणया रहै सकै सै? <sup>18</sup> हे बाळकों, हम वचन अर जीभ तै ए न्ही, पर काम अर सच के जरिये भी काम करां।

### पणमेशर के सम्मुख हियाव

<sup>19</sup> इस्से तै हम जाणागे के हम सच के सां; अर जिस बात म्ह म्हारा मन हमने दोष देगा, उसके बारे म्ह हम उसके आगे आपणे-आपणे मन नै होसला दे सकांगे; <sup>20</sup> क्यूँके पणमेशर म्हारे मन म्ह बड़ा सै, अर सारा कीमे जाणै सै।<sup>21</sup> हे प्रियो, जै म्हारा मन हमने दोष ना दे, तो हमने पणमेशर के आगे होसला होवै सै।<sup>22</sup> अर जो कीमे हम माँगां सां, वो हमने उस तै मिले सै, क्यूँके हम उसके हुक्म नै मान्ना सां अर जो उसने भावै सै वो ए करां सां।<sup>23</sup> उसका हुक्म यो सै के हम उसके बेड़े यीशु मसीह पै बिश्वास करां, अर जिसा उसने म्हारै ताही हुक्म दिया सै उससे के मुताबिक आप्पस म्ह प्रेम राखां।<sup>24</sup> जो उसके हुक्म नै मान्ना सै, वो उस म्ह अर वो उन्हे म्ह बणया रहै सै: अर इस्से तै, यानी उस आत्मा तै जो उसने म्हारै ताही दिया सै, हम जाणा सां के वो म्हारै

### आत्मायां नै परखो

<sup>4</sup> हे प्रियो, हरेक आत्मा का बिश्वास ना करो, बल्के आत्मायां नै परखो के वो पणमेशर की ओड़ तै सै के न्ही; क्यूँके घणे ए झूठे नब्बी दुनिया म्ह उठ खड़े होए सै।<sup>2</sup> पणमेशर की आत्मा थम इस रीति तै पिच्छाण सको सां: जो आत्मा मान ले सै के यीशु मसीह देही म्ह होके आया सै वो पणमेशर की ओड़ तै सै, <sup>3</sup> अर जो आत्मा यीशु नै न्ही मानती, वो पणमेशर की ओड़ तै न्ही सै; अर वो ए तो मसीह के विरोधी की आत्मा सै, जिसका जिकर थमने

सुण्या सै के वो आण आळा सै, अर इब भी दुनिया म्ह सै।<sup>4</sup> हे बाळकों, थम पणमेशर के सां, अर थमने उसपै जीत पाई सै; क्यूँके जो थारै म्ह सै वो उस तै जो दुनिया म्ह सै, बड़ा सै।<sup>5</sup> वे दुनिया के सै, इस कारण वे दुनिया की बात बोले सै, अर दुनिया उन्हेकी सुणै सै।<sup>6</sup> हम पणमेशर के सां। जो पणमेशर नै जाणै सै, वो म्हारी सुणै सै; जो पणमेशर नै न्ही जाणता वो म्हारी न्ही सुणता। इस ढाळ हम सच की आत्मा अर भ्रम की आत्मा नै पिच्छाण लेवा सां।

### पणमेशर प्रेम सै

<sup>7</sup> हे प्रियो, हम आप्पस म्ह प्रेम राक्खा; क्यूँके प्रेम पणमेशर सै जो कोए प्रेम करै सै, वो पणमेशर तै जन्मा सै अर पणमेशर नै जाणै सै।<sup>8</sup> जो प्रेम न्ही राखता वो पणमेशर नै न्ही जाणदा, क्यूँके पणमेशर प्रेम सै।<sup>9</sup> जो प्रेम पणमेशर म्हारै तै राक्खै सै, वो इस तै प्रकट होया के पणमेशर नै आपणे इकलौते बेड़े ताही दुनिया म्ह भेज्जा सै के हम उसके जरिये जीवन पावां।<sup>10</sup> प्रेम इस म्ह न्ही के हमने पणमेशर तै प्रेम करया, पर इस म्ह सै के उसने म्हारै तै प्रेम करया अर म्हारे पाप प्रायाश्चित के खात्तर आपणे बेड़े ताही भेज्जा।<sup>11</sup> हे प्रियो, जिब्व पणमेशर नै म्हारै ताही इसा प्रेम करया, तो हमने भी आप्पस म्ह प्रेम राखणा चाहिए।<sup>12</sup> पणमेशर ताही भी किसे नै न्ही देख्या; जै हम आप्पस म्ह प्रेम राक्खा, तो पणमेशर म्हारै म्ह बणया रहवै सै अर उसका प्रेम म्हारै म्ह सिद्ध हो गया।<sup>13</sup> इस्से तै हम जाणा सां के हम उस म्ह बणे रहा सां, अर वो म्हारै म्ह; क्यूँके उसने आपणे आत्मा म्ह तै म्हारै ताही दिया सै।<sup>14</sup> हमने देख भी लिया अर गवाही देवा सां के पिता नै बेड़े ताही जगत का उद्धारकर्ता करके भेज्जा सै।<sup>15</sup> जो कोए या मान ले सै के यीशु पणमेशर का बेड़ा सै, पणमेशर उस म्ह बणया रहवै सै अर वो पणमेशर म्ह।<sup>16</sup> जो प्रेम पणमेशर म्हारै तै राक्खै सै, उसने हम जाण गये अर हमने उसका बिश्वास सै। पणमेशर प्रेम सै, अर जो प्रेम म्ह बणया रहवै सै वो पणमेशर म्ह बणया रहवै सै, अर वो उस म्ह बणया रहवै सै।<sup>17</sup> इस्से तै प्रेम म्हारै म्ह सिद्ध होया के हमने न्याय के दिन होसला हो; क्यूँके जिसा वो सै उससे ए दुनिया म्ह हम भी सां।<sup>18</sup> प्रेम म्ह डर न्ही होंदा, बल्के सिद्ध प्रेम डर नै दूर कर दे सै; क्यूँके डर का सम्बन्ध सजा तै होवै सै, अर जो डरै सै वो प्रेम म्ह सिद्ध न्ही होया।<sup>19</sup> हम इस करके प्रेम करा सै, के पैहले उसने म्हारै तै प्रेम करया।<sup>20</sup> जै कोए कहै, "मै पणमेशर तै प्रेम राक्खुँ सूँ," अर आपणे भाई तै बैर राक्खै तो वो झूठा सै; क्यूँके जो आपणे भाई तै जिस ताही उसने देख्या सै प्रेम न्ही राखता, तो वो पणमेशर तै भी जिस ताही उसने न्ही देख्या प्रेम न्ही राक्ख सकता।<sup>21</sup> उस तै हमने यो हुक्म मिल्या सै, के जो कोए पणमेशर तै प्रेम राक्खै सै वो आपणे भाई तै भी प्रेम राक्खै।

### जगत पै जय पाना

<sup>5</sup> जिसका यो बिश्वास सै के यीशु ही मसीह सै, ओ पणमेशर तै पैदा होया सै; अर जो कोए पैदा करण आळे तै प्रेम राक्खै सै, वो उस तै भी प्रेम राक्खै सै।<sup>2</sup> जिब्व हम पणमेशर तै प्रेम राक्खै सां अर उसके हुक्म नै मान्ना सां, तो इस्से तै हम जाणा सां के हम पणमेशर की औलाद तै प्रेम राक्खा सां।<sup>3</sup> क्यूँके पणमेशर तै प्रेम राखणा यो सै के हम उसके हुक्मा नै मान्ना; अर उसके हुक्म मुश्किल कोन्या।<sup>4</sup> क्यूँके जो कीमे पणमेशर तै पैदा होया, वो दुनिया पै जीत पावै सै; अर वो जीत जिस तै दुनिया पै जीत पावै सै म्हारा बिश्वास सै।<sup>5</sup> दुनिया पै जीत पावैण आळा कौन सै? सिर्फ वो जिसका यो बिश्वास सै के यीशु पणमेशर का बेड़ा सां।

### यीशु मसीह के बारे म्ह गवाही

<sup>6</sup> यो ए सै वो जो पाणी अर लहू के जरिये आया था, यानी यीशु मसीह: वो सिर्फ पाणी के जरिये बल्के लहू दोनुआ के जरिये आया था।<sup>7</sup> अर जो गवाही देवै सै, वो आत्मा सै; क्यूँके आत्मा सच सै।<sup>8</sup> गवाही देण आळे तीन सै, आत्मा, पाणी अर लहू; ये तिन्नु एकै ए बात पै सहमत सै।<sup>9</sup> जिब्व हम माणसा की गवाही मान ल्यां सां, तो पणमेशर की गवाही तो उस तै बढ के सै; अर पणमेशर की गवाही या सै के उसने आपणे बेड़े के बारे म्ह गवाही दी सै।<sup>10</sup> जो पणमेशर के बेड़े पै बिश्वास करै सै वो आपणे ए म्ह गवाही राक्खै सै।

जिसने पणमेशर पे बिश्वास नही करया उसने उस ताही झूठा बताया, क्यूँके उसने उस गवाही पे बिश्वास करया जो पणमेशर ने आपणे बेट्टे के बारे में दी है। 11 अर वा गवाही या से के पणमेशर ने म्हारै ताही अनन्त जीवन दिया है, अर यो जीवन उसके बेट्टे में है। 12 जिसके धोरे बेट्टा है, उसके धोरे जीवन है; अर जिसके धोरे पणमेशर का बेट्टा कोनी, उसके धोरे जीवन भी कोनी।

### अनन्त जीवन

13 मन्त्रे थारै ताही, जो पणमेशर के बेट्टे के नाम पे बिश्वास करों सो, इस करके लिख्या है के थम जाणोंके अनन्त जीवन थारा है। 14 मन्त्रे थारै ताही, जो पणमेशर के बेट्टे के नाम पे बिश्वास करों सो, इस करके लिख्या है के थम जाणोंके अनन्त जीवन थारा है। 15 जिबब हम जाणा सां के जो कीमे हम माँगा सां ओ म्हारी सुणै है, तो यो भी जाणा सां के जो कीमे हमने उसने

मांग्या, वो पाया है। 16 जै कोए आपणे भाई ने इसा पाप करते देखै जिसका फल मृत्यु ना हो, तो बिनती करै, अर पणमेशर उस ताही उन्ह खात्तर, जिन्ने ने इसा पाप करया है जिसका फल मृत्यु ना हो, जीवन देगा। जिसका फल मृत्यु है; इसके बारे में मैं बिनती करण खात्तर नही कहन्दा। 17 सारी ढाळ का अधर्म तो पाप है, पर इसा पाप भी है जिसका फल मृत्यु नही 18 हम जाणा सां, के जो कोए पणमेशर तै पैदा होया है, वो पाप नही करता; पर जो पणमेशर तै पैदा होया है, उसने वो बचाई राखै है, अर वो दुष्ट उसने छु भी नही पांदा। 19 हम जाणा सां के हम पणमेशर तै सां, अर सारि दुनिया उस दुष्ट के वश में पड़ी है। 20 हम यो भी जाणा सां के पणमेशर का बेट्टा आ गया है अर उसने म्हारै ताही समझ दी है के हम उस सच्चे ने पिच्छाणा; अर हम उस में जो सच है, यानी उसके बेट्टे यीशु मसीह में रह्या सां। सच्चा पणमेशर अर अनन्त जीवन यो है। 21 हे बाळकों आपणे आप ने मूर्ता तै बचाये राखों।

## 2 यूहन्ना

### अभिवादन

1 मन्त्रै प्राचीन कै कात्री तै उस छौंटी होई श्रीमती अर उसके बाळकां के नाम, जिनतै मै साचा प्रेम राखूँ सूँ, अर सिर्फ मै ए नीं बल्के वे सारे भी प्रेम राखै सै जो साच नै जाणै सै; 2 ओ साच जो म्हारै म्ह स्थिर रहवै सै, अर सारी हाण म्हारै गेल्या पक्की तौर पै रहवैगा; 3 पणमेशर पिता, अर पिता के बेट्टे यीशु मसीह कै कात्री तै अनुग्रह अर दया अर शान्ति, साच अर प्रेम सुदा म्हारै गेल्या रहवैगें।

### सच अर प्रेम

4 मै घणा राज्जी होया के मन्त्रै तेरे कई बाळकां ताही उस हुक्म कै मुताबिक, जो म्हारै पिता की ओड़ तै मिल्या था, साच पै चाल्दे होए पाया। 5 इब हे नारी, मै तन्त्रै कोए नया हुक्म कोनी, पर ओए जो सरुआत तै म्हारै गेल्या सै, लिखूँ सूँ; अर तेरै तै बिनती करूँ सूँ के हम एक-दुसरे तै प्रेम राक्खां। 6 अर प्रेम यो सै के हम उसके हुक्मां कै मुताबिक चाल्ला; यो ओए हुक्म सै जो थमनै सरुआत तै सुणया सै, अर थमनै इस पै चालणा भी चाहिये। 7 क्युँके घण-

खरे इसे भकाण आळे दुनिया म्ह लिकड़ आये सै, जो यो न्ही मान्दे के यीशु मसीह देही म्ह होकै आया; भकाण आळा अर मसीह बिरोधी योए सै।

8 आपणे बारै म्ह चौकन्ने रहो, के जो मेहनत हमनै करी सै उस ताही थम गवाँ ना देवो, बल्के उसका पूरा इनाम पाओ। 9 जो कोए मसीह की शिक्षा तै आगै बढ जावै सै उसम्ह बणया नीं रहन्दा, उसके धोरै पणमेशर कोनी; जो कोए उसकी शिक्षा म्ह डटया रहवै सै उसके धोरै पिता भी सै अर बेडा भी। 10 जै कोए थारै धोरै आवै अर याए शिक्षा ना देवै, उस ताही ना तो घर म्ह आण द्यो अर ना नमस्कार करो। 11 क्युँके जो कोए इसे माणस नै नमस्कार करै सै, ओ उसके भुन्डे काम्मां म्ह साइझी होवै सै।

### आखरी अभिवादन

12 मन्त्रै घणी ए बात थारै तै करणी सै, पर कागज अर स्याही तै लिखणा कोनी चाहन्दा, पर उम्मीद सै के मै थारै आऊँगां अर आम्मी-स्याम्ही बतळाऊँगा, जिस तै थारा आनन्द पूरा होवै। 13 तेरी छौंटी होई बेब्बे के बाळक तेरै ताही नमस्कार कइ सै।



## 3 यूहन्ना

### अभिवादन

1 मुझ प्राचीन की ओड़ तै प्रिय गयुस कै नाम जिस तै मैं साच्चा प्रेम राखूँ सूँ 2 हे प्यारे, मेरी या प्रार्थना सै के जिसा तू आत्मिक बढ़ोतरी करण लाग रह्या सै, उस्से तरियां तू सारी बातां म्ह बढ़ोतरी करै अर आच्छा बिच्छा रहवै 3 क्यूँके जिब्व भाईयाँ नै आण के उस सच की गवाही दी, जिस पै तू साच्च-ए चालै सै, तो मैं ब्होत ऐ राज्जी होया 4 मन्नै इस तै बढ़के और कोए खुशी कोन्या के मैं सुणु, के मेरे बाळक सच पै चालै सै।

### गयुस की तारीफ

5 हे प्यारे, जो कीमे तू उन भाईयाँ के गैल करै सै, जो परदेशी सै, उसनै बिश्वासी के रूप म्ह करै सै 6 उन्नै कलीसिया के स्याम्ही तेरै प्रेम की गवाही दी सै 7 जै तू उन्नै उस ढाळ बिद्या करेगा जिस ढाळ पणमेशर के माणसा के खात्तर सही सै यो तू आच्छा करैगा 7 क्यूँके वे उस नाम के खात्तर लिक्ड़े सै, अर गैरजातां म्ह कीमे न्ही लेंदे 8 इस करके इसा का स्वागत करना चाहिए, जिस म्ह हम भी सच के पक्ष म्ह उसके साज्जी होवा।

### दियुत्रिफेस अर दियुत्रियुस

9 मन्नै कलीसिया ताही कीमे लिख्या था, पर दियुत्रिफेस जो उन म्ह बड्डा बनणा चाहवै सै, म्हारै ताहि न्ही आपणान्दा 10 इस करके जिब्व मैं आऊँगा तो, उसके काम जो वो करण लाग रह्या सै, उसनै समझाऊँगा, के वो म्हारे बारै म्ह भुंड़ी-भुंड़ी बात कहै सै; अर इस म्ह भी सब्र ना करके खुद ऐ भाईयाँ नै न्ही आपणान्दा, अर उन्नै भी जो अपणाना चाहवै सै नाट्टै सै अर कलीसिया तै लिकाड़ देवै सै 11 हे प्यारे, बुराई के न्ही पर भला करण आळे बणो 12 जो भलाई करै सै, वो पणमेशर की ओड़ तै सै; पर जो बुराई करै सै, उसनै पणमेशर ताही न्ही देख्या 12 दियुत्रियुस के बारै म्ह सारा नै, बल्के सच नै भी आप गवाही दी; अर हम भी गवाही देवा सां, अर तू जाणै सै के म्हारी गवाही साच्ची सै।

### आखरी अभिवादन

13 मन्नै तेरै ताहि भोत कीमे लिखना तो था, पर स्याही अर कलम तै लिखना न्ही चाहन्दा 14 पर मन्नै आश सै के तेरै तै ताळ्ळा ए मिलूँगा, फेर हम आम्ही-स्याम्ही बात करांगे 15 तन्नै शान्ति मिल्दी रहवै 15 उरै के मित्तर तेरै ताही नमस्कार कहै सै 15 ओड़े के मित्तरां तै नाम ले-ले के नमस्कार कह दिये।

## यहूदा

1 यहूदा की ओड़ तै जो यीशु मसीह का दास अर याकूब का भाई सै, उन बुलाए होड़ा कै नाम जो पणमेशर पिता म्ह प्यारे अर यीशु मसीह की रुखाळ म्ह सै। 2 2 दया अर शान्ति अर प्यार थमनै घणाए-घणा मिल्दा रहवै। 3 3 हे प्यारो, जिब्व मै थमनै उद्धार कै बाबत म्ह घणी मैहनत तै कोशिश कर रया था जिसम्ह हम सारे गेल्या हिस्सेदार सां, तो मन्ने थारतै न्यू समझाणा जरूरी जाण्या के उस बिश्वास कै खातर पूरी मैहनत करो जो पवित्र माणसा तै एके बै थमाया गया था। 4 4 क्यूँके कितने इसे माणस बोल-बाले म्हारतै आ मिले सै, जिनके इस सजा का खुलासा गुजरे बखतां म्ह पहल्या तै ए लिख्या गया सै: उनम्ह भगति नीं सै, अर म्हारे पणमेशर कै अनुग्रह नै लुचपण म्ह पलट दे सै, अर म्हारा एक्के मालिक अर प्रभु यीशु मसीह नै मानण तै नाट्टै सै। 5 5 पर जिब्वके थमनै सारी बात्तां का एकबै बेरा लागया सै, फेरभी मै थमनै इस बात की सोझी दुवाळें सूं के प्रभु नै एक कुन्बै तै मिस्र देश तै छुटाण कै पाछै बिश्वास ना करणीया का नास करया। 6 6 फेर जिन सुर्गदुत्तां नै आपणे होदैं ताही बणाए नीं राख्या बल्के आपणी खुद की बसासत छोड़ दी, उसनै उनतै भी करडैं दिन के न्याय खातर अन्धेरै म्ह, जो सारै बख्त कै खातर सै, कैद म्ह राख्या सै। 7 7 जिस तरिया सदोम अर अमोरा अर उनकै ओरै-धोरै के कस्बे, जो इनकै बराबर जार होंगे थे, अर परायी देही कै पाछै लागे थे, आग के अनन्त दण्ड म्ह पड़कै उदाहरण बणगे सै। 8 8 उस्से तरिया तै ये सपने देखणीये भी आपणी-आपणी देही नै अशुद्ध करै, अर प्रभु कै हक्क नै छोड्वा जाणै सै, अर ऊपरले ओदे आळयां नै भुंडा-आच्छा कहवै सै। 9 9 पर मुखिया सुर्गदुत मीकाईल नै जिब्व शैतान तै मूसा की लाश कै बाबत कह्या-सुणी करी, तो उसतै भुंडा-आच्छा कहकै खोट लाण की हिम्मत कोनी करी पर न्यू कह्या, “प्रभु तन्ने धमकावै।” 10 10 पर ये माणस जिन बात्तां नै कोणी जाणदें उन्नै भुंडा-आच्छा कहवै सै, अर जिन बात्तां नै बिना समझ के डांगर कै बराबर सुभा ए जाणै सै, उनम्ह अपणे-आप ताही नास करै सै। 11 11 उन पै हाय ! क्यूँके वे कैन की तरिया चाल चालै सै, अर मजदूरी कै खातर बिलाम की तरिया भुन्डे होंगे सै। कोरह की ढाळ बिरोध करकै नास हो गे सो। 12 12 ये थारी प्रेम की सभायां म्ह थारै गेल्या

खावै-पीवै सै, समुन्दर म्ह लुकी होए पत्थर के टिल्ले जिस्से सै, अर बिना खटकै के आपणा पेट भरण आळे रुखाळे सै, वे बिना पाणी के बादल सै, जिन्नै बाळ उड़ा ले जावै सै; पतझड़ के इसे पेड़ सै, जिनम्ह कदे फळ कोनी लाग्दे, जो दो बै मर लिये सै; अर जड़ तै उखड़ गे सै। 13 13 ये समुन्दर की तेज झाल के हिलोरे सै, जो आपणी शर्म का झाग उछालै सै; ये डाँवाडोल तारे सै, जिनके खातर सारी हाण ताही घणा अंधेरा धरया गया सै। 14 14 हनोक नै भी जो आदम तै सातवीं पीढ़ी म्ह था, इनके बाबत या भविष्यवाणी करी, “लखाओ, प्रभु आपणे लाक्खों पवित्र माणसा कै गेल्या आया 15 15 के सारया का न्याय करै, अर सारे बिना भगति करणीया नै उनके अभगति के सारे काम्मां कै बाबत जो उन्नै भगतिहीन होकै करे सै, अर उन सारी करडी बात्तां कै बाबत म्ह जो भगतिहीन पापियां नै उसकै बिरोध म्ह कही सै, दोषी ठहराए।” 16 16 ये तो बिना संतोषी, बड़बड़ाणआळे, अर आपणी मर्जिया कै मुताबिक चालणआळे सै, अर आपणे मुँह तै घमण्ड की बात बोळै सै, अर वे नफे कै खातर मुँह देख बड़ाई करै सै। 17 17 पर हे प्यारो, थम इन बात्तां नै याद राक्खो कै म्हारे प्रभु यीशु मसीह के प्रेरित पहल्याए कहगे सै। 18 18 वे थमनै कह्या करै थे, “के पाछले दिनां म्ह इसे मखोल करणीये होंगे जो आपणी आभगति की अभिलाषायां कै मुताबिक चालैंगे।” 19 19 ये वे सै जो फूट गेरै सै; ये देहीआळे माणस सै, जिनम्ह आत्मा कोनी। 20 20 पर हे प्यारो, थम आपणे घणे पवित्र बिश्वास म्ह बढ़ते जाओ अर पवित्र आत्मा तै प्रार्थना करदे होए, 21 21 खुद नै पणमेशर कै प्यार म्ह बणाए राक्खो; अर अनन्त जिन्दगी के खातर म्हारे प्रभु यीशु मसीह की दया की बाट देखदे रहो। 22 22 उन पै जो शक म्ह सै, दया करो; 23 23 अर घणखरयां नै आग म्ह तै झपटके लिकाड़ो; अर घणखरयां पै डर कै गेल्या दया करो, पर उस लत्ते तै भी नफरत करो जो देही कै गेल्या कलंकित हो गया सै। 24 24 इब जो थमनै ठोकर खाण तै बचा सकै सै, अर आपणी महिमा की भरपूरी कै श्यामी मग्न अर बिना खोट करकै खड़या कर सकै सै, 25 25 उस एकमात्र पणमेशर म्हारे उद्धारकर्ता की महिमा अर गौरव अर पराक्रम अर हक्क, म्हारे प्रभु यीशु मसीह के द्वारा जिसा पुराणे बख्त तै सै, इब भी हो अर युगानुयुग रहवै। आमीन।

## प्रकाशित वाक्य

1 यीशु मसीह का प्रकाशितवाक्य, जो उस तारीं पणमेशर नै इसकरकै दिया के अपने दास्सां नै ये बात, जिनका ताव्ळा होणा जरूरी सै, दिखावै; अर उसनै अपने सुर्गदुत तारीं खन्दाकै उसके जरिये अपने दास युहन्ना तारीं बताया, 2 जिसनै पणमेशर के बचन अर यीशु मसीह की गवाही, यानिके जो कीमे उसनै देख्या था उसकी गवाही देई। 3 धन्य सै ओ जो इस भविष्यवाणी के बचन नै पढ़ै सै, अर वे जो सुणें सैं अर इस म्ह लिक्खी होई बात्तां नै मान्ने सै, क्यूँके टैम लवै सै।

### सात्तु कलीसियायां का अभिवादन

4 युहन्ना की ओड़ तै आसिया की सात कलीसियायां के नाम: उसकी ओड़ तै जो सै अर जो था अर जो आण आळा सै; अर इन सात आत्मायां की ओड़ तै जो उसके सिंहासन कै श्यामी सैं, 5 अर यीशु मसीह की ओड़ तै जो बिश्वास जोग्गा साक्षी अर मरे होया म्ह तै जी उठण आळ्यां म्ह तै जेद्दा अर धरती के राजायां का हाकिम सै, थारै तारीं अनुग्रह ए शान्ति मिल्दी रहवै। ओ म्हारै तै प्रेम राखै सै, अर उसनै अपने लहू के जरिये म्हारै तारीं पाप तै छुटाया सै, 6 हमनै एक राज्य अर अपने पिता पणमेशर के खातर याजक भी बना दिया; उस्से की महिमा अर पराक्रम युगानुयुग रहवै। आमीन। 7 लखाओ, ओ बादळां कै गेल्या आण आळा सै, अर हरेक आँख उसनै देखैगी, बल्के जिन्नै उस तारीं बेध्या था वे भी उस तारीं देखैंगे, अर धरती के सारे कुल उसके कारण छात्ती पीटैंगे। हम्बै। आमीन। 8 प्रभु पणमेशर, ओ जो सै अर जो था अर जो आणआळा सै, जो सबतै ठाड्डा सै, न्यू कहवै सै, "मै अल्फा अर ओमेगा सूँ।"

### युहन्ना नै मसीह का दर्शन

9 मै युहन्ना, जो थारा भाई अर यीशु के क्लेश अर राज्य अर धीरज म्ह थारा गेल-साइझी सूँ, पणमेशर के बचन अर यीशु की गवाही के कारण पतमुस नाम कै टाप्पू म्ह था। 10 मै प्रभु के दिन आत्मा म्ह आ ग्या, अर अपने पाच्छै तुरही बरगा बड्डा शब्द न्यू कहन्दे सुणया, 11 "जो कीमे तू देखै सै उसनै किताब म्ह लिखके सात्तु कलीसियायां के धोरै खन्दा दे, यानिके इफिसुस, अर स्मुरना, अर पिरगमुन, अर थूआतीरा, अर सरदीस, अर फिलदिलफिया, अर लौदीकिया तारीं।"

12 फेर मन्ने उस तारीं, जो मेरै तै बोल्लण लागरया था, देखण कै खातर आपणा मुँह फेरया, अर पाच्छै घूमके मन्ने सोन्ने की सात दीवटें देखीं, 13 अर उन दीवटां कै बिच्चाळै माणस के बेट्टे कै बरगा एक आदमी देख्या, जो पायां तारीं का लत्ते पहरे, अर छात्ती पै सोन्ने का पटुका बाँधे होड़ था। 14 उसके सिर अर बाळ धोळी उन बल्के पाळे की ढाळ जम्मा धोळे थे, अर उसकी आँख आग की ज्वाला की ढाळ थीं। 15 अर उसके पैर सारया म्ह काम्मल पीतळ जिसे थे, इस ढाळ मान्ने जणु भट्टी म्ह तपाए होए हों; अर उसका बोल घणे पाणी के बोल कै बरगा था। 16 ओ अपने शोळे हाथ म्ह सात तारे लिए होड़ था, अर उसके मुँह म्ह तै चोक्खी दोधारी तलवार लिक्कै थी। उसका मुँह इस ढाळ बळै था, जिस ढाळ सूरज करडी धूप के टैम चमकै सै। 17 जिब्व मन्ने उस तारीं देख्या तो उसके पायां पै मुरद्या की ढाळ पड्य्या। उसनै मेरै पै आपणा शोळा हाथ, धरकै कह्या, "मतना डरै, मै पहल्डा अर आखरी अर जिन्दा सूँ; 18 मै मरग्या था, अर इब देख मै युगानुयुग जीऊँ सूँ; अर मौत अर पाताळ की तार्ली मेरै धोरै सैं। 19 इसकरकै जो बात तन्ने देखीं सैं अर जो बात होण लागरी सैं अर जो बात इसकै पाच्छै होणआळी सैं, उन

सारियां नै लिख ले। 20 अर्थात् उन सात तारयां का भेद जिन तारीं तन्ने मेरै सोळे हाथ म्ह देख्या था अर उन सोन्ने दिवटां का भेद वे सात तारे, सात्तु कलीसियायां के दूत सैं अर वे सात दीवट, सात कलीसियायां सैं।

### इफिसुस तारीं संदेश

2 इफिसुस की कलीसिया के दूत नै न्यू लिख : के, जो सात्तु तारे अपने शोळे हाथ म्ह लिए होड़ सैं, अर सोन्ने की सात्तु दीवटां कै बिच्चाळै हाँडै सैं, ओ न्यू कहवै सैं के, 2 मै तेरै काम, अर मैहनत, अर तेरा धीरज जाणु सूँ; अर न्यू भी, के बुरे माणसां नै तो देख सकै सैं; अर जो अपने आप नै प्रेरित कहवै सैं, अर सैं नीं, उन तारीं तन्ने परख कै झूठा पाया। 3 अर तू धीरज धरै सैं, अर मेरै नाम कै खातर दुःख ठान्दे-ठान्दे थक्या नीं। 4 पर मन्ने तेरै बिरोध म्ह न्यू कहणा सैं के तन्ने आपणा पहल्डा-सा प्रेम छोड़ दिया सैं। 5 इसकरकै सोद्वी म्ह आ, के तू कित तै गिरया सैं, अर मन फिरा अर पहल्या की ढाळ काम कर; अर जै तू मन नीं फिरावैगा, तो मै तेरै धोरै आकै तेरी दीवट नै उस जंगहा तै हटा दूँगा। 6 पर हम्बै, तेरै म्ह या बात तो सैं, के तू नीकुलइयां के काम्मां तै नफरत मान्ने सैं, जिन तै मै भी नफरत मानु सूँ। 7 जिस कै कान हों, ओ सुण लेवै के आत्मा कलीसियायां तै के कहवै सैं: जो जीत पावै, मै उस तारीं उस जीवन कै दरख्त म्ह तै जो पणमेशर के सुर्गलोक म्ह सैं, फळ खाण नै दूँगा।

### स्मुरना तारीं संदेश

8 अर स्मुरना की कलीसिया के दूत नै न्यू लिख : के, जो पहल्डा अर आखरी सैं; जो मर लिया था अर इब जिन्दा होग्या सैं, ओ न्यू कहवै सैं के, 9 "मै तेरै क्लेश अर गरीबी नै जाणु सूँ; (पर तू साहूकार सैं); अर जो माणस अपने आप तारीं यहूदी कहवै सैं अर सैं नीं, पर शैतान की पंचायत सैं, उनकी बुराई नै भी जाणु सूँ। 10 जो दुःख तन्ने झेळने होंगे, उन तै मत घबरा; क्यूँके देखो, शैतान थारै म्ह तै कितन्यां तारीं जेळखात्रै म्ह गेरण पै सैं ताके थम परखे जाओ; अर थारै तारीं दस दिन तारीं क्लेश ठाणा पडैगा: ज्यान देण तक बिश्वासी रह; तो मै तन्ने जीवन का मुकुट देऊँगा। 11 जिस के कान हों, ओ सुण ले के आत्मा कलीसियायां तै के कहवै सैं: जो जीत पावै, उस तारीं दूसरी मौत तै नुकसान कोनी पहोचैगी।

### पिरगमुन तारीं संदेश

12 अर पिरगमुन की कलीसिया के दूत नै न्यू लिख : के, जिसके धोरै दोधारी अर चोक्खी तलवार सैं, ओ न्यू कहवै सैं के, 13 मन्ने न्यू तो बेरा सैं, के तू ओड़ै रहवै सैं जित शैतान का सिंहासन सैं, अर मेरै नाम पै स्थिर रहवै सैं; अर मेरै पै बिश्वास करण तै उन दिनां म्ह भी पाच्छै नीं हट्या जिन म्ह मेरा बिश्वास जोग्गा गवाह अन्तिपास, तेरै म्ह उस जंगहा पै मारया गया जित शैतान रहवै सैं। 14 पर मन्ने तेरै खिलाफ कृष्ण बात कहणी सैं, क्यूँके तेरै उरै कितने तो इसे सैं, जो बिलाम की शिक्षा नै मान्ने सैं, जिसनै बालाक तारीं इसालियां कै श्यामी ठोकर कारण धरणा सिखाया, के वे मूरतां के बलिदान खावै, अर जारी करै। 15 उस्से तरियां-ए तेरै उरै कितने तो इसे सैं, जो नीकुलइयां की शिक्षा नै मान्ने सैं। 16 ज्यातै मन फिरा, नीं तो मै तेरै धोरै ताव्ळा ए आकै, अपने मुँह की तलवार तै उनकै गेल्या लडूँगा। 17 जिसके कान हों, ओ सुण लेवै के आत्मा कलीसियायां तै के कहवै सैं; जो जीत पावै, उस तारीं मै गुप्त-मन्ने म्ह तै दूँगा, अर उस तारीं एक धोळा पत्थर

भी हूँगा; अर उस पत्थर पै एक नाम लिख्या होया होगा, जिस ताहीं उसके पाण आळे कै सिवाय और कोए नीं जाणैगा।

### थुआतीरा ताहीं संदेश

18 अर थुआतीरा की कलीसिया के दूत नै न्यू लिख :

के, पणमेशर का बेड़ा जिस की आँख आग की ज्वाला की ढाळ, अर जिस के पैर सारया तै काम्मल पीत्तळ कै बरगे सैं, यो कहवै सैं के, 19 "मै तेरे काम्मां, अर प्रेम, अर बिश्वास, अर सेवा, अर धीरज नै जाणुं सूं, अर न्यू भी के तेरै पाच्छले काम पहलडया तै बढ कै सैं। 20 पर मन्त्रै तेरै खिलाफ न्यू कहणा सैं, के तू उस लुगाई इजेबेल नै रहण देवै सैं जो अपणे आप नै नबी कहवै सैं, अर मेरै दासां नै जारी करण, अर मूर्तियाँ कै श्यामी बलिदान खाण नै सिखाके भकावै सैं। 21 मन्त्रै उस ताहीं मन फिराण कै खातर मौक्का दिया, पर वा अपणे जारीपणे तै मन फिराणा कोनी चाहन्दी। 22 लखा, मै उस ताहीं खाट पै गेरु सूं; अर जो उसके गेल्या जारी करै सैं जै वे भी उसके बरगे काम्मां तै मन नीं फिरावैंगे तो उन्नै भारया क्लेश म्ह गेरूंगा। 23 अर मै उसके बाळकां नै मार हूँगा; अर फेर सारी कलीसिया नै बेरा पाट जावैगा के हृदय अर मन जाँचणआळा मै ए सूं; अर मै थारै म्ह तै हरेक नै उसके काम्मां कै मुताबिक बदला देऊँगा। 24 पर थम थुआतीरा के बाकी माणसां तै, जितने इस शिक्षा नै नीं मांदे, अर उन बात्तां नै जिन्नै शैतान की गहरी बात कहवै सैं नीं जाणदे, न्यू कहूँ सूं, के मै थारै पै और बोझ कोनी गेरूंगा। 25 पर हम्बै, जो थारै धोरै सैं उसनै मेरै आण तक थाम्बे रहो। 26 पर जो जीत पावै, अर मेरे काम्मां कै मुताबिक आखरी ताहीं करदा रहवै, मै उसनै जात-जात्तां के माणसां पै हक्क देऊँगा। 27 अर ओ लोहे का राजदण्ड लिये होड उन पै राज्य करैगा, जिस ढाळ कुम्हार के माट्टी के बासण चकणाचूर हो जावै सैं: जिस तरियां के मन्त्रै भी इसा ए हक्क अपणे बाप तै मिल्या सैं। 28 अर मै उसनै तडकै लिकडण आळा तारा देऊँगा। 29 जिसके कान हों, ओ सुण लेवै के आत्मा कलीसियायां तै के कहवै सैं।

### सरदीस ताहीं संदेश

3 अर सरदीस की कलीसिया के दूत नै लिख :

के, जिस कै धोरै पणमेशर की सात आत्मां अर सात तारे सैं, ओ न्यू कहवै सैं, के मै तेरे काम्मां नै जाणुं सूं, के तू जिन्दा तो कुहवै सैं, पर, सैं मरया होड। 2 जागू रह, अर उन चीज्जां ताहीं जो बची होड सैं, अर जो मिटण आळी थीं, उन्नै मजबूत कर; क्यूँके मन्त्रै तेरै किसे काम ताहीं अपणे पणमेशर कै लवै पूरा नीं पाया। 3 इस करके सोद्वी म्ह आ, के तन्नै किस तरियां तै शिक्षा पाई अर सुणी थी, अर उसम्ह बणया रह, अर मन फिरा: अर जै तू जागू नीं रहवैगा, तो मै चोर की ढाळ आ जाऊँगा अर तन्नै कद्वे भी नीं बेरा पाडूँगा, के मै किस टैम तेरै पै आण पडूँगा। 4 पर हम्बै, सरदीस म्ह तेरै उरै कीमे माणस इसे सैं, जिन्नै अपणे-अपणे लत्ते अशुद्ध कोन्या करे, वे धोळे लत्ते पहरे होड मेरे गेल हॉडेगें क्यूँके वे इस जोगे सैं। 5 जो जीत पावै, उस ताहीं इस्से ढाळ धोळे लत्ते पहरेण जावैंगे, अर मै उसका नाम जीवन की किताब म्ह तै किस्से तरियां तै भी नीं काडूँगा, पर उसका नाम अपणे पिता अर उसके सुर्गदुत्तां कै श्यामी मान ल्युँगा। 6 जिसके कान हों, ओ सुण ले के आत्मा कलीसियायां तै के कहवै सैं।

### फिलदिलफिया ताहीं संदेश

7 अर फिलदिलफिया की कलीसिया के दूत नै न्यू लिख :

के, जो पवित्र अर साच्चा सैं, अर जो दाऊद की ताळी लेरया सैं, जिस के खोल्ले होए नै कोए मूंद नीं सकदा अर मूंदे होए नै कोए खोल नीं सकदा, ओ न्यू कहवै सैं के, 8 मन्त्रै तेरे काम्मां का बेरा सैं, (लखा, मन्त्रै तेरै श्यामी एक दरवाजा खोल राख्या सैं, जिस नै कोए मूंद नीं सकदा) के तेरी सामर्थ माडी-सी सैं, अर तन्नै मेरै बचन ताहीं पुगाया सैं अर मेरै नाम तै कोनी मुकरया। 9 लखा, मै शैतान के उन पंचायत आळयां नै तेरै बस म्ह कर हूँगा, जो यहूदी बण बैट्टे सैं, पर सैं नीं, बल्के झूठ बोळें सैं लखा, मै इसा करूँगा, के वे आके तेरे पायां म्ह मुद्रे पडैंगे, अर न्यू जाण लेवैंगे, के मन्त्रै तेरै तै प्रेम राख्या सैं।

10 तन्नै मेरै धीरज कै बचन ताहीं थाम्बया सैं, ज्यांतै मै भी तन्नै हिम्तान के उस टैम बचा राखुंगा, जो धरती पै रहण आळयां कै परखण कै खातर साब्ली दुनिया पै आण आळा सैं। 11 मै ताच्चा ए आणआळा सूं: जो कीमे तेरै धोरै सैं, उसनै थाम्बे राख, के कोए तेरा ताज खोस नीं लेवै। 12 जो जीत पावै, उसम्ह अपणे पणमेशर कै मन्दर म्ह खम्बा बणाऊँगा; अर ओ फेर कदे बाहरण नीं लिकडूँगा; अर मै अपणे पणमेशर का नाम, अर अपणे पणमेशर के नगर, यानिके नये यरूशलेम का नाम, जो मेरै पणमेशर कै धोरै तै सुर्ग पै तै उतरण आळा सैं अर आपणा नया नाम उस पै लिखूँगा। 13 जिसके कान हों, सुण ले के आत्मा कलीसियायां तै के कहवै सैं।

### लौदिकिया ताहीं संदेश

14 अर लौदिकिया की कलीसिया के दूत नै न्यू लिख :

के, जो आमीन, अर बिश्वास जोगा, अर साच्चा गवाह सैं, अर पणमेशर की सृष्टि का खास कारण सैं, ओ न्यू कहवै सैं। 15 के मै तेरे काम्मां नै जाणुं सूं के तू ना तो शीळा सैं अर ना तात्ता; आच्छा होंदा के तू शीळा या तात्ता होंदा। 16 इसकरके के तू गुणगुणा सैं, अर ना शीळा अर ना तात्ता, मै तन्नै अपणे मुँह म्ह तै उगलणे पै सूं। 17 तू जो कहवै सैं, के मै साहूकार सूं, अर अमीर होग्या सूं, अर मन्त्रै किसे चीज का घाट्टा नीं, अर न्यू नीं जाणदा, के निरभाग अर नीच अर कंगाल अर आन्धा, अर उघाड़ा सैं। 18 इस करके मै तन्नै राय हूँ सूं, के आग म्ह ताया होड सोन्ना मेरै तै मोल ले, के तू साहूकार हो जावै; अर धोळा लत्ता ले- ले के पहर कै तन्नै अपणे उघाडेपण पै सम नीं आवै; अर आपणी आँखां म्ह लाण कै खातर सुरमा ले, के तू देखण लागै। 19 मै जिस-जिस तै प्रेम राखूँ सूं, उन सारया ताहीं उलाहना अर ताडना हूँ सूं, इस करके हिम्मत राख, अर मन फिरा। 20 लखा, मै दरवाजै पै खडया होया खटखटाऊँ सूं: जै कोए मेरा बोल सुणके दरवाजा खोल्लैगा, तो मै उसके धोरै भीतर आके उसके गेल्या खाणा खाऊँगा, अर ओ मेरै गेल्या। 21 जो जीत पावै, मै उस ताहीं अपणे गेल्या अपणे सिंहासन पै बिठाऊँगा, जिसा मै भी जीत पाके अपणे बाप कै गेल्या उसके सिंहासन पै बैठ गया। 22 जिसके कान हों, ओ सुण लेवै के आत्मा कलीसियायां तै के कहवै सैं।

### सुर्ग म्ह आराधना

4 इन बात्तां कै पाच्छै जो मन्त्रै निगांह करी, तो के देखूँ सूं, के सुर्ग म्ह एक दरवाजा खुल्या होया सैं; अर जिस ताहीं मन्त्रै तुरही कै शब्द तै अपणे गेल बात करदे सुणया था, ओए कहवै सैं, के उरै ऊपरान आ ज्या: अर मै वे बात तन्नै दिखाऊँगा, जिन का इन बात्तां कै पाच्छै पूरा होणा जरूरी सैं। 2 अर जिब्बे मै आत्मा म्ह आग्या; अर के देखूँ सूं, के एक सिंहासन सुर्ग म्ह धरया सैं, अर उस सिंहासन पै कोए बैठ्या सैं। 3 अर जो उस पै बैठ्या सैं, ओ यशब अर माणिक बरगा दिखाई देवै सैं, अर उस सिंहासन कै चौगरदे के मरकत बरगा एक बादळ-धनुष दिखाई देवै सैं। 4 अर उस सिंहासन कै चौगरदे कै चौबीस सिंहासन सैं; अर इन सिंहासनां पै चौबीस प्राचीन धोळे लत्ते पहरे होड बैट्टे सैं, अर उनके सीरयां पै सोन्ने के ताज सैं। 5 अर उस सिंहासन म्ह तै बिजळीयां अर गर्जन लिकडे सैं अर सिंहासन कै श्यामी आग के सात दिवें जळण लागरे सैं, ये पणमेशर की सात आत्माएं सैं। 6 अर उस सिंहासन कै श्यामी मान्नो बिलौर कै बरगा कौंच कै बरगा समुंदर सैं, सिंहासन कै बिच्चाळै अर सिंहासन कै चौगरदे कै चार प्राणी सैं, जिन कै आगै-पाच्छै आँखे-आँख सैं। 7 पहला प्राणी शेर कै बरगा सैं, अर दूसरा प्राणी का मुँह बाच्छडै कै बरगा सैं, तीसरे प्राणी का मुँह माणस कै बरगा सैं, अर चौथा प्राणी उडवे होड उकाब कै बरगा सैं। 8 अर च्यारु प्राणीयां कै छः-छः पाख सैं, चौगरदे नै अर भीतर आँखे-आँख सैं; अर वे दिन-रात बिना आराम करे न्यू कहवै सैं, के पवित्र, पवित्र, पवित्र प्रभु पणमेशर, सारया तै ठाड्डा, जो था, अर जो सैं, अर जो आण आळा सैं। 9 अर जिब्ब वे प्राणी उसकी जो सिंहासन पै बैठ्या सैं, अर जो युगानुयुग जीवै सैं, महिमा अर आदर अर धन्यवाद करैंगे। 10 फेर चौबीसों प्राचीन सिंहासन पै बैठण आळे कै श्यामी पड जावैंगे, अर उस ताहीं जो युगानुयुग जीवै सैं प्रणाम करैंगे; अर अपणे-अपणे ताज सिंहासन कै श्यामी न्यू कहन्दे होए धर देवैंगे।

11 "हे म्हारे प्रभु अर पणमेशर. तू-ए महिमा अर आदर अर सामर्थ के जोगा सै; क्यूँके तन्नै-ए सारी चिज्रां ताहीं बणाया अर वे तेरी-ए मर्जी तै थीं अर रची गई।"

### मुहरबन्द किताब अर मेम्ना

5 अर जो सिंहासन पै बैठ्या था, मन्नै उसके सोळें हाथ म्ह एक किताब देखी, जो भीत्तर अर बाहरण लिक्खी होइ भी, अर वा सात मोहर ला के भेड़ी गई थी। 2 फेर मन्नै एक ठाड्डे सुर्गदुत ताहीं देख्या जो ठाड्डे बोल तै न्यू प्रचार करै था के इस किताब के खोल्लण अर उसकी मोहर तोड़ण के जोगा कौण सै? 3 अर ना सुर्ग म्ह, ना धरती पै, ना धरती के तळें कोए उस किताब नै खोल्लण या उस पै निगांह गेरण के जोगा लिक्कड्या। 4 अर मै फूट-फूटके रोण लाग्या, क्यूँके उस किताब के खोल्लण, या उस पै निगांह करण के जोगा कोए नीं मिल्या। 5 फेर उन प्राचीनां म्ह तै एक नै मेरै तै कह्या, मतना रोवै; लखा, यहूदा के गोत्र का ओ शेर, जो दाऊद का मूल सै, उस किताब नै खोल्लण अर उसकी सात्तु मोहर तोड़ण के खातर जयवन्त होया सै। 6 अर मन्नै उस सिंहासन अर च्यारु प्राणीयां अर उन प्राचीनां के बिच्चाळें, मान्नो एक मारया होइ मेम्ना खड्या देख्या: उसके सात सींग अर सात आँखं थीं; ये पणमेशर की सात्तु आत्माएं सैं, जो साबती धरती पै खन्दाई गई सैं। 7 उसनै आके उसके सोळें हाथ तै जो सिंहासन पै बैठ्या था, वा किताब ले ली, 8 अर जिब्व उसनै किताब ले ली, तो वे च्यारु प्राणी अर चौबीसों प्राचीन उस मेम्नै के श्यामी पड़ गे; अर हरेक हाथ म्ह वीणा अर धूप तै भरे होइ सोन्ने के कटोरे थे, ये तो पवित्र माणसां की प्रार्थनाएं सैं। 9 अर वे यो नया गीत गाण लागे, के तू इस किताब के लेण, अर उसकी मोहरां नै खोल्लण जोगा सै; क्यूँके तन्नै मरके अपणे लहू तै हरेक कुल, अर भाषा, अर माणस, अर जात म्ह तै पणमेशर के खातर माणसां ताहीं मोल लिया सै। 10 अर उन ताहीं म्हारै पणमेशर के खातर एक राज्य अर याजक बणाया; अर वे धरती पै राज्य करै सैं।

11 अर जिब्व मन्नै देख्या, तो उस सिंहासन अर उन प्राणीयां अर उन प्राचीनां के चौगरदे के भोत-से सुर्गदुतां का बोल सुणया, जिनकी गिणती लाक्खां अर करोड़ों की थी। 12 अर वे ठाड्डे बोल तै कहवें थे, के मारया होया मेम्ना ए सामर्थ, अर धन, अर ज्ञान, अर ताकत, अर आदर, अर महिमा, अर धन्यवाद के जोगा सै। 13 फेर मन्नै सुर्ग म्ह, अर धरती पै, अर धरती के तळें, अर समुन्दर की सारी बणाई होइ चिज्रां नै, अर सारा कीमे ताहीं जो उन म्ह सै, न्यू कहन्दे सुणया, के जो सिंहासन पै बैठ्या सै, उसका, अर मेम्नै का धन्यवाद, अर आदर, अर महिमा, अर राज्य, युगानुयुग रहवै।" 14 अर च्यारु प्राणीयां नै आमीन कहा, अर प्राचीनां नै मुद्दा पड़ के प्रणाम करया।

### सात मोहरां का खोल्ल्या जाणा

6 फेर मन्नै देख्या, के मेम्नै नै उन सात्तु मोहरां म्ह तै एक ताहीं खोल्ल्या; अर उन च्यारु प्राणीयां म्ह तै एक का गर्जण जिसा शब्द सुणया, के आ। 2 अर मन्नै निगांह करी, अर देख्यो, एक धोळा घोड़ा सै, अर उसका सवार धनुष लिए होइ सै: अर ताहीं एक ताज दिया गया, अर ओ जीतदा होया लिक्कड्या के और भी जीत पावै।

3 अर जिब्व उसनै दूसरी मोहर खोल्ली, तो मन्नै दूसरै प्राणी ताहीं न्यू कहन्दे सुणया, के आ। 4 फेर एक और घोड़ा लिक्कड्या, जो लाल रंग का था; उसके सवार ताहीं यो हक्क दिया गया, के धरती पै तै मेल ठा ले, ताके माणस एक-दूसरै नै मारै; अर उस ताहीं एक बड्डी तलवार देई गई।

5 अर जिब्व उसनै तीसरी मोहर खोल्ली, तो मन्नै तीसरै प्राणी ताहीं न्यू कहन्दे सुणया, के आ: अर मन्नै निगांह करी, अर देख्यो, एक काळा घोड़ा सै; अर उसके सवार के हाथ म्ह एक ताखड़ा सै। 6 अर मन्नै उन च्यारु प्राणीयां के बिच्चाळें तै एक शब्द न्यू कहन्दे सुणया, के दीनार का सेर भर गिहूँ, अर दीनार का तीन सेर जौ, पर तेल अर दाखरस का नुकसान ना करिये।

7 अर जिब्व उसनै चौथी मोहर खोल्ली, तो मन्नै चौथे प्राणी का बोल न्यू कहन्दे सुणया, के आ। 8 अर मन्नै निगांह करी, अर देख्यो, एक पिळा-सा

घोड़ा सै; अर उसके सवार का नाम मौत सै: अर अधोलोक उसके पाच्छे-पाच्छे सै अर उन ताहीं धरती के चौथे हिस्से पै यो हक्क दिया गया, के तलवार, अर अकाल, अर मरी, अर धरती के बण-पशुवां के जरिये माणसां ताहीं मार देवै। 9 अर जिब्व उसनै पाँचवी मोहर खोल्ली, तो मन्नै वेदी के तळें उनके प्राणां ताहीं देख्या, जो पणमेशर के बचन के कारण, अर उस गवाही के कारण जो उन्नै देई थी, मारे गये थे। 10 अर उन्नै ठाड्डे बोल तै रुक्का मार के कह्या; हे मालिक, हे पवित्र, अर सत्य; तू कद ताहीं न्याय नीं करैगा? अर धरती के बासिन्द्यां तै म्हारै लहू का पल्टा कद ताहीं नीं लेवैगा? 11 अर उन म्ह तै हरेक ताहीं धोळा लत्ता दिया गया, अर उन तै कह्या गया, के और माडी-वार ताहीं आराम करो, जिब्व ताहीं के थारे संगी दास, अर भाई, जो थारी तरियां मरण आळे सैं, उनकी भी गिणती पूरी ना हो लेवै।

12 जिब्व उसनै छटी मोहर खोल्ली, तो मन्नै देख्या, के एक बड्डा हाल्लण होया; अर सूरज काम्बळ की ढाळ काळा, अर साब्ला चाँद लहू जिसा होग्या। 13 अर अकास के तारे धरती पै इस ढाळ पड़गे जिस तरियां आँधी तै हालके अंजीर के दरख्त म्ह तै काचे फळ झड़ें सैं। 14 अर अकास इस ढाळ डिग गया, जिस तरियां लपेटण तै डिग जावें सैं; अर हरेक पहाड़, अर टापू, आपणी-आपणी जंगहा तै टळ गया। 15 अर धरती के राजे, अर प्रधान, अर सरदार, अर साहूकार, अर सामर्थी माणस, अर हरेक गुलाम, अर हरेक आजाद, पहाड़ां की खोह म्ह, अर चट्टानां म्ह जा लुटके। 16 अर पहाड़ां, अर चट्टानां तै कहण लागे, के म्हारै पै पड़ जाओ; अर म्हारै ताहीं उसके मुँह तै जो सिंहासन पै बैठ्या सै अर मेम्नै के प्रकोप तै लटको ल्यो। 17 क्यूँके उनके प्रकोप का भयानक दिन आण पओच्या सै, इब कौण डट सकै सै?"

### इस्त्राएल के 1, 44, 000 लोग

7 इसके पाच्छे मन्नै धरती के च्यारु कुणयां पै च्यार सुर्गदुत खड़े देख्ये, वे धरती की च्यारु हवायां नै थाम्बे होइ थे ताके धरती, या समुन्दर, या किसे दरख्त पै, हवा नीं चाल्ले। 2 फेर मन्नै एक और सुर्गदुत ताहीं जिन्दे पणमेशर की मोहर लिए होइ पूरब तै ऊप्पर की ओइ आंदे देख्या; उसनै उन च्यारु सुर्गदुत्तां तै जिन ताहीं धरती अर समुन्दर का नुकसान करण का हक्क दिया गया था, ठाड्डे बोल तै रुक्का मारके कह्या। 3 जिब्व ताहीं हम अपणे पणमेशर के दासां के माथे पै मोहर नीं ला देवां, जद ताहीं धरती अर समुन्दर अर दरखतां ताहीं नुकसान ना पओचाईयो। 4 अर जिन पै मोहर देई गई, मन्नै उनकी गिणती सुणी, के इस्त्राएल की ऊलादां के सारे गोत्रां म्ह तै एक लाख चवाळीस हजार पै मोहर दी गई। 5 यहूदा के गोत्र म्ह तै बारहा हजार पै मोहर दी गई; रूबेन के गोत्र म्ह तै बारहा हजार पै; गाद के गोत्र म्ह तै बारहा हजार पै। 6 आशेर के गोत्र म्ह तै बारहा हजार पै; नपताली के गोत्र म्ह तै बारहा हजार पै; मन्शिशह के गोत्र म्ह तै बारहा हजार पै। 7 शमौन के गोत्र म्ह तै बारहा हजार पै; लेवी के गोत्र म्ह तै बारहा हजार पै; इस्साकार के गोत्र म्ह तै बारहा हजार पै। 8 जबूलून के गोत्र म्ह तै बारहा हजार पै; यूसुफ के गोत्र म्ह तै बारहा हजार पै अर बिन्यामीन के गोत्र म्ह तै बारहा हजार पै मोहर दी गई।

### एक बड्डी भीड़

9 इसके पाच्छे मन्नै निगांह करी, अर देख्यो, हरेक जात, अर कुल, अर माणस अर भाषा म्ह तै एक इसी बड्डी भीड़, जिस ताहीं कोए गिण नीं सकै था धोळा लत्ता पहरे, अर अपणे हाथां म्ह खजूर की डालीं लिए होए सिंहासन के श्यामी अर मेम्नै के श्यामी खड़ी सैं। 10 अर ठाड्डे बोल तै रुक्का मारके कहवें सैं, के उद्धार के खातर म्हारै पणमेशर का जो सिंहासन पै बैठ्या सै, अर मेम्नै की जै-जैकार होवै। 11 अर सारे सुर्गदुत, उस सिंहासन अर प्राचीनां अर च्यारु प्राणीयां के चौगरदे के खड़े सैं, फेर वे सिंहासन के श्यामी मुँह के बळ पड़गे; अर पणमेशर के आगे मुद्दे पड़के प्रणाम करके कह्या, आमीन। 12 म्हारै पणमेशर की बड़ाई, अर महिमा, अर ज्ञान, अर धन्यवाद, अर आदर, अर सामर्थ, अर ताकत युगानुयुग बणी रहवै। आमीन।

13 इस पै प्राचीनां म्ह तै एक नै मेरै तै कह्या; ये धोळे लत्ते पहरे होए कौण सैं? अर कित तै आये सैं? 14 ज्यातै मन्नै उसतै कह्या, "हे मालिक, तन्नै-ए

बेरा सैं।" उसनै मेरै तै कहया, "ये वे सैं, जो उस बड्डे कळेश म्ह तै लिकड़कै आये सैं; इन्नै आपणे-आपणे लत्ते मेमनै कै लहू म्ह धो कै धोळे करे सैं।

15 इस्से कारण वे पणमेशर कै सिंहासन कै श्यामी सैं, अर उसके मन्दर म्ह दिन-रात उस की सेवा करै सैं; अर जो सिंहासन पै बैठ्या सैं, ओ उनके ऊप्पर आपणा तम्बू ताणैगा। 16 वे फेर भूकखे अर तिसाए ना होंवेंगें: अर ना उन पै धूप, ना कोए तपन पडैगी। 17 क्यूँके मेम्ना जो सिंहासन कै बिचालै सैं उनकी रुखाळी करैगा, अर उन ताहीं जीवन रूपी पाणी के सोत्यां कै धोरै ले जाया करैगा; अर पणमेशर उसकी आँखां तै सारे आँसू पुंज देवैगा।

### सात्मीं मुहर अर सोत्रे का धूपदान

8 अर जिब्व उसनै सातमी मोहर खोली, तो सुर्ग म्ह आधे घंटे ताहीं सन्नाटा छा गया। 2 अर मन्त्रे उन सात्तु सुर्गदुत्तां ताहीं जो पणमेशर कै श्यामी खड़े रहवें सैं, देख्या, अर उन ताहीं सात तुरहियाँ दी गई।

3 फेर एक और सुर्गदुत सोत्रे का धूपदान लिए होड़ आया, अर वेदी कै लवै खड़या होया; अर उस ताहीं आब्ल धूप दिया गया, के सारे पवित्र माणसां की प्रार्थनायां कै गेल्या उस सोनहली वेदी पै जो सिंहासन कै श्यामी सैं चढ़ाए। 4 अर उस धूप का धुम्मा पवित्र माणसां की प्रार्थनायां सुदा सुर्गदूत कै हाथ तै पणमेशर कै श्यामी पहाच गया। 5 अर सुर्गदुत नै धूपदान ले कै उस म्ह वेदी की आग भरी, अर धरती पै गेर दी, अर गर्जन अर शब्द अर बिजळीयां अर हालण होण लाग्या।

### सात तुरहियाँ

6 अर वे सात्तु सुर्गदूत जिन कै धोरै सात तुरहियाँ थी, फुक्कण नै त्यार होए। 7 पहल्या सुर्गदूत नै तुरही फूक्री, अर लहू तै मिले होड़ ओळे अर आग पैदा होई, अर धरती पै गेरी गई; अर धरती का तीसरा हिस्सा जळ गया, अर दरखतां का तीसरा हिस्सा जळ गया, अर सारी हरी घास भी जळ गी।

8 अर दुसरै सुर्गदूत नै तुरही फूक्री, तो मान्रो आग जिसा जळदा होया एक बड्डा पहाड़ समुन्दर म्ह गेरया गया; अर समुन्दर का तीसरा हिस्सा लहू म्ह होग्या। 9 अर समुन्दर का तीसरा हिस्सा बणाई होड़ चीज जो जिन्दी थीं मर गी, अर जहाज का तीसरा हिस्से का नास होग्या।

10 अर तीसरै सुर्गदूत नै तुरही फूक्री, अर एक बड्डा तारा जो मशाल की ढाल जळै था, सुर्ग तै टूट्या, अर नदियां कै तीसरै हिस्से पै, अर पाणी के सोत्यां पै आण पड़या। 11 उस तारै का नाम नागदौना कुहवावै सैं, अर तीसरा हिस्से का पाणी नागदौना बरगा कड़वा होग्या, अर घण-खरे माणस उस पाणी कै कड़वे हो जाण तै मर गे।

12 अर चौथै सुर्गदूत नै तुरही फूक्री, अर सूरज का तीसरा हिस्सा, अर चाँद का तीसरा हिस्सा अर तारयां कै तीसरै हिस्से पै आपफत आई, उरै ताहीं के उनका तीसरा हिस्सा अन्धेरै म्ह डूब गया अर दिन कै तीसरै हिस्से म्ह चाँदणा नीं रहया, अर उससे तरिया ए रात म्ह भी।

13 जिब मन्त्रे फेर देख्या, तो अकास कै बिचालै एक उकाब ताहीं उड़दे अर ऊँचे शब्द तै न्यू कहुँदे सुणयां, "उन तीन सुर्गदुत्तां की तुरही के शब्दां के कारण, जिनका फूकणा इब्बे बाक्री सैं, धरती के बासिन्द्यां पै हाय, हाय।"

9 अर पाँचमै सुर्गदूत नै तुरही फूक्री, तो मन्त्रे सुर्ग तै धरती पै एक तारा पड़दा होड़ देख्या, अर उस ताहीं घणै गहरै कुण्ड की ताळी दी गई। 2 अर उसनै घणै गहरै कुण्ड ताहीं खोल्या, अर कुण्ड म्ह तै बड्डी भट्टी जिसा धुम्मा उठ्या, अर कुण्ड कै धुम्मे तै सूरज अर हवा पै अन्धेरा छा गया। 3 अर उस धुम्मे म्ह तै धरती पै टिड्डो लिकड़ी, अर उन ताहीं धरती के बिच्छुआ जीसी ताकत दी गई। 4 अर उन तै कहया गया, के ना धरती की घास ताहीं, ना किसे हरियाली ताहीं, ना किसे दरखत ताहीं नुकसान पहाचाओ, सिर्फ उन माणसां ताहीं जिनके माथे पै पणमेशर की मोहर नीं सैं। 5 अर उन ताहीं मार देण का तो नीं, पर पाँच महिन्यां ताहीं माणसां ताहीं दर्द देण का हक्क दिया गया; अर उन का दर्द इसा था, जिसा बिच्छु कै डंक मारण तै माणस का होवें सैं। 6 उन दिनां म्ह माणस मौत नै टोहवेंगें, अर पावें नीं गें; अर मरण की चाहन्ना करैगें, अर मौत उन तै भाजैगी।

7 अर उन टिड्डियां की शिक्क लड़ाई कै खातर त्यार करे होए घोड़यां कै जिसे थे, अर उनके सिरां पै मान्रो सोत्रे के ताज थे; अर उसके मुँह माणसां बरगे थे। 8 अर उनके बाळ लुगाईयां कै जिसे, अर दांद शेरों कै जिसे थे। 9 अर वे लोहवै जीसी झिलम पहररे थे, अर उनके पाखां का शब्द इसा था जिसा रथां अर भोत-से घोड़यां का जो लड़ाई म्ह भाजै सैं। 10 अर उनकी पून्जड़ बिच्छुआ जीसी थीं, अर उन म्ह डंक थे, अर उन ताहीं पाँच महिन्यां ताहीं माणसां ताहीं दुःख पहाचाण की जो सामर्थ थी, वा उनकी पून्जड़ां म्ह थी। 11 घणै गहरै कुण्ड का दूत उन पै राजा था, उसका नाम इब्रानी म्ह अबदोन, अर यूनानी म्ह अपुल्योन सैं।

12 पहली बिन्दा बीत ली, लखाओ इब इन कै पाचछै दो बिन्दा और होण आळी सैं। 13 अर जिब्व छटमै सुर्गदूत नै तुरही फूक्री तो जो सोत्रे की वेदी पणमेशर कै श्यामी सैं उसके सीन्गा म्ह तै मन्त्रे इसा शब्द सुणया। 14 मान्रो कोए छटमै सुर्गदूत तै जिस कै धोरै तुरही थी कहण लागरया सैं के उन च्यार सुर्गदूत्तां ताहीं जो बड्डी नदी फुरात कै धोरै बन्धे होड़ सैं, खोल दे। 15 अर वे च्यारू दूत खोल दिए गये जो उस घड़ी, अर दिन, अर महीत्रै, या साल कै खातर माणसां का तीसरा हिस्सा मारण खातर त्यार करे गये थे। 16 अर फौजां के सवारां की गिणती बीस करोड़ थी; मन्त्रे उनकी गिणती सुणी। 17 अर मन्त्रे इस दर्शन म्ह घोड़े अर उसके इसे सवार दिक्खे, जिनकी झिल्म आग, अर धूम्रकान्त, अर गन्धक जीसी थी, अर उन घोड़यां का सिर शेरों कै सिरां कै बरगे थे; अर उनके मुँह तै आग, अर धुम्मा, अर गन्धक लिकड़ै थी। 18 इन तीन्नु मरीयां तै; यानिके आग, अर धुम्मा, अर गन्धक तै जो उसके मुँह तै लिकड़ै थीं, तीसरै हिस्से के माणस मारे गये। 19 क्यूँके उन घोड़यां की ताकत उन कै मुँह, अर उनकी पुन्जड़ां म्ह थीं; ज्यांतै के उनकी पुन्जड़ साँपां जीसी थीं, अर उन पुन्जड़ां के सिर भी थे, अर इन्ने तै वे दर्द देवें थे। 20 अर बाकी माणसां नै जो उन मरीयां तै नीं मरे थे, अपणे हाथां के काम्मां तै मन नीं फिराया, के भूंडी औपरी आत्मायां की, अर सोत्रे अर चान्दी, अर पीत्तळ, अर पत्थर, अर काठ की मूर्तियाँ की पूजा ना करो, जो ना देख, ना सुण, ना चाल सकें सैं। 21 अर जो खून, अर टुणा, अर जारी, अर चोरी उन्नै करी थी, उनतै मन नीं फिराया।

### सुर्गदुत अर छोटी किताब

10 फेर मन्त्रे एक और टाड्डा सुर्गदूत ताहीं बादळ ओढ़े होड़ सुर्ग तै उतरदे देख्या, उसके सिर पै बादळ का धनुष था: अर उसका मुँह सूरज जिसा अर उसके पांव आग कै खम्बै कै बरगे थे। 2 अर उसके हाथ म्ह एक छोटी-सी खुली होड़ किताब थी; उसनै आपणा शोळा पांव समुन्दर पै, अर ओळा पांव धरती पै धरया। 3 अर इसी टाड्ड किलकी मारी, जिस ढाल शेर गरजै सैं; अर जिब्व ओ किलकी मारै था तां गर्जन के सात शब्द सुणाई दिए। 4 अर जिब्व सात्तु गर्जन के शब्द सुणाई दे लिए, तो मै लिखण पै था, अर मन्त्रे सुर्ग तै यो शब्द सुणया, के जो बात गर्जन के उन सात शब्दां तै सुणी सैं, उन्नै ल्हकोए राख, अर लिखै ना। 5 अर जिस सुर्गदूत ताहीं मन्त्रे समुन्दर अर धरती पै खड़े होड़ देख्या था; उसनै आपणा शोळा हाथ सुर्ग कै कात्री ठाया। 6 अर जो युगानुयुग जिन्दा रहवैगा, अर जिसनै सुर्ग ताहीं अर जो कीमे उस म्ह सैं, अर धरती ताहीं अर जो कीमे उस पै सैं, अर समुन्दर ताहीं अर जो कीमे उस म्ह सैं बणाया उससे की सूह खा कै बोल्या, "इब तो और वार नीं होगी।

7 बल्के सातमै सुर्गदूत के शब्द देण कै दिनां म्ह जिब्व ओ तुरही फूक्कण पै होगा, तो पणमेशर की ल्हकोई होड़ मनसां, उस सुसमाचार कै मुताबिक जो उसनै अपणे दास नब्बीयां ताहीं दी, पूरी होगी। 8 अर जिस शब्द करण आळै ताहीं मन्त्रे सुर्ग तै बोलदे सुणया था, ओ फेर मेरे गेल्या बात करण लाग्या; के जा, जो सुर्गदूत समुन्दर अर धरती पै खड़या सैं, उसके हाथ म्ह की खुली होड़ किताब ले लेवें। 9 अर मन्त्रे सुर्गदूत कै धोरै जा कै कहया, "या छोटी किताब मन्त्रे दे; अर उसनै मेरै तै कहया, "ले इसनै खा ले, अर या तेरा पेट कड़वा तो करैगी, पर तेरै मुँह म्ह शहद जीसी मिट्टी लागैगी।" 10 ज्यांतै मै वा छोटी किताब उस सुर्गदूत कै हाथ म्ह तै ले कै खा गया, वा मेरै मुँह म्ह शहद जीसी मिट्टी तो लागी, पर जिब्व मै उसनै खाग्या, तो मेरा पेट कड़वा

होग्या। 11 फेर मेरै तै न्यू कह्या गया, "तेरै ताहीं घण-ए माणसां, अर जात्तां, अर भाषायां अर राजायां के बारै म्ह दुबारा भविष्यबाणी करणी होगी।"

### दो गवाह

11 फेर मेरै ताहीं नापण के खातर एक सरकण्डा दिया, अर किसे नै कह्या, "उठ, पणमेशर के मन्दर अर वेदी, अर उसम्ह भजन करण आळ्यां ताहीं नाप ले। 2 अर मन्दर के बाहरण का आंगण छोड़ दे; उसनै मतना नाप, क्यूँके ओ गैर-जात्तां ताहीं दिया गया सै, अर वे पवित्र नगर ताहीं बियाळिस महीनै ताहीं रौंदैगी। 3 अर मै अपणे दो गवाहां ताहीं यो हक्क देऊँगा, के टाट ओढ़ होए एक हजार दो सौ साठ दिन ताहीं भविष्यबाणी करै।

4 ये वै ए जैतून के दो दरखत अर दो दिवे सैं जो धरती के प्रभु के श्यामी खड़े रहवैं सैं। 5 अर जै कोए उन ताहीं नुकसान पहाचावै सै, तो उनके मुँह तै आग लिक्क के उन के बैरियां ताहीं भष्म करैं सैं, अर जै कोए उन ताहीं नुकसान पहाचाणा चाहवैगा, तो जरूर इस्से ढाळ तै मारया जावैगा। 6 इन ताहीं हक्क सै, के अकास ताहीं मुन्दे, के उनकी भविष्यवाणी के दिनां म्ह मिह नीं बरसै, अर उन्नै सारै पाणी पै हक्क सै, के उस ताहीं लहू बणा देवें, अर जिब्व-जिब्व चाहवैं जद-जद धरती पै हरेक ढाळ की बिप्दा ल्यावैं। 7 अर जिब्व वे आपणी गवाही दे लेवेंगे, तो ओ पशु जो घणे गहरे कुण्ड म्ह तै लिक्कड़ेगा, उन तै लड़के उन ताहीं जितैगा अर मार देवैगा। 8 अर उनकी लाश उस बड़े नगर के चौक म्ह पड़ी रहवैगी, जो आत्मिक तौर तै सदोम अर मिस्र कुहवावै सैं, जित उन का प्रभु भी क्रूस पै चढ़ाया गया था। 9 अर सारे माणसां, अर कुलां, अर भाषायां, अर जात्तां म्ह तै लोग उनकी लाश साढ़े तीन दिन ताहीं देखदे रहवेंगे, अर उनकी लाश कब्र म्ह धरण नीं देवेंगे। 10 अर धरती के बासिन्दे, उनके मरण तै राज्जी अर मग्न होवेंगे, अर एक-दुसरै के धोरै तोपे खन्दावेंगे, क्यूँके इन दोनु नब्बियां नै धरती के बासिन्दयां ताहीं सताया था 11 अर साढ़े तीन दिन के पाच्छे पणमेशर के कात्री तै जीवन की आत्मा उन म्ह बड़गी; अर वे अपणे पायां के बळ खड़े होये, अर उनके देखण आळे डर गे। 12 अर उन्नै सुर्ग तै एक बड्डा बोल सुणाई दिया, के उरै ऊपरण आओ; न्यू सुण वे बादळ पै सवार होके अपणे बैरियां के देखदे-देखदे सुर्ग पै चढ़ गे। 13 फेर उस्से टैम एक बड्डा हाल्लण आया, अर नगर का दसमां हिस्सा पड़ गया; अर उस हाल्लण तै सात हजार माणस मरगे अर बचे होड़ डर गे, अर सुर्ग के पणमेशर की महिमा करी। 14 दूसरी बिप्दा बीत ली, लखाओ, देखओ, तीसरी बिप्दा ताळी आण आळी सै।

### साल्मीं तुरही

15 अर जिब्व सातमै दूत नै तुरही फूकी, तो सुर्ग म्ह इस बारै म्ह बड्डे-बड्डे शब्द होण लागे, के दुनिया का राज्य म्हारै प्रभु का, अर उसके मसीह का हो गया। 16 अर ओ युगानुयुग राज्य करैगा, अर चौबिसों प्राचीन जो पणमेशर के श्यामी अपणे-अपणे सिंहासन पै बैठे थे, मुँह के बळ मुद्दे पड़के पणमेशर की धोक मारके। 17 न्यू कहण लागे,

"के हे सारया म्ह ठाड़े प्रभु पणमेशर, जो सै, अर जो था, हम तेरा धन्यवाद करां सां, के तन्नै आपणी बड्डी सामर्थ काम म्ह ल्याके राज्य करया सै।

18 अर गैर-जात्तां नै खुन्दक आई, अर तेरा प्रकोप आण पड़या अर ओ टैम आण पहाच्या सै, के मरे होया का न्याय करया जावै, अर तेरे दास नब्बियां अर पवित्र माणसां ताहीं अर उन छोड़े-बड्डयां ताहीं जो तेरै नाम तै डरैं सैं, बदला दिया जावै, अर धरती के बिगाडण आळे नाश करे जावैं।

19 फेर पणमेशर का जो मन्दर सुर्ग म्ह सै ओ खोल्या गया, अर उसके मन्दर म्ह उसकी वाचा का सन्दूक दिख्या; अर बिजळियां अर शब्द अर गर्जन अर भूकम्प होए अर बड्डे ओळे पड़े।

### लुगाई अर अजगर

12 फेर सुर्ग पै एक बड्डा निशान दीख्या, यानिके एक लुगाई जो सूरज ओढ़े होड़ थी, अर चाँद उसके पायां के तळै था, अर उसके सिर पै बारहा तारयां का ताज था। 2 अर वा पेट तै होई, अर किलकी मारै थी;

क्यूँके जापे का दर्द उस ताहीं होण लाग्या था; अर वा बाळक जाम्मण के दर्द म्ह थी। 3 अर एक और निशान सुर्ग पै दीख्या, अर देखओ; एक बड्डा लाल अजगर था जिस के सात सिर अर दस सींग थे, अर उसके सिरां पै सात राजमुकुट थे। 4 अर उसकी पुन्जड़ नै अकास के तीसरै हिस्से के तारें खिंचके धरती पै गेर दिए, अर ओ अजगर उस लुगाई तै श्यामी जो जच्चा थी, खड़या होया, के जिब्व वा बाळक जणै तो उसके बाळक नै निंगळ जावै। 5 अर उसके छोरा होया जो लोहवै का दण्ड लिए होड़, सारी जात्तां पै राज करण पै था, अर उसका बाळक चाणचक पणमेशर के धोरै, अर उसके सिंहासन के धोरै ठा के पहाचा दिया गया। 6 अर वा लुगाई उस बण म्ह भाज गी, जित पणमेशर के कात्री तै उसके खातर एक जंगहा त्यार करी गई थी, के ओढ़े वा एक हजार दो सौ साठ दिन ताहीं पाळी जावै।

7 फेर सुर्ग पै रोळा होया, मीकाईल अर उसके सुर्गदुत अजगर तै लड़ण नै लिक्कड़े, अर अजगर अर उसके दूत उस तै लड़े। 8 पर हावी कोनी होए, अर सुर्ग म्ह उन के खातर फेर जंगहा कोनी रही। 9 अर ओ बड्डा अजगर यानिके ओए पुराणा सांप, जो इब्लीस अर शैतान कुहवावै सै, अर साबती दुनिया नै भकाण आळा सै, धरती पै गेर दिया गया; अर उसके दूत उसके गेल गेर दिए गए। 10 फेर मन्नै सुर्ग पै तै यो बड्डा शब्द आंदे होड़ सुणया, के इब म्हारै पणमेशर का उद्धार, अर सामर्थ, अर राज्य, अर उसके मसीह का हक्क दीख्या सै; क्यूँके म्हारै भाईयां पै तोहमन्द लाण आळा, जो दिन-रात म्हारै पणमेशर के श्यामी उन पै तोहमन्द लाया करै था, गेर दिया गया। 11 अर वे मेम्नै के लहू के कारण, अर आपणी गवाही के बचन के कारण, उस पै जीते, अर उन्नै अपणे जी ताहीं प्यारा नीं जाणया, उरै ताहीं के मौत भी सहन कर ली। 12 ज्यांतै, के स्वर्गो, अर उनके बासिन्दयां मग्न होओ; हे धरती, अर समुन्दर, धारै पै हाया! क्यूँके शैतान घणी खुन्दक के गेल्या थारै धोरै उतर आया सै; क्यूँके जाणै सै, के उसका माड़ा-ए टैम और बच रया सै।

13 अर जिब्व अजगर नै देख्या, के मै धरती पै गेर दिया गया सूं, तो उस लुगाई ताहीं जिन्नै बेड़ा पैदा करया था, काल करया। 14 अर उस लुगाई ताहीं बड्डे उकाब के दो पाख दिए गये, के सांप के श्यामी तै उड़ के बण म्ह उस जंगहा पहाच जावै, जित वा एक टैम, अर टैमां, अर आधे टैम ताहीं पाळी जावैं। 15 अर सांप नै उस लुगाई के पाच्छे अपणे मुँह तै नदी की तरियां पाणी बहाया, के उसनै नदी तै बहा दे। 16 पर धरती नै उस लुगाई की मदद करी, अर आपणा मुँह खोल के उस नदी ताहीं जो अजगर नै अपणे मुँह तै बहाई थी, पी लिया। 17 फेर अजगर नै लुगाई पै छोह करया, अर उसकी बाक्की ऊलाद तै, जो पणमेशर की आज्ञायां ताहीं मान्दे अर यीशु की गवाही देण पै स्थिर सै, लड़न नै गया। 18 अर ओ समुन्दर के बालू पै जा खड़या होया।

### दो पशु

13 अर मन्नै एक पशु ताहीं समुन्दर म्ह तै लिक्कड़े होड़ देख्या, जिसके दस सींग अर सात सिर थे; उसके सीन्नां पै दस राजमुकुट अर उसके सिरां पै पणमेशर की बुराई के नाम लिक्खे होड़ थे। 2 अर जो पशु मन्नै देख्या, ओ चित्तै के बरगा था; अर उसके पांव भालू जिसे, अर मुँह शेर के बरगा था; अर उस अजगर नै आपणी सामर्थ, अर आपणा सिंहासन, अर बड्डा हक्क, उस ताहीं दे दिया। 3 अर मन्नै उसके सिरां म्ह तै एक पै इसा भारया घाव लाग्या होड़ देख्या, मान्त्रो ओ मरण पै सै; फेर उसका जी लेण आळा घाव चंगा होग्या, अर साबती धरती के माणस उस पशु के पाच्छे-पाच्छे अचम्भा करदे होड़ चाले। 4 अर उन्नै अजगर की पूजा करी, क्यूँके उसनै पशु ताहीं आपणा हक्क दे दिया था अर न्यू कहके पशु की पूजा करी, के इस पशु के बरगा कौण सै?

5 कौण उस तै लड़ सकै सै अर बड्डे बोल बोल्ण अर बुराई करण के खातर उस ताहीं एक मुँह दिया गया, अर उस ताहीं बियाळीस महीनै ताहीं काम करण का हक्क दिया गया। 6 अर उसनै पणमेशर की बुराई करण के खातर मुँह खोल्या, के उसके नाम अर उसके तम्बू यानिके सुर्ग के बासिन्दयां की बुराई करै। 7 अर उस ताहीं न्यू हक्क दिया गया, के पवित्र माणसां तै लड़ै, अर उन पै जीत पावै, अर उस ताहीं हरेक कुल, अर माणस, अर भाषा, अर जात पै हक्क दिया गया। 8 अर धरती के वे सारे बासिन्दे जिन के नाम उस मेम्नै

की जीवन की किताब म्हा लिक्खे नीं गये, जो दुनिया के बनण के टैम तै मारया गया सै, उस पशु की पूजा करैगें। 9 जिसके कान हों ओ सुणै।

10 जिस ताहीं कैद म्हा पड़णा सै, ओ कैद म्हा पड़ैगा, जो तलवार तै मारैगा, जरूरी सै के ओ तलवार तै मारया जावैगा, पवित्र माणसां का धीरज अर बिश्वास इस्से म्हा सै।

11 फेर मन्त्रै एक और पशु ताहीं धरती म्हा तै लिक्डदे देख्या, उसके मेम्नै की ढाळ दो सींग थे; अर ओ अजरग की ढाळ बोझै था। 12 अर यो उस पहल्ले पशु का सारा हक्क उसके श्यामी काम ल्यावै था, अर धरती अर उसके बासिन्द्यां तै उस पहल्ले पशु की जिस का ज्यान तै मारण आळा घाव चंगा होया था, पूजा करै था। 13 अर ओ बड्डे-बड्डे निशान दिखावै था, उरै ताहीं के माणसां के श्यामी सुर्ग तै धरती पै आग बरसा देवै था। 14 अर उन निशानां के कारण जिन ताहीं उस पशु के श्यामी दिखाण का हक्क उस ताहीं दिया था; ओ धरती के बासिन्द्यां ताहीं इस तरियां भकावै था, के धरती के बासिन्द्यां तै कहवै था, के जिस पशु के तलवार लागरी थी, ओ जिन्दा होया सै, उसकी मूर्ति बनाओ। 15 अर उस ताहीं उस पशु की मूर्ति म्हा जी घालण का हक्क दिया गया, के पशु की मूर्ति बोलण लागै; अर जितने माणस उस पशु की मूर्ति की पूजा नीं करै, उन ताहीं मरवा देवै। 16 अर उसनै छोट्टे, बड्डे, साहूकार, कंगाल, आजाद, गुलाम सारया के शौळै हाथ या उन के माथै पै एक-एक छाप करा दी। 17 के उस ताहीं छोड़ जिस पै छाप यानिके उस पशु का नाम, या उसके नाम का अंक हो, अर कोए लेण-देण नीं कर सकै। 18 ज्ञान इस्से म्हा सै: जिसमह अक्क हो ओ इस पशु का अंक जोड़ ले, क्यूँके ओ माणस का अंक सै, अर उसका अंक छ: सौ छियासठ सै।

### मेम्ना अर उसके लोग

14 फेर मन्त्रै निगांह करी, ओ मेम्ना सिव्योन पहाड़ पै खड्या सै, अर उसके गेल्या एक लाख चौवाळीस हजार माणस सैं, जिन के माथै पै उसका अर उसके बाप का नाम लिख्या होड़ सै। 2 अर सुर्ग तै मन्त्रै एक इसा शब्द सुणाई दिया, जो पाणी की घणी धारायां अर बड्डे गर्जन जिसा शब्द था, अर जो शब्द मन्त्रै सुणया; ओ इसा था, मान्नो वीणा बजाण आळे वीणा बजान्दे हों। 3 अर वे सिंहासन के श्यामी अर च्यारू प्राणीयां अर प्राचीनां के श्यामी मान्नो, एक नया गीत गाण लागरे थे, अर उन एक लाख चौवाळीस हजार माणसां ताहीं छोड़ जो धरती पै तै मोल लिए गये थे, कोए ओ गीत नीं सिख सकै था। 4 ये वे सैं, जो लुगाईयां के गेल्या अशुद्ध नीं होए, पर कुवारे सैं: ये वे ए सैं, के जित किते मेम्ना जावै सैं, वे उसके पाच्छे हो लेवै सैं: ये तो पणमेशर के खातर पहल्या फळ होण के खातर माणसां म्हा तै मोल लिए गये सैं। 5 अर उनके मुँह तै झूठ नीं लिक्डया था, वे बेकसूर सैं।

### तीन सुर्गदुत

6 फेर मन्त्रै एक और सुर्गदुत ताहीं अकास के बिच्चाळे उड़दे होड़ देख्या जिस के धोरै धरती पै के बासिन्द्यां की हरेक जात, अर कुल, अर भाषा, अर माणसां ताहीं सुनाण के खातर घणा पुराणा सुसमाचार था। 7 अर उसनै ठाडू बोलके कहया, "पणमेशर तै डरो; अर उसकी महिमा करो; क्यूँके उसके न्याय करण का टैम आण पहोच्या सै, अर उसका भजन करो, जिसनै सुर्ग अर धरती अर समुन्द्र अर पाणी के सोत्ते बनाए। 8 फेर इसके पाच्छे एक और दूसरा सुर्गदुत न्यू कहन्दा होड़ आया, के पड़ग्या, ओ बड्डा बाबुल पड़ग्या जिस नै अपणी जारी की कोपमय दारू सारी जात्तां ताहीं पिलाई सैं। 9 फेर इनके पाच्छे एक और सुर्गदुत ठाडू बोल तै न्यू कहन्दा होड़ आया, के जो कोए उस पशु अर उसकी मूर्ति की पूजा करै, अर अपणे माथै या अपणे हाथ पै उसकी छाप ले। 10 तो ओ पणमेशर का प्रकोप की निरी दारू जो उसके खुन्दक के कटोरे म्हा घाली गई सैं, पीवैगा अर पवित्र सुर्गदुत्तां के श्यामी, अर मेम्नै के श्यामी आग अर गन्धक की पीड़ा म्हा पड़ैगा। 11 अर उनकी पीड़ा का धुम्मा युगानुयुग उठदा रहवैगा, अर जो उस पशु अर उसकी मूर्ति की पूजा करै सैं, अर जो उसके नाम की छाप लेवै सैं, उन ताहीं दिन-रात चैन नीं मिलैगा। 12 पवित्र माणसां का धीरज इस्से म्हा सैं, जो पणमेशर के हुक्मां नै मान्नै, अर यीशु पै बिश्वास राखै सैं। 13 फेर मन्त्रै सुर्ग तै यो शब्द सुणया, के

लिख; जो मुर्दे प्रभु म्हा मरै सैं, वे इब तै धन्य सैं, आत्मा कहवै सैं, हम्बै, क्यूँके वे अपणी मैहनतां तै आराम पावैगें, अर उनके काम उनके गेल्या हो लेवैगें।

### कटनी

14 अर मन्त्रै निगांह करी, अर देखो, एक उजळा बादळ सै, अर उस बादळ पै माणस के बेट्टे बरगा कोए बैठ्या सैं, जिसके सिर पै सोत्रे का ताज अर हाथ म्हा चोक्खी दराती सैं। 15 फेर एक और सुर्गदुत नै मन्दर म्हा तै लिक्डके, उस तै जो बादळ पै बैठ्या था, ठाडू बोल के रुक्का मारके कहया, "के आपणी दराती ल्याके लामणी कर, क्यूँके लामणी का टैम आण पहोच्या सैं, ज्यांतै के धरती की खेती पक ली सैं। 16 इस करके जो बादळ पै बैठ्या था, उसनै धरती पै आपणी दराती लाई, अर धरती की लामणी करी गई। 17 फेर एक और सुर्गदुत उस मन्दर म्हा तै लिक्डया, जो सुर्ग म्हा सैं, अर उसके धोरै भी चोक्खी दराती थी। 18 फेर एक और सुर्गदुत जिस ताहीं आग पै हक्क था, वेदी म्हा तै लिक्डया, अर जिसके धोरै चोक्खी दराती थी, उस तै ठाडू बोल के कहया, "आपणी चोक्खी दराती ल्याके धरती की दाख लता के गुच्छे काट ले; क्यूँके उसकी दाख पक ली सैं। 19 अर उस सुर्गदुत नै धरती पै आपणी दराती लाई, अर धरती की दाख लता का फळ काटके, अपणे पणमेशर के प्रकोप के बड्डे रस के कुण्ड म्हा घाल दिया। 20 अर नगर के बाहरण उस रसकुण्ड म्हा दाख रौंदे गये, अर रसकुण्ड म्हा तै इतना लहू लिक्डया के घोड़ा की लगामां ताहीं पहोच्या, अर सौ कोस ताहीं बह गया।

### आखरी आपतां के गेल सुर्गदुत

15 फेर मन्त्रै सुर्ग म्हा एक और बड्डा अर अनोक्खा निशान देख्या, यानिके सात सुर्गदुत जिन के धोरै सात्तु पाच्छेली बिप्दा थीं, क्यूँके उनके खत्म हो जाण पै पणमेशर के प्रकोप का अंत सैं। 2 फेर मन्त्रै आग तै मिल्या होड़ कांच के बरगा एक समुन्द्र देख्या, अर जो उस पशु पै, अर उस की मूर्ति पै, अर उसके नाम के अंक पै जिते होड़ थे, उन ताहीं उस कांच के समुन्द्र के लवै पणमेशर की वीणायां ताहीं लिए होड़ खड़े देख्या। 3 वे पणमेशर के दास मूसा का गीत, अर मेम्नै का गीत गा गाके कहवै थे, "हे सारया तै ठाडू प्रभु पणमेशर, तेरे काम महान, अर अनोक्खे सैं, हे युग-युग के राजा, तेरी चाल सई अर साच्ची सैं। 4 "हे प्रभु, कौण तेरै तै नीं डरैगा अर तेरै नाम की महिमा नीं करैगा? क्यूँके सिर्फ तू ए पवित्र सैं। सारी जात्तां आके तेरै श्यामी मुद्दे पडके प्रणाम करैगीं, क्यूँके तेरै न्याय के काम दिख गे सैं।"

5 अर इसके पाच्छे मन्त्रै देख्या, के सुर्ग म्हा गवाही के तम्बू का मन्दर खोल्या गया। 6 अर वे सात्तु सुर्गदुत जिन के धोरै सात्तु बिप्दा थीं, शुद्ध अर चमकदी होई मणि पहरे होड़ छाती पै सुनहरे परणे बांधे होड़ मन्दर तै लिक्डे। 7 अर उन च्यारू प्राणीयां म्हा तै एक नै उन सात सुर्गदुत्तां ताहीं पणमेशर के, जो युगानुयुग जीवै सैं, प्रकोप तै भरे होड़ सात सोत्रे के कटोरे दिए। 8 अर पणमेशर की महिमा अर उसकी सामर्थ के कारण मन्दर धुएँ तै भर गया, अर जिब तक उन सात्तु सुर्गदुत्तां की सात्तु बिप्दा खत्म नीं होई तब तक कोए मन्दर म्हा नीं जा सक्या।

### पणमेशर के प्रकोप के सात कटोरे

16 फेर मन्त्रै मन्दर म्हा किसे ताहीं ठाडू बोल तै उन सात्तु सुर्गदुत्तां तै न्यू कहन्दे सुणया के जाओ, पणमेशर के प्रकोप के सात्तु कटोरयां ताहीं धरती पै उंडेल दयों। 2 इस करके पहल्ले नै जाके आपणा कटोरा धरती पै उंडेल दिया। अर उन माणसां का जिन पै पशु की छाप थी, अर जो उसकी मूर्ति की पूजा करै थे, एक ढाळ का भूंडा अर दुःख देण आळा फोड़ा लिक्डया। 3 अर दुसरै नै आपणा कटोरा समुन्द्र पै उंडेल दिया अर ओ मरे होए का लहू बण गया, अर समुन्द्र म्हा का हरेक जी राखण आळा मर गया। 4 अर तीसरै नै आपणा कटोरा नदीयां, अर पाणी के सोत्तां पै उंडेल दिया, अर ओ लहू बणग्या। 5 अर मन्त्रै पाणी के सुर्गदुत ताहीं न्यू कहन्दे सुणया, के हे पवित्र, जो सैं, अर जो था, तू न्यायी सैं अर तन्नै यो न्याय करया। 6 क्यूँके उन्नै पवित्र माणसां, अर नब्बियां का लहू बहाया था, अर तन्नै उन ताहीं लहू



पिलाया; क्यूँके वे इस्से जोगे सैं। 7 फेर मन्त्रे वेदी तै यो शब्द सुणया, के हन्बै! हे सारया तै ठाड्डे प्रभु पणमेशर, तेरे फैसले सई अर साचे सैं।

8 अर चौथे नै आपणा कटोरा सूरज पै उंडेल दिया, अर उस ताहीं माणसां नै आग तै झुलसाण का हक्क दिया गया। 9 अर माणस घणी तपण तै झुलस गे, अर पणमेशर के नाम की जिस ताहीं इन मुसीबतां पै हक्क सैं, बुराई करी अर उसकी महिमा करण के खातर मन नीं फिराया। 10 अर पाँचमै नै आपणा कटोरा उस पशु के सिंहासन पै उंडेल दिया अर उसके राज्य पै अन्धेरा छाग्या; अर माणस दर्द के मारे आपणी-आपणी जीभ चबाण लागे। 11 अर अपणे दर्दा अर फोड़यां के कारण सुर्ग के पणमेशर की बुराई करी; अर अपणे-अपणे काम्मां तै मन नीं फिराया। 12 अर छटमै नै आपणा कटोरा बड्डी नदी फुरात पै उंडेल दिया अर उसका पाणी सूख गया के पूरब दिशा के राजायां के खातर राह तयार हो जावै। 13 अर मन्त्रे उस अजगर के मुँह म्ह तै, अर उस जिनौर के मुँह म्ह तै, अर उस झूठे नबी के मुँह म्ह तै तीन भूंडी औपरी आत्मायां ताहीं मँदकां की हुन्यार म्ह लिकड़दे देख्या। 14 ये निशान दिखाण आळी भूंडी औपरी आत्मा सैं, जो साबती दुनिया के राजायां के धोरै तै लिकड़ के ज्यांतै जावैं सैं, के उन ताहीं सारया तै ठाड्डे पणमेशर के उस बड्डे दिन की लड़ाई के खातर कट्टे करैं। 15 लखा, मै चोर की ढाळ आऊँ सूँ; धन्य ओ सैं, जो जागदा रहवै सैं, अर अपणे लत्तयां की चौकसी करै सैं, के उघाडा ना हाँडे, अर माणस उसका उघाडापण नीं देखै। 16 अर उन्नै उन ताहीं उस जंगहा कडा करया, जो इब्रानी म्ह हर-मगिदोन कुहवावै सैं।

17 अर सातमै नै आपणा कटोरा हवा पै उंडेल दिया, अर मन्दर के सिंहासन तै यो बड्डा शब्द होया, के, हो चुक्या। 18 फेर बिजलियां, अर शब्द, अर गर्जन होए, अर एक इसा बड्डा हाल्लण होया, के जिब्व तै माणस धरती पै बणाया गया, जद तै इसा बड्डा हाल्लण कदे नीं होया था। 19 अर उस बड्डे नगर के तीन टुकडे हो गे, अर जात-जात के नगर पड़ गे, अर बड्डा बाबुल की याद पणमेशर के उरै होई, के ओ अपणे छोह की जळण की दारु उसनै प्यावै। 20 अर हरेक टापू आपणी जगहा तै टळ ग्या; अर पहाडां का बेरा नीं पाट्या। 21 अकास तै माणसां पै मण-मण के बड्डे ओळे पड़े, अर इसकरके के या बिप्दा घणी-ए भारया थी, लोगां नै ओळयां की बिप्दा के कारण पणमेशर की बुराई करी।

### बड्डी बेश्या

17 अर जिन सात सुर्गदुत्तां के लवै वे सात कटोरे थे, उन म्ह तै एक नै आके मेरै तै न्यू कह्या के उराण आ, मै तन्नै उस बेश्या का दण्ड दिखाऊँ, जो घणै-ए पाणी पै बैड्डी सैं। 2 जिस के गेल्या धरती के राजायां नै जारी करी, अर धरती के बासिन्दे उसकी जारी की दारु तै गिरकाणे हो गे थे। 3 फेर ओ मन्त्रे आत्मा म्ह बण ताहीं ले ग्या, अर मन्त्रे किरिमजी रंग के पशु पै जो बुराई के नाम्मां तै लुक्या होड था अर जिस के सात सिर अर दस सींग थे, एक लुगाई ताहीं बैडे होड देख्या। 4 या लुगाई बैजनी, अर किरिमजी लत्ते पहर-री थी, अर सोत्रे अर घणी किम्मत आळे मणियां अर मोतियां तै सजी होड थी, अर उसके हाथां म्ह एक सोत्रे का कटोरा था जो नफरत के जोगी चिजां तै अर उसकी जारी की भुंडी चिजां तै भरया होड था। 5 अर उसके माथे पै यो नाम लिख्या था, भेद-बड्डा बाबुल धरती की बेश्यायां अर नफरत के जोगी चिजां की माँ। 6 अर मन्त्रे उस लुगाई ताहीं पवित्र माणसां के लहू अर यीशु के गवाहां के लहू पीण तै गिरकाणी देख्या अर उस ताहीं देख के मै हैरान होग्या।

7 उस सुर्गदुत नै मेरै तै कह्या, "तू क्यांतै हैरान होया? मै इस लुगाई, अर उस पशु का, जिस पै वा चढरी सैं, अर जिसके सात सिर अर दस सींग सैं, तेरै ताहीं भेद बताऊँ सूँ। 8 जो पशु तन्नै देख्या सैं, यो पहल्या तो था, पर इब नीं सैं, अर घणै गहरै कुण्ड तै लिकड़ के बरबादी म्ह पडैगा, अर धरती के बासिन्दे जिनके नाम दुनिया के बनण के टैम तै जीवन की किताब म्ह लिक्खे नीं गये, इस जिनौर की या हाल्लत देखके, के पहल्या था, अर इब नीं; अर फेर आ ज्यावैगा, अचम्भा करैंगे। 9 उस अक्क के खातर जिस म्ह ज्ञान सैं योए मौक्का सैं, वे साल्लु सिर सात पहाड सैं, जिन पै वा लुगाई बैड्डी सैं। 10 अर वे सात राजा भी सैं, पाँच तो हो लिये सैं, अर एक इब भी सैं; अर एक

इब ताहीं आया कोनी, अर जिब्व आवैगा, तो कीमे टैम ताहीं उसका रहणा भी जरूरी सैं। 11 अर जो जिनौर पहल्या था, अर इब नीं, ओ आप आठमां सैं; अर उन साल्लुआ म्ह तै पैदा होया, अर बरबादी म्ह पडैगा। 12 अर जो दस सींग तन्नै देखे वे दस राजे सैं; जिन्नै इब ताहीं राज्य नीं पाया; पर उस पशु के गेल्या घडी-भर के खातर राजायां बरगा हक्क पावैंगे। 13 ये सारे एक मन होवैंगे, वे आपणी-आपणी सामर्थ अर हक्क उस पशु ताहीं देवैंगे। 14 ये मेम्नै गेल लडैंगे, अर मेम्ना उन तै जीत जा गा; क्यूँके ओ प्रभुवां का प्रभु, अर राजायां का राजा सैं: अर जो बुलाए होड, अर छाँट होड, अर बिश्वासी उसके गेल सैं, वे भी जीत पावैंगे।

15 फेर उसनै मेरै तै कह्या, के जो पाणी तन्नै देख्या, जिन पै बेश्या बैड्डी सैं, वे माणस, अर भीड़ अर जात्तां, अर भाषा सैं। 16 अर जो दस सींग तन्नै देखे, वे अर पशु उस बेश्या तै बैर राखैंगे, अर उस ताहीं लाचार अर उघाडी कर देवैंगे; अर उसका मांस खा जावैंगे, अर उस ताहीं आग म्ह जळा देवैंगे। 17 क्यूँके पणमेशर उनके मन म्ह न्यू घाल्लैगा, के वे उसकी मनसा पूरी करै; अर जिब्व ताहीं पणमेशर के बचन पुरे नीं हो लेवै, जिद ताहीं एक मन हो के आपणा-आपणा राज्य पशु ताहीं दे दे। 18 वा लुगाई, जिसनै तू देखे सैं, ओ बड्डा नगर सैं जो धरती के राजायां पै राज करै सैं।"

### बेबीलोन का पतन

18 इसके बाद मन्त्रे एक सुर्गदुत ताहीं सुर्ग तै उतरदे देख्या, जिसके धोरै बड्डा हक्क था; अर धरती उसके तेज तै रौशन हो गी। 2 उसनै ठाड्डू बोल तै रुक्का मार के कह्या, के, पड़ग्या बड्डा बाबुल पड़ग्या सैं; अर भूंडी औपरी आत्मायां का घर, अर हरेक भूंडी आत्मा का अड्डा, अर एक भूंडा अर नफरत जोगा पंछी का अड्डा होग्या। 3 क्यूँके उसकी जारी की डरावणी दारु के कारण सारी जात पड़ग्यी सैं, अर धरती के राजायां नै उसके गेल्या जारी करी सैं; अर धरती के बिपारी उसके अश-आराम के आब्लपणे के कारण साहूकार होए सैं। 4 फेर मन्त्रे सुर्ग तै किसे और का बोल सुणया, के हे मेरे माणसो, उस म्ह तै लिकड़ आओ; के थम उसके पापां म्ह साइझी नीं होवो, अर उसकी मुसीबतां म्ह तै कोए थारै पै ना आण पडै। 5 क्यूँके उसके पाप सुर्ग ताहीं पहीच गे सैं, अर उसके अधर्म पणमेशर नै याद आये सैं। 6 जिसा उसनै थारै ताहीं दिया सैं, उससे तरियां ए उस ताहीं भी भर दयो, अर उसके काम्मां के मुताबिक उस ताहीं दो गुणा बदला दयो, जिस कटोरे म्ह उसनै भर दिया था उससे म्ह उसके खातर दो गुणा भर दयो। 7 जितनी उसनै आपणी बडाई करी अर अश-आराम करया; उतना उस ताहीं दर्द, अर दुःख दयो; क्यूँके वा अपणे मन म्ह कहवै सैं, मै राणी बण बैड्डी सूँ, बिधवा कोनी; अर दुःख म्ह कट्टे नीं पडैगी। 8 इस करके एक ए दिन म्ह उस पै बिप्दा आण पडैगी, यानिके मौत, अर दुःख, अर अकाल; अर वा आग म्ह भस्म कर दी जावैगी, क्यूँके उसका न्यायी प्रभु पणमेशर ठाड्डा सैं। 9 अर धरती के राजा जिन्नै उसके गेल्या जारी, अर अश-आराम करया, जिब्व उसके जळण का धुम्मा देखैंगे, तो उसके खातर रोवैंगे, अर छात्ती पीटैंगे। 10 अर उसके दर्द के डर के मारे दूर खडे होके कहवैंगे, हे बड्डे नगर, बाबुल! हे मजबूत नगर, हाय! हाय! घडी ए भर म्ह तन्नै दण्ड मिलग्या सैं।

11 अर धरती के बिपारी उसके खातर रोवैंगे अर कळपैंगे, क्यूँके इब कोए उनका माळ मोल कोन्या लेवैगा। 12 यानिके सोन्ना, चान्दी, रत्न, मोत्ती, अर मलमल, अर बैजनी, अर रेशमी, अर किरिमजी लत्ते, अर हरेक ढाळ का खशबुदार काठ-लाकड़ी, अर हाथी दांत की हरेक ढाळ की चीज, अर आब्ल मंहगा लाकड़ी-काठ, अर पीत्तळ, अर लोहयां, अर संगमरमर के सारे ढाळ के बरतन। 13 अर दालचीनी, मसाले, धूप, सेन्ट, लोबान, दारु, तेल, मैदा, गेहूँ, गऊँ, बैब्द, भेड, बकरियां, घोड़े, रथ, अर गुलाम, अर माणसां के प्राण। 14 इब तेरे मन भाण आळे फळ तेरै लवै तै जान्दे रहवैंगे; अर सुवाद अर भडकीली चीज तेरै तै दूर होई सैं, अर वे कट्टे भी नीं मिलैंगी। 15 इन चिजां के बिपारी जो उसके जरिये साहूकार हो गे थे, उसके दर्द के डर के मारे दूर खडे होंगे, अर रोदे अर कळपदे होड कहवैंगे, 16 "हाय! हाय! यो बड्डा नगर जो मलमल, अर बैजनी, अर किरिमजी लत्ते पहरै था, अर सोत्रे, अर रत्नां, अर मोत्तियां तै सज्या था, 17 घडी ए भर म्ह उसका इसा भारया धन नास होग्या;

अर हरेक मांझी, अर पाणी म्ह सफर करणीयां, अर मल्लाह किस्ती चलाणीए, अर जितने समुन्दर तै कमावै सैं, सारे दूर खड़े होए। 18 अर उसके जळण का धुम्मा देखे होए रुक्का मार कै कहवैगै, "कौण-सा नगर इस बड़े नगर कै बरगा सै?"

19 अर अपणे-अपणे सिरां पै धूळ गेरैगैं, अर रोंदे होड अर कळपदे होड किलकी मार-मारकै कहवैगैं, के, हाय! हाय! यो बड्डा नगर जिसकी सम्पत्ति कै जरिये समुन्दर के सारे जहाज आळे साहूकार हो गे थे घड़ी-ए भर म्ह उजड़ग्या। 20 हे सुर्ग, अर हे पवित्र माणसां, अर प्रेरितों, अर नब्बियों, उस पै खुशी मनाओ, क्यूँके पणमेशर नै न्याय करके उस तै थारा पलटा लिया सै। 21 फेर एक ठाड्डे सुर्गदुत नै बड्डी चाक्री कै पाट कै बरगा पत्थर ठाया, अर न्यू कहकै समुन्दर म्ह बगा दिया, के, बड्डा नगर बाबुल इस्से ढाळ घणी ताकत तै गिराया जावैगा, अर फेर कदे भी उसका बेरा नीं पाटैगा। 22 अर वीणा बजाण आळे, बजिनियों, अर अळगोजा बजाण आळ्यां, अर तुरही फूकण आळ्यां का शब्द फेर कदे भी तन्नै सुणाई नीं देवैगा, अर किसे कारीगरी का कोए कारीगर भी कदे भी तेरै तै नीं मिलैगा; अर चाक्री कै चालण का शब्द फेर कदे भी तन्नै नीं सुणैगा। 23 अर दिवै का चाँदणा फेर कदे भी तेरै पै नीं चमकैगा अर बंनडा-बंनडी का शब्द फेर कदे भी तन्नै सुणाई नीं देवैगा; क्यूँके तेरे बिपारी धरती के प्रधान थे, अर तेरे टूणै तै सारी जात भकाई गई थीं। 24 नब्बीयों अर पवित्र लोगों, अर धरती पै सारे घात करे हुआं का लहू उस्से म्ह पाया गया।"

19 इसकै बाद मन्नै सुर्ग म्ह मान्नो भीड़ ताहीं ठाड्डे बोल तै न्यू कहन्दे सुणया, के, हल्लिलूय्याह! उद्धार, अर महिमा, अर सामर्थ, म्हारै पणमेशर ए की सै। 2 क्यूँके उसके फैसले साचे अर सई सैं, ज्यांतै के उसनै उस बड्डी बेश्या का जो अपणी जारी तै धरती ताहीं बिगाडण लागरी थी, न्याय करया, अर उस तै अपणे दासां कै लहू का पलटा लिया सै। 3 फेर दूसरी बर उन्नै हल्लिलूय्याह कहया: अर उसके जळण का धुम्मा युगानुयुग उठदा रहवैगा। 4 अर चौबीसों प्राचीन अर च्यारू प्राणीयां नै पड़ के पणमेशर की धोक मारी; जो सिंहासन पै बैठ्या था, अर कहया, आमीन, हल्लिलूय्याह!

### मेम्नै का ब्याह

5 अर सिंहासन म्ह तै एक शब्द लिकड़या, के, हे म्हारे पणमेशर तै सारे डरण आळे दासों, के छोटेळे, के बडळे; थम सारे उसकी स्तुति जै-जैकार करो। 6 फेर मन्नै बड्डी भीड़ जिसा, अर घणै पाणी जिसा शब्द, अर गर्जनां बरगा भारया शब्द सुणया, के, हल्लिलूय्याह! ज्यांतै के, प्रभु म्हारा पणमेशर, सारया तै ठाड्डा राज्य करै सै। 7 आओ, हम आनन्दित अर मग्न होवां, अर उसकी जै-जै कार करां; क्यूँके मेम्नै का ब्याह आण पहीच्या: अर उसकी बिरबान्नी नै अपणे आप ताहीं त्यार कर लिया सै। 8 अर उस ताहीं शुद्ध अर चमकदार सुथरे मलमल नै पहरण का हक्क दिया गया, क्यूँके उस सुथरे मलमल का मतलब पवित्र माणसां के धर्म के काम सैं। 9 अर उसनै मेरै तै कहया; न्यू लिख, के, धन्य वे सैं, जो मेम्नै के ब्याह के जीमणै म्ह न्योदे गये सैं; फेर उसनै मेरै तै कहया, ये बचन पणमेशर के साच्ची बचन सैं। 10 अर मै उसकी धोक मारण कै खातर उसके पायां के म्ह पडग्या; उसनै मेरै तै कहया, "लखा, इसा मतना करै, मै तेरा अर तेरे भाईयां का जोड़ीदार दास सूं, जो यीशु की गवाही देण पै स्थिर सैं, पणमेशर ए की धोक मार; क्यूँके यीशु की गवाही भविष्यवाणी की आत्मा सै।

### धोळे घोड़े का सवार

11 फेर मन्नै सुर्ग ताहीं खुल्या होड देख्या; अर के देखूँ सूं के एक धोळा घोड़ा सै; अर उस पै एक सवार सै, जो बिश्वास जोग्गा, अर साच्चा कुहवावै सैं; अर ओ धर्म कै गेल न्याय अर लड़ाई करै सैं। 12 उसकी आँख आग की लपट सैं; अर उसके सिर पै आब्ल से राजमुकुट सैं; अर उस पै एक नाम लिख्या सै, जिस ताहीं उसनै छोड़ और कोए नीं जाणदा। 13 अर ओ लहू तै छिड़क्या होड बाणा पहरे सै: अर उसका नाम पणमेशर का बचन सै। 14 अर सुर्ग की फौज धोळे घोड़यां पै चढ़कै अर धोळा अर शुद्ध मलमल पहरे होड उसकै पाच्छै-पाच्छै सैं। 15 अर जात-जात नै मारण कै खातर उसके मुँह तै

एक चोक्खी तलवार लिकड़ै सैं, अर ओ लोहवै का राजदण्ड लिए होड उन पै राज करैगा, अर ओ सारया तै ठाड्डे पणमेशर के डरावणे प्रकोप की जलण की दारू के कुण्ड म्ह दाख रौंदैगा। 16 अर उसके लत्ते अर जांघ पै यो नाम लिख्या सै, राजाओं का राजा अर प्रभुओं का प्रभु। 17 फेर मन्नै एक सुर्गदुत ताहीं सूरज पै खड़े होड देख्या, अर उसनै ठाड्डे बोल तै रुक्का मार कै अकास कै बिचाळै तै उडण आळे सारे पंछीयां तै कहया, "आओ, पणमेशर की बड्डी बिपारी कै खातर कड़े हो जाओ। 18 जिस तै थम राजाओं का मांस, अर सरदारों का मांस, अर ठाड्डे माणसां का मांस, अर घोड़यां का, अर उनके सवारां का मांस, अर के, आजाद, के, गुलाम, के, छोटे, के, बड़े, सारे माणसां का मांस खाओ।"

19 फेर मन्नै उस पशु अर धरती के राजाओं अर उनकी फौजां ताहीं उस घोड़ै के सवार, अर उसकी फौज तै लडण कै खातर कड़े देख्या। 20 अर ओ पशु अर उसके गेल्या ओ झूठा नब्बी पकड़या गया, जिस नै उसके श्यामी इसे निशान दिखाए थे, जिन कै जरिये उसनै उन ताहीं भकाया, जिन्नै उस पशु की छाप ली थी, अर जो उस की मूर्ति की पूजा करै थे, ये दोनु जिन्दे जी उस आग की झील म्ह जो गन्धक तै जळै सैं, गेरे गये। 21 बाक्की लोग उस घोड़े की तलवार तै, जो उसके मुँह तै लिकड़ै थी, मार दिए गये; अर सारे पंछी उनके मांस तै छिक गे।

### हजार साल का राज्य

20 फेर मन्नै एक सुर्गदुत ताहीं सुर्ग तै उतरदे देख्या; जिस के हाथ म्ह घणै गहरे कुण्ड की ताळी, अर एक बड्डी बेल थी। 2 अर उसनै उस अजगर, यानिके पुराणै सांप ताहीं, जो इब्लीस अर शैतान सैं; पकड़के हजार साल कै खातर जुड़ दिया। 3 अर उस ताहीं घणै गहरे कुण्ड म्ह गेर कै मूंद दिया अर उस पै मोहर ला दी, के ओ हजार साल के पुरे होण ताहीं जात-जात के माणसां ताहीं दुबारा नीं भकावैगा; इसकै बाद जरूरी सैं, के माडी वार खातर दुबारा खोलया जावै। 4 फेर मन्नै सिंहासन देखे, अर उन पै माणस बैठ गे, अर उन ताहीं न्याय करण का हक्क दिया गया; अर उनकी आत्मायां ताहीं भी देख्या, जिनके सिर यीशु की गवाही देण अर पणमेशर के बचन कै कारण काटे गये थे; अर जिन्नै ना उस पशु की, अर ना उसकी मूर्ति की पूजा करी थी, अर ना उसकी छाप अपणे माथे अर हाथां पै ली थी; वे जिन्दे हो कै मसीह कै गेल्या हजार साल ताहीं राज करदे रें। 5 जिब्व ताहीं ये हजार साल पुरे नीं होए जिद ताहीं बाकी मरे होए नीं जिन्दे उठे; यो तो पहला मर कै जी उठणा सै। 6 धन्य अर पवित्र ओ सैं, जो इस पहलड़े दुबारा जी उठण का साइझी सैं, इस्यां पै दूसरी मौत का किम्मे भी हक्क नीं, पर वे पणमेशर अर मसीह के याजक होंगे, अर उसके गेल हजार साल ताहीं राज्य करैगैं।

### शैतान का बिनाश

7 अर जिब्व हजार साल पुरे हो लेंगे; तो शैतान कैद तै छोड़ दिया जावैगा। 8 अर उन जात्तां ताहीं जो धरती कै चोगरदे कै होंगी, यानिके गोग अर मगोग ताहीं जिनकी गिणती समुन्दर की बाळू कै बराबर होगी, भका कै लड़ाई कै खातर कड़े करण ताहीं लिकड़ैगा। 9 वे साबती धरती पै फैल जावैगी; अर पवित्र माणसां का अड्डा अर प्यारै नगर नै घेर लेवैगी; अर आग सुर्ग तै उतर कै उन ताहीं भस्म करैगी। 10 अर उनका भकाण आळा शैतान आग अर गन्धक की उस झील म्ह, जिस म्ह ओ पशु अर झूठा नब्बी भी होगा, गेर दिया जावैगा, अर वे दिन-रात युगानुयुग दर्द तै तडपदे रहवैगैं।

### बड्डा सफेद सिंहासन अर आखरी न्याय

11 फेर मन्नै एक बड्डा धोळा सिंहासन अर उस ताहीं जो उस पै बैठ्या होड सैं, देख्या, जिसकै श्यामी तै धरती अर अकास भाज गे, अर उन कै खातर जंगहा नीं मिली। 12 फेर मन्नै छोटे-बड़े सारे मरे होया ताहीं सिंहासन कै श्यामी खड़े होड देख्या, अर किताब खोली गई; अर फेर एक और किताब खोली गई; यानिके जीवन की किताब: जिस ढाळ उन किताबां म्ह लिख्या होड था, उनके काम्मां कै मुताबिक मरे होया का न्याय करया गया। 13 अर

समुन्द्र नै उन मरे होया ताहीं जो उस म्ह थे, दे दिया, अर मौत अर अधोलोक नै उन मरे होया ताहीं जो उन म्ह थे, दे दिया; अर उन म्ह तै हरेक के काम्मां के मुताबिक उनका न्याय करया गया।<sup>14</sup> अर मौत अर अधोलोक भी आग की झील म्ह गेरे गये; या आग की झील तो दूसरी मौत सै।<sup>15</sup> अर जिस किसे का नाम जीवन की किताब म्ह लिख्या होया ना मिल्या, ओ आग की झील म्ह गेरया गया।

### नया अकास अर नयी धरती

**21** फेर मन्त्रे नये अकास अर नयी धरती ताहीं देख्या, क्यूँके पहला अकास अर पहली धरती जा ली थी, अर समुन्द्र भी नीं रहया।<sup>2</sup> फेर मन्त्रे पवित्र नगरी नये यरुशलम ताहीं सुर्ग पै तै पणमेशर के धोरै तै उतरदे देख्या, अर वा उस बनड़ी के बरगी थी, जो अपणे धणी के खातर सिंगार कर री हो।<sup>3</sup> फेर मन्त्रे सिंहासन म्ह तै किसे ताहीं ठाडु बोल तै न्यू कहन्दे सुणया, के, लखा, पणमेशर का डेरा माणसां के बिचाळे सै; ओ उनके गेल्या डेरा करैगा, अर वे उसके माणस होंगे, अर पणमेशर आप उन के गेल्या रहवैगा; अर उनका पणमेशर होगा।<sup>4</sup> अर ओ उनकी आँखां तै सारे आंसू पूंज देवैगा; अर इसके बाद मौत नीं रहवैगी, अर न दुःख, अर बिलाप, न दर्द रहवैगा; पहलड़ी बात जान्दी रही।

<sup>5</sup> अर जो सिंहासन पै बैठ्या था, उसनै कहया, के लखा, मै सारा कीमे नया कर दूँगा; फेर उसनै कहया, के लिख ले, क्यूँके ये बचन बिश्वास के जोगे अर साच्ची सै।<sup>6</sup> फेर उसनै मेरै तै कहया, "ये बात पूरी हो गी सै, मै अलफा अर ओमिगा, आदि अर अन्त सूं: मै तिसाए ताहीं जीवन के पाणी के सोते म्ह तै मुफ्त म्ह पिलाऊँगा।<sup>7</sup> जो जीत पावै, ओए इन चीजां का वारिस होगा; अर मै उसका पणमेशर होऊँगा, अर ओ मेरा बेट्टा होगा।<sup>8</sup> पर डरपोकां, अर अबिश्वासियां, अर घिनौनों, अर हत्यारां, अर जारां, अर टूणे करणीयां, अर मूर्ति पूजणीयां, अर सारे झूठयां का भाग उस झील म्ह मिलेगा, जो आग अर गन्धक तै जळदी रहवै सै: या दूसरी मौत सै।"

### नया यरुशलम

<sup>9</sup> फेर जिन सात सुर्गदुत के धोरै सात पाच्छली मुसीबतां तै भरे होड़ कटोरे थे, उन म्ह तै एक मेरै धोरै आया, अर मेरै गेल्या बात करके कहया, "उरान आ: मै तन्त्रे बनड़ी यानिके मेम्ने की बीरबान्नी दिखाऊँगा।"<sup>10</sup> अर ओ मन्त्रे आत्मा म्ह, एक बड्डे अर ऊंचे पहाड़ पै ले गया, अर पवित्र नगरी यरुशलम ताहीं सुर्ग पै तै पणमेशर के धोरै उतरदे दिखाया।<sup>11</sup> पणमेशर की महिमा उस म्ह थी, अर उसका चाँदणा भोत-ए घणे मंहगे पत्थर, यानिके बिलौर के बरगा यशब की ढाळ सुथरा था।<sup>12</sup> अर उसकी भीत घणी ऊँची थी, अर उसके बारहा फाटक अर फाटकां पै बारहा सुर्गदुत थे; अर उन पै इस्राएलियां के बारहा गोत्रां के नाम लिक्खे थे।<sup>13</sup> पूरब के कान तीन फाटक, उत्तर के कान तीन फाटक, दक्खिन के कान तीन फाटक, अर पश्चिम के कान तीन फाटक थे।<sup>14</sup> अर नगर की भीत की बारहा नेवें थीं, अर उन पै मेम्ने के बारहा प्रेरितां के बारहा नाम लिक्खे होड़ थे।<sup>15</sup> अर जो मेरै गेल्या बात करण लागरया था, उसके धोरै नगर, अर उसके फाटकां अर उसकी भीत ताहीं नाप्पण के खातर एक सोत्रे का गज था।<sup>16</sup> अर ओ नगर चौकोर बस्या होड़ था अर उसकी लम्बाई चुड़ाई के बराबर थी, अर उसनै उस गज तै नगर ताहीं नाप्या, तो साढ़े सात सौ कोस का लिक्खया: उसकी लम्बाई, अर चुड़ाई, अर ऊँचाई बराबर थी।<sup>17</sup> अर उसनै उसकी भीत ताहीं माणस के, यानिके सुर्गदुत के नाप तै नाप्या, तो एक सौ चुवाळिस हाथ लिक्खी।<sup>18</sup> अर उसकी भीत की जुड़ाई यशब की थी, अर नगर इसे चोक्खे सोत्रे का था, जो सुथरे काँच के जिसा हो।<sup>19</sup> अर उस नगर की नेवें हरेक ढाळ के घणे मंहगे पत्थरां तै संवारी होड़ थीं, पहलड़ी नेव यशब की थी, दूसरी नीलमणि की, तीसरी लालड़ी की, चौथी मरकत की।<sup>20</sup> पाँचमी गोमेदक की, छठी माणिक्य की, सातमी पीतमणि की, आठमी पेरोज की, नौम्मी पुखराज की, दसमी लहसनिए की, ग्यारमी धूम्रकान्त की, बाहरमी याकूत की।<sup>21</sup> अर बारहाँ फाटक, बारहा मोतियाँ के थे; एक-एक फाटक, एक-एक मोत्ती का

बणया होड़ था; अर नगर की सड़क साफ-सुथरे काँच के जिसे चोक्खे सोत्रे की थी।

<sup>22</sup> अर मन्त्रे उस म्ह कोए मन्दर नीं देख्या, क्यूँके सारया तै ठाड्डा प्रभु पणमेशर, अर मेम्ना उसका मन्दर सै।<sup>23</sup> अर उस नगर म्ह सूरज अर चाँद के चाँदणे की आंट नीं, क्यूँके पणमेशर के तेज तै उस म्ह चाँदणा हो रया सै, अर मेम्ना उसका दिवा सै।<sup>24</sup> अर जात-जात के माणस उसके चाँदणे म्ह चाल्लै-फिरैंगे, अर धरती के राजा अपणे-अपणे तेज का सामान उस म्ह ल्यावैंगे।<sup>25</sup> अर उसके फाटक दिन नै कद्वे भी नीं मूंदे जावैंगे, अर ओड़ै रात नीं होगी।<sup>26</sup> अर माणस जात-जात के तेज अर टाट-बाट का सौद्धा उस म्ह ल्यावैंगे।<sup>27</sup> पर उसम्ह कोए अपवित्र चीज, या नफरत आळा काम करण आळा, या झूठ का गढनआळा किस्से भी तरियां तै बडन नीं पावैगा, पर सिर्फ वे लोग जिनके नाम मेम्ने के जीवन की किताब म्ह लिक्खे सै।

**22** फेर उसनै मेरै ताहीं बिलौर बरगी झलकदी होड़, जीवन के पाणी की एक नदी दिखाई, जो पणमेशर अर मेम्ने के सिंहासन तै लिक्खे उस नगर की सड़क के बिचाळे बहवै थी।<sup>2</sup> अर नदी के इस पार; अर उस पार, जीवन का दरख्त था; उस म्ह बारहा ढाळ के फळ लागै थे, अर ओ हरेक महिन्ने फळ ल्यावै था; अर उस दरख्त के पत्त्यां तै जात-जात के माणस चंगे होवै थे।<sup>3</sup> अर फेर श्राप नीं होगा अर पणमेशर अर मेम्ने का सिंहासन उस नगर म्ह होगा, अर उसके दास उसकी सेवा करैंगे।<sup>4</sup> अर उसका मुँह देखैंगे, अर उसका नाम उनके माथ्यां पै लिक्खया होया होगा।<sup>5</sup> अर फेर रात नीं होगी, अर उन ताहीं दिवै अर सूरज के चाँदणे की जरूत नीं होगी, क्यूँके प्रभु पणमेशर उन ताहीं चाँदणा देवैगा; अर वे युगानुयुग राज करैंगे।

### यीशु का दुबारा आणा

<sup>6</sup> फेर उसनै मेरै तै कहया, "ये बात बिश्वास के जोगी, अर साच्ची सै, अर प्रभु नै जो नब्बियाँ की आत्मायां का पणमेशर सै, अपणे सुर्गदुत ताहीं ज्यांतै खन्दाया, के अपणे दासां ताहीं वे बात जिनका ताळ्ळा पूरा होणा जरूरी सै दिखाए।<sup>7</sup> लखा, मै ताळ्ळा आण आळा सूं; धन्य सै ओ, जो इस किताब की भविष्यवाणी की बात्तां नै मानै सै।<sup>8</sup> मै ओए युहन्ना सूं, जो ये बात सुणै, अर देखै था; अर जिब्ब मन्त्रे सुणया, अर देख्या, तो जो सुर्गदुत मन्त्रे ये बात दिखावै था, मै उसके पायां म्ह प्रणाम करण के खातर मुद्दा पड्यया।<sup>9</sup> अर उसनै मेरै तै कहया, "लखा, इस ढाळ मतना करै; क्यूँके मै तेरा अर तेरे भाई नब्बियाँ अर इस किताब की बात्तां के मानण आळ्या का जोडीदार दास सूं; पणमेशर ए की धोक मार।"<sup>10</sup> फेर उसनै मेरै तै कहया, "इस किताब की भविष्यवाणी की बात्तां ताहीं बन्द मतना करै; क्यूँके टैम लवै सै।<sup>11</sup> जो जुल्म करै सै, ओ जुल्म ए करदा रहवै; अर जो भूंडा सै, ओ भूंडा बणया रहवै; अर जो धर्मी सै, ओ धर्मी बणया रहवै; अर जो पवित्र सै, ओ पवित्र बणया रहवै।<sup>12</sup> लखा, मै ताळ्ळा आण आळा सूं; अर हरेक के काम के मुताबिक बदला देण के खातर प्रतिफळ मेरै धोरै सै।<sup>13</sup> मै अलफा अर ओमेगा, पहलड़ा अर पाच्छला, आदि अर अन्त सूं।

<sup>14</sup> धन्य वे सै, जो अपणे लत्ते धो लेवै सै, क्यूँके उन ताहीं जीवन के दरख्त के लोवै आण का हक्क मिलेगा, अर वे फाटकां तै हो के नगर म्ह बडैंगे।<sup>15</sup> पर कुत्ते, अर टूणा करणीयें, अर जार, अर हत्यारे अर मूर्ति पूजणीया, अर हरेक झूठ का चाहण आळा, अर गढण आळा बाहरण रहवैगा।<sup>16</sup> मुझ यीशु नै अपणे सुर्गदुत ताहीं ज्यांतै खन्दाया, के थारै आगै कलीसियायां के बारै म्ह इन बात्तां की गवाही दे; मै दाऊद का मूल, अर बंश, अर भोर का चमकदा होड़ तारा सूं।<sup>17</sup> 1 अर आत्मा, अर बनड़ी दोत्रु कहवै सै, आ; अर सुनण आळा भी कहवै, के आ; अर जो तिसाया हो, ओ आवै अर जो कोए चाहवै ओ जीवन का पाणी मुफ्त म्ह ले।

### उपसंहार

<sup>18</sup> मै हरेक ताहीं जो इस किताब की भविष्यवाणी की बात सुणै सै, गवाही दूँ सूं, के जै कोए माणस इन बात्तां म्ह कीमे बधावै, तो पणमेशर उन मुसीबतां ताहीं जो इस किताब म्ह लिक्खी सै, उस पै बढ़ावैगा।<sup>19</sup> अर जै

कोए इस भविष्यवाणी की किताब की बात्तां म्ह तै कीमे लिकाडै, तो पणमेशर उस जीवन के दरख्त अर पवित्र नगर म्ह तै जिस का जिक्रा इस किताब म्ह सै, उसका हिस्सा लिकाड देवैगा | <sup>20</sup> जो इन बात्तां की गवाही

देवै सै, ओ न्यू कहवै सै, हम्बै, मै ताव्ळा आण आळा सूं; आमीन | ये प्रभु यीशु आ | " <sup>21</sup> प्रभु यीशु का अनुग्रह पवित्र लोगों कै गेल रहवै | आमीन |